







Gonsalvus Trenner

1797

55097/13

43571
PSYCHOLOGIA
EMPIRICA,
METHODO SCIENTIFICA
PERTRACTATA,

QUA EA, QUÆ

DE ANIMA HUMANA
INDUBIA EXPERIENTIÆ FIDE
CONSTANT, CONTINENTUR
ET

AD SOLIDAM UNIVERSÆ
PHILOSOPHIÆ PRACTICÆ
AC THEOLOGIÆ NATURALIS TRACTATIONEM
VIA STERNITUR.

AUTORE

CHRISTIANO WOLFIO,

POTENTISSIMI SUECORUM REGIS, HASSIÆ LANDGRAVII, CONSILIARIO REGIMINIS,
MATHEMATUM AC PHILOSOPHIÆ PROFESSORE PRIMARIO IN ACADEMIA
MARBURGensi, PROFESSORE PETROPOLITANO HONORARIO, ACADEMIÆ
REGIÆ SCIENTIARUM PARISIÆ, SOCIETATUMQUE REGIARUM BRITANNICÆ
ATQUE BORUSSICÆ MEMBRO.

EDITIO NOVA PRIORI EMENDATIO.
CUM PRIVILEGIIS.

FRANCOFURTI & LIPSIÆ, MDCCXXXVIII.

PROSTAT IN OFFICINA LIBRARIA RENGERIANA.



SERENISSIMO PRINCIPI
AC DOMINO,

DOMINO
WILHELMO,

HASSIÆ LANDGRAVIO, PRINCIPI
HERSFELDIÆ, COMITI CATTIMELIBOCI,
DECIÆ, ZIEGENHAINÆ, NIDDÆ ET
SCHAUMBURGI

&c. &c.

POTENTISSIMI SUECORUM
REGIS, HASSIÆ LANDGRAVII,
IN TERRIS HÆREDITARIIS
VICARIO,

EXERCITUS EQUESTRIS FOEDERATI BELGII
GENERALI LOCUM TENENTI,
LEGIONIS PRÆTORIANÆ DESULTORIÆ
CHILIARCHÆ,

NEC NON

OPPIDI TRAJECTI MOSANI SUPREMO
PRÆFECTO BELLICO,

&c. &c.

PRINCIPI AC DOMINO
LONGE CLEMENTISSIMO.

PRINCEPS SERENISSIME,
DOMINE
LONGE CLEMENTISSIME.



Antæ sunt, quæ mentem
Tuam exornant, & quibus
inter summos omnes ævi
Principes caput augustum
extollis, ut, si quis ea facun-
dia præditus foret, quæ iis describendis
sufficeret, is vivis coloribus depictum da-
ret,

DEDICATIO.

ret, quicquid de Mente humana sublimē ac heroicū cognosci potest. Utinam mihi essent vires, quas iisdem deprædicandis non sine successu impenderem! Atat tenuitatis ipsarum mihi probe conscius valde vereor, ne eas potius obscurerem, quam illustrem. Præstat igitur siliere & monere tantummodo seros nepotes, quibus tanti Principis memoria semper sacra erit, ut Historicorum volumina quævis antiquissima & recentissima evolventes, id omne Tibi tribuendum esse agnoscant, quicquid unquam in Principibus venerabunda mente deprædicarunt, quotquot unumquodque vero suo pretio æstimare didicerunt. Quoniam in hoc Opere, quod sub Psychologiæ

DEDICATIO.

empiricæ nomine in publicum profero, facultates mentis humanæ omnes ea, qua fieri potuit, solertia explico, & ad dotes atque virtutes, quæ mentem humanam ornare possunt, intimius perspicendas facem præfero; singularis mihi ratio fuit, cur, PRINCEPS SERENISSIME, opus hoc ad pedes SERENITATIS TUÆ humillima mente deponam. Accedit vero hæc altera non minus singularis, quam silentio transmitti nefas esto! Quemadmodum Aristotelem, Philosophum summum, hodienum felicem prædicat Orbis eruditus, quod ALEXANDRI M. gratia frueretur, ut ejus munificentia perficere posset, quod alias frustra tentasset; ita me non minus felicem prædica-

DEDICATIO.

dicabit ætas futura , quod Tua gratia adjunctus perficere mihi detur , quod dudum animo volvi , vastum illud philosophiæ opus , cuius jam quartum in publicam lucem prodit volumen. Gratia illius summæ suspiciendos indies experior effectus , ad tam arduum opus , quod aggressus sum , continuandum maxime proficuos , immo apprime necessarios. Quoties enim Tuam, PRINCEPS CLEMENTISSIME, in me clementiam intueor, toties vires languescentes refici animumque mihi addi sentio ad vincendum improbo labore omne, quod objicitur, obstaculum. Meum igitur fuit, PRINCEPS SERENISSIME, Tuam in me gratiam publico cultui venerari ac ad posterorum memoriam

DEDICATIO.

riam commendare. Eodem adeo vultu hunc, quem humillime offero, librum intueri ut digneris, quo autorem ejus hactenus adspicere solitus es, demisse rogo. Invota jam totus resolvitur animus. Servet Te, Principum Decus, Deus Optimus Maximus, & omni felicitatis genere locupletet! Ita vovet

PRINCEPS SERENISSIME,
DOMINE CLEMENTISSIME,
SERENITATIS TUÆ

*humillimus & subjectissimus
cultor*

CHRISTIANUS WOLFIUS.



PRÆFATIO.



Psychologiæ primam partem in lucem proferimus, quam empiricam appellare suevimus, propterea quod de anima tradit, quæ experientia magistra addiscuntur, eruendo notiones ex iis, quæ in nobismetipsis observamus. Disciplina hæc utilitates longe maximas spondet. Explicantur in ea facultates animæ humanæ singulæ, quibus utimur tum in rebus cognoscendis, tum in rebus gerendis, tum in

(Wolffii Psychologia.)

b

actioni-

actionibus liberis determinandis. Logica docet usum facultatis cognoscendi, præsertim superioris, quem intellectum dicimus, in certa rerum cognitione comparanda. Quamobrem si quis ea, quæ in Logica traduntur, intimius perspicere voluerit, ei facem præferet doctrina de facultate cognoscendi, ejus præsertim parte superiori. Non inanem ideo operam sumet, qui, ubi probe cognita atque perspecta habuerit, quæ prima Psychologiæ empiricæ parte, de facultatis cognoscendi parte tam inferiore, quam superiore docemus, Logicæ imprimis theoriam omnem accuratæ discussioni subjicit: animadvertet enim lucem inexpectatam, qua præcepta ejus perfusa plenius ac intimius intelliguntur, & amplioris multo usus agnoscuntur, quam antea videbantur, ubi mens seipsam adhuc veluti per nebulam quandam intuebatur. Usus facultatis cognoscendi expendit quoque Ars inveniendi, cumque facile principem. Quamobrem in hac certo tramite progredi non licet, nisi instar fili Ariadnei sit Psychologiæ de facultate theoria. Traditur nempe ibidem modus investigandi veritatem nobis adhuc incognitam tum recto usu facultatis inferioris, tum facultatis superioris, tum per utriusque rite celebratum connubium. Ultramque igitur facultatis cognoscendi partem penitus perspectam habere debet, qui in arte inveniendi apertis oculis videre nec talpa cœcior

coecior esse debet. Singularem facultatum animæ usum docet Logica probabilium, eumque utilitatis longe maximæ. Quamobrem quando hæc philosophiæ pars longe utilissima excoletur, non minus is, qui eidem in formam artis redigendæ studebit; verum etiam ceteri, qui præceptis ejusdem rite intelligendis ac ad usum transferendis operam navabunt, non aliis utentur perspicillis, nisi quæ Psychologia empirica suppeditat, ubi in singulis dignoscendis & agnoscendis acumen suum desiderari non patientur. Rectam actionum liberarum directionem philosophia moralis monstrat. Nullus itaque est in hac nobilissima philosophiæ parte, qui facultatis animæ humanæ omnes nondum a facie novit. Non alia profecto causa est, quod hætenus philosophi omnem virtutum ac morum praxin ad artis formam non redegerint, quam quod minime perspexerint, quomodo per leges, quas sequuntur facultates animæ, eadem arbitrio nostro subjiciantur earundemque usu actiones liberæ eo dirigantur, quo tendere debent, ut adeo singularum actionum humanarum determinationes atque directiones per constantes quasdam leges non minus intelligibili modo explicentur & ex natura animæ a priori deducantur, quam in Physica actiones

corporum ac pendentes inde mutationes in universo hodie explicari solent. Oculatam faciemus fidem, quando Metaphysica absoluta, & jure naturali ad umbilicum perducto, Ethicam methodo nostra pertractabimus. Tum vel fugitivo oculo eam percurrenti patebit, quantus sit Psychologiæ empiricæ in praxi morum usus. Immo idem jam elucescet in Philosophia practica universali, in qua generalem illius praxeos theoriam tradituri sumus. Habet etiam usum Psychologia empirica insignem, sed hætenus non animadversum in ipsa notione juris naturalis & obligationis naturalis investiganda & evolvenda: qui denuo ex Philosophia practica universali elucescet. Immo in Jure naturali nobilissima pars officiorum erga seipsum, quæ scilicet officia erga animam complectitur, nondum perspectis penitus animæ facultatibus rite constitui nequit: id quod ex Corpore Juris naturalis, quale locupletissimum daturi sumus, abunde patebit. Inprimis autem in parte philosophiæ moralis semiotica, quæ Ars conjectandi hominum mores dici suevit, inexpectatum præstat usum Psychologia empirica: id quod luculenter constabit, ubi fundamenta hujus Artis in Philosophia practica universali excitabimus

&

& in Philosophia morali de signis virtutum ac vitiorum trademus , quæ ad interiorem mentis statum divinandum conducunt. De rebus gerendis Politica agit. Nos doctrinam civilem ex jure naturali & philosophia morali tanquam principiis propioribus deducimus. Quamobrem cum multus sit Psychologiæ in Jure naturæ ac Philosophia morali usus , mediantibus præceptis Juris naturalis atque Ethicæ in philosophiam moralem redundat. Enimvero non opus est ut ad usum hunc mediatum provocemus ; habet enim usum immediatum maxime præclarum in philosophia civili , non modo ubi de cura Principis circa animam subditorum agitur , verum etiam in aliis ejus capitibus : quemadmodum palam erit , ubi Politicam luci publicæ exposituri sumus. Restat usus prorsus eximius , qui solus Psychologiam empiricam commendare , immo indispensabilem ejus necessitatem commonstrare poterat , nimirum is qui in Theologia naturali conspicitur. Quando enim eam luci publicæ exposituri sumus , palam erit nisi notionibus distinctis facultatum mentis præsuppositis ad distinctas attributorum divinatorum notiones perveniri haud quaquam posse. Quantum vero intersit ut co-

rundem notiones distinctas possideamus , tum dilucide constabit , quando in Jure naturali de officiis erga Deum , in philosophia morali de pietate ceterisque virtutibus theologicis, in Theologia de Deo ex operibus naturæ cognoscendo & in ipsa Theologia naturali de methodo in hac cognitione observanda acturi sumus. Quæ de usu Psychologiæ empiricæ disseruimus , non in eorum numerum referenda sunt , quæ magis optanda , quam speranda videntur : neque enim loquimur nisi experta. Ac ideo provido consilio Psychologiam empiricam a rationali sejungere placuit , ut inconcussa mancant tam arduæ molis fundamenta. Cum enim in Psychologia rationali naturam mentis humanæ ac essentiam explicemus & inde eorum , quæ in mente observantur , rationem a priori eliciamus, novo quodam & invidendo ausu ; in historia autem literaria peregrinus ac hospes sit necesse est , qui ignoret eum regnare in orbe erudito morem , ut quæ noviter detecta sunt non admittantur , nisi postquam per aliquod temporis spatium impugnata , in invidiam adducta & extirpationi proxima fuerint : fundamenta doctrinarum generi humano utilissimarum ne ad speciem quidem labefactari consultum duximus.

Quam-

Quamobrem si quis hebetioris fuerit ingenii, quam ut Psychologiam rationalem capiat; is eadem seposita, immo si libuerit damnata ad philosophiam practicam statim progrediatur certo persuasus se non minus inoffenso tramite per spatiosum illius campum progressurum, quam cui hoc datum fuerit ut animam suam a priori cognoscat. Quamvis vero in Psychologia empirica non tradamus nisi quæ certa experientiæ fide constant & quæ unusquisque in seipso experiri potest, modo facultates suas ad eum gradum evexerit, ut ad exercitia huc requisita fuerint aptæ; hoc tamen non obstante methodi nostræ leges secuti omnem doctrinam in eum ordinem digessimus, ut alia ex aliis deducantur & sequentia ex antecedentibus demonstrantur. Id in primis necessarium esse duximus, ut evidenter constaret, propositiones singulas esse rite determinatas & definitiones iis demonstrandis sufficere, quæ inde demonstrari debent, consequenter utrasque esse principia ad ratiocinandum utilia ac in disciplinis ceteris cum fructu adhibenda. Ut vero alia ex aliis deduci possent, singulas facultates eo ordine explicavimus, quo in modificationibus animæ sese exerunt. Atque hoc nomine non modo facultatem cognoscendi contemplamur, antequam ad facultatem appetendi confide-

siderandam pedem promovemus ; verum etiam utriusque partem inferiorem a superiori accurate distinguimus , & in explicanda utraque ab inferiori ad superiorem eodem tramite progredimur , quo in exercitio facultatum ab illa ad hanc continuus fit progressus. Taceo cetera , quæ ex ipsa lectione rectius innotescunt. Ceterum qui in posterum tantorum , quos prædicavi , fructuum participes fieri voluerint , in Psychologia empirica assidui sint , donec in notionibus , quas familiares experiuntur , plenissima luce fruantur , quam lectori discendi animo accedenti animitus apprecamur. Dabam Marburgi Cattorum d. 19. Aprilis 1732.





PSYCHOLOGIÆ EMPI- RICÆ PROLEGOMENA.

§. I.



Psychologia empirica est scientia stabiliendi *Psychologicæ* principia per experientiam, unde ratio *empiricæ* redditur eorum, quæ in anima humana definitio. fiunt.

Psychologiæ empiricæ definitionem jam dedimus in Discursu præiminari *Logicæ* præmissio (§. 111.). Monuimus quoque ibidem (not. §. 112.), cur a *Psychologia* rationali eam distinguamus. Principia *Psy-*

chicæ, quæ a posteriori stabiliuntur, maximam habent per universam philosophiam practicam, immo per omnem quoque *Theologiam* tam naturalem, quam revelatam, utilitatem. Quamobrem cum in *Psychologia* rationali tradantur, quæ, cum principiis nondum obviis nitantur, in disputationem adducuntur; ea, quæ veritatibus arduis tanquam fundamentum subterni debent, ab illis separari conveniebat. Sed de his, quæ jam alibi legi possunt, plura non dicimus.

(*Wolffii Psychologia.*)

A

§. 2.

§. 2.

*Quomodo
Psychologiæ
empiricæ
doctrina in-
notescat.*

Quoniam in Psychologia empirica per experientiam stabiliuntur ea, quæ de anima humana traduntur (§. I.) ; ea autem experimur, quæ ad perceptiones nostras attenti cognoscimus (§. 664. Log.) ; quæ ad Psychologiam empiricam spectant attentione ad ea facta, quæ nobis consciis in anima nostra fiunt, innotescunt.

Propositio hæc duplicem habet usum. Etenim hinc primo liquet, quomodo ad cognitionem eorum perveniatur, quæ in Psychologia empirica docentur: id quod inventoribus prodest. Secundo autem ex eo intelligitur, quomodo ea, quæ in Psychologia empirica traduntur, & rite intelligi, & ad examen revocari possint: id quod eos juvat, qui certam rerum psychologicarum notitiam sibi comparare student. Nimirum notiones psychologicas inventurus id agere debet, ut anima plurimas operationes ex se elicere possit: ita enim multorum experiundorum aderit occasio. Ab iis enim, quæ fiunt in anima, colligimus, quæ fieri possunt eaque ad notiones determinatas revocamus. Quæ vero in Psychologia traduntur, ea ut in se experiantur, vel in talia, quæ experitur, resolvat, operam dare debet, qui verbis respondentes notiones habere & de earum veritate certus esse voluerit. Ex ipsa autem tractatione constabit, quod hoc studium quovis pacto ipsimet juvemus.

§. 3.

*Habitus ad
psychologi-
cas notiones
inveniendas
requisitus.*

Quoniam in Psychologia traduntur, quæ experientia magistra innotescunt (§. I.), ea vero singularia sunt (§. 665. Log.), cum, quæ in Philosophia docentur, cujus pars Psychologia empirica est (§. III. Disc. prælim.), accuratis definitionibus explicari (§. 116. Disc. prælim.), & ad propositiones determinatas revocari debeant (§. 121. Disc. prælim.) ; Dogmata Psychologiæ empiricæ inventurus pollere debet habitu ea, quæ experimur, ad definitiones accuratas & ad propositiones determinatas revocandi: qualem habitum possibilem esse constat (§. 708. Log.).

Hæc non una de causa monemus. Etenim ad hoc conducit, ne quis se huic labori parem existimet, qui tamen eidem maxime impar est, irrito successu tantum opus aggressurus. Deinde hinc intelligimus, cur Psychologia hætenus propemodum deserta fuerit ac parum exulta. Docemus denique ad notiones psychologicas inveniendas plurimum adjumentum afferre notiones ontologicas, quales esse directrices in notionibus universalibus eruendis in Horis subsecivis A. 1729. Trim. Vern. n. 4. §. 2. & seqq. ostendimus.

§. 4.

Psychologia empirica suppeditat rationali. *Usus Psychologia empirica in rationali.*
Etenim in Psychologia rationali ratio reddenda est eorum, quæ in anima nostra fiunt (§. 58. 31. *Disc. prelim.*). Enimvero in Psychologia empirica stabiliuntur principia, unde ratio redditur eorum, quæ in anima humana fiunt (§. 1.). Ergo Psychologia empirica suppeditat rationali.

Hinc jam alias (*not. §. III. Disc. prelim.*) monuimus, Psychologiam empiricam Physicæ experimentali respondere. Constat enim Physicam quoque experimentalem dogmaticæ principia suppeditare. Quemadmodum itaque physicæ experimentali indefessam operam navare debet, qui rerum naturalium cognitionem veram curæ cordique habet; ita etiam in Psychologia empirica assiduus sit necesse est, qui certam animæ cognitionem desiderat. Patebit vero in progressu plura de anima humana certo cognosci posse, quam vulgo existimetur, si Psychologia empirica rite excolatur.

§. 5.

Psychologia empirica inservit examinandis & confir- *Usus alter.*
mandis iis, quæ de anima humana a priori eruuntur. Quoniam enim in Psychologia empirica ea traduntur, quæ attentione ad ea facta, quæ nobis consciis in anima nostra fiunt (§. 2.), cognoscuntur; si quæ de anima humana a priori eruta fuere, cum iis conferenda sunt, quæ in Psychologia empirica per experientiam stabiliuntur. Quod si enim cum iisdem eadem sunt vel consentiunt, ea veritati consentanea esse dubitari nequit: sin vero eidem repugnant, ea a veritate abhorreere palam est
A 2 (§. 567.)

(§. 567. *Log.*). Quodsi in Psychologia empirica nondum reperitur, quod a priori de anima fuit evictum; beneficio aliorum, quæ in Psychologia empirica traduntur, attentio ad mentem nostram dirigenda & in eo defigenda, quod eidem respondere debet, ut appareat, utrum eidem conveniat, nec ne. Et si quid occurrat, quod ad observationem reduci nequit; videre licet, num cum eo, quod ex principio in Psychologia empirica stabilito consequitur, idem sit, vel num ex eo, quod a priori erutum, sequatur aliquid in Psychologia empirica stabilitum. Apparet itaque Psychologiam empiricam inservire examinandis æque confirmandis iis, quæ de anima humana a priori eruantur.

Atque in eo Psychologia empirica denuo convenit cum Physica experimentalis: etenim experimentis quoque urimur tanquam examinibus dogmatum physicorum, sive ex aliis experimentis, sive ex his, quæ ex aliis experimentis deducta fuere, porro erutis. Psychologia rationalis tradit ea, quæ a priori de anima innotescunt (§. 58. *Disc. pralim.*). Quamobrem patet, Psychologiam rationalem promovere incrementum empiricæ, etsi ex ea principia mutuetur: cum scœnore enim reddit, quod ab ea mutuarum fuerat. Equidem non impossibile videtur, ut ea absque Psychologiæ rationalis auxilio a posteriori ex observationibus deriverentur; enimvero id commode fieri non posse ipso facto docemur. Deficit attentio ad observationes, sine qua advertere non datur, quæ in anima fiunt. Veritates a priori deductæ nos commonefaciunt eorum, quæ observari debent, & alias cogitationem nostram effugiunt. Eadem modum insinuant, sine quo eorum, quæ in nobis contingunt, conscii esse non possumus. Experta loquimur, quæ illi quoque experturi sunt, qui in Psychologicis notionibus sibi familiaribus reddendis operam collocabunt. Imitatur ea in re Psychologus Astronomus, qui ex observationibus eruit theoriam, & theoriam, quam eruit, per observationes denuo comprobatur, ac ope theoriæ ad observationes deducitur, quæ alias cogitationem ipsius minime subiissent. Atque ideo in Psychologia rationali interferuntur demonstrationibus, quæ ad empiricam referri debebant. Et, ubi Psychologia empirica conditur, ubi rationalis jam exulta, plurimis principiis locupletari potest, quæ alias ægre in eadem

eadem locum habitura fuissent. Optime igitur sibi consulit, qui studium Psychologiæ rationalis cum empirica constanter conjungit, et si consultum nobis fuerit illam ab hac separari.

§. 6.

Psychologia empirica principia tradit juri naturali. In jure naturali demonstratur, quænam actiones sint malæ, quænam bonæ (§. 68. *Disc. prælim.*). Constat vero ex iis, quæ de jure naturali & gentium dicta sunt in Horis subsecivis A. 1729 Trim. Brum. n. II. §. 6. 15. ac suo tempore evidentius demonstrabitur in Philosophia practica universali, atque ex ipso Juris naturalis systemate apparebit, rationem actionum, cur bonæ atque malæ sint, a natura humana desumi, consequenter etiam ab iis, quæ menti humanæ insunt. Quare cum in Psychologia empirica contineantur, quæ nobis consciis in anima nostra sunt (§. 2.); ex iis quoque desumendas esse rationes actionum intrinsece bonarum, vel malarum apparet. Psychologia igitur principia juri naturali tradit (§. 866. *Ontol.*).

Usus Psychologiae empiricae in jure naturali.

Obtinet id inprimis in officiis hominis erga animam suam.

§. 7.

Psychologia empirica inservit Theologiæ naturali eique principia tradit. In Theologia enim naturali agimus de Deo, ejusque adeo attributis (§. 57. *Disc. prælim.*). Ostendemus autem in Theologia naturali, nos ad notiones attributorum divinorum pervenire, quatenus notiones eorum, quæ menti humanæ insunt, ab imperfectionibus seu limitationibus liberamus. Quoniam itaque in Psychologia empirica traduntur notiones distinctæ eorum, quorum mens sibi in se conscia esse potest (§. 2.); in formandis notionibus attributorum divino- rum Theologiæ naturalis cultorem juvat, adeoque Theologiæ naturali inservit.

Usus ejusdem in Theologia naturali.

Enimvero quoniam in Psychologia empirica, ut modo diximus, notiones distinctæ traduntur eorum, quæ menti hu-

manæ insunt; ab iis principia generalia abstrahere licet de omni ente, quod similitudinem quandam cum anima habet, quanta scilicet ad genus quoddam constituendum sufficit (§. 710. *Log.*), hoc est, de Spiritu in genere. Quare cum etiam Deus Spiritus sit, quemadmodum in Theologia naturali demonstrabitur; ad eum quoque principia ista applicari possunt (§. 346. *Log.*). Psychologia itaque empirica Theologiæ naturali principia tradit.

Hinc intelligitur Theologiam naturalem multis defectibus laborare debere, nisi Psychologia empirica probe fuerit exculta. Quo profundius in hac versatus fueris, eo uberiores in illa lucem experieris. Notiones enim attributorum divinarum sunt distinctæ ac determinatæ, & hinc ad ratiocinandum utiles: id quod non modo in omni philosophia practica & Theologia naturali experimentalis, verum etiam in ipsa Theologia revelata usum multiplicem habet.

§. 8.

*Usus in phi-
losophia
practica.*

Psychologia empirica philosophiæ practicæ principia tradit. Demonstrationem jam dedimus (§. 92. *Disc. prælim.*), cum ostenderemus, philosophiam practicam ex Metaphysica principia petere debere, si in ea omnia demonstranda sint: quam adeo ibidem vide.

Non alia profecto ratio est quam Psychologiæ empiricæ neglectus, quod in Ethica præsertim praxis virtutum colendarum & vitiorum fugiendorum prorsus fuerit deserta. Quæcunque enim de ea dici possunt, ad appetitum determinandum redeunt: in appetitus autem determinationem omnes omnino perceptiones influunt. Quamobrem quæ in Psychologia de appetitus determinatione stabiliuntur principia, ea in Ethica ad casus speciales transferuntur. Aliam longe faciem induit omnis morum philosophia, ubi luce Psychologiæ colustratur, tumque demum iudicium certum fieri potest, quousque virtutes in potestate sint & quænam nos ab earum cultura arceant. Immo quæ de philosophia morali evicimus, ad ipsam quoque Theologiam moralem applicari possunt ac debent. Non liberabuntur libri, qui de ea scribuntur, a sterilitate, nisi ubi Psychologiæ periti ad eam in systema redigendam animum appellant: id quod non simplici vice

vice me monuisse memini. Clarius autem hæc intelligentur, ubi philosophiæ moralis systema ex principiis psychologicis a priori deductum dederimus.

§. 9.

Psychologia empirica principia tradit Logicæ. Demonstratio in Logicam denuo dedimus, cum ostenderemus, quænam Logicæ principia habeat (§. 89. Disc. prælim.): quam adeo ibidem vide,

Nimirum si rationem a priori reddere velis regularum logicarum, ad ea recurrendum, quæ de facultate cognoscendi in Psychologia traduntur. Quamobrem etiam Logicam demonstrativa methodo tradituri, de tribus mentis operationibus, notionum differentia formaliter terminorumque usu tradidimus, quæ in Psychologia empirica sedem propriam habent, & passim per eam deprehendes principia ex Psychologia empirica mutuata. Logicæ igitur tanto uberiores lucem affundi deprehendes, quo penitus in Psychologia mentem humanam inspexeris. Possent alia bene multa de utilitate Psychologiæ empiricæ tradi: sed hæc sufficere possunt ad culturam Psychologiæ iis persuadendam, quibus certa Dei ac sui cognitio virtutisque studium curæ cordique est. Et ea fieri nonnulla repetere libuit, quæ ex Discursu præliminari præsupponi poterant.

§. 10.

Studium Psychologiæ empiricæ animum sciendi cupidum Voluptas multa voluptate perfundit & voluptatis capacem reddit, quæ alias in ipsum non caderet. Etenim Psychologia empirica ea tradit, quæ nobis consciis in anima nostra fiunt (§. 2.). Quare cum animus sciendi cupidus ex cognitione acquisita voluptatem percipiat; ex sui inprimis cognitione certa voluptatem percipere debet, consequenter cum animæ cognitio ex Psychologia empirica acquisita certa sit (§. 567. Log.), ex studio psychologico voluptatem percipere debet.

Quoniam in Psychologia empirica cognoscimus principia, unde ratio eorum, quæ in anima humana fiunt, redditur (§. 1.), ratio vero eorum, quæ enti insunt, vel inesse possunt, ex
 ipsius

ipsius essentia tandem petitur (§. 168. *Ontol.*); in ea cognoscimus, tum quæ in numero essentialium sunt, tum quæ rationem suam in iis habent. Jam vero qui novit ea, quæ menti humanæ sunt, multo rectius de perfectione mentis judicare valet quam alter, qui eadem ignorat: id quod per se patet. Quare cum inferius ostendatur ex sensu perfectionis percipi voluptatem eamque esse tanto majorem, quanto profundius perfectionem rimeris: per studium psychologicum animus hominis capax redditur voluptatis, quæ alias in eum minime caderet.

Constat ex Horis subsecivis A. 1729. Trimestr. Æt. n. l. & Trim. Autuma. n. l. & A 1730. Trim. Brum. n. l. & Trim. Vern. n. l. siue-ram illam voluptatem, quæ homines maxime decet, esse eam, quæ ex cognitione veritatis tam naturalis, quam revelatæ virtutisque tam naturalis, quam christianæ percipitur. Hanc igitur voluptatem ut plenius ac certius percipiamus, Psychologiæ studio obtinetur. Quoniam vera hominis felicitas, quæ in hac terra in ipsum cadit, in perceptione istius voluptatis consistit, quemadmodum suo tempore in philosophia practica universali demonstraturi sumus; quanti momenti sit solida Psychologiæ empiricæ cognitio hinc innotescit. Ceterum ex ipsa tractatione constabit, non impossibile esse, ut certam ac fecundam de anima humana cognitionem consequamur. Parebit fallere præjudicium commune, quod immaterialitas animæ obstat, quominus positivi quid de eadem cognoscamus.

FINIS PROLEGOMENORUM.



PSYCHO-

PSYCHOLOGIÆ EMPIRICÆ

PARS I.

DE

ANIMA HUMANA

IN GENERE

ET

FACULTATE COGNOSCENDI

IN SPECIE.

SECTIO I.

DE ANIMA IN GENERE.

CAPVT I.

De existentia animæ humanæ.

§. II.

Nos esse nostri rerumque aliarum extra nos constitutarum Fundamen-
 conscios quovis momento experimur. Non opus est nisi ^{tum cogni-}
 attentione ad perceptiones nostras, ut ea de re cer- ^{tionis exi-}
 ti simus (§. 664. Log.). ^{stentia ani-}
^{ma.}

Nemo miretur, nos talia proponere, quæ unicuique
 obvia sunt, nec quisquam in dubium vocaverit. Facimus hoc
 jubente methodo. Ubi enim aliquid demonstrandum, sumenda
 quædam sunt, cum nulla nisi ex assumtis procedat demonstratio.
 Quæ vero assumuntur, vel evidentia, vel per se clara esse debent,
 quod vel ante jam fuerint demonstrata, vel absque probatione con-
 cedantur. Ad classem posteriorem pertinet propositio præsens.

§. 12.

*Certitudo
illius fun-
damenti.*

Nos esse nostri conscios ipsa dubitatione confirmatur.
Pone enim te dubitare, utrum tui rerumque aliarum extra te conscius sis, nec ne. Non negare potes, te dubitare, cum ipsemet hoc affirmes (§. 28. *Ontol.* & §. 205. *Log.*). Unde vero non ti te dubitare, nisi ex eo, quod dubitationis tuæ tibi conscius sis? Hoc ipso igitur te tui conscium esse affirmas, cum te de eo dubitare asseveras. Te igitur tui esse conscium ipsa dubitatione confirmatur.

Utamur hoc principio ad demonstrandum gradum evidentiae, qua nititur cognitio existentiae sui ipsius aut, si mavis, animæ.

§. 13.

*Principium
cognoscendi
existentiam
sui.*

Qui sui aliarumque rerum actu conscius est, ille etiam actu est sive existit. Propositio hæc adeo evidens est, ut absque probatione concedi debeat, sumenda adeo per modum axiomatis. Quod si hoc negas; ponendum est, posse ens quoddam sui aliarumque rerum actu conscium esse, etiam si ipsum actu non sit. Ergo eidem actu quædam inerunt, antequam existit: quod cum nemo non absurdum esse fateatur; qui sui aliarumque rerum conscius est, existit.

Propositio præsens est casus specialis notionis communis, vi cuius existentiam rei colligimus. Ex prædicatis enim actualibus colligitur communiter rei existentia. Si quis dicit, lapidem esse calidum, solem lucere, semen progerminare de casu singulari locutus: nemo dubitabit ex eo inferre, lapidem, solem, semen existere. Datur adeo in nobis notio quædam communis, cui distincte enunciata responderet hæc propositio: Si individuo actu quid convenit aut, si mavis, Si de individuo actu quid prædicari potest, idem actu est, sive existit. Notionis hujus generalis casum specialem esse propositionem præsentem, per se patet. Et sane hoc ipso principio cognitio existentiae animæ nostræ reducitur ad notionem communem. Conferuntur hic utiliter, quæ ea fini alibi diximus (*not.* §. 370. & 393, itemque *not.* §. 203. & 186. *Ontol.*) & quæ de utilitate hujus reductionis monuimus (*not.* §. 125. *Ontol.*). Utinam philosophi ad notiones communes magis attenderent,

rent, confusas ad distinctas revocarent, & a specialibus universales abstraherent! Ipso successu experirentur, quantum in iis præsidii possum sit ad recte philosophandum.

§. 14.

Nos existimus. Sumus enim nobis nostri rerumque aliarum extra nos conscii (§. 11.). Qui sui rerumque aliarum extra se conscius est, ille existit (§. 13.). Nos igitur existimus.

Quomodo nobis innotescat nos existere.

Hac ratione nobis innotescere, quod existamus, nemo in dubium vocare potest, qui ad seipsum attendit. Pone enim te tibi non esse tui rerumque aliarum extra te conscium; veluti te dormire. Numne dormientis mentem unquam subibit cogitatio, quod existas? Quis hoc affirmaverit? Pone te vigilantem esse tui rerumque aliarum extra te tibi conscium, non tamen perpendere, quod ens conscius existat: tui quidem tibi conscius es, seu te ipsum sentis, quatenus te agere & pati percipis; minime autem de existentia tua mentem tuam subit cogitatio. Antequam igitur cogitatio existentia tua mentem tuam subire potest, præcedere debet notio rei sibi sui rerumque aliarum actu conscia existentis. Ad distinctam igitur notionem reducimus confusam communem existentia nostra eamque terminis universalibus enunciamus. Ceterum hinc est, quod rationem reddituri, unde constet, nos existere, vel quæsi tum existamus, respondeamus: nos hoc nunc agere, veluti scribere, ambulare, videre, admittentes, quod hoc nunc agamus, quia nobis ejus conscii sumus. Quoniam philosophi est rationem reddere, cur ea, quæ fieri possunt, actum consequantur (§. 31. *Disc. prælim.*); rationem quoque reddere tenetur, cur nos existere certi simus. Quam obrem nemo mirerur, talia a nobis probari, quæ probatione nulla indigere videntur. Non admittimus existentiam nostram absque probatione, quemadmodum ex dictis apparet. Philosophi igitur est docere, qualis probatio in rationibus nostris conf. sis contineatur.

§. 15.

Cognitio existentia nostra ipsa dubitatione confirmatur, seu, ex eo, quod dubitamus, utrum existamus, nec ne, colligitur, nos existere. Etenim ex demonstratione propositionis præcedentis constat nos colligere existentiam nostram ex eo, quod nobis

Gradus certitudinis cognitionis existentia nostra.

nobis nostri aliarumque rerum extra nos sumus conscii. Enimvero quod nostri aliarumque rerum extra nos nobis conscii simus, adeo certum est, ut ipsa dubitatione confirmetur (§. 12.). Cognitio igitur existentiae nostrae ipsa dubitatione confirmatur.

Idem adhuc alia ratione ostenditur. Ponamus te dubitare, utrum existas, nec ne: cum tibi hujus dubitationis sis conscius, qui vero sui sibi conscius est, existat (§. 11.); ex eo, quod dubitas utrum existas, nec ne, colligere debes, quod existas.

Hinc patet gradus certitudinis, qui cognitioni existentiae nostrae convenit. Tantus nimirum est, ut eo majorem concipere non liceat. Quid enim certius existimari debet eo, quod ipsa dubitatione confirmatur, seu, quod hinc esse colligis, quod dubites, num sit. Philosophi igitur cum sit scrutari rationem tantae certitudinis, minime reprobari potest opera, quam in reducendo ratiocinio, quo existentiam nostram colligimus, ad notionem distinctam impendit.

§. 16.

Quidnam eadem evidentia cognoscatur, qua existentiam nostram cognoscimus.

Si quid per syllogismos infertur, quorum praemissae sunt propositiones indemonstrabiles, vel judicia intuitiva experientis claris superstructa; id eadem evidentia cognoscitur, qua nos existere cognoscimus. Existentiae enim nostrae cognitio nititur hoc syllogismo (§. 14.):

Quodcunque ens sui ipsius aliarumque rerum extra se sibi actu conscius est, illud existit.

Atqui Nos nostri aliarumque rerum extra nos actu nobis conscii sumus.

Ergo Nos existimus.

In hoc syllogismo propositio major est principium rationis, in quo notio confusa subjecti atque praedicati ita indivulso nexu cohaeret, ut producta notione subjecti in eodem quoque compareat notio praedicati, adeoque propositio indemonstrabilis (§. 263. Log.). Quare cum praeterea theoretica sit (§. 266. Log.); ex axiomatum numero est (§. 267. Log.). In minore syllogismi nobis tribuimus praedicatum, quod in notione nostri

nostri comprehensum intuemur, adeoque minor propositio iudicium intuitivum est (§. 51. Log.). Nititur autem idem experientia (§. 11.) tam clara, ut dubitando confirmetur (§. 12.). Eadem igitur evidentia cognoscitur, qua nos existere cognoscimus, si quid per syllogismos infertur, quorum præmissæ sunt propositiones indemonstrabiles, vel iudicia intuitiva experientiis clavis superstructa.

Apparet hinc utilitas disquisitionis de modo, quo existentia nostræ certi reddimur, nimirum quid ad hoc requiratur, ut quid eadem certitudine cognoscamus, qua nos cognoscere agnoscimus. Quoniam in Psychologia rationali & Theologia naturali arduas demonstramus veritates, veluti de immortalitate animæ & existentia Dei; maximi profecto momenti est cognitio distincta gradus illius evidentia, qua nititur existentia sui ipsius cognitio.

§. 17.

Quicquid demonstratur, id eadem evidentia cognoscitur, Gradus qua nos existere cognoscimus. In numerum principiorum demonstrandi non assumuntur nisi definitiones, experientia indubitata, axiomata & propositiones jam demonstrata (§. 562. Log.). Quoniam itaque definitiones sunt propositiones identicae (§. 214. Log.), adeoque axiomata, si ad propositiones reducuntur (§. 270. Log.), consequenter una cum ceteris axiomatis indemonstrabiles (§. 267. Log.); ex definitionibus autem, experientiis indubitis & axiomatis primæ propositiones demonstrantur, quæ deinde in numerum principiorum demonstrandi assumuntur (§. 551. & seqq. Log.); principia demonstrandi prima sunt experientia indubitata & propositiones indemonstrabiles. Enimvero si quid infertur per syllogismos, quorum præmissæ sunt propositiones indemonstrabiles vel iudicia intuitiva experientiis clavis superstructa; id eadem evidentia cognoscitur, qua nos existere cognoscimus (§. 16.). Ergo quod demonstratur, id eadem evidentia cognoscitur, qua nos existere cognoscimus.

Nemo non videt, sermonem hic esse de demonstrationibus veri

nominis, minime autem de præteritis, quales hodie in primis multæ prostant. Non difficile vero est demonstrationem genuinam a spuria separare, si quidem observaveris, quæ de genuina eandem formam præscripsimus (§. 511. & seqq. Log.) & in demonstrationibus expendendis plurimum versatus fueris.

§. 18.

*Evidentia
veritatum
geometricarum
qualis sit.*

Veritates geometricæ eadem evidentia cognoscuntur, qua existentia nostra nobis innotescit. Veritates enim geometricæ demonstrantur legitime, quemadmodum ostendimus, cum genuinam demonstrationum formam delinearemus (§. 551. & seqq. Log.). Quicquid vero demonstratur, id eadem evidentia cognoscitur, qua existentia nostra nobis innotescit (§. 17.). Ergo veritates geometricæ eadem evidentia cognoscuntur, qua existentia nostra nobis innotescit.

Loquimur hic de demonstrationibus legitimis, quales dedit *Euclides* cum ceteris Geometris antiquis. Neque enim diffitemur, dari subinde hodie nonnullos, qui a rigore Geometricarum veterum recedunt, nec in demonstrando peritis satisfaciunt. Immo nec diffitemur a modernis Geometris transitu a natura ad Geometriam facto subinde assumi, quæ salvis demonstrandi legibus assumi nequeant, immo sæpius a veritate abhorrent.

§. 19.

Ratio assensus, quem prompte veritatibus geometricis præbemus.

Quoniam veritatum geometricarum, si legitime demonstrantur, ea est evidentia, qua existentia nostra nobis innotescit (§. 18.); ideo non mirum, quod nemo istis assensum denegare possit, qui vim demonstrationum percipit.

Nos ea de causa non probamus, si juvenibus mathemata absque demonstratione proponuntur, ut de eorum veritate convinci minime possint. Necessè enim est, ut in se percipiant vim demonstrationum, qua assensus vel ab invito extorquetur. Alias enim discrimen inter convictionem & persuasionem opere ipso nunquam distinguunt, neque methodi accuratæ, sine qua convictioni locus esse nequit, pulchritudine atque amore unquam capiuntur. Equidem vulgo sibi persuadent, demonstrationes nausæam creare tyronibus, eosque a studio Machæseos arcere. Enimvero diuturna experientia didicimus,

id

id metuendum minime esse, siquidem demonstrationes rite resolvere noveris, ne sis obscurus & confusus in docendo.

§. 20.

Ens istud, quod in nobis sibi sui & aliarum rerum extra *Anima de-* nos conscium est, *Anima* dicitur. Vocatur etiam subinde *Ani-* finitio, *ma humana*, item *Mens* vel *Mens humana*.

Definitio nominalis est; attamen positiva. Realitas ejus a posteriori patet. Etenim in anterioribus vidimus, dari quid in nobis, quod sibi sui aliarumque rerum extra nos conscium est. Quale sit illud ens, in Psychologia empirica docemus. Quid sit & quod a corpore organico diversum sit, in Psychologia rationali demum ostendemus.

§. 21.

Anima humana existit. Etenim nos existimus, quatenus nobis nostri aliarumque rerum extra nos conscii sumus (§. 14.). *Anima ex-* Enimvero quatenus nobis nostri aliarumque rerum extra stentia. nos conscii sumus, anima sumus (§. 20.). Existit igitur anima nostra.

Apparet adeo, dum existentiam nostri evicimus nos non demonstrasse, nisi quod anima nostra existat; corporis autem existentiam adhuc in dubio reliquisse, propterea quod nondum constet, utrum ens istud, quod sibi sui conscium est, sit ipsum hoc corpus, an vero ens aliud ab eo diversum.

§. 22.

Animæ existentiam ante cognoscimus, quam corporis. Et enim animæ nostræ existentiam ex eo cognoscimus, quod nobis nostri rerumque aliarum extra nos conscii sumus (§. 20. Psychol. & §. 349. Log.). Enimvero si de existentia reali corporum dubitamus, hujus dubitationis nobis conscii sumus, consequenter nobis nostri conscii sumus, quatenus dubitamus. Quoniam igitur ex eo, quod de existentia reali corporum dubitamus, demonstrari potest, nos existere, quatenus nostri aliorumque conscii sumus (§. 14.); existentiam animæ cognoscimus, dum adhuc de existentia corporis dubitamus, adeoque antequam existentiam corporis cognoscimus.

*Cujusnam
rei existen-
tia primum
agnoscatur.*

Respexit huc *Cartesius* Meditat. 2. de prima philosophia, dum adstruere conatur mentem humanam esse notio-rem corpore. Etenim assertum suum inde probat, quod de rebus omnibus dubitans ex ipsa hac dubitatione cognoscat se esse, quatenus scilicet cogitat, id est, quatenus est res cogitans. Nihil autem aliud intelligit per rem cogitantem, quemadmodum paulo post videbimus, nisi ens, quod sibi sui ipsius rerumque aliarum tanquam extra se conscius est. Primum igitur quod certo cognoscimus, dum de ceteris omnibus dubitamus, est aliquid, quod ad animam spectat, non ad corpus. Atque eatenus dici potest animam humanam esse corpore notio-rem. Satis vero accurate in ista secunda meditatione philosophatur *Cartesius*, quemadmodum decet philosophum acutum, qui mentis acie distinguit a se invicem separanda, quatenus scilicet de existentia nostri sermo est. Etenim quod naturam & essentiam mentis attinet, in eo deproperavit iudicium suum, quemadmodum suo loco ostendetur. Certum tamen est, quod ibidem affirmat, primum, quod de anima nostra cognoscimus, esse illud, quod cogitet, aut potius, quod sit sui rerumque aliarum tanquam extra se existentium sibi conscia.

CAPVT II.

DE

Modo cognoscendi animam.

§. 23.

*Cogitatio
quid sit.*

Cogitare dicimur, quando nobis conscius sumus eorum, quæ in nobis contingunt, & quæ nobis tanquam extra nos repræsentantur. *Cogitatio* igitur est actus animæ, quo sibi sui rerumque aliarum extra se conscius est.

Definitio hæc nominalis ab usu loquendi minime recedit: id quod per exempla eunti patet. Quando arborem contuemur, nobis ejus conscius existentes de ea nos cogitare dicimus. Quando nobis attributa Dei repræsentamus & notionum, quas jam de iis habemus, nobis conscius sumus; de Deo nos cogitare dicimus. Quando triangulum nobis imaginamur & imaginis hujus quasi oculis oberrantis conscius nobis sumus; de triangulo nos cogitare dicimus. Nos igitur cogitare affirmamus, quando nobis rerum quarundam aut operationum mentis nostræ sumus conscius. Enimvero quando nobis nihili conscius sumus,

sumus, veluti in somnio, tum nos non cogitare pronunciamus. Retinet eundem significatum *Cartesius*. Ita enim Princip. philos. part. I. art. 9. *Cogitationis nomine*, inquit, *intelligo illa omnia, quæ nobis consciis in nobis sunt, quatenus eorum in nobis conscientia est.* Nostrum adeo fuit significatum & usui loquendi communi conformem, & in philosophia introductum retinere (§. 142. 147. *Disc. prelim.*). Etsi igitur non desint, qui cogitationes ad omnes mentis humanæ modificationes extendunt, etiam eas, quarum sibi conscia non est; illis quidem liberum relinquimus, quo in significatu vocabulo uti velint, nostrum tamen non est eorum vestigia sequi.

§. 24.

Mens *percipere* dicitur, quando sibi objectum aliquod repræsentat: ut adeo *Perceptio* sit actus mentis, quo objectum quodcunque sibi repræsentat. *Perceptio nis definitio.*

Ita percipimus colores, odores, sonos; mens percipit seipsum & mutationes in se contingentes.

§. 25.

Menti tribuitur *Apperceptio*, quatenus perceptionis suæ sibi conscia est. *Apperceptio quid sit.*

Apperceptionis nomine utitur *Leibnitius*: coincidit autem cum conscientia, quem terminum in præsentī negotio *Cartesius* adhibet.

§. 26.

Quoniam cogitamus, quando nobis conscii sumus eorum, quæ in nobis contingunt, & quæ nobis tanquam extra nos repræsentantur (§. 23.); *omnis cogitatio est perceptionem* (§. 24.), & *apperceptionem involvit* (§. 25.). *Quanam in cogitatione a se invicem distinguenda.*

E. gr. Dum jam scribo, conscius mihi sum me scribere. Quatenus mihi conscius sum actus scribendi, eundem appercepio; quatenus vero idem in mente repræsentatur, ut ejusdem conscius esse possim, eundem percipio. Actus enim scribendi non percipitur, quatenus motus quidam manus & digitorum contingunt ad literarum ductum atque seriem necessariū. Similiter dum solem video, ejus tanquam extra me consistentis conscius mihi sum. Eum igitur percipio, quatenus eundem mihi repræsentō; sed appercepio, quatenus mihi conscius

(*Wolffii Psychologia.*) C sum

sum tanquam talis, qualem represento. Constat nimirum ex Astro-
nomia, idemque in Physica ostenditur, solem longe alium esse quam
apparet. Figura ad sphericam proxime accedit: mens vero eum sibi
representat instar disci. Mole sua tantum superat Tellurem, ut ea
contemptibilis parvitas respectu solis existimari debeat: mens vero
eundem instar disci admodum exigui representat. Solis igitur nobis
conscii sumus, non qualis revera est; sed qualem sibi representat mens
nostra. In omni cogitatione perceptio seu rei in mente representatio
& apperceptio, vi cuius nobis conscii sumus objecti, quod in mente
representatur, aut, si mavis, illius representationis, probe a se invicem
distinguenda sunt.

§. 27. *Quæ ex iis, quæ menti inesse observamus, legitimo ratio-*

*Quænam
menti ob-
ea, quæ in
ipsa obser-
vamus,
tribuenda.*

*cinio colliguntur & quæ porro ex his inferuntur; eadem quo-
que menti conveniunt. Idem valet de omni ente alio. Etenim
quæ ex iis, quæ menti inesse observamus, legitimo ratiocinio
colliguntur, ac porro ex his, quæ scilicet legitimo ratiocinio in-
de collecta sunt, inferuntur; ea de mente humana demonst-
rantur (§. 551. & seqq. Log.). Quare cum vera sit propositio, quæ
demonstrari potest (§. 544. Log.), consequenter prædicatum sub-
jecto suo conveniat propter ea, ex quibus idem colligitur (§.
505. Log.); menti quoque convenire debet, quod colligitur ex
iis, quæ menti inesse observamus & quod porro ex his inferuntur
legitimo ratiocinio, quod ex illis colligitur.*

Idem valere de omni ente ex ipsa demonstratione appa-
ret, quæ talis omnino est, ut ad omne ens promiscue applicari
possit.

Nititur hac propositione omnis cognitio discursiva, atque clarior
evadet ipsius veritas, ubi ratiocinia mentis in sequentibus scrutati fue-
rimus. Sane hujus propositionis fide tribuuntur subjecto suo omnia
prædicata, quæ de eadem demonstrari possunt. In definitionibus no-
minalibus figurarum sumimus nonnulla, quæ iisdem inesse debent,
atque ex iis ratiocinando colligimus porro, quæ iisdem tribuenda ve-
niunt. Nimirum illi figuræ tribuenda sunt ea, quæ ex assumtis colli-
gun-

guntur, cui conveniunt, quæ assumpta fuerunt. Recto igitur tramite incedimus, si eodem modo de mente judicamus.

§. 28.

Ad cognitionem mentis pervenitur, si ad cogitationes nostras. Modus per-
attendimus eidemque porro tribuimus, quæ legitimo ratiocinio ex iis veniendi ad
colliguntur. Quoniam enim cogitationes perceptiones & ap- *cognitionem*
perceptiones involvunt (§. 26.); dum cogitamus, aliquid vel ad *mentis.*
nos spectans, velle nobis diversum nobis repræsentamus (§. 24.),
ejusque repræsentationis nobis consci sumus (§. 25.). Quare
si ad cogitationes nostras attendimus, hoc ipso nobis inno-
tescit, non tantum quomodo objectum repræsentetur, sed etiam
qualis tunc in anima mutatio accidat. Atque ita ad animæ
cognitionem pervenitur.

Quoniam porro menti tribuenda veniunt, quæ ex aliis,
eidem inexistentibus legitimo ratiocinio colliguntur (§. 27.), at-
que ea menti convenire certum est, quæ in ea observamus (§.
517. Log.); ea quoque menti convenire debent, quæ ex iis
legitimo ratiocinio colliguntur, quæ in mente observantur. At-
que ita denuo ad animæ cognitionem pervenitur.

Propositionem hanc ideo apponimus, ut, dum constat, quomodo
ad certam animæ cognitionem perveniatur, ea, quæ de anima tradi-
turi sumus, ad examen revocare valeamus. Id enim unice nobis
propositum est, ut ad certam animæ cognitionem lectorem perdu-
camus tum ob dignitatem, tum ob utilitatem doctrinæ. Cogni-
tionis vocabulo utimur nondum definito, propterea quod hic in
notione confusa acquiescere possimus, nec distincta opus sit. Id
tamen minime obstabit, quo minus in sequentibus confusam ad
distinctam reducamus.

S E C T I O II.

DE

FACULTATIS COGNOSCENDI
PARTE INFERIORI.

CAPUT I.

De differentia perceptionum
formali.

§. 29.

*Facultas
animæ quid
dicatur.*

Quemadmodum potentia activa in genere *Facultas* dici solet (§. 716. *Ontol.*); ita etiam potentiæ activæ animæ *Facultates* ipsius appellantur.

Quotnam sint animæ facultates & quales sint, in Psychologia empirica declaramus: quid vero proprie sint & quomodo animæ insint, in Psychologia rationali demum declarabitur. Conducunt tamen ad eas intelligendas, quæ de potentiis activis in genere jam in philosophia prima annotavimus (not. §. 716.). Nimirum vi notionis, quam de actione habemus (§. 713. *Ontol.*), potentiam activam, consequenter facultatem tribuentes animæ affirmamus, non repugnare iis, quæ animæ insunt, seu, ut quædam eidem inexistencia vel relationes ad alia ita mutantur, ut ratio mutationis contineatur in illis ipsis, quæ eidem insunt, seu, ut per alia, quæ eidem insunt, intelligi possit, cur ea accidat mutatio. Enimvero quoniam in Psychologia empirica nondum dirimi potest, utrum in passionum numero sint, quæ tales videntur & si vel maxime ponamus, esse eas utique passiones, cum tamen actionibus animæ ita implicentur, ut hæc absque iis intelligi minime possint; nemo ægre ferat, quod sub Facultatum titulo talia expendamus, quæ ad passiones refert. Quod si hæc ratio nondum ei satis facit, significatum vocabuli extendat ad potentias passivæ: id quod, cum arbitrariæ sint definitiones nominales, absque ulla contradictione facere licet.

§. 30.

§. 30.

Si quid percipimus, aut id ab aliis perceptibilibus satis distinguimus, aut idem a nobis fieri minime posse deprehendimus. Fundamentum perceptionum clararum & obscurarum. Levi-
 attentione opus est ad obvias perceptiones, ut asserti veritas agnoscatur. Etenim si solem & arborem luce diurna collustratam in vicinia intuemur, solem & arborem ab aliis objectis, quæ simul percipimus, satis distinguere valemus, ita ut denuo redeuntem agnoscamus, & Lunam vespere intuentes eam a Sole distinguamus, arborem vero aliam alibi contuentes ejus cum illa similitudinem animadvertamus. Enimvero si in luce crepusculina objectum aliquod in agro positum videmus, ea, quæ ipsi insunt, non satis discernimus, ut adeo cum rebus olim visis idem comparaturi similitudinem, quam cum iis habet, non animadvertamus. Differentia adeo hæc omnium optime innotescit, si idem objectum in eadem distantia ad lucem diurnam & crepusculinam respicias: cum enim hic cum modo percipiendi nobis sit negotium, differentia omnium optime in eodem objecto sese prodit.

Monuimus jam alibi differentiam notionum formalem a modo cognoscendi desumi (§. 77. Log.); non alia vero est perceptionum differentia, quam notionum in Logicis explicata, cum in Logica vocabulum notionis, prout ab autoribus fieri solet, in latiori significato acceperimus, ne, dum alios legimus, facile confundamur. Ne tamen in Psychologia desint nomina ad ea a se invicem discernenda, quæ discerni consueverunt, immo necessarium est, vocabula quædam arctioribus limitibus coerceri nil vetat. Non obstat lex methodi, ut in diversis disciplinis ejusdem vocis significatus mutetur; unde eam inculcantes addidimus, id fieri debere saltem in eadem philosophiæ parte (§. 143. Disc. pralim.): cujus quidem rei rationes alibi commodius expendere licebit. Ceterum dum simul perceptorum mentionem injicimus, ad ea referimus quomodocunque percepta, sive sensum, sive imaginationis ope. Hactenus enim differentiam in iis non attendimus.

§. 31.

*Perceptio
clara quæ
nam.*

Si quod percipimus agnoscere, vel a perceptibilibus ceteris distinguere valemus, *perceptio*, quam habemus, *clara* est.

Exemplum perceptionis claræ præbet Sol, quando eundem videmus; præbet arbor, quando in luce diurna eandem intuemur; præbet calor, quem tactu in lapide percipimus. Nimirum si duo simul clare percipiuntur, iis inter se collatis apparet, num eadem sint, an diversa.

§. 32.

*Perceptio
obscura
quanam.*

Si quod percipimus non agnoscere, vel a ceteris perceptibilibus non distinguere valemus, *perceptio*, quam habemus, *obscura* est.

Exemplo est objectum e longinquo visum, quod quale sit non agnoscimus. Videre nos quidpiam conscii nobis sumus: sed quid illud sit, quod videmus, nos ignorare non minus nobis conscii sumus. Quatenus igitur in perceptione quid desideratur, ne res agnoscere possit; eatenus eam obscure percipimus. Et obscure rem a nobis percipi innuimus, dum interrogati, quid videamus, respondemus, nos nescire, ad quodnam genus vel ad quamnam speciem idem referre debeamus.

§. 33.

*Rei obscure
perceptæ
num insunt
clare per-
ceptæ.*

Rei obscure perceptæ inesse possunt, quæ clare percipiuntur. Neque enim repugnat rei quædam inesse, quæ clare percipiuntur, & præterea inesse alia, quæ prorsus non percipiuntur, veluti cum vel defectu luminis, vel ob parvitatem suam, vel ob nimiam distantiam oculis sese subducunt. Enimvero si quædam rei inexistencia clare percipiuntur, nobis ejusdem conscii sumus, hoc est, conscii nobis sumus nos videre objectum aliquod, cui insunt ea, quæ clare percipimus. Quoniam vero præterea insunt alia, quæ prorsus percipi nequeunt, alia vero clare percipi possunt: rem agnoscere minime valemus, nec eam a ceteris perceptibilibus distinguere novimus; quemadmodum in clare perceptis obtinet. Res igitur ipsa obscure percipitur

(§. 32.).

(§. 32.). Patet adeo rei obscure perceptæ inesse posse, quæ clare percipiuntur.

Idem patet a posteriori, si ad exempla obvia attendimus. Ponamus enim, nive dudum colliquata, alicubi adhuc in campo partem quandam terræ nive tectam esse. Quodsi eam e longinquo in luce præferim, crepusculari videas, colorem album satis clare percipis, nec minus figuram & magnitudinem percipis, qualis e longinquo apparet: non tamen ea clare percipis, per quæ nivem ab aliis objectis albis distinguis. Insunt itaque rei obscure perceptæ, quæ clare percipiuntur. Et vi eorum, quæ clare percipiuntur, rem istam agnoscere potes, quod eadem adhuc sit, quando post aliquod temporis intervallum rediens eam in loco isto adhuc positam ex eadem distantia contueris. Plurimum adeo falluntur, qui sibi persuadent, rem clare percipi, quod unum vel alterum ipsi inexistentem clare percipiatur.

§. 34.

Si mens sibi conscia est, se objectum aliquod obscure percipere; perceptionem suam obscuram clare percipit. Etenim agnoscit perceptionem suam esse obscuram eamque a clara distinguit. Perceptionem igitur, quam habet, obscuram clare percipit (§. 31.).

Perceptio clara perceptionis obscura.

Propositionem hanc prætermittere non debuimus, propterea quod nobis compertum est perceptionem claram perceptionis obscuræ cum perceptione objecti, quæ obscura est, confundi. Percipit anima ea, quæ in se sunt, adeoque suas quoque, quas habet, perceptiones vel clare, vel obscure. Etenim perceptiones ejus non minus sunt objectum facultatis percipiendi, quam res aliæ, quas percipit. Atque ideo mens perceptionum suarum conscia est, quatenus scilicet perceptioni adhæret ad perceptionem.

§. 35.

Claritas perceptionum est id, quod *Lumen animæ* appellare solemus. Et hinc anima dicitur *illuminari*, quatenus acquirit facultatem res clare percipiendi, ut sibi conscia sit ejus, quod percipit, atque ea, quæ percipit, probe a se invicem distinguat.

Lumen animæ.

Non

Non hic sumimus terminos in sensu theologico, sed philosophico, qui cum communi loquendi usu convenit. Transferuntur autem termini a rebus materialibus ad animam propter similitudinem. Quemadmodum enim in mundo materiali lumen efficit, ut res materiales videamus; ita claritati perceptionum tribuendum, ut earum nobis conscii simus, atque perceptionem unam ab altera distinguere valeamus. Et quemadmodum oculus absque lumine nihil videre potest; ita etiam mens absque claritate perceptionum non conscia sibi esse potest ejus, quod percipitur. Similitudinem explicamus, ut constet denominandi ratio. Res ipsa autem absque ista similitudine intelligitur & cum arbitrium sit, quo nomine eam insignire velimus, definitio quoque nominalis luminis animæ absque ista similitudine intelligitur & terminus ita explicatus sumitur in significato proprio (§. 148. Log.).

§. 36.

*Tenebra in
anima.*

Ex adverso obscuritas atque defectus perceptionum est id, quod *Tenebrarum* nomine in anima venit.

Quemadmodum enim in mundo materiali tenebræ sunt defectus luminis, seu ejusdem privatio; ita etiam in anima tenebræ esse debent defectus claritatis perceptionum. Sed perceptiones, quæ claræ non sunt, obscuræ sunt (§. 31. 32.). Ergo tenebrarum nomine in anima appellari debet obscuritas perceptionum, vel earum defectus. Hæc denuo monemus, ut denominandi ratio pateat. Ceterum jam intelligitur, quomodo explicari possit alteri, nobis jam in re aliqua plus luminis fuisse affusum, quam ante habueramus.

§. 37.

*Fundamen-
tum perce-
ptionum di-
stinctarum
& confusa-
rum,*

Si rem clare percipimus aut ea, quæ eidem insunt, a se invicem distinguere & alteri sigillatim enunciare valemus, aut id in potestate nostra minime positum deprehendimus. Patet idem per exempla eunti. E. gr. dum video arborem, truncum distinguo a ramis, ramos a furculis, furculos a foliis, folia a gemmis. Similiter in foliis colorem viridem distinguo a colore corticis, quo teguntur truncus, rami & furculi; fibras per ipsum extensas a substantia reliqua minime fibrosa. Dum faciem hominis intueor, in eadem nasum, frontem, palpebras, oculum, genas, os, mentum a se invicem distinguo. Similiter in oculo distin-

distinguo pupillam ab uvea, uvea ab adnata, qua vestitur sclerotica, figuram oculi globosam a figura nasi vel oris, volubilitatem oculi a situ fixo partium aliarum. Dum aurum manui impositum adspicio, oculis colorem, manu gravitatem in eodem discerno. Enimvero colorem flavum auri a colore viridi foliorum & hunc ab illo optime distinguo, diversitatis utriusque mihi conscius: sed in ipsa flavedine, in ipsa viriditate nihil distinguo, ut utramque adeo clare percipiam, ut flavedinem auri a flavedine tulipæ, viriditatem foliorum nascentium a viriditate adulatorum optime distinguam.

Non jam distinguimus inter ea, quæ in rebus perceptibilibus distinguimus; sed in eo acquiescimus, quod multa subinde in uno percipiamus, neque a se invicem diversa esse agnoscamus; subinde autem in re percepta nihil prorsus diversi percipiamus.

§. 38.

Si in re percepta plura sigillatim enunciabilia distinguimus, *Perceptio* clara dicitur *distincta*. *Perceptio distincta*

Exempla dedimus de arbore, de foliis, de facie humana, de oculo, *quamam sit.*
de auro, milleque alia dari possunt unicuique ubivis obvia.

§. 39.

Si in re clare percepta plura separatim enunciabilia non distinguimus, *Perceptio* dicitur *confusa*. Est scilicet perceptio *confusa* *quid sit.*
confusa clara quidem, sed non *distincta*.

Exempli loco sunt flavedo auri, viriditas foliorum, & in genere colores omnes. Pertinent huc etiam sapes & odores, in quibus nihil distinguimus, quod sit separatim enunciabile. Perceptionem confusam negative definire licet, quia jam positive definivimus *distinctam*, cui opponitur (not. §. 85. *Ontol.*). Ceterum hic aliquid singulare obtinet, quod id, quod negativum videtur, quatenus in definitione ponitur, æquipolleat positivo. Etenim non minus nobis consci sumus potentie distinguendi plura perceptibilia in uno perceptibili, quam impotentie tale quid faciendi: immo impotentie ut nobis magis consci simus, singulari quadam ratione accidit. Observamus in nobis conatum plura in re una, v. gr. colore rubro, distinguendi, eumque

que irritumprehendimus: observamus autem tanto majorem, quominus eum succedere experimur. Quamobrem impotentia notio involvit notionem conatus frustranei, adeoque quidpiam maxime positivi. Ista igitur impotentia percipiendi plura in re perceptibili una optimo jure aequipollet differentia specificae positivae, ita ut in definienda perceptione confusa adhiberi possit, etiamsi distincta perceptio nondum fuerit definita. Opportune talia monemus, cum plurimos esse observemus, qui carpunt, quae non intelligunt. Dispellendae sunt praedictorum nebulae, ne claritati notionum officiant mentisque aciem hebetent.

§. 40.

*Perceptionis
partialis &
compositae
differentia.*

Perceptio partialis est, quae in perceptione rei alterius contenta. *Ast composita* dicitur, quae ex pluribus partialibus constat.

E. gr. Dum arborem percipimus, truncum, ramos, surculos, folia, gemmas percipimus. Arboris igitur perceptio composita est, perceptiones trunci, ramorum, surculorum, foliorum, gemmarum partiales sunt. Folium si sigillatim contemplemur, & in eo colorem viridem, fibras per ejus substantiam dispersas & reliquam substantiam distinguimus, perceptiones fibrarum & situs earundem, coloris viridis ac materiae a fibris diversae sunt perceptiones partiales; ipsa vero folii perceptio composita est. Similiter perceptiones flavedinis ac gravitatis auri sunt partiales; ipsa vero auri perceptio composita est. Ex his exemplis liquet, perceptiones partiales esse non modo perceptiones partium, ex quibus componitur res percepta; verum etiam determinationum, quae eam ingrediuntur, seu qualitatum & quantitatis ipsius. Quoniam vero determinationes intrinsecae omnes simul uti unum spectantur cum re percepta; res percepta per modum totius & determinationes intrinsecae ad eam spectantes instar partium considerantur (§. 341. *Ontol.*). Atque inde denominatio ortum trahit. Insunt plures determinationes intrinsecae etiam in iis, quae ad mentem nostram spectant, seu quorum nobis tanquam in nobis conscii sumus, quatenus eorum conscii sumus. Quamobrem perceptiones eorum, quae menti insunt, vel in ea accidunt, in perceptiones partiales resolvuntur. Exempli loco non solum sunt ea, quae haecenus definita fuere; verum etiam illa, quae in sequentibus definiuntur.

§. 41.

§. 41.

Si perceptiones particulares fuerint claræ, composita distincta est. Etenim si perceptiones particulares fuerint claræ, *Origo claritatis in perceptionibus.* plura sigillatim enunciabilia in re percepta a se invicem distinguimus (§. 31. 40.). Enimvero si in re percepta plura sigillatim enunciabilia distinguimus, perceptio ejus distincta est (§. 38.). Ergo si perceptiones particulares fuerint claræ, composita distincta est.

Habes hic ortum perceptionis distinctæ. Cur enim perceptio arboris distincta est? quia clare percipis truncum, ramos, furculos, folia, arbores, ita ut sigillatim percipere possis singulas istas partes. Cur folium percipis distincte? quia in eodem percipis clare colorem, fibras per longitudinem & latitudinem extensas atque reliquam ejus substantiam, figuram quoque & magnitudinem, partiumque situm. Sane si nihil eorum a se invicem discernere posses, id quod accidere deberet, ubi in arbore vel folio, quæ insunt, clare non perciperes; nec arborem vel folium distincte perciperes.

§. 42.

Qui plura sigillatim enunciabilia in eodem perceptibili clare percipit; is magis distincte idem percipit altero, qui pauciora in eodem clare percipit. Quando enim in eodem perceptibili plura sigillatim enunciabilia clare percipiuntur, perceptiones particulares, ex quibus rei perceptio constat, claræ sunt (§. 40.). Enimvero si perceptiones particulares fuerint claræ, composita ex iis distincta est (§. 41.), consequenter quo plures perceptiones particulares claræ fuerint, eo magis distincta esse debet composita. Ergo qui in eodem perceptibili plura sigillatim enunciabilia clare percipit, is magis distincte idem percipit altero, qui pauciora in eodem clare percipit. *Gradus distinctæ perceptionis.*

Per hoc principium æstimatur gradus distinctæ perceptionis, qui in eodem subiecto diverso tempore, & in diversis subiectis eodem tempore diversus apprehenditur. Atque hoc ipso via ad sublimia non minus, quam utilia atque sæcunda sternitur.

§. 43.

*Perceptio
totalis.*

Perceptionem totalem appello eam, quæ complectitur eas omnes, quas dato aliquo momento simul habemus. Quamobrem cum perceptionem totalem ut unum quid consideremus, perceptiones rerum, ex quibus constant, ejus respectu tanquam partiales considerantur, ac ideo a nobis quoque partiales dicentur (§. 40.).

E. gr. Si in campo integrum exercitum contueor, uno obtutu præter eum simul campum, sylvam e longinquo spectatam, cæli ac terræ confinia & objecta alia complector. Immo eodem momento, absentia quoque objecta mihi repræsentor, veluti templum, in quo sæpe vidi militum præfectum. Subeunt quoque mentem meam cogitationes variae pro diversitate objectorum mihi repræsentatorum. Omnes istæ perceptiones simul absolvunt perceptionem totalem, quæ cum pro una habeatur ratione temporis, quo omnes eam ingredientibus conjunguntur, aut vi simultaneitatis & continuitatis eam ingredientium, perceptiones singulorum objectorum una exhibitorum partiales appellantur. Non variatur hic significatus vocis perceptionis partialis, sicuti & eam, quæ composita dicitur (§. 40.), totalem appellare potuissimus, scilicet objecti, quod per eam nobis exhibetur: quod ut intelligatur, simili rem declarari necesse est. Perceptiones nostræ, quæ & ideæ appellantur, cum imaginibus rerum comparantur, immo cum iisdem ad commune genus reduci possunt: id quod in Psychologia rationali ostendetur. Jam imago dicitur animalis, arboris, plantæ, ædificii, hominis & ita porro, quæ unicum istiusmodi objectum repræsentat. Quodsi vero in eadem tabula conjunguntur plures istiusmodi imagines, ut vi continuitatis unumquid efficiant; omnes simul pro una imagine habentur. Nimirum continuitas unitatis notionem superaddit.

§. 44.

*Perceptio
totalis
quando
distincta.*

Si perceptiones partiales, quæ totalem ingrediuntur, claræ sint; perceptio totalis distincta est. Etenim si perceptiones partiales claræ sint, objecta per eas repræsentata a se invicem distinguere valemus (§. 31.). Enimvero quoniam perceptio totalis partiales istas omnes in se complectitur (§. 43.); in ea plura sigillatim enunciabilia a se invicem distinguimus, consequen-

quenter & in objecto ejus, quod repræsentat; perceptio igitur totalis est distincta (§. 38.).

Adest hic quid fictum, quatenus nempe simul percepta consideramus instar entis unius & res singulas, quæ una percipiuntur, tanquam partes unum totum constituentes, seu tanquam determinationes entis isti intrinsecas: sed hanc fictionem fert usus loquendi (not. §. 43.).

§. 45.

Si perceptiones totales distinctæ sunt, anima est in statu Status perceptionum distinctarum. Etenim quotidie in nobis experimur, perceptionem totalem unam in anima continuo substitui alteri, aut partiales, quæ eidem insunt, alias abire, alias superaccedere, ita ut perceptio totalis non maneat eadem (§. 181. Ontol.). Perceptiones adeo totales continuo mutantur (§. 290. Ontol.), adeoque statum ejus constituunt (§. 705. Ontol.). Quoniam igitur perceptiones totales distinctæ sunt per hypoth. anima tunc temporis est in statu perceptionum distinctarum, quando totales distinctæ sunt.

Poteramus propositionem præsentem sumere per modum definitionis nominalis: sed quia denominationi inest veritas, consultius fuit eandem demonstrari. Qui in resolvendis notionibus multum versati sunt; his satis superque perspectum est inesse sæpissime definitionibus nominalibus veritatem, quando scilicet nomen rei veritati consentaneum, ut idem sit, quod dicitur. Deditus jam olim exempla in Elementis Matheseos Latinis, Arithmetica, Geometria, Astronomia. Cum enim studium Matheseos potissimum urgeamus, ut methodi compotes ejus tractatione reddamur; ad tam præclarum usum idem aptare volumus, quemadmodum debuimus. Quamobrem definitiones nominales, quibus inest veritas, ad propositiones demonstrativas reduximus, utur probe gnari, nil quicquam decedere evidentia Mathematicum, si more recepto ex communibus observationibus emanant, quæ definitionibus nominalibus respondent. Neque consilium hoc mutavimus iniquas aliquorum censuras experti, qui, cum sibi acuminæ præstare videntur, defectu acuminis deproperant judicia.

§. 46.

Si perceptiones partiales, quæ totalem ingrediuntur, fuerint totalis.

*quando sit
obscura.*

rint obscuræ ; perceptio totalis obscura est. Etenim perceptio totalis ex partialibus constat (§. 43.). Quare si singulæ partiales obscuræ sunt, nihil eorum, quæ in totali continentur, ab aliis perceptibilibus distinguere valemus (§. 32.), consequenter nec ea simul sumpta, quæ una perceptione totali comprehenduntur, ab iis simul sumtis, quæ exhibentur per totalem aliam, discernere licet. Perceptio igitur totalis obscura est.

Facile apparet in propositionis hypothese supponi nihil prorsus clare perceptum in perceptione totali contineri, etsi alias non obstat, ut in perceptione obscura alicujus objecti insint nonnulla, quæ clare percipiuntur (§. 33.).

§. 47.

*Status per-
ceptionum
obscura-
rum.*

Si perceptiones partiales obscuræ sunt, anima est in statu perceptionum obscurarum. Eodem, quo supra (§. 45.), modo id ostenditur, nisi quod in principiorum numerum referenda sit propositio præcedens.

An detur istiusmodi status animæ, jam non disquirimus: instituetur disquisitio suo loco. Quoniam status iste, quo anima perceptiones habet obscuras, opponitur alteri, quo perceptio totalis distincta est; status perceptionum obscurarum dici etiam potest *status perceptionum confusarum*, si in denominatione veritatis non habetur ratio, sed ea arbitrario fit.

§. 48.

*Idea quid
sit.*

Repræsentatio rei dicitur *Idea*, quatenus rem quandam refert, seu quatenus objective consideratur.

Si objectum aliquod in mente repræsentatur, distinguere debet actus mentis, quo fit repræsentatio; repræsentatio ipsa, quatenus objectum quoddam menti exhibet, & denique actus, quo mens repræsentationis istius, consequenter rei, qualis repræsentatur, conscia sibi est. Actus prior, quo fit repræsentatio, est perceptio (§. 24.); actus posterior, quo mens sibi conscia est repræsentationis, vocatur apperceptio (§. 25.); ipsa vero repræsentatio materialiter sumpta aut in relatione ad objectum, quod repræsentatur, dicitur *idea*. Vulgo perceptiones & ideæ a se invicem non distinguuntur, quemadmodum nec perceptio ab apperceptione. Enimvero cum in Psychologia intersit distinguere quam accu-

accuratissime, quæ in se diversa sunt; nostrum quoque fuit sublata synonymia terminis vindicare significatum convenientem, quem non sine magna probabilitate originarium esse suspicamur. Ipsa forma vocabuli insinuat significatum perceptionis originarium, quod ea habita fuerit pro actione mentis. Et quia idea cum imagine comparatur (not. §. 43.); haud obscure intelligitur, quod significatus objectum respiciat.

§. 49.

Repræsentatio rerum in universali seu generum & specierum *Notio* a nobis appellabitur. *Notio quid sit.*

Nimirum paulo inferius apparebit, ab ideis rerum singularium abstrahi ea, quæ pluribus communia sunt & similitudinem quandam inter eas constituunt, & quatenus subjecto non tribuimus nisi determinationes istas communes entia in universali constitui. Quamobrem si nobis objectum repræsentamus cum iis determinationibus, quæ pluribus individuis communia sunt, separatis iis, quæ communia non sunt, dicemus in posterum istam repræsentationem notionem. Notandum vero est, notiones ingredi non modo essentialia, verum etiam attributa & modos; modo prædicata sint communia. Atque hac ratione nihil circa rerum in mente repræsentationem occurrit, quod non peculiari nomine sit insignitum. Ceterum cum definitiones sint arbitrariæ, de consensu aliorum non multum sumus solliciti, etsi non difficile foret eundem stabilire.

§. 50.

Notionum differentia eadem est, quæ perceptionum: *Notionum sunt nimirum & notiones vel claræ, vel obscuræ; claræ vel distinctæ, vel confusæ.* Sed cum de his & aliis hinc porro pendentibus differentiis abunde jam dixerimus in Logica integro capite (§. 77. & seqq.), quæ ibi relegi possunt, repetere supervacaneum judicamus.

Etsi enim in Logica sub notione quamlibet rei repræsentationem comprehendere libuerit (§. 34. Log.); id tamen minime obstat, ut de notione ibidem dicta jam de solo ente universali interpretemur, ad quod non minus, quam ad ens singulare applicari possunt. Atque hinc apparet, nullum ex tantisper variata significatione vocis erroris periculum esse metuendum.

§. 51.

§. 51.

*Cognoscere
quid sit.*

Rem cognoscere idem est ac ejus notionem, vel ideam sibi acquirere.

Ita Deum cognoscit, qui sibi acquirit notiones attributorum divinatorum. Triangulum cognoscit, qui trianguli notionem sibi comparat. Animam cognoscimus, dum nobis comparamus notiones eorum, quæ ipsi insunt.

§. 52.

*Cognitio
quid sit.*

Cognitio est actio animæ, qua notionem vel ideam rei sibi acquirit.

Actionem animæ cum effectu ejus pro uno eodemque habentes per cognitionem ideam quoque & notionem intelligere solemus, loquendi inconstantia: sed nostrum est fixum verborum tueri significatum. Animam nobis concipimus tanquam causam efficientem idearum atque notionum, quæ virtute sua ideas producit & inde porro notiones format. Hic igitur distinguimus ideam a notionem, actionem animæ, qua ideam & notionem producit atque format. ab utraque, productionem ideæ a notionis formatione. Idea est rei singularis imago (§. 48.), quæ entis in universali imaginem seu notionem in se continet (§. 49.). Actio, qua idea producitur, est perceptio (§. 24.), cui apperceptio superaccedit (§. 25.). Actiones, quibus notiones rerum præsertim distinctæ formantur, complures sunt, de quibus postea agemus operationes intellectus explicaturi: hoc enim nomine appellantur. Perceptio & operationes intellectus simul communi nomine cognitio dicuntur. Apparet igitur, vocabulis singulis ex nostris definitionibus respondere significatum realem & per ea discerni, quæ menti diversa insunt. Atque hoc sufficit in definitionibus nominalibus. Quamobrem cum nemine ferram contentions reciprocabimus, si acumine sufficiente destitutus non separat a se invicem discernenda, atque ideo pro synonymis habet terminos, quos nos tanquam formaliter diversos a se invicem distinguimus.

§. 53.

*Facultas
cognoscendi
quid sit.*

*Quatenus cognitio in mente possibilis est, hoc est, quatenus fieri potest, ut rem cognoscamus, menti facultatem cognoscendi tribuimus (§. 29.): ut adeo *Facultas cognoscendi* ea sit, qua ideas ac notiones rerum nobis acquirimus.*

Definiri etiam potest per facultatem, qua res cognoscimus, cum & facultas in superioribus fuerit definita (§. 29.), & quando rem cognoscere dicamur explicatum (§. 51.), ut adeo definitum non possit dici ingredi definitionem contra expressam Logicæ legem (§. 168. Log.). Inest denominationi veritas, quemadmodum in terminis complexis haud raro accidere solet, si nempe ex simplicium notione deducitur notio complexi, veluti hic ex notione facultatis (§. 29.) & cognitionis (§. 51. 52.) notio facultatis cognoscendi resultat per combinationem, sicuti terminus complexus per combinationem simplicium resultat.

§. 54.

Facultatis cognoscendi pars inferior dicitur, qua ideas & notiones obscuras atque confusas nobis comparamus.

Plurimum interest facultatis cognoscendi partem inferiorem distingui a superiori. Discrimen hoc jam annotarunt veteres, etsi in Logica, arte inveniendi & moralibus non eum fecerint usum, qui inde expectandus.

§. 55.

Facultatis cognoscendi pars superior est, qua ideas & notiones distinctas acquirimus.

Nemo offendatur partis appellatione, inde inferens nos menti humanæ contra ejus simplicitatem tribuere partes, ac inde materialissimum exsculpere conetur, ut dignum inter consequentiaris obtineat locum (§. 1047. Log.). Pars enim facultatis cognoscendi inferior & superior terminus philosophicus est, cui nulla inest veritas. Ex terminorum adeo simplicium notionibus non derivanda est notio eidem respondens, sed dispiciendum, utrum ea, quæ eidem tribuitur, in anima contineatur, nec ne. Non ideo Astronomus affirmat, planetas incerta lege hinc inde circumvagari & affixas superficiei sphaeræ mundanæ affigi, quod illas stellas planetas, sive erroneas, has vero affixas appellet.

CAPVT II.

De Sensu.

§. 56.

*Principium
cognoscendi
corpus su-
um.*

Observamus aliquod corpus & in eo mutationes, quibus contingentibus, corpora istarum mutationum causas percipimus. Immo quæ sunt in mundo adspectabili, non aliter percipimus, nisi quatenus mutationes quasdam corpori huic inducunt. Etenim si corpora lumen in oculum, quæ corporis istius pars est, immittunt & mutationem quandam corpori inducunt, in Physica distincte explicandam; illorum nobis tanquam extra nos nobis conscii sumus, adeoque ea percipimus (§. 24.). Similiter si corpus aliquod corpus istud tangit, contactus hujus nobis conscii sumus, eumque adeo percipimus. Quod si impediatur, ne istæ mutationes in hoc corpore contingant, v. gr. si oculos claudimus, vel corpus a contactu arcemus; omnis quoque statim cessat perceptio.

Differentia corporis hujus a corporibus aliis, quæ percipimus, cuilibet adeo obvia est, ut, velit nolitve, eam animadvertat, ejusque sibi conscius sit, utut in confusa perceptione acquiescat nec eam ad distinctam reducat, sicuti nunc a nobis factum.

§. 57.

*Dependen-
tia perce-
ptionum a
corpore.*

Quoniam per mutationes, quæ in corpore isto accidunt, intelligimus, cur res materiales in mundo adspectabili percipiamus, & cur tales potius percipiamus, quam aliter; ratio perceptionum rerum materialium in mutationibus, quæ in corpore isto contingunt, continetur (§. 56. Ontol.), adeoque perceptiones rerum materialium in mundo adspectabili a mutationibus in corpore isto contingentibus dependent (§. 851. Ontol.).

Dependentia hæc adeo obvia est, ut nemo eam in dubium vocare ausit; sed quilibet ejusdem intime sibi sit conscius. Quamobrem summi poterat, nisi terminum dependentiæ in philosophia prima distincte expli-

explicasset, adeoque de perceptionibus rerum materialium in mundo adspectabili a philosopho nil prædicari conveniret, nisi quod eadem convenire ex ipsis notionibus colligatur. Ceterum hac ipsa applicatione notionis philosophiæ primæ fiunt clariores, earumque fecunditas, utilitas & cum notionibus communibus consensus clarissime perspicitur, ut tanto securius iisdem in posterum fidamus.

§. 58.

Corpus istud dicimus *nostrum*, a quo dependent perceptiones rerum materialium in mundo adspectabili, quas *nostræ* notio habemus.

Atque ita apparet, quod aliquam corporis nostri notionem habeamus, & quam sit illa notio, quomodo ad eam perveniamus. Nemo existimet, nos terminum notionis hic de re singulari usurpare. Quando enim corpus nostrum distincta definitione explicamus, idem per modum rei universalis consideramus. Plura enim sunt corpora, quæ a diversis subjectis dicuntur corpora sua, & quorum unumquodque individuum aliquod appellat *corporis mei* nomine. Immo quando ego corpus hoc, quod jam tango propriis manibus, pro corpore meo agnosco, facta distincta applicatione notionis, quam dedimus, corporis nostri ad se, tum corpus meum in propositione majore per modum rei universalis concipio, quemadmodum in syllogismo proprio fieri solet (§. 351. 352. Log.).

§. 59.

Corpora in mundo adspectabili nobis *præsentia* dicuntur, quæ mutationem corpori nostro inducere valent, nisi scilicet ullum superaccedat obstaculum accidentale.

Ita solem dicimus præsentem, si eum videre possumus. Horologium est præsens, si ejus sonum audio. Flos est præsens, si olerem naribus percipio & ita porro. Scilicet tum nobis dicitur præsens corpus alterum, si in corpus nostrum agere valet. Impedimenti enim accidentalis rationem minime habemus. Sol nobis præsens est, dum eum respectu corporis nostri obtinet situm, ut eundem videre possimus; etsi objecto quodam interposito visus interceptatur.

§. 60.

Quoniam corpora nobis præsentia sunt, quæ mutatio-

*situ quo-
modo pen-
deat.*

nes corpori nostro inducere valent, nisi ullum obstaculum accidentale id impediat (§. 59.), corpora vero ista percipimus, quæ mutationes corpori nostro inducunt (§. 56.), tales scilicet, a quibus perceptiones rerum in mundo adspectabili pendent (§. 58.); corpora ista nobis præsentia sunt, quæ eum ad corpus nostrum habent situm, ut percipi a nobis possint, nisi accidentale aliquod obstaculum adsit.

Si tempore nocturno in hypocausto nostris oculis directe opponatur aliquod objectum, candela accensa, idem videmus, adeoque nobis præsens est (§. 59.). Quodsi candela extinguitur, accidentale quoddam impedimentum superaccedit, ne videri amplius possit. Non tamen ideo præsens esse desinit, sufficit enim objectum eum ad oculum retinere situm, ut videri possit, nisi ex accidente cesset visionis actus, veluti in casu nostro ob defectum luminis.

*Præsentia
corporis in
dato loco.*

§. 61. Corpus aliquod dicitur præsens aliquo in loco, si intra terminos consistit, quibus locum istum definimus.

E. gr. Hypocaustum terminatur parietibus: quamobrem quicquid intra horum ambitum continetur, in hypocausto præsens est. Non confundenda est præsentia in dato aliquo loco cum ea, quæ corpori alicui tribuitur respectu nostri. Præsentia terminus relativus est, qui objecti unius existentia ad coëxistens aliud relationem involvit. Ideo objectum in eodem loco constitutum diverso respectu & præsens dici potest, & absens. Ita campana, cujus sonum percipio, præsens mihi est; non autem præsens est in eo loco, ubi ego sum, nisi quando turrim conscendens ibidem commoror, ubi campana suspensa conspicitur. Visus cum sit sensus potior, & cum tactus objectum supponat propinquissimum; in præsentia corporum dijudicanda vulgo visus magis atque tactus, quam aliorum sensuum habetur ratio.

§. 62.

*Præsentia
corporis no-
stri.*

Corpus nostrum nobis semper præsens est. Illud enim corpus nostrum est, a quo dependent perceptiones rerum materialium in mundo adspectabili, quas habemus (§. 58.). Enimvero continuo experimur, ipsum hoc corpus a nobis percipi: partes

partes enim ipsius tangere licet propriis manibus & videre propriis oculis partim visione directa, partim reflexa, seu mediante speculo. Quare cum partes corporis nostri istiusmodi mutationes in ipso corpore nostro producere valeant, ut easdem percipiamus, idque nullo non tempore accidat; corpus nostrum nobis continuo præsens est (§. 59.).

Nemo non præsentiam corporis sui continuam inde colligit, quod idem continuo percipiat, etsi abesse subinde possit apperceptio, ut scilicet perceptionis istius non semper actu nobis sumus conscii (§. 25.). Unde & hoc corpus nostrum esse ex eo colligi solet, quod nobis semper sit præsens, cum corpora alia nunc sint præsentia, nunc absentia.

§. 63.

Absens dicitur, quod præsens non est. Corpora igitur Absens quid absentia a nobis sunt, quæ istiusmodi mutationem corpori nostro sit a nobis. inducere minime valent, a qua perceptio aliqua pendet (§. 59.), aut quæ talem ad corpus nostrum situm habent, ut a nobis percipi non possint, etiamsi accidentale obstaculum nullum adsit (§. 60.).

Ex eo, quod aliquid præsens non sit, absentiam ejus colligunt vulgo omnes. Quamobrem si constet, unde innotescat rei præsentia; hoc ipso etiam liquet, unde absentia manifesta sit.

§. 64.

Similiter quia absens est, quod præsens non est (§. 63.); *Absentia in dato loco absens est, si intra terminos istos non consistit, quibus dato loco. locum istum definimus (§. 61.).*

Ita abest e hypocausto, qui in spatio illo non est, quod parietibus hypocausti continetur. Hæc facilia sunt; non tamen inutilia, præsertim si ad universalia, quæ insunt, attenditur.

§. 65.

Perceptiones, quarum ratio continetur in mutationi- *Sensatio* bus, in organis corporis nostri qua talibus contingentibus, dicun- *quid sit.* tur *Sensationes.* Definiri etiam posset *Sensatio*, quod sit per-
E 3 ceptio

ceptio per mutationem, quæ fit in organo aliquo corporis nostri qua tali, intelligibili modo explicabilis.

E. gr. Quando objectum aliquod intuens percipio, ex mutatione, quæ in oculo contingit, intelligibili modo explicari seu ratio reddi potest, cur tale appareat potius, quam aliter. Illa igitur objecti representatio e sensationum numero est. Similiter dum dolorem vulnere corpori inflicto percipio; cur eam percipiam & cur talem percipiam, ratio redditur ex mutationibus, quæ in loco vulneris corpori accidunt. Quare perceptio doloris e sensationum numero est.

§. 66.

Organi sensorii descriptio.

Organum sensorium appellatur organum seu pars organica corporis, in cuius mutationibus continentur rationes perceptionum rerum materialium in mundo adspectabili.

Ita organum sensorium est oculus: ex mutationibus enim, quæ eidem ab objectis externis inducuntur, per organicam ipsius structuram possibiles, intelligitur, cur jam hoc potius videamus objectum, quam aliud, & cur tale hoc appareat objectum.

§. 67.

Sensus definitio.

Facultas sentiendi sive *Sensus* est facultas percipiendi objecta externa mutationem organis sensorii qua talibus inducentia, convenienter mutationi in organo factæ.

Facile perspiciunt attentiores, cur addamus restrictionem. Possunt accidere organo sensorio a causis extrinsecis mutationes, quæ a structura organica minime pendent, veluti si oculo vulnus infligitur, vel si idem contunditur. Neque enim vulnus vel contusio est mutatio, quæ oculo vi structuræ suæ organicæ, seu quatenus est organon ad videndum aptum, accidit. Ceterum hic sensum concipimus, quatenus in anima est, quemadmodum & sensationem (§. 65.), e si non negemus, ad sensationem & facultatem sentiendi pertinere etiam ea, quæ in corpore illi, quod in anima est, respondent, quatenus facultas sentiendi spectatur ut facultas hominis & sensorio ut quid ad hominem spectans. Enimvero quod ad corpus spectat, in Physica explicari debet suoque tempore explicabitur: neque adeo hujus loci est.

§. 68.

Sensuum numerus.

Quoniam quinque dantur in corpore humano organa, quo-

quorum qua talium mutationibus suæ in anima perceptiones respondent, quemadmodum unusquisque in se experitur; *sensus* quoque *quinque numerantur*, scilicet *visus*, *auditus*, *olfactus*, *gustus*, *tactus*.

Cur non plures quam quinque sint sensus, nostrum jam non est inquirere. Luber tamen fundamentum illorum sensuum exponere, cum ad intelligendas definitiones sequentes plurimum faciat. Scilicet aut corpora alia nostrum immediate contingunt, aut mediate. Si immediatus est contactus, tactui locus est. Quodsi corpus immediate nostrum tangere nequit, aut in ipsum agit, mediante lumine, aut mediante sono, aut mediantibus effluviis, aut mediantibus quibusdam corpusculis, quæ ejusdem massæ permixta sunt. In primo casu visui, in secundo auditui, in tertio odoratui, in quarto gustui locus est.

§. 69.

Facultas videndi sive *Visus* est facultas percipiendi objecta, *Visus quid* convenienter mutationi vi luminis in oculo factæ. *fit.*

Definimus hic visum respectu animæ: quidem in corpore contingat, dum videmus, in Physica explicabimus. Idem tenendum est de sensibus ceteris, de quibus in proxime sequentibus articulis agitur. Mutationem igitur, quæ in oculo contingit, dum videmus, hic ut explicemus necesse non est. Quodsi tamen dependentiam perceptionum in mente a mutatione in organo distincte comprehendere volueris, cum ista per hanc intelligibili modo explicabilis sit, ad perceptionem mentis penitus intelligendam non parum conducit, si mutatio in organo penitus intelligatur. Ita v. gr. visio clara est, si clara fuerit in oculo imago, quæ in ejus fundo radiis luminis illapsis delineatur; distincta est visio, si imago ista distincta fuerit. Qui vel Opticam didicit, vel in Physica probe versatus est; is dependentiam visus a mutatione in oculo vi luminis factam optime perspicit.

§. 70.

Facultas audiendi sive *Auditus* est facultas percipiendi sonum, convenienter mutationi per eundem in aure factæ. *Auditus quid fit.*

Discernimus auditu sonos omnis generis, quos inter etiam sunt voces animantium atque hominum, itemque loquela.

§. 71.

§. 71.

*Odoratus
quid sit.*

Facultas olfaciendi, sive *Olfactus* est facultas percipiendi odores rerum, convenienter mutationi, vi effluviiorum a corporibus odoriferis exhalatorum in naribus factæ.

Quod corpora odorifera emittant effluvia & qualia sint ista effluvia, in Physica disquiremus.

§. 72.

Gustus quid sit.

Facultas gustandi, sive *Gustus* est facultas percipiendi sapores, convenienter mutationi, quam objecta sapida dentibus comminuta in lingua producant.

Quidnam sit in objectis lapidis, quod linguæ mutationem quandam inducit, dum comminuta saliva perfunduntur, denuo in Physica disquiremus.

§. 73.

Tactus quid sit.

Facultas tangendi, sive *Tactus* est facultas percipiendi qualitates & quantitatem corporum, convenienter mutationi, quam per contactum corporis nostri in eodem producant.

Istiusmodi qualitates sunt asperitas, lævitas, durities, molliities, gravitas. Tactu etiam discernuntur nonnulla, quæ visu alias discerni solent, veluti figuræ & magnitudo: utat hic perceptiones aliæ sociæ suppetias ferant, veluti in discernendis figuris perceptio motus digitorum vel manus juxta ductum perimetri.

§. 74.

*Sensatio
quanam
fortior.*

Sensatio una fortior dicitur altera, quæ majorem claritatis gradum habet, seu cujus nobis magis conscii sumus quam alterius. Idem intellige de perceptione quacunque.

E. gr. Major est claritas in perceptione luminis solaris, quam lunaris, eademque in priori casu sensatio fortior, quam in posteriori. Similiter major claritas est in fœtore aëæ fœtidæ, quam liliiorum contritorum, adeoque in illo casu sensatio fortior, quam in hoc est.

§. 75.

*Sensatio
quanam
debilior.*

Sensatio una debilior est altera, quæ minorem claritatis gradum habet, seu cujus nobis minus conscii sumus quam alterius. Idem intelligitur de perceptione quacunque.

Ita minor est claritas in perceptione luminis lunaris, quam solaris, adeoque illa debilior hac altera. Similiter in perceptione fœtoris liliorum contritorum minor est claritas, quam in perceptione fœtoris asæ fœtidæ, adeoque illa hac altera debilior est.

§. 76.

Sensatio fortior obscurat debiliorem, ita ut subinde debiliorem prorsus non appercipiamus. Lumen Solis atque Lunæ quando simul percipimus, Luna instar tenuis cujusdam nubeculæ pallet. Luminis solaris perceptio clarior est perceptione lunaris, consequenter illa fortior (§. 74.); hæc debilior (§. 75.), quemadmodum nobis innotescit, si comparemus objecta lumine lunari perfusa cum objectis lumine solari collustratis. Quare cum interdiu lumen Lunæ palleat, quod noctu solum perceptum satis clarum deprehenditur; sensatio fortior obscurat debiliorem. Similiter lumen stellarum noctu satis clare percipitur, ast interdiu lumine solari vel luce diurna oculos occupante adeo obscure percipitur, ut ejus nobis prorsus non simus conscii, consequenter omnis cesser apperceptio (§. 25.). Sensatio luminis solaris multo fortior est sensatione luminis stellarum (§. 74.). Quare denuo patet, sensationem debiliorem obscurari a fortiori, & quidem ita ut debiliorem prorsus non appercipiamus. Idem obtinet in sensationibus aliis. Ita quilibet experitur verba loquentis non percipi præ sonitu campanarum. Est autem sonitus campanarum sonus vehementior voce loquentis, atque adeo ille clarius hac percipitur. Quoniam itaque illa sensatio fortior, hæc debilior (§. 74. 75.); sensatio fortior in auditu quoque debiliorem obscurat. Similiter sapor unus impedit, ne alium percipiamus. Et in vulgus notum est, odore gravi effici, ne fœtorem clare percipiamus. In utroque autem casu denuo ut ante colligitur, sensationem fortiorem obscurare debiliorem.

Magnum principium experientiæ est propositio præsens, quam ideo inferius ad majorem universalitatis gradum evehemus. Usus in
(Wolffii Psychologia.)

moralibus amplissimus est, quemadmodum suo tempore constabit. In arte quoque inveniendi non postremum sibi locum vindicat. In Physicis parebit ratio a priori, quatenus sensationes per mutationes in organo sensorio sunt explicabiles. Ceterum propositionis præsentis in casu speciali utilitatem dudum agnovere Optici, quibus in propositionum a posteriori stabilitarum numero fuit: lumen vehemens visibilia quædam obscurare, veluti lucem debiliorem, seu quando lux debilis cum forti conjungitur, quemadmodum videre est apud *Alhazenum* Opticæ lib. 1. n. 32. f. 20. ex editione *Risneri*. Principium vero istud opticum universalius effecit *Risnerus* Opticæ lib. 2. n. 20. dum ita enunciat: visibile majus officit minori. Visio multum valet ad sensationes omnes, immo porro ad perceptiones ac notiones omnes penitus intelligendas. Visio enim sensationis species est, adeoque cum ceteris sub eodem genere contentis communia habere debet (§. 241. *Ontol.*). Similiter sensatio perceptionum quædam species est (§. 67.), atque adeo denuo cum ceteris perceptionibus communia habere debet (§. cit. *Ontol.*). Et eodem modo patet, notionibus quoque communia esse debere cum perceptionibus. Unde consequens est, a visione abstrahi posse, quæ omni sensationi, immo perceptioni ac notioni omni respondent. Exemplum habemus in differentia perceptionum, quod aliæ sint claræ, aliæ obscuræ; aliæ distinctæ, aliæ confusæ. Etenim ex Elementis Opticæ *Euclidis* apparet, jam olim visionem distributam esse in claram & obscuram, & claram subdivisam in confusam atque distinctam. Ad notiones quoad rem ipsam illam differentiam applicavit *Valerianus Magnus*, e Capucinorum familia, in Logica: *Cartesius* vero etiam nomina retinuit. Utriusque vestigia secutus est *Leibnitius*, qui multum tribuit acumini *Valeriani Magni*, terminis cum *Cartesio* assumptis adjungens notiones *Valeriani* definitionibus *Euclideanis* apud *Herigonium* in Cursu Mathematico consentientes. Nos differentiam illam admisimus & ejus multiplicem jam in Logica usum fecimus, atque ad ulteriorem in Psychologia, Philosophia morali & Arte inveniendi transferemus, ob rationes modo fusius inculcatas, scilicet quod deprehenderimus, notionibus visionis obscuræ, claræ, confusæ, distinctæ inesse generales, aut eas potius ad generales revocari posse, atque hæc generales convenire ad amissum cum explicationibus *Valeriani* a *Leibnitio* in Actis Eruditorum A. 1684. p. 537. propositis, idem facturi, si nec *Valerianus*, nec *Leibnitius* ante de eo cogitasset, nec *Cartesius* terminos opti-

corum

corum ad omnem cognitionem promiscue transfulisset, quoniam nobis in more positum fuit a prima juventute scrutari universalia, quæ notionibus Mathematicorum eorumque methodo insunt, atque eadem ad Logicam perficiendam & mentem humanam cognoscendam applicare. Non vero invidemus aliis laudem suam, si qui ante nos viventes vel ea perspexerunt, quæ proprio Marte fuimus affecti, ut lubenter aliis accepta referamus etiam ea, quæ nobis debemus, modo nobis constet de eo, quid senserint alii.

§. 77.

Objectum sensibile, vel etiam *Sensibile simpliciter* dicitur, *Sensibilis* quod sensu percipi potest, seu, quod in organo sensorio aliquo *definitio*, efficere potest mutationem, per quam eidem in mente respondens perceptio explicari potest (§. 67.). Unde porro liquet, quid in specie dicatur *visibile*, *audibile*, *odorabile*, *gustabile*, *tactile*.

Probè hic notandum est, quod jam ex antecedentibus claret, sensibilia triplici modo considerari posse, vel quatenus insunt objecto, vel quatenus mutationem inferunt in organo sensorio, vel quatenus denique percipiuntur ab anima. Hic sensibile tertio modo consideratur, cum jam aliud non intendamus, nisi ut doceamus, quomodo a mente percipiantur objecta mutationem organici sensorii actione sua inducentia.

§. 78.

Anima in sensationibus suis nihil immutare potest, nec Forma per- unam alteri pro arbitrio substituere valet, dum *objectum sensi-* ceptionum *abile in organum sensorium agit.* Etenim sensationum ratio *ab arbitrio* continetur in mutationibus, quæ organici sensorii ab objectis *anima in-* sensibilibus inducuntur (§. 65.), adeoque positis istis mutationibus ponuntur & ipsæ (§. 118. *Ontol.*). Quoties itaque eadem mutatio in organo accidit & quamdiu eadem mutatio in organo subsistit, tamdiu quoque perceptio eadem (§. 189. *Ontol.*). Fieri igitur nequit, ut anima in sensatione seu perceptione objecti sensibilis pro arbitrio suo unum pro altero substituat, vel integram aliam esse jubeat, consequenter in sensa-
F 2 tion-

tionibus suis nihil immutare potest, nec integram mutare valet, dum objectum aliquod sensibile in organum sensorium agit (§. 290. *Ontol.*).

Idem etiam sic ostenditur. Ratio sensationum continetur in mutatione, quam objectum sensibile organo sensorio inducit (§. 65.), consequenter dum mutatio in organo contingit, sensatio in mente necessario est (§. 298. *Ontol.*), & quidem hæc potius & talis, quam alia (§. 56. *Ontol.*). Quare cum absolute necessarium in se immutabile sit, hypothetice autem necessarium tamdiu mutari nequeat, quamdiu salva est conditio, sub qua necessarium (§. 325. *Ontol.*); sensationes vero vel absolute, vel hypothetice necessariæ esse debeant *per demonstrata*; eadem tamdiu mutari nequeunt, quamdiu salva est mutatio in organo, consequenter fieri nequit, ut mutatione in organo eadem atque immutata anima quidpiam in sensatione immutet.

Idem etiam patet a posteriori. Si fragor tormenti aurem ferit, minime efficere potes, ut ejus loco percipias sonum blandiorem. Si foetor nares occupat, efficere nullo modo potes, ut vel ejus loco odorem suavem, vel foetorem saltem minus molestum percipias. Si ex data quadam distantia objectum quoddam adspicias, tui non est arbitrii, an majus, an vero minus; an hisce potius, quam aliis qualitatibus præditum objectum sentire velis. Nihil igitur in sensationibus mutare vales, sed tales utique admittere debes, quales te inconsulto oriuntur.

Nemo non hoc in se experitur, & qui sensationum dependentiam a mutationibus in organo sensorio perspicit atque adeo agnoscit illas per has intelligibili modo explicabiles esse; is abunde quoque convincitur de veritate propositionis hujus a priori: quem in finem addidimus demonstrationem, cum pro instituto nostro sufficere videretur, ut eam a posteriori stabiliremus. Judicent vero posteri, quid sentiendum sit de hominibus fatalem omnium rerum necessitatem ad destructionem libertatis animæ plenariam cum everfione omnis religionis, virtutis, justitiæ, ac societatis civilis tendentem hinc exsculpentibus mihi que tanquam crimen objicientibus, ut ad criminationes responsurus proferre

ferre non potuerim, nisi quæ male sanos deridendos propinarent a partium studio remotis. Ceterum propositio hæc, quemadmodum ceteræ omnes, suum habet in praxi morali usum. Etenim cum actiones nostras secundum rationem dirigere jubeamur, obstacula nobis obijciunt sensus: id quod suo loco distinctius explicaturi sumus. Quamobrem impedimenta ista remoturi probe nosse debemus, quantum sensationes ab arbitrio nostro pendeant, & quousque anima nullam prorsus in easdem potestatem habeat. In præsentem igitur propositionem docemus, quod forma sensationum sit ab arbitrio animæ prorsus independens, nec eidem comperat potestas in ea quidpiam immutandi,

§. 79.

Si objectum sensibile in organum sensorium rite constitutum agit; necessario sentimus, seu in animæ potestate positum non est, utrum velit sentire, nec ne. Id patet unicuique ad ob-
Cœxistentia mutationum in organo & sensationum necessitas.
viam quovis momento experientiam attendenti. Etenim si objectum visibile in oculos apertos radios immittit; arbitrii tui non est, utrum istud videre velis, nec ne; sed necessario idem vides, five velis, five nolis. Similiter si sonus in aures illabitur; arbitrii tui non est, utrum audire velis, nec ne; sed necessario audis, five velis, five nolis. Si effluvia odorifera nares afficiunt, vel cibus comminutus & saliva perfusus linguam contingit; arbitrii tui non est, utrum odorem, vel saporem percipere velis, nec ne; sed utrumque necessario percipis, five velis, five nolis. Eodem modo si manum fronti admoves; arbitrii tui non est, utrum tactum percipere velis, nec ne; sed frontem manu tangi necessario sentis, five velis, five nolis. Nullus igitur datur sensus, in quo veritas propositionis præsentis experimento in te ipso facto exemplo confirmari nequeat.

Idem tamen vi antecedentium a priori quoque ostenditur. Etenim in mutatione, quam objectum sensibile organo inducit, continetur ratio sufficiens sensationum (§. 65.). Quamobrem si mutatio in organo sensorio accidit; mens quoque necessario sentit (§. 298. *Ontol.*), consequenter in arbitrio ipsius positum non est, utrum sentire velit, nec ne.

Qualis sit ista coëxistentiæ mutationum in organo sensorio & perceptionum in anima necessitas, an absoluta, an hypothetica, in præsentî definiri minime potest. Quæstio altioris indaginis est, utpote a commercio inter mentem & corpus intercedente tota pendens. Parum autem refert respectu libertatis animæ, utrum absoluta sit, an hypothetica: id quod ex inferioribus patebit, ubi in notionem libertatis inquisiverimus. Absolum igitur est ex necessitate coëxistentiæ mutationum in organo & perceptionum in mente exsculpere fatalem necessitatem libertati interitum minaturam, cum libertas salva sit, si vel maxime necessitas illa sit absoluta. Enimvero quid est tam absurdum, quin dicatur ab aliquo consequentiariorum? Ceterum quando hic de mutationibus in organo sermo est, ad eas referimus, quicquid in corpore accidere debet, ut perceptioni in mente sit locus, utut hic nobis perinde sit, qualia sint ea, quæ in corpore nostro contingunt, dum sentimus. Ita v. gr. mutatio, dum videmus, in oculo facta includit etiam motum per nervum opticum ad cerebrum usque continuarum. Præterea notandum venit, nos & hic, & in omni casu simili supponere statum corporis vivi & hominis vigilantis: id quod sequitur ex eo, quod modo inculcavimus, neque enim in corpore morruo, vel etiam in homine dormiente integra locum habet mutatio, quæ in corpore prærequiritur, ut anima sibi objectum repræsentet ejusdemque repræsentationis sibi conscia sit. Talia opportune monemus contra eos, qui in captandis verbis sunt assidui, ut acumine præstare videantur.

§. 80.

Modus primus impediendi sensationem.

Si organum sensorium ab objecto avertimus, sensatio impeditur. Etenim si organum sensorium ab objecto sensibili avertimus; objectum in ipsum agere seu mutationem in eodem producere nequit, qualis per structuram organi possibilis: quod per se patet. Enimvero si mutatio in organo sensorio non contingit, nulla amplius sensationis datur ratio sufficiens (§. 65.), consequenter cum absque ratione sufficiente nil quicquam esse possit (§. 70. *Ontol.*), cessabit quoque in mente sensatio seu perceptio (§. 65.). Quoniam itaque ex aversione organi intelligitur, cur nulla in mente fiat sensatio *per demonstrata*; aversio organi ab objecto continet rationem sufficientem, cur idem

mi-

minime sentiamus. Impeditur adeo sensatio per aversionem organi sensorii ab objecto sensibili (§. 726. *Ontol.*).

A posteriori obvia experientia idem innotescit. Etenim si oculum avertimus a luna, ne radii ab eadem propagati in eum illabi possint; lunam non videmus. Si manum retrahimus a superficie globi rotundi in tenebris, nec rotunditatem ejus tactu percipimus, qui in figura percipienda visus vice fungebatur. Neque aliter rem sese habere deprehendimus in sensibus ceteris.

Utile est nosse, quo usque nobis aliqua sit in sensationes potestas, cum in moralibus, tum in arte inveniendi: id quod suo loco luculentius constabit.

§. 81.

Si actio objecti sensibilis in organum sensorium quocunque Modus alter modo impeditur; in anima quoque sensatio impeditur. Quoni- *impediendi*
am per actionem objecti sensibilis in organum sensorium intel- *sensationem*
ligitur, cur mutatio quædam in eodem actu contingat, quæ vi structuræ ejusdem possibilis erat; ratio hujus mutationis est actio ista (§. 56. *Ontol.*), adeoque mutatio, quæ organo inducitur, effectus ab objecto sensibili productus (§. 886. *Ontol.*). Quare cum actio causæ efficientis ponenda sit, si effectus poni debeat (§. 898. *Ontol.*); actione in organum sensorium impedita, adeoque cessante (§. 726. *Ontol.*), mutatio quoque in organo cessare debet. Enimvero ratio sensationis cum in ista contineatur (§. 65.), cessabit quoque ratio sensationis, consequenter ipsa sensatio (§. 70. *Ontol.*). Quoniam itaque ex impedita actione objecti sensibilis in organum sensorium intelligitur, cur nulla in mente fiat sensatio *per demonstrata*; impedita actio objecti sensibilis in organum sensorium continet rationem sufficientem, cur idem minime sentiamus. Impeditur adeo sensatio per impeditam actionem objecti sensibilis in organum sensorium.

Apo-

A posteriori idem adeo obvium est, ut notio propositioni præfenti respondens inter communes referri mereatur. Sane si oculos claudimus, ne radii ab objecto visibili propagati in oculum incidere possint; hoc ipso impeditur, ne visibile vi luminis in oculum agat (§. 726. *Ontol.*). Cessat vero tum etiam visus objecti alias videndi. Similiter si aures obturamus, ne sonus illabi possit; actio soni in aurem impeditur: tum vero nec sonum auditu percipi manifestum est. Si nares digitorum supremis articulis ita intrusis, ut vix spiritum per eos ducere liceat, obturemus, ne foetori pateat ingressus; effluviorum a corpore foetido exhalatorum actio in organum olfactus impeditur: foetorem vero tum a nobis minime percipi experimur. Quovis igitur momento quilibet in se experiri potest, impedita actione objecti sensibilis in organum sensorium impediri quoque sensationem, alias in anima exituram.

Propositionis præfentis eadem est utilitas, quæ præcedentis: quod ideo monemus, ne quis contemnat, quæ vulgaria videntur. Ex vulgaribus enim tanquam seminibus nascuntur sublimia & a communibus notionibus maxime remota: id quod vel sola Elementa *Euclidis* docere poterant, ex ipsa autem philosophiæ universæ pertractatione legitima, tum etiam ex Arte inveniendi evidentius elucescet.

§. 82.

Modus debilitandi sensationem.

Si sensationem ea, quam habemus, fortio- rem in nobis excitamus; hanc ægre, immo prorsus non appercipimus. Sensatio enim fortior ita obscurare potest debiliorem, ut hanc prorsus non appercipiamus (§. 76.). Quare si ea, quam habemus, fortio- rem in nobis excitamus; efficitur omnino, ut eam, quam habemus, vel ægre, vel prorsus non appercipiamus.

Principium hoc maximi momenti est in mente a sensu abducenda, qui eidem periculosus. Confirmatur a posteriori. E. gr. si lignum putridum in tenebris conspicias; accensa candela sensum lucis adeo debilitas, ut prorsus non lucere videatur. Alta voce quæ legis pronuncians impedis, ne mussitantium verba percipias. Suffitu odorem suscitans foetoris perceptionem fugas.

§. 83.

Regule perceptionum dicuntur, quas anima observat in percipiendo, seu juxta quas perceptiones ipsius explicari possunt. Unde in specie *Regule sensationum* sunt, juxta quas sensationes in anima explicari possunt.

*Regula
perceptio-
num & sen-
sationum
quam im-
dicantur.*

Exempla regularum sensationum sunt propositiones proxime præcedentes (§. 78. & seqq.). Neque alium in finem regulas illas proposuimus, quam ut sensationes inde explicemus, quoties nobis in posterum cum ipsis erit negotium.

§. 84.

Leges perceptionum sunt principia generalia regularum perceptionum. Et hinc in specie *Lex sensationum* dicitur principium generale regularum sensationum.

*Leges per-
ceptionum
& sensatio-
num,*

Denominatio fit ad imitationem regularum & legum motus (§. 302. 303. *Cosmol.*). Nostrum vero inprimis est in Psychologia empirica stabilire leges & regulas inde pendentes generales perceptionum ac cogitationum, quod iis utamur in moralibus ad regimen actionum liberarum rite instituendum. Quemadmodum enim in philosophia naturali absque regulis motus explicari nequit, quomodo corpora pro arbitrio nostro movere valeamus; ita quoque in philosophia practica absque regulis perceptionum doceri non potest, quomodo actiones nostras liberas pro arbitratu nostro dirigamus.

§. 85.

Lex sensationum hæc est propositio: Si in organo aliquo sensorio ab objecto aliquo sensibili quædam producitur mutatio; in mente eidem coëxistit sensatio per illam intelligibili modo explicabilis, seu rationem sufficientem, cur sit & cur talis sit, in illa agnoscens. Veritas propositionis abunde patet ex antecedentibus. Neque enim, si rem potius, quam terminos spectes, aut ad terminorum explicationes in anterioribus traditas (§. 65. 66. 77.) animum advertas, differt a principio cognoscendi corpus suum supra proposito (§. 56.) & dependentiæ perceptionum a corpore notione (§. 57.). Immo talis est, ut obviis ex-

*Lex sensa-
tionum.*

(*Wolffii Psychologia.*)

G

perien-

perientiis statim confirmari possit, si de veritate ejus dubites. Enimvero in demonstrandis regulis sensationum (§. 78. & seqq.) usi sumus propositione ista tanquam principio (§. 876. *Ontol.*). Est igitur lex sensationum (§. 84.).

Legi huic plurimum lucis affundit Optica, cum in ea regulæ visionis, quas adeo sensus princeps observat, explicentur. Pater enim eas tanquam ad rationem ultimam ad propositionem præsentem reduci. Sufficit vero regulas visionis per experimenta & observationes stabiliri.

§. 86.

*Identitatis
perceptio-
nis ratio.*

Si mutatio in eodem organo sensorio eadem est; sensatio quoque in anima eadem esse debet. Etenim sensatio agnoscit in mutatione organi rationem sufficientem, cur sit & cur talis sit (§. 85.). Enimvero si in duobus casibus eadem ratio sufficiens ponitur; quod in uno casu vi illius fuit, etiam in altero vi ejusdem esse debet (§. 189. *Ontol.*). Ergo si mutatio in eodem organo sensorio eadem est; sensatio quoque in anima eadem esse debet.

Magnum hoc principium est in omni sensationum doctrina. Usum ejas amplissimum loquitur Optica, cum per immediatam consequentiam inde fluant principia visionis generalia phænomenis visus demonstrandis inservientia, veluti quod duo objecta videantur ejusdem magnitudinis, si imagines in oculo eandem magnitudinem habent, consequenter si sub eodem angulo videntur. Non minus autem ad alias quoque sensationes applicari potest.

§. 87.

*Diversa
quando sen-
sui eadem
apparere
debeant.*

Quodsi ergo contingat a diversis objectis sensibilibus eandem in eodem organo sensorio produci mutationem; eadem apparere debent. Etenim si a diversis objectis sensibilibus in eodem organo sensorio eadem producitur mutatio; sensatio quoque in anima eadem esse debet (§. 86.). Quare cum sensationes sint perceptiones (§. 65.), perceptiones vero objecti representationes (§. 24.); anima sibi in hoc casu objecta diversa tanquam eadem representare debet. Quoniam tamen in se diversa sunt,

non eadem *per hypothesein*; eadem tantummodo apparent. Patet igitur diversa objecta eadem apparere debere, quoties contingit eandem ab iis mutationem in eodem organo sensorio produci.

Hoc principium continet rationem generalem, cur sensus subinde diversa representet tanquam eadem, adeoque fallat, seu apparere quid faciat, quod non est. In omni Optica plurima occurrunt exempla, quæ sub hac lege continentur: est enim fons plurimum deceptionum opticarum.

§. 88.

Si mutatio in organo sensorio eodem diversa est, sensatio quoque in anima diversa est. Ponamus enim, si fieri potest, mutationem in organo sensorio esse diversam, sensationem vero eandem. Quoniam in mutatione, quæ in organo accidit, continetur ratio, cur talis in anima potius sit sensatio, quam alia (§. 65.); per diversam mutationem in organo intelligibili modo explicari poterit, cur eadem sensatio talis potius sit, quam alia (§. 56. *Ontol.*), consequenter cur anima hoc potius objectum, quam aliud, idemque hoc potius modo quam alio sibi representet (§. 24.): quod cum sit absurdum, sensatio in mente eadem esse nequit, si mutatio in organo diversa est. Erit igitur & ipsa diversa (§. 181. 183. *Ontol.*).

*Diversitas
sensatio-
nis ratio.*

Absurditas ista magis adhuc elucescit in Psychologia rationali. Confirmatur autem experientia. Etenim si beneficio speculorum vel vitrorum politorum efficiamus, ut alia objecti in oculo delineetur imago, quam delineari solet, ubi nudo oculo idem contuemur; objectum quoque aliter videri manifestum est. Similiter constat, unum idemque objectum non idem apparere in diversis distantis, nam v. gr. globus e longinquo visus instar disci exhibeatur. Constat autem aliam globi in oculo imaginem delineari, si fuerit in vicinia constitutus; aliam vero, si longinquo intervallo a nobis fuerit ramotus. Jam ex imagine in oculo redditur ratio, cur nobis instar disci appareat globus e longinquo visus, & cur rotundus appareat in vicinia oculo objectus. Unde nemo non fatebitur, absolum fore, globum & in vicinia, & e longinquo instar disci videri debere, vel in utroque casu conspici convexum,

utut imago in uno casu eadem sit, quæ est disci; in altero vero ab eadem diversa.

§. 89.

Idem quando appareat diversum.

Quodsi ergo contingat, idem objectum diversam efficere mutationem in eodem organo; diversum quoque apparere debet. Etenim si idem objectum diversam efficit mutationem in eodem organo, sensatio quoque in anima diversa esse debet (§. 88.). Enimvero sensationes sunt perceptiones (§. 65.), perceptiones vero objecti repræsentationes (§. 24.). Anima igitur sibi in hoc casu objectum idem tanquam diversum repræsentare debet. Quoniam tamen idem est *per hypothesein*; diversum tantummodo apparet. Patet igitur idem objectum diversum apparere debere, quoties contingit diversam ab iis mutationem in eodem organo sensorio effici.

Hoc principium continet rationem generalem, cur sensus subinde idem repræsentet tanquam diversum, adeoque fallat, seu apparere quid faciat, quod non est. In Optica plurima occurrunt exempla specialia, cum propositio præfens sit fons alter deceptionum opticarum. Sensus enim fallit, tum quatenus diversa tanquam eadem, tum quatenus eadem tanquam diversa repræsentat. Patebit idem clarius ex inferioribus, ubi errorum fontes recludemus ostensuri, cur anima errare possit & quandonam eam errare contingat.

§. 90.

Idea mutationibus organorum sensoriorum respondens.

Unicuique mutationi in organo possibili sensatio quædam & idea peculiaris in anima responder. Etenim quotiescunque mutatio quædam in organo aliquo sensibili actu contingit, toties quoque sensatio quædam in anima eidem coëxistit (§. 85.), ita quidem ut eadem sit sensatio, quoties in organo mutatio eadem (§. 86.), si vel maxime ab objectis diversis producat (§. 87.), & vicissim diversa sit sensatio, quoties diversa est in organo mutatio (§. 88.), si vel maxime ab eodem objecto producat (§. 89.). Necessè igitur est, ut unicuique mutationi in organo possibili sensatio quædam peculiaris respondeat. Sensationes sunt perceptio-

ceptiones (§. 65.), adeoque actus mentis; quo objectum aliquod sibi repræsentat (§. 24.). Quare cum repræsentatio objecti dicatur idea, quatenus ipsum refert (§. 48.), unicuique autem mutationi in organo peculiaris quædam sensatio respondeat *per demonstrata*; unicuique mutationi in organo possibili peculiaris quædam idea respondere debet.

Quemadmodum per structuram organi possibile est, ut a tali objecto istiusmodi in eodem mutatio producat, veluti ut in oculo istiusmodi imago delineetur, si tale objectum in tali situ oculo oppositum radios lucis in eum immittit; ita per essentiam animæ possibile est, ut talis quædam sensatio in eadem producat, qua objectum istiusmodi eo modo repræsentatur. Quando vero mutatio in organo actu contingit; sensatio quoque in anima actu oritur, nec alia, quam hæc isti coexistere potest. Cur vero hæc potius, quam alia eidem coexistat, & quomodo fieri possit, ut eidem coexistat, in Psychologia rationali demum inquiremus.

CAPVT III.

De Imaginatione.

§. 91.

Objectorum sensibilibus absentium ideas mens reproducere va- *Reproductio*
let, seu, quod perinde est, Si qua sensu percepit anima, idearum ob-
jectorum perceptiones reproducere potest, objectis licet absen- *jectorum*
tibus. Obvia experientia idem confirmatur, cum nullum sit *sensibilem*.

momentum, quo juxta ea, quæ sensu percipimus, non simul absentia nobis repræsentemus. E. gr. Si fuimus in templo, domum reduces idem nobis repræsentare valemus, veluti ipsum extra nos contueremur, etiamsi nullam oculo inducat mutationem, a qua perceptio templi dependet (§. 90.), consequenter nobis absens sit (§. 63.). Enimvero repræsentatio ista, qua templum veluti extra nos nobis præsens sistitur, etsi non sit, idea templi est (§. 48.) & templum, quod videri adeoque sensu percipi potest, objectum sensibile est (§. 77.) Anima igitur

ideam objecti sensibilis absentis antea sensu percepti reproducere valet.

Idem eodem modo colligitur ex quovis exemplo alio. Propositio enim præfens est illud universale, quod in quolibet exemplo singulari, seu casu quolibet particulari continetur. Notandum vero est artificium, quo in hoc & simili casu universale in singularibus latens ab iisdem vi notionum universalium ante acquisitarum separatur: id quod insignem nobis præstat utilitatem in acquirendo acumine pervidendi abstracta in concretis, de quo deinceps ex instituto agimus. Nihil proponimus, quod non singularem promittat utilitatem, nec obviis adeo sollicitè enodandis præter rationem inhæremus. Ipsi nimirum experti sumus, quare necessarium sit studium, quod in rebus obviis meditandis collocatur, si vel summam diligentiam & maximum acumen ad meditationem afferas. Nemo hoc credit nisi expertus. Is autem demum experimento in se facto idem experitur, qui obvia isto modo meditatur. Ignorant hoc Mathematici, quorum defectus in notionibus evolvendis supplet figura, & notiones subinde obscuras successus calculi in jam notis clariores efficit. Ignorant eruditi ceteri omnes, qui ab accurata discussione sunt alieni. Quamobrem non moramur iudicia, quæ deproperant utilitatem nobis exploratam minime prospicientes. Et talia opportune subinde moneri existimamus, quæ nobis ducibus philosophantibus animum addere debent ad diligentiam assiduam continuandam.

§. 92.

*Imaginatio-
nis definitio.*

Facultas producendi perceptiones rerum sensibilibus absentium *Facultas imaginandi* seu *Imaginatio* appellatur. Quoniam itaque anima rerum absentium ideas reproducere valet (§. 91.); *Animæ competit facultas imaginandi*, sive *Imaginatio*.

Propositionem adeo præcedentem eum in finem præmissimus, ut imaginationis realitas in aprico poneretur. *Aristotelicis* imaginatio etiam *Phantasia* appellari solet. De *Tschirnhausen* vocabulum Imaginationis in sensu latiori sumit, ita ut etiam facultatem sentiendi sub ea comprehendat. Imaginatio nimirum ipsi idem est, quod facultatis cognoscendi partem inferiorem supra appellavimus (§. 54.). Sed significatus adeo latus ipsi peculiaris est, quemadmodum parte 2. §. 2. p. m. 41. ipsemet observat, hanc reddens denominandi rationem, quod facul-

facultates istæ, etsi diversæ, id habeant commune, quod earum opera sub specie imaginum pleraque nobis exhibeantur. Atque hæc ideo monemus, ne ad libri *Tschirnhusiani* lectionem accedens confundatur.

§. 93.

Ideam ab imaginatione productam *Phantasma* dicimus. *Phantasmatis definitio.*

Equidem *Aristotelici* vocabulum phantasmatis non eodem prorsus sensu accipiunt; sed sufficit nobis eodem commode exprimi posse ideas ab imaginatione productas. Quoniam enim phantasia, teste *Goclenio* in *Lexico Philosophico*, etiam sumitur pro specie alicujus rei, quæ sensu comprehensa est, relicta in mente; phantasia vero pro facultate imaginandi sumitur (not. §. 92.); phantasma commodius restringitur ad ideas a phantasia productas. Quia *Aristotelici* in doctrina de mente humana non satis a se invicem separarunt, quæ distingui debebant; ideo nemo nobis vitio vertet, si accuratam de anima cognitionem consecuturi determinatas & fixas vocabulis tribuamus significationes.

§. 94.

Si quid sensu distincte percipimus, id facilius & clarius Quenam sensu nobis imaginamur; quam quod confuse percipimus: immo si quid cilius imaginamur, id minus clare imaginamur, quam si idem sensu percipitur. Si faciem solis imaginari conamur, figuram & magnitudinem bene imaginamur, atque satis clare; at lumen imaginari vix ac ne vix quidem possumus, ut eadem adsit claritas, quæ adest, dum sensu idem percipitur. Quoniam in figura solis plura distinguere licet, nec minus quæ magnitudini insunt ad alias referre datur magnitudines, veluti diametrum disci solaris ad altitudines objectorum sensibilibum, aream perimetro comprehensam ad superficies alias planas; figuram & magnitudinem distincte percipimus (§. 38.). Enimvero quoniam in lumine solis plura separatim enunciabilia distinguere non licet; lumen non nisi confuse percipimus (§. 39.). Et quia figuram & magnitudinem in phantasmate solis ab aliis una perceptis probe distinguimus ac inde figuram ejus agnoscimus; phantasma solis perceptio clara est (§. 31.). Jam vero phantasma adeo obscurum est, ut ex illa obscuritate lumen non agnoscas, & si vel maxime aliqua

aliqua claritate perfundatur, tanta tamen non est, quæ ad lumen solis agnoscendum sufficit, quin potius illam ab hoc plurimum differre tibi conscius es. Luminis adeo solaris phantasma perceptio aut obscura penitus (§. 32.), aut minus saltem clara est (§. 31.). Patet itaque nos sensu distincte perceptum facilius & clarius imaginari, quam quod confuse percipitur, & si quid imaginamur, id nos minus clare imaginari, quam ubi sensu percipitur.

Non inutile est, si ad alia exempla respiciens ex iis similiter propositionem præsentem eruas. Quoniam tamen exempla obvia sunt, ut plura in medium proferamus opus non est. Propositionis præsentis utilitas ex subsequentibus elucescet: major autem in Moralibus aliquando palam fiet. Ceterum obiter monemus, modum eruendi universalis ex singularibus, quo in stabiliendis propositionibus a posteriori utimur, æquipollere demonstrationibus majoris perspicuitatis gratia ad casum specialem applicatis: quales in Mathesi mixta occurrere nemo ignorat, qui vellevi studio in eadem versatus est. Unum adhuc notandum est, antequam a propositione præsentem ad aliam digrediamur: utrum scilicet quid facile, an difficile imaginemur, id nobis innotescere, quatenus nobis conscius sumus conatus, quem ad imaginandum aliquid adhibemus. In exemplo allato phantasmatis solaris apparet, quod figura & magnitudo veluti vocata statim sistat; ast ubi lumen imaginari conamur, conatum successu frustraneo repetitum appercipimus, ut adeo hinc impotentia positivam notionem consequamur (not. §. 39.).

§. 95.

Quanam

idea sensua-
les dicantur.

Ideas sensuales appello, quæ vi sensationis in anima existunt, seu, quæ in anima actu infunt, quod jam ista in organo sensorio mutatio accidit. Dici etiam potest, quod sint ea, quæ a sensu in anima producuntur.

E. gr. Dum solem intuemur, idea solis, vi cujus nobis ejusdem sumus conscius, a visu pender, atque ideo in nobis existit, quia radii a sole in oculum illapsi organo visus mutationem quandam inducunt; dicitur itaque idea ista sensualis. Similiter si sonum tubæ percipimus, quia in aurem illapsus mutationem quandam organo auditus inducit; soni idea sensualis est. Idem dicendum est de ideis ceteris, qui mutatio-

rationibus in ceteris organis sensoriis contingentibus in anima respondent. Atque ideæ hæ sensuales opponuntur phantasmatis, quæ vi imaginationis producuntur (§. 93.): cur enim ab his distinguendæ veniant, ex sequentibus apparebit, & utilitas in moralibus palam fiet.

§. 96.

Phantasmata minus clara sunt ideis sensualibus. Si quid *Differentia* enim sensu confuse percipitur, id claritati minime obstat (§. 39.), *phantasma* exemplo luminis atque colorum: si vero idem imaginamur, *tum & ide-* id minus clare imaginamur, quam si idem sensu percipitur (§. *arum sen-* 94.). Quare cum objectis sensibilibus semper insint confuse per- *sualium.* cipienda, veluti visibilibus colores (not. §. 39.); si quod objectum sensibile imaginamur, minus claritatis adesse debet, quam si idem sensu percipimus. Enimvero idea sensu producta sensualis idea est (§. 95.); phantasma vero idea est, quæ ab imaginatione producitur (§. 93.). Patet itaque phantasmatis minus adesse claritatis, quam ideis sensualibus.

Exemplo est idea sensualis solis & phantasma ejusdem, quas duas perceptiones gradu claritatis a se invicem differre nemo non in seipso experitur. Gradus claritatis bene quidem distinguimus, sed in iis sigillatim enunciabilia minime deprehendimus, adeoque eos nonnisi confuse percipimus. Ita si duo fuerint colores, unum esse altero clariorem vulgo satis obvium est; sed undenam majorem gradum claritatis unius, minorem alterius agnoscamus; nec nobis conscius sumus, nec enunciare valemus.

§. 97.

Quoniam phantasmata & ideæ sensuales gradu claritatis a se invicem differunt (§. 96.), per eandem a se invicem distinguendi possunt, consequenter *Si phantasmata & ideæ sensuales in phantasma-* anima coëxistunt, illa ab his distinguimus. *ta ab ideis sensualibus.*

Confirmat corollarii præsentis veritatem experientia. Nemo non sibi conscius est, se phantasmata ab ideis sensualibus coëxistentibus optime distinguere, ut adeo nunquam immineat periculum, ne quod imaginamur cum eo, quod sentimus, confundamus, quamdiu simul sentimus & imaginamur: id quod nobis vigilantibus accidit.

§. 98.

*Actuum
imagina-
tionis &
sensatio-
num debi-
liorum æ-
quipollentia.*

Actus imaginationis æquipollent sensationibus debilioribus. Debilior enim est sensatio, quæ minorem claritatis gradum habet (§. 75.). Quare cum phantasmata minus clara sint ideis sensualibus (§. 96.), illa autem vi imaginationis (§. 93.), hæ vi sensuum producantur (§. 95.); actus imaginationis minorem gradum claritatis habet, quam sensatio. Quoniam itaque sensibilia imaginamur (§. 92.), adeoque ea, quæ sensu percipi possunt (§. 77.); ipsa autem experientia constat, sensibilia in luce fortiori clarius percipi, quam in debiliore; actus imaginationis æquipollent sensationibus debilioribus.

Confirmatur idem experientia. Etenim si nocturnis tenebris ingruentibus equitem ex intervallo videmus; ideæ sensuales non majorem, immo sæpius minorem claritatis gradum habent, quam si eundem imaginamur. Simile quid notamus, si idem objectum in luce diurna & lunari diverso tempore conspiciamus, & cum phantasmate ejusdem conferimus, modo distantia tanta sit ab oculo in casu posteriori, quæ ad istam differentiam inducendam sufficit. Sed nostrum non est in præsentia inquirere, quomodo ista distantia determinari debeat.

§. 99.

*Obscuratio
imagina-
tionis per
sensum.*

Sensationes obscurant actus imaginationis, ita ut hos subinde prorsus non appercipiamus. Actus enim imaginationis æquipollent sensationibus debilioribus (§. 98.). Quoniam itaque sensatio fortior obscurat debiliorem, ita ut subinde debiliorem prorsus non appercipiamus (§. 76.); sensationes actus imaginationis coëxistentes obscurare debent, ita ut eos subinde prorsus non appercipere liceat.

Id actu fieri in anima nostra, ut adsint phantasmata, quorum tamen nobis minime consci sumus; in subsequenter patebit. Atque ideo suo loco inquirendum erit, quomodo phantasmata latentia in aprium producantur, ut jam nobis eorum consci reddamur, cum antea consci non essemus.

§. 100.

Sensationes debiliores clariores sunt, absentibus fortioribus. Obvia idem confirmatur experientia. Si luna nocturno tempore fulget, objecta ejus lumine collustrata resplendent, & ipsum lumen Lunæ multo clarius percipitur, quam interdiu, dum instar nubeculæ pallet. Lumen Solis multo clarius percipimus, quam Lunæ, adeoque sensatio prior fortior est (§. 74.), posterior debilior (§. 75.). Quando igitur Sol non amplius conspicitur, sed Luna sola in oculos incurrit, illo sub horizonte latente, ut nihil prorsus luminis ex fonte isto manantis ad eos pertingat; sensatio fortior cessat, debilior sola relinquitur. Enimvero tum lumen lunare multo clarius percipitur, quam antea, neque enim amplius Luna instar nubeculæ pallere videtur, adeoque sensatio debilior clarior fit fortiori absente.

Nimirum cessat jam obscuræ causæ (§. 75.), adeoque debilior non obscuratur. Retinet igitur suam, quam habet, claritatem.

§. 101.

Si actus imaginationis soli sunt, clariores sunt, quam sensationibus coexistentes. Quoniam enim actus imaginationis sensationibus debilioribus æquipollent (§. 98.); si actus imaginationis soli insunt animæ, absentibus sensationibus omnibus, perinde est ac si sensatio debilior sola adesset, fortiori remota. Enimvero sensationes debiliores clariores sunt absentibus fortioribus (§. 100.). Ergo actus imaginationis clariores quoque esse debent, si fuerint soli, quam si sensationibus coexistunt.

Idem confirmatur a posteriori. Etenim in somnio cessant sensationes & soli actus imaginationis in anima dantur. Tum vero posteriores utrique clariores sunt, quam dum vigilamus, cum phantasmata pro ideis sensualibus habeamus, existimantes nos vigilare, cum dormimus, & in rei veritate contingere, quod tantummodo apparet.

§. 102.

Casus speciales.

Quoniam actus imaginationis clariores sunt, si soli sunt, quam si sensationibus junguntur (§. 101.); *Actus imaginationis clariores sunt in tenebris & quando oculos claudimus, aliisque objectis absentibus, quæ cetera organa sensoria feriunt.*

Responderet propositio præsens notioni communi: phantasmatis enim claritatem conciliaturi oculos claudimus & alia objecta a contactu organorum sensoriorum arcemus.

§. 103.

Quenam sensibilia ceteris clarius imaginemur.

Visibilia objecta, itemque verba facilius & clarius imaginamur, quam sonos inarticulatos, odores, sapores & qualitates tactiles, seu, quæ tactu solo percipiuntur. In objectis enim visibilibus multa insunt, quæ distincte percipimus, veluti figuræ & magnitudines, situs atque motus, quemadmodum ex demonstratione de facilitate & difficultate imaginandi (§. 94.) apparet. In verbis singulas syllabas a se invicem distinguimus tanquam sigillatim enunciabiles, adeoque eadem distincte percipimus (§. 38.). Enimvero in sonis inarticulatis, odoribus, saporibus & qualitatibus tactilibus, seu iis, quæ solo tactu percipiuntur, plura sigillatim enunciabilia distinguere non licet, adeoque eadem tantummodo confuse percipimus (§. 39.). Enimvero si quid sensu distincte percipimus, id facilius & clarius nobis imaginamur, quam quod confuse percipimus (§. 94.). Ergo visibilia objecta, itemque verba, facilius & clarius imaginamur, quam sonos inarticulatos, odores, sapores & qualitates tactiles, seu, quæ tactu solo percipiuntur.

Veritas propositionis præsentis obvia admodum experientia confirmatur, ut eam nemo in dubium vocare possit, quoniam experimentum statim in se capere potest, quamprimum dubitatio animum invadit. Quodsi quædam imaginari conemur, unusquisque in semetipso deprehendet, occurrere ipsi partim objecta visibilia, partim verba. In visibilibus clare a se percipi figuras, magnitudines, situs ac motus experiemur; in verbis percipi syllabas, quatenus successive pronunciari possunt. Quodsi vero sonos alios, sapores, odores vel quæ tactu solo percipi

percipi possunt; imaginari conemur; nihil a nobis effici intelligemus, utut sonos, sapes, odores & qualitates tactiles, quamprimum sensu percipiuntur, extemplo agnoscamus. Ceterum utilitate non caret probe a se invicem distingui, quæ facile imaginari licet, ab iis quæ vix ac ne vix quidem imaginari possumus. Patebit utilitas in Moralibus. Nihil enim de anima certa experientia fide cognoscitur, quod non inexpectatam subinde in Moralibus utilitatem afferat. Propter istam vero utilitatem inanem operam minime sumit, qui in notionibus communibus sibi clavis reddendis assiduus est. Evadunt autem claræ, si ad exempla animum advertimus. Et quo plura exempla attente consideramus, eo nobis fiunt clariores.

§. 104.

Si quæ simul percepimus & unius perceptio denuo producat *Quanam actu imagi-*
ducatur, sive sensuum, sive imaginationis vi; imaginatio produ-
cit & perceptionem alterius, seu, quod perinde est, perceptio *nemur.*
præterita integra recurrit, cujus præsens continet partem. Patet id a posteriori, si in quocunque casu singulari comparemus ideam sensualem præsentem cum phantasmate, quod actu imaginationis præsens sistitur. E. gr. Ponamus te in templo vidisse Titium seu personam quandam tibi ignotam, & in templum alio tempore venientem oculos conjicere in locum, ubi federat; recurret tibi phantasma Titii, etsi is tunc temporis non fuerit præsens, sed locus iste vel vacuus fuerit, vel ab alia persona occupatus. Quodsi tunc temporis, quo Titium videbas, eum Mevio colloquentem vidisti; mox etiam recurret phantasma Mevii, etsi nec ipse præsens sit, nec in locum, quem occupaverat, oculos convertas. Quoniam Titium & locum, quem in templo occupavit, simul vidisti; Titius & locus sunt duo visibilia, quæ simul percepisti, aut, generaliter loquendo, res duæ sensu simul perceptæ (§. 77.). Dum in templum alio tempore veniens oculum in locum istum conjicis, ubi federat Titius; visus vi denuo producit perceptio unius rerum alias simul visarum, seu, generalissime loquendo, sensus vi producit perceptio unius rerum alias simul perceptarum (§. 67.). Dum po

tibi recurrit phantasma Titii nunc quidem absentis; vi imaginationis producitur perceptio rei alterius simul perceptæ (§. 92.). Apparet adeo si rerum antea simul sensu perceptarum una sensu denuo percipiatur; imaginationem etiam producere perceptionem alterius.

Quia porro Titium loquentem videras cum Mevio; Titius & Mevius sunt duo objecta visibilia, seu, generaliter loquendo, res duæ sensu simul perceptæ (§. 77.). Dum phantasma Titii recurrit; unius rerum sensu simul perceptarum perceptio vi imaginationis denuo producitur (§. 92.). Dum porro tibi recurrit phantasma Mevii, nunc non modo absentis, sed cujus ne locum quidem adspicis; vi imaginationis producitur perceptio rei alterius simul perceptæ (§. cit.). Patet igitur si unius rerum antea simul perceptarum perceptio vi imaginationis denuo producitur; vi ejusdem imaginationis produci quoque perceptionem rei alterius simul perceptæ.

Ponamus denique te ideam horti animo concipientem, qualem nullibi vidisti, eundem instruere arboribus ordine plantatis & ornare floribus, quales verno tempore in hortis amœnis conspiciuntur. Ponamus porro, te alio tempore in via conspiciere arbores ordine plantatas: phantasma horti tui, qualem tibi antea imaginatus fueras, extemplo recurret. Quoniam ideam horti dum animo concipis & in eo arboribus atque floribus loca convenientia pro arbitrio assignas, istorum objectorum nullum præsens est, *per hypothesin*; vi imaginationis rerum plurium perceptiones una producis, ut perceptionem quandam totalem constituent (§. 43.), qualis esse solet, si plura simul sensu percipiuntur, seu uno obtutu videntis comprehenduntur. Habes igitur hic res plures simul imaginatione perceptas. Dum in via conspicias arbores ordine plantatas, quales in horto tuo tibi imaginatus fueras; unam rerum antea simul imaginatione perceptarum vi ejusdem denuo producis (§. 92.). Dum vero

vero phantasma horti, quem antea imaginatus fueras, denuo recurrit; vi imaginationis producitur perceptio rerum simul imaginatione perceptarum ceterarum (§. cit.). Patet igitur, si quæ simul imaginatione fuerint percepta & unius eorum perceptio vi sensus denuo producat; imaginationem quoque producere perceptionem alterius.

Quoniam igitur imaginatio producit simul percepta, si eorum unum sensu vel imaginatione denuo percipiatur, siue simul sensu, siue imaginatione percepta fuerint; generaliter omnino liquet, si quæ simul percepimus & perceptio unius eorum siue sensuum, siue imaginationis vi producta denuo fuerit, imaginationem quoque producere perceptionem alterius seu ceterorum.

Propositio præsens maximæ utilitatis est in serie perceptionum explicanda: id quod non modo in moralibus, verum etiam in Logica & Psychologia indispensabilis necessitatis est. Incidi in eam juvenis, cum philosophiam practicam universalem methodo mathematica conscriberem: deprehendebam enim ea me opus habere in demonstrando, atque ideo eandem summi instar axiomatis seu notionis communis exemplo *Euclidis*. Mox ejus quoque usum observavi in ratiocinatione distincte explicanda, quemadmodum in sequentibus docebo. Ne quis vero existimet, ad eam stabiliendam summi, quæ a veritate facti aliena sunt; ut unusquisque assumat exempla, quæ præsens ipsi suggerit experientia, consulum est. Et ne quis methodo abstrahendi universalialia a singularibus nondum satis fidens existimet, a singulari vel particulari ad universale argumentationem fieri; pluribus exemplis diverso tempore obviis utatur. Plurimum huc conducit, si non solum ad nos, sed alios quoque attenti ex perceptione præsentem reddere conemur per aliquod temporis intervallum rationem eorum, quæ nobis vel aliis in mentem veniunt: ita nimirum non modo veritas propositionis nobis confirmabitur, sed eidem quoque respondens notio & clarior evadet, & fecunditas ejusdem manifesta fiet.

§. 105.

Si quod nunc percipitur specie vel genere idem est cum Idem porro eo, expenditur.

eo, quod alias una cum aliis perceptum fuerat, imaginatio etiam horum perceptionem producere debet. Quæ enim specie vel genere eadem sunt, ea sibi mutuo similia sunt, quatenus ad eandem speciem, vel ad idem genus referuntur (§. 233. 234. *Ontol.*), consequenter quædam in iisdem eadem sunt (§. 195. *Ontol.*). Quare si nunc percipimus A specie vel genere idem cum B, quod alias cum C perceperamus; quædam omnino percipimus, quæ antea simul cum aliis in B percipimus. Quamobrem cum perceptio ceterorum, quæ ipsi B inerant & in A minimeprehenduntur, vi imaginationis una produci debeant (§. 104.); imaginatio quoque producit perceptionem ipsius B. Quoniam vero B percipiebatur una cum C; evidens est cum perceptione ipsius B produci etiam debere perceptionem ipsius A (§. *cit.*). Patet igitur, si quod nunc percipitur specie vel genere fuerit idem cum eo, quod alias una cum aliis perceptum fuerat, imaginationem etiam horum perceptionem producere debere.

Idem confirmatur a posteriori. Ponamus enim nos in convivio simul vidisse hospites & vitra vino plena. Quodsi domi die sequente oculos in vitra convertis, quibus vinum infundi solet; extemplo tibi occurrit phantasma hospitum ac vitrorum vino plenorum rerumque ceterarum in convivio præsentium. Vitra, quæ domi conspicias, specie saltem eadem sunt cum vitris, quæ videras in convivio. Ergo objectum specie idem, quod percipis, non modo tibi in mentem revocat objectum antea perceptum ad eandem speciem pertinens; verum etiam alia cum eodem simul percepta.

Patet idem in exemplis aliis. Ita vitra, quibus vinum infundi solet, in mentem tibi revocant tabernam vitris omnis generis instructam, quam in nundinis vidisti. In exemplo, quod ad propositionem præcedentem dedimus, arbores in horto plantandas in mentem revocant arbores in via plantatæ, & ita porro. Dicitur autem objectum in mentem revocari, cujus phantasma vi imaginationis produci-
ducitur.

§. 106.

Sine prævia sensatione nullum in anima phantasma oriri potest. Pone enim, si fieri potest, phantasma aliquod sine prævia sensatione oriri. Nulla jam amplius erit ratio, cur hoc potius phantasma oriatur, quam aliud, cum ipsum nulla perceptio præcedat, nec ob defectum ejusdem ratio aliqua in corpore assignari possit (§. 85.). Quoniam itaque fieri nequit, ut absque ratione sufficiente aliquid sit (§. 70. *Ontol.*); neque etiam fieri potest, ut sine prævia sensatione aliquod in anima phantasma oriatur.

Phantasmatis cum sensatione nexus.

Nullum quoque allegare licet exemplum phantasmatis absque prævia sensatione in anima exorti, modo attentione atque acumine sufficiente utaris, ne scilicet existimes venire quid in mentem, cujus nulla ratio ex perceptione præsentē reddi possit, cur hac posita ponatur. Neque enim negandum est, nisi in ratione phantasmatis ex præcedente perceptione eruenda aliquandiu jam versatus fueris, ægre illam detegi posse. Peculiare nimirum requiritur acumen ad ea, quæ perceptionibus ac appetitibus nostris insunt, distinguenda, ubi non veluti sponte sua absque ullo negotio patent.

§. 107.

Si imaginatio reproducere debet perceptiones aliarum rerum antea simul perceptarum cum ea, quam nunc percipimus; res istæ vel sæpius, vel diu simul percipiuntur necesse est. Etenim quod specie præsertim, vel genere idem est, successive cum pluribus rebus aliis specie & genere differentibus percipitur. Quamobrem ratio aliqua adesse debet, cur imaginationi hujus potius, quam alterius rei perceptio occurrat, quæ non minus quam ista cum re nunc percepta simul antea percepta fuit (§. 70. *Ontol.*). Quare cum adsit aliqua ratio, si perceptio ejus rei, quæ cum nunc percepta sæpius simul percepta fuit, producat, vel etiam quæ diu cum hac simul percepta fuit, nimirum hæc ipsa, quod sæpius vel diu simul percepta fuerit, utpote quæ sola differentia in simultaneitate percipiendi jam

Quænam perceptio-nes ab imaginatione producantur.

admittitur (§. 104. 105.) ; si imaginatio reproducere debet perceptiones aliarum rerum antea simul perceptarum cum ea, quam nunc percipimus ; res istæ vel sæpius, vel diu simul percipiantur necesse est.

Idem patet a posteriori. Si in aliquo templo sæpius fuisti, ubi phantasma ejus recurrit, primum recurrit phantasma ejus partis, quam e loco tibi consueto conspicias, vel si idem templum quoad speciem externam repræsentat, eam tibi faciem exhibet, quam sæpius præteriens respexisti. Si in horto aliquo sæpius fuisti & eum cum aliis, in quibus fueras, vel de quibus narrantes audiveras, contulisti ; ubi vi perceptionis præsentis perinde est, cujusnam horti perceptio producat, phantasma ejus recurrit, non vero alterius. Nec aliud quid obtinet in casibus aliis. Similiter si in horto aliquo vides plantam exoticam, antea tibi non visam ; eam diu contemplaris, ut facilitatem ejus perceptionem producendi, quoties de plantis sermo incidit, vel planta aliqua visui objicitur, præsertim rara, tibi compares. Immo ab eadem digressus phantasma vi imaginationis conservas & aciem mentis in eodem contemplando adhuc defigis, & tanto certiores ex eo te existimas fore, ut in posterum absentis perceptionem reproducere valeas.

Multa attentione opus est ad talia pervidenda, qua uti non possunt nisi exercitati. In Psychologia rationali, ubi in nexum istarum perceptionum inquiremus ; res evadet clarior. Quod si vero quis in addiscenda Psychologia empirica, qualem proponimus, multum ac diu versatus attentionem ad ea, quæ in anima contingunt, conservare didicerit ; is facilius observare poterit, quæ nunc aciem mentis effugiunt. Etsi autem observatio sit difficilis, si in casu dato phantasma dijudicanda ; hoc tamen non obstante eidem responderi notio communis, cum eadem nitatur praxis res memoriæ mandantium, quemadmodum inferius ostendemus.

§. 108.

Quoniam res percipiuntur tum sensu, tum imaginatione (§. 67. 92.), *facilitas reproducendi perceptiones rerum antea* per-

*Modus acquirendi
facilitatem*

perceptarum cum iis, quæ nunc percipiuntur, acquiritur, sive res *reprodu-*
 sæpius ac diu sensu, sive imaginatione simul percipiuntur. *cendi per-*

Apparet adeo non modo sensum juvare imaginationem, sed eam *ceptiones.*
 quoque ipsam absque sensuum auxilio in facilitate idearum reprodu-
 cendarum acquirenda utiliter ac cum successu versari. Sed de his
 plura dicemus paulo deinceps de memoria acturi.

§. 109.

Si res plures simul percipiuntur, & mentis acies in unam *Quomodo*
 earum intenditur; imaginatio reproducit perceptionem rerum cum *perceptiones*
 hac antea simul perceptarum. Si plura simul percipis & mentis *producenda*
 aciem in unam earum intendis; hujus tibi magis conscius es, *a præsentē*
 quam ceterorum, & in eo quid distinguis, quod tibi tanquam *pendeant.*
 in eo repræsentas. Quare cum aliqua adesse debeat ratio, cur
 imaginationi potius occurrat perceptio rerum cum hac, quam
 alia in perceptione præsentē contenta simul perceptarum (§. 70.
Ontol.), talis vero quidem adsit in eo casu, quo imaginatio
 producit perceptionem rerum antea simul cum ea percepta-
 rum, in quam mentis aciem intendis, nulla vero adsit in altero
 casu, quo produceret perceptionem rerum antea simul cum una
 ceterarum conjunctarum, in quam mentis aciem minime inten-
 dis; si res plures simul percipiuntur & mentis acies in unam ea-
 rum intenditur; imaginatio reproducit perceptionem rerum
 cum hac antea simul perceptarum.

Idem etiam sic ostenditur. Quando in perceptione præ-
 sente plura continentur & in eorum unum mentis aciem diri-
 gis; hujus tibi magis, quam ceterorum conscius es, atque adeo
 perinde est ac si hoc solum perciperes. Enimvero imaginatio
 producit perceptionem eorum, quæ simul percepta fuere cum
 eo, quod nunc percipitur (§. 104.); reproducere igitur debet per-
 ceptionem eorum, quæ cum eo ex pluribus in eadem perceptio-
 ne nunc contentis simul percepta fuere, in quod mentis aciem
 intendis.

Idem etiam a posteriori confirmatur. Ponamus tibi in oculos incurrere externam ædificii cujusdam faciem & in ea fenestras, e quibus orbes quidam vitrei sunt avulsi. Si mentis aciem dirigas in avulsos ex fenestris orbes; imaginatio objiciet tibi phantasma ædificii alterius cum fenestris, ex quibus orbes vitrei sunt avulsi, quod alias vidisti, & huic succedent phantasmata aliorum similium ædificiorum antea visorum, veluti eorum, e quorum fenestris infelici casu a grandine orbes vitrei aliquando fuerant excussi, ubi aciem mentis in orbes avulsos intendere pergis. Plura istiusmodi exempla tibi recurrent, si in perquirendis rationibus phantasmatum ex perceptione præsentem nascentium fueris assiduus.

In hoc & aliis casibus id inprimis agendum est, ut phantasma ex perceptione immediate enatum cum perceptione præsentem conferatur: id quod subinde difficultatem parit, si attentionem ad id, in quo mentis aciem defigis, non diu conserves, sed eandem statim ad aliud in re percepta obvium promoveas. Quamobrem veritatem propositionis præsentis experientia domestica confirmaturus, non modo mentem ad idem in objecto sensibus obvium perceptibile diu attentam conservari consultum est, verum etiam in phantasmate ex perceptione præsentem immediate nascente in idem prorsus dirigenda mentis acies, quod ejus reproducendæ ratio fuit.

§. 110.

*Phantasma-
tum successio
qualis.*

Si mentis aciem continuo in id intendis, quod phantasma cum perceptione, ex qua nascitur, commune habet; successio phantasmatum in eodem genere vel eadem specie entium continuatur: si vero in phantasmate ad alia eandem dirigis, successio phantasmatum in alio genere, vel alia specie entium continuatur. Etenim si mentis aciem in id intendis, quod phantasma cum perceptione, ex qua nascitur, commune habet, phantasma, quod ex eodem nascitur, denuo idem cum ipso commune habere debet (§. 104). Enimvero quatenus in phantasmatis, adeoque rebus, quas repræsentant (§. 93. 48.), eadem insunt; eate-

nus

nus res sibi invicem similes sunt (§. 195. *Ontol.*), consequenter vel ad idem genus, aut eandem speciem pertinent (§. 233. 234. *Ontol.*), aut tanquam ad idem genus, vel eandem speciem pertinentia spectari possunt (§. *cit.*). Phantasma igitur unum alteri succedit in eodem genere, vel eadem specie entium. Quare cum continuo in phantasmate præsentē aciem mentis dirigatur in idem, in quod in phantasmate anteriore dirigebatur; phantasmatum successio in eodem genere entium, vel in eadem specie continuatur.

Enimvero si jam in phantasmate aciem mentis in aliud intendis, quam quod in anteriore continebatur; prodibit alterum phantasma, quod quidem aliquid commune habet cum phantasmate, ex quo nascitur, non autem cum perceptione priori (§. 109.). Ex iis igitur, quæ modo ostendimus, patet, phantasma alterum cum perceptione prima ad idem genus, vel eandem speciem referri minime posse, quatenus scilicet genus, vel species constituitur per communia, quæ insunt, & tanquam reproductionis rationes alleganda veniunt. Phantasmatum igitur successio in eodem genere, vel eadem specie entium minime continuatur: continuantur adeo in diverso genere, vel in diversa specie.

Idem etiam a posteriori ostenditur. Ponamus te dirigere mentis aciem in orbes vitreos e fenestris ædificii, quod adspicis, avulsos. Reproducetur phantasma templi, in quo fenestræ itidem tales conspiciuntur, a quibus orbes vitrei sunt avulsi. Quod si jam ad phantasma templi attentionem dirigis & in eo mentis aciem in orbes vitreos e fenestris avulsos iterum inrendis; imaginatio producet phantasma ædium, in quibus infausto casu a grandine orbes vitrei e fenestris sunt excussi. Si in hoc phantasmate denuo mentis aciem in orbes vitreos ex fenestris excussos dirigis, succedit phantasma hypocaufti, in quo ab hominibus ebriosis orbes vitrei excutiuntur & ita porro. Singula

igitur phantasmata & cum iis perceptio prima , a qua tandem omnia ortum ducunt, id commune habent, quod in iis represententur ædificia cum fenestris, in quibus orbes vitrei evulsi, vel excussi sunt. Quare cum ædificia istiusmodi tanquam peculiaris quædam ædificiorum species considerari possint, quemadmodum ædificia quævis re vera ad idem genus entium spectant; phantasmatum successionem in eodem genere, vel eadem specie entium continuari patet, si mentis aciem continuo in id dirigis, quod unumquodque phantasma cum perceptione, ex qua nascitur, commune habet.

Enimvero ponamus te ut ante tibi representare ædificium & in eo mentis aciem dirigere in orbes vitreos & fenestris ædificii, quod adspicis, avulsos. Ponamus inde nasci phantasma templi, in quo itidem sunt fenestræ, ex quibus orbes vitrei evulsi. Quod si jam mentis aciem non in fenestras, sed in suggestum dirigis; phantasma concionatoris sese tibi sistit, quem in eodem constitutum sæpius vidisti. Quod si attentionem ad eundem conservas, recurrit phantasma horti, in quo cum eodem collocutus es. Si in horti phantasmate mentis aciem dirigis in arbores, recurrit phantasma sylvæ densis arboribus obsitæ: succedet idea cervi, qualem in sylva aliquamdiu vidisti. Ex phantasmate cervi nascetur phantasma culinæ, in qua humi jacet cervus. Si ibi aciem mentis dirigis in orbes stanneos; recurret phantasma tabernæ vasis stanneis instructæ, in nundinis antea visæ & ita porro. Patet itaque si continuo mentis aciem in ea dirigis, quæ phantasmatis anterioribus cum perceptione communia non sunt; phantasmatum successionem in eodem genere vel specie entium non continuari, sed potius in diversis.

Casus posterior frequentior est priori, & prior quidem magis pendet ab arbitrio nostro, si existere debet: quoniam tamen ab arbitrio nostro pendet, ideo unusquisque experimentum in se capere potest, quamprimum voluerit, modo alias ad istiusmodi experimenta aptus sit. Requiritur enim ad ea, ut attentionem suam pro arbitrio in perceptio-

ceptio-

ceptionibus suis figere & ea, quæ ipsis insunt, acumine suo a se invicem distinguere possit: quod etsi facillimum videatur, ubi exempla ab alio proponuntur, non tamen omni difficultate caret, ubi quis ipsemet e suo penu exempla depromere velit. Quamobrem nos non piget in iis, quæ contemptibilis facilitatis videntur, tantæ studere claritati, quanta desiderari potest in rebus difficillimis, ut lectorem ad eas animi dotes perducamus, quæ ad interiorem animæ suæ cognitionem requiruntur.

§. III.

Si vi imaginationis producitur phantasma alicujus loci, Phantasma ex eo porro enascitur phantasma actionum a nobis, vel aliis in isto loco perpetratarum, & ex his porro phantasma aliarum rerum ^{smata actionum præteritarum unde nascantur, & quæ} olim post ipsas perceptarum. Etenim si vi imaginationis producitur phantasma alicujus loci; cum eodem simul producitur phantasma aliarum rerum cum loco isto simul perceptarum (§. 104.). Quare cum actiones nostras, quas in loco isto perpetravimus, una cum loco perceperimus, quod per se patet; imaginatio etiam phantasma illarum actionum producere debet. Eodem modo patet, ex phantasmate loci nasci quoque debere phantasma actionum ab aliis in eodem loco perpetratarum, quas vel præsentibus vidimus, vel ab aliis relatas accepimus. Enimvero si quid porro cum actione ista connexum fuit, seu ex eadem secutum, aut alio modo post actionem in eadem serie perceptum; quoniam actio per tractum temporis continuata una cum ceteris, quæ isto tempore contigerunt, & in sensus nostros incurrerunt, percepta simul fuit, ex phantasmate actionis nasci quoque debent phantasmata aliarum rerum eodem tempore, quo actio duravit, perceptarum (§. cit.). Et quia phantasma actionis perpetratæ conservatur aliquandiu, dum alia objecta postea sensus feriunt, consequenter illa etiam una cum hisce percipitur; imaginatio quoque producere debet phantasmata aliarum rerum olim post ipsam perceptarum.

Idem probatur a posteriori. Ponamus tibi recurrere phantasma ædificii in platea siti, in qua sæpius incedere solitus fuisti.

fuiſti. Quoniam phantaſma domus non recurrit niſi cum platea, in qua ſitum (§. 104.); ad hanc in phantaſmate mentis a-
ciem dirigenti recurrit etiam phantaſma inceſſus per plateam. Quodſi per eandem deambulaturus in hortum ſæpiuſte contu-
liſti; phantaſma horri mox recurret. Et quia in horto flores decerpere ſolitus fuiſti, te flores decerpentem exhibet phantaſma. Mox in mentem venient flores alibi viſi & diſcurſus de magno eorundem pretio moti cum loco atque perſonis tum in eodem præſentibus, quando ſermo iſte incidebat. Phantaſma diſcurſus in mentem revocat librum, in quo de pretio florum quædam legiſti, & ita porro. Vides, hic ex phantaſmate plateæ naſci phantaſma inceſſus per eandem & ex hoc porro ortum trahere phantaſma horti. Ex phantaſmate igitur loci naſcitur phantaſma actionis & ex phantaſmate actionis naſcuntur porro phantaſmata rerum aliarum. Similiter ex phantaſmate horti naſcitur phantaſma, quod te flores exerpentem exhibet, & ex hoc porro venit phantaſma floris alibi viſi. Denuo igitur ex phantaſmate loci naſcitur phantaſma actionis & ex phantaſmate actionis reſultant phantaſmata aliarum rerum. Similiter phantaſmata diſcurſus de pretio florum parit phantaſma libri, in quo de eodem quædam legiſti. Ex phantaſmate igitur actionis alienæ naſcitur phantaſma rei alterius. Quoniam res nobis repræſentare ſolemus cum loco, in quo fuerunt, & in loco aliquo dum commoramur, non prorsus ſumus otioſi; nihil ſane frequentius eſt, quam ut phantaſmata rerum revocent ſimul phantaſmata locorum & actionum in iisdem perpetratarum, ut adeo non opus ſit plura exempla ad confirmandam propoſitionem afferri.

Utilitate minime vacat vel minimas ſcrutari differentias, quæ in reproductione phantaſmatum occurrunt. Quoniam enim ita innotefcit, quomodo phantaſmata in ortu ſuo a ſe invicem pendeant; hoc ipſo eorundem reproductionem in poteſtatem noſtram redigimus. Id autem potiſſimum in omni ſtudio psychologico intendimus, ut fa-
cul-

cultates mentis in potestatem nostram redigamus, ita enim iisdem uti possumus pro arbitrio; id quod in moralibus maximi momenti est.

§. 112.

Si in mentem venit phantasma actionis præmeditata; Phantasma ex eo oritur phantasma loci, in quo eam præmeditatus es, una cum ex actione rebus ibi præsentibus, quando de eadem meditatus, vel etiam ibi præmeditadem alias sæpe vists. Etenim si actionem præmeditatus es, ta veniens. quam deinde exequeris; ubi eam exequeris, in mentem venit phantasma deliberationis, atque ita actionem cum deliberandi actu simul percipis. Quodsi ergo phantasma actionis quacunque de causa mentem tuam subit: phantasma quoque deliberationis in eandem venire debet (§. 104.). Et quoniam te deliberantem una percepisti cum loco, in quo deliberavisti, atque rebus ibidem præsentibus, cum actionem præmeditareris; locum vero cum rebus aliis, quando alio tempore eas ibidem vidisti; phantasma loci sistit una res vel istas, vel hæc (§. cit.), prout majorem vel istas, vel has reproducendi facilitatem tibi conciliaisti (§. 108.).

Idem etiam confirmatur a posteriori. Ponamus te in conclavi Titii præmeditatum esse colloquium cum Mevio de itinere ad nundinas Francofurtenses instituendo. Ubi cum eo actu colloqueris, phantasma colloquium præmeditantis in conclavi Titii tibi occurrit, atque ita colloquium & te idem præmeditantem in alio loco una percipis. Quodsi deinde iter actu ingrederis, recurret phantasma colloquii cum Mevio de hoc itinere, atque ita denuo colloquium de itinere & iter ipsum simul percipis. Jam si postea de itinere cogitas, in mentem venit phantasma loci, in quo cum Mevio de eodem collocutus es, antequam institueretur, una cum rebus aliis cum perceptione loci connexis. Ubi in mentem venit phantasma loci, in quo colloquium celebratum, idem in eandem revocat phantasma loci cum rebus aliis connexis, ubi colloquium præmeditatum.

Vides igitur ex phantasmate itineris oriri phantasma loci, in quo idem præmeditatus es, & ex phantasmate colloquii de itinere phantasma loci, ubi colloquium præmeditatus es. In utroque igitur casu ex actionis præmeditatae phantasmate oritur phantasma loci, in quo eam præmeditatus es, una cum rebus aliis, quemadmodum fert propositio.

Quodsi omnes illas propositiones, quæ de ortu phantasmatum ex perceptionibus aliis allatæ sunt, probe consideres; eum ex nexu perceptionum pendere deprehendes. Quomodo vero nexus iste resulter, patet ex iis, quæ de facilitate reproducendi perceptiones rerum antea perceptarum simul cum iis, quæ nunc percipiuntur, diximus (§. 108.): id quod ut evidentius appareat, propositionem subsequentem addere lubet. Magnum enim momentum trahit in praxi nexus istius cognitio, propterea quod ejus beneficio reproductionem idearum potestati nostræ subicere valeamus. Quanam vero hinc in praxin moralem utilitas redundet, suo loco constabit, ubi eodem in rebus maxime arduis utemur.

§. 113.

Nexus perceptionum causa.

Si res plures sæpius vel diu simul percipiuntur, perceptiones earum inter se connectuntur. Etenim si res plures sæpius vel diu simul percipiuntur, anima facilitatem acquirit ex perceptione unius reproducendi perceptionem alterius (§. 108.). Quoniam vero ex perceptione una intelligitur, cur reproducat altera; in perceptione una continetur ratio alterius, nimirum ex eo, quod sæpius vel diu simul perceptæ fuerint, cur anima perceptionem alteram reproducat, & in eo, quod commune habent duæ perceptiones, cur hanc reproducat, ratio continetur (§. 56. *Ontol.*). Perceptiones igitur earum rerum inter se connectuntur, quæ sæpius vel diu simul percipiuntur (§. 10. *Cosmol.*).

Atque ita apparet, quid fieri a nobis debeat, ut rerum perceptiones ita connectantur, quo aliquam pro arbitrio reproducere possimus: id quod intenditur in praxi morali (*not. §. prac.*).

§. 114.

Quoniam perceptiones rerum, quarum una ex altera producenda est, ideo connectuntur, quod res sapius, vel diu simul fuerint perceptæ (§. 108. 113.); non vero ex eo intelligitur, cur res perceptæ vel simul existant, vel se invicem sequantur, consequenter in re una non continetur ratio coëxistentiæ, vel successionis alterius (§. 56. *Ontol.*); res ideo inter se non connectuntur, quia perceptiones earum in anima connectuntur (§. 10. *Cosmol.*).

Nexus perceptionum a nexu rerum, quæ percipiuntur, independens.

E. gr. Si hominem quandam aliquamdiu in templo vidisti; perceptio hominis cum perceptione templi connectitur. Enimvero ex perceptione hominis non intelligis, cur sit etiam templum; neque etiam ex perceptione templi intelligis, cur sit etiam homo. Templum igitur & homo in existentia sua a se invicem minime pendent. Nullus adeo intercedit nexus inter templum & hominem, qui in id intravit, ut inter perceptiones templi ac hominis nexus intercedat.

§. 115.

Regule imaginandi, vel imaginationis, item Phantasmatum dicuntur, per quas phantasmata explicari possunt, seu, quas anima in imaginando observat, aut, quod perinde est, juxta quas phantasmata oriuntur.

Regula imaginationis quanam dicantur.

Regularum phantasmatum seu imaginandi exempla habes in præcedentibus (§. 105. & seqq.): neque enim propositiones proxime præcedentes in alium finem attulimus, quam ut inde phantasmata explicemus, reddentes in primis rationem, cur ex hoc istud potius jam enascatur, quam aliud. Id nimirum ad secundam animæ cognitionem maxime utile.

§. 116.

Lex imaginationis, sive Phantasmatum dicitur principium generale regularum sensationum.

Lex imaginationis

Rationem denominandi vide supra (not. §. 84.), eadem enim non modo hic utimur, sed utemur etiam inferius in omni casu simili.

quanam dicatur.

§. 117.

Lex imaginationis.

Lex imaginationis sive Phantasmatum hæc est propositio: Si qua semel percepimus & unius perceptio denuo producat; imago producta & perceptionem alterius. Veritas propositionis jam patet ex superioribus (§. 104.): ibi enim eandem a posteriori stabilimus, singulis momentis eodem modo proprio in nobis experimento facto confirmandam. Enimvero in demonstrandis regulis imaginationis (§. 105. & seqq.) usi sumus propositione ista tanquam principio (§. 876. Ontol.), eademque in posterum utemur. Est igitur lex imaginationis (§. 116.).

§. 118.

Absentia

sensationum & phantasmatum.

Sæpius sensationes omnes & phantasmata omnia simul prorsus cessare videntur, ut nihil prorsus appercipiamus. Quoniam id nobis quotidie accidit, veritas propositionis præsentis adeo clara est, ut experientia quadam singulari eam confirmari non sit opus (§. 666. Log.).

Quod si urgeas propositionem præsentem non esse satis determinatam, cum non constet, quandonam id obtineat, sed tempus vage per particulam sæpius indicari; tenendum est, in subsequentibus nos demonstraturos esse, quandonam id contingere debeat, neque in præsentis opus esse accuratam temporis determinationem. Etenim in usum definitionis nominalis præmittimus observationem, quæ suggerit notionem vocabulo jungendam ut intelligatur: huic autem instituto sufficit nosse, sensationes & phantasmata simul prorsus cessare posse, quandonam vero id contingat, seu quibus præsuppositis id fieri debeat ut constet opus non esse.

§. 119.

Dormire & vigilare quando dicimur.

Si sensationes omnes clare cessant, nec ullius, quod præsens est, nobis conscii sumus, dormire dicimur. Et status iste mentis, quo omnes sensationes clare prorsus cessant, seu, quo nihil eorum, quæ præsentia nobis sunt, nobis conscii sumus, Somnus appellatur. Dicitur autem Somnus profundior, quando cum

sen-

sensationibus clavis una phantasmata clara cessant, ita ut nihil prorsus appercipiamus. Et quando redeunt sensationes claræ, *evigilare* dicimur.

Nondum definimus, utrum in somno profundiori omnis perceptio absit, nec ne, quando scilicet nihil appercipimus: id enim demum in Psychologia rationali fieri poterit.

§. 120.

Interdum res absentes clare percipimus, perceptionibus aliis per tractum aliquem temporis aliis succedentibus, donec vel evigilemus, vel profundiori somno immergamur. Quando somniamus. Patet idem a posteriori & in vulgus notum est, cum nemo sit, cui tale quid non acciderit. Neque adeo opus est, ut ad casum specialem provocemus (§. 666. Log.), præsertim cum talis semper esse debeat, cujus experimentum in seipso nemo capere possit. Etenim nostri arbitrii non est, quam perceptionum seriem in te habere velis. Præstat igitur unumquemque ejus recordari, quem sibi notum experitur.

Quodsi tamen exemplum desideres: repete illud, quo ad docendam differentiam inter somnium & veritatem usi sumus (§. 493. Ontol.). Immo finge, quæ ad confirmandas regulas phantasmatum in anterioribus adduximus (§. 105. & seqq.), ea dormienti tibi occurrere: exempla somniorum erunt istæ phantasmatum successiones.

§. 121.

Si per tractum aliquem temporis nonnisi res absentes *Somniare* percipientes, nullius præsentis nobis conscii sumus, seu, quando *quando dormimus* res in somno appercipimus, *Somniare* dicimur. Et status iste mentis, quo nonnisi res absentes clare percipimus, seu earum nobis conscii sumus, *Somnium* appellatur.

Somnium hic accipitur subjective, quatenus modificationem quandam animæ denotat: sumi vero etiam solet objective, quatenus est rerum sibi mutuo succedentium representatio. Inconstantia loquendi, quæ in communi sermone obtinet, utrumque significatum fert, quemadmodum attendenti ad illum palam fit. Sed nos significatui priori strictius inhærebimus.

*Somnium
imaginatio-
nis opus.*

§. 122.

Dum somniamus, res, quas percipimus, imaginamur. Quando enim somniamus, res nonnisi absentes clare percipimus (§. 121.). Sed dum res absentes percipimus, eas imaginamur (§. 92.). Ergo dum somniamus, res, quas percipimus, imaginamur.

Principium hoc fecundissimum est: fungitur enim vice notionis directricis, quando de somniis meditandum.

§. 123.

*Somni
ratio.*

Omne somnium initium capit a sensatione & per phantasmatum successionem continuatur. Quando enim somniamus, res quasdam imaginamur (§. 122.), consequenter anima phantasmata producit (§. 93.). Enimvero sine prævia sensatione phantasma nullum in anima oriri potest (§. 106.). Ergo nec somnium sine prævia sensatione oriri potest, consequenter a sensatione aliqua initium capit.

Quoniam vero res, quas somniantes percipimus, imaginamur (§. 122.); anima continuo phantasmata alia producit (§. 93.), consequenter somnium per successionem phantasmatum continuatur.

Posterius nemo in dubium vocat. Quando enim evigilamus, nihil ejus præsens fuisse, quod per somnium nobis representavimus, abunde convincimur. Certum igitur unicuique est, se nihil eorum sensu percepisse, de quo in somnio cogitavit. Enimvero sensationem aliquam somnio initium præbere non cuilibet manifestum est. Quamvis autem a priori satis evidenter pateat, a posteriori tamen ut confirmetur consultum est. Etsi enim difficile sit sensationem istam, quæ somnio ortum largitur, a phantasmatis distinguere ob rationem non unam; non tamen prorsus impossibile est, modo initii somni recorderis & ad statum corporis tui respicias. Subinde accidit, ut sensatio debilior, quæ somnio inchoando sufficit, durante somnio fiat fortior, ut idem finiat, veluti si tormina ventris dormiens percipere incipis, tumque somni rationem perpendens facile initii causam animadvertis. Dantur casus alii, in quibus idem eadem facilitate contingit, veluti

veluti cum a siti somnium ortum trahit, quam eodem finito evigilans adhuc percipis.

§. 124.

Si interea temporis, dum somniamus, novam quandam sensationem non appercipimus, vel in eam mentis aciem non dirigimus; successio phantasmatum in eadem serie continuatur. Quodsi vero sensationem quandam interea appercipimus & in eam mentis aciem dirigimus; somnium in diversis phantasmatum seriebus continuatur. Etenim somnium per phantasmatum successionem continuatur (§. 123.). Quare cum phantasma non nascatur nisi ex prævia vel sensatione, vel actu imaginandi (§. 104.), in progressu autem somnii sensatio nullum locum habeat, quæ appercipitur, vel, si talis adsit, in eam mentis acies non intendatur, per *hypoth. priorem*, adeoque in præsentis negotio perinde sit, ac si prorsus abesset (§. 109.); phantasma nullum in somnio oriri potest nisi ex phantasmate præexistente. Quare cum hæc phantasmata inter se connexa sint (§. 113.); omnia simul unam seriem constituunt. Atque adeo successio phantasmatum in eadem serie continuatur.

Somniorum
diversitas.

Enimvero ponamus novam quandam sensationem inter phantasmata interponi & in eam mentis aciem dirigi: imaginatio reproducet perceptionem rerum cum re ista, quam sentimus, antea simul perceptam (§. 109.). Quoniam vero jam successio phantasmatum in eadem serie continuari debet, quæ jam incepit, quamdiu nova sensatio non interponitur, vel mentis acies in eandem dirigitur, per *cas. i.* successio phantasmatum in altera hac serie continuari debet. Et ita porro. Patet igitur successionem phantasmatum in diversis seriebus continuari, quando sensationes novæ interponuntur & mentis acies in eas dirigitur.

Propositio præsens est principium generale, per quod somnia explicari possunt, modo non ignores, quæ in applicanda ea præsupponuntur. Non immerito itaque lex somniorum dici poterat, quemadmodum legem sensationum appellamus, per quam sensationes sunt expli-

explicabiles, & legem phantasmatum, per quam phantasmata explicanda veniunt.

§. 125.

Somnii simplicis & compositi differentia.

Somnium simplex dicemus, quod in eadem serie phantasmatum continuatur. *Somnium vero compositum* appellabimus, quod in diversis seriebus phantasmatum continuatur.

Quoniam somnia in potestate nostra non habemus per ea, quæ nobis de iis constant; exemplis quoque discrimen inter *somnium simplex* & *compositum* illustrare non datur, quorum experimentum in te ipso facere poteras. Enimvero quoniam successiones phantasmatum, quas vigilantes in potestate nostra habemus, juxta regulas anteriores a somniis non differunt, nisi quod juxta sensationes continentur; non modo aliquas somniis similes comminisci licet, sed illas ipsas, quibus propositiones anteriores illustravimus, pro somniis accipere possumus. Etenim si phantasmatum successio in eadem serie continuatur vi imaginationis, non aliter idem fiet, dum vigilamus, quam dum dormimus: imaginatio enim secundum eandem legem in omni casu operatur. Somniamus igitur vigilantes, quando neglectis sensationibus mentis aciem continuo in phantasmata dirigimus, ut ex uno continuo nascatur aliud, eaque successio per aliquem temporis tractum continuetur. Atque hoc pacto omnia, quæ de somniis demonstrantur, in se statim experiri licet.

§. 126.

Sensationes somnium ingredientibus quales.

Sensationes, a quibus *somnium initium sumit* & quæ *phantasmatis in eodem interdum interponuntur*, debiles sunt. Etenim sensationes, a quibus *somnium initium capit* (§. 123.) & quæ *phantasmatis in eodem subinde interponuntur* (§. 124.), a phantasmatis non distinguuntur, ita ut vulgo ignoretur quod adsint. Quare cum alias phantasmata ab ideis sensualibus gradu claritatis distinguantur, quo a se invicem differunt (§. 97.); in præsentī casu gradu claritatis differre minime debent, adeoque actioni imaginationis æquipollent. Enimvero actibus imaginationis non æquipollent nisi sensationes debiles (§. 98.). Sensationes igitur, a quibus *somnium initium sumit* & quæ *phantasmatis in eodem interdum interponuntur*, debiles sunt.

Atque

Atque hæc est ratio difficultatis agnoscendi sensationes, a quibus vel initium capit somnium quodlibet, vel series qualibet in composito. Diximus supra (*not.* §. 101.), in somnio cessare sensationes & solos actus imaginationis in anima dari, quia vulgo sensationes quasdam adesse non agnoscimus & ob eorum æquipollentiam phantasmata ideis sensualibus substitui possunt, nec sensationes actibus imaginationis coëxistant. Sufficit somnium potissimum ex phantasmatis componi, ideas vero sensuales nonnisi somnio excitando inservire, nam sensationes, de quibus hic loquimur, in eorum numerum, quæ per somnium repræsentantur, non ingrediuntur.

§. 127.

In somnio res absentes nobis videntur præsentæ. So- *Cur in so-*
mnia enim a sensatione quadam initium capiunt & per phan- *mnio præ-*
tasmatum successionem continuantur (§. 123.), vel in eadem *sensia no-*
serie, vel in diversis, si novæ subinde sensationes interponantur *bis vide-*
(§. 124.). Quoniam vero unica illa vel paucissimæ saltem sen- *antur, quæ*
sationes debiles sunt (§. 126.), adeoque minorem claritatis gra- *non sunt.*
dum quam alias habent (§. 75.); ideæ sensuales a phantasmatis non amplius distinguuntur (§. 97.). Anima igitur phantasmata pro ideis sensualibus habet, consequenter cum phantasmata sint ideæ ab imaginatione (§. 93.), ideæ autem sensuales a sensu productæ (§. 95.), adeoque illa res absentes (§. 92.), hæc præsentæ (§. 65.) repræsentent (§. 48.); res absentes pro præsentibus habet.

Foras alicui dubium oriri poterat, cur anima res præsentæ, quæ paucissimæ sunt, non potius habeat pro absentibus, sibi conscia se tantummodo imaginari, minime autem sentire. Sed non difficulter tollitur. Etenim res nobis per imaginationem non aliter extra nos exhibentur, ac quæ præsentæ sunt, nisi quod diverso id fiat claritatis gradu. Quare constanter quæ imaginamur pro præsentibus haberemus, nisi diversa gradus claritas nos differentię admoneret. Quoniam ea in somnio tollitur, ratio quidem adest, cur te sensu percipere existimes, quæ imaginariis; nulla vero adest, cur tibi persuadeas te imaginari etiam paucissima illa, quæ sensu percipis. Atque ita patent, quæ superius ad illam strandam propositionem de actibus imaginationis solitariis assumimus (*not.* §. 101.).

§. 128.

*Somnium
quale sit.*

In somnio mutationes, quas phantasmata contingunt absque ratione sufficiente. Equidem hanc propositionem jam alias stabilivimus a posteriori, cum differentiam inter veritatem & somnium exponeremus (not. §. 493. *Ontol.*). Quoniam tamen ex principiis anterioribus ostendi potest, cur id fieri debeat, ideo hic loci doceri debet: id quod fit sequentem in modum. Dum somniamus, res, quas percipimus, imaginamur (§. 122.). Quare si in somnio mutatio aliqua contingit, res una ideo alteri succedit, quod eam aliquando cum præsente una percipimus (§. 117.). E. gr. Dum somnium te hospitem cum convivis exhibet, persona, quam inspicis, mutatur in aliam, quod hanc alteram cum priore sæpius una vidisti, vel quod hæc altera aliquid habeat alteri simile, qualecunque tandem fuerit, sive ea adhuc vixerit, sive dudum mortua fuerit. Vel in apparatum convivii intendens mentis aciem reproducis occasione ejus, quod in eodem animadvertis, phantasma personæ, quam alias in convivio vidisti, ubi eadem aderat. Enimvero ex eo, quod res quædam simul perceptæ aliquando fuere, non intelligitur, cur una existente existere debeat alia, consequenter in eo, quod ponitur, non continetur ratio sufficiens, cur poni etiam debeat alterum (§. 56. *Ontol.*). Mutationes igitur, quas phantasmata in somnio referunt, absque ratione sufficiente contingunt.

Non repugnat, quod perceptiones, quatenus in mente sibi invicem succedunt, inter se connectantur (§. 113.), consequenter cum ratione sufficiente sibi invicem succedant (§. 10. *Cosmol.*): neque enim res ideo inter se connectuntur, quia perceptiones earum in anima connectuntur (§. 114.). Nimirum si somnium consideretur subjective, quatenus in anima alia atque alia phantasmata vel coexistunt, vel sibi invicem succedunt, coexistentiæ & successioni perceptionum ratio ex regulis imaginationis & lege ejusdem reddi potest: neque adeo mutationes, quæ animæ somnianti accidunt, ratione sufficiente destituuntur. Sane ideo sequitur anima in producendis phantasmatis legem constantem, ne
quid

quid in ea accidat absque ratione sufficiente, dum imaginatur. Enimvero si somnium consideretur objective, quatenus phantasmata exhibent res tanquam extra nos præsentēs, mutationes harum rerum absque ratione sufficiente fiunt, propterea quod ex eadem ratione poni nequeat res una posita altera, ex qua ponitur perceptio rei illius posita perceptione huius. Mirum igitur videri poterat, quod sibi de acumine gratulenter, qui discrimen hoc non pervidentes contradictionem hinc exsculpere conantur, nisi satis superque constaret, quam sint ad deproperanda iudicia prompti, qui sibi videntur esse, nec sunt.

§. 129.

Si in duabus personis somnium initium capit ab eadem sensatione debili, somniat tamen diversa sunt. Etenim somnium in utraque persona per phantasmatum successionem continuatur (§. 123.), consequenter phantasma primum ideo succedit in locum sensationis debilis, vel eidem superaccedit, quod res, quam ipsum repræsentat, simul fuerit percepta cum re altera, quam exhibet sensatio debilis. Enimvero quoniam res illæ simul perceptæ non sunt prorsus eadem in utroque subiecto, id quod obvia experientia manifestum est; nec phantasmata, quæ easdem referunt, prorsus eadem esse possunt. Quare cum idem valeat de phantasmatis, quæ prioribus succedunt; phantasmata prioribus succedentia multo magis diversa esse debent. Enimvero cum somnia per phantasmatum successionem continuantur (§. 123.), phantasmata vero sibi invicem in duobus subiectis succedentia eadem non sint; nec somnia eadem sunt, sed diversa.

Consultum nobis videtur propositionem præsentem illustrare exemplo, cum multum faciat ad demonstrationem rectius intelligendam, ubi abstractis concipiendis nondum fueris adsuetus. Ponamus in duabus personis dormientibus fragorem tormenti explosi excitare sensationem debilem. Ponamus in utraque eam adhuc superesse perceptioni claritatem, ut fragorem tormenti agnoscat. Ponamus tertio unam personam fragorem tormenti sæpius percepisse, dum in festivitatibus solennibus cives ac milites in foro catervatim congregati bombardas exploderent. Recurret igitur phantasma fori cum militi-

bus & civibus ibidem cum bombardis congregatis. Quodsi jam in locum quendam fori particularem mentis aciem dirigit, ubi poma aliosque fructus arborum vendi frequentissime vidisti: civium cum bombardis ibidem constitutorum in locum succedunt mulieres poma vendentes & currus pomis onusti una cum plebis multitudine, qualem adesse vidisti, cum poma venderentur. In poma, qualia in horto aliquo, ad urbem procul dissitam sito comedisti, respiciens te mox in horto illo deambulanti conspicis cum persona, cum qua in eodem deambulasti sæpius. Et quia cum eadem persona sæpius una fuisti in templo, te in templo congregata multitudine sedentem conspicis. Quoniam vero ibidem ingentem vidisti multitudinem, quoties tubarum & tympanorum strepitus personuit; in frequentiam hominum mentis aciem dirigens hic quoque in mentem venit phantasma, quod te præsentem sistit in templo monachorum disputantium, quorum solennitatem augment tubarum & tympanorum sonitus. Non difficile foret solenni ita continuare vel per integrum diem, siquidem ponamus nulla sensatione idem interrompi. Enimvero ponamus jam personam alteram fragorem tormenti percepisse in adventu solenni Principis alicujus: mox imaginatio eidem suggeret multitudinem confluentem, qualem cum sæpius viderit maleficis ad supplicium ductis, recurrit ipsi latronis phantasma, qui cruce prælata duobus Ecclesiæ ministris comitibus in curiam ducitur ibidem a scabinis condemnandus. In crucem intuens se vidit in cæmeterio constitutum, in quo cruce prælata funus ducitur. In eadem cruce attentionem defigens videt se in templo, in quo imago salvatoris cruci affixi erecta conspicitur. Ad suggestum respicienti recurrit phantasma templi, in quo aliquando verba e suggestu ad populum fecit, seque ad eundem ejusdem finis gratia contendentem percipit & ita porro. Vides itaque somnia, quæ ex eadem sensatione initium capiunt, esse prorsus diversa pro diversitate subjectorum. Immo si vel centum ponas personas, ex eadem ramen sensatione in singulis diversa ortum trahent somnia. Neque enim in una perceptiones rerum simultaneæ eodem modo sese habuerunt, quemadmodum in altera, neque in una eadem inter se connexæ sunt, quæ connectuntur in altera.

§. 130.

*Diversorum
phantasma.*

Quoniam etiam in vigilantibus ex sensationibus oriuntur phantasmata, & ex his porro alia (§. 104. & seqq.); eodem

pror-

prorsus, quo ante (§. 129.), modo ostenditur, *si in diversis sub-* tum ex ea-
jectis ex eadem sensatione continuantur phantasmata, seriem dem sensa-
phantasmatum in uno non fore eandem, quæ est in altera. tione conti-
nuatio.

Propositionis præsentis veritatem experiri datur, si duæ vel plures
 perforæ in eandem rem sensu perceptam intentæ respicere jubentur ad
 phantasmata inde orta & continua serie sibi invicem succedentia. Fieri
 enim potest, modo fueris exercitatus, ut ex eadem sensatione non inter-
 rupta serie phantasmata continues. Atque ita simul veritas propositi-
 onis præcedentis experimento confirmari potest. Series enim phan-
 tasmatum ex eadem sensatione continuatorum æquipollet somnio,
 modo directionem aciei mentis arbitrio tuo subdus, quemadmodum
 jam ante (not. §. 125.) docuimus.

§. 131. *Si uno tempore in aliud, quod sensatio data re-*

In eodem subjecto diverso tempore ex eadem sensatio- Diversitas
ne series phantasmatum diversæ ortum trahunt, siue vigilet siue phantasma-
dormiat, si vel interea temporis facilitatem alterius phantasmatis tum ex ea-
vi illius sensationis reproducendi sibi contraxit, vel uno tempore dem sensa-
aliud in sensatione respicit, quam altero. tione di-
 Etenim si interea tem- verso tem-
 poris, quo phantasma aliquod ex perceptione quadam oriri pore propa-
 solebat, facilitatem contraxisti phantasma aliud vi ejusdem gatorum.
 sensationis producendi (§. 108.); ubi sensatio ista in poste-
 rum præsens fuerit, ex eadem posterius hoc phantasma
 oriri debere patet. Enimvero cum ex hoc phantasmate pro-
 dire debeant phantasmata rerum antea simul cum aliqua earum
 perceptarum, quas ipsum nobis tanquam præsentis exhibet
 (§. 104.), diversa autem phantasmata non easdem res ex-
 hibeant; ideo porro in hoc altero casu non eadem ex phanta-
 smate primo oriri possunt phantasmata, quæ in priori oriuntur.
 Quare cum idem dicendum sit de phantasmatis ulterioribus,
 evidens est seriem phantasmatum fore diversam, ubi anima con-
 traxit facilitatem phantasma aliud ex sensatione data produ-
 cendi, quam alias ex eadem oriri solebat.

Similiter si uno tempore in aliud, quod sensatio data re-

præsentat, mentis aciem dirigis, quam altero, vi imaginationis quoque uno tempore aliud producitur phantasma, quam altero (§. 109.). Unde porro ut ante ostenditur, seriem phantasmatum uno tempore ex data sensatione ortum trahentium esse diversam a serie phantasmatum alio tempore ex eadem hac sensatione propagatorum.

Quoniam utraque ratiocinatio subsistit, sive te vigilantem supponas (§. 117.), sive somnies (§. 122.); utrumque tam in somniis, quam quando vigilas, evenire debet.

Pateridem a posteriori. E. gr. Ponamus te in templo, quod frequentare solitus fuisti, e regione habuisse altare & in hoc sæpius ac diu convertisse oculos. Templum adspicienti e longinquo recurret notio altaris. Quodsi jam locum vel in eodem templo mutas, vel aliud deinde frequentes, & e regione sedeant personæ, quæ oculis tuis constanter obijciuntur: ubi postea templum aliquod vides, recurret tibi phantasma loci illius templi, in quo sedere soles, una cum personis e regione sedere solitis. Jam cum in casu priori mentis acies in altare dirigebatur & in imaginem quidem Christi resurgentis, quæ principem in eodem locum occupat; mentem subibit phantasma ceremoniæ Christi ex sepulchro resurgentis, quam in templis Pontificiorum antea vidisti. Quodsi jam in sacerdotem vestitu sacro indutum & in sepulchrum Christi conscendentem mentis aciem dirigis, prodibit in anima phantasma clericorum aliorum cum rebus aliis connexis, & ita porro. Enimvero si in casu altero respicis personas, quas e regione in templo sedentes videre soles; earum occasione mentem subibunt personæ aliæ, quas alibi cum istis vidisti, una cum loco, ubi eas vidisti. Unde porro alia prorsus nascuntur phantasmata, quam in casu priori. Patet itaque ex eadem sensatione in eodem subjecto varia sibi invicem succedere phantasmata, ubi phantasma aliud ex sensatione data producendi facilitatem tibi comparasti, quam quod antea vi illius reproducere sueveras. Enimvero si in casu primo altare templi respiciens in candelabras argenteas cogitationem tuam dirigis; mentem subit taberna vasis argenteis instructa una cum loco, ubi eandem vidisti. Si juxta istam tabernam collocutus fuisti cum amico, quem alias vidisti alibi: phantasma amici recurrens reproducet phantasma loci, ubi alias eundem videras, & ita porro. Atque ita ex eadem sensatione diverso

diverso tempore diversæ propagantur series phantasmatum, prout mentis aciem vel in hanc, vel istam perceptionem partialem dirigis, quam sensatio continet.

§. 132.

Si diverso tempore sensatio debilis, a qua somnium oritur, diversæ fuerit debilitatis, quamvis alias eadem; eandem tamen rem tibi percipere non videris. Etenim si sensatio fuerit debilis, minorem claritatis gradum habet, quam alias habere solet, ubi debilitata minime fuerit (§. 75.), consequenter pro diverso debilitatis gradu diversus quoque est claritatis gradus. Quare cum vi claritatis res perceptæ agnoscantur (§. 31.), deficiente magis magisque claritate minus quoque agnoscuntur & ab aliis perceptibilibus distinguuntur, consequenter cum aliis confundis, quæ per debilitatam perceptionem repræsentantur. Quare cum perceptionis tibi conscius sis, quatenus clara est, eandem rem tibi percipere in quolibet debilitatis gradu non videris.

*Debilitata
sensationis
effectus.*

Propositionem præsentem experientia confirmare licet, si probe notes, quomodo sensus fallat, si in luce crepera contueris aliquod objectum, vel etiam idem e longinquo visum obscurius evadit.

§. 133.

Quoniam imaginatio non producit nisi perceptionem rei antea simul perceptæ eum ea, quæ nunc percipitur (§. 104.); sensatio autem, a qua phantasma ortum trahit, pro diversitate debilitatis non eandem rem exhibet (§. 132.); phantasma quoque diverso tempore ex eadem sensatione debili diversum oriri debet, si debilitas variat. Unde porro ostenditur, quemadmodum supra (§. 129.) ex eadem sensatione debili diversa somnia ortum trahere debere pro diverso debilitatis gradu.

*Diversitas
phantasma-
tum a di-
versa debi-
litate sen-
sationis
pendens.*

Non opus est, ut corollarium præbens exemplo aliquo illustretur; cum levi immutatione superiora huc accommodari possint, aut ad illorum imitationem alia vi legis imaginationis, aut imaginationis libera operatione, reperiri queant.

§. 134.

§. 134.

Quando somnium per somnum extinguatur.

Si phantasmatum claritas successive debilitetur, somnium tandem per somnum profundum extinguitur. Quoniam enim vi claritatis phantasmatum nobis conscii sumus ejus, quod per ea repræsentatur (§. 35.), si continuo claritas debilitatur, nobis continuo minus ejusdem conscii sumus, quod repræsentant. Quamobrem cum claritas tandem omnis evanescere debeat, ita ut nihil prorsus appercipiamus, seu nihili prorsus nobis conscii sumus (§. 25.), somno profundo opprimimur (§. 119.). Quare cum in somnio rerum absentium, quas phantasmata repræsentant (§. 93.), nobis conscii sumus (§. 121.); somnium per profundum somnum extinguitur.

Veritas propositionis præsentis confirmatur etiam a posteriori. Cessat enim somnium somno continuato. Somnum autem absque somno profundum dicimus (§. 119.).

§. 135.

Finis somniorum in evigilantibus.

Si evigilamus, somnium extinguitur. Dum enim evigilamus, redeunt sensationes claræ, quæ scilicet appercipimus (§. 119.); adeoque nobis conscii sumus rerum præsentium (§. 67. 60.). Enimvero in somnio nullius rei præsentis nobis conscii sumus (§. 121.). Somnium igitur cessat.

Idem etiam sic ostenditur. Dum evigilamus, redeunt sensationes claræ (§. 119.), adeoque idæ sensuales (§. 95.), somnium vero nonnisi phantasmata (§. 123.), aut sensationem unam vel alteram debilem (§. 126.) actibus imaginationis æquipollentem admittit (§. 98.), consequenter ideam unam vel alteram sensualem cum phantasmate confundendam (§. 93. 95.). Enimvero quoniam phantasmata minus clara sunt ideis sensualibus in statu scilicet vigilantium, quo non debilitantur (§. 96.), atque adeo illa ab his distinguimus (§. 97.) consequenter nec res absentes pro præsentibus habemus (§. 67. 92.). Quare cum in somnio res absentes pro præsentibus habeamus (§. 127.); somnium, dum evigilamus, extinguitur.

Poterat

Poterat idem pluribus modis aliis ostendi; sed in re manifesta tanto demonstrandi apparatu opus non est. Ex demonstratione posteriori patet ratio, cur somnium extingui debeat, dum evigilamus. Etenim vulgo somnium ideo a phantasmatum successione, quam vigilantes experimur, distinguimus, quod in somnio presentia nobis videantur, quæ non sunt, atque in rei veritate contingere existimemus, quod tamen non contingit. Continet tamen etiam prior aliquam rationem, sed eam magis secretam, ut non quivis eandem animadvertat. Etenim somnium a successione phantasmatum, quam vigilantes experimur, distinguimus, quod in somnio phantasmata in eadem serie continuantur, nobis tale quid non cogitantibus, neque continuationem intendentibus, multo minus promoventibus; in vigilantibus autem ideis sensuibus continuo interrumpantur, nec in eadem serie nisi nostro studio difficulter continuantur.

§. 136.

Si actum imaginandi clare percipimus, sed phantasmata non multum claritatis habent, aut, si mavis, obscura fuerint, quid somniamus, non agnoscimus. *Somnia obscura quando sunt.* Etenim phantasmata sunt ideæ ab imaginatione productæ (§. 93.), adeoque repræsentationes rerum (§. 48.), consequenter perceptiones (§. 24.) objective consideratæ. Quando igitur phantasmata obscura sunt, rem, quam repræsentant, non agnoscimus nec a ceteris perceptibilibus satis distinguimus (§. 32.), etsi actum imaginandi, a quo pendet phantasma (§. 93.), clare percipiamus. Quamobrem nobis conscius sumus nos somniare (§. 31.), non tamen agnoscimus quid somniamus (§. 121.).

Dari istiusmodi statum animæ experientia obvia loquitur, nec quisquam illorum ignorat, quibus somnia sunt frequentia.

§. 137.

Somnia igitur perinde ac perceptiones singulæ distinguenda veniunt in clara & obscura. Clarum scilicet somnium est, quando agnoscimus, quid somniamus: obscurum vero somnium est, quando, quid somniamus non satis agnoscimus, etsi actus percipiendi nobis conscius simus. *Somniorum obscurorum & clarorum differentia.*

(Wolffii Psychologia.)

M

Sunt

Sunt adhuc plura, quæ de somniis notanda veniunt, sed hic nondum tradi possunt, suo adeo loco tum in Psychologia empirica, tum rationali, tum in aliis philosophiæ partibus in medium afferenda. Similiter plura quoque de imaginatione ipsa observanda occurrunt; sed quæ itidem locis convenientibus trademus. Quoniam enim ea, quæ de anima a posteriori innotescunt, ita proponere visum est, ut ad propositiones determinatas reducta ex aliis deducantur, & observata rationis lumine collustrata universalitati notionis claritatem scenerent; plura hic afferre non datur.

CAPVT IV. De Facultate fingendi.

§. 138.

*Pbanta-
smatum di-
vifo.*

P *Artem entis compositi unam absque altera, subjectum item absque modo, non tamen absque attributo, imaginari possumus.* In omni ente composito partes a se invicem separari possunt & una absque ceteris existere potest, ita ut nec unam absque altera sensu percipi repugnet: id quod obvia experientia adeo manifestum est, ut nemo id in dubium vocare audeat. Sane a trunco arboris separamus radices atque ramos; radices pro arbitrio dividimus in partes minores; a ramis refecamus surculos; a surculis decerpimus folia & ita porro. Partem unam transferimus in locum unum ceteris alibi relictis. Atque ita illam absque his visu percipimus solam. Similiter a trunco corporis humani amputari potest caput, amputari possunt artus. Anatomici partes singulas pro arbitrio suo a se invicem separant & unam absque ceteris sigillatim oculis subiciunt. Quoniam igitur in se non repugnat partem entis compositi unam absque ceteris sensu percipi; quæ autem sensu percipimus, ea etiam imaginari valemus (§. 91. 92.); partem etiam compositi unam absque altera imaginari possumus.

Idem

Idem confirmatur a posteriori. Pone enim te vidisse animal quoddam antea tibi non visum & diuturna contemplatione acquisivisse facilitatem reproducendi perceptionem, seu phantasma (§. 93.) animalis istius absentis. Facto in te ipso experimento constabit, te etiam capitis solius, vel aurium solarum, vel caudæ solius phantasma reproducere posse: quamvis negari non possit, inexercitato recurrere phantasma totius animalis, dum phantasma unius tantummodo membri reproducere conatur. Ne tamen conatus destituat successus, imaginandum tibi erit, amputari caput & aliorum transferri; resecari aurem & resectam vel abscondi, vel oculis accuratius inspicendam subjici; detrahi pellem & mensæ imponi. Quodsi enim actum separationis simul imagineris & partem separatam mente rebus aliis jungas; te quamlibet absque ceteris imaginari posse intelliges.

Quoniam modi inesse & non inesse possunt (§. 150. *Ontol.*); ideo non repugnat, ut subjectum modo instructum, eodemque etiam destitutum sensu percipias. Quamobrem cum imaginari valeamus, quæ sensu percipimus (§. 91. 92.); subjectum quoque absque modo imaginari licet.

Idem confirmatur a posteriori. Ponamus te vidisse florem cœruleum. Quoniam colores, quæ insunt subjectis, mutabiles sunt, adeoque inter modos referuntur (§. 151. *Ontol.*); facto in temetipso experimento reperiēs, te eundem florem absque colore cœruleo tibi imaginari posse, ut album v. gr. obijciat imaginatio, quem cœruleum sistebat visus. Idem eodem modoprehenditur in aliis subjectis.

Denique quia attributa enti constanter insunt (§. 150. *Ontol.*) ab eodem quippe inseparabilia (§. 304. *Ontol.*); impossibile est, ut sine attributo sensibili unquam sensu percipias subjectum. Quamobrem cum imaginatio reproducat sensu perceptibilia (§. 91.); non minus impossibile est subjectum aliquod imaginari absque attributo perceptibili.

Idem confirmatur a posteriori. Ternarius numerus angulorum est attributum trianguli. Quodsi triangulum imagineris, impossibile est ut idem absque tribus angulis tibi repræsentantes. Quodsi imaginando montem tibi repræsentare velis, impossibile est ut eum tibi repræsentantes absque valle: habere enim vallem aut, si mavis, necessitas coëxistentiæ vallis est quasi attributum montis.

Et si obvia admodum sint, quæ propositione præsentate continentur, necesse tamen est, ut probe expendantur, ne defectus claritatis notionis utilis pariat in rebus arduis difficultatem. Ceterum ars pictoria & sculptoria inservit experimentis, quibus comproberetur, quanam visibilia imaginari possimus. Quicquid enim imaginari licet; idem etiam utraque arte repræsentare valemus. Ratio clarius in Psychologia rationali elucescet.

§. 139.

Phantasmatum divisio quid dicatur.

Divisio phantasmatum est separatio perceptionum partialium a composita.

Ita phantasmata dividimus, dum perceptionem trunci a perceptione composita arboris separamus; dum florem cæruleum absque colore cæruleo imaginamur; dum a phantasmate ignis calorem removemus. Quodsi quæsieris, quomodo id fieri possit, ut ignem tibi imagineris absque calore; notandum est, calorem tactu percipi. Quamobrem ut ignem absque calore imagineris; phantasma ignis producere debes, quale visu percipis, una cum phantasmate digiti igni immissi. Clare enim percipere poteris cum ignem, tum digitum eodem immissum, nihil tamen percipiens caloris.

§. 140.

Ejus realitas evicta.

Quoniam partem entis compositi unam absque altera, subjectumque absque modo imaginari possumus (§. 138.), perceptio vero partis in perceptione entis compositi, perceptio modi in perceptione subjecti continetur, adeoque non minus illa, quam hæc partialis est, perceptio autem entis compositi & subjecti composita (§. 40.); perceptiones partiales a composita separare, consequenter *phantasmata dividere valemus* (§. 139.).

Exem-

Exempla ad paragraphos præcedentes allata huc etiam pertinent. Ne tamen eadem huc transferenti occurrat difficultas, quædam opportune monenda sunt. Ignem absque calore concipi impossibile, quem admodum in Physica docemur. Dubitari igitur nequit, calorem in attributorum numerum esse referendum. Enimvero ostendimus (*not.* §. 139.), phantasma caloris a phantasmate ignis separari posse: id quod contradicere videtur propositioni de impossibilitate imaginandi subjectum absque attributo. Etsi autem difficultas sit ad speciem composita; protinus tamen evanescit, si modum, quo ignem absque calore imaginari datur, attente consideres. Constat nimirum qualitates sensibiles, in quarum numero calor est, duplici modo spectari posse, vel quatenus insunt subjecto, vel quatenus denotant mutationem organo inductam, cui idea sensualis responderet (§. 90.). Calor, quatenus denotat quid igni inexistens, attributum ignis est; non vero quatenus mutationem tactus organo inductam significat. Nunquam efficiens, ut ignem tibi imagineris absque eo, quod in eo concipiendum, ut ad mutationem organo tactus inducendam aptum sit, cui caloris perceptio in anima responderet, ut in se non repugnet, cessare istam mutationem in organo actione ignis in corpus nostrum sive naturaliter, sive per miraculum impedita. Optica adiumento est in faciendo experimento, quo phantasma istud illustratur. Et enim ope speculi concavi, præsertim cylindrici, imaginem candelæ ardentis in aëre exhibere licet, cui si digitum immittas, nihil caloris percipies, utut flamma apparens a flamma ardente visa minime distinguatur. Obiter monemus, Opticam haud parum adiumenti ad experimenta psychologica afferre, modo experimentis opticis in rem tuam fatis uti valeas.

§. 141.

Perceptiones partiales diversorum entium compositorum Potentia pro arbitrio combinare valemus, subjecto quoque imaginatio tri-perceptiones buere potest modos in eo sensu nondum a nobis perceptos, perceptos combinanda. tamen antea in aliis subjectis, modo eidem non repugnent, ut prodeat phantasma entis sensu antea nondum percepti. Perceptiones enim partiales diversorum entium compositorum repræsentant partes entium compositorum diversorum (§. 40.). Quare eum partem unam absque altera imaginari possumus (§. 138.),

ut autem quædam simul imaginemur sufficiat ea simul sensu percepta fuisse (§. 104.) ; nil sane obstat , quominus partes diversorum entium compositorum simul imaginemur. Et quoniam in perceptione cujuslibet entis compositi idea nexus partium & continuitatis, indeque resultantis unitatis continetur, id quod unicuique ad eam, quæ ipsi primum obvia est, attendenti palam fit, consequenter idea nexus partium, continuitatis & unitatis recurrere nobis debet, quoties ens quoddam compositum imaginari conamur (§. 109.) ; quando partes diversorum entium compositorum tanquam in uno coëxistentes subiecto imaginari intendimus, idæ nexus partium & continuitatis simul recurrere debent. His igitur ad ideas partium accedentibus, prodit idea composita (§. 40.), adeoque phantasma (§. 93.) entis compositi antea sensu nunquam percepti. Patet adeo, perceptiones partiales diversorum entium compositorum pro arbitrio a nobis combinari posse, ut prodeat phantasma entis sensu antea nondum percepti.

Idem confirmatur a posteriori. Trunco corporis humani imaginatio jungit caput cervinum, pedes equinos, geminata brachia humana cum manibus : id quod unusquisque, dum hæc legit, in semetipso experitur. Enimvero homo, cervus, equus & monstrum humanum quatuor brachiis cum totidem manibus instructum sunt diversa entia composita (§. 531. *Ontol.*). Quoniam igitur imaginatio phantasma producere valet, in quo trunco humano junguntur caput cervinum, pedes equini, brachia geminata humana, ita ut partes hæc sint sibi invicem continuæ atque simul ens unum mentiantur, nos perceptiones partiales diversorum entium compositorum combinare valere, ut prodeat phantasma entis sensu antea nondum percepti, patet. Atat non minus in teipso experiri potes, posse te ab ente illo composito removeere cornua cervina & iis substituere bovina; posse te removeere pedes equinos iisdemque substituere caprinos; posse te removeere brachia humana iisdemque

que substituere pedes anteriores simia, & ita porro. Patet itaque te perceptiones partiales diversorum entium compositorum pro arbitrio combinare valere.

Quodsi modus aliquis, minimum genere idem, enti alicui non repugnat; possibile utique est, enti inexistere modum istiusmodi, minimum genere talem, v. gr. ens præditum esse colore aliquo (§. 85. *Ontol.*), consequenter ens istiusmodi modo instructum existere valet (§. 133. *Ontol.*). Quoniam igitur subjectum ipsum antea sensu percepimus, nec minus modum in altero subjecto ab eo diverso deprehendimus *per hypothef.* consequenter inexistentiæ istiusmodi in aliquo subjecto ideam habemus; dum subjecto imaginatio modum istiusmodi tribuere conatur, idea quoque inexistentiæ recurrit (§. 109.): qua ideis subjecti & modi sociata prodit phantasma subjecti modo quodam instructi, qualem antea in ipso sensu nondum percepisti.

Idem confirmatur a posteriori. Lilia ista, quæ natura candida producit, nunquam nisi candida vidimus. Hoc tamen non obstante imaginatio iisdem colorem luteum, cæruleum, viridem, rubrum, nigrum & alium quemcunque tribuere valet. Etsi autem non constet, utrum natura colorem candidum in alium mutare possit, nec ne, cum mixtionem materiæ, quæ in cepis absolvitur, ignoremus, consequenter num essentiæ liliorum intrinsecæ, quæ mixtione illa & corpusculorum mixti combinatione absolvitur (§. 257. *Cosmol.*) repugnet; quatenus tamen nonnisi structuram externam sensu percipimus, eidem non repugnat color quivis alius: etenim non modo colore quodam lilium obducere valemus salva ipsius structura, verum etiam per vitra colorata idem respicientes eidem colorem quemvis tribuere valemus. Color igitur candidus respectu structuræ externæ, quæ sola oculis obvia est, pro modo habetur (§. 151. *Ontol.*), nec colores alii eidem eodem respectu repugnant,

pugnant, seu impossibile non est, ut alius quidam color loco candidi insit (§. 170. *Ontol.*). Imaginatio igitur subjecto alicui tribuere potest modum, qui eidem minime repugnat, ut prodeat phantasma entis antea sensu nondum percepti.

Ex his, quæ de subjecto vi imaginationis modo quodam instruendo diximus, apparet, fieri posse ut pro modo habeamus, qui non est, quoniam scilicet eidem minime patet interior rei essentia. Non tamen imaginamur contradictoria, nisi quodam subreptionis vitio. Quodsi enim in subjecto imaginabili non admittis nisi ea, quæ in sensum incurrunt; minime repugnat idem eidem inesse, quod imaginationis vi eidem tribuitur. Quodsi enim iis, quæ phantasma repræsentat, repugnaret, quod superaddit imaginatio; nec idem superaddere valeret: quin potius se tale quid imaginari minime posse deprehenderet. Quamobrem imaginatio non fallit nisi eos, qui vitio subreptionis non confundenda confundunt, veluti qui phantasma lilii pro ipso lilio habent. Sed ea ex sequentibus evadent clariora.

§. 142.

*Phantasmatum
compositio
quid dicatur.*

Compositio phantasmatum est combinatio perceptionum partialium ad constituendam unam compositam.

Illustratur phantasmatum compositio iisdem exemplis, quibus ad confirmandum propositionem anteriorem a posteriori usi sumus. Non tamen difficile est exempla quotlibet alia superaddere, cum unius cujusque imaginatio iisdem luxuriat.

§. 143.

*Realitas
istius com-
positionis
adstructa*

Phantasmata componere valemus. Perceptiones enim partium diversarum entis compositi pro arbitrio combinare valemus, subjecto quoque in phantasmate tribuere modum in eodem sensu non perceptum, perceptum tamen in aliis, modo eidem non repugnet, ut prodeat phantasma entis sensu antea nondum percepti (§. 141.). Enimvero dum perceptiones partiales combinamus ad constituendam unam compositam, phantasmata componimus, (§. 142.). Phantasmata igitur componere valemus.

Atque ita realitas compositionis phantasmatum fuit evicta, eodem prorsus modo, quo antea divisionem evicimus.

§. 144.

§. 144.

Facultas phantasmatum divisione ac compositione pro-
ducendi phantasma rei sensu nunquam perceptæ dicitur *Facultas fingendi quid sit.*
facultas fingendi.

Phantasmatum divisio ac compositio sunt operationes imaginationis (§. 139. 142.). Quare cum facultas fingendi non supponat nisi possibilitatem phantasmata dividendi & componendi; ejus exercitium operationibus imaginationis totum absolvitur, consequenter facultas fingendi ipsa facultate imaginandi continetur & quandam ejus veluti partem constituit.

§. 145.

Anima habet facultatem fingendi. Poteest enim phan-
tasmata dividere (§. 140.) atque componere (§. 143.), adeoque *Quod anima componat.*
habet facultatem ea dividendi atque componendi (§. 29.).
Quare cum in divisione phantasmatum perceptiones partiales a compositis separentur (§. 139.) & in compositione perceptiones partiales ad diversa subiecta pertinentes ita combinantur, ut unam compositam constituent (§. 142.); phantasma sic prodit rei sensu antea nondum perceptæ. Habet igitur anima facultatem phantasmatum divisione ac compositione producendi phantasma rei sensu antea nondum perceptæ, adeoque facultatem fingendi habet (§. 144.).

Idem etiam sic ostenditur. Anima perceptiones partiales diversorum entium compositorum pro arbitrio combinare valet, ut prodeat phantasma entis sensu antea nondum percepti (§. 141.). Enimvero dum perceptiones partiales a compositis, ad quas pertinent, separat, phantasmata dividit (§. 139.) & dum has partiales separatas iterum pro arbitrio combinat, ut unam compositam constituent, eadem componit (§. 142.). Phantasmatum igitur divisione ac compositione producit phantasma rei sensu antea nondum perceptæ, consequenter facultatem fingendi habet (§. 144.).

A posteriori facultatem hanc fingendi confirmant exempla,
(*Wolffii Psychologia.*) N pla,

pla, quibus paulo ante (§. 141.) stabilivimus, nos perceptiones partiales diversorum entium compositorum pro arbitrio combinare valere. Fingimus e. gr. ens antea non visum, dum truncum corporis humani vi imaginandi jungimus caput cervinum, pedes equinos, geminata brachia humana cum manibus. Truncum humanum ab homine, caput cervinum a cervo, pedes equinos ab equo, brachia humana cum manibus denuo ab homine separamus, atque hoc ipso phantasmata dividimus (§. 139.). Truncum humanum, quem ab homine; caput cervinum, quod a cervo; pedes equinos, quos ab equo & geminata brachia humana, quæ a diversis hominibus separavimus, pro arbitrio combinamus, utque unum constituent ens compositum, continuitatem a corpore quolibet viso mente sejunctam insuper iis locis jungimus, ubi partes diversorum entium coalescere debent, atque eo ipso phantasmata componimus (§. 142.). Quando itaque fingimus ens, quod truncum habet humanum & geminata brachia humana cum manibus, caput vero cervinum & pedes equinos; phantasma istud producimus aliorum phantasmatum divisione ac compositione. Eodem modo idem confirmatur exemplis quibuscunque aliis, quibus propositio anterior (§. 141.) confirmari potest.

Neque hoc mirum videri debet. Etenim propositio de combinatione perceptionum partialium ad diversa subiecta pertinentium est notio phantasmatum compositioni respondens (§. 142.), & phantasmatum divisio, quæ in separatione perceptionum partialium a composita consistit (§. 139.), tacite supponitur.

§. 146.

*Entia ficta
quando
imaginatio
producat.*

Si ea componimus, quæ sibi mutuo repugnant, vel naturæ vi in eodem subiecto conjungi nequeunt, phantasma ens fictum representat. Pone enim ea, quæ sibi mutuo repugnant, componi: ens istiusmodi, quale phantasma representat, impossibile erit (§. 83. Ontol.). Quare cum existere nequeat, quod impossi-

possibile est (§. 132. *Ontol.*); enti istiusmodi existentia repugnat (§. 310. *Log.*), consequenter ens fictum est (§. 140. *Ontol.*).

Pone secundo ea, quæ imaginatio componit, vi naturæ in eodem subjecto conjungi non posse. Quoniam natura universa est aggregatum omnium virium motricium, quæ corporibus in mundo coëxistentibus simul sumtis insunt (§. 507. *Cosmol.*); mundus autem seu universum series est entium finitorum tam simultaneorum, quam successivorum inter se connexorum (§. 48. *Cosmol.*); in serie rerum non continentur causæ, quæ in eodem subjecto conjungere possunt, quæ imaginatio componit (§. 881. *Ontol.*). Quare cum in mundo nihil actum consequatur, nisi cujus causa in serie rerum, ex qua constat, continetur (§. 97. *Cosmol.*); ens istiusmodi in mundo hoc adspectabili actum consequi, seu existere nequit, adeoque si non absolute, saltem in relatione ad mundum præsentem existentia eidem repugnat (§. 310. *Log.*). Erit igitur denuo ens fictum (§. 140. *Ontol.*).

Difficile subinde est demonstratu, utrum ea, quæ imaginatio conjungit, sibi mutuo repugnent, nec ne. Trunco humano jungimus caput cervinum, pedesque equinos: ecquis vero demonstret, vel in se repugnare, ut truncus humanus continuus sit capiti cervino & pedibus equinis, vel tale quid minimum vi naturæ existere non posse, etsi in se non impossibile per miraculum ut existat minime repugnet? Multus sane requireretur apparatus, antequam demonstrationem absolvere liceret, utut per se incautis manifestum videatur, ens istiusmodi naturæ viribus existere non posse, quod idem nec existere unquam viderimus, nec alibi existere, aut extitisse acceperimus. Accidit ex hac ratione, ut in numerum entium fictorum referamus, quicquid imaginatio antea nobis non visum producit, etsi nondum inquisiverimus, utrum vel absolute, vel in ordine ad præsentem seriem rerum contradictionem involvat.

§. 147.

Quoniam pro arbitrio nostro componentes, quæ imaginatio nobis suggerit, fieri potest ut ea componamus, quæ sibi
Confusio entis si li cum reali quo-
 mu-

*modo evi-
tanda.*

mutuo repugnant, vel naturæ minimum vi in eodem subjecto conjungi nequeunt; in eo autem casu phantasma ens fictum repræsentat (§. 146.); si imaginatio phantasma quoddam producit, quod repræsentat in numerum entium referendum non est, antequam demonstratum fuerit, id contradictionem non involvere, nec in mundo hoc adspectabili existere posse sumendum, antequam evictum fuerit, causam ejus in serie rerum præsentem contineri. Si enim contradictionem involvit, impossibile est (§. 79. Ontol.), adeoque existere nequit (§. 132. Ontol.), consequenter nec ens est (§. 134. Ontol.). Quodsi vero causa ejus in serie rerum præsentem non contineatur, in mundo hoc actum consequi nequit (§. 97. Cosmol.), adeoque in numerum entium ad præsentem rerum seriem sive mundum adspectabilem (§. 55. Cosmol.) pertinentium referri nequit (§. 134. Ontol.).

E. gr. Vidimus aves, vidimus pisces. Imaginationi nihil obstat, quo minus alas apponat pisci & sic producat phantasma piscis volantis. Enimvero piscis volans in numerum entium vel simpliciter, vel ad hunc mundum adspectabilem pertinentium referri nequit, antequam ostenderit, non repugnare ut piscis habeat alas, vel naturæ vi pisces volantes produci posse. Jam cum ex relatione illorum constet, qui per maria navigarunt, dari pisces volantes: phantasma piscis volantis si in genere consideretur, ens fictum equidem non refert: quatenus tamen ei, quem refert, pisci eas apponit alas, quas phantasma exprimit, in numerum entium verorum ideo nondum referri potest piscis ille volans, quem tibi imaginaris. Videmus itaque, quam parum sit fidendum imaginationi, & quam caute sit procedendum, ne nobis ab eadem imponi patiamur.

§. 148.

*Ars phan-
tasmatum
repræsentat-
rix.*

Si imaginatio per arbitrariam compositionem phantasma quoddam producit; ars objectum eidem simile producere valet. Quando enim imaginatio per arbitrariam compositionem phantasma quoddam producit, perceptiones partiales ad constituendam unam compositam combinat pro arbitrio (§. 142.). Quare cum perceptiones istæ partiales repræsentent res corpo-

reas

reas antea sensu perceptas (§. 91.); minime repugnat materiæ istiusmodi induci figuræ, quales eadem habent (§. 88. *Ontol.*). Quoniam præterea partes ita figuratæ continuum exhibent in phantasmate *per hypoth.* nec impossibile est, ut partes ita figuratæ sibi mutuo fiant continuæ. Nihil igitur obstat, quo minus materiæ figuræ inducantur istiusmodi in superficie continua, consequenter ars objectum phantasmati simile producere valet (§. 195. *Ontol.*).

Idem etiam confirmatur a posteriori. Imaginationis vi producimus phantasma, in quo trunco humano jungitur caput cervinum cum pedibus equinis & brachiis humanis. Quoniam cervinum caput, truncus corporis humani, pedes equini & brachia humana sunt in numero entium, quæ existunt; non impossibile est ut materiæ istiusmodi figuræ inducantur, quales extus apparent. Et quia non repugnat figuræ quaslibet una induci eidem trunco arboris vel lapidi, ut in superficie externa continuitatem exhibeant; ligno vel lapidi incidî potest simul figura capitis cervini, trunci corporis humani, brachiorum humanorum & pedum equinorum, ut in superficie partes circa extrema sibi mutuo sint continuæ. Sculptor itaque effigiare valet statuam, quæ habet caput cervinum, truncum humanum, brachia humana & pedes equinos. Similiter pictor in tabula istiusmodi ens delineare valet, & arte fuforia idem ex metallo fieri potest.

Nimirum quæ imaginatio in objecto clare repræsentat, ea non repugnant materiæ, sed eidem inesse possunt. Quamobrem nil obstat, quo minus arte materiæ talia inducantur. Enimvero si deinde tacite superaddis, quæ vi naturæ existere nequeunt, non dantur causæ naturales, quæ ex materia existente ens istiusmodi producere valent. Atque ita ens istud, quod phantasma repræsentat, ex classe rerum naturalium exulat. Ita si caput cervinum jungimus corpori humano, minime repugnat, ut utraque figura eidem ligno, vel lapidi inducatur, vel diversis lignis aut lapidis frustis inductæ figuræ eo modo jungan-
tur, quo continuitatem mentiantur, cum sola superficies externa,

qua terminatur materia, & color eidem illitus in sensum & imaginationem incurrat. Enimvero si tacite superaddimus, caput cervinum structuram habere debere internam, qualem in natura rerum habet, & similiter trunco corporis humani eam tribuimus structuram internam, quam nostrum habet; illæ structuræ internæ naturæ vi coexistere nequeunt in eodem subiecto. Quod si ex anatomia cervi & corporis humani structura interna satis perspecta foret omnisquæ ratio in utraque pateret; ostendi forsitan poterat, cur repugnet trunco corporis humani adhærere caput cervinum: aut, si concedamus, non simpliciter repugnare, ut corpus humanum vivum instructum sit capite cervino; nullas tamen dari in natura rerum causas istiusmodi entis productrices monstrari poterat, siquidem causarum naturalium series nobis sufficienter foret perspecta. Cavendum igitur, ne phantasmati iudicando tacite superaddamus, quæ in eodem non continentur, quatenus idem simpliciter apprehendimus. Ita imaginatio repræsentare potest in phantasmate motum capitis cervini trunco humano coherentis: neque hoc repugnat simpliciter, cum idem quoque re ipsa afficere liceat, si caput cervinum arte effectum imponatur trunco corporis hominis viventis, ut caput ejus intra ipsum abscondatur. Enimvero si tacite superaddimus, motum fieri a principio capiti cervino interno eodem modo, quo in natura rerum cervum caput suum movere observamus; subreptionis quodam vitio phantasmati ingerimus, quod in eodem non continetur.

§. 149.

Ars inveniendi architectorum aliorumque artificum.

Quoniam partes ædificii diversæ pro arbitrio a nobis fieri possunt; *imaginatio ex iis, quæ in pluribus ædificiis diversis vidit, ideam novi ædificii componere valet. Idem eodem modo fit in aliis operibus artis.*

Nititur hoc principio ars inveniendi architectorum communis, quæ & utuntur artifices alii. Etenim dum ideam ædificii extruendi animo concipere debent, plures ædificiorum ichnographias & orthographias oculis subiciunt. Sunt scilicet imagines rerum phantasmatum vicariæ, cum non repræsentent nisi ea, quæ vi imaginationis repræsentari possunt, ut adeo perinde sit, sive imaginatio reproducat ideas rerum antea visarum, sive imagines earundem oculis objiciantur. Ex istis deinde ichnographiis & orthographiis in suam ichnographiam & orthographiam transferunt, quæ commoda videntur, atque ita componendo veluti

veluti phantasmata novum producant. Obtinet idem in arte pictoria, sculptoria & re hortensi, aut, si mavis, architectura hortensi.

§. 150.

Si architectus ex iis, quæ in pluribus ædificiis diversis vidit, ideam ædificii componit vi principii rationis sufficientis; communis ædificium juxta eam extructum est regulis architecturæ conformi. Et in genere si artifex ex iis, quæ in pluribus diversis corporibus artificialibus ad artem suam spectantibus vidit, ideam corporis cujusdam artificialis ejusdem artis vi principii rationis sufficientis componit; corpus istud regulis artis conforme. Etenim si architectus ex iis, quæ in pluribus ædificiis diversis vidit, ideam ædificii componit vi principii rationis sufficientis; in eadem nihil admittit, cuius non dare possit rationem sufficientem, cur adesse potius, quam abesse debeat, cur tale potius, quam aliud esse debeat (§. 70. Ontol.). Quoniam itaque in architectura civili rationes singularum partium desumuntur a fine earundem (§. 5. Arch. civil.) & omnes tandem rationes particulares resolvuntur in scopum fundatoris, qui totius ædificii finis est (§. 2. Archit. civil.); in rationes eorum inquit, quæ in aliis ædificiis facta fuisse videt, & num ea conspirent cum fine ædificii, cuius ideam animo concipere debet, judicat. Quare cum propositiones enunciantes determinationem rationi conformem sint regulæ (§. 475. Ontol.); in idea ædificii, quæ animo concipitur, singula secundum regulas architecturæ civilis determinantur. Et quoniam nullas determinationes admittit, nisi quæ ad scopum fundatoris obtinendum tendunt per demonstrata; determinationes omnes inter se consentiunt & in ædificio, cuius idea animo concipitur, nascitur perfectio (§. 503. Ontol.). Enimvero illud regulis architectonicis conforme censetur ædificium, quod, cum sit perfectum, a defectu liberum (§. 524. Ontol.), adeoque nihil continet regulis contrarium (§. 477. Ontol.). Ædificium adeo regulis architectonicis conforme, si exstruitur juxta ideam ex iis, quæ

quæ architectus in pluribus ædificiis diversis vidit, juxta principium rationis sufficientis compositam.

Idem eodem prorsus modo ostenditur de corpore quocunque alio artificiali ad quamcunque artem spectante: neque enim alia re opus est, quam ut pro ædificio substituatur corpus artificiale in genere, & pro regulis architecturæ substituantur in genere regulæ artis in demonstratione anteriore. Habere enim unamquamque artem suas regulas, vel exinde colligitur, quod in quæcunque corpora artificialia perfectio cadat, vi cujus aliud præstare judicatur alio; omnis autem perfectio suas habeat regulas, per quas explicari, hoc est, intelligi potest, cur determinationes intrinsecæ tales potius sint, quam aliæ (§. 509. *Ontol.*). Quod si dubites, an corporibus artificialibus singulis respondeat aliqua perfectio, perpendas, quæso, singula certi cujusdam finis gratia fieri; ad quem cum tendant determinationes intrinsecæ singulæ, ex earum consensu nascitur in corpore perfectio (§. 503. *Ontol.*).

Pater adeo usum imaginationis rectificari per connubium imaginationis cum ratione, ut adeo ars communis inveniendi, quæ vulgo seducit, ut opus artis defectu laborer, fiat proba opusque producat perfectum, non secus ac si sine imaginationis subsidio fuisset inventum.

§. 151.

*Significatus
hierogly-
phicus qui-
nam sit.*

Significatum hieroglyphicum appello, quo res quædam ad denotandam aliam transfertur.

Ita significatus hieroglyphicus est trianguli, si eodem ad denotandum Deum trinunum utamur. Sumimus vocabulum in recepto significatu. Etenim *Hieroglyphice* dicta fuit veteribus ars significandi aliquid per sculptas rerum animaliumque figuras: quibus adeo utebantur loco literarum. Ars ista olim Ægyptiis, Sinis aliisque gentibus usitata fuit; hodie autem non adeo frequens ejus usus est. Imaginationi multus locus est in constituendo significatu hieroglyphico, non tamen soli; sed accedere quoque debet ratio, quæ illam in componendis phantasmatis dirigit. Quamobrem hic locus est, quo modum constituendi significatum hieroglyphicum distinctius explicare debemus.

§. 152.

Si phantasma quoddam ita componitur, ut per similitudinem partium constitutivarum cum determinationibus rei cuiusdam intrinsecis hæ ex istis colligi possint; phantasma significatum hieroglyphicum habet ac vi principii rationis sufficientis componitur. Etenim si phantasma ita componitur, ut per similitudinem partium constitutivarum cum determinationibus rei cuiusdam intrinsecis hæ ex istis colligi possint; singulæ partes, ex quibus phantasma componitur, sunt signa determinationum in re ista contentarum (§. 952. *Ontol.*) & phantasma integrum est signum rei ipsius (§. cit.). Res igitur, quam phantasma repræsentat (§. 48. 93.), ad denotandam rem aliam transfertur, consequenter phantasma significatum hieroglyphicum habet (§. 151.).

Figura hieroglyphica quomodo inveniantur.

Enimvero quoniam partes hæ similitudinem quandam habent cum determinationibus rei cuiusdam intrinsecis, per hypothef. ex similitudine ista intelligitur, cur hæ potius partes, quam aliæ in compositione phantasmatis admittantur, & cur eadem simul jungantur. Similitudo igitur ita continet rationem sufficientem compositionis (§. 56. *Ontol.*), consequenter phantasma vi principii rationis sufficientis componitur (§. 71. *Ontol.*).

Habemus hic principium genuinum idemque fecundissimum constituendi significatus hieroglyphicos: quod ut appareat, exemplum unum alterumque in medium proferamus. *Comenius*, qui non inutili instituto in gratiam puerorum orbem pictum condidit, ut vocabula rerum cum ideis animæ imprimerent, cum animam pingere non posset, ad artem hieroglyphicam confugiens phantasma condidit, cui significatum hieroglyphicum indidit. Animam enim repræsentat per puncta in istiusmodi figuram disposita, qualem exhibet umbra corporis humani in planum ad horizontem perpendiculare & corpori atque luminis directe oppositum projecta. Puncta enim vi definitionis Geometricarum indivisibilia sunt, etsi talia pingi non possint, adeoque simplicitatem animæ denotant, vi cujus omni prorsus parte caret. Figura

(*Wolffii Psychologia.*)

O

corporis humani, per quam puncta ista disponuntur, cum per ipsa ista puncta absque ullo linearum ductu constituatur, denotat substantiam animæ, vi cuius absque corpore subsistere potest. Quatenus tamen puncta ista per figuram corporis disponuntur atque ita disposita eandem figuram necessario exprimunt; animæ cum corpore unio a voluntate ipsius independens denotatur. Denique cum puncta ista per totam corporis humani figuram dispergantur; hoc ipso indigatur animam esse totam in toto corpore & totam in qualibet ejus parte, juxta doctrinam Scholasticorum tunc temporis in scholis receptam. Ecce igitur significatum hieroglyphicum phantasmatis, quo *Comenius* animam representavit. Dum enim idem exhibuit, perinde est ac si dixisset, animam esse substantiam simplicem, quæ independentem a corpore subsistere possit, vinculo tamen voluntate ipsius non dissolubili ita unita sit corpori, ac si tota esset in qualibet parte corporis, quemadmodum tota in toto corpore existit. Memini me plus simplici vice vidisse historiam Salvatoris a diabolo in deserto tentari ita depictam, ut diabolus speciem monachi *Franciscani*, sed pedibus equinis, vel caprinis instructi referret. Ab erroribus aliis imputandis adeo abhorrens, ut in casu dubio alteri scientiam majorem ea, quam possedit, tribuere malim, quam errorem, mihi quoque persuadere minime potui factum hoc fuisse ex errore chronologico de origine Ordinis *Franciscanorum*. Quamobrem imagini isti sensum hieroglyphicum inesse collegi. Constat *Franciscanos*, qui vitæ austeritate ceterum omnem superant, reliquos homines in universum omnes sanctimonia præcellere existimari, ita ut Imperatores, Reges ac Principes veste monachi *Franciscani* induti mori ac sepeliri ament. Quare cum diabolus visibili forma exhiberi nequeat, nisi sub specie humana, in angelum vero lucis se transformare soleat, 1 Cor. XI. 14. nullum mihi dubium est, diabolum simulatorem pingi instar monachi *Franciscani* ad significandum morem ejus, quem Apostolus nos docuit, tribui autem ei pedes equinos, vel caprinos, ut porro indigiretur, ipsum arte sua efficere minime posse, quin attentus formam fallacem detegat. Sensus hic hieroglyphicus convenit historię temptationis, adeoque eundem fert phantasma pictura expressum, etiam si ejus inventor eum non intenderit. Ceterum notatu dignum, antiquissimis temporibus non modo dogmata, sed & historica per figuras hieroglyphicas tradita fuisse, ne quis promiscue ad hæc arcana cognoscenda admitteretur. Istud de *Egyptiis* notissimum est; hoc vero de *Sinensibus* comme-

morat *Philippus Cauplet*, Soc. Jesu, Sinenſis Miſſionis in urbem Procurator, in præſatione ad Tabulam Chronologicam Monarchiæ Sini-
cæ Pariſiis 1686. editam f. 11. Ita primus imperii conditor *Fohi* in
lucem editus habuiſſe fertur caput forma quidam humana, ſed cor-
pus ſerpentina ad denotandam prudentiam callidumque ejus inge-
nium. Succellori ejus *X in num* caput fuiſſe dicitur bovina ſpecie,
quod induſtriam in agricultura excolenda poſuerit ſingularem & bo-
ves ſub jugum mittere cepit. De eodem narratur, quod, dum agri-
culturam inſtituere meditaretur, cælum pluerit triticum & orizam,
ad denotandam fertilitatem agrorum, quam arte promovit. Hiero-
glyphicum iſtud ſcribendi genus qui non intelligunt, hiftoriam fabu-
loſam appellant & contra evidentes veritatis characteres, quos *Com-
pletus* commemorat, perperam pro conficta venditant.

§. 153.

Si non modo partes ſingulæ, ex quibus phantaſma compo- *Perfectio*
nitur, denotent diverſas determinationes rei intrinſecas, verum *hierogly-*
etiam ſingula, quæ in iſtis partibus diſtingui poſſunt, denotent ea, *phicorum.*
quæ in determinationibus rei diſcernuntur; phantaſma totum ſig-
nificativum eſt & in genere hieroglyphicorum perfectum. Etenim
in phantaſmate non conſiderantur niſi partes, ex quibus com-
ponitur, & ea, quæ in his partibus diſtingui poſſunt: cetera
enim tacite ſupponenda forent. Quare cum partes ſingulæ
denotent diverſas rei cujuſdam determinationes intrinſecas &
ea, quæ in partibus hiſce diſtinguuntur, ſignificent quæ in de-
terminationibus iſtis diſcernuntur *per hypoth.* nihil eſt in toto
phantaſmate, quod non habeat ſignificatum hieroglyphicum
(§. 151.). Phantaſma igitur totum ſignificativum eſt.

Jam cum in toto phantaſmate nihil detur, quod non
habeat ſignificatum hieroglyphicum *per demonſtrata*: quæcun-
que phantaſmati inſunt ad ſignificatum hieroglyphicum, quo-
res quædam denotatur (§. 151.), tendunt, conſequenter quæ
phantaſmati inſunt diverſa, ea inter ſe conſentiunt (§. 503.
Ontol.). Quare cum conſenſu plurium a ſe invicem differen-

tium in uno constet perfectio rei (§. cit.); phantasma istud, quatenus sensum fundit hieroglyphicum, perfectum est.

Maximam utilitatem habet theorema præfens in dijudicando significato hieroglyphico. Illustrat idem exemplum Comenii de anima, ad quod paulo ante (not. §. 152.) provocavimus. Etenim in phantasmate isto distingui non possunt nisi puncta, punctorum horum situs & terminus, quo circumscribitur spatium, in quo nullo ordine collocantur, sed ita ut spatium totum replere videantur. Singula hæc significativa sunt & significatus particulares simul sumti constituunt significatum integrum phantasmatis, quemadmodum ante dicta relegendi apparet. Phantasma igitur totum significativum est &, quatenus significatum hieroglyphicum habet, perfectum est.

§. 154.

Gradus perfectionis in figuris hieroglyphicis.

Si duo fuerint phantasmata eundem significatum hieroglyphicum habentia & singula in se considerata fuerint perfecta; id quidem perfectius est altero, quod ampliorem habet significatum seu per quod plura significantur. Quoniam phantasmata eundem significatum hieroglyphicum habent & in se considerata respectu ejusdem perfecta sunt per *hypoth.* quoad significatum hieroglyphicum a se invicem differre nequeunt, nisi quatenus unum plura significat in subjecto, ad quod denotandum phantasmata illa destinantur (§. 151.), quam alterum. Quare cum in re perfectiore plura observabilia sint, quam in altera, quæ minorem perfectionem habet (§. 520. *Ontol.*); phantasma illud, quatenus significatus hieroglyphicus attenditur, perfectius est, quod plura significativa continet, quam alterum, per quod pauciora in subjecto indigitato significantur.

Idem etiam sic ostenditur. Phantasmati A plura insunt, quæ significent determinationes subjecto per idem indigitato intrinsecas, quam phantasmati B, quo idem denotatur subjectum per *hypoth.* Quoniam itaque phantasmata A & B, quatenus idem denotant subjectum, respectu significatus hieroglyphici tanquam entia ejusdem speciei considerari possunt

(§. 233. 195. *Ontol.* & §. 151. *Psychol.*); significativa autem sunt determinationes, quibus in genere hieroglyphicorum phantasmata ista constituuntur (§. 122. *Ontol.* & §. 151. *Psychol.*): phantasma A perfectius est phantasmate B (§. 521. *Ontol.*).

Demonstratio posterior magis evolvi poterat: id quod ex plurium citationum cumulatione apparet. Enimvero non est, ut, quod jam ante breviter satis evidum fuit, longiore demonstratione corroboretur. Usus vero insignem habet theorema præsens in concilianda sensui hieroglyphico omni amplitudine, quam habere potest.

§. 155.

Si phantasma hieroglyphicum representet singulas notas, quæ definitionem rei alicujus ingrediuntur; loco definitionis servit. Si enim phantasma hieroglyphicum singulas notas representat, quæ definitionem rei alicujus ingrediuntur; per ipsum patent, quænam in definitione ista notæ contineantur. Quare cum in definitione enumerentur notæ ad rem definitam agnoscendam & ab aliis distinguendam sufficientes (§. 153. *Log.*), perinde vero sit, si notæ istæ verbis tanquam signis (not. §. 958. *Ontol.*), siue signis aliis, quales sunt res in hieroglyphicis (§. 151.), indigentur; phantasma hieroglyphicum loco definitionis servit.

Phantasma *Comenianum* de anima, quod supra (not. §. 152.) explicavimus, definitionis loco inservire poterat. Etenim anima definiri potest per substantiam simplicem corpori humano independentem a voluntate sua ita unitam, ut sit una in toto & tota in qualibet ejus parte juxta doctrinam Scholasticorum, immo & secundum rei veritatem, siquidem intelligibili modo explices, quomodo anima una in toto & citra sui multiplicationem tota in qualibet ejus parte existat: id quod suo loco explicabimus. Quare cum phantasma *Comenianum* singula ista significet; definitionis loco esse potest.

§. 156.

Si phantasma hieroglyphicum representet subiectum confuse perceptum siue absolute, siue sub certis determinationibus accidentalibus una cum prædicatis eidem vel absolute, vel sub iisdem

*Propositio-
num repræ-
sentatio hi-
eroglyphica.*

dem determinationibus competentibus ; propositionis in casu priori categoricæ , in posteriori hypotheticæ loco servit. Etenim si phantasma hieroglyphicum repræsentat subjectum confuse perceptum sive absolute, sive sub certis determinationibus accidentalibus ; per ipsum patet, quale sit subjectum & sub qua conditione in casu posteriori spectetur (§. 151.). Et quoniam præterea denotat prædicatum subjecto vel absolute spectato, vel sub datis determinationibus tribuendum, per idem quoque innotescit hoc prædicatum, consequenter phantasma nobis & notionem in memoriam revocat propositioni, quæ ex isto subjecto atque prædicato componitur (§. 200. Log.), tribuendam (§. 520. 521. Log.). Enimvero perinde est sive notio propositioni respondens excitetur ope verborum, sive ope phantasmatum hieroglyphicis, adeoque phantasma propositionis loco servit, tam categoricæ, quam hypotheticæ.

Exempli loco est phantasma, quo justitiam nobis repræsentamus instar virginis velatis oculis libram manu una, gladium altera tenentis. Etenim hic virgo repræsentat justitiam confuse saltem perceptam. Libra indicat, quod suum tribuat utrique. Gladius significat, quod pœnis afficiat delinquentes. Velati denique oculi indignant, quod non habeat respectum personarum, vel generalius, quod nullis rationibus extrinsecis se permoveri patiatur. Libra ergo, gladius & velati oculi denotant tria prædicata justitiæ tribuenda. Est adeo phantasma hieroglyphicum loco triam propositionum, quæ idem habent subjectum, vel loco propositionis, cui triplex est prædicatum (§. 314. Log.). Propositio nimirum copulativa est (§. 315. Log.) eaque hujus tenoris: Justitia jus suum tribuit cuique, pœnis debitis afficit delinquentes, nec ullis rationibus extrinsecis se permoveri patitur ad quicquam faciendum. Quod si velati oculi trahantur ad constantem ac perpetuam voluntatem, quæ rationibus intrinsecis tota nititur, ab extrinsecis prorsus independens, & libra referatur ad modum, quo jus suum tribuit privatis, gladius vero ad modum, quo idem tribuit publico seu Reip. quam hic instar personæ considerare licet, prout in Trim. Vern. A. 1729. n. II. §. 7. observavimus; phantasma istud hieroglyphicum *Ulpiani* quoque definitionem repræsentare potest, quod sit constans & perpetua voluntas jus suum cuique tribuendi; id quod mirum videri

minime debet, cum significatus hieroglyphicus sit arbitrarius, et si ratione non destituatur, quemadmodum ex ipsa ejus definitione (§. 151.) colligitur, omnisque definitio in propositiones converti possit & ex propositionibus communis subjeſti condantur definitiones ejusdem.

§. 157.

Figuras hieroglyphicas appello, quas phantasmata significatum hieroglyphicum habentia repræsentant.

Phantasma hieroglyphicum, de quo in antecedentibus locuti sumus, est idea, quæ imaginem quandam repræsentat, cui significatus hieroglyphicus tribuitur. Ita si anima repræsentatur per puncta ita disposita in plano, ut eadem perimetro circumscribantur, quæ umbra corporis humani in planum projecta comprehenditur (not. §. 152.); phantasma hieroglyphicum est, quatenus in mente existit idea; figura autem hieroglyphica, quatenus imago delineatur, per quam puncta isto pacto disponuntur. Phantasma in mente existit; imago eidem similis, quæ figura hic appellatur, extra eandem, sive picta, sive sculpta, sive æri incisa seu arte quacunque expressa fuerit.

§. 158.

Discipline per figuras hieroglyphicas tradi possunt. In disciplinis enim non occurrunt nisi definitiones ac propositiones (§. 1212. Log.). Definitiones per figuras hieroglyphicas exhiberi possunt (§. 155.); possunt etiam per easdem exhiberi propositiones (§. 156.). *Disciplina igitur per figuras hieroglyphicas tradi possunt.*

Facile apparet, tradi debere propositiones absque demonstratione: prolixum enim nimis foret, etsi non prorsus impossibile, demonstrationem quoque, utpote ex meris propositionibus ac definitionibus contextam (§. 551. & seqq. Log.), sub involucri hieroglyphico exhibere. Uti sunt temporibus antiquissimis Ægyptii hoc veritates inventas propagandi modo, ne propalando pervenirent ad indignos, qui iisdem pretium statuere minime possent, vel, ut phrasi hieroglyphica idem enunciatur, ne margaritæ suisbus projicerentur. Characteres *Sinarum* antiquissimi, quos *Tobi* imperii conditor invenisse dicitur, hieroglyphici sunt ex parte, subinde etiam ex alia. Etenim ex combinatione characteris, quo homo denotatur, & alterius, quo canis indigitatur, oritur character docilitatis atque obedientiæ, vid. *Nouveau voyage autour du*

Figura hieroglyphica definitio.

Usus figurarum hieroglyphicarum in disciplinis.

du monde par Mr. le Gentil Tom. I. p. 259. Nemo tamen diffitebitur artem hieroglyphicam hac in parte fuisse adhuc imperfectam, cum methodus veteribus nondum adeo accurate cognita & perspecta fuerit, quemadmodum ad hunc usum requiritur. Esi autem non omnino consultum sit veritates generi humano utiles hieroglyphico velamine tegi; usum tamen adhuc habere possunt, ut veritates arduæ atque utiles hoc subsidio memoriæ tenacius infigantur ac felicius in eandem revocentur. Unde figuræ hieroglyphicæ in moralibus plurimum utilitatis afferunt: id quod suo loco abunde patebit. Alchymistæ modum docendi & scribendi hieroglyphicum retinere ex eadem ratione: id quod vel ex unius *Basilii Valentini* scriptis colligitur. *Caspar Neumannus*, Theologus eximius, literis hebraicis significatum hieroglyphicum tribuit, per quem aliquid ab essentiali trahit, quemadmodum jam alibi (not. §. 978. Log.) monuimus.

§. 159.

Vis significandi figurarum hieroglyphicarum.

Figuræ hieroglyphicæ signa artificialia sunt. Figuræ enim hieroglyphicæ significatum hieroglyphicum habent (§. 158.), adeoque ad denotandas res alias, quam quas repræsentant, transferuntur (§. 153.), consequenter ex iis colligitur, quod aliud quid sit diversum ab ea re, quam repræsentat. Est igitur signum (§. 952. *Ontol.*). Enimvero quoniam in figuris hieroglyphicis res quædam ad aliam significandam ab hominibus transfertur (§. 151.); vis significandi ab arbitrio hominum pender. Sunt igitur figuræ hieroglyphicæ signa artificialia (§. 958. *Ontol.*).

Monuimus jam in superioribus (§. 155.), phantasmata hieroglyphicum significatum habentia verbis æquipollere. Idem ergo etiam de figuris hieroglyphicis tenendum (§. 157.).

§. 160.

Figurarum hieroglyphicarum differentia.

Figuræ hieroglyphicæ vel primitivæ sunt, vel derivativæ. Figuræ enim hieroglyphicæ sunt signa artificialia (§. 159.). Quare cum signa artificialia vel primitiva sint, vel derivativa (§. 964. *Ontol.*); figuræ etiam hieroglyphicæ vel primitivæ sunt, vel derivativæ.

Appli-

Applicamus hic ad speciem, quod de genere demonstratum fuit in Ontologia (§. 348. Log.): Nisi Ontologiam præmissemus, poteramus absque demonstratione figuras hieroglyphicas dividere in primitivas & derivativas & ex arbitrio ipsis tribuere significatum, quem vi Ontologiæ obtinent (§. 161.).

§. 161.

Figuræ hieroglyphicæ primitivæ sunt, quæ ab aliis se prioribus ortum non trahunt; derivativæ autem sunt, quæ ab aliis oriuntur. In quo ea consistit. Figuræ enim hieroglyphicæ sunt signa artificialia (§. 159.), adeoque primitivæ primitiva, derivativæ derivativa (§. 160.). Quare cum signa primitiva sint, quæ ab aliis signis se prioribus ortum non trahunt; derivativa autem, quæ ex aliis se prioribus oriuntur (§. 964. Ontol.): figuræ etiam hieroglyphicæ primitivæ esse debent, quæ ab aliis se prioribus ortum non trahunt; derivativæ autem, quæ ex aliis oriuntur.

Illustrant propositionem præsentem, quæ ad illustrandam notionem signorum derivativorum adduximus (not. §. 964. & seqq.).

§. 162.

Notas irresolubiles hic appello eas, quæ a cognoscente in alias simpliciores non amplius resolvuntur, sive quod in se tales sint, sive quod cognoscens eas amplius resolvere non possit, aut nolit. Ex adverso *Notas resolubiles* dico, quæ a cognoscente ulterius resolvi possunt, aut debent. *Notarum irresolubili-um & irresolubilium diversitas.*

Non attendimus hic rationes, cur resolutio ulterior non fiat. Quamobrem jam non inquirimus, utrum dentur notiones in se irresolubiles, nec ne: sed eam disquisitionem suo loco reservamus. Dari autem notas, quas nos vel ulterius resolvere non possumus, vel nolumus, quod inutilis eo in loco videatur ulterior resolutio; exempla obvia docent. Ita flavedo auri est nota in se resolubilis, quoniam ex mixtione oritur, adeoque causas suas habet; immo in genere quoque coloris flavi notio suas habet notas, per quas differt ab aliis coloribus. Nos tamen hætenus nec notionem flavedinis auri, nec coloris flavi in genere ulterius resolvere valemus. In Ontologia notiones totius, partis, æqualitatis, majoris, minoris in suas notas resolvimus,
(Wolffii Psychologia.) P mus,

mus, quæ eas ingrediuntur, ut adeo ipso facto ostenderimus eas esse resolutibiles. Hoc tamen non obstante *Euclides* in Elementis notionibus istis utitur tanquam notis irresolubilibus, cum eas distincte non explicet.

§. 163.

*Figurarum
hierogly-
phicarum
primitiva-
rum usus.*

Notæ irresolubiles, quæ notiones rerum distinctas ingrediuntur, representandæ sunt per figuras primitivas. Quoniam enim notæ irresolubiles, quæ notionem rei distinctam ingrediuntur, non amplius resolvuntur, sive quod in se irresolubiles sint, sive quod eas resolvere amplius nolis, vel non possis (§. 162.); nulla adest ratio, cur figuras hieroglyphicas, per quas eas representare constituisti (§. 151. 157.), ex aliis componas. Quoniam itaque ex aliis se prioribus non oriuntur; primitivæ sunt (§. 161.), adeoque notæ irresolubiles per figuras hieroglyphicas primitivas representari convenit.

In arte characteristica demonstrari debet, per signum artificiale primitivum representari debere notiones irresolubiles, seu res, quarum istiusmodi habemus notiones. Sed cum ars ista adhuc in desideratorum numero sit; ejus principia hic præsupponi minime potuerunt. De ea quædam trademus in Arte inveniendi.

§. 164.

*Notionum
distincta-
rum hiero-
glyphica re-
presentatio.*

Notiones distinctæ representandæ sunt per figuras hieroglyphicas derivativas. Si enim notio nobis distincta est, notas, quas continet, distinguere valemus (§. 88. Log.). Quare si hieroglyphice representanda; figura singulas illas notas distincte representare debet, consequenter ex figuris hieroglyphicis aliis, tanquam partibus componenda, quarum singulæ notas singulas denotant (§. 151. 157.). Quoniam itaque figura hieroglyphica notionem distinctam representans ex aliis se prioribus oritur; derivativa est (§. 161.).

Exempli loco esse potest figura hieroglyphica justitiæ supra allata (not. §. 156.).

§. 165.

Quoniam definitiones exprimunt notiones completas *Definitio-*
 (§. 152. Log.), adeoque distinctas (§. 92. 88. Log.); propositioni *num & pro-*
 autem non minus affirmativæ (§. 520.), quam negativæ (§. 521. *positionum*
 Log.) notio respondet, quæ cum in ea subjectum a prædicato *in disciplinis*
 discernatur (§. 199. 200. Log.), itidem distincta est (§. 88. Log.); *hieroglyphi-*
ca representatio.
 In disciplinis definitiones & propositiones per figuras hieroglyphicas
 derivativas representandæ sunt (§. 164.).

In disciplinis definitiones non ingrediuntur termini nisi ante ex-
 plicari (§. 119. *Disc. prælim.*), nec utendum est in propositionibus
 terminis nisi accurata definitione explicatis (§. 116. *Disc. prælim.*).
 Quamobrem si in locum terminorum figuræ hieroglyphicæ surro-
 gandæ sunt; definitiones quoque & propositiones perinde componi
 debent ex figuris aliis simplicioribus ad denotanda ea, quæ ipsas in-
 grediuntur, destinatis. Leges enim methodi generales sunt, ut non
 minus in terminis, quam in signis quibuscunque aliis locum habeant,
 quibus ad notiones alteri indigitandas utimur.

§. 166.

Notæ resolubiles, quæ notionem rei distinctam ingrediuntur, *Notarum*
 in disciplinis representandæ sunt per figuras hieroglyphicas deriva- *resolubilium*
 tivas. Quoniam enim notæ resolubiles, quæ notionem rei di- *representa-*
 distinctam ingrediuntur, in alias simplices resolvi possunt (§. *tio hierogly-*
 162.); notio earum distincta est (§. 88. Log.). Enimvero notio- *phica.*
 nes distinctæ per figuras hieroglyphicas derivativas representan-
 dæ sunt (§. 164.). Ergo etiam notæ resolubiles per figuras hie-
 roglyphicas derivativas representandæ veniunt.

Per se patet, propositionem hanc valere in omni casu resolubilita-
 tis notarum, quousque in iis resolvendis progrediatur, vel consul-
 tum fuerit.

§. 167.

Notiones adequatæ representandæ sunt per figuras hie- *Notionum*
 roglyphicas derivativas. Si enim nobis adæquata est notio, *adequata-*
 notarum, quæ rei notionem distinctam ingrediuntur, notio- *rum hie-*
 roglyphica re- *presentatio.*
 nes

nes itidem distinctæ sunt (§. 95. *Log.*), adeoque in notis denuo distinguimus notas, quæ ipsis insunt (§. 88. *Log.*), consequenter notæ resolubiles sunt (§. 162.), & ita progredi licet, donec perveniatur ad notas, quæ a nobis non amplius in alias simpliciores resolvi possunt, vel quos in simpliciores resolvi ulterius minime consultum est, consequenter ad irresolubiles. Quare cum notæ resolubiles in disciplinis (quem casum in hisce theorematibus supponimus) repræsentari debeant per figuras hieroglyphicas derivativas (§. 166.); figuræ hieroglyphicæ, per quas notiones adæquatæ repræsentari debent, componendæ sunt ex figuris hieroglyphicis derivativis, consequenter ipsæmet multo magis derivativæ sunt (§. 161.).

Quam admodum in disciplinis potissimum spectanda est notionum continua evolutio, unde tandem resultant adæquatæ; ita in Arte hieroglyphica, quando disciplinis servire debet, figurarum derivativarum potissimum habenda est ratio. Majoris autem momenti est invenire figuras hieroglyphicas derivativas, quam primitivas: id quod probatione non indiget. Vicissim tamen negari non potest, quæ in figuris derivativis latent facilius revelari posse, quam quæ in primitivis absconduntur.

§. 168.

Figura hieroglyphicæ vicariæ quænam dicantur.

Figuras hieroglyphicas vicarias appello figuras hieroglyphicas primitivas, quæ in locum derivativarum in compositione derivativarum aliarum assumuntur.

Respondent figuræ istæ vicariæ terminis philosophicis & mathematicis jam ante explicatis, quos in definitionibus ac propositionibus assumimus loco eorum, quæ in ipsorum definitionibus continentur.

§. 169.

Vicariarum figurarum usus.

Si figura hieroglyphica ex aliis derivativis & hæ vicissim ex aliis derivativis sint componendæ; ad evitandam confusionem a vicariis ordiendum. Si figura hieroglyphica ex aliis derivativis & hæ vicissim ex aliis derivativis sint componendæ ac ita porro; figurarum primitivarum, quæ ultimas derivativas ingrediuntur, tantus

tantus resultare potest numerus, qui figuram compositam contemplantes confundit, vel etiam ut figuræ primitivæ singulæ exhiberi non amplius possint. Neceffe igitur est, ut evitandæ confusionis gratia a figuris primitivis abstineamus, quæ in derivativam compositam introduci debebant. Quoniam tamen notæ resolubiles, quibus istæ figuræ derivativæ ex primitivis constantes conveniunt, per derivativas sunt exprimendæ (§. 166.); exceptio quidem ab hac regula (§. 510. *Ontol.*), sed ita tamen fieri debet, ut salva maneat perfectio figuræ compositæ (§. 514. *Ontol.*). Enimvero si in locum derivatarum, quæ vel ex primitivis, vel ex aliis minus compositis constant, assumas primitivas derivativis æquipollentes, quas figuram compositam contemplatus pro arbitrio sibi invicem substituere potest; figura composita non pauciora indigitat, si primitivis utaris, quam si derivativis locum concedas, adeoque perfectio figuræ hieroglyphicæ non mutatur (§. 154.); in figuram autem compositam evitandæ confusionis gratia vicariæ introducuntur (§. 168.). Quamobrem si figura hieroglyphica ex aliis derivativis & hæ vicissim ex derivativis aliis fuerint componendæ, ac ita porro; ad evitandam confusionem a vicariis est ordiendum.

Patet vicarias figuras hieroglyphicas referri posse ad derivativas vel immediate ex primitivis, vel mediate ex vicariis aliis minus compositis: ut adeo figurarum vicariarum nascentur grades diversi, quos jam accuratius persequi non vacat. Quoniam vero in gradu dato quolibet in casu sit subsistendum, ipsa necessitas docebit, sine qua vicariarum opem implorari ratio nulla suadet. In arte hieroglyphica, præsertim ubi ad disciplinas tradendas transfertur, intellectus suppetias fert imaginationi, & hæc vicissim ipsi auxilio est. Quoniam tamen ex Logica præsupponi poterant, quæ de operationibus intellectus cognoscenda sunt, antequam artis istius principia intelligere possis; placuit hic simul proponere, quæ ad partem animæ inferioriorem solam non spectant: id quod & in aliis casibus similibus tenendum.

§. 170.

Figmentum quid sit & quomodo producat.

Phantasma, quod ens fictum repræsentat, dicitur *Figmentum*. Quare cum phantasma ens fictum repræsentet, si ea componimus, quæ sibi mutuo repugnant, vel naturæ vi in eodem subiecto conjungi nequeunt (§. 146.) ; *Figmentum producitur, si ea componimus, quæ sibi mutuo repugnant, vel naturæ vi in eodem subiecto conjungi nequeunt.*

Exemplum adeo figmenti præbet homo cum capite cervino & pedibus equinis. Ab his figmentis quomodo differant monstra inferius demum patebit. Quæ monstris tribuuntur animalium brutorum figuræ, aliquam saltem cum iis similitudinem habent, sed eadem non sunt.

§. 171.

Quo respectu figmentum possit esse ens verum.

Si quod figmento respondet figura hieroglyphica fuerit ; quatenus significativum est veri cujusdam entis speciem constituit. Si enim quod figmento respondet fuerit figura hieroglyphica, significatum hieroglyphicum habet (§. 157.) , adeoque ens istud fictum (§. 170.) ad denotandam rem aliam, seu ens verum transfertur (§. 151.) . Ast cum in figuris primitivis significatus non pendeat a significato figurarum aliarum simpliciorum (§. 161.) , adeoque tanquam signi artificialis (§. 159.) arbitrarius sit (§. 958. *Ontol.*) ; nihil sane obstat ex parte figuræ, quo minus ipsi ejusmodi significatus simul tribuatur, atque adeo significatus totus a contradictione liber (§. 48. *Ontol.*) . Quatenus vero per figuras istas denotantur ea, quæ enti cui-dam vero simul insunt *per demonstr.* significatus quoque ex parte rei significatæ a contradictione liber (§. 48. *Ontol.*) & per ea, quæ enti insunt, datur ratio, cur hæc simul inesse debeant (§. 56. *Ontol.*) . Figmento igitur respondens figura hieroglyphica, quatenus ex aliis primitivis componitur, non continet nisi talia, quæ per principium contradictionis & rationis sufficientis (§. 29. 71. *Ontol.*) determinatur (§. 113. *Ontol.*) .

Quodsi

Quodsi figuræ simpliciores, ex quibus figura hieroglyphica figmento respondens componitur, fuerint derivativæ; significatus earum a significato aliarum, ex quibus componuntur, pendet (§. 161.), adeoque partim ex iis, quæ rei significandæ insunt, partim ex ipsis figuris combinandis intelligitur, cur hæc potius, quam aliæ compositionem figuræ hieroglyphicæ, quæ figmento respondet, ingredi debeant, consequenter tam in figuris compositionem ingredientibus, quam in re significata continetur ratio, cur hæc potius, quam aliæ esse debeant figuræ hieroglyphicæ partes (§. 56. *Ontol.*). Et quatenus non denotant nisi ea, quæ enti cuidam vero insunt, *per demonstrata*; significatus nullam contradictionem involvit (§. 47. *Ontol.*). Patet igitur denuo figuræ hieroglyphicæ non inesse, nisi quæ per principium contradictionis & rationis sufficientis determinantur. Enimvero datur in ente veritas, quatenus ea, quæ insunt, per principium contradictionis & rationis sufficientis determinantur (§. 498. *Ontol.*). Quare etiam in figuris hieroglyphicis veritas inest, consequenter figuræ hieroglyphicæ, quatenus significativæ sunt, veri cujusdam entis speciem constituunt (§. 496. *Ontol.*).

Distinguenda est veritas, quæ rei significatæ inest, a veritate, quæ figuræ hieroglyphicæ inest, quatenus significativa. Ego valde suspicor, idolorum figuras fuisse primum hieroglyphicas & significasse attributa Numini tribuenda; sed significatum hieroglyphicum successu temporis oblitteratum fuisse, ut, quamdiu is ignoretur, mireremur, quomodo homines tam absurdos sibi fingere potuerint Deos. Nostrum vero jam non est in eam rem solertius inquirere. Sufficit principia nostra inservire significatui hieroglyphico, si quis figmento inest, detegendo. Poteramus hætenus demonstratis subungere theoremata ad significatum hieroglyphicum detegendum utilia; sed quoniam hodie arte ista non utimur ad occultanda arcana scientiarum atque artis, operæ pretium non videtur salibus immorari.

§. 172.

*Imaginatio
arbitrio
nostro sese
subducens.*

Si quod figmentum producere conamur ; sæpius prodit figmentum ab eo, quod intenderamus, diversum. Vel in genere : Si quid imaginari intendimus, sæpius phantasma prodit diversum ab eo, quod intenderamus. Ponamus e. gr. te imaginari velle equitem seu virum equo infidentem : præsto tibi erit phantasma exhibens fœminam equo infidentem, vel prorsus phantasma cameli, cui onus impositum est, cui porro infidet fœmina quædam. Etenim si videns fœminam alio, quam maribus solenne est, more equo infidentem in actum equitandi attentionem tuam direxisti & in eo eandem diu defixam detinuisti ; imaginatio acquisivit facilitatem ex actu equitationis reproducendi ideam fœminæ equo infidentis (§. 108.). Quodsi jam phantasma equitis producturus in equitationem inprimis attentionem dirigis ; loco equitis tibi occurreret fœmina equo infidens. Immo dum in eadem defigis attentionem, quamprimum phantasma nascitur, ut equi vix ac ne vix quidem tibi conscius fueris, ad hunc cogitationem tuam promoturus camelum loco equi vides, ex eadem prorsus ratione. Apparet itaque fieri posse, ut loco phantasmatis, quod producere intendis, prodeat aliud ab eo, quod intenderas, prorsus diversum.

Quoniam figmenta sunt phantasmata (§. 170.), adeoque ideæ ab imaginatione productæ (§. 93.) ; accidit autem ut imaginari quid intendenti prodeat phantasma diversum ab eo, quod intenderat, *per demonstrata* : fieri etiam debet, ut, dum figmentum quoddam producere conaris, prodeat sæpius diversum ab eo, quod intenderas.

Apparet hinc, imaginationem non ita subesse arbitrio nostro, quin eidem sese nobis vel invitis subducatur. Quibus vero mediis eandem coërcere valeamus, ex inferius dicendis demum elucescet. Facultas fingendi etiam sese in cognitione symbolica exerit, ibique periculosa est, cum incauti facile in errorem prolabantur ; sed de hisce atque aliis suo loco dicentur, quæ satisfaciunt.

CAPVT V.

De Memoria, Oblivione & Reminifcentia.

§. 173.

Ideam reproductam recognoscere dicimur, quando nobis conscii sumus, nos eam jam antea habuisse. *Idearum recognitio quid sit.*

Videmus hominem in templo alibi jam ante visum. Dum eum intuemur, conscii nobis sumus, nos eum jam ante vidisse. Similiter librum botanicum evolventes intuemur plantæ cujusdam exoticæ figuram atque nobis conscii sumus nos eam jam alias contemplatos fuisse. Annulum conspicientibus imaginatio offert phantasma alterius, nobisque sumus conscii hunc posteriorem nobis jam alias visum, aut illius phantasma sæpius jam oculis nostris oberrasse. Dicimur in hisce casibus recognoscere hominem, quem videmus; plantam, cujus figuram in libro delineatam contuemur; annulum, cujus phantasma nobis occurrit. Atque ita simul patet, nos ideas reproductas recognoscere posse, ut adeo tantummodo inquiri debeat, quandonam & qua de causa id fiat: quem in finem propositionem sequentem subjicimus.

§. 174.

Si idea reproducta in alia perceptionum serie continetur, Quando id quam ante percepta continebatur & utriusque seriei nobis consci sumus; illam recognoscimus. Ponamus te vidisse Mevium in templo, nunc vero denuo videre in ædibus Titii. Dico te recognoscere Mevium, hoc est, tibi conscium esse, quod eum jam ante videris, quod nunc eum sensu percipis una cum ædibus Titii, imaginatio vero phantasma ejus producit una cum phantasmate templi & actuum mentis super Mevio in templo reflectentis. Ita nimirum idea Mevii, quæ sensu reproduci-
(Wolffii Psychologia.) Q neba-

nebatur, & in hac differentia recognitionis ratio consistit. Et enim dum Mevium vides altera vice & imaginatio reproducit ideam ejusdem; anima utriusque sibi conscia idearum identitatem agnoscit. Enimvero quoniam nunc Mevium vides in ædibus Titii, imaginatio vero eum sistit in templo, atque conscium te reddit actuum mentis, quos videns in templo Mevium in te expertus fuisti; hoc ipso conscius tibi es, te Mevium jam antea vidisse, adeoque eum recognoscis (§. 173.). Recognoscis autem ex eo, quid idea Mevii nunc in alia perceptionum serie continetur, quam ante, cum eum primum videres.

Idem etiam sic ostenditur. Mevium videns in ædibus Titii, quam ante videras in templo, recognoscis: id quod experientia certum in dubium vocari nequit (*not. §. præc.*). Ratio igitur adesse debet, cur eum recognoscas (§. 70. *Ontol.*). Enimvero ex eo, quod ab imaginatione producta idea prorsus similis est Mevio, quem vides, non intelligis, quod eum jam ante videris, adeoque similitudo ratio sufficiens recognitionis non est (§. 56. *Ontol.*). Alia igitur detur necesse est. Jam vero per se patet, rationem istam in perceptionibus contineri debere. Quoniam itaque non continetur in ipsa idea Mevii sensus atque imaginationis ope bis producta; necesse est ut contineatur in ideis cum ista simul productis. Ideæ autem simul productæ sunt objectorum & antea, & nunc cum persona Mevii simul perceptorum, atque præterea actionum mentis, quas ante in te expertus es, cum primum videres Mevium, & nunc in te experiris, cum eundem denuo vides. Ergo in his perceptionibus fociis, quæ in utroque casu diversæ sunt, cognitionis ratio continetur. Enimvero si quem in templo vidisti, eum denuo in templo vides; eundem non minus recognoscis, quam si eum alibi vides, etiamsi in objectis utrobique simul perceptis nullam differentiam observes. Sola igitur objectorum simul perceptorum diversitas ratio sufficiens recognitionis non est

est (§. 56. *Ontol.*), consequenter aliud adhuc præterea requiritur (§. 70. *Ontol.*). Quare cum aliorum tibi conscius non sis, quam actionum mentis super objectis perceptis reflectentis; in his simul quærenda ratio est. Mevium adeo recognoscis, quatenus ejus idea nunc in alia perceptionum mentis serie est, quam in qua continebatur, cum eum primum videres.

Propositio præsens propemodum ad notiones communes referri poterat. Etenim quæsitus, unde Mevium, quem in templo videras, nunc vero in Titii ædibus vides, recognoscas, respondes ex eo, quod eum videris in templo. Quæsitus porro, unde certus sis, quod eum in templo videris, reponis, exinde te certissimum esse, quod eum ibidem videris, quoniam agnoscens hominem esse tibi ignotum nosse avebas, quinam esset. Accidit nimirum, ut homines quæsitæ attentionem dirigant ad ea, quæ in notionibus confusis involvuntur, adeoque ad responsiones eorum attentius plurima addiscere possit, quæ ad evolutionem notionum faciunt. Ceterum propositioni præsentī plurimum lucis inferius affundetur, quando de judiciis & ratiociniis dicturi sumus: tum enim clarius constabit, quinam sint illi actus, seu operationes istæ mentis, quæ seriem perceptionum ingredientibus animam juvant in ideis denuo oblatis recognoscendis. Notandum denique est, ideas, quas ante jam habuimus, reproduci vel sensuum, vel imaginationis ope, & utrumque casum in propositione præsentē supponi.

§. 175.

Facultatem ideas reproductas (consequenter & res per eas repræsentatas) recognoscendi *Memoriam* dicimus. Quoniam itaque ideas reproductas recognoscere valemus (*not. §. 173.*); *memoriam habemus*. *Memoria quid sit.*

Equidem nemo dubitat, hominem memoria pollere: quoniam tamen memoriam definivimus, necessariam utique videbatur ostendere, nobis competere memoriam eo sensu, quem voci tribuimus, præsertim cum notio memoriæ imaginaria, quæ communiter obtinet, diversum quid indigitare videatur. Ne vero hæc quemquam turbet, sequentem propositionem addere libet.

*Reprodu-
ctio idea-
rum cur
non pertine-
at ad me-
moriam.*

Facultas ideas, quas antea habuimus, reproducendi, non pertinet ad memoriam. Facultas enim reproducendi ideas rerum, quas antea habuimus, rebus licet absentibus, quam nobis competere certum est (§. 104.), ad imaginationem spectat (§. 92.), adeoque citra confusionem imaginationis atque memoriæ, duarum facultatum a se invicem utique discernendam, ad memoriam referri nequit.

Et fieri sane potest, ut idea aliqua in nobis reproducatur, non tamen recognoscatur: quo in casu nemo effectum istum memoriæ tribuerit. Ponamus te quid legisse in libro quodam, & alio tempore vi imaginationis ideam istam in mente tua reproduci, sed ita ut tibi non sis conscius ea, quæ jam mentem tuam subeunt, te jam in libro isto legisse. Memoriæ non tribues hunc effectum, quamdiu conscientia ejus rei abest. Unde colligitur, quod notio memoriæ, nec ab usu loquendi communi abhorreat, etsi inconstantia loquendi significatum vagum fecerit, ut subinde tantisper varietur, quemadmodum sæpissime accidit eo in casu, quo definitiones accuratæ desunt.

§. 177.

*Notio ima-
ginaria me-
morix, sed
minus ex-
acta.*

Notio memoriæ, quod sit receptaculum idearum, in quo conduntur & unde rerum usu exigente denuo promuntur, imaginaria est eademque minus exacta. Quoniam enim ideas, quas habuimus, reproducere (§. 104.) & reproductas recognoscere valemus (§. 174.); id quandam similitudinem habet cum rebus, quas in receptaculo quodam recondimus, & usu exigente iterum inde depromimus. Nimirum ideæ, quas habemus, ante non habueramus, respondent rebus, quas recondimus, & earum reproductio actui, quo eas depromimus, quando iisdem opus habemus. Fingimus igitur ob hanc similitudinem, quod non est, scilicet receptaculum quoddam, in quo ideæ acquisite conduntur & ex quo iterum depromi possunt, quando iisdem opus habemus, ut facultatem animæ, quæ in oculos non incurrit, veluti quidpiam iisdem præsens per imaginem sistere valeamus.

mus. Quare notio memoriæ, qua nobis eam repræsentamus tanquam receptaculum idearum, in quo conduntur & ex quo usu sic exigente iterum depromuntur, imaginaria est (§. 110. *Ontol.*).

Enimvero quoniam ideas depromere ex receptaculo, in quo reconditæ fuerant, idem est ac eas, quas jam ante habuimus, reproducere; facultas vero ideas, quas ante habuimus, reproduciendi ad memoriam minime pertinet (§. 176.); notio imaginaria memoriæ aliquid continet, quod ex ea exulare debebat, adeoque accurata non est (§. 153. *Log.*). Accedit quod ad memoriam requiratur idearum reproductarum recognitio (§. 175.), quæ in notione imaginaria nonnisi tacite supponitur, quatenus nempe sumitur, animam sibi consciam esse; quod jam ideam ex receptaculo, in quo eam reposuerat, depromat.

Notio imaginaria memoriæ involvit facilitatem ideas acquisitas reproduciendi, quæ cum in animam cadat, eatenus vicaria veri est & in ratiocinando adhiberi potest (*not.* §. 110. III. *Ontol.*). Admodum circumspectus tamen esse debet ejusdem usus, ne in errorem incidat. Reproductio enim idearum sequitur legem imaginationis (§. 104.), ad quam spectat, neque adeo arbitrii nostri est, cui sese subinde vel nobis invitis subducit (§. 172.), etsi vi idearum juxta legem imaginationis reproductarum reproductionem aliarum intendere ac in eandem destinato consilio tendere valeamus, quemadmodum ex iis liquet, quæ de figuris hieroglyphicis (§. 152. & seqq.) & in genere de arbitraria phantasmatum combinatione (§. 141.) dicta fuere. Notio autem imaginaria incautis facile imponit, ac si arbitrio nostro prorsus subiecta esset, quatenus ideas in receptaculo reconditas depromere dicitur, dum eas reprodueit suppressa lege imaginationis, quam violare nequit. Quoniam præterea nonnisi tacite supponit, quod maxime omnium ad memoriam spectat, immo rationem ejus formalem constituit, ut cum Scholasticis loquar; vix consultum est, ut notione imaginaria unquam utamur, præsertim cum nihil difficultatis habear facilitas reproduciendi ideas & facultas reproductas recognoscendi, quam utramque menti competere constat absque ulla fictione (§. 118. 174.), ac diversæ istæ facultates non commode eodem nomine insigniantur. Habemus nimirum in mente facultatem res sensu

perceptas denuo reproducendi (§. 104.), quæ ita comparata est, ut facilitatem id faciendi nobis acquirere valeamus (§. 108.), itemque facultatem ideas reproductas recognoscendi (§. 174.). Has igitur facultates a se invicem nominibus distinguere convenit. Facultas prima Sensus dicitur (§. 67.), secunda Imaginatio (§. 92.); tertiæ igitur relinquitur Memoriam nomen. Si quis tamen facilitatem reproducendi ideas a facultate eisdem reproducendi separare & ad memoriam trahere velit, is per nos abundet suo sensu; nulla tamen ratio nobis suadet, ut idem faciamus.

§. 178.

*Memoria
mandari
quid dica-
tur.*

Memoria mandare dicimur illud, cujus ideam reproducendi facilitatem nobis comparamus.

Supponit phrasis notionem memoriam imaginariam: quam etsi non probemus (§. 177.), multo minus autem admittamus, si quis ea uti velit ad memoriam veluti a priori per causas suas explicandum, cum sic in notionem deceptricem degeneret (§. 38. Log.), consultum tamen est communes loquendi formulas ad significatum naturæ mentis humanæ conformem reduci, ut iisdem citra veritatis dispensium uti liceat.

§. 179.

*Quomodo
id fiat.*

Quoniam itaque facilitas reproducendi ideas acquiritur, si res sæpius ac diu sensu, sive imaginatione simul percipiuntur (§. 108.); *memoria mandamus ea, quæ sæpius vel diu simul percipiuntur, sive id fiat sensuum, sive imaginationis ope* (§. 178.).

Consentanea hæc sunt experientiæ obvia. Neque enim alius memoriam quid mandandi modus in praxi communi receptus est, quam ut objectum aliquod sæpius, vel diu sensibus præsens sistamus & verba, quæ memoriam mandari debent, sæpius reperiamur. Atque hinc apparet, nos in explicandis formulis communibus ab usu loquendi non recedere (§. 139. Log.).

§. 180.

*Memoria
quid retine-
ri dicatur.*

Memoria retinere dicimur id, cujus ideam reproducendi & reproductam recognoscendi facilitatem conservamus.

Est enim propriè loquendo memoriæ tantummodo sit ideam reproductam recognoscere (§. 175.): quoniam tamen recognosci nequit, nisi ante reproducatur; si quid memoria retineri debet juxta communem usum loquendi, eandem quoque reproducendi facilitatem conservare debemus.

§. 181.

Quoniam facilitas reproducendi ideam acquiritur, si *Quomodo id fiat.* eam sæpius reproducas (§. 108.), atque adeo, si vel maxime amissa fuerit, eodem modo reparatur; ea vero recognoscimus, quæ sæpius simul cum aliis percipimus (§. 174.); multo magis hoc pacto facilitas ideam reproducendi & reproductam recognoscendi conservare debemus. Memoria igitur retinemus ea, quorum ideam sæpius in nobis reproducimus, sive id fiat sensuum, sive imaginationis ope.

Consentit denuo praxis communis: neque enim habemus aliud medium, quo memoriæ semel infixæ eadem retinere studeamus, quam repetitionem, quæ in iterata idearum earundem reproductione consistit. Proposito adeo præsens ita etiam efferrè poterat: Memoria retinemus, quæ frequenter repetimus; siquidem definitionem repetitionis præmittere libuisset.

§. 182.

Alii diuturniore objecti contemplatione, vel pluribus actibus *Differentia iteratis facilitatem ideas reproducendi & reproductas recognoscen-* memoria in di sibi comparant; alii minus diuturna contemplatione & paucioribus actibus iteratis ad id opus habent. *diversis sub-* *jectis.* Experientia obvia idem loquitur, ad quam hic provocare sufficit (§. 666. Log.).

Continetur in his ratio, cur in memoria gradus admittamus, & unum altero memoria præstare affirmemus, etsi ea non sit unica.

§. 183.

Alii plures ideas reproductas recognoscere valent, alii pauciores. *Alia differentia.* Loquitur & hoc experientia obvia, ut adeo denuo ad eam provocare iufficiat (§. 666. Log.).

In his quoque continetur ratio, cur in memoria gradus admittantur & uni majorem, alteri minorem memoriam tribuamus.

§. 184.

Uterior

differentia.

Alii frequentius iterata idearum reproductione memoria retinent, quod eidem demandarunt; alii minus frequenter iterata idearum reproductione memoriæ semel infixæ retinent. Nec hoc a communi, & obvia experientia abhorret, ut adeo hic etiam ad eam provocare sufficiat.

En rationem ulteriorem graduum memoriæ in diversis subjectis diverforum.

§. 185.

*Alia memo-
ria diffe-
rentia.*

Alii ideam memoriæ demandatam reproducere & recognoscere valent, etsi multo tempore eandem non reproduxerint: alii eam non amplius reproducere, nec reproductam recognoscere valent, si aliquo tempore eandem non reproduxerint. Patent hæc non minus obvia experientia, ut ad eam provocasse sufficiat (§. 666. Log.).

Grados hinc memoriæ tribuuntur ob diversitatem temporis, quo eadem idea a duobus subjectis memoriæ demandata fuit: sed in comparatione subinde quoque habenda ratio modi, quo quid memoriæ infixum fuit. Multa attentione opus est, ne inter se comparemus, quæ ob diversitatem aliquam intercedentem comparare non licet.

§. 186.

*Cito quinam
memoriæ
quid man-
det.*

Cito memoriæ quid mandare dicitur, qui minus diuturna contemplatione objecti paucioribusque actibus iteratis id facit, quatenus actus pauciores ceteris paribus minus temporis spatium exigunt. Unde ex adverso colligitur, quinam tardius memoriæ quid demandare dicendus sit.

Numerus actuum, quibus quid memoriæ infigitur, hic non attenditur; sed tantummodo tempus, quod uni eorum necessario impendendum pro eorundem numero reduplicari debet, ita ut actus idem bis, ter, quater iteratus exigat tempus duplum, triplum, quadruplum ejus, quod uni impenditur.

§. 187.

§. 187.

Abſque multo labore ſeu facile quid memoriæ mandare *Facile qui-*
 dicitur, qui paucioribus iteratis actibus id facit, vel etiam mi- *nam memo-*
 nus diuturna objecti contemplatione, quatenus ea pauciores *riæ quid*
 operationes mentis continet. Unde ex adverſo colligitur, qui- *mandet.*
 nam *difficulter quid memoriæ mandare* dicendus ſit.

Nimirum hic temporis nulla habetur ratio, ſed ſpectantur tantum-
 modo operationes mentis, quibus in contemplatione objecti utimur
 ad ideam ejus memoriæ inſigendam.

§. 188.

Diu memoria quid retinere dicitur, qui ideam ejus re- *Diu memo-*
 producere & reproductam adhuc recognoscere valet, etiamſi *ria quinam*
 longo tempore eandem non reproduxerit. *quid reti-*

Revocamus ad notiones diſtinctas & determinatas communes lo- *neat.*
 quendi formulas, ne notiones confuſæ, quæ iisdem adhærent, cum
 aliquid imaginarii a notione memoriæ imaginaria trahant (§. 177.),
 incautis imponant. Id enim plurimis ſolenne eſt, ut notionem ex
 verbis, non ex rebus derivent.

§. 189.

Bonam memoriam habere dicitur, qui cito & facile quid *Bona me-*
 eidem mandat, diuque retinet. *moria qua-*

Utrumque ad bonam memoriam ex communi uſu loquendi re- *nam.*
 quiri ad communes ſermones attenti diſcimus. Videas enim homines
 mirantes, ſi quis cito & facile quid memoriæ mandat, ſed non diu
 retinet: cum ex priorē bonitatem memoriæ colligant, poſterius ta-
 men eidem adverſari exiſtitant.

§. 190.

Bonitas memoriæ diverſos admittit gradus, tum quate- *Gradus bo-*
nus quid memoriæ cito, tum quatenus facile mandatur, tum *nitatis me-*
quatenus diu retinetur. Bonitas enim memoriæ cum confi- *moriæ.*
 ſtat in aptitudine animæ aliquid cito ac facile eidem mandandi
 diuque retinendi (§. 189.); in determinationum animæ (§. 122.

112 *Ontol.*) & quidem intrinsecarum numero est (§. 545. *Ontol.*). Quare cum sine tercio assumpto intelligatur , quod per se patet ; in qualitarum animæ numero est (§. 452. *Ontol.*). Jam vero quicito quid memoriæ mandat , minus diuturna contemplatione objecti ac paucioribus actibus iteratis id facit , quatenus scilicet actus pauciores ceteris paribus minus temporis spatium exigunt (§. 186) : Qui facile quid memoriæ mandat , paucioribus iteratis actibus id facit , vel etiam minus diuturna contemplatione , quatenus ea pauciores operationes mentis continet (§. 187.) : Qui denique diu quid retinet , ideam ejus reproducere & reproductam adhuc recognoscere valet , etiam longo tempore eandem non reproduxerit (§. 188.). Quare cum alii diuturniore objecti contemplatione , vel pluribus actibus iteratis facilitatem ideas reproducendi & reproductas recognoscendi , consequenter memoriæ quid mandandi (§. 178.), sibi comparent ; alii minus diuturna contemplatione opus habeant (§. 182.), alii frequentius iterata idearum reproductione memoria retineant , quod eidem demandarunt ; alii minus frequenter iterata earum reproductione memoriæ semel infixæ retineant (§. 184.) : alii denique ideam memoriæ demandatam reproducere & recognoscere valeant , etsi multo tempore eandem non reproduxerint ; alii eam non amplius reproducere , nec reproductam recognoscere valeant , si aliquo tempore eandem non reproduxerint (§. 185.) : qualitas illa animæ in diversis subjectis differt , consequenter cum id , quo qualitates eadem salva identitate differre possunt in diversis subjectis , sit gradus (§. 746. *Ontol.*) ; bonitas memoriæ gradus admittit , tum quatenus quid memoriæ cito , tum quatenus facile mandatur , tum denique quatenus diu retinetur.

Bonitas memoriæ consideratur instar termini simplicis , cui aliqua notio respondet independentem a memoria in se considerata (§. 108. *Log.*). Unde bonitas memoriæ spectatur tanquam qualitas animæ ; non tanquam qualitas memoriæ : quamvis respectu notionis

tionis imaginariæ bonitas memoriæ instar qualitatis ejusdem considerari possit (§. 177.), a qua tamen abstinemus, cum nulla necessitas exigat ut quid fictitii admittamus (not. §. cit.).

§. 191.

Gradus bonitatis memoriæ æstimantur ex tempore im- *Mensura*
pendendo, ut quid memoriæ mandetur; ex numero actuum, qui- *graduum*
bus ideæ reproductæ memoriæ demandantur; ex numero deni- *bonitatis*
que actuum, quibus infixæ retinentur. Bonitas enim memo- *memoria.*
riæ gradus admittit, quatenus quid eidem cito ac facile demandatur, diuque eadem retinetur (§. 190.). Quare cum cito quid memoriæ mandetur, quod minus diuturna contemplatione objecti & paucioribus actibus iteratis mandatur, quatenus actus pauciores ceteris paribus minus temporis spatium exigunt (§. 186.); in bonitate memoriæ æstimanda, quatenus quid cito eidem demandatur, temporis inprimis ratio habetur. Gradus igitur bonitatis memoriæ, quatenus quid cito eidem demandatur, æstimatur ex tempore, quo quid memoriæ mandatur.

Porro qui facile quid memoriæ mandat, paucioribus iteratis actibus id facit, vel etiam minus diuturna contemplatione, quatenus ea pauciores operationes mentis continet (§. 187.). In bonitate igitur memoriæ æstimanda, quatenus quid facile eidem mandatur, numeri actuum habetur ratio, quibus aliquid eidem mandatur, consequenter gradus bonitatis memoriæ, quatenus quid facile eidem mandatur, æstimanda venit ex numero actuum, quibus repetitis quid eidem mandatur.

Denique qui diu quid memoria retinet, ideam ejus reproducere & reproductam adhuc recognoscere valet, etiam si longo tempore eandem non reproduxerit (§. 188.). In bonitate igitur memoriæ æstimanda, quatenus quid diu eadem retinetur, numeri actuum habetur ratio, quibus diverso tempore

repetitis ideæ memoriæ mandatæ retinentur, consequenter gradus bonitatis memoriæ, quatenus eadem diu quid retinetur, æstimatur ex numero actuum, quibus diverso tempore repetitis memoriæ semel infixæ in eadem retinentur.

Et si ope propositionis præsentis gradus bonitatis memoriæ inter se distingui possint in diversis subiectis; in applicatione tamen circumspeditione opus est, ne fallamur. Sæponimus enim impedimenta, quæ sese offerre solent atque mentem ab attentione avocant, quam ad res memoriæ mandandas afferre debet. Hac certe absente & tarde, & difficulter memoriæ mandatur, quod alias cito ac facile mandari poterat. Unde accidit, quædam ab eodem subiecto tarde ac difficulter memoriæ mandari, cum alia cito atque facile eidem infigantur, prout scilicet vel voluptatem, vel tædium quis percipit ex iis, quæ memoria retineri debent. Sed hæc ex inferius dicendis partim de attentione, partim de voluptate ac tædio patebunt.

§. 192.

Magna memoria quam dicatur.

Magnam memoriam habere dicitur, qui multarum rerum ideas reproducere & reproductas recognoscere, longam quoque rerum seriem memoria retinere valet.

Ita memoriam magnam eis tribuimus, qui integra loca, ne syllaba quidem immutata, ex Autoribus recitare valent. Magnam quoque memoriam tribuimus, qui multarum rerum notitiam ita animo comprehensam tenent, ut data occasione ideas in se reproducere & reproductas recognoscere valeant. Exempla specialia in priori casu præbent illi, qui integra Biblia, vel Corpus juris integrum memoriæ ita infixerunt, ut singula iusto ordine recitare aliisque in calamum distitare potuissent, si Biblia amissa, vel Corpus juris amissum restitui debuissent. In posteriori casu exemplum speciale offerunt, qui plurimarum disciplinarum campum ita emensi sunt, ut de singulis, quotiescunque fert occasio, disserere valeant.

§. 193.

Gradus memoriæ & imaginatio.

Memoria & imaginatio admittunt gradus, quatenus rerum multarum ideas reproducere & reproductas recognoscere valeamus. Imaginatio est facultas ideas reproducendi (§. 92.); me-

memoria facultas reproductas recognoscendi (§. 175.), adeoque utraque determinatio animæ (§. 122. 112. *Ontol.*), eaque intrinseca (§. 545. *Ontol.*), consequenter cum fine tertio assumpto intelligi possit, qualitas (§. 152. *Ontol.*). Enimvero alii plures ideas reproducere & reproductas recognoscere valent, alii pauciores (§. 183.). Quare cum id, quo qualitates eadem identitate salva in diversis subjectis differre possunt, sit gradus (§. 746. *Ontol.*); imaginatio & memoria gradus habent, quatenus rerum ideæ reproducuntur & agnoscuntur.

Gradus memoriæ ipsius distinguendi sunt a gradibus bonitatis ipsius. Quemadmodum enim in istis memoriæ magnitudo consistit (§. 192.); ita hi bonitatis magnitudinem constituunt (§. 190.).

§. 194.

Magnitudo memoriæ æstimatur ex numero rerum, quarum ideas reproducere & reproductas recognoscere valemus, tum memoria diverso tempore sigillatim perceptarum, tum eodem tempore in una continua serie simul perceptarum. Magnitudo
Qui enim magnam memoriam habent, multarum rerum ideas reproducere & reproductas recognoscere, longam quoque rerum seriem memoria retinere valent (§. 192.). In magnitudine igitur memoriæ æstimanda habenda est ratio multitudinis rerum, sive diverso tempore sigillatim, sive eodem in continua serie simul perceptarum, quas reproducere ac reproductas recognoscere valemus, consequenter numeri illarum rerum (§. 340. *Ontol.*).

Duplicem magnitudinis memoriæ mensuram offert propositio præsens, scilicet numerum rerum sigillatim antea perceptarum, & numerum rerum in continua serie eodem tempore perceptarum. Mensura una non æquipollet alteri, cum una in alterius locum surrogari non possit: neque enim qui longam rerum seriem memoriæ mandare valet, ut eandem, quando ita visum fuerit, denuo recitare possit, ideo multarum quoque rerum diverso tempore perceptarum ideas retinere valet; nec ex adverso longam rerum seriem successive perceptarum memoria tenere valet, qui rerum ingente multitudine

memoriam quasi obrutam habet. Non tamen repugnat, ut uterque gradus locum habeat in eodem subjecto.

§. 195.

*Exercitium
quid dica-
tur.*

Actuum specie vel genere eorundem iteratio dicitur. *Exercitium: quod adeo gradus admittit pro numero actuum partim eodem, partim diverso tempore repetitorum.*

Ita exercitium scribendi consistit in iteratione actuum scribendi, five eadem continuo scribas, five diversa. Similiter exercitium saltandi consistit in iteratione actuum ad saltationem requisitorum. In utroque casu iteratio eodem tempore continua esse potest; diverso autem tempore interrupta est, quatenus inter unam & alteram actuum continuo iteratorum seriem tempus interjicitur, quo nullus istiusmodi actus existit.

§. 196.

*Exercitiâ,
quibus quid
memoriæ
mandatur
& retine-
tur.*

Quoniam actibus eodem tempore, vel etiam diverso iteratis memoriæ mandamus, quod retinere volumus (§. 176.); ut quid memoriæ mandetur & eadem retineatur, exercitio opus est (§. 195.).

Per naturam & essentiam nimirum animæ fieri potest, ut ideas rerum semel perceptarum reproducamus, reproductas recognoscamus & facilitatem utrumque faciendi conservemus. Sed ut actu in anima obtineat, quod per naturam & essentiam ejus possibile, exercitio opus est. Hinc oleum & operam perdunt in ideis rerum sibi comparandis, qui negligunt exercitia eas memoriæ mandandi & semel eidem mandatas eadem retinendi. Sed de his plura paulo inferius, ubi de oblivione agemus,

§. 197.

*Modus ex-
tendendi
imaginatio-
nem & me-
moriam.*

Exercitio obtinetur, ut imaginatio ideas plures simul reproducat & per longius temporis spatium immutatas conservet. Illustre exemplum nobis præbet Joannes Wallisius, Mathematicus merito suo celeberrimus, qui Algebrae C. 103. f. 449. Vol. II. Oper. narrat, se nocte mera peregrisse operationes arithmeticas in numeris multo majoribus, quam quis speret clara luce

luce fieri posse. Sane cum *Joannes Georgius Pelsbover*, Regiomontanus Borussus, A. 1670. d. 18. Februarii stylo Angliæ ipsum inviseret; noctu in tenebris decumbens, sola fretus memoria, ex numero 53 locorum 246813579012141131516182017192122242628302325272931 radicem quadratam 27 locorum 157103016871482805817152171 fere extraxit non alia usus methodo, quam quæ communiter usitata. Immo f. 550 addit, series mathematicas, etiam subtilissimas longaque consequentiarum serie connexas, & demonstrationes bene longas & satis intricatas haud felicius expedire potuisse quam nocte silente & meris tenebris, quando nihil adfuit, quod aures oculosve alio abriperet, quin posset tota mentis attentione illis incumbere, totumque rei ambitum, etiam late patentem, una quasi synopsi animo præsentem sistere, eamque sic enodare & ordinare, ut alias vix potuerit. Ipse autem ingenue fatetur, quod eam vim imaginationis atque memoriæ exercitio fuerit consecutus. Etenim f. 449: Cum antehac, inquit, curiositatis gratia tentaverim aliquando, quousque vis memoriæ mihi suppetere ad peragendas operationes arithmeticas (puta multiplicationem, divisionem, radicum extractionem similesve) absque ope calami & atramenti, aut quæ horum instar sunt: remque satis succedere deprehenderim (verbi gratia) in extrahenda radice quadratica, ex numero figuris 8, 10, 12. aut etiam pluribus scripto: procedere visum est pedetentim (non quidem uno impetu eodemque tempore, sed successive pluribus intervallis) idem experiri (nec sine successu) in numeris (quod ajunt) locorum 20, 30, 40. Ad domesticam quoque provocare possum experientiam. Etenim initio studii mathematici ac imprimis algebraici in lecto decumbens meris tenebris problemata algebraica solvi & calculo ad finem perducto formulas geometricæ construxi sola imaginationis ac memoriæ vi; cumque interdum solutionem ac constructionem repeterem, me nihil a vero aberrasse depre-

deprehendi. Satis autem superque recordor, me nonnisi prævio exercitio id obtinuisse.

Cur tempus nocturnum faveat in præsentē negotio, jam non inquirimus, etsi *Wallisus* in iis, quæ adduximus, verbis haud obscure id innuat. Paulo enim deinceps ex instituto ea de re nobis dicendum erit, ubi de attentione agemus. Ceterum quæ præsens fert propositio, ea unusquisque in seipso experiri poterit, juniore præsertim ætate, utut cum *Walliso* non ad eandem metam perveniat.

§. 198.

*Extensio
imaginationis &
memoriæ
quid sit.*

Imaginatio dicitur extendi, si plures ideas simul producere & per longum temporis spatium productas conservare apta redditur. Et *Memoria* extendi dicitur, quatenus ideas istas continuo recognoscit. Quoniam itaque exercitio efficitur, ut imaginatio ideas plures simul producere & per longius temporis spatium immutatas conservare valeat (§. 197.); nos autem identitatis idearum conservatarum nobis continuo conscii sumus, experientia teste, easdemque adeo continuo recognoscimus (§. 173.); *imaginationem & memoriā exercitio extendere* valemus.

Extensio imaginationis & memoriæ adeo firmiter coheret, ut hæc una cum illa obtineatur. Quodsi tamen sufficiente acumine utamur, memoriæ quid acquiri, dum imaginatio extenditur, quod ante isti non aderat, haud difficulter perspicitur. Etenim memoriæ tribuitur, quod omnium istarum idearum, quas simul appercipimus, identitatem per omnem temporis tractum agnoscamus, quemadmodum ex demonstratione corollarii præsentis liquet, quodque quasdam reproductas recognoscamus. Exemplo anteriori (§. 197.) idem palam redditur. Etenim dum *Wallisus* sibi primum proposuit numerum 63 locorum, ut inde extraheret radicem; fieri non potuit, ut totum continuo obtutu comprehenderet. Quamobrem tot ejus notas reproducere debuit in ipsa operatione, quot necessariæ erant ad singulas operationes partiales. Duplex vero hic fuit memoriæ officium, scilicet ut ejus vi agnosceremus identitatem notarum reproductarum cum iis, quæ in serie vi imaginationis primum assumpta locum istum occupabant, & ut durante operatione aliqua particulari agnosce-

agnosceret, notas, quarum nobis conscii sumus, esse constanter easdem. In his extensio memoriæ consistit, quæ ab extensione imaginationis, quæ ideas producit & conservat, utique diversa.

§. 199.

Si quis imaginationem & memoriam extendere velit, a gradu minori extensionis continuo progrediendum ad majorem. *Initium & progressus extensionis memoria.* Probat idem exemplum Wallisii & quilibet experimentum in semetipso capere potest. Etenim Wallisus operationes prolixas arithmeticas sola imaginationis atque memoriæ vi absoluturus initium fecit in numeris ex 8, 10, 12 figuris constantibus ac deinde progressus continuo est ad prolixiores, donec tandem in numero 53 locorum eandem perficere posset. Si enim exercitia per singulos dies continuentur, & singulis diebus insensibiliter difficiliora instituantur; nulla est ratio, cur his imaginatio & memoria sufficere non debeat, cum anterioribus seu proxime præcedenti sufficerent. Per insensibilia autem incrementa cum differentia quantumvis magna successu temporis inter exercitia prima & ultima enascatur; imaginatio quoque & memoria continuo magis magisque extenditur.

Domesticam hic quoque experientiam appellare poteram, ad quam ante (§. 197.) provocavi: ipse enim probe memini, me a faciliioribus exorsum ad difficiliora progressum fuisse per insensibilia incrementa. Et sane si quid memoriæ mandandum, quod prolixius est; citius ac facilius idem efficitur, ubi particulam unam alteri continuo addis, quam si uno veluti impetu totum eidem ingerere coneris. Consultissimum est, si quis experimentum in seipso capere studeat. Quousque progredi possit, experientia docebit.

§. 200.

Quæ distincte percipiuntur, memoriæ facilius mandantur diutiusque ea retinentur, quam quæ confuse percipiuntur. *Distincta perceptio cur juvet memoriam.* Si quid enim distincte percipimus, plura sigillatim enunciabilia in eodem distinguimus (§. 38.). Ponamus majoris eviden-
(Wolffii Psychologia.)

tia gratia nos in objecti O discernere, quæ insunt, A, B, C, D, E &c. & ea eodem ordine se invicem excipere, quo literæ se invicem consequuntur. Patet nos primo ipsum A sigillatim nobis repræsentare, non attentis ceteris quæ adsunt, atque deinde cogitationem successive ad B, C, D, E &c. promovere. Quare dum per aliquem temporis tractum singula hæc, quæ insunt, A, B, C, D, E &c. sensui vel imaginationi præsentia sistimus & ad ordinem, quo se invicem consequuntur, respicientes, A & B simul, D & E simul &c. percipimus, facilitatem acquirimus una cum A reproducendi perceptionem ipsius B, & cum ipso B perceptionem ipsius C ac ita porro (§. 108.), ut adeo excitata idea ipsius A recurat quoque idea ipsius B & hinc porro ipsius C ac ita porro (§. 109.). Atque ita ipsum O memoriæ mandamus (§. 178.), eo quidem successu, ut perinde sit ac si unicum saltem A, vel B, vel C, vel D, vel E eidem mandassemus.

Enimvero qui objectum O nonnisi confuse percipit, quæ ipsi sigillatim enunciabilia insunt, A, B, C, D, E &c. non distinguit (§. 39.), adeoque totum uno obtutu comprehendit. Quoniam igitur non attendit ad numerum eorum, quæ ipsi O insunt, nec ad ordinem, quo invicem sequuntur; subsidio illo destituitur, quo in distincta perceptione idea ipsius B producitur ope alterius A, idea ipsius C ope alterius B ac ita porro. Quamobrem cum in priori casu subsidium quoddam reproducendi & recognoscendi ideas suppeditetur, quo in altero casu caremus; diuturna objecti contemplatione in casu priori memoriæ idem mandari debet, quam in posteriori, secus enim subsidium istud nullum foret, consequenter distincte percepta facilius memoriæ mandari debent, quam quæ confuse percipiuntur.

Si quis de veritate facti dubitet, eum a posteriori convinci consultum est. Quamobrem propositionem præsentem experientia adhuc confirmare lubet, utut rationem ejus per-
spexe-

spexerimus. Ponamus te legere historiam quandam præsertim prolixiorē multisque circumstantiis perplexis involutam. Quodsi lectionem ita instituas, ut textum auctoris distincte resolves, singula facta, singulas circumstantias a se invicem separans ac ordinem, quo se invicem excipiunt, perpendens; te quæ legisti exactissime enarrare posse intelliges, cum idem a te fieri nondum posse animadvertas, etsi eodem tempore consumto textum auctoris aliquoties relegeris. In casu priori historiam distincte percipis (§. 38.); in posteriori confuse (§. 39.). Quoniam historiam in casu primo accurate enarrare vales; in posteriori non item; ideam ejus reproducendi & reproductam recognoscendi facultatem in casu priori tibi comparasti, quam in casu altero nondum acquisivisti, adeoque in priori memoriæ eandem mandasti (§. 178.), eandemque eadem retinivisti (§. 180.), cum in priori eandem memoriæ nondum mandaveris, nedum retinueris. Idem vero lectioni impendisti tempus, adeoque æque diuturna fuit objecti contemplatio. Quamobrem in casu priori facilius memoriæ historiam mandasti & retinivisti, quam in altero. Distincte igitur percepta facilius memoriæ mandari ac diutius eadem retineri, quam confuse percepta patet. Idem experiri licet in demonstrationibus præsertim prolixis, quæ distincte resoluræ & sensui ac imaginationi objectæ multo facilius memoriæ mandantur diutiusque eadem retinentur, quam ubi in confuse percepta acquiescis. Immo idem experiri licet in lectione librorum quorumcunque.

Maximæ utilitatis est propositio præsens, cum ostendat modum multa memoriæ facile mandandi ac firmiter eadem retinendi. Et huic sane consentanea est praxis omnis, qua memoria juvatur, qualiacunque tandem sint artificia, quibus eidem succurritur. Inter illa artificia occurrit dogmatum in tabulas relatio, in quibus uno quasi conspectu exhibentur, quæ de eodem subjecto tenenda sunt, ac præterea in classes quædam generales revocantur numerisque distinguuntur, ut & distincte percipi possint, si singula sigillatim perlustrantur & quo ordine se invicem excipiant perpenditur, & confuse quoque percipian-

ciantur, si uno obtutu totam tabulam comprehendis. Ita enim obtinetur, ut & integram tabulam solius imaginationis ac memoriæ vi tibi repræsentare ac eadem singulas in eadem classes designare, & in singulis describere valeas, quæ iisdem conveniunt. Quodsi distincta perceptione juves imaginationem atque memoriam, ut tabulam, quam constructam perlustrasti, tanquam præsentem tibi repræsentare & singula in eadem collocanda tanquam in iisdem descripta exhibere valeas; eo ipso imaginatio & memoria haud parum extenditur (§ 198.). Quamobrem etsi disciplinis conveniat methodus scientifica, quæ unumquodque eo loco tradi jubet, quo per antecedentia intelligi ac demonstrari potest (§ 133. *Disc. pralim.*); non tamen ideo contemnendæ sunt tabulæ mnemonicæ, quæ doctrinis, quibus imbutus est animus & quarum evidentiam ex demonstrationibus, sicuti claritatem ex definitionum legitima concatenatione per subordinationem decentem facta (§ 119. *Disc. pralim.*) hausit, facile retinendis inserviunt. Nostra ætate fere in desuetudinem abiit tabularum istarum usus, sane eximius, si in præjudicium methodi scientificæ non tendat, qua in re peccatum est a maioribus; sed vel ad systematicam tractationem præparet tyronem, vel eidem absolutæ superaccedat, quando nimirum nihil amplius superest, quam ut clare ac evidenter percepta memoriæ fideliter mandentur, ut, quæ didicisti veraque cognovisti, occasione ita ferente dextre ac utiliter applicare possis. De tabulis istis mnemonicis plura diximus in Horis subsecivis A. 1730. Trim. æstiv. num. III.

S. 201.

Artificiosa

*idearum re-
producti. &
recognitio.*

Si ideas rerum vel verborum reproducendas ad objecta quedam visibilia referimus, veluti si verba in iis descripta imaginamur; conspectu objectorum idæ in nobis reproducuntur & recognoscuntur. Quodsi enim verba quædam aut nomen rei cujusdam objecto cuidam visibili veluti inscripta tibi imaginæris (id quod fieri posse, quovis momento in temetipso experiri poteris; objectum istud verbaque eidem inscripta vi imaginationis simul percipis, actusque imaginationis tibi conscius es. Quodsi jam objectum istud intueris, illud necessario percipis (§ 199.). Enimvero si qua simul percepimus & unius perceptio

ceptio denuo producit sensus vi, imaginatio etiam perceptionem alterius producit (§. 104.). Ad conspectum igitur objecti ideæ verborum, quæ eidem veluti inscripta imaginatus fueras, simul reproducuntur una cum actu imaginationis, quo ea quasi inscripseras, consequenter reproductas recognoscis (§. 174.). Si verbis ideam rei substituas; demonstrationem adhuc eandem subsistere animadvertes.

Propositio præfens est fundamentum artificiorum, quibus ad juvandam imaginationem & memoriam utimur. Per legem enim imaginationis patet (§. 117.), reproductionem idearum non aliter arbitrio nostro subici posse, quam ubi eas cum ideis aliis per coëxistentiam aut immediatam successione copulamus. Quicquid igitur ad reproductionem idearum dato tempore absolvendam intervenire debet, ex hoc fonte derivandum, nisi quatenus eorum ratio simul haberi potest, quæ imaginationi ac memoriæ extendendæ inserviunt (§. 199. 200.).

§. 202.

Artificium memoriæ dicimus actionem, qua quid aptum *Artificium* efficitur ad idearum reproductionem & recognitionem juvan- *memoriæ* dam, quod per se eandem juvare non poterat.

Ita si nobis imaginemur, verba quædam parieti adscripta; hoc ipso efficiamus, ut conspecto pariete verborum istorum idea in nobis reproducatur & reproducta recognoscatur (§. 201.); consistit igitur in hac actione, quæ parietem aptum efficiamus ad ideam verborum reproducendam & eorum recognitionem juvandam, artificium memoriæ. Scilicet memoriæ artificium est, quod diu vel sæpius verba ista veluti parieti inscripta nobis imaginemur, & parietem intuemur, quando verborum illorum meminisse voluerimus.

§. 203.

Quoniam per artificium memoriæ aptum quid redditur ad idearum reproductionem & recognitionem juvandam, quod per se ad eandem nil quicquam conferre poterat (§. 202.); imaginationis vero est ideas reproducere (§. 104.), memoriæ re- *Artificio- rum isto- rum usus.*

productas recognoscere (§. 175.) ; per artificia memoriae imaginatio & memoria arbitrio nostro subijcitur.

Artificiis nimirum istis obtineretur, ut ideas reproducamus & reproductas recognoscamus, quando & ubi nobis libuerit.

§. 204.

Artis mnemonica definitio.

Ars mnemonica seu *Ars memoriae* dicitur ars memoriam extendendi artificiisque juvandi. *Mnemonicorum* nomine veniunt praecepta illius artis.

Veteribus hanc artem fuisse excultam, ex autore ad *Herennium* lib. 4. constar, ubi tamen eandem restringere videtur ad sola artificia, quibus memoria juvatur (§. 202.). Sed consultius esse videtur, ut arti huic tribuamus, quicquid a nobis ad memoriam amplificandam, perficiendam & quocunque modo juvandam proficisci potest. Ecce enim entia multiplicemus praeter necessitatem? Fecit *Simonides* primum invenisse hanc artem, quemadmodum narrat *Cicero* lib. 2. de Oratore. Artem mnemonicam in se significato strictiori describit laudatus antea autor ad *Herennium*, quem si consulere volueris, constabit utique eam non alio niti fundamento, quam quod paulo ante adstruximus (§. 201.).

§. 205.

Memoria naturalis & acquisita atque artificialis differentia.

Memoria naturalis dicitur, quae homini absque ulla exercitatione praevia & ullis artificiis inest. *Acquisita* appellatur, quae praevia exercitatione & artificiorum ope comparatur. Ejus adeo species est *artificiosa*, quae nonnisi artificiorum ope in nobis datur.

Hoc sane sensu memoriam artificiosam sumunt veteres, ut videre est apud *Ciceronem* atque *Herennium*: sed eadem exercitatione comparatum a naturali non distinguunt, quod tamen fieri nobis commodum visum. Maluimus adeo memoriae naturali opponere acquisitam, quae duas sub se complectitur species, alteram innominatam, alteram artificiosam. *Goclenio* in Lexico memoria artificiosa & acquisita synonyma sunt.

§. 206.

Memoria acquisita.

Memoria acquisita ac in specie artificiosa arte mnemonica obtri-

obtinetur. Memoria enim acquisita pravia exercitatione & *quomodo*
artificiorum ope obtinetur (§. 205.), ac in specie quidem arti- *obtinetur.*
ficioſa artificiorum ope comparatur (§. cit.). Enimvero arte
mnemonica memoria extenditur (§. 204.), adeoque exercita-
tione pravia (§. 198.): arte etiam mnemonica per artificia ju-
vatur memoria (§. 204.). Memoria igitur acquisita & in specie
artificioſa arte mnemonica obtinetur.

Apparet adeo uſus artis mnemonicae, quæ memoriã naturalem
perficit, ut imaginationis ac memoriæ ope efficere valeamus, quod
alias a nobis fieri minime poſſet.

§. 207.

Memoria dicitur labi, ſi ideam reproductam habemus *Memoria*
pro eadem, quam ante nos habuiſſe conſcii nobis ſumus, eſſi *quando la-*
immutata fuerit, ſeu corrupta. Memoria in hoc caſu etiam *batur, nos-*
fallere dicitur, quatenus in cauſa eſt, ut diverſa habeamus pro *que fallat.*
iisdem.

E. gr. Vidimus Sempronium veſte viridi indutum. Recurrit
nobis idea Sempronii vi imaginationis producta, ſed quæ cum veſte
rubra indutum ſiſtit. Quodſi nobis perſuadeamus nos vidiffe Sem-
pronium veſte rubra indutum, memoria labi nosque fallere dicitur.

§. 208.

Quoniam nihil frequentius eſt, quam ut homines diſ- *Quod me-*
ſentiant in iis, quæ ſimul viderunt; cum repugnet idem ſimul *memoria labi*
fuiſſe & non fuiſſe (§. 28. Ontol.): neceſſe eſt ut vel uni imagina- *poſſit.*
tio rem aliter repræſentet, quam erat, vel utrique. Quia ta-
men uterque ſibi conſcius eſſe videtur, ſe talem vidiffe, qualem
ſibi repræſentat; memoriã vel uniũs, vel utriusque labi ne-
ceſſe eſt (§. 207.). *Memoriã igitur labi poſſe manifeſtum eſt.*

Lapſus memoriæ nemo non in ſe unusquiſque experiri poteſt, mo-
do attendere velit. Errores inprimis calculi lapſu memoriæ com-
mittuntur ab iis, qui in eodem exercitati ſunt. Immo plures alii ei-
dem debentur, quemadmodum inferius oſtenſuri ſumus.

§. 209.

§. 209.

*Labilitas
memoria.*

Memoria dicitur labilis, quatenus fieri potest, ut labatur, seu lapsus eidem non repugnat. Quare cum manifestum sit memoriam labi posse (§. 208.); *memoria utique labilis*.

Memoriam esse labilem, adeo compertum est, ut eam esse labilem in proverbium fere abierit. Utinam vero eam perpenderent, qui ex erroribus lapsu memoriæ commissis, & a quovis tyrone facile colligendis nescio quid adversus errantes colligere vellent! Astronomi æquiores ceteris se præbent, qui errores calculi memoriæ lapsu commissos facile condonant alteri.

§. 210.

*Lapsus
memoriae
causa.*

Si imaginatio ad rerum olim perceptarum ideas diversas spectantia in unam confundit, nec anima sibi conscia est ideæ rei unius, quam reproductam cognoscit, quidpiam ex ideæ rei alterius admisceri; memoria labitur. Etenim dum ideam olim perceptæ rei vi imaginationis reproductit anima reproductamque recognoscit *per hypoth.* conscia sibi est se rem istam olim percepisse (§. 173.). Quoniam vero imaginatio eidem aliquid admiscet ex ideæ rei alterius antea similiter perceptæ; ideam quoque ejus, quod alteri admiscetur, reproductam recognoscit (§. 174.), adeoque non minus sibi conscia est, se idem olim percepisse (§. 173.). Enimvero quia sibi conscia non est, id ex ideæ rei alterius ideæ rei reproductæ admisceri *per hypoth.* id ad eam pertinere putat. Ideam igitur vi imaginationis jam reproductam pro eadem habet, quam olim habuit, cum rem sensu perciperet, utut immutata fuerit (§. 172.). Memoria igitur labitur (§. 207.).

Memorable mihi succurrit exemplum, quo propositio præsens confirmatur. Titius adolescens in lectione poetarum Græcorum *Homeri, Hesiodi, Pindari* versatus fuerat. Cum ab eadem abstinuisset, in manus ipsius inciderat libellus, qui sub titulo *Hellenodiarum* Lutheranae editus est & in quo cantiones in Ecclesia usitæ in rhythmos Græcos ejusdem terminationis, retentis melodiis, conversæ leguntur. Eum curiositatis gratia aliquoties perlegerat & ope melodiarum ipsi admodum familiare identitatem terminationum, qualis in versibus

Ger.

Germanicis recepta, memoriæ firmiter infixerat. Aliquot annis elapsis ubi sermo incidebat de Poësi Germanica, quod ob identitatem terminationum in versibus præter metrum obversandam sit difficile; Titius contendebat, eandem difficultatem obtinere in versibus Græcis, qui perinde ac Germanici eandem admittant terminationem, & quicquid ceteri, qui aderant, in contrarium dicebant, se a sententia sua dimoveri non pariebatur: se enim optime recordari ejus ajebat, quod in *Homero, Hesiodo, Pindaro*, aliis observaverit. Immo tam certus sibi videbatur sententiæ suæ, ut vix propriis oculis fidem haberet, cum in *Homero* contrarium videret, & attonita mente haberet, quid responderet non habens. Evidens hic est lapsum memoriæ contigisse ex eo, quod vi imaginationis eadem terminationes rhythmorum in Hellenodia ideæ versuum Græcorum Poëtarum fuisse admixtæ, nec Titius ejus sibi conscius fuit, tantummodo sibi conscius versuum *Homeri, Hesiodi, Pindari* a se aliquando lectorum, & terminationum earundem in rhythmis Græcis observatarum. Hinc vero simul liquet, quam facilis sit memoriæ lapsus ac subinde inevitabilis, ut adeo absolum sit eundem labentibus imputari.

§. 211.

Ideas res producendi & reprodu-
gnoscendi impotentia.
Etas reco-
gnoscendi
impotentia.
 Si res nec diu, nec sæpius sive sensu, sive imaginatione percipiuntur; ideas earum vi imaginationis reproducere non possumus, nec reproductas sensu recognoscere valemus. Etenim si res nec diu, nec sæpius; sive sensu, sive imaginatione percipiuntur; fieri non potest, ut, si idea rei simul perceptæ in anima producatur, illius etiam idea simul recurrat (§. 107.). Quare cum imaginatio in reproducendis ideis rerum antea perceptarum constantem hanc legem sequatur, ut, si unius rerum simul perceptarum perceptio in nobis producat, perceptionem quoque alterius producat (§. 117.); si res nec diu, nec sæpius, sive sensu, sive imaginatione percipiuntur, ideas earum vi imaginationis reproducere non possumus.

Quodsi ideam rei antea perceptæ vi imaginationis reproducere non valemus, ejusdemque sensu jam productæ nobis conscii sumus; perinde est, ac si eam prima vice perciperemus, cum prima vice eandem percipientis imaginatio similiter eam

(Wolffi Psychologia.) T ideam

ideam cum aliis non reproducat (§. 117.). Nulla igitur adest ratio, cur nobis conscii esse debeamus, quod rem istam jam perciperimus, vel ideam istam jam ante habuerimus, consequenter conscii nobis esse non possumus, quod eandem jam habuerimus (§. 70. *Ontol.*). Quamobrem ideam rei antea perceptæ, etsi jam sensuum vi reproducatur, recognoscere non valemus (§. 173.). Enimvero si res nec diu, nec sæpius, sive sensu, sive imaginatione percipiantur; ideas earum reproducere non possumus *per partem primam*. Ergo nec ideas sensu reproductas recognoscere valemus.

Utrumque confirmatur a posteriori. Experimur enim deesse nobis facultatem reproducendi ideas rerum antea perceptarum: experimur etiam deesse nobis facultatem, ideas rerum antea perceptarum recognoscendi, si sensuum ope denuo producantur, ubi res, cum primum perciperentur, non diu percipimus, neque deinde eas sæpius percipimus. Quod vero deesse debeat, inde colligimus, quod jam cesset ratio, cur in casu opposito adsit. Si vero ratio sufficiens cessat, illud etiam cessare debet, quod propter eam potius est, quam non est (§. 118. *Ontol.*).

Propositio præsens a posteriori adeo manifesta nobis videtur, ut eam unusquisque statim largiatur, qui sibi conscius est, quomodo objecti diuturna vel sæpius iterata contemplatione ideam ejus reproducendi & reproductam recognoscendi facilitatem sibi comparaverit. Quodsi tamen in notionem evidentiae curatius inquiras; notioni principii ontologici, quod adduximus (§. 118. *Ontol.*), claræ quidem, etsi confusæ, id tribuendum esse animadvertes.

§. 212.

*Nexus re-
cognitionis
& reprodu-
ctionis idea-
rum.*

Si ideam sensuum ope reproductam non recognoscere valemus, nec eam vi imaginationis reproducere valemus. Si enim ideam sensuum ope reproductam recognoscere non valemus; nobis conscii non sumus, quod eam jam antea habuerimus (§. 173.), consequenter ratio cessare debet, cur nobis conscii
simus,

simus, nos eam jam antea habuisse (§. 118. *Ontol.*). Quare cum ideam reproductam recognoscamus, adeoque nobis conscii sumus nos eam jam antea habuisse (§. 173.), quia idea reproducta in alia perceptionum serie continetur, quam ante percepta continebatur & utriusque seriei nobis conscii sumus (§. 174.), utriusque autem seriei nobis conscii esse nequeamus, nisi vi imaginationis rei, quæ nunc sensu percipitur, idea cum ideis ceterarum rerum antea cum eadem perceptarum simul reproducat, quod per se patet; idea vi imaginationis non producit, dum sensuum ope reproducitur, ubi eam recognoscere non valemus. Patet itaque si ideam sensuum ope reproductam recognoscere non valeamus; nos nec eam vi imaginationis reproducere valere.

Idem etiam sic ostenditur. Ponamus nos imaginationis vi reproducere valere ideam ejusdem rei, quæ nunc sensu denuo percipitur. Quoniam res sensu jam percipitur *per hypoth.* necesse est ut idea ejus cum ideis rerum aliarum simul perceptarum actu reproducat vi imaginationis (§. 104.). Anima igitur perceptiones sensuales cum phantasmatis conferens perspicit, ideam rei sensu nunc reproductam in alia perceptionum serie contineri, quam antea percepta, ab imaginatione nobis exhibita continebatur, adeoque illam recognoscere valet (§. 174.); id quod hypothesein evertit.

Veritatem propositionis præsentis etiam in nobis ipsis experimur, modo ea attentione uti possimus, quæ ad impotentiam observandam sufficit. Etenim si rem sensui oblatam admoniti recognoscere non valeamus, clausis oculis, ut mentem a sensu abducamus, ejus aciem in ideas, quas habemus, intendimus, si forsan exiguam claritatem habeat idea vi imaginationis cum sociis reproducta, eam tamen animadversuri (§. 101.). Enimvero dum nihil ejus animadvertere valemus, in hæc tandem verba erumpimus: nos nullo prorsus modo me-

minisse posse, quod rem istam jam antea sensu perceperimus; quo ipso significamus impotentiam ideam vi imaginationis reproducendi (§. 177.).

Quoniam recognitio idearum, consequenter rerum, quas representant, cum earum reproductione vi imaginationis facta adeo firmiter coheret; mirum videri non debet, quod vulgo facilitas ideam reproducendi ad memoriam referatur, & facultas reproductam recognoscendi, in qua proprie memoria consistit (§. 175.), nonnisi tacite supponatur (§. 177.).

§. 213.

*Recognitio-
nis iterata
ratio.*

Si res aliqua sæpius sensu vel vi imaginationis percepta & in iteratis perceptionibus recognita fuit; eandem postea reproductam anima recognoscit ex eo, quod eam jam ante recognoverit. Etenim si res aliqua sæpius sensu vel imaginationis vi percepta & in iteratis perceptionibus recognita fuit, vi legis imaginationis (§. 117.) posthac idea ista cum perceptione actus recognitionis reproduci debet (§. 107.). Quoniam igitur anima sibi conscia est, se ideam istam jam antea recognovisse, consequenter se jam antea sibi consciam fuisse, quod eandem ideam, quæ nunc in eadem reproducta fuit, jam antea habuerit (§. 173.); ex eo utrique intelligit, quod ideam, quæ nunc in eadem reproducta fuit, jam antea habuerit, consequenter ratio sufficiens recognitionis in eo continetur (§. 56. *Ontol.*). Quare cum posita ratione sufficiente ponatur etiam id, quod per eam potius est, quam non est (§. 118. *Ontol.*); ex eo, quod ideam, quæ nunc denuo reproducitur, jam antea reproductam recognovimus, recognoscimus.

Actiones seu operationes animæ in recognitionem idearum reproductarum influere, vidimus jam superius (§. 174.), cum recognitionem ideæ prima præsertim vice reproductæ demonstrarem. Immo nihil magis influit in istam recognitionem, quam operationum mentis circa eas simultanea reproductio.

§. 214.

Recognitio.

*Si res aliqua sæpius cum aliis aliisque percepta & in ite-
ra-*

ratis perceptionibus recognita fuit; idea postea reproducta ad-
 heret perceptio quædam confusa, unde recognoscitur. Si enim
 res aliqua sæpius cum aliis aliisque percepta & in iteratis per-
 ceptionibus recognita fuit; idea ejusdem reproducta fuit se-
 cunda vice cum iis perceptionibus, quas anima in prima simul
 habuit, in tertia tam cum iis, quas in prima, quam cum istis,
 quas in secunda habuit; in quarta tam cum iis, quas in prima
 & secunda, quam quas in tertia habuit & ita porro (§. 174.):
 id quod etiam experimur, dum singulas ideas reproductas men-
 tis acie perlustramus, urpote successive in eas incidentes, quæ
 diversis vicibus una percepimus. Quoniam vero toties quo-
 que recognita fuit, quoties iterato reproducta fuit, *per hypoth.*
 perceptio quoque iterata recognitionis una cum idea rei to-
 ties perceptæ ac recognitæ reproduci debet (§. 107. 117.).
 Quoniam igitur multiplices perceptiones cum idea rei sæpius
 jam perceptæ una reproducuntur, anima vero omnes simul
 uno veluti obtutu comprehendens in perceptione hac com-
 posita non distinguit eas a se invicem, quæ ipsam ingrediuntur,
 perceptio ista confusa est (§. 39.). Atque adeo patet perce-
 ptioni rei sæpius cum aliis aliisque perceptæ & in iteratis per-
 ceptionibus recognitæ adhærere perceptionem quandam con-
 fusam.

Enimvero quoniam ipsa experientia edocti sumus, per-
 ceptionem istiusmodi confusam adhærere rebus antea jam per-
 ceptis; ex perceptione ista confusa perceptionis reproductæ
 sociâ intelligitur, quod eam jam antea habuerimus. Est igitur
 confusa illa perceptio ratio sufficiens, cur intelligamus, quod
 perceptionem reproductam jam habuerimus (§. 70. *Ontol.*),
 consequenter ratio sufficiens recognitionis (§. 173.). Quare
 cum posita ratione sufficiente poni etiam debeat id, quod
 propter eam potius est, quam non est (§. 118. *Ontol.*); ex con-
 fusâ ista perceptione ideæ reproductæ sociâ animâ ideam repro-
 ductam recognoscere debet.

Propositio præsens plurimum prodest ad perceptiones confusas, quæ vi imaginationis, sive ideis sensualibus, sive phantasmatis sociantur, evolvendas, ut successive singulæ reddantur claræ. Ad eam vero atque præcedentem attendere debent, qui veritatem propositionis de modo recognoscendi ideas reproductas (§. 174.) experimento in se facto intelligere gestiunt. Alias enim accidit, ut in casum propositionis præsentis, vel præcedentis incidentes modum recognitionis non agnoscant, adeoque tanquam spurium rejiciant, quod eum experientia contrarium judicent. Referenda igitur est propositio præsens in earum numerum, quæ mentis aciem intendit, quæ semetipsam cognoscit.

§. 215.

*Oblivionis
definitio.*

Memoriæ opponitur *Oblivio*, quæ adeo est impotentia ideas reproductas (consequenter res per eas repræsentatas) recognoscendi.

Memoria enim est facultas ideas reproductas recognoscendi (§. 175.). Ergo si oblivio contraria esse debet memoriæ; in impotentia eas recognoscendi consistere debet: facultati enim agendi opponitur impotentia, cum in posteriori casu impossibile esse debeat, quod in priori possibile. Definitio oblivionis cum nominalis sit, arbitraria utique est, atque ideo nulla prorsus probatione indiget. Quoniam tamen arbitrium regi debet rationibus, nec a significato recepto temere est recedendum (§. 142. *Disc. prælim.*); cur oblivionem ita definiamus, reddenda nobis fuit ratio.

§. 216.

*Impotentia
reproducen-
di ideas ad
oblivionem
pertinens.*

Quoniam ideam vi imaginationis reproducere nequit, qui eandem ope sensuum reproductam recognoscere non valet (§. 212.); qui vero rei cujusdam oblitus est, eam recognoscere non potest, dum sensu eandem percipit (§. 215.): *Qui rei cujusdam oblitus est, ideam ejus vi imaginationis reproducere nequit.* Hinc & ad oblivionem spectat impotentia reproducendi ideas rerum antea perceptarum.

Impotentia reproducendi ideas opponitur facultati easdem reproducendi, adeoque imaginationi (§. 134.), consequenter ad eandem referri nequit. Quamobrem quoniam oblivio absque ista impotentia locum

locum habere nequit, nulla vero ratio est, cur istam peculiari nomine insigniamus, neque ullum peculiare nomen suppetit, quod eidem tribui possit; ad oblivionem utique referenda. Consentit quoque communis loquendi usus, quo impotentia reproducendi ideas rerum antea perceptarum una cum impotentia easdem recognoscendi oblivio salutatur.

§. 217.

*Si quas ideas longo tempore non reproducimus; rerum Quorum-
per illas representatarum obliviscimur.* Etenim si longo tempo- *nam obli-
re ideas aliquas non reproducimus, cessat ratio, cur memoria scamur.*
retineantur (§. 181.), consequenter eadem retineri nequeunt
(§. 118. *Ontol.*). Anima igitur facilitatem ideam reproducen-
di & reproductam recognoscendi, quam habuerat, amittit (§.
180.), consequenter ad eas reproducendas & recognoscendas
impotens redditur. Quare cum in ista impotentia ideas re-
cognoscendi atque reproducendi oblivio consistat (§. 215.
216.); eorum obliviscimur, quorum ideas longo tempore non
reproducimus.

Idem etiam sic ostenditur. Si quas ideas longo tem-
pore non reproducimus; eas posthac vi imaginationis nec re-
producere, nec sensuum ministerio reproductas recognoscere
valemus (§. 211.). Quare cum eorum obliviscamur, quorum
ideas ministerio sensuum reproductas recognoscere non possu-
mus (§. 215.), neque vi imaginationis reproducere valemus
(§. 216.); illarum rerum obliviscimur, quarum ideas longo
tempore non reproducimus.

Veritatem propositionis presentis unusquisque in semetipso ex-
peritur. Luber tamen in medium asferre exemplum memoratu di-
gnum, quod a *Leibnitio* me accepisse memini. Ex duabus epistolis
Johannis Huddenii de reductione æquationum & de maximis & mi-
nimis, quæ inter Commentarios in Geometriam *Cartesii* leguntur,
apparet, virum fuisse Algebrae ac Geometriæ sublimioris peritissimum.
Quod si opus *MSC.* prostaret, in quod inventa sua retulit, multo ma-
gis idem appareret. Enimvero consul *Amstelodamensis* factus rerum
geren-

gerendarum cura a calculis algebraicis & figuris geometricis avocabatur, ut horum ideas in se reproduendi occasione destitueretur. Quamobrem cum *Leibnizius* ex Gallia redux eundem accederet de rebus ad Geometriam sublimiorem spectantibus cum ipso collocuturus; librum suum MSC. ei obtulit, ut eundem perlustraret, quem facete se doctiorem appellabat, propterea quod ideas rerum geometricarum & algebraicarum oblivioni dederat. Propria igitur inventa non amplius intelligebat, nedum noverat *Huddenius*, propterea quod rebus aliis intentus diu de iisdem non cogitaverat. *Isaacus Nevtonus* inventorum mathematicorum gloria eminet, quæ in primis in eximio opere Principiorum philosophiæ naturalis mathematicorum leguntur. Communis fama fuit non modo in Anglia, verum etiam in Germania, in quam inde translata, eum ætate provectiore libros a se conscriptos non amplius intellexisse. Probabilitate non destituebatur vi propositionis præsentis. Cum enim ultra seculi quadrantem distet editio secunda a prima, nulla tamen inventa ulteriora huic accefferint, qualia uberrima & maxima a tanto viro proficisci poterant intra tantum temporis intervallum; haud obscure hinc colligitur, quod intra istud temporis intervallum de rebus geometricis, quales in Opere principiorum continentur, non amplius cogitaverit. Eas igitur rursus oblivisci debebat. Nihil autem hoc ipsum derogat laudibus summis tanti viri, quas ex inventis consecutus. Manet enim inventor, sive inventa propria ipsemet iterum oblivioni dederit, sive ad extremum usque vitæ halitum eadem memoria retinuerit. Absit etiam ut quis sibi persuadeat, vires intellectus decrevisse, si quis oblivioni dedit, quæ noverat in aliqua scientiæ parte, animum deinde ad alia appellens! Eadem igitur *Newtonum* laus manet, sive fama de oblivione inventorum propriorum vera fuerit, sive fallax, quemadmodum *Pembertonus* contendit in præfatione ad Conspectum Philosophiæ *Isaci Newtoni*, quem idiome Anglicæ edidit. Quatenus fama sumitur vera, propositionem præsentem illustrat.

§. 218.

Quomodo
oblivio a
potestate
nostra pen-
deat.

Si rei cujusdam ideam pro arbitrio nostro reproducere
& non reproducere possumus; easdem oblivioni tradere vale-
mus. Si enim arbitrii nostri est ideam rei cujusdam reprodu-
cere; ab eadem reproducenda tanto tempore abstinere possu-
mus,

mus, quanto libet. Quare cum rei illius obliviscamur, cujus ideam longo tempore non reproducimus (§. 217.); rem istam oblivioni tradere valemus, cujus ideam pro arbitrio nostro vel reproducere, vel non reproducere possumus.

Utilitatem non exiguam habet præsens propositio in moralibus, ubi sæpius interest ut norimus, utrum in potestate nostra positum sit, nec ne, ut quid oblivioni tradamus, ne præcipiamus, quæ fieri nequeunt. Ceterum dari talia, quorum ideas num reproducere velimus in potestate nostra positum est, obvia experientia confirmat.

§. 219.

Si rem antea perceptam sensu denuo percipiamus, & vi imaginationis reproducta ejus & rerum aliarum idea fuerit obscura; re recognoscenda habemus seu certo eam recognoscere non valeamus. *Quando in ea recognoscenda habemus seu certo eam recognoscere non valeamus.*

ra, rem repræsentatam ex ea non agnoscere, nec a ceteris perceptibilibus distinguere valemus (§. 32.). Quamobrem si eam ad præsentem referamus, identitatem rei sensus atque imaginationis vi repræsentatæ agnoscere minime valemus (§. 181. *Ontol.*). Et quoniam ideæ rerum ceterarum non minus obscuræ sunt *per hypoth.* nec eas agnoscere atque ab aliis distinguere valemus (§. 32.), consequenter nec nobis consci sumus, ideam sensu nunc reproductam in alia perceptionum serie contineri, quam, cum ante perciperetur, continebatur. Illam igitur recognoscere non valemus (§. 174.). Quoniam tamen idea illa obscura vi imaginationis reproducta ideæ rei sensu denuo perceptæ adhæret *per hypoth.* eique subinde, quæ clare percipiuntur, inesse possunt (§. 33.); anima ex idea confusa, quæ sensu perceptæ vi imaginationis adjungitur, rem recognoscere adsueta (§. 214.), aliquid adesse videt, unde res recognoscitur, quatenus nempe rei perceptæ imaginationis vi quædam reproducta idea adhæret, præsertim si ex iis, quæ obscuræ perceptioni clare percepta insunt, aliquid identitatis rei sensu perceptæ ac vi imaginationis repræsentatæ simul percipit. Ponitur igitur aliquid rationis,

(*Wolffii Psychologia.*)

sed non sufficiens ad rem recognoscendam (§. 56. *Ontol.*), quatenus scilicet notio obscura & confusa in genere notionum conveniunt, a se invicem tamen differunt (§. 31. 39.), neque diversitas serierum, in quibus res nunc percepta & antea percepta continetur, clare percipitur. Quamobrem non prorsus impossibile nobis videtur, nos ideam ejus rei jam antea habuisse, immo subinde probabile videtur, nos eam jam ante habuisse (§. 578. *Log.*), certo tamen id nobis constare nequit (§. 574. *Log.*). Rem igitur sensu nunc perceptam certo recognoscere non valemus (§. 173.), seu in ea recognoscenda hæremus.

Idem confirmatur a posteriori. Ponamus Titium vidisse Mevium in loco aliquo publico, ubi multus erat hominum sibi ignotorum confluxus, ut adeo oculos in eodem defixos non diu retinuerit. Ponamus porro Titium denuo videre Mevium in ædibus Sempronii ac in eo recognoscendo hære. Hanc hæitationem significaturus ait, videri sibi quasi Titium jam viderit, se tamen id pro certo asseverare non posse. Quod si jam in casu simili constitutus ad temetipsum attenderis; obscuras quasdam ideas menti tum obversari animadvertes, quæ probabiliter quandam speciem cum formidine oppositi inducunt. Hæres igitur in re, quam nunc percipis, recognoscenda, quod idea vi imaginationis reproducta ad conspectum ejusdem sit obscura, utut quidpiam insit, quod clare percipitur, ad rem tamen recognoscendam minime sufficiens.

Hæret nimirum in re recognoscenda, qui probabile sibi esse conscius est, quod ideam ejus jam ante habuerit, non tamen certo novit. Ita enim aliquid rationis perspicuus in assensum trahitur vi probabiliter; sed ejus insufficientiam agnoscens ab eodem retrahitur. Et si adeo pronus sit ad assentiendum, quandam tamen adhuc repugnantiam animadvertit, quam superare non valet.

§. 220.

*Idea rei
reproducta*

Si rei antea clare perceptæ idea vi imaginationis reproducta fuerit obscura; anima nonnullorum oblita est, quæ in eadem

dem clare perceperat. Quoniam enim idea vi imaginationis reproducta obscura est per *hypoth.* ad rem repræsentatam (§. 48.) agnoscendam & ab aliis perceptibilibus distinguendam non sufficit (§. 32.). Enimvero quia eandem ante clare percepisti per *hypoth.* idea, quam habebas, eidem agnoscendæ ac ab aliis distinguendæ sufficiebat (§. 31.). Quare cum res agnoscatur ac ab aliis distinguatur per ea, quæ ipsi insunt, quod per se patet & obvia experientia confirmatur; in posteriori casu, quando rem clare percipiebas, tibi nonnullorum in ea conscius esse debebas, quorum tibi conscius non es in priori, quando eam obscure percipis. Quando igitur obscuram rei antea clare perceptæ ideam vi imaginationis reproductis; nonnulla ad eam pertinentia reproducere minime vales. Jam vero ea obliti sumus, quorum ideas reproducere (§. 216.), vel etiam sensu reproductas recognoscere non valemus (§. 215.). Quædam itaque obliti sumus, quæ in re clare percepta apperceperamus, quando vi imaginationis ideam nonnisi obscuram reproducimus rei antea clare perceptæ.

vi imaginationis quantum sit obscura.

Oblivione ideæ deteriorantur, ut claræ in obscuras abeant: id quod unusquisque in seipso experiri potest, quando negligit media, quibus res clare perceptæ memoriæ mandantur & semel mandatæ eandem retinentur, hoc est, si ideam rei clare perceptæ non sæpius in se reproductit (§. 179. 181.). Inprimis hic commoda sunt exempla, quæ oblivioni tradita exhibent in ideis obscuris rerum antea clare perceptarum, quarum ideas claras antea etiam vi imaginationis reproducere poteras.

§. 221.

Idea rei, quæ percipitur, sociæ dicitur, idea tota composita, quæ vi ideæ rei, quæ jam percipitur, ab imaginatione produ- *Idea rei in præsentia percepta sociæ.*

Ponamus te videre Titium in foro, quem ante videras in templo & ab imaginatione (§. 104.) produci ideam Titii tanquam sedentis in templo una cum partialibus aliis templi & rerum in eodem præsentium. Dicimus ideam totam compositam ex ideis templi, Titii, per-

personarum ac rerum aliarum in templo præsentium ideam sociam Titii, quatenus eum jam in foro videmus, aut, si mavis, ideam sociam ideæ sensualis Titii, quam jam habes.

§. 222.

Quando nobis videamur rem antea perceptam jam vidisse, sed ignorantes quando & ubi.

Si rem ante sensu perceptam sensu denuo percipias & in idea socia obscura aliquid tantummodo claritatis fuerit ideæ partiali ejusdem rei; videris tibi rem antea percepisse; sed ubi vel quando perceperis, ignoras. E. gr. Si Titium jam in foro vides, quem ante videras in templo, & idea socia tantummodo aliquid claritatis habet in idea partiali personæ Titii; dico te tibi videri Titium vidisse alibi, sed non meminisse ubi eum videris. Etenim quia idea socia obscura est *per hypoth.* ad ea omnia agnoscenda atque ab aliis distinguenda, quæ in eadem continentur, non sufficit (§. 32.). Quoniam itaque in idea socia continentur ideæ partiales, quas imaginatio occasione ideæ sensualis Titii una cum idea ejusdem Titii antea in templo visi producit (§. 221. 40.), adeoque ideæ templi, personarum rerumque aliarum in eodem præsentium (§. 104.); ad personam Titii, templum, personas ac res in templo præsentis agnoscendum minime sufficit. Enimvero quia ideæ Titii vi imaginationis reproductæ aliquid claritatis adest *per hypoth.* quidpiam ad personam Titii spectans clare percipitur, consequenter idem agnoscere ac ab aliis distinguere valemus (§. 31.). Jam cum phantasma Titii cum idea ejus sensuali componimus, identitatem ejus, quod clare in phantasmate percipitur, in utraque idea animadvertimus, atque inde probabile efficitur, phantasma istud referre Titium, quem jam videmus (§. 578. Log.), adeoque eundem jam antea videmur nobis vidisse (§. 214.). Quoniam vero ideis partialibus ceteris, quæ compositionem sociæ ingrediuntur, nihil claritatis inest *per hypoth.* nec templi, nec rerum in eo præsentium tibi conscius esse potes (§. 32.), consequenter ignoras, ubi vel quando eundem videris.

Idem

Idem confirmatur a posteriori. Etenim casus hic frequentissimus est, quo personam, quam videmus, ita alloqui solemus: Videor me te alicubi vidisse, sed recordari nequeo, ubi & quando te viderim. Quodsi vero tunc temporis, quando aliquem ita alloquimur, ad nosmetipsos attendimus & ad interiora mentis rimanda satis acuti sumus; in id incidemus, quod in persona, quæ oculis nostris præsens sistitur, observatum nobis probabile reddit, quod eam jam alias viderimus. Mentis vero aciem in ipsam magis adhuc intendentes, ea intentione, num succurrat forsan locus vel tempus, quo personam istam vidimus; nonnisi obscuram quandam ideam animo obversari animadvertemus, quæ præter locum in genere, vel tempus seu successionem quandam, aut multitudinem in genere nil repræsentat, ut impossibile sit vel locum in specie, vel res, quarum successione notionem temporis habemus, vel res multitudinem constituentes agnosci ac a se invicem distingui.

Propositio præsens est casus specialis antecedentis (§. 220.). Neque enim piget casus speciales a se invicem accurate distinguere, ut excitemus acumen ad interiora mentis perlustranda necessarium.

§. 223.

Si rem ante sensu perceptam sensu denuo percipias & in Quando hæc idea sociæ obscura aliquid tantummodo claritatis fuerit ideæ præteritam in tiali rei alicujus antea cum præsentem simul perceptæ; videris tibi eo, quid aliterem, quam nunc percipis, quodam in loco, vel aliquo tempore, vel cubi percipere cum re quadam alia percepisse, etsi parum certus sis, num eadem præteritam præcise res fuerit, quam nunc percipis. Quoniam idea sociæ rei, quæ percipitur, tota idea compolita est, quæ vi ideæ rei, quæ jam percipitur, ab imaginatione producitur (§. 221.), vi imaginationis autem producuntur ideæ rerum cum ea, quam nunc percipis, antea simul perceptarum (§. 104.); si ponamus e. gr. te videre aliquem fructum in foro, quem ante videras in horto, imaginatio reproducit horti rerumque aliarum in eodem præteritum

sentium ideam. Quoniam idea horti partialis clara est *per hypoth.* ad eum agnoscendum & ab aliis distinguendum sufficit (§. 32.), adeoque videris tibi aliquid vidisse in horto isto (§. 214.). Enimvero quia idea fructus vi imaginationis producta obscura est, *per hypoth.* ad eum agnoscendum & ab aliis distinguendum non sufficit (§. 32.), adeoque ignoras, utrum fructum quempiam videris, nec ne, multo minus nosti, num hunc præcise fructum videris, quem nunc præsentem intueris. Patet itaque te quidem tibi conscium esse, quod in horto aliquid videris; non tamen certum esse, utrum hunc præcise fructum, num aliud quid videris.

Idem etiam ostenditur a posteriori. Casus enim propositioni præsentem respondens is est, quo rem quandam, veluti plantam exoticam, videntes in hæc verba erumpimus: videri nobis nos plantam istiusmodi jam vidisse in horto Titii; pro certo tamen id asseverare minime posse. Respondet etiam eadem casus alter agnatus, quo affirmamus, nos aliquid vidisse in horto Titii, sed quid fuerit non recordari. Prior nimirum casus obtinet, quando idea plantæ vi imaginationis producta vegetabile quodpiam in genere exhibet; casui autem posteriori locus est, quando objecti in horto visi idea nonnisi ens in genere refert.

Immiscet sese hisce memoriæ atque imaginationis actibus cognitio symbolica, de qua inferius suo loco dicemus. Quamobrem qui experimentum eorum, quæ hic stabilimus, in seipsis capere volunt; illi probe attendere debent, num quid cognitionis symbolicæ subsit. Sane non exiguus attentionis gradus, nec acumen leve requiritur, si quis vel quotidie in anima sua observanda ad notiones distinctas revocare voluerit, notiones confusas evoluturus & quid in obscuris lateat conjectando assecuturus. Ubi quis Psychologiæ & Ontologiæ assiduam navaverit operam ac methodi vim perspexerit & in potestatem suam redegerit; is sensim sensimque illam attentionem illudque acumen acquireret, plurimum sibi in philosophiæ moralis, tam theoria, quam praxi profuturum.

§. 224.

Si rem ante ſenſu perceptam ſenſu denuo percipis, & in Quando u-
idea ſocia obſcura aliquid claritatis eſt ideæ partiali ejusdem rei, trumque
nec non ideæ partiali rei cujuſdam alterius antea cum præſente contingat.
ſimul perceptæ; videris tibi rem, quam nunc ſenſu percipis, antea
percepſiſſe quodam in loco, vel aliquo tempore, vel etiam cum re qua-
dam, an tamen præciſe hanc rem perceperis, & num hoc præciſe
in loco, vel hoc præciſe tempore, vel cum hac præciſe re eandem
perceperis, pro certo aſſeverare non potes. Quodſi enim rem
ante ſenſu perceptam ſenſu denuo percipis & in idea ſocia ob-
ſcura aliquid claritatis eſt ideæ partiali ejusdem rei per hypoth.
videris tibi rem antea percepſiſſe, utut certo affirmare non poſſis,
quod eam jam ante perceperis (§. 222.). Quoniam porro aliquid
etiam claritatis adhæret ideæ partiali rei cujuſdam alterius antea
cum præſente perceptæ per hypoth. & rem, quam nunc percipis,
videris tibi jam ante percepſiſſe per demonſtrata; rem, quam
nunc percipis, tibi percepſiſſe videris quodam in loco, vel aliquo
tempore dato, vel cum re quadam alia, utut non certus ſis,
quod eam præciſe in iſto loco, vel iſto tempore, vel cum re iſta
perceperis (§. 223.). Enimvero nec pro certo aſſeverare po-
teras, quod rem iſtam præciſe jam antea perceperis per demon-
ſtrata. Ergo videris tibi rem, quam nunc ſenſu percipis, an-
tea percepſiſſe quodam in loco, vel aliquo tempore, vel etiam
cum re quadam, an tamen præciſe hanc rem perceperis, & num
hoc præciſe in loco, vel hoc præciſe tempore, vel cum hac præ-
ciſe re eandem perceperis, pro certo aſſeverare non potes.

Confirmatur propoſitio præſens etiam a poſteriori.
 Etenim eidem reſpondet caſus, quo rem intuentes, quam percipi-
 mus, in hæc tandem verba erumpimus: videri nobis nos perſo-
 nam hanc vel rem præſentem vidiffe in horto Titii, etſi id pro
 certo aſſeverare non poſſimus, ſcilicet quod hanc præciſe perſo-
 nam, vel rem in horto præciſe Titii viderimus; ſed fieri poſſe,
 ut in utroque fallamur.

Atque

Atque ita casus singulos speciales contemplati sumus, in quibus anima in objectis denuo perceptis recognoscendis hæret (§. 219.). Quoniam obscuritas perceptionum vi imaginationis reproductarum in causa est (§. 222. & seqq.); oblivioni tribuendum esse apparet, quod subinde in rebus denuo obviis recognoscendis hæreamus (§. 220.). Et oblivio nos admonuit, ut hanc animæ in rebus recognoscendis hæitationem hic loci consideraremus.

§. 225.

*Diversi
gradus hæ-
sitationis
animæ in
recognos-
cendis re-
bus.*

Quoniam ideis particularibus, ex quibus sociæ constat (§. 221. 40.), diversi convenire possunt obscuritatis gradus, prout plus vel minus claritatis iisdem inest, seu in rebus obscure perceptis plura vel pauciora insunt, quæ clare percipiuntur (§. 33.); hæsitatio autem animæ in objectis recognoscendis ab idearum istarum obscuritate pendet (§. 222. & seqq.); hæsitatio animæ in rebus recognoscendis pro diverso obscuritatis ideæ sociæ gradu diversi sunt gradus.

Experientia corollarium hoc generale propositionum præcedentium abunde confirmat. Quodsi enim attendere velimus ad eos casus, in quibus recognitio rerum antea perceptarum dubia nobis est; non aliam, quam obscuritatem ideæ sociæ hæsitatiois causam esse intelligemus, ita ut nunc magis, nunc minus hæsitemus, prout major, vel minor fuerit illius obscuritas. Equidem haud difficile nobis foret diversitatem obscuritatis ideæ sociæ ad differentias quasdam generales revocare ac pendentem inde animæ in rebus recognoscendis hæsitationem diversam distincte explicatam demonstrare: sed non consultum nobis videtur tanta uti prolixitate, ubi generalibus contenti esse possumus, quibus excitatur & juvatur acumen in ceteris per se videndis, quando occasio eorum observandorum nobis sese offert.

§. 226.

*Rei quando
memineri-
mus.*

Rei meminisse dicimur, quando ideam ejus reproductam recognoscere valemus, consequenter nobis conscii sumus, nos eam jam antea habuisse (§. 173.).

E. gr. Narrat tibi Titius, qui peregre iter faciens te invisit, quod tecum in Academia aliquoties conversatus fuerit, provocans ad cir- cum-

constantias singulares. Quodsi horum omnium tibi probe conscius fueris, quod ita facta olim fuerint; respondes: te omnium probe meminisse. Reproducitur tibi ideas rerum antea factarum, quas tum, cum fierent, percepisti, aut, si mavis, ansam earum reproduendarum tibi suppeditat. Dum tibi conscius es, te illa olim percepisse, ideas reproductas recognoscis (§. 173.). Dicis igitur te eorum meminisse, quia ideam eorum reproductam adhuc recognoscis. Tandiu adeo rei cujusdam meminimus, quamdiu ideam ejus reproductam recognoscere valeamus. Facultas ideam reproductam recognoscendi memoria dicitur (§. 175.). Actum igitur memoriæ exprimimus dicentes, nos rei meminisse. Absentia hujus actus non semper oblivionem in casu dato denotat (§. 215.), adeoque nec quasi ejus actum exprimimus dicentes, nos rei non meminisse. Quamobrem consultum est ut adhuc exponamus, quid intersit inter hosce duos animæ status, quorum altero dicimus, nos rei non meminisse; altero vero affirmamus, nos ejusdem esse oblitos.

§. 227.

Rei non meminisse dicimur, quando nobis videmur eam antehac nondum percepisse. *Ast rei obliti* dicimur, quando nobis conscii sumus nos ideam ejus percepisse, eam vero nunc reproducere non possumus. *Quando rei non meminisse & oblivisci dicamur.*

Nimirum oblivio denotat impotentiam ideas reproductas recognoscendi (§. 215.) easque reproducendi (§. 216.). Non igitur ante cognoscimus nos rei fuisse oblitos, quam impotentia hujus nobis conscii sumus (§. 48. Log.). Enimvero impotentia hujus nobis conscii esse non possumus, nisi nobis conscii simus, nos rem istam vel olim percepisse, quam tamen nunc recognoscere non valeamus, vel ejus nunc ideam reproducere minime possumus. Ut appareat, quomodo id fieri possit, paulo distinctius id nobis erit exponendum. Ponamus te vidisse crocodilum, atque meminisse, quod crocodilum videris, beneficio cognitionis symbolicae, de qua postea dicemus, quatenus nempe memoriam habes horum verborum: Vidi crocodilum. Enimvero si jam sermo incidit de crocodilo & ex te quaerit aliquis, qualis iste fuerit, ejus autem ideam reproducere non vales; vel si quis tibi monstrat animal, cui istud nominis convenit, tu vero idem recognoscere non potes, non tibi conscius utrum crocodilus, quem

(Wolffii Psychologia.)

quem vidisti, tale animal fuerit, nec ne; te oblitum esse ais, quale animal fuerit crocodilus. Ast si tibi nec conscius es, te crocodilum aliquando vidisse, immo dubitas, urum videris, nec ne; te non meminisse affirmas, quod unquam videris crocodilum. Satus hos animæ esse a se invicem diversos, nemo non videt, eosque cum ratione distingui non minus in propatulo est.

§. 228.

*Quid sit in
memoriam
revocare.*

Res illa, quæ jam percepta perceptioni alterius reproducendæ inservit, eam nobis in memoriam revocare dicitur. Atque hinc affirmamus, quod alter nobis in memoriam quid revocet, si in nobis producit ideam, cujus ope altera reproducitur.

E. gr. Videns Sempronium, quem ante in nundinis videras, nundinarum meministi rerumque ibi visarum & a te gestarum. Persona igitur Sempronii tibi nundinas atque res ibidem visas & a te gestas in memoriam revocat. Quodsi Sempronium non vidisses, nec nundinæ cum rebus ibidem visis atque gestis in memoriam venissent. Quodsi vero ponas Titium loqui vel de Sempronio, vel de ipsis nundinis atque audito sermone in te nascatur idea Sempronii ac inde porro idea nundinarum rerumque ibidem visarum & gestarum; Titium personam Sempronii & nundinas cum rebus ibidem visis ac gestis tibi in memoriam revocasse affirmas.

§. 229.

*Difficultas
ideas re-
producendi
& reprodu-
ctas reco-
gnoscendi.*

Subinde ideam rei una cum re præsentæ reproducere non possumus, vel etiam ideam rei antea perceptæ reproducendam recognoscere non valemus; sed ejus ope reproducimus ideas rerum aliarum simul perceptarum & harum demum subsidio ideam illam, quam reproducere non poteramus, reproducimus, vel, quam recognoscere non poteramus, recognoscimus. Quoniam obvia experientia utrumque manifestum est, ad exempla provocasse sufficit, quibus excitatur attentio, ut unusquisque eadem in seipso observare queat & notio propositioni præsentī respondens clarior reddatur. Ponamus te vidisse Titium in templo & posthac de eodem sermonem incidere, quod in templo præsens fuerit. Vi autem ideæ templi;

quæ

quæ audito nomine ab imaginatione producitur, ideam Titii reproducere nequis, quemadmodum per legem imaginationis fieri debere videbatur (§. 117.). Dum vero aciem mentis in ideam templi intendis; recurrunt ideæ personarum aliarum in templo visarum, in mentem veniunt cogitationes, quas eadem respiciens fovisti, & tandem eandem quoque subit idea Titii, in quem oculos te convertisse jam meministi, ubi cogitationes istas fovebas. Hic igitur templum & personam Titii simul percepisti: sed, dum templum denuo percipis, idea ejus vi imaginationis reproducta, non tamen simul reproducitur idea Titii, etsi eam reproducere intendas. Enimvero vi ideæ templi reproducuntur successive ideæ rerum aliarum, scilicet aliarum personarum visarum & cogitationum mentis, quas habuisti, donec tandem succedat Titii quoque idea, quam initio reproducere non poteras immediate ope ideæ templi. Eodem modo sese res habet in casu altero. Ponamus te vidisse in horto Mevii plantam quandam exoticam, & posthac eandem plantam denuo videre in horto Caji. Sempronius monet plantam hanc esse eandem, quam in horto Mevii jam videras; sed quod eandem videris minime meministi. Dum constanter asseverat Sempronius, te eandem plantam in horto Mevii jam vidisse; mentis aciem in hortum Mevii dirigit, vi imaginationis repræsentatum. Succedunt variarum rerum ibidem visarum ideæ, in quarum serie dum contineri quoque animadvertis plantam, quam præsentem contueris, subito eam recognoscis & Sempronio jam assentiris, quod eadem sit, quam videras in horto Mevii. Hic ideam rei antea sensu jam perceptæ, quando eam denuo percipis, non recognoscis, etsi subeat mentem idea rei antea simul perceptæ, quemadmodum per legem memoriæ fieri debere videbatur (§. 174.). Enimvero ope ideæ rei simul perceptæ reproducis reproductasque recognoscis rerum aliarum tunc temporis quoque

perceptarum ideas, atque earum tandem auxilio eam recognoscis, quam initio recognoscere non poteras.

Non inquirimus in rationem, cur id fiat, etsi manifesta sit superiorum gnaris. Nimirum ideæ junguntur potissimum actibus reflexis mentis, atque adeo non omnia simul percepta ita inter se connexa sunt, ut unius idea reproducta reproducatur etiam altera, si præsertim non sæpius simultanea perceptio iteretur, ubi recognitio quoque actuum reflexorum numerum ingreditur. Plenior adeo lux hisce affulget ex sequentibus, ubi de actibus reflexis mentis plura dicemus ex instituto.

§. 230.

Reminiscencia de finitio

Perceptionum præteritarum mediata reproductio & recognitio, aut, si mavis, facultas perceptiones præteritas mediate reproducendi & recognoscendi *Reminiscencia* dicitur. Vocatur etiam *Recordatio*.

Ita in exemplis anterioribus (§. 229.) reminisceris, te Titium, de quo sermo est, vidisse in templo, quem te ibidem vidisse meminisse non poteras. Similiter reminisceris te plantam, quam in horto Caji vides, in horto Mevii jam vidisse: id quod meminisse non poteras, cum Sempronius te admoneret.

§. 231.

Reminiscencia medium

Quoniam dum reminiscimur rei alicujus, vel ejusdem recordamur, ejus ideam mediantibus aliis reproductis reproducimus & recognoscimus (§. 229.); dum rei cujusdam reminisci volumus, ad circumstantias loci & temporis aliasque res tum præsentis, quando eam percepimus, vel alias eidem similes, affines aut contrarias attendimus.

Utimur eodem medio, quoties alter recordari nequit eorum, quæ ipsum meminisse volumus. Atque eodem modo etiam utimur locis in tabulis mnemonicis, quoties non satis fidelem experimur memoriam in iis, quæ per tabulas mnemonicas disposita sunt, quemadmodum intelligitur ex iis, quæ de iisdem proposuimus in Floris subsecivis A. 1730. Trim. æstiv. num. III. Medium hoc re-

mi-

miniscentiæ notissimum est, atque vulgo adhibetur ab omnibus: responder enim corollario præsentis notio communis, quæ per experientiam domesticam ingeneratur omnium hominum animis. Hinc *Goclenius* in Lexico philosophico recordationem seu reminiscentiam definit per simulacri amissi instaurationem, quæ sit discursu ab uno principio noto ad aliud ignotum & consideratione circumstantiarum temporis præsentis, quo per sensum vel per intellectum res cognita est, vel similem & affinium, vel contrariorum. Appellat is simulacrum ideam vi imaginationis productam, quam supra phantasma diximus. Refert autem reminiscentiam etiam ad cognitionem symbolicam, de qua nos demum paulo inferius dicemus. Simulacrum amissam esse affirmat, quatenus ideam rei reproducere non valeamus, dum volumus.

§. 232.

Quoniam eorum, quæ reminiscimur, ideam reproducere vel reproductas recognoscere non valeamus, sicuti ceterorum, quorum meminimus (§. 229. 230.), eorum obliti nobis videmur (§. 215.). Quia tamen mediantibus perceptionibus præteritis aliis ideas istas tandem reproducimus & recognoscimus (§. 230.); dum rei reminiscimur, eam recognoscere nobis videmur, quam obliti fueramus.

*Recognitio
rei oblivio-
ni tradita.*

Hinc apud *Goclenium* in Lexico philosophico Reminiscencia seu recordatio etiam definitur, quod sit recognitio rei, quam homo oblitus est. Nempe homo denuo cognoscit, quod cognoverat ante, sed oblitus fuerat, novitque se id denuo cognoscere. Eius enim videri possit *Goclenium* per recognitionem tantummodo intelligere iteratam cognitionem, dum oblivionem factam esse dicit propter simulacri rem representantis amissionem & recognitionem fieri ait per simulacri amissi instaurationem; non tamen iteratæ cognitionis apperceptionem excludere potest, quippe ita in præsentis casu cogitationibus nostris adhaerentem, ut ab iis eandem separari impossibile sit. Rectius tamen alii species sive ideas rerum dixerunt testas, quam amissas, ideo reminiscentiam definientes per disquisitionem testarum specierum.

S. 233.

*Scholion
generale.*

Et hactenus quidem dicta sufficiant de facultatis cognoscitivæ parte inferiori, quatenus eam a posteriori agnoscimus. Progrediendum igitur nunc erit ad partem quoque superiorem, quatenus eadem experientia magistra cognoscitur. A parte inferiori ad superiorem non progressus fit per saltum, sed per gradus intermedios, quos tamen rectius ad sectionem secundam rejicimus. Quoniam gradus isti inter utramque partem intermedii sunt, ideo fieri non potuit, quin jam in præsentè sectione, in notis præsertim, eorum subinde fieri debuerit mentio, cum per notiones communes confusas satis intelligantur, etsi jam instituti ratio postulet, ut eos quoque distinctè explicemus.



SECTIO

S E C T I O I I I .

DE

FACULTATIS COGNOSCENDI
PARTE SUPERIORI.

CAPUT I .

De Attentione & Reflexione.

§. 234.

Efficere possumus, ut in perceptione composita partialem unam *Apperceptionem* magis appercipiamus, quam ceteras. Hoc unusquisque *nis dependentia a nostro arbitrio.* quovis momento in se experiri potest. Intuere quæso faciem hominis; videbis frontem, oculos, genas, nasum, os & mentum simul & tibi conscius eris, quod singulas hæc partes uno obtutu comprehendas: oculis enim a facie averfis, dum quærenti, quid videris, respondes, te faciem hominis & in ea singulas istas partes vidisse, confiteris. Enimvero fieri posse deprehendis, ut faciem alterius intuens magis tibi conscius sis oculorum, quam ceterarum partium faciei. Similiter ponamus te simul videre objecta in templo præsentia & verba concionatoris audire; ponamus porro te etiam æstum percipere, quo fervet ær. Fieri a te posse deprehendes, ut magis tibi conscius sis verborum oratoris sacri, quam objectorum, quæ in oculos incurrunt, & æstus corpori molesti. Patet itaque a te effici posse, ut in iis, quæ simul percipis, unius tibi magis sis conscius, quam ceterorum, consequenter ut in perceptione composita partialem unam magis appercipias, quam ceteras (§. 40. 25.).

Videmus itaque apperceptionem pendere aliquatenus a potestate nostra.

§. 235.

§. 235.

*Diversitas
claritatis
in simul
perceptis.*

Dum perceptionem partialem magis appercipimus quam ceteras, quæ in eadem totali continentur; ea nobis ceteris clarior est. Quando enim perceptionem quandam partialem magis appercipimus, quam ceteras, quæ in eadem totali continentur; magis nobis ejusdem conscii sumus, quam ceterarum (§. 25.). Quodsi ejusdem magis conscii sumus, quam ceterarum; rem quoque per eam repræsentatam (§. 24.) magis agnoscimus ac ab aliis perceptibilibus distinguimus, quam ceteras per ceteras perceptiones repræsentatas. Perceptio igitur partialis, quam magis appercipimus ceteris, clarior nobis est ceteris, quæ una cum ipsa in eadem perceptione continentur (§. 31.).

Non solum hoc obtinet in rebus sensu perceptis, verum etiam in iis, quæ vi imaginationis percipiuntur. Immo valet etiam, quatenus mens seipsam percipit ac operationum suarum sibi conscia est. Præterea locum habet in omni rerum cognitione, sive ea intuitiva fuerit, sive symbolica. Non e longinquo hic petenda probatio, cum domestica unumquemque experientia, eaque admodum obvia, id docere possit.

§. 236.

*Anima potest
in claritatem
perceptionum.*

Quoniam efficere possumus, ut in perceptione composita partialem unam magis appercipiamus, quam ceteras (§. 234.); dum autem perceptionem partialem magis percipimus quam ceteras, quæ in eadem totali continentur, ea nobis ceteris clarior est (§. 235.); *efficere utique possumus ut in perceptione composita partialis una majorem claritatem ceteris habeat.*

Patet adeo esse aliquam animæ in claritatem perceptionum potestatem eandemque ab arbitrio ipsius pendere aliqua ex parte.

§. 237.

*Attentionis
definitio.*

Facultas efficiendi, ut in perceptione composita partialis una majorem claritatem ceteris habeat, dicitur *Attentio*.

Po-

Ponamus e. gr. nos simul percipere verba loquentis, videre præterea objecta in eo, quo sumus, loco præsentia & oculis nostris opposita, percipere etiam calorem, quo abundat aer in eodem loco. Quodsi perceptiones istas simultaneas inter se compares, non eodem gradu claritatis omnia simul percipi animadvertes. Quodsi enim verba loquentis probe agnoscis eaque a se invicem distinguis; non æque tibi conscius es objectorum, quæ lumine suo oculos feriunt, immo subinde caloris prorsus non tibi conscius es. Tum vero dicis te attendere ad verba loquentis: immo quasitus annon hoc vel illud in objecto præsentem animadvertas, autan non calor molestus tibi accidat; respondes, te jam ad objectum istud & calorem non attendere, attendere autem ad verba loquentis, significaturus scilicet te illud in objecto non animadvertere, nec calorem admodum clare percipere, atque hoc ipso rationem redditurus, cur id fiat. Hinc non modo apparet definitionis præsentis realitas, quæ per præcedentia jam satis manifesta; verum etiam intelligitur vocabulum attentionis sumi a nobis in significatu recepto: sit ita quod aliter videatur illis, qui notionem, quæ ipsis est, consulam nunquam ad distinctam revocarunt.

§. 238.

Sensatio impedit, quo minus ad phantasma simus attentus, Impeditur et sensatio fortior impedit, quo minus ad debiliorem simus attentus. Phantasmata vi imaginationis producuntur (§. 93.), adeoque per actus imaginationis subsistunt. Quoniam itaque sensationes actus imaginationis obscurant, ita ut hos subinde prorsus non appercipiamus (§. 99.); impediunt utique, quo minus phantasmatis magis nobis conscius simus, quam rei sensu perceptæ (§. 25.), consequenter quo minus efficiamus, ut phantasma nobis fiat clarius ideis sensualibus. Impediunt itaque quo minus ad phantasma simus attentus. Quoniam sensatio fortior obscurat debiliorem, ita ut subinde debiliorem prorsus non percipiamus (§. 76.); eodem, quo ante, modo pater sensationem fortiolem impedire, quo minus ad debiliorem simus attentus.

Idem confirmatur a posteriori. Ponamus te vi imaginationis
(VWolffii Psychologia.) Y natio-

nationis tibi repræsentare imaginem *Mosis* in templo visam & ad eam attendere. Quodsi objectum aliquod præsens in oculos incurrit, v. gr. arbor vicina, dum in hortum prospicis; attentionem ad imaginem illam deficere experieris, ad arborem nunc directam nonnisi difficulter ad illam retrahi, præsertim ubi attentionem nondum in potestatem tuam redeigisti. Impedit igitur in hoc casu sensatio attentionem ad phantasma afferendam. Similiter visum claritate sua vincere sensationes ceteras constat. Orator ad verba, quæ recitat attentus, ubi oculum convertit in personam, deficere sentit attentionem ad sermonem suum.

Propositioni huic notio communis responder: unde audias vulgo omnes conqueri, sese non posse ad rem præsentem esse attentum, si organa sensoria ab objectis sensibilibus feriuntur.

§. 239.

Quomodo tollantur.

Quare si ad phantasmata attentum esse velimus; ne objecta externa in organa sensoria agant, impedimus. Ita claudimus oculos, ne in eos incurrere possit objectum præsens, dum attentionem ad imaginem ejus conservare volumus, quod alibi nobis visum meminimus. Idem a nobis fieri solet, ubi majorem ad operationes mentis attentionem conservare voluerimus.

Videmus subinde oratores & concionatores clausis oculis orationem recitare, ne objecta visibilia impediant attentionem ad ea, quæ verbis proferunt. Alii oculos ab auditoribus avertunt, ne eorum conspectu ab attentione avocentur. Tacemus exempla alia, quæ unusquisque posthac facile per se agnoscet, ubi attentione usus principium præsens applicat, aut, si mavis, eruere studet.

§. 240.

Attentio quando facilius, quando difficilius conservetur.

Quoniam sensatio impedit, quo minus ad phantasma sumus attentum, & sensatio fortior impedit, quo minus ad debiliorem sumus attentum (§. 238.); attentio facilius conservatur, quando pauca in sensus externos agunt; difficilius vero, quando multa simul, præsertim fortiter, in organa sensoria agunt.

Inde

Inde est, quod aurora dicatur Musis amica, quoniam matutino tempore pauca sunt objecta, quæ in organa sensoria agunt, cum nondum ferveat solis æstus, ær strepitu hominum non resonet, nec corpus sit sibi in seipso molestum, quemadmodum a prandio præsertim fieri solet. Accedunt rationes aliæ ab imaginatione, quæ ex sequentibus patent. Pater per se auroam non esse Musis amicam, si eo fueris in loco, ubi primo statim mane multus hominum strepitus esse solet, aut ubi sedes in conclavi, in quo calidus nimium ær molestus. Ceterum ex eadem ratione multi eruditorum lucubrationes amant, quæ tamen aliis incommodis premuntur.

S. 241.

Si multa phantasmata in imaginatione continuo sibi invicem succedunt; attentio difficulter conservatur. Quod si enim multa phantasmata in imaginatione continuo sibi invicem succedunt; nova continuo nobis objiciuntur objecta, quorum nobis conscius sumus. Quare ubi ad ea attendimus, cessat attentio ad objectum, ad quod eandem conservare constitueramus. *Attentio ab imaginatione impedita.*

Patet idem a posteriori. Ponamus enim te heri fuisse in frequentia multorum hominum ac interfuisse convivio lauto atque opiparo, ubi ad singula probe attendisti. Cras meditaturus in mentem veniunt idæ hæsternæ dici: experieris, quam difficile sit mentem conservare attentam ad ea, quæ meditaris, ubi præsertim (quod hic supponitur) attentionem ad gradum quendam eximium exercitatione nondum evexeris, quemadmodum fieri posse mox docebimus.

Casus sunt complures alii, ubi idem experiri licet. Quod si multæ in imaginatione continuo sibi invicem succedant idæ, atque his fueris intentus; non audis, quæ ab Oratore sacro dicuntur, etsi verba in aures incidunt, teque eadem audire tibi videris. Impossibile nimirum est, ut apertis auribus non audias: enimvero quoniam deest attentio ad ea, quæ audis, quid audias tibi probe conscius non es, adeoque multo minus quid audiveris recordari potes. Imaginatio sane non minus turbat attentionem, quam sensus: quod enim sensus efficit claritate, id imaginatio variatione ac novitate idearum.

§. 242.

*Concursus
sensuum at-
que imagi-
nationis in
impedienda
attentione
& imagina-
tionis ea in
re a sensu
dependen-
tia.*

Quoniam phantasmata oriuntur pravia sensatione (§. 106.), quatenus repræsentant res cum iis, quæ sensu percipiuntur, antea simul perceptas (§. 117.) ; ubi objecta multa in sensus agunt, vi imaginationis quoque multorum objectorum absentium idæ reproducentur, & eorum ope in continua serie continuantur, ubi attentionem animæ ad se trahunt (§. 104.): *Sensus atque imaginatio in impedienda attentione vires mutuas conjungunt & imaginatio a sensu excitatur.*

Unusquisque hæc in seipso experiri potest, quamprimum sensus attentionem ad se trahit, eandem postea imaginationi nova continuo suggerenti inhærere. Sensus claritate sua attentionem ab objecto, ad quod ea dirigitur, avocant & imaginatio vi dependentiæ a sensibus eam in tramite retinet, donec a sensu denuo aliorum flectatur, vel vi operationum mentis in viam pristinam reducarur.

§. 243.

*Gradus at-
tentionis.*

Aliorum attentio tanta est, ut vix ac ne vix quidem percipiant objecta, quæ organa sensoria feriunt; aliorum attentio minor est, ut statim appercipiant objectum, quod vel leviter organum sensorium ferit. Posterius frequentissimum est atque vulgo obtinet, ita ut non opus sit exemplis specialibus idem confirmari (§. 666. Log.). Prius autem non experiuntur in se nisi illi, qui longis, perplexis atque abstrusis meditationibus sunt adfuerunt. Exemplo nobis est Petrus Remundus de Monmort, Mathematicus Gallus, qui, referente Fontenellio in Elogio, quod legitur in Historia Academiæ Regiæ Scientiarum A. 1719. p. 115. edit. Bat. inter plurimos strepitus resolutionibus problematum admodum perplexorum incubuit. In eodem conclavi, quo meditationibus vacabat, pulsabantur instrumenta musica, filiulus hinc inde cursitabat & patrem interpellabat, problematum difficultum solutionem ad finem perducebat. Testatur autem experientia, quod tanta attentione utentes ad objectum præsens, non sint sibi consciï eorum, quæ sensu percipiunt,

ciunt, & sese excusare, quod hoc vel istud non audiverint, seu non viderint, quod non attenderint.

Gradus hic in aliis major est, in aliis minor: in omnibus haud quam idem. Quamobrem ubi quis ad exempla animum adverterit, varietatem ea in re obviam deprehendet. Cavendum vero ne ex uno exemplo judicemus de eo, quod in omni casu obtinet, aut obtinere debet. Diversitas graduum hic dependet a diversa obfuscatione idearum sensualium. Sed nascitur quoque aliunde: quemadmodum propositionibus sequentibus docere volumus.

§. 244.

Alii attentionem ad idem objectum diu conservare possunt; aliorum attentio statim expirat. Exemplum nobis præbent illi, qui Mathesi vel philosophiæ operam navant. Sunt enim nonnulli, qui attentionem conservare possunt, etiamsi demonstrationes fuerint longæ, atque perplexæ: alii ex adverso eam statim desiderare patiuntur, ubi longa evadit ratiociniorum concatenandorum series. Attentionis singularis exempla hic nobis præbent *Clavius & Vallisius*. Quanta fuerit attentio *Clavii*, ex solo Mathematici hujus opere de Astrolabio intelligitur, quod Operum Tomo tertio legitur: etenim schemata tam implexa sunt ac intricata, demonstrationes tam prolixæ, ut *Tacquetus* Opticæ lib. 3. f. 178. sibi persuadere minime possit, quod ullus unquam mortalium volumen istud totum perlegerit. Testatur idem opus ejus *Gnomonicum*, quod Tomo quarto Operum continetur: in eo enim demonstrationes non minus sunt prolixæ, schemata non minus implexa ac intricata, ut adeo exercendæ patientiæ in conservanda attentione inservire possit. Quamdiu *Vallisius* attentionem suam conservare potuerit, *Mechanicorum* sive *Tractatus de motu* pars secunda, quæ est de centro gravitatis ejusque calculo & Operum Vol. II. f. 643. & seqq. legitur, satis intelligitur. Legat enim, cui volupe fuerit & qui talibus intelligendis par est, vel unam propositionem, quæ sola aliquot folia occupat, &

Alius attentionis gradus.

adjunctam prolixissimam demonstrationem, nec dubitabit amplius de *Wallisii* in diu conservanda attentione patientia summa.

Quod vero non omnibus datum sit attentionem tam diu conservare, quamdiu *Clavius* & *Wallisius* eandem conservare potuerint; haud difficulter probatur. Videmus enim, plerorumque attentionem initio studii mathematici deficere, si brevem aliquam demonstrationem concipere debeant. Et *Tacquetus* judicavit, paucissimorum attentionem fore tam diuturnam, ut demonstrationibus *Clavianis* de Astrolabio polari perpendendis sufficiat.

Habemus hic alteram attentionis mensuram, tempus scilicet, per quod ea continuatur.

S. 245.

*Gradus attentionis
alius.*

Alii ad plura simul attenti esse possunt; alii nonnisi ad unum. Posterius plerique in se experiuntur, observantes quod attenti ad ea, quæ vident, non simul attenti esse possint ad ea, quæ audiunt, aut alio sensu percipiunt. Quod si attentionem inter plura dividere voluerint; minorem esse ad singula sensum deprehendunt. Non desunt tamen exempla eorum, qui ad plura simul attendere possunt, ita ut eorum æque sibi consciï sint, sive objecta attentionis referantur ad unum sensum, sive ad diversa. Exemplo hic nobis est *Julius Cæsar*, quem eodem tempore, quo ipse epistolam scripsit, quatuor quoque aliis epistolas dictare potuisse constat, immo, qui septem epistolas diversas eodem tempore dictare potuit, si ipsemet nullam scriberet.

In hoc Cæsaris exemplo singularis quoque memoriæ vis elucet: unde vulgo ad probandum vim memoriæ ejus prorsus singularem factum hoc adduci solet. Merentur istiusmodi exempla, quæ eximias animæ corporisque dotes ac virtutes loquuntur, in usum psychologicum annotari, quibus monumenta Historicorum perlostrandum superpetit, cum plus iisdem ordinarii insit, quam quidem vulgo putatur. Neque enim rarissima sunt exempla, quod pauci istiusmodi

do.

dotium ac virtutum sint capaces, sed quod pauci dentur, qui de iisdem sibi acquirendis sunt solliciti. Ceterum de iis, quæ de diversis attentionis gradibus docemus, in genere tenenda sunt, nobis jam non propositum esse nisi ostendere, quod plures dentur attentionis gradus: nondum autem inquirimus, quanam sint eorundem graduum rationes. De his enim hic loci defectu principiorum dicere nondum licet. Utile autem est nosse, quanam sint in gradibus attentionis assequendis attendenda, ne de ea præcipitemus iudicia & ne in ea perficienda desiderari patiamur industriam nostram. Maximi enim fieri debet attentio ob multiplicem ejus, quem experimur, usum. Raritas illius attentionis gradus, de quo propositio præsens loquitur, peperit verbum istud vulgatum: *Pluribus intentus minor est ad singula sensus.*

§. 246.

Alii eandem attentionem offerre possunt ad objectum Alius at-
quodcunque; alii ad quædam nullam prorsus, ad alia vix le-
tem quandam offerunt attentionem. *Exempla, quibus propo-*
sitio præsens confirmatur, inter viros doctos inprimis obvia
gradus.
 sunt. Prout enim unumquemque sua trahit voluptas, attentione quoque sua utitur. Ita Poëtæ attentione utuntur ad versus, quos legunt, & ad objecta, quorum notiones in fundendis versibus utilia sunt; ad alia difficile ipsis est eandem adhibere attentionem. Geometra stupenda uti potest attentione ad calculos algebraicos & figuras geometricas: quodsi versus legere debeat vel alia, quæ sunt a foro suo aliena, et si ea intelligere possit, attentionem tamen ad ea vix ac ne vix quidem aliquam afferre potest. Ita memini me adolescentem cognovisse virum quendam eruditum, qui continua utebatur attentione ad sermones sacros promiscue omnes eaque constanter eadem, qualiacunque tandem proferret concionator, cum ceteris auditoribus non perinde esset, quinam suggestum conscenderet. Multorum eruditorum is mos est, ut in musæo suo ad lectionem librorum & meditationes suas sufficientem afferant attentionem.

tionem; sed ad vitæ negotia, res domesticas & ea, quæ ad cultum corporis spectant, nullam.

Influit hic in determinationem attentionis appetitus: de quo influxu suo loco dicemus. Pertinet huc illud Poëtæ: Trahit sua quemque voluptas. Hoc ipso enim ratio determinans attentionis ad objecta indigitatur.

§. 247.

Alius attentionis gradus.

Alii ad rem præsentem, quæcunque tandem fuerit, omnem afferre possunt atque solent attentionem: alii animum semper habent absentem, nisi objectum fuerit præsens, ad quod attentionem adhibere adsueti sunt. Exempla inprimis inter eruditos obvia sunt. Pertinent huc illi, de quibus ante dixi (§. 246.), qui in musæo suo sunt attentæ; sed ad res domesticas, vitæ negotia cultumque corporis attentionem afferre nequeunt. Hi enim plerumque animum semper habent in musæo præsentem, attendentes ad ea, quæ de rebus literariis suppeditat memoria vigore imaginationis. Exempla quoque obvia sunt inter artifices. Dantur enim aliqui, quos præter artem, quam colunt, nihil juvat, atque adeo quæ sunt artis continuo ipsis præsentia sunt & attentionem eorum in se trahunt, ut nunquam habeant animum ad alia præsentem. Sunt etiam e sexu præfertim sequiori, quas Venus vexat, omnem in se attrahens attentionem, quam adeo desiderari patiuntur in omni negotio.

Plurimum utilitatis habet animus ad omnia præsens: plurimum vero obest, si quis animo constanter absens fuerit. Utilitas suo tempore in moralibus elucescet. Ex defectu attentionis ad rem quamlibet præsentem constanter afferendæ culpa oritur, quam Moralistæ & Jæti in actionibus humanis dolo opponunt, & qua plurimum damni datur aliis, plurimum quoque damni arcessunt sibi metipsi agentes. Quemadmodum itaque attentionis gradus aliis in cognitione rerum utiles sunt; ita ex adverso is, de quo jam nobis sermo est, potissimum in actionum liberarum legitima ac prudente determinatione locum habet,

§. 248.

Gradus attentionis exercitatione comparantur. Infantes recens nati ad nihil prorsus attenti sunt, sed successive illorum ad objecta nonnulla excitanda attentio est, atque ita demum ad aliqua attendere adsuescunt. Etsi autem successu temporis ad objecta nonnulla attendere discant; levis tamen tantummodo eorum attentio est, nec provectiore ætate ad eximium quendam gradum promovetur, nisi actus ad eum spectantes sapius iterentur, adeoque exercitia præcedant (§. 195.). Sane *Monmortius*, *Clavius* & *Wallisius*, *Julius Cæsar* aliique non pervenere ad eos attentionis gradus, nisi attentione sapius exercita in diversis istis circumstantiis, quas paulo ante annotavimus (§. 243. & seqq.). Insigne attentionis exemplum præbet *Archimedes*, qui meditationibus geometricis intentus, cum urbe ab hoste capta miles in conclave ingressus ad eum accederet gladio virum divinum perfoffurus, eum non agnovit, sed famulum suum esse ratus in hæc verba erupit: noli turbare circulos. Constat autem ex scriptis *Archimedis*, quod meditationibus profundissimis fuerit adsuetus, & ex historia, quæ *Vitruvius lib. 9. c. 3.* de invento ejusdem portionem argenti auro mixtam in integro opere deprehendendi ac discernendi narrat, colligitur quod habuerit animum ad præsentia quævis attentum, etsi alias meditationibus suis constanter inhæreret. Etenim ab *Hierone* Rege jussus portionem argenti aureæ coronæ a fabro mixtam in integra discernendi modum excogitare, cum casu in balneum veniret ibique in solum descenderet, animadvertit, quantum corporis sui in eo insideret, tantum aquæ extra solum effluere, atque adeo non ita inhæsit suæ meditationi, qua tunc animus ejus distinebatur, quin simul attenderet ad præsentia & pro acumine suo attentionem ad abstracta in concretis contenta promoveret. Solum igitur *Archimedis* exemplum probat, quam necessaria sit ad attentionis eximium gra-

Gradus at-
tentionis
comparandi
modus.

dum sibi comparandum exercitatio. Ceterum omnium omnino Mathematicorum exemplum veritatem propositionis præsentis confirmat. Nullum enim videris, qui attentione non vincat alios. Quilibet autem in seipso experiri potest, quod initio studii mathematici attentionis gradus sit exiguus, successu autem temporis continuo augeatur. Quodsi vero etiam inter alios eruditos atque artifices eximium quendam attentionis gradumprehendas; in omni casu ex eodem intelliges, quod eum non a natura habuerint, sed continuo usu eandem sibi comparaverint.

Plurimum refert nosse cum in genere, quænam in anima exercitio comparentur; tum in specie, quod attentio in eorum numero sit. Utrumque in Moralibus inprimis plurimum habet usum: id quod suo tempore suoque loco constabit. Enimvero cum diversi sint attentionis gradus; diversis quoque exercitiis opus est. Quamobrem nec omne attentionis genus studio Matheseos acquiritur, etsi idem in suo genere sit medium præstantissimum attentionem sibi comparandi. Quoniam itaque attentio maximam utilitatem habet, cujuscunque tandem gradus fuerit; a scopo præsentis non alienum est, ut jam porro in specie doceamus, quibusnam exercitiis unusquisque attentionis gradus acquiri possit.

S. 249.

*Modus acquirendi
potentiam
attentionis
inter impedimenta
sensuum
conservanda.*

Si quis attentionem inter multos strepitus, seu in genere inter vehementes objectorum in organa sensoria actiones conservandi sibi comparare voluerit; sæpius omnem adhibere debet conatum eandem inter strepitus sensim sensimque majores, vel actiones objectorum in organa sensoria sensim sensimque vehementiores ad objectum aliquod pro arbitrio conservandi. Quoniam enim non omnes inter eosdem strepitus, seu, in genere inter easdem actiones objectorum in organa sensoria conservare attentionem possunt; sed alii inter majores strepitus, alii inter minores tantum conservare valent, vel in genere aliis vehementior objectorum in organa sensoria actio non obstat, quo minus sint ad

ad rem suam attenti, aliis vero minus vehemens jam impedimento est (§. 243.); attentio unius instar partis attentionis alterius spectari potest (§. 341. *Ontol.*), consequenter attentio unius minor, attentio vero alterius major est (§. 352. *Ontol.*). Quare cum attentiones duorum subjectorum in hoc casu sint inæquales (§. 354. *Ontol.*); erunt quantitate diversæ (§. 350. *Ontol.*), consequenter attentio quantitatem habet. Enimvero quia attentio est animæ quædam facultas (§. 237.), in numero determinationum intrinsecarum animæ (§. 122. 545. *Ontol.*), adeoque qualitas animæ est (§. 455. *Ontol.*). Ergo potentia conservandi attentionem inter multos strepitus, seu vehementes actiones objectorum in organa sensoria est qualitatis cujusdam quantitas, consequenter gradus quidam (§. 747. *Ontol.*). Jam vero gradus attentionis exercitio comparantur (§. 248.). Ergo exercitio quoque comparatur potentia conservandi attentionem inter multos strepitus, seu vehementes quascunque objectorum externorum actiones in sensoria organa. Quoniam itaque exercitium in iteratione actuum specie vel genere eorundem consistit (§. 195.); si quis attentionem inter multos strepitus, seu in genere inter vehementes objectorum in organa sensoria actiones sibi acquirere voluerit, is sapius eandem inter strepitus, seu actiones vehementes objectorum in organa sensoria conservare debet. Et quia potentiam istam initio nondum possidemus, quam demum acquirere studemus; ideo incipiendum est exercitium ab iis casibus, ubi strepitus vel actio objecti in sensus attentionem impediens non est ingens; progrediendum vero continuo ad alios, in quibus strepitus fit major, vel actio in organa sensoria vehementior. Pars prior demonstrationis brevior fieri poterat hoc modo. Attentio qualitas animæ est, quod eodem, quo ante, modo ostenditur. Quare cum eadem in diversis subjectis differre possit potentia, qua conservatur inter strepitus vel actiones

Z

vehe-

vehementes objectorum in organa sensoria attentio (§. 243.); ipsa hæc potentia gradus attentionis est (§. 746 *Ontol.*), consequenter exercitio comparatur (§. 248.), si attentionem inter strepitus, seu actiones objectorum in organa sensoria pro arbitrio conservare studemus.

Nullum sane dubium est, quin *Monmortius*, quem eodem attentionis gradu instructum fuisse in superioribus observavimus, eandem exercitio fuerit consecutus. Ipsi enim veritatem propositionis præsentis in nobis experti sumus, nam cum initio turbaremur vel missitatione aliorum, nullum deinde obstaculum poni nobis potuit tubarum clangore & tympanorum sonitu.

§. 250.

*Diuturna
attentio
quomodo
acquiratur.*

Si quis attentionem diu ad idem objectum conservandi potentiam sibi comparare voluerit; is omnem conatum adhibere debet, ut sensim sensimque per temporis spatium longius conservet. Eodem prope modum modo idem ostenditur, quo propositionem præcedentem evicimus. Nimirum primo patet ut ibidem potentiam diu conservandi attentionem esse gradum quendam attentionis: deinde cum gradus attentionis exercitio acquiratur (§. 248.), inde porro colligitur, sæpius attentionem ac idem objectum conservari debere & quidem sensim sensimque per longius spatium.

Idem etiam confirmatur a posteriori. Neque enim *Clavius* & *Wallisius*, quos in hoc genere attentionis commendavimus, initio studii mathematici ea attentione uti potuere, qualis ad meditationes longas, intricatas atque perplexas absolvendas postea requirebatur. Unde videmus Matheseos theoreticæ studio acquiri facultatem attentionem per longum admodum temporis spatium conservandi absque omni radio atque molestia. Immo ipso facto docemur, si quis in Mathesi a minus intricatis ac perplexis ad ea continuo progrediatur, quæ magis intricata atque perplexa sunt, ejus tandem attentionem nec intricatis atque perplexis defatigari. Qui continuo lectioni
libro-

librorum incumbunt, illi non minus attentionis ad lectionem conservandi potentiam diuturno usu sibi compararunt. Similiter artifices in experimentando otium consumentes successive eam consecuti sunt attentionem, quam in experimentis capiendis adhibere solent. Idem loquitur exemplum artificum, quorum opera plurimum attentionis postulant ut rite perficiantur, & quorum animos sollicita cura tenet, ne quid in opere ab ipsis perfecto reprehendi possit.

Influit in hunc attentionis gradum appetitus multiplici modo ac plurimæ ipsius in hoc negotio sunt partes. Sed de his agendum erit suo loco, ubi influxum appetitus in attentionem ex instanti persequemur. Ceterum si quis in disciplinis diu conservandæ attentionis potentiam sibi comparare voluerit, ei nil quicquam magis ad donum hoc eximium consequendum prodest demonstrationum continuo longiorum evolutione & calculorum continuo prolixiorum ac intricatiorum tractatione. Hoc profecto medio tantum attentionis diu conservandæ gradum sibi acquisiverat *Varignonius*, Geometra Gallus eximius, ut singulare nobis in præsentē casu exemplum præbeat. Narrat enim *Fontenellius* in elogio, quod legitur in *Historia Academiæ Regiæ Scientiarum A. 1722. p. 192* edit. Bat. *Varignonium* lucubrationes suas sæpissime continuasse usque ad horam secundam matutinam, miratus sonitum campanæ horam secundam loquentis. Nimirum qui præsentē attentionis gradu excellunt, iis tempus præter omnem spem præterlabitur, quod nullam prorsus attentionem afferant ad rerum successionem, unde notio temporis nascitur (§. 572 *Ontol.*), sed omnem ad objectum applicent, cum quo ipsis negotium est. Enimvero *Varignonium* singularem hunc attentionis gradum non sine exercitio sibi acquisivisse, ex eo intelligitur, quod *Fontenellius* autor sit a prima juventute virum indolentem integros dies in studiis literariis consummisisse, spera omni recreatione, qua alius lassus refocillatur animus. Ceterum non minus ex iis, quæ idem *Fontenellius* narrat, colligitur, in attentionem *Varignonii* diuturnam influxisse appetitam; sed de eo suo loco nobis dicendum erit.

§. 251.

Modus ac-
quirendi
potentiam
partiendi
inter objecta
plura atten-
tionem.

Si quis ad plura simul attentionem adhibendi potentiam sibi comparare velit ; is sibi primum acquirat potentiam attentionem tamdiu ad idem objectum conservandi , quamdiu voluerit , immo etiam inter quascunque objectorum in sensus externos actiones ; deinde attentionem partiatur inter objecta duo , felicique progressu positus inter plura , quamdiu ipsi progredi datum fuerit . Patet eodem prorsus modo , quo supra (§. 249.) , potentiam partiendi attentionem inter objecta plura esse gradum quendam attentionis , consequenter exercitio comparari (§. 248.) , atque ideo opus est repetitis continuo actibus , quibus attentionem inter plura objecta simul partimur (§. 195.) . Enimvero antequam attentionem inter plura partiiri possis , necesse est ut eandem in eodem objecto pro arbitrio retinere & animum inprimis ab iis objectis , quæ sensus feriunt , revocare possis : id quod per se pater . Quamobrem primo potentiam diu conservandi attentionem (§. 250.) & inter quasvis objectorum in sensus actiones acquirere debes (§. 249.) .

Idem probatur a posteriori . Laudavimus supra (§. 245.) præclarum in hoc genere Julii Cæsaris exemplum . Hunc non sine exercitatione ad hunc attentionis gradum pervenisse colligo ex eo , quod ipsius ævo , quemadmodum ex Autore ad Herennium lib. 4. intelligitur , memoriæ artificiosæ una cum arte oratoria studuerint illi , quorum eadem erat , quæ Cæsaris , conditio . Exercitia autem , quibus memoria artificiosa comparatur , plurimum habent affinitatis cum iis , quibus potentia partiendi attentionem inter plura objecta comparatur , ut facilis sit a memoria artificiosa ad hanc potentiam transitus . Præterea vitæ genus , quod secutus est Cæsar , & circumstantiæ illorum temporum ad partiendum attentionem absque destinato consilio eum invitabant , ut adeo gradum istum attentionis acquirere potuerit , etsi de eodem acquirendo non cogitaret ;

ret; nec tale quid fieri posse ante agnosceret, quam dono isto prorsus singulari frueretur.

Ostendemus suo loco, quosdam casu incidere in exercitia, quibus habitus comparantur, atque præter omniem opinionem ac intentionem iisdem potiri, etsi alii plurimum laboris impendere debeant, ut eosdem consequantur. Idem obtinet in casibus aliis, in ipsa quoque veritate, quæ later, detegenda.

§. 252.

Si quis animum indifferentem ad quodlibet objectum efficiere velit, ut eandem ad quodvis attentionem offerre possit; is omnem adhibere debet conatum, ut ad objecta non modo quævis obvia, sed studio etiam quæsitæ, inprimis ad ea, quæ attentione sua indigna judicat, & a quibus quasi retrahitur animus, attendat. Indifferentia attentionis.
Eodem, quo supra (§. 249.), modo ostenditur, indifferentiam attentionis ad objecta quælibet obvia esse gradum quendam attentionis, consequenter exercitio comparari (§. 248.). Quamobrem cum hoc exercitium consistat attentione actuali ad objecta promiscue omnia, quæ sese nobis offerunt (§. 195.); si differentiam istam attentionis acquirere voluerimus, opera nobis danda est sedulo, ut objecta prorsus diversa in conspectum nostrum prodeant, vel animo nostro offerantur, & omnis conatus adhibendus, ut ad singula eadem attentio conserveatur, quamdiu nobis visum fuerit. Et quoniam difficilius conservatur attentio, si qua nobis tam abjecta videantur, ut infra attentionem nostram ea posita existimemus, aut si quæ talia sint, ut ab iis prorsus abhorreamus; in id potissimum nobis enitendum, ut attentionem nostram in istiusmodi objectis diu defixam detineamus: quod etsi initio molestum nobis accidat, tædia tamen aliquantisper devoranda sunt, donec nulla amplius in nobis repugnancia deprehendatur.

Quoniam huc plurimum conducit rerum diversitas continuo variata; non tam casui res committenda, quam destinato consilio quærenda sunt objecta, qualia ad attentionem nostram exercendam

[com-

commoda judicamus. Quilibet autem; si quidem attentione uti voluerit, in seipso experietur, in praesente casu appetitum multum influere in attentionem nostram. Quamobrem in exercitiis instituendis ab eo expectanda sunt subsidia. Plurimum in moralibus utilitatis habet attentionis identitas in negotiis levioribus & iis, quæ maximi momenti sunt. Atque ideo in hoc gradu attentionis comparando utiliter admodum opera collocatur.

§. 253.

*Præsentia
animi quo-
modo ac-
quiratur.*

Qui indifferentiam attentionis ad objecta quælibet sibi comparat, eadem industria acquirere potest potentiam ad rem præsentem, quæcunque tandem fuerit, omnem afferendi attentionem. Etenim qui indifferentiam attentionis ad objecta quælibet sibi comparat, is omnem adhibet conatum, ut ad objecta quælibet obvia attentionem tandiu conservet, quamdiu ipsi visum fuerit (§. 252.). Quare si studium istud conservandi attentionem ad rem quamlibet præsentem aliquamdiu continuet; sine ullo tandem negotio ad rem præsentem quamlibet, si voluerit, conservare valet (§. 195. 248.). Eadem igitur industria acquirit potentiam attentionem omnem afferendi continuo ad rem quamlibet præsentem, qua indifferentiam attentionis ad objecta quælibet sibi comparat.

Poterat etiam eodem, quo supra (§. 249.), modo ostendi potentiam habendi animum ad præsentia continuo attentum esse peculiarem quendam attentionis gradum, atque adeo exercitio comparari (§. 248.). Quare cum exercitium huc spectans sit continua ad id, quod præsens est, attentio (§. 195.); animum quoque ad præsentia constanter attentum afferre tenemur, nisi attentionem aliud quid sibi vindicet, eumque ab iis revocare debemus, quæ huc non spectantia eundem occupant, ubi potentiam animum ad rem quamcunque præsentem acquirendi nobis comparare volumus.

Sunt multa motiva particularia, quibus determinamur ad animum rebus præsentibus continuo præsentem, sed hæc ad philosophiam

potius moralem, quam ad Psychologiam spectant. Abhi itaque ut quis existimet, omitti utilia, quæ suo loco a nobis referuntur

§. 254.

Gradus quilibet attentionis diu intermisso ejus usu iterum amittitur. Gradum attentionis semel acquisitum non utendo iterum amitti, experientia obvia docet. Domesticam hic appellare possumus. Sane cum adsueti essemus inter quosvis strepitus, ipsarum tubarum clangorem ac tympanorum sonitum ad meditationes nostras conservare attentionem, perinde ac si prorsus tranquillo in loco sederemus; ubi aliquot annis musæum nobis fuisset ab omni strepitu prorsus remotum, attentio nostra facillime turbari poterat, nec sine difficultate in objecto præsentē detinebatur, præsertim quod nonnisi vi imaginationis præsens sistebatur, ac ubi meditationibus de rebus a sensu remotis indulgendum erat. Novo igitur exercitio demum instaurandus erat attentionis gradus, quasi de novo comparandus (§. 248.).

*Quomodo
attentionis
gradus si-
mul acqui-
situs amit-
tatur.*

Confucio, Sinarum Philosopho, veritas propositionis præsentis probe perspecta fuit. Quamobrem cum ipsi perspectum esset, quam necessaria sit attentio ad rectam actionum directionem, ad res quas-
cunque levissimas eandem attentionem afferrebat, quam ad res arduas
afferre solebat: quemadmodum in Notis ad Orationem de Sinarum
philosophia practica me monuisse memini.

§. 255.

Gradus quilibet attentionis continuo usu & conservatur, & perficitur. Quoniam enim gradus attentionis promiscue omnis exercitio acquiritur (§. 248.), impossibile est ut amittatur, quamdiu exercitium istud durat. Quare cum exercitium duret, quamdiu gradu isto attentionis utimur (§. 195.); continuo ejusdem usu conservari debet.

*Quomodo
attentionis
gradus con-
servetur &
perficiatur.*

Porro quia exercitio acquiri debet, quicquid attentionis acquiritur (§. 248.); attentio autem perficitur, si quid
(Wolffii Psychologia.)

attentionis acquiritur, quod nondum habebamus: continuo gradus alicujus attentionis usu idem perfici debet.

Ex propositione praesente ulterius liquet, Confusio fuisse rationem sufficientem, cur ad actiones quasunque minimi, immo nullius momenti eandem afficeret attentionem, qua ad negotia ardua & actiones maximi momenti opus erat. Quod adeo in philosopho summo reprehendendum, immo deridendum propinant, qui res nonnisi obiter inspicere solent superficialiariam attentionem cum habitudine mentis conjungentes; id summam utique laudem meretur.

§. 256.

Attentionis directio pro arbitrio variabilis.

Attentionem nostram successive ad alias aliasque partes perceptionis totalis promovere valemus, prouti visum nobis fuerit. Hoc ex eorum numero est, quod unusquisque quovis momento in se experiri potest. Ponamus enim te videre arborem. In potestate tua positum deprehendis, ut attentionem tuam dirigas ad folia, a foliis ad furculos, quibus eadem adherent, a furculis ad ramos, quibus iidem inseruntur, a ramis ad truncum, ex quo ipsi procedunt. Immo in potestate tua positum deprehendis, ut a trunco eandem retrahas ad aliam quamcunque ejus partem. Similiter si attentionem in folio defigis, in potestate tua positum deprehendis, ut eam applies ad folii figuram & inprimis ad perimetrum, qua continetur folium, deinde eandem promoveas ad colorem viridem, quo tingitur, ad pediculi per integrum folium secundum longitudinem ejus continuationem, hinc ad ramulos inde procedentes secundum folii latitudinem, ulterius ad furculos ex ramulis undiquaque sparsis ac tandem ad materiam inter ipsos conspicuam seu utriculorum congeriem. Nec minus in folii perlustratione, quam ante cum totam arborem conspiceres, in potestate tua positum deprehendis, ut a qualibet particulari perceptione ad quamlibet alteram attentionem retrahas.

Videmus adeo attentionis directionem pendere ab arbitrio nostro, etsi hic exercitio opus sit, ut magis eidem subjiaciatur, quemadmodum paulo post ostensuri sumus.

§. 257.

§. 257.

Attentionis successiva directio ad ea, quæ in re percepta insunt, dicitur *Reflexio*. Unde simul liquet, quid sit *Facultas reflectendi*, scilicet quod sit facultas attentionem suam successive ad ea, quæ in re percepta insunt, pro arbitrio dirigendi. Quare cum constet, quod attentionem nostram successive ad alias aliasque partes perceptionis totalis promovere valeamus, prouti nobis visum fuerit (§. 256.); *anima habet facultatem super rebus perceptis reflectendi*. *Reflexionis definitio.*

Goclenius noster in Lexico reflexionem definit per intimam animæ actionem, qua recognoscit tum seipsam, tum suos actus & suas species. Intellegit autem per species animæ ideas rerum, quas habet. Et recognoscere ipsi idem est ac sibi conscium esse, quod hanc ideam jam habeamus, quod has operationes mentis jam exerceamus. Nimirum harum ita nobis consci sumus, quatenus attentionem nostram successive ad ea, quæ in re percepta continentur, ipsasque nostras actiones mentis circa eas convertimus. Non videtur *Goclenius* satis distinguere, quæ memoriæ sunt, ab iis, quæ reflexioni tribuenda veniunt. Quod tamen vocabulum reflexionis non sumat in alio significatu, quam a nobis accipitur, ex ceteris ejus verbis apparet, quæ ibidem leguntur. „Reflexio enim, ait, Physicis est, cum, postquam intellectus concepit rem aliquam, rursus concepit se concepisse eam, & considerat ac metitur, qua certitudine & modo illam cognoverit & si opus fuerit, iterum atque iterum convertit se seu revertitur ad se & actus suos. „ Etenim dum affirmat, animam iterum atque iterum convertere se seu reverti ad actus suos; specialem reflexionis casum, qua super actibus suis mens reflectit, eodem modo describit, quo nos reflexionem in genere definivimus. Quid enim aliud est conversio ad actum semel perceptum, quam directio attentionis ad eundem. Dum vero de re ipsa percepta pronunciat, quod eandem consideremus, ac metiamur qua certitudine & modo illam cognoverimus, hoc ipso actus reflexionis nonnullos enumerat, quæ sese per directionem attentionis ad partiale quoddam objectum exerunt. Prima vero, quibus utitur, verba ad memoriam referenda, quæ cum reflexione semper conjungitur.

§. 258.

*Quoniam
per actus
reflexos di
stinguamus
in re perce
pta.*

*Si super re percepta reflectimus, eorum, quæ eidem in-
sunt diversa, vel ad eandem quomodocunque pertinent, nobis con-
scii sumus. Et ea a re, cui insunt, diversa esse agnoscimus. Etenim
cum super re percepta reflectimus, attentionem successive ad
ea dirigimus, quæ eidem insunt, vel ad eam quomodocunque
spectant (§. 257.). Efficimus itaque ut id, ad quod atten-
tionem nostram dirigimus, clarius percipiamus ceteris, quæ
simul insunt (§. 237.), consequenter ut idem magis apper-
ciamus, quam cetera, quæ in re percepta simul continentur
(§. 235.). Magis adeo nobis conscii sumus, nos id percipere,
ad quod attentionem nostram dirigimus, quam cetera, quæ in
eadem re simul insunt (§. 25.). Quare cum attentionem suc-
cessive ad alia aliaque in re percepta contenta promoveamus *per
demonstrata*; successive quoque nobis magis conscii sumus,
quod nunc hoc, nunc istud percipiamus, quod rei perceptæ
inest, quam cetera, quæ simul insunt. Dum igitur super re
percepta reflectimus, eorum, quæ eidem diversa insunt, vel ad
eandem quomodocunque pertinent, (horum enim, quæ illo-
rum, eadem est ratio) nobis conscii sumus.*

Enimvero dum super re percepta reflectimus, attentio-
nem nostram pro arbitrio dirigere possumus in quodcunque
eidem inexistens, vel quomodocunque ad eandem spectans,
eamque inde ad rem perceptam ipsam retrahere (§. 257.).
Quare cum ad rem ipsam attenti ejus nobis conscii simus *per
demonstrata* & eorum, quæ in eadem vel ad eandem quomodo-
cunque spectantia figillatim percepimus, tanquam figillatim
perceptorum meminimus (§. 226.); dum super re percepta
reflectimus, ea, quæ eidem insunt, vel quomodocunque ad
eandem spectant, tanquam diversa ab eadem agnoscimus (§.
(§. 183. *Ontol.*)).

Exemplo propositio præsens ejusque demonstratio mirifice illu-
stratur. Etenim si super arbore reflectimus successive attentionem
nostram

nostram dirigimus ad folia, furculos, ramos, truncum, quemadmodum paulo ante (§. 256.) jam vidimus. Dum attentionem nostram ad folia dirigimus, magis nobis consci sumus, quod jam percipiamus folia, quam quod simul furculos, ramos & truncum percipiamus. Similiter dum attentionem nostram ad furculos dirigimus, magis nobis consci sumus, quod jam furculos percipiamus, quam quod simul folia, ramos & truncum percipiamus, ac ita porro. Sigillatim igitur nobis consci sumus foliorum, furculorum, ramorum, trunci, hoc est, eorum, ex quibus arbor constat, simulque nobis consci sumus, quod eorundem sigillatim nobis consci sumus. Inde est quod *Golenio* autore philosophi ad reflexionem requisiverint, ut mens concipiat se rem concepisse, & eam ad actus suos se convertere dicat. Enimvero dum attentionem ad integram arborem iterum dirigimus, memoria nobis suggerit, nos folia sigillatim modo percepisse & eadem est furculorum, ramorum atque trunci memoria. Atque inde colligimus folia esse ab integra arbore diversa, eodemque modo agnoscimus furculorum, ramorum atque trunci ab eadem diversitatem; nimirum folia & arborem integram sibi invicem non posse substitui, ut eorundem nobis consci sumus, seu ut facta substitutione respectu perceptionis perinde sit, ac si substitutio nulla facta esset. Quilibet enim satis agnoscit perinde non esse, sive arborem integram percipiat, sive tantummodo folia, aut furculum, aut ramum, aut truncum. Vi notionis igitur diversitatis agnoscimus, folia ab arbore esse diversa (§. 183. *Ontol.*). Immo eodem modo agnoscimus furculos, ramos, truncum esse tum ab arbore integra, tum a se invicem diversos. Ex sequentibus patebit reflexioni sese immiscere multas mentis operationes, ut adeo mirum non sit hactenus non satis a se invicem esse discreta, quæ ad diversas animæ facultates spectant.

§. 259

Si attentionem nostram primum in A, deinde in B si- *Collatio re-*
gillatim, mox in A & B simul dirigimus; A & B *inter se conferre rum perce-*
dicimur. Est adeo *Rerum perceptarum collatio* attentionis *ptarum.*
primum in singulas, mox in duas vel plures simul facta dire-
ctio. Quoniam attentionem nostram successive ad alia alia-
que, prout nobis commodum visum fuerit, dirigere valemus
(§. 256.); *res quoque perceptas inter se conferre* valemus.

Ponamus te attentionem tuam dirigere ad arborē integram, mox sigillatim ad folia, furculos, ramos & truncum. Deprehendes in potestate tua positum esse, ut attentionem ad folia & furculum simul dirigas, atque tibi eorum simul, sed tanquam a se invicem diversorum sis conscius. Dum hoc facis, folia & furculum inter se conferre diceris. Insunt huic collationi plures animæ operationes, & dum attentio huc illucque seu a re percepta una ad alteram continuo retrahitur, memoria quoque cum imaginatione sese immiscet.

§. 260.

Quod pertineat ad reflexionem.

Dum super rebus perceptis reflectimus, eas quoque inter se conferimus. Etenim dum super rebus perceptis reflectimus, attentionem nostram successive ad ea, quæ in re percepta insunt, vel quomodocunque ad eandem pertinent, prout nobis commodum visum fuerit, defigimus (§. 257.). Quoniam itaque directio attentionis ab arbitrio nostro pender; ad bina quoque simul eandem dirigere valemus, ad quæ eandem sigillatim direxeramus. Quare cum res percepras inter se conferamus, dum attentionem nostram primum in eas sigillatim, deinde in easdem simul dirigimus, eam continuo ab una ad alteram quasi retrahentes (§. 259.); *dum super re percepta reflectimus, ea inter se conferimus.*

Est nempe rerum perceptarum collatio actus quidam specialis reflexionis, etsi non simplex, sed in varios alios resolubilis, quemadmodum jam (not. §. 259.) innuimus. Hic sane actus sese exrit, dum quæ in re percepta diversa insunt tanquam diversa agnoscimus (§. 258.).

§. 261.

Reflexio animæ super seipsa.

Anima quoque super seipsa & actibus suis reflectere potest. Anima enim est sibi sui, adeoque eorum, quæ ipsi actu insunt, seu actuum suorum conscia (§. 20.): id quod quovis etiam momento unusquisque in se experiri potest & singulis comprobarur, quæ in antecedentibus de anima observata retulimus. Mens igitur seipsam & actus suos percipit & apper-

pit

pit (§. 24. 25.), adeoque efficere valer, ut partialem quandam perceptionem magis appercepiat, quam ceteras (§. 234.), veluti ut actum aliquem suum se percipere magis sibi sit conscia, quam quod percipiat ceteros, consequenter ut ejus perceptio sit ipsi ceteris clarior (§. 235.). Attentionem igitur suam ad unum actum, vel unum quidpiam in se perceptum dirigere valer, quod antea cum aliis in se simul percipiebat (§. 237.), consequenter super seipsa actibusque suis reflectere potest (§. 257.).

Reflexio animæ super seipsa suisque actibus aut, si mavis, iis quæ actu in anima contingunt, est medium perveniendi ad cognitionem animæ. Quicquid enim in Psychologia empirica traditur, illud cognoscimus, quatenus super iis, quæ in seipsa mens observat, reflectimus. Hæc tamen reflexio singulare quoddam acumen præsupponit. Unde contigit, quod in cognitione animæ philosophi plurimi non multum profecerint.

§. 262.

Actus reflexi dicuntur omnes animæ actiones, quæ reflexionem ingrediuntur. *Actus reflexi.*

Istiusmodi actus nulli sese exerunt in infantibus recens natis. Immo nec adulti super rebus omnibus ac actionibus suis reflectere solent, aut, si cum *Cicerone* loqui malueris, animum ad res omnes suasque actiones reflectere solent. Quod in philosophia reflexionem simpliciter appellamus, *Ciceroni* dicitur animi ad rem (perceptam) reflexio.

§. 263.

Continuo exercitio super re quacunque obvia singulisque nostris actionibus reflectere aduſcimus. Quodsi continuum fuerit super re quacunque reflectendi exercitium; super re quacunque obvia singulisque nostris actionibus reflectendi conatum continuo adhibemus (§. 195.). Quare cum nobis conscius simus istius reflexionis, dum eandem instituimus, quod a posteriori satis patet, simulque rei, super qua reflectimus, tanquam sensui vel animo præsentis nobis conscius simus, quod non minus manifestum est; actus reflexos cum præsentia rei simul

simul percipimus (§. 262.). Quamobrem si idea quadam animo obversetur & in præsentiam ejus dirigimus attentionem, ut adeo ejusdem nobis conscii sumus (§. 237.); reflexionis quoque perceptio una excitatur (§. 104.) & nos eandem recognoscimus (§. 174.), consequenter nobis conscii sumus quod alias super re sensui vel animo præsentem reflexerimus (§. 173.). Quoniam igitur id destinato consilio fecimus *per hypoib.* hujus quoque consilii nobis conscii sumus. Quamobrem quamdiu nulla adest ratio, cur idem mutemus, quod hic supponitur; denuo super re reflectimus obvia, quia jam nobis præsens est, vel animo ejus nobis obversatur idea, consequenter etiam super actionibus nostris quibuscunque. Continuo igitur exercitio super re quacunque obvia singulisque nostris actionibus reflectere adfuescimus.

Proposio præsens maximæ est utilitatis, siue rerum cognitionem acquirendam, siue virtutis exercitium spectes.

§. 264.

*Impedimen-
ta reflexio-
nis.*

Quæ attentioni obstant, ea quoque impedimento sunt reflexioni. Si quidem attentionem impedit, idem etiam impedire debet, quo minus eandem dirigas successive ad ea, quæ in re percepta insunt, aut quomodocunque ad eandem spectant: id quod per se patet. Enimvero in directione attentionis successiva ad ea, quæ in re percepta insunt, reflexio consistit (§. 257.). Quicquid ergo attentionem impedit; idem quoque reflexioni impedimento est.

Impedimenta attentionis recensuimus in superioribus, scilicet sensationes, præsertim fortiores (§. 238.) & phantasmatum in imaginatione continuam successionem (§. 241.). Ac inferius patebit, quæ obstacula eidem appetitus objiciat. Non igitur opus est, ut de impedimentis reflexionis specialiora proferamus. Equidem est quadam etiam ad reflectendum super re percepta aptitudo, quæ ubi deficit, parum hac in re profeceris: sed ejus defectum non commode inter impedimenta referre potes. Impedimentum enim supponit in agente aptitudinem ad agendum.

§. 265.

Quoniam igitur potentiam conservandi attentionem *Medium* nobis exercitio acquirere valemus (§. 248.), ad reflexionem *reflexionis*, vero conservatione attentionis opus habemus (§. 264.); *si quis absque obstaculo super rebus perceptis reflectere velit, is attentionis conservandæ potentiam sibi comparare debet.*

Quomodo potentiam conservandi attentionem nobis comparare debeamus in diversis, qui hic occurrunt, casibus, docuimus supra (§. 249. & seqq.). Inprimis plurimum nos juvat attentio, quam inter plura objecta simul partimur, ubi sigillatim percepta vel inter se, vel cum re tota conferimus.

CAPVT II.

De Intellectu in genere & differentia cognitionis.

§. 266.

Dum super re percepta reflectimus, distincte eam percipimus. *Quando*
 Dum enim super re percepta reflectimus, eorum, quæ *rem distin-*
 eidem insunt diversa, vel ad eandem quomodocunque *et percipia-*
 pertinent, nobis conscii sumus & ea a re, cui insunt, diversa *mus.*
 agnoscimus (§. 258.). Quoniam adeo in eadem plura sigillatim enunciabilia distinguimus; eam distincte percipimus (§. 38.). Dum igitur super re percepta reflectimus, distincte eam percipimus.

Paretidem ex supra (not. §. 258.) allato exemplo de arbore. Dum enim super eadem reflectimus, tanquam diversa in eadem successive nobis representamus folia, furculos, ramos, truncum, adeoque eandem distincte percipimus. Similiter dum super folio reflectimus, tanquam diversa in eodem distinguimus pediculum, ejus secundum folii longitudinem productionem, ramos inde derivatos & secundum folii latitudinem extensos, furculos hinc inde per folium excurrentes, perime-

trum folii, colorem viridem, differentiam coloris in parte anteriori & posteriori, seu superiori ac inferiori, utriculorum congeries inter surculos contentas, adeoque folium distincte percipimus. Idem centenis exemplis aliis confirmari potest, ut adeo pateat, res a nobis distincte percipi posse, quatenus habemus facultatem animum ad eas reflectendi. Tolle hanc facultatem, ipsam tolles distinctam perceptionem.

§. 267.

*Modus per-
veniendi ad
perceptionem distin-
ctam.*

Quoniam rem distincte percipimus, dum super ea reflectimus (§. 266.); multarum rerum perceptiones distinctas consequenturi super iis reflectere debemus.

Pater adeo modus perveniendi ad perceptiones rerum distinctas. Plurima tamen adhuc subsidia supersunt, quæ ex sequentibus manifesta evadent. Utile est distinctis rerum perceptionibus a teneris unguiculis adsuescere, consequenter ad objecta quæcunque obvia excitari attentionem atque exerceri reflexionem.

§. 268.

*Quomodo
ad percep-
tiones u-
niversales
pervenian-
tur.*

Dum super re percepta reflectimus & eam vel cum aliis simul perceptis, vel cum aliis, quarum meminimus, conferimus; perceptiones specierum ac generum acquirimus. Etenim dum super re percepta reflectimus, eorum, quæ eidem insunt diversa, vel ad eam quomodocunque pertinent, nobis consci sumus & are, cui insunt, diversa esse agnoscimus (§. 258.). Quod si ergo ea, quæ in rebus simul perceptis, vel etiam in iis, quæ nunc percipiuntur & quarum meminimus, inter se conferimus; quæ in ipsis eadem sunt, quæ diversa sunt, percipimus, consequenter nobis consci sumus similitudinis ac dissimilitudinis illarum (§. 195. 211. *Ontol.*). Quare cum similitudo individuorum species, similitudo specierum genera constituat (§. 233. 234. *Ontol.*); dum super re percepta reflectimus & eam vel cum aliis simul perceptis, vel cum aliis, quarum meminimus, conferimus; perceptiones specierum atque generum acquirimus.

Hoc modo percipimus res omnes, quas nominibus appellativis compellere solemus. Ita arborem in genere tanquam genus, cerasum in

in genere tanquam speciem; brutum in genere tanquam genus, equum vel canem in genere tanquam speciem percipimus.

§. 269.

Rerum genera & species a se invicem discreturi per sonos Quomodo quosdam articulatos ea indicare solemus. Res facti non aliter genera & quam a posteriori probari potest. Experientia autem unicuique obvia est, ut exempla in medium proferri opus non sit species rerum indigentur. (§. 666. Log.).

Quodsi dubites num soni isti articulati indigentur genera & species; levi quadam attentione opus est, ut idem animadvertas. Pone enim te intueri canem, qui Mordax appellari solet; pater ideo canem hunc singularem vocari Mordacem, ut eum ab aliis canibus distinguas, & quodcumque individuum in hac brutorum specie canem dici. Est igitur vocabulum canis nomen speciei, non individui.

§. 270.

Quoniam ex sono isto articulato ab altero prolato colligimus, rem præsentem sive actu ipso, sive in idea esse individuum hujus speciei vel generis (§. 269); soni articulati, quibus genera & species rerum, vel etiam individua indigentur, sunt signa generum & specierum, vel etiam individuorum. Signa generum, specierum & individuorum.

Hinc jam in Ontologia (not. §. 98, 99.) vocibus istiusmodi articulatis usi sumus ad illustrandum doctrinam de signis.

§. 271.

Voces articulatz, quibus res perceptas aut perceptiones nostras indigitamus, dicuntur Vocabula, ut adeo Vocabula sint quid sint. signa nostrarum perceptionum, vel rerum per eas repræsentatarum. Vocabula quid sint.

Ita vocabulum arbor & corpus naturale in regno vegetabili denotat, quod ex foliis, surculis, ramis, trunco atque radice componitur; & ideam arboris, quam habemus, & vi cujus nobis arborem tanquam præsentem repræsentare valemus, quotiescunque voluerimus.

§. 272.

Quoniam vis significandi vocabulorum ab arbitrio hominum Qualia mihi signa sunt vocabula.

minum pendet, quod per se patet; *Vocabula signa artificialia sunt* (§. 98. *Ontol.*), consequenter nil quicquam obstat, quo minus iisdem tribuatur significatus prorsus contrarius, vel ut eidem vocabulo tribuantur diversi simul significatus, vel eadem res diversis indiget vocabulis (§. 959. *Ontol.*).

Exempla jam dedimus alibi (*not. §. 959. Ontol.*), cum de signis artificialibus in genere ageremus. Vocabulorum autem significatus arbitrarius probe notandus est: etsi enim evidentissimus sit, plurimi tamen in eum impingunt, in interpretatione autorum ita procedentes, quasi significatus esset necessarius, atque adeo vocabula in numerum signorum naturalium essent referenda. Unde plurima consequuntur incommoda, quæ hic commemorari prolixum nimis foret.

§. 273.

*Quomodo
vocabula
ideam rei in
memoriam
revocent &
contra.*

Si quis vocabulum & rem eodem denotatam sæpius una percepit; vocabulo audito rei quoque, quam denotat, meminit, & contra idea rei sive sensus, sive vi imaginationis resuscitata, vocabuli ejusque significatus meminit. Si quis enim vocabulum & rem eodem denotatam sæpius una percepit, audito vocabulo vi imaginationis reproduci debet idea rei eodem denotata (§. 117.), eademque ab anima recognosci debet (§. 213.). Enimvero quando ideam rei reproductam recognoscere valemus, ejusdem meminimus (§. 226.). Audito igitur vocabulo, rei eodem denotatae meminimus.

Similiter si idea rei sive sensu, sive vi imaginationis resuscitatur; idea quoque vocabuli & significatus ejus reproducitur (§. 117.), & tam illa, quam hic ab anima recognoscitur (§. 213.). Idea igitur rei quomodocunque resuscitata vocabuli ejusque significatus meminimus (§. 226.).

Atque ita apparet, quomodo linguam vernaculam, vel etiam ipso usu quamcunque aliam discamus, & cur infantes successu dum temporis vocabula intelligere discant. Quod vero eadem ante intelligant, quam eloqui valeant, id quidem inde est, quod voces formentur variis organorum loquelæ motibus, quemadmodum
suo

suo tempore in Physicis docebimus, motus vero istos prompte producendi potentia non nisi multo exercitio acquiratur.

§. 274.

Si quis vocabula diversarum linguarum sæpius simul percipit, audito uno meminit etiam alterius ac communis utriusque significati. Si qua enim vocabula sæpius simul perceperimus, audito uno reproducitur etiam idea alterius & communis utriusque significatus (§. 117.), eademque a nobis recognoscitur (§. 213.). Vocabuli igitur alterius ac communis utriusque significatus audito uno simul meminimus (§. 226.).

Nos non alio uti modo linguas exoticas addiscendi, quam ut ideas vocabulorum in utraque lingua idem significantium sæpius una excitemus & super iis reflectentes communis utriusque significatus ideam superaddamus, quatenus utrumque ad eandem rem referimus; nemo est qui ignorat.

§. 275.

Facultas res distincte representandi dicitur *Intellectus*.

Intellectus

Vocabulum intellectus vulgo a modum vagum ac ambiguum habet significatum, quemadmodum videre est apud Goclenium in Lexico, ubi misere se torquet in diversis significatibus eruendis; nec tamen tradit, quæ satisfaciunt. Nos distinguimus ea, quæ in anima insunt, a se invicem, & vocabula ad ea denotanda ita applicamus, ut singulis tribuatur fixus quidam ac diversus a significato alterius significatus, qui usui loquendi, quantum inconstantia permittit, non repugnat. Quod si ergo facultatem cognoscendi excutias; cognosces res representari vel confuse per imagines, vel distincte distinguendo a se invicem, quæ in imaginibus insunt, eademque ab imaginibus separando. Dum consules res percipimus, ea vel præsentia, vel absentia sunt. Triplex adeo in representatione rerum discriminem occurrit. Quamobrem tribus opus habemus vocabulis. Habemus tria vulgo vocabula, quæ de facultate cognoscendi usurpantur, sensum, imaginationem & intellectum. Non invito igitur communi loquendi usu sensus ad rerum præsentium in singulari, imaginatio ad absentium itidem in singulari per imagines confusam representationem adeoque intellectus ad representationem distinctam in universali refertur. Sufficit nos

quid dicatur.

vocabulorum in Psychologia significatus in se arbitrarios ita determinare, ut ad certam atque distinctam animæ cognitionem acquirendam & cum aliis communicandam nobis sint subsidio. Diximus in superioribus (§. 55.) facultatem cognoscendi superiorem, qua ideas & notiones distinctas acquirimus. Intellectus adeo & facultas superior cognoscendi synonyma videntur: quemadmodum etiam *Thünygius* in Institutionibus §. 60. Psych. innuit. Quod si tamen acumine profundiori in differentiam penetrare volueris, facultatem cognoscendi superiorem latius patere deprehendes, quam intellectum. Et enim ad acquirendas ideas ac notiones distinctas plura requiruntur, quam representatio rerum distincta in universali, seu ipse representandi actus proximus, etsi remote in eundem influant. Sed non opus est tam sollicite a se invicem distinguere, quæ citra errorem pro synonymis haberi possunt.

§. 276.

Gradus intellectus objectivus.

Quo plura igitur distincte quis sibi representare potest; eo major est intellectus (§. 275.).

Convenit huic corollario notio quædam communis: vulgo enim majorem intellectum tribuimus ei, qui pluribus ideis cum refertum habet, quam qui paucioribus, ut adeo de pluribus rebus disserere possit quam alter ac de pluribus suum interponere judicium valeat. Habemus adeo primum gradum intellectus, qui ab objecto desumitur, ac ideo *gradus objectivus* appellari potest.

§. 277.

Gradus intellectus formalis.

Quo plura quis in eodem subjecto distinguit; eo major est intellectus (§. 275.).

Nec ab hoc corollario abhorret notio communis. Majorem enim intellectum respectu alicujus objecti tribuimus uni, quam alteri, si plura de eodem subjecto noverit prædicata, quam alter. Habemus adeo alterum intellectus gradum, qui cum a forma seu modo representationis petatur, *gradus formalis* vocari potest.

§. 278.

Intellectus qui est maximus.

Quoniam in intellectu non distinguimus nisi objectum, quod representatur, & modum, quo representatur (§. 275.), primus autem gradus illius ab objecto (§. 276.), alter a forma peti-

petitur (§. 277.); intellectus major concipi nequit, quam qui omnia possibilia distincte sibi repræsentare valet, consequenter intellectus omnia possibilia distincte repræsentans erit omnium maximus, seu absolute summus.

Utrum detur intellectus maximus seu absolute summus, nec ne, imo utrum possibilis sit, nec ne; hic nondum definiri potest. In Theologia naturali ostendemus, eum utique possibilem esse atque Deo competere. Non vero tantummodo in usum Theologiæ naturalis propositio præsens præmittitur, verum etiam eum in finem eidem hic locus conceditur, ut inde intellectus nostri imperfectionem metiamur atque adeo agnoscamus, quam infinito intervallo a maximo intellectu distemus, clarius percipientes veritatem illius pervulgari, maximam partem eorum, quæ scimus, esse minimam eorum, quæ nescimus. Bini illi intellectus gradus, de quibus diximus (§. 276. 277.), in hominibus, quorum intellectus tam materialiter sive ratione objecti, quam formaliter sive ratione modi repræsentandi limitatus est (§. 279.) plurimum differunt. Sed differentia ista ex sequentibus clarius elucescet.

§. 279.

Intellectus noster limitatus est tum quoad objectum, tum Limitatio quoad modum repræsentandi objecta. Quilibet tum in se, tum intellectus in aliis experitur, intellectum nostrum non extendi ad possibilia humani omnia, sed aliqua saltem esse, quæ nobis repræsentare valeamus. Quare cum ultra istum definitum numerum ceterorum nihil nobis repræsentare valeamus; intellectus noster quoad objectum limites agnoscit (§. 468. Ontol.), adeoque limitatus est.

Similiter unusquisque non minus in se, quam in aliis animadvertit, non aliqua saltem, quæ objecto, quod nobis repræsentare valeamus, non vero omnia discernibilia distinguere valere. Quare cum ultra istum definitum numerum denuo nihil discernere valeamus; intellectus quoque noster quoad modum repræsentandi objecta limites agnoscit (§. 468. Ontol.), adeoque limitatus est.

Duplex datur, uti graduum (§. 276. 277.), ita etiam limitationis fundamentum, objectum scilicet ac modus repræsentandi objectum.

Ex limitibus enim objectorum perceptibilium & modi eadem representandi nascuntur gradus.

§. 280.

*Enunciabile
quid sit.*

Si quid vocabulis indigitare valemus, id *enunciare* dicimur: ut adeo *enunciabile* dicatur, quod verbis indigitari potest.

Atque ita ad notionem distinctam revocavimus terminem, quem supra ex notione communi confusa notum supposuimus (§. 38.), independentem tamen ab illa definitione, quam ingrediebatur.

§. 281.

*Quanam
enunciabilia
sint.*

Quicquid in idea rei distingui ab alio potest, id etiam enunciabile est. Quoniam vocabula sunt signa perceptionum, adeoque & rerum per eas representatarum artificialia (§. 272.), vis significandi eorum prorsus ab arbitrio nostro pendet (§. 958. *Ontol.*). Quamobrem si quid in idea rei distingui ab alio potest, idem etiam vocabulo aliquo tanquam signo indigitare licet. Enunciabile igitur est (§. 280.).

Non licet excipere, quod tot vocabula inveniri nequeant, quot diversa perceptibilia deprehenduntur. Etsi enim difficile, si non prorsus impossibile sit, ut numerus perceptibilium cum numero vocabulorum vi combinationum literarum utilium ac scopo presenti convenientium possibilium conferamus; constat tamen eidem vocabulo diversos attribui posse significatus, si vel maxime concedas, tot vocabula apta excogitari non posse, quot perceptibilia a nobis distingui possunt (§. 272.), atque idem fieri absque ulla confusione ipso facto experimur. Exempli loco esse possunt, quæ in Horis subsecivis A. 1730. Trim. æst. n. IV, de notione naturalis, præternaturalis & nonnaturalis dicta sunt.

§. 282.

*Facultas
abstrahendi
quid sit.*

Si ea, quæ in perceptione distinguuntur, tanquam a re percepta sejuncta intuemur; ea *abstrahere* dicimur. Eatenus igitur menti tribuitur *facultas abstrahendi*, quatenus ea, quæ rei perceptæ insunt, tanquam ab eadem sejuncta spectamus.

Competere nobis facultatem abstrahendi, ipso facto disimus. Etenim temperantiam considerare possumus, nulla habita attentione ad subje-

subje-

subjectum, cui habitus iste inest, tumque dicimur temperantiam considerare in abstracto. Et quando videmus hominem temperantem & quæ ex actibus illius colligimus, tanquam ab eodem sejuncta spectamus; ea ab eodem abstrahere dicimur, quæ ad notionem temperantiæ spectant.

§. 283.

Quoniam notiones generum & specierum absolvuntur similitudine individuorum (§. 233. 234. *Ontol.*), similitudo autem consistit in identitate eorum, quæ individuis insunt (§. 195. *Ontol.*); si ea, quæ in individuis eadem sunt, atque constanter insunt vel inesse intelliguntur, tanquam ab iisdem sejuncta spectamus, notiones specierum atque generum consequimur, consequenter notiones specierum atque generum per abstractionem formamus.

Notiones
generum &
specierum
per abstra-
ctionem
formatae.

Concurrit adeo in formandis notionibus generum & specierum sensu duce attentio, reflexio, abstractio præter imaginationem atque memoriam, quemadmodum hætenus dicta recolenti apparet. Ceterum si quis non statim viderit, cur inter constantia, quæ subjecto alicui insunt, ea quoque referamus, quæ inesse intelliguntur; is mente recolat de possibilitate modorum alibi (§. 249. & seqq. *Ontol.*) dicta. Etenim modorum possibilitates considerantur instar talium, quæ rebus inexistunt & si in proximorum numero sunt, inter semper inexistentia referuntur.

§. 284.

Si, quæ ab alio abstrahimus, ea vocabulis peculiaribus designamus & hoc modo abstractiones sunt magis clare ac distinctæ. Si qua enim ab alio abstrahimus, ea, quæ rei perceptæ insunt, tanquam ab eadem separata spectamus (§. 282.). Quare cum vocabulis utamur tanquam signis eorum, quæ percipiuntur (§. 271.); ea, quæ ab alio abstrahimus, vocabulis peculiaribus designamus. Jam vero ea, quæ abstrahimus, actu a re percepta separari nequeunt; sed tantummodo mente separantur, quatenus attentionem nostram in ea dirigimus & super re percepta reflectimus, adeoque nobis magis consciï sumus, (*Wolffii Psychologia.*)

Quomodo
abstraccio-
nes fiant
clare ac di-
stinctæ.

quod hæc percipiamus , quam quod alia simul percipiamus (§. 235. 237.) & ea a re, cui insunt, diversa esse agnoscimus (§. 258.). Quando autem ea , quæ abstrahimus, peculiaribus vocabulis designamus ; singula quoque actu sigillatim enunciare valemus (§. 280.). Jam vero hic perinde est ac si ea, quæ abstrahuntur a re percepta, actu ab eadem separarentur ; vocabulorum autem sibi conscius meminit etiam rerum iisdem denotatarum (§. 273.), consequenter sibi conscius est, se ea, quæ a re percepta abstrahuntur, tanquam ab ea diversa, ei tamen inexistentia deprehendisse (§. 226.). Quoniam itaque abstracta jam agnoscimus qua talia & a ceteris distinguimus & tanquam sigillatim enunciabilia sigillatim quoque enunciamus atque ita ipso facto a se invicem distinguimus ; si quæ ab alio abstrahimus vocabulis peculiaribus designamus, abstractiones fiunt magis claræ atque distinctæ (§. 31. 38.).

Quantum vocabulorum usus huc conferat, ut abstractiones fiant claræ atque distinctæ, ipso facto experimur. Sane vocabulis adsueti iisdem ita inheremus, ut absque iis non cogitemus de rebus, præsertim ubi super iisdem reflectere velimus: quæ sane ratio est, cur plurimi sibi persuaserint, nos absque vocabulorum usu de rebus cogitare non posse, animadvertentes scilicet nos tacite nobismetipsis loqui, quando de rebus cogitare intendimus.

§. 285.

*Subsidium
memorie in
retinendis
abstractis.*

Si, quæ ab aliis abstrahimus, ea vocabulis peculiaribus designamus ; abstracta facilius memoriæ mandantur & diutius retinentur. Etenim si, quæ ab aliis abstrahimus, ea vocabulis peculiaribus designamus, abstracta fiunt magis distincta (§. 284.). Quare cum memoriæ facilius mandentur atque eadem diutius retineantur, quæ distincte percipiuntur, quam quæ confuse percipiuntur (§. 200.); si, quæ ab aliis abstrahimus, ea vocabulis peculiaribus designamus, hæc ipsa & facilius memoriæ mandantur & diutius retinentur.

Si quis attentione sufficiente uti didicerit, veritatem asserti in seipso experiri potest.

§. 286.

Cognitio, quæ ipso idearum intuitu absolvitur, dicitur *Cognitionis intuitiva*, seu, *rem intuitive cognoscere* dicimur, quatenus idæ ejus, *intuitiva definitio*, quam habemus, nobis sumus conscii.

E. gr. Dum arborem præsentem intueor, mihiq; conscius sum eorum, quæ in eadem obrutu comprehendo; intuitivam arboris habeo cognitionem. Si triangulum mihi vi imaginationis tanquam in tabula delineatum, vel asserem triangularem repræsentem, atque hujus figuræ mihi conscius sim; triangulum intuitive cognosco.

§. 287.

Si in cognitione intuitiva idæ rei tantummodo mihi consci- *Cognitio*
us sum seu attentionem in tota simul defigo; cognitio confusa est: si intuitiva
vero super eadem reflecto, distincta. Etenim si attentionem in idæ *quando con-*
tota simul defigo, me ideam hanc jam habere mihi tantummo- *fusa, quando*
do magis conscius sum, quam quod præterea etiam habeam alias *distincta.*
(§. 237.). Nihil adeo, quod sigillatim enunciabile est (§. 281.),
ab altero distinguo. Cognitio igitur intuitiva, quam habemus
(§. 286.), confusa est (§. 39.).

Quodsi super idæ rei, quam habemus, reflectimus, eorum, quæ in idæ rei diversa sunt, & nobis conscii sumus, & a re, cui insunt, diversa esse agnoscimus (§. 258.), consequenter plura sigillatim enunciabilia in idæ rei distinguimus (§. 281.). Cognitio igitur intuitiva, quam habemus, distincta est (§. 38.).

E. gr. Quando arborem intuitive cognosco & attentionem in tota simul defigo, mihi tantummodo conscius sum me jam arborem videre, vel imaginari, & magis quidem mihi conscius sum me jam ideam arboris habere, quam quod simul videam vel imaginær objecta alia. Quare cum intuitiva cognitio non egrediatur terminos confusæ perceptionis, & tota hac absolvatur, confusa utique est. Enimvero ponamus nos jam super arbore reflectere; ab ea folia, furculos, ramos, truncum, tum etiam singula hæc a se invicem distinguimus. Nostra igitur intuitiva arboris cognitio distincta est. Idem prorsus judicium esto de triangulo. Si figuram in charta delineatam intueor, nec ultra attentio-

nem in tota defixam progredior ; non aliud inde consequitur, quam quod mihi magis sim conscius, me jam triangulum videre, quam quidpiam præterea ab eodem diversum. Enimvero ubi super triangulo reflecto ; & laterum singulorum, & angulorum, & numeri ternarii tam laterum, quam angulorum mihi sigillatim conscius sum, eaque tanquam a se invicem, atque a tota figura diversa intueor. Intuitiva igitur cognitio distincta est.

§. 288.

Actus cognitionis intuitiva distincta est.

Quoniam super re percepta reflectentes attentionem nostram successive dirigimus ad ea, quæ in re percepta insunt (§. 257.), adeoque nobis consci sumus, nos hæc jam in ea percipere (§. 258.), eaque inter se conferimus (§. 260.); *cognitio intuitiva distincta est, quatenus attentionem nostram successive ad singula dirigimus, mox ad plura simul retrahimus (§. 259.).*

Qui verbis constanter uti adsuevere, dum super rebus reflectunt; illi ægre experimentum propositionis præsentis in se capere possunt. Probe enim meminimus, nos non sine exercitatione demum obtinuisse, ut, seposito omni vocabulorum usu, actus istos animæ ederemus. Supponimus nimirum in præsentem, ubi de cognitione rerum intuitiva nobis sermo est, nulla nobis esse vocabula, quibus tum ea, quæ in re percepta discernuntur, tum res percepta ipsa indigitari possunt.

§. 289.

Cognitio symbolica quænam dicatur.

Quod si cognitio nostra terminatur actu, quo verbis tantum enunciamus, quæ in ideis continentur, vel aliis signis eadem representamus, ideas vero ipsas verbis aut signis aliis indigitatas non intuemur; *cognitio symbolica est.*

Ita cognitionem symbolicam habeo trianguli, si cogito ipsum esse figuram tribus lineis terminatam, trianguli vero ideam nullam, multo minus linearum, quibus terminatur, ac numeri ternarii earundem ideas intueor. Similiter cognitionem chiliogoni symbolicam habeo, si verbis tacite quasi loquens mihi ipsi indigito, chiliogonum esse figuram mille lateribus terminatam, laterum vero singulorum, ac numeri millenarii, ipsiusque chiliogoni ideam nullam intueor. Quod etiam signis aliis uti possimus ad res nobis representandas præter verba, vel sola Arithmetica loquitur, ubi singularibus utimur notis numericis ad nu-

mxose

meros quoscunque representandos. Habes igitur hic signa numerorum, quæ sunt a verbis, quibus enunciantur, diversa. Luculentiora exempla Analysis recentiorum, quam Algebram vulgo dicimus, supeditat, ubi formulis ex literis atque signis aliis compositis notiones rerum exhibemus: cujus rei exemplum dedimus alias (not. 72. & 74. Log.).

§. 290.

Si ad res quasdam denotandas utamur loco vocabulorum signis primitivis; ea nonnisi compendiosæ scriptioni inserviunt. *Signorum usus in compendiosa scriptione.* Etenim si signa sunt primitiva, ab aliis signis se prioribus ortum non trahunt (§. 964. Ontol.), adeoque simplicia sunt (§. 673. Ontol.). Enimvero vocabula, etsi significatus eorum primitivus sit, ex pluribus tamen literis componuntur, adeoque materialiter considerata, ex signis aliis simplicioribus constant. Signa igitur primitiva a vocabulis diversa compendiosius scribi possunt, quam vocabula iisdem æquipollentia. Inserviunt itaque signa ista scriptioni compendiosæ.

Istiusmodi signa in Astronomia occurrunt. Sunt enim talia signa planetarum & signa signorum eclipticæ. Signum Saturni e. gr. est ♄ Jovis ♃ Veneris ♀. Vocabulum *Saturnus* octo, *Jupiter* septem, *Venus* quinque literis constat; signa autem, quibus utuntur Astronomi, sunt simplicia, ex aliis simplicioribus minime composita. Similiter signum adpectus trigoni est △. Vocabulum *Trigonus* octo literis constat, si vocabulum *adpectus* adjicias, literarum numerus multiplicatur. Ast signum hujus adpectus simplex est. Jam si ponamus, Venerem & Jovem habere adpectum trigonum, ut ad eo scribendum sit: *Trigonus* sc. *adpectus Veneris & Jovis*; ope signorum astronomicorum compendiosius scribimus: △ ♃ ♀. Gemina exempla in Chymia occurrunt: Chymici enim utuntur signis primitivis, ex nullis aliis simplicioribus compositis ad denotandum res chymicas. Atque eadem signa inserviunt compendiosæ scriptioni eodem modo, quo signa astronomica eidem inservire ostendimus.

§. 291.

Si loco vocabulorum utamur signis, quorum significatus *Signa occul-*
Cc 3 *culæa.*

occultatur ; rebus occulte significandis inserviunt. Etenim si cui significatus signi occultus est, ut eidem minime constet, quænam res eodem denotetur, ei rei significatæ idea occurrere nequit signo viso (§. 117.). Quamobrem hisce signis res aliquibus, quibus nimirum eorum significatus perspectus est, significare possumus, ut alii, qui eundem minime perspectum habent, ignorent, quid illis significaverimus. Rebus adeo occulte significandis inserviunt.

Exempli loco nobis esse possunt signa cryptographica, quibus epistolas occulte scribimus, ut eas videns legere non possit, nisi clavem habuerit, aut, si fieri possit, eruere noverit. Dicitur autem clavis significatus signorum primitivorum, quorum combinatione resultat signum scripturæ. Vulgo utuntur notis numericis loco literarum & hisce significatum arbitrarium tribuunt, quatenus eædem in literarum locum surrogantur. Clavem habet, qui novit, quænam notis numericis respondeant literæ. Pertinet huc etiam mos scribendi veterum hieroglyphicus, & sub præsentem etiam propositionem continentur icones Alchymistarum, quibus processus occultare solent,

§. 292.

*Signa notio-
nibus rerum
distinctis
exhibendis
apta.*

Si quæ notionem rei ingrediuntur signis denotantur a vocabulis diversis ; eorum combinatione distinctam rei notionem veluti spectandam exhibere licet. Etenim si singula, quæ notionem rei ingrediuntur, signis peculiaribus indigitare noveris ; hisce visis aut quomodocunque perceptis resuscitantur ideæ illorum, quæ iisdem significantur, resuscitantur etiam ideæ vocabulorum, quibus enunciantur (§. 117.). Quamobrem si signa ista combinentur, ut uno obtutu comprehendendi possint ; reflectendo non modo singula notionem rei ingredientia percipimus, verum etiam enunciare valemus. Notionem igitur rei distinctam alteri veluti spectandam signis hisce exhibere licet.

Exemplo nobis est Algebra. Solutiones enim problematum, hoc est, notiones distinctas constructionis problematum, vel regularum ex datis numeris investigandi quæsitos, exprimimus formulis, in quibus quanti-

tatum

tatum seu numerorum datorum signa mediantibus signis operationum arithmeticarum combinamus. Ita paucis exhibentur, quæ subinde longa verborum ambage explicanda forent. Habemus quoque hodie signa artis saltatoriæ, a quodam artis hujus Magistro, cui *Fesillet* est nomen, in Choregraphia, seu Arte saltationes per characteres exprimendi sermone Gallico edita, exposita. Ope eorundem saltationes noviter inventæ absenti communicari facilius ac multo brevius possunt, quam si verbis describendæ forent. In eundem censum veniunt notæ musicæ, nec a præsentē foro aliena sunt signa, quibus utimur ad notiones modorum syllogismorum distinctas exhibendas (§. 375. Log.).

§. 293.

Si notæ seu notiones irresolubiles signis primitivis exprimuntur & inde signa derivativa notionum distinctarum, hoc invenientur; tam definitionum, quam propositionum distinctarum formandum optatur; signa vocabulorum vicaria sunt ad inveniendum utilia. Quoniam enim per signa derivativa definitiones ac propositiones determinatæ repræsentantur per hypoth. in ratiociniis autem nonnisi definitiones ac propositiones determinatæ applicantur (§. 348. 349. Log.); ratiocinia omnia per ista signa derivativa exprimi possunt. Quare cum ex iis, quæ cognita sunt, id quod incognitum est per ratiociniorum concatenationem eruatur (§. 725. Log.); signa vocabulorum vicaria in hoc casu ad inveniendum utilia sunt.

Hypotheseos possibilitatem jam in philosophia prima evicimus, cum theoriam signorum traderemus (§. 965. & seqq. Ontol.). Eidem illustrandæ inserviunt, quæ superius de usu figurarum hieroglyphicarum in disciplinis tradidimus (§. 163. & seqq.). Etenim tum figuræ hieroglyphicæ sunt signa artificialia rerum perceptarum (§. 158. 159. 151.) perinde ac vocabula (§. 271. 272.) & in illarum usu eadem observantur regulæ, quæ circa usum vocabulorum in disciplinis observari solent. Ceterum exemplum istiusmodi signorum dedi in Arithmetica, quæ in numero Elementorum Matheseos Latino idiomate evulgatorum continetur, ubi characterē derivativo proportionis utor ad demonstrandum theoremata de magnitudinum ac numerorum ratione. In Algebra tot occurrunt exempla, quot dantur problemata per regulas Algebrae solvenda.

venda. Etenim in denominatione assumuntur datorum, quorum notiones irresolubiles sunt, signa primitiva & inde eruuntur derivativa exprimentia vel definitiones, vel propositiones; horum vero ope investigatur incognitum. Omnes formulæ algebraicæ sunt signa derivativa, quæ exprimunt notiones distinctas, quas ingrediuntur quantitates tanquam primitivæ assumtæ, ut in earum notionibus confusis acquiescas. Atque hoc modo vidimus multiplicia dari signa a vocabulis diversa, sed eorum vicaria, quæ subinde utiliter in vocabulorum locum surrogantur.

§. 294.

Artis characteristica definitio.

Ars characteristica appellatur ea, quæ explicat signorum in rebus aut eorundem perceptionibus denotandis usum.

Ars hæc adhuc in desideratis est, quemadmodum jam alias monuimus (not. §. 965. *Ontol.*). Quoniam vocabula ipsa, quibus ad perceptiones vel res iisdem representatas exprimendas utimur, in horum signorum numero sunt (§. 271.); principia Grammaticæ universalis ex arte characteristica petenda. Sunt enim vocabulis cum ceteris signis quædam communia, quatenus sub eodem genere continentur. Ceterum cum exempla in notis numericis earumque in Arithmetica usu atque in primis in calculo specioso Algebrae habeamus; inde generalia quædam principia hujus artis abstrahi possunt, quibus deinde via ad ulteriora sternitur. Immo non inutile est notiones generales abstrahere a signis quibusvis vocabulorum vicariis, quæ in iisdem latent.

§. 295.

Illius potissimum obiectum.

Quoniam inter signa vocabulorum vicaria eminent ea, quæ ad inveniendum apta sunt; *In arte characteristica signorum ad inveniendum utilium ratio in primis explicari debet.*

In Algebra istiusmodi signa habemus pro quantitativis; sed desiderantur talia in philosophia pro rerum qualitativis. Illa faciliora sunt, hæc difficiliora inventu. Quamobrem mirum non est, quod illis dudum inventis hæc adhuc in desideratis numerentur. Quantitativum ex aliis assumtis ortus satis manifestus est: at quomodo qualitates aliæ ex aliis nascentur, nondum adeo exploratum est.

§. 296.

Si ope signorum ad inveniendum utilium ex cognitis incognita investigari debent; modus combinandi signa & combinationem variandi perspectus esse debet. Si quid enim, quod incognitum est, ex aliis, quæ cognita atque perspecta sunt, eligendum; assumpta colliguntur in notionem distinctam, quæ propositioni cuidam determinatæ respondet, ac inde porro ratiocinando tandem deducitur, quod erat inveniendum (§. 725. ac §. 551. & seqq. *Log.*). Quamobrem si signorum ope idem efficiendum; signa primitiva, quibus assumpta designantur, ita combinari debent, ut notionem distinctam, in quam colliguntur, exprimens signum derivativum prodeat, consequenter si ope signorum ad inveniendum utilium ex cognitis incognita investigari debent, modus combinandi signa perspectus esse debet.

Quando signa ad inveniendum apta adhiberi possint.

Enimvero quoniam porro opus est, ut ex hoc signo derivativo reperiatur signum aliud derivativum, quod exhibet notionem distinctam ejus, quod inveniri debebat; hoc vero signum in se perinde ac alterum, ex quo eruendum, signa omnia primitiva assumptorum continere debeat, tanquam determinationum, per quas determinatur id, quod quærebatur; signum derivativum, quod quæritur, ex eo, quod per combinationem primitivorum prodiit, aliter erui nequit nisi combinatione variata. Quamobrem si ope signorum ad inveniendum utilium ex cognitis incognita investigari debent; modus quoque variandi combinationem signorum primitivorum perspectus esse debet.

His uberior lux affundetur olim in Arte inveniendi. Quod sitamen quis probe attenderit ad analysin demonstrationum, quam dedimus in Logica (§. 551. & seqq.) eandemque juxta istud exemplar in aliis demonstrationibus instituerit, ac præterea in Algebra tum ad æquationes ex datis erutas, tum ad formulas per illarum reductiones repertas eam attentionem attulit, quæ ad reflexiones logicas (*Wolffii Psychologia.*)

sufficit; ei profecto nihil in tota demonstratione occurrer, quod non sit evidens. Si qua ceteris superfit obscuritas, illi ex dictis perspiciunt, quomodo eam dispellere debeant. *Æquationes* ex datis erutæ sunt signa derivativa notionum distinctarum, quas data & quæsitæ tanquam notæ ingrediuntur, & quæ vel definitionibus, vel propositionibus determinatis respondent. *Æquationum* vero reductio tandem resolvitur in variationem combinationum signorum primitivorum, ut prodeat signum aliquod derivativum notionis distinctæ modi, quo ex datis determinatur quæsitum.

§. 297.

*Artis characteristica
combinatoria
definitio.*

Ars illa, quæ docet signa ad inveniendum utilia & modum eadem combinandi eorundemque combinationem certa lege variandi, dicitur *Ars characteristica combinatoria*. Vocatur a *Leibnitio* etiam *speciosa generalis*.

Artis hujus characteristica combinatoriæ pars quædam specialis Algebrae est, quam notioni huic convenienter dixeris *Artem characteristicam combinatoriam magnitudinum* vi eorum, quæ ad præcedentem propositionem annotavimus. Hinc jam olim *Leibnitio* pro eo, quod ipse erat, ingenii acumine ad Algebrae animum reflectenti, artis hujus idea aliqua subnata esse videtur. In literis enim ad *Oldenburgium* d. 28. Decemb. A. 1675. datis, quæ leguntur apud *VVallisium* Vol. III. Oper. f. 621. ita scribit: „Ego vero agnosco, quicquid in genere probat Algebra, nonnisi superioris scientiæ beneficium esse, „quam nunc *combinatoriam characteristicam* appellare soleo, longe „diversam ab illa, quæ, auditis his vocabulis, statim alicui in mentem „venire posset. “ Hanc artem distinctæ notionum analysi destinare videtur. Ibidem enim f. 121. „Valde suspecta, inquit, nobis esse debet notio infiniti & minimi, & maximi, & perfectissimi, & ipsius „omnitatis. Neque fidendum his notionibus, antequam ad illud criterion exigantur, quod mihi agnoscere videor, & quod velut mechanica ratione, fixam & visibilem & (ut ita dicam) irresistibilem reddit „veritatem. Quale nobis inexplicabili beneficio tributum est a natura. Hæc Algebra, quam tanti facimus merito, generalis illius artificii nonnisi pars est. Id tamen præstat, errare ne possimus quidem, „si velimus, & ut veritas quasi picta velut machinæ ope in charta expressa deprehendatur. “ Quicquid vero hic dicit, nil differt ab eo, quod

quod in formulas algebraicas convenit, ut satis appareat loquentem omnem suam attentionem, in formulas istas direxisse ac verbis expressisse, quæ in iis acumine pervidendi abstracta in concretis discernimus. De hac scientia paulo clarius loqui videtur in Miscellaneis Berolinensibus pag. 23. affirmans, „esse superiorem Mathematica scientiam, „parem certitudine, majorem virtute atque efficacia, ubi rationes ideales, non tantum a sensibus, sed etiam ab imaginibus sejunguntur.“ Ope enim signorum heuristicorum seu ad inveniendum utilium in ideis contenta a sensu & imaginibus, hoc est, ideis confusis, quæ in sensu ac imaginatione existant, sejunguntur. Enimvero cum hæc verba proferat, dum mentionem injicit mundi cujusdam invisibilis ad quem provocat

Mreus, & in quo rationes rerum principiaque veritatesque arcanae, omnisque convenientiæ & certitudinis fontes laterent, & superioris illius scientiæ ideo aliquid pervidisse *Mreum* largitur; de suis potius monadibus, quam de arte combinatoria characteristica locutus esse videtur: sit ita quod per hanc artem ex mundo invisibili v. sibilis absque imaginibus solorum characterum legitima combinatione deduci debeat. Quod an ab ullo unquam homine fieri possit, definire nolo. Apertissime autem de arte ista loquitur in literis ad *Remondum* d. 10. Jan. & 14. Mart. 1714, quæ leguntur in libro Gallico, cui titulus: *Recueil de diverses pieces par Monf. Leibniz, Clarke, Newton*, Tom. 2. p. 129. & seqq. ubi eam speciosam generalem appellat eamque a characteristica totam pendere ac veritates ad formam calculi reducere affirmat; id quod in Artem characteristicam combinatoriam, qualem hic definimus, convenire partim ex ipsa definitione, partim ex sequentibus liquet.

§. 298.

Calculus in genere est inventio alicujus signi seu characteris derivativi ex aliis sive primitivis, sive derivativis per continuam æquivalentium substitutionem.

Calculi generalis definitio.

Non alia est notio calculi in genere, quæ a calculo vulgari arithmetico abstrahitur, eademque calculo communi arithmetico ac algebraico communis est. In Arithmetica habemus novem characteres simplices seu signa primitiva, quibus tamen, si ab unitate discesseris, characteres seu signa derivativa æquivalentia exhiberi possunt (*not. §. 339. Ontol.*). Omnis calculus eum in finem instituitur, ut ex figuris seu characteribus numerorum datorum sive primitivis, sive derivativis investigetur character plerumque derivativus numeri quæsit. Ita addentes numeros 314 & 522 reperimus summam 836. Sunt autem 314 & 522 signa

derivativa numerorum datorum ; sed 836 est character derivativus quæsitus. Totus autem calculus absolvitur per substitutionem characterum æquivalentium pro æquivalentibus. Ita ex numeris datis 314 & 522 reperturi summam, pro $2 \div 4$ substituimus 6. Est autem $2 \div 4 = 6$, adeoque hi duo characteres sibi invicem salva numeri quæsitæ quantitate substitui possunt (§. 349. *Ontol.*). Similiter pro $1 \div 2$ seu pro $10 \div 20$ substituimus 3 sive 30 ; pro $3 \div 5$ seu pro $300 \div 500$ substituimus 8 sive 800, quod $1 \div 2 = 3$ & $5 \div 3 = 8$. Non absimili modo sese res habet in operationibus arithmeticeis ceteris. Sane abacus Pythagoricus, quo in multiplicatione ac divisione utimur, non est nisi tabula characterum æquivalentium, qui sibi invicem substitui possunt. Ita quatuor bis summa denotantur per hunc characterem derivativum 4. 2, ubi punctum multiplicationis seu iteratæ positionis quaternarii signum est. Tabula vero Pythagorica exhibet huic characteri æquivalentem primitivum 8. Est enim $4 \cdot 2 = 8$. Unde in calculo pro 4. 2 substituitur 8. Similiter senarius novies sumtus denotatur per 6. 9 ; ei vero æquivalens character 54 exhibetur in abaco Pythagorico, in calculo pro isto substituendus. Similiter in Algebra cum idem Algorithmus obtineat, qui in Arithmetica communi obtinet ; vel inde intelligitur, calculum non posse consistere nisi in inventione signi derivativi ex aliis primitivis vel derivativis ope substitutionis signorum æquivalentium facta. Ita pro quantitate a in seipsam ducta sive aa substituitur a^2 ; pro radice ex a extracta \sqrt{a} vel $a^{1/2}$. Et in reductione æquationum continuo substituimus duos characteres sibi invicem æquales pro duobus aliis characteribus quantitates sibi invicem æquales exprimentibus. Notione hac calculi generali utemur etiam in subsequentibus, quamobrem eam hic notasse j. vat.

§. 299.

Modus inveniendi veritatem in arte combinatoria characteristica.

In arte combinatoria characteristica veritates inveniuntur per speciem quandam calculi. Etenim in arte characteristica notationes irresolubiles exprimuntur per characteres primitivos ac inde per combinationem eruuntur derivativi, ex quibus modo combinationis continuo variato elicitur character derivativus notionis antea nobis incognitæ, quæ invenienda erat (§. 297.). Enimvero si ex characterem seu signo uno derivativo per variationem modi combinationis eruitur alius character derivativus ;

unus substituitur in locum alterius, neque alia hic quam æquivalentium intelligitur substitutio, cum alias non appareat, quomodo in eodem tramite progredi possis, seu nulla adsit ratio, cur characterem hunc in locum prioris assumes. Quare cum per calculum reperiatur, quod per continuam characterum derivativorum æquivalentium substitutionem eruitur (§. 298.); in arte characteristica combinatoria veritates per calculi quandam speciem inveniuntur.

Quoniam Algebra species hujus artis est & ipsa quoque Arithmetica communis pro quadam ejus specie haberi potest; exempla ibidem obvia propositionem præsentem ejusque demonstrationem plurimum illustrent. In primis inde patet, quod in demonstratione affirmatur, scilicet characterem derivativum non posse substitui in locum alterius, nisi sit æquivalens. Sane in additione pro $3 + 4 + 9$ substitui nequit nisi 16, cum hic character sit priori æquivalens, adeoque hoc substituto respectu quantitatis numeri inveniendi perinde sit, sive ponas 16, sive 3, 4 & 9 simul. Similiter si in Algebra sit $abc = a^2x + ax^2$ & dividendo per a in locum æquationis prioris surroges hanc posteriorem $bc = ax + x^2$; æquatio posterior æquivalet priori, quatenus utraque continet omnes quantitates datas atque incognitam simul. Ac ideo quia hoc pacto alteri æquivalet, eidem substitui potest; non autem substitui posset alia, in qua quantitates omnes non ingrederentur, consequenter quæ æquivalens ei, cui substitueretur, minime esset. Hactenus adeo non habemus nisi calculum numerorum in Arithmetica & calculum magnitudinum in Algebra moderna sive speciosa. Antequam Arithmetica literalis esset inventa, de calculo magnitudinum ne per forum quidem quisquam cogitasset, immo plerique calculum magnitudinum in numerum impossibilem retulissent. Quamobrem non miramur, si qui ceteras calculorum species similiter in entium fictorum numerum referant. *Leibnitius* calculum situs dare intenderat, quo uteremur in Geometria, quoties ad situm redit quæstio, veluti si de lineis perpendicularibus, de lineis parallelis ac ad se invicem obliquis, de angulis sermo fuerit: cum tamen in intentione tantummodo habuit, minime autem perfecit, etsi dubitandum non sit eum multo faciliorem esse debere calculo qualitatum, qui ad speciosam illam generalem seu artem combinatoriam characteristicam requiritur. Ubi disciplinae magis fuerint excultæ, quam nunc quidem fieri solet, ars quoque inveniendi

majora capiet incrementa , cujus complementum est ars characteristica combinatoria.

§. 300.

*Qua ars
combinato-
ria chara-
cteristica
presuppo-
nat.*

Si per artem characteristicam combinatoriam quædam inveniendæ , notiones irresolubiles seu primitivæ in suo genere determinandæ , modique combinationum & variationum istarum possibiles ante determinandi. Etenim in arte combinatoria characteristica notiones irresolubiles seu primitivæ in suo genere signis primitivis exprimendæ sunt, primitiva autem signa combinanda veniunt, ut prodeant derivativa, modus denique combinandi variari debet, ut prodeat character derivativus notionis alicujus antea nobis ignora, sed quæ quæritur (§. 297.). Quamobrem si artem characteristicam in aliquo scientiæ genere exercere velis, necesse est ut notiones determinentur, quæ tanquam irresolubiles spectari debent. Requiritur præterea ut modi combinationum possibiles sint perspecti & ne lateant modi, quibus combinationes istæ variari possunt. Antequam igitur de arte characteristica combinatoria cogitare possis, notiones irresolubiles in dato genere determinare, diversos combinationis modos possibiles docere & variationem istarum combinationum detegere teneris.

Primum specimen artis combinatoriæ characteristiæ habuimus in Arithmetica, ubi notio irresolubilis est unitas, quæ ideo tanquam indivisibilis spectatur. Ex unitate derivantur numeri per ejus iteratam positionem, æque inde constituuntur notiones aliæ, quæ tanquam irresolubiles, subinde etiam tanquam resolubiles spectantur, prout commodum visum fuerit. Reducuntur modi numeros variandi ad numerum determinatum & axiomata seu regulæ generales utendi istis variationibus præmittuntur. Hisce demum præmissis de characteribus commodis, modoque eos combinandi ac combinatos variandi cogitare licuit. Sunt nimirum characteres primitivi 1, 2, 3, 4, 5, 6, 7, 8, 9, 0. Combinantur iidem per valorem localem ad denotandum numerum quemvis assignabilem, variantur per substitutiones characterum æquivalentium, quos exhibent tabulæ algorithmi, quarum vulgo tantummodo

modo construitur ea, quæ in usum multiplicationis ac divisionis servit, etsi etiam pro additione atque subtractione tales construi possint, ut ut facilitatis gratia, & quod iis carere possimus, omittantur. Ita vi tabulæ additionis characteres æquivalentes sunt, $3 \div 4$ & $7, 5 \div 2$ & $7, 6 \div 1$ & 7 , ita ut vi artis characteristica tres sint definitiones septenarii $3 \div 4 = 7, 5 \div 2 = 7, 6 \div 1 = 7$. Similiter tabula subtractionis suppeditat hos characteres æquivalentes $8 - 1$ & $7, 9 - 2$ & $7, 10 - 3$ & 7 , ut adeo denuo totidem prodeant ut ante definitiones characteristica, in quibus definitum & definitio æquivalent, $8 - 1 = 7, 9 - 2 = 7, 10 - 3 = 7$. Multiplicatio nullum dat characterem septenario æquivalentem: dat tamen divisio ope abaci Pythagorici scilicet $14:2$ & $7, 21:3$ & 7 ac ita porro, ut novem prodeant characteristica definitiones septenarii $14:2 = 7, 21:3 = 7, 28:4 = 7, 35:5 = 7, 42:6 = 7, 49:7 = 7, 56:8 = 7, 63:9 = 7$ & $70:10 = 7$. Quomodo vero characteres isti opportune sibi invicem substituantur, ut in dato casu prodeat character derivativus conveniens numero quæsito, regulis algorithmi docetur, immutabilibus legibus, quæ axiomatis continentur, superstructi. Idem in Algebra docere poteramus, quæ Arithmeticæ accessit tanquam alterum specimen ob agnationem cum eadem facile superaddendum. Extra Mathesin hætenus non occurrit in philosophia artis characteristica exemplum, quam in doctrina syllogistica de modis syllogismorum, quemadmodum dudum monui, cum Logicæ compendium in usum academicum Germanico idiomate ederem & monitum repetii in Logica Latina (not. §. 374.). Sed dabitur alia vice de hisce uberius differendi occasio. Quæ vero in propositione præsentè inculcantur, ad amissim ibi observata reperiēs. Quod si vero istius characteristica vim omnem intelligere volueris, respiciendum non modo est ad Vocales A, E, I & O, quibus propositionum qualitates & quantitates indignantur; verum etiam ad consonantes S, P, M & C, quibus conversiones & transpositiones propositionum designantur in reductione syllogismorum a secunda & tertia figura ad primam, quarum significatus a nobis non explicatur, quod tædiosam reductionis doctrinam prætermiserimus, ex libellis logicis communibus petendam.

§. 301.

Quoniam notæ irresolubiles in suo genere determinari nequeunt, nisi dentur rerum notiones adæquatæ (§. 95. 96. Log.), notionum vero adæquatarum investigatio seu notionum in no-

*Difficultas
artis combinato-
riae characteri-
sticæ inve-
niendæ.*

tas irresolubiles resolutio non adeo facilis, in tanta præsertim disciplinarum imperfectione, neque commoda signorum seu characterum inventio unicuique statim obvia; *Artis combinatoriæ characteristica generalis inventio difficillima est, nec ante in potestate erit, quam disciplinæ magi fuerint excultæ.*

Leibnitius jam A. 1675. ad *Oldenburgium* scribebat, se artis combinatoriæ characteristica mirabilem vim ac potestatem præceptis aliquando & speciminibus explicaturum, si sanitas ac otium fuerit. Ac ideo mox fore tempus affirmabat, quod de Deo ac mente non minus certa, quam de figuris numerisque habeamus: quo machinarum inventio non difficilior, quam constructio problematum geometricorum. Quamvis vero vitam omnem usque ad A. 1716. in otio literario consumserit, ad eam tamen excolendam animum nunquam appulit, difficultatem dubio procul expertus, quem non præviderat, ob notionem istius artis nondum satis evolutam. Hinc in literis ad *Remondum* A. 1714. datis, quas supra (not. §. 297.) laudavimus, equidem fatetur, se artem istam daturum, si esset ætatis nondum adeo profectæ minusque distractæ, aut alii juniores ad istiusmodi negotium apti suppetias ferrent; in aliis tamen p. 139. non diffidet, pro præsentis rerum suarum statu sibi hoc difficile esse, præsertim cum non adsint, qui ipsam animent & suppetias ferant. Si quis mente perpendit, qualis numerorum in Arithmetica, magnitudinum in Algebra, syllogismorum in Logica notio præsupposita fuerit, antequam characteristica ad numeros, magnitudines & syllogismos applicari potuerit, & quamdiu in Arithmetica atque Algebra commodi desiderati fuerint characteres; is difficultatem artis characteristica combinatoriæ generalis haud difficulter æstimabit, neque mirabitur *Leibnitium*, cujus diffusum ingenium in uno objecto continuo hærare non poterat, tanto temporis intervallo ne latum quidem unguem in arte ista progressum fuisse.

§. 302.

*Lingua &
Scriptura
universalis
definitio.*

Lingua universalis dicitur, quam omnes omnium linguarum gentes intelligere possunt. Similiter *Scriptura universalis* dicitur, quam omnes omnium linguarum gentes intelligere possunt.

Problema de lingua seu scriptura universali dudum exercuit eruditos, propterea quod commodissima foret eruditis ad conceptus suos cum

cum aliis communicandos. Electa fuerat ejus loco lingua latina, quam tamen unusquisque demum multo studio atque labore addiscere teneatur, cum scripturam universalem intelligere posset, etiamsi eam, quæ scribentierat, linguam non intelligeret. Inprimis vero nostra ætate lingua vel scriptura istiusmodi utilissima foret, qua lingua latina tantum non in desuetudinem abit, viris doctis sermone sibi patrio scripta sua exarantibus. Satis enim experimur, quam tædiosum sit tot addiscere linguas, ut libros exóticos legere ac ex inventis exterorum proficere possis. Et si igitur non improbemus, ut disciplinæ vernaculo quoque idiomate tradantur, idemque fecerimus ipsi omnes cum Mathematicos, tum philosophiæ partes Germanico idiomate in publicum proferentes, cum sic ad utilem rerum cognitionem perducantur etiam, qui sunt a studiis literariis alieni; displicet tamen, si promiscue omnia vernaculo sermone conscribantur, ea præsertim, quæ ad totius orbis eruditi notitiam pervenire consueverunt.

§. 303.

Lingua philosophica dicitur, in qua vocabula significatum essentialiter habent. Sunt autem *vocabula essentialiter philosophica significantia*, quæ sunt signa derivativa notionum distinctarum, & definitionum minimum definitionum.

Lingua philosophica inter desiderata numeratur. Fuere quidem & hos inter inprimis *Casparus Neumannus*, Theologus Vratislaviensis, qui vocabulis Hebraicis significatum essentialiter tribuerunt; ast non talem, qualem lingua philosophica requirit. In lingua enim philosophica vocabula distincte repræsentare debent determinationes rei intrinsecas, minimum tot, quot definitioni sufficiunt: ast juxta *Neumannum* in Clave domus Heber vocabula Hebraica significatum essentialiter tantummodo generalem habent, qui emphasi vocum declarandæ inservit, quatenus nempe apparet ratio denominandi a re desumpta ex ipsis literis vocabuli compositionem ingredientibus. Ita *Neumannus* vocabulum \square explicat per versatile versatile corpus, quia \square signum versationis & \square signum trinae dimensionis. Quare cum Astronomi recentiores ostenderint, stellas præter motum translationis motu quoque vertiginis continuo cieri; ad duplicem hunc motum in stellarum denominatione respici ab Hebræis colligit. Quod si vocabuli significatus essentialis esset; non modo duplex iste motus, sed alia etiam prædicata stellarum aliunde nondum cognita ex vocabuli inspectione innotescere deberent. Signi-

(*Wolffii Psychologia.*)

Ee

fica-

ficatus igitur vocum Hebraicarum essentialis, qualem iisdem tribuit vir ingeniosus, eo multo inferior est, quem lingua philosophica requirit.

§. 304.

*Signorum
derivati-
vorum in
arte chara-
cteristica si-
gnificatus
essentialis.*

In arte characteristica combinatoria signa derivativa significatum essentialem habent. In arte enim characteristica docetur, quomodo signa ad inveniendum utilia combinentur, & eorum combinatio certa lege varietur (§. 297.), consequenter quomodo notiones irresolubiles signis primitivis exprimantur & inde signa derivativa notionum distinctarum, hoc est, tam definitionum, quam propositionum determinatarum formantur (§. 293.). Quoniam itaque signum derivativum ingrediuntur signa primitiva illarum notionum, in quas resolvitur notio rei, cujus signum derivativum fuit repertum; ex ipso hoc signo derivativo patent ea, quæ notionem distinctam ingrediuntur, consequenter signum istud derivativum significatum essentialem habet (§. 303.).

Pars artis characteristicae combinatoriae est Arithmetica communis, qualem inventis notis numericis, quibus nunc utimur, habemus. Ponamus dari numeri hunc characterem 395. Est is utique signum derivativum constans ex tribus primitivis 3, 9 & 5 per valorem localem combinatis. Duplex nimirum significatus notis primitivis inest, quorum alterum a figura, alterum a loco aut, si mavis, ordine loci habent. Ita 5 vi figurae significat unitatem quinquies poni, seu esse $5 = 1 \times 1 \times 1 \times 1 \times 1$; vi loci versus dexteram primi, in quo collocatur, indigitat unitatem iterato sumendam hic esse digitum, seu unitatem primitivam, non amplius resolubilem. Similiter 9 vi figurae significat unitatem novies poni, hoc est, esse $9 = 1 \times 1 \times 1 \times 1 \times 1 \times 1 \times 1 \times 1 \times 1$; vi loci a dextera secundi, aut, si mavis, vi ordinis hujus loci, ob quem primus a loco dextimo, vel secundus a dextera numeratus dicitur, indigitat unitatem iterato sumendam esse decadem, adeoque derivativam, utpote resolubilem in unitates alias simpliciores, non amplius resolubiles, quales nimirum in loco primo occurrunt. Denique 3 vi figurae significat unitatem ter poni, seu esse $3 = 1 \times 1 \times 1$; vi autem loci indigitat, unitatem iterato ponendam esse centenarium, adeoque derivativam, utpote in decades resolubilem. Character igitur numeri 395

notionem ejus distinctam exhibet, atque analysin perfectam indigitat, qua adaequate comprehenditur. Etenim ex ipso caractere discimus numerum istum componi ex quinque digitis, novem decadibus, tribus centenariis, & unitates quinque primas esse irresolubiles adeoque, tanquam primitivas sumi; unitates novem habere ad irresolubiles rationem decuplam, & similiter unitates tres habere ad decades seu unitates derivativas primi gradus rationem decuplam. Nimirum, si cui libuerit, ope horum signorum distincte resolvere potest numerum propositum 395 in simplicissima sua elementa, quæ sunt unitates irresolubiles. Ex hoc unico exemplo abunde patere existimo, quomodo signis derivativis infit significatus essentialis. Latent profunda in obviis, modo acumine tuo ea digneris. Nostrium igitur est attentionem ad ea excitare, quæ vulgo non sine detrimento scientiæ negliguntur. Pars artis characteristica combinatoriæ est etiam Algebra speciosa, qua hodie utimur. Formulæ enim algebraicæ numerorum atque magnitudinum significatum utique essentialem habent. E. gr. in numeris polygonis tanquam primitiva sumuntur latus & numerus angulorum, quorum ille si dicatur n , hic vero a ; prodit formula pro numero polygono in genere $n^2(a-2) - n(a-4)$. Formula hæc exhibet notionem distin-

2

ctam modi, quo ex latere & numero angulorum numerus quilibet polygones inveniri potest: id quod cum Algebrae generis satis superque perspectum sit, a ceteris vero non intelligatur, ut distinctius explicetur supervacaneum foret. Demus potius exemplum a mathematico diversum. Monuimus ante, extra Mathesin hactenus non proflare exempla artis characteristicae combinatoriæ nisi in denominationibus modorum syllogismorum. Ostendi idem quoad vocales in opere Logico (§. 374.) ob rationem supra jam dictam (not. §. 300.). Non inconsultum tamen viderur, ut significatum essentialem exemplo aliquo simul quoad consonantes illustremus, cum sic amplior evadat. Primus modus secundæ figuræ dicitur CESArE. Literæ significativæ hic sunt C, E, S A & E. Tres vocales indignant, 1. syllogismus constare tribus propositionibus. Ordo literarum ordinem propositionum, ipsæ literæ propositionum quantitatem & qualitatem significant. Nimirum E primo loco occurrens indicat propositionem majorem esse 2. universalem quoad quantitatem, & 3. negativam quoad qualitatem. Litera A ordine secunda significat, propositionem minorem esse 4. quoad quantitatem

universalem, & 5. quoad qualitatem affirmativam. Denique litera E tertio loco posita indicat, conclusionem hujus syllogismi 6. quoad quantitatem esse universalem & 7. quoad qualitatem negativam. Litera initialis C, quæ eadem est cum litera initiali modi Celarent in prima figura, innuit 8. syllogismum hunc secundæ figuræ ad primum reductum esse in modo Celarent. Litera S significat 9. propositionem majorem vertendam esse simpliciter, ut scilicet prædicatum & subiectum invicem permutantur. Quia vocalem A nulla excipit consonans significativa, inde intelligitur 10. propositionem minorem in reductione syllogismi secundæ figuræ ad primam manere eandem. Similiter quia vocalem tertiam E nulla sequitur consonans, adeoque nec significativa; id indicio est 11. in reductione syllogismi, qui est in modo Cesare, a secunda figura ad primam conclusionem eandem retineri. Denique notandum exinde, quod denominationem ingrediatur consonans significativa S intelligi 12. syllogismum non esse in prima figura & ex litera E tertio loco posita eandem non esse in tertia: unde inferitur, eum esse in secunda. Quoniam de syllogismis nihil notandum, nisi quæ hic ex literis significativis denominationem ingredientibus deducta fuerunt; nomina hæc essentialiter significantium illustria exempla præbent, ut ad ea excitanda sit attentio, quam vulgo deficere constat.

§. 305.

Lingua & scriptura universalis unde pendeat.

In arte combinatoria characteristica signa derivativa seu characteres derivativi linguam quandam seu scripturam universalem constituunt. In arte enim characteristica signa derivativa significatum essentialem habent (§. 304.), adeoque ex iis intelligitur, quænam notionem rei distinctam ingrediantur, modo significatum signorum primitivorum tenuerit (§. 303.). Quare cum significatus signorum derivativorum nullam præsupponat linguam, & signa primitiva intelligi possint a quocunque mortalium, si significatus eorum in sua lingua eidem explicetur, vel alio quocunque modo insinuetur; signa derivativa in omni lingua intelligi possunt. Patet igitur beneficio artis characteristicæ combinatoriæ scribi posse, quæ omnes omnium linguarum gentes intelligunt, adeoque signa derivativa in

arte

arte characteristica combinatoria constituunt scripturam &, quatenus voce efferuntur, linguam quandam universalem (§. 302.).

Probant id exempla artis combinatoriæ characteristicae, qua prostant. Notæ numericæ in Arithmetica vulgari ab omnium linguarum gentibus intelligi possunt & numeri his signis scripti ab omnibus intelliguntur, quibuscunque tandem linguis utantur. Hinc tabulæ sinuum atque tangentium, itemque logarithmorum, quæ totæ ex numeris constant, in omni lingua usui esse possunt. Si quis noverit, quid denotent signa & characteres in formula algebraica; in omni lingua intelligere potest, quæ eadem de subiecto suo insinuat. Innotescunt autem significatus characterum primitivorum seu literarum, quibus quantitates designantur, etiam per relationem ad figuram delineatam absque ullo verborum apparatu. Unde in probatione propositionis præsentis dixi, perinde esse, five cui signorum primitivorum significatus in lingua ipsi vernacula explicetur, five quocunque alio modo insinuetur. Vocabula, quibus modi syllogismorum indignantur, sunt signa derivativa artis characteristicae. Sed si quis significatum vocalium A, E, I & O atque consonantium S, P, M & C habuerit perspectum; is in omni lingua ex istis vocabulis intelligere poterit, quæ de unoquoque modo tenenda sunt. Vocabula igitur, quæ sunt modorum in singulis syllogismorum figuris nomina, linguam quandam & scripturam de syllogismis universalem constituunt.

§. 306.

Signa derivativa in arte combinatoria characteristica *Lingua philosophicam* *linguam quandam philosophicam constituunt.* Signa enim ista *significatum* *essentialem* *habent* (§. 304.). Quare cum lingua *philosophica* *unde pendeat.* philosophica sit, in qua vocabula significatum essentialem habent (§. 303.); linguam quandam philosophicam constituunt signa derivativa in arte combinatoria characteristica.

Paret hoc ex nominibus modorum syllogismorum in qualibet figura. Etenim qui ad literas significativas in iis contentas animum advertit, & ex eorum significatu ratiocinatur; is in omni lingua illorum beneficio intelligit, quæ de quovis argumentandi modo demonstrantur in Logica, quemadmodum paulo ante uberius docuimus (not. §. 304.).

§. 307.

Lingua u-
niversalis
præstantis-
sima.

Quoniam ars combinatoria characteristica non modo speciem quandam scripturæ seu linguæ universalis (§. 305.); verum etiam speciem quandam linguæ philosophicæ exhibet (§. 306.); *Ars combinatoria characteristica speciem scripturæ philosophicæ offert ab ea, quam cogitarunt alii, prorsus diversam (§. 302.).*

Nimirum alii non intendunt nisi characteres communes, quibus unusquisque in sua lingua scribit & quos unusquisque in sua explicat, cum unusquisque characterum significatum in sua lingua explicet. Atque adeo nihil intenditur, nisi ut omnes intelligant in sua lingua, quod nos scripsimus in nostra (§. 302.). Exempli loco afferri solent characteres Sinensium, quibus præcipua pars eruditionis ipsorum continetur, quibusque res indigere solent. Etenim iidem a vocabulis independentes communes sunt Sinensibus & Japonensibus, etsi hi populi diversis linguis utantur, nec unus alterum intelligat lingua sua loquentem. *David Solbrigius* in *Continuatione prima Miscellaneorum Berolinensium* p. 32. & seqq. in usum *linguæ æcumenicæ* seu universalis commendat notas numericas Lexicorum beneficio ad significatum rerum transferendas: ast nihil in his derivativi est, quod ad linguam philosophicam simul utile sit. Neque enim qui de lingua universali cogitant, eandem simul philosophicam esse debere volunt. Observavit hoc jam *Leibniti* in supra laudatis (not. §. 297.) ad *Remondum* literis, præstantiam artis combinatoriæ characteristicæ, seu, speciosæ universalis commendaturus, atque ex eo colligitur, quod non aliam ejus habuerit notionem, quam eam, quæ a nobis explicata fuit, neque dubium ullum superest, quod notionem illius artis ab Algebra abstraxerit. Hæc nimirum ipsi sese tanopere probavit, ut in omni scientiarum genere simile quid proflare optaverit. Hinc vidimus ipsum cogitantem de analysi situs (not. §. 299.), ut in Geometria singula per modum calculi tradi possent. Constat etiam ipsum cogitasse de analysi genuina numerorum, cum Algebra, quam ad problemata arithmetica applicare solemus, sit analysis magnitudinum, adeoque ad quantitatem continuam spectet, non ad discretam, nec ad discretam applicetur, nisi quatenus continua per eam explicabilis: quem in finem *Arithmetice binariæ* destinaverat, in qua numeri omnes resolvuntur in 1 & 0,

Enim-

Enimvero quemadmodum in Analyfi situs non invenit, quod satisfaceret; ita nec in numerorum Analyfi tantum profecit, quantum voluiffet, quod nimis effret diftractus.

§. 308.

Quoniam in illa fpecie linguæ univerfalif, quam Ars *Lingua univerfalif abfque Lexico addifcenda.* combinatoria characteriflica offert, vocabulorum vicem tuentur characteres feu figna derivativa (§. 293. 297.); pauca vero primitiva, ex quibus componuntur, abfque Lexici alicujus ufu in unaquaque lingua addifci poffunt; *Ifta linguæ univerfalif fpecies, quam ars combinatoria characteriflica promittit, abfque omni Lexici fubfidio addifci poteft.*

Atque hæc infignis prærogativa eft linguæ hujus univerfalif præ ceteris, de quibus hætenus cogitarunt alii. Etfi autem lingua hæc univerfalif multo facilius intelligi poffit, quam alia quæcunque, quæ primitivis utitur characteribus, faltem quoad fignificatum; inventu tamen multo difficilior eft (§. 301.). Ceterum veritatem propofitionis præfentis firmat modus fcribendi numeros, confirmant etiam nomina modorum fyllogifmorum in qualibet figura. Etenim notarum numericarum primitivarum fignificatum unusquisque in fua lingua addifcit, & abfque Lexici alicujus fubfidio deinde intelligit numeros a quocunque fcriptos, quacunque lingua is eisdem pronuciare foleat. Similiter fignificatum vocalium & confonantium SPM & C unusquisque in fua lingua difcit in Logica, vocabulorum autem, quibus modi fyllogifmorum indigitantur, fignificatum abfque Lexico unusquisque intelligit, quacunque lingua utatur, etiamfi ante doctrinam fyllogifticam non didicerit.

§. 309.

Signa derivativa artis combinatoriæ characteriflicæ in- Artis characteriflica ferviunt æftimando gradui probabilitatis, ubi ob data infuffi- *combinato-* cientia ad veritatem certam pervenire non poffumus, oftendunt- *ria ufus in* que quid fuppleri adhuc debeat, ut probabilias in certitudinem *æftimenda* abeat. Etenim figna derivativa artis combinatoriæ characteriflica continent in fe primitiva, per quæ determinatur id, cui *probabili-* derivativum refpondet (§. 296. 297.), confequenter requifita *tate.* ad veritatem omnia (§. 573. Log.). Atque ideo ex figni derivativi nuda

nuda inspectione patet, num in dato casu requisita ad veritatem omnia sint perspecta, an quædam ignorentur. Quare cum veritatem certo cognoscat, qui omnia requisita ad eandem agnoscit (§. 574. *Log.*) probabilitatem vero tantummodo habeat, qui prædicatum subiecto tribuit ob quædam requisita ad veritatem (§. 578. *Log.*), eamque tanto maiorem, quo plura requisita ipsi fuerint perspecta, tanto autem minorem, quo plura quis ignoraverit; signa ista derivativa gradui probabilitatis æstimando inserviunt, ubi sufficientia data ad veritatem perveniendi liquidam desunt.

Enimvero quoniam ex ipso signo seu charactere derivativo apparet, quænam requisita ad veritatem adhuc desint, his autem simul perspectis veritas certa cognoscitur (§. 574. *Log.*); quænam suppleri debeant, ut veritas certo cognoscatur in dato casu per signa derivativa artis characteristicae utique patet.

Signa derivativa in arte characteristica hunc habent usum, quatenus definitiones (§. 580. *Log.*) & propositiones determinatas (§. 583. 584. *Log.*) repræsentant. Intercedit tamen adhuc insignis aliqua differentia inter definitiones ac propositiones determinatas communi more & characteristice expressas, quatenus in expressione posteriori continetur notio adæquata vi characteris resolubilis, quemadmodum ex datis superioribus exemplis (*not.* §. 304.) intelligitur. Commendavit ob hunc insignem in deliberationibus de negotiis humanis usum artem combinatoriam characteristicam in sæpius laudatis ad *Remondum* literis p. 131. *Leibnitius*. Nostrum igitur fuit vi nostrorum de probabilitate principiorum ex notione artis combinatoriae characteristicae idem deducere, ut appareat tum illorum fecunditas, tum notionis hujus cum notione *Leibnitiana* identitas.

§. 310.

*Quanam
ars chara-
cteristica
combinato-
ria memo-
riae suppe-
tias ferat.*

Ope artis combinatoriae characteristicae notiones rerum distinctæ, immo adæquate memoriae facile mandantur eademque retinentur. In arte enim combinatoria characteristica notio rei distincta, immo adæquata paucis signis seu characteribus

ribus

bus primitivis inter se combinatis exprimitur (§. 293. 294.). Quamobrem si quis ideam istius signi derivativi memoriæ imprimit eandemque retinet; is notionem distinctam, immo adæquatam rei signo denotatæ memoriæ infigit eandemque retinet. Quoniam itaque extra omne dubium est characterem istiusmodi derivativum facilius memoriæ mandari ac retineri posse, quam plurimæ propositiones retinentur, quæ notionem signo hoc denotatam ingrediuntur & in quas ea beneficio hujus signi resolvable; ope artis combinatoriæ characteristicæ notiones rerum distinctæ, immo adæquatæ memoriæ facilius mandantur eademque retinentur, quam absque ejus auxilio id fieret.

Evidentissime idem loquuntur nemina modorum in diversis syllogismorum figuris. Vidimus paulo ante, quantus propositionum numerus in unica voce *Cesare* contineatur, quæ quod non eadem facilitate memoriæ mandari ac retineri possint, quæ vocabulum istud eidem infixum retinetur, nemo profecto asseveraverit. Et hæc sane ratio impulit vocabulorum istorum inventorem ad eadem in Logicam introducenda, ne doctrina syllogistica ad præcavendos errores ex vitio formæ oriundos adeo necessaria oblivioni tradatur: quem in finem quoque signorum primitivorum significatus versiculis memorialibus comprehensus fuit. Usus adeo iste præclarus artis combinatoriæ characteristiciæ dudum innotuit, etsi *Leibnitius* in literis sæpissime laudatis nullam ejus fecerit mentionem.

§. 3II.

Ope artis combinatoriæ characteristiciæ facillime remini- *Suppetia*
scimus singulorum ad notionem rei distinctam pertinentium, cer-
utique sumus nos nihil eorum, quæ ad eam pertinent, prætermi-
tere. Signum nimirum derivativum, quo in arte combinatoria characteristica res quædam denotatur, componitur ex signis primitivis singulorum, quæ notionem distinctam ingrediuntur (§. 296. 297.). Quare cum significatum signorum primitivorum familiarem experiatur, qui artis combinatoriæ characteristiciæ signa derivativa intelligere vult; signa primitiva singula in signo derivativo contenta ea in memoriam revocant, quæ ad
(Wolffi Psychologia.) Ff no-

notionem rei distinctam requiruntur (§. 228.); & hinc eorum facile reminiscimur, quæ ad rei notionem distinctam pertinent (§. 230.). Quoniam itaque plura ad eam non spectant, nisi quæ per ista in memoriam revocantur, certus autem jam es, te singula tibi in memoriam revocasse, quæ signis illis primitivis indigentur; evidens omnino est beneficio artis characteristica combinatoriæ nos certos esse posse, quod nihil eorum, quæ de re didicimus, oblivioni dederimus, nec in præsentem quicquam eorum prætermittamus, quod ad notionem ejus distinctam spectat.

§. 312.

*Reductio
cognitionis
symbolicæ
ad quasi in-
tuitivam.*

Ope artis combinatoriæ characteristica cognitio symbolica convertitur quasi in intuitivam, etiam in eo casu, ubi cognitio intuitiva distincta haberi nequit. In arte combinatoria characteristica notiones irresolubiles signis primitivis exprimuntur, & inde signa derivativa notionum distinctarum formantur (§. 293. 294.), atque adeo notiones distinctæ veluti oculis spectandæ exhibentur (§. 292.), quatenus nempe singula signa primitiva eorumque combinationem in signo derivativo intuemur. Quoniam in arte characteristica combinatoria signis repræsentamus, quæ in ideis continentur, & hæc intuemur (§. 297.); cognitio in eadem symbolica est (§. 289.). Enimvero quia signa primitiva & modus, quo combinantur, ea nobis in memoriam revocant, quæ in notione symbolice repræsentata seu characteristice expressa continentur (§. 228.), ut singulorum, quæ rei insunt, recordemur (§. 230.); hoc ipso ea, quæ in re symbolice repræsentata continentur, veluti in ideis suis intuemur, adeoque ad intuitivam veluti cognitionem cognitio symbolica reducitur (§. 286.).

Quoniam in arte characteristica combinatoria characteres conduntur derivativi eodem modo pro substantiis rerum materialium & entibus quibusvis abstractis, ut ea, quæ ab-

stra-

fractis insunt, vi signorum seu characterum primitivorum inter se combinatorum exhibeantur per modum partium, ex quibus tanquam totum aliquod componantur; abstracta istiusmodi nobis exhibemus tanquam entia composita, in quibus partes compositionem ingredientibus earundemque nexum a se invicem distinguimus, adeoque symbolica hac representatione veluti ad intuitivam cognitionem reducuntur *per demonstrata*. Enimvero cum res intuitive cognoscamus, quatenus idearum, quas de iis habemus, nobis conscii sumus (§. 286.), abstracta vero tanquam a re percepta sejuncta spectari debeant (§. 282.); in iis præferim, quæ a sensu valde remota sunt, cognitio intuitiva distincta vix ac ne vix quidem, immo prorsus non haberi potest. Patet igitur artem combinatoriam characteristicam cognitionem symbolicam convertere quasi in intuitivam etiam in iis casibus, ubi cognitio intuitiva distincta haberi nequit.

Exempla luculenta præbent formulæ algebraicæ, qualem pro numeris polygonis in genere (*not.* §. 304.) exhibuimus. Numerus polygonus in genere est ens maxime abstractum, & ortus ejus ex latere atque angulorum numero multo magis in eundem numerum referendus. Jam formula $n^2(a-2) - n(a-4)$, ubi n latus, a numerum an-

2

gulorum denotat (§. 210. *Analys.*), repræsentat ortum numeri polygoni in genere ex latere atque angulorum numero tanquam ens compositum ex duabus partibus $\frac{1}{2}n^2(a-2)$ & $\frac{1}{2}n(a-4)$, quæ denuo ex partibus aliis n^2 & $a-2$ atque n & $a-4$ componuntur, & signa — atque () ostendunt, quomodo partes istæ inter se jungantur, Characteres tam speciosi, quam numeri nobis in memoriam reveant, quæ ortum numeri polygoni ingrediantur, & signa combinationum ostendunt, quomodo ad eandem concurrant. Atque ita vi formulæ distincte quasi percipimus ortum numeri polygoni in genere ex latere ac angulorum numero & eundem quasi coram intuemur: ita ut nobis conscii simus singulorum, quæ successive fieri debent, ut numerus quilibet polygonus prodeat veluti res quædam in natura rerum orta, certique simus nihil eorum prætermitti, quæ ad ortum istum necessaria sunt, nihilque alio ordine poni, quam quo alterum excipere debet. Ad

singula signa singulosque characteres attenti notiones nobis in memoriam revocamus, quæ iisdem respondent, ut adeo perinde sit ac si in toto aliquo ex partibus compositio partes earundemque nexum intueremur. Habemus adeo beneficio formulæ algebraicæ intuitivam quasi cognitionem ortus numeri polygoni cujuscunque ex latere atque angulorum numero, etsi is non sit ex numero eorum, quæ in sensum cadunt, nec in numerum rerum materialium ex aliarum compositione ac immutatione oriri solitarum. Non minus laculenta sunt exempla, quæ ad illustrandum propositionem præsentem præbent nomina modorum syllogismorum in singulis figuris. E. gr. Nomen modi primi in figura secunda CESARE repræsentat hunc modum tanquam exs ex variis partibus certo quodam modo inter se junctis compositum, quatenus constat ex literis significativis, quæ hoc potius, quam alio ordine sese excipere debent. Literæ istæ ac ordo, quo se invicem sequuntur, in memoriam revocant singula prædicata huic modo tribuenda, ut eadem tanquam partes in re contentas intuearis quasi. Atque ita cognitio mere abstracta & symbolica ad intuitivam quasi revocatur, ut, si vocabulum intuearis, omnium de hoc modo argumentandi tibi perinde conscius sis, ac si ens quoddam compositum intuens tibi conscius es partium in eodem contentarum. Ita a sensu avocata & ab imaginibus separata, ut distincta fierent ac præcisa, nihil prorsus confusi admixtum habentia, ad sensum rursus ac imagines revocantur, ut claritas, quam perdiderant, restituatur, sicque omnis redeat utilitas, quam cognitioni offert sensus. Et hoc pacto cognitioni, quæ ab arte characteristica combinatoria pendet, proprium est, quicquid in cognitione intuitiva & symbolica utile; ab ea autem alienum est, quicquid imperfecti in utraque occurrit.

§. 313.

*Intellectus
puri & non
puri definitio,*

Intellectus dicitur *purus*, si notioni rei, quam habet, nihil confusi admiscetur nihilque obscuri. *Non purus* dicitur, si notioni rei insunt, quæ confuse aut prorsus obscure percipiuntur.

Notiones numerorum pertinent ad intellectum purum, quatenus nobis sunt adæquata: hinc enim iis nihil confusi, nihil obscuri admiscetur, cum tandem perfecta analysi resolvantur in notionem unitatis (§. 339. *Ontol.*). Dedimus jam supra exemplum, in quo numerum 395 analysi perfecta ad notionem solius unitatis reduximus (*not.* §. 304.), ut adeo in tota numeri cujuscunque notione nihil supponatur, quod con-

confuse, vel saltem prorsus confuse percipiamur. Unde notiones numerorum ad adæquatas proxime accedunt, & intellectum purum qualis sit produunt. Cum quantitates in abstracto spectatæ, quales in Algebra consideramus, sint numeri indeterminati; formulæ algebraicæ intellectui puro illustrando inserviunt, etsi notiones iis respondentes non prorsus tales sint, quales intellectus purus exigit, cum quantitates referantur ad continuum, cujus confusa tantum hic est notio, utpote prorsus imaginaria. In Physicis & Moralibus intellectus minime purus est, cum notiones, quas ibidem habemus, adæquatæ non sint, analysin perfectam, quæ in irresolubilibus sua natura talibus terminatur, minime admittentes. Ex systematica enim tractatione apparet, nos in confuse perceptis subsistere & confusas quasdam notiones pro primitivis seu irresolubilibus assumere.

§. 314.

Quoniam perceptiones confusæ ad facultatis cognoscendi partem inferiorem spectant (§. 54.), sensum nempe atque imaginationem (§. 67. 92.); *Intellectus purus est, si a sensu atque imaginatione liber est, & in tantum quidem purus est, in quantum a sensu atque imaginatione liber.* *Intellectus quando purus.*

In numerorum doctrina nullam supponimus notionem primitivam, nisi unitatis, adeoque non opus est ullam supponi notionem confusam, nisi unitatis. Quoniam numeri deinde omnes (§. 339. *Ontol.*), etiam fracti (§. 399. *Ontol.*) & irrationales (§. 405. *Ontol.*) in unitates resolvuntur; singulis quoque nihil confusi adheret, nisi quod ab unitate trahunt. Quodsi notio unius quæratur distincta, qualem in philosophia prima (§. 328. *Ontol.*) & in Mathesi Latina (§. 3. *Arithm.*) dedimus; notio quoque unitatis ab omni propemodum, quod est confusum, liberatur. Quamobrem in numerorum cognitione intellectus a sensu atque imaginatione propemodum prorsus liber est, ut adeo notiones numerorum intellectum purum, qualis vi propositionis præsentis esse debet, maxime illustrent. Conferunt quoque aliquid ad hunc scopum formulæ algebraicæ ad figuras relatæ. Etenim vi characterum, quæ de figura distincte concipiuntur, ab imagine ejusdem, qua eam nobis vi imaginationis aut sensus repræsentamus, separamus & ab imaginibus ita abstracta beneficio formulæ concipimus: immo in calculo analytico nihil prorsus nobis cum figuris negotii est. Intellectus igitur eatenus purus est, quatenus ab ima-

ginibus separata per characteres combinat & combinationem variando veritatem investigat. Unde apparet, in arte combinatoria characteristica intellectum ad purum magis accedere, quam in cognitione symbolica, qua utimur, communi. Ad hanc artem combinatoriam characteristicam igitur preparamur, si notiones rerum ab imaginibus separemus, eas continuo resolvendo in alias simpliciores. Atque ea ratio nos impulit, ut in philosophia prima demonstraverimus, quæ facile absque demonstratione concedunt omnes ac ideo ipse *Euclides*, demonstrator rigidissimus, sumit, quamvis facile prævideremus, fore bene multos, quibus nugari videamur, propterea quod nondum prospiciant utilitatem, quam nos reipsa experti sumus, & quæ ex secuturis disciplinis magis elucescer, immo quam experientur omnes, quotquot intellectum purum excolent summam in cognitione rerum evidentiam consecuturi. Non moramur aliorum judicia, quamdiu nobis veri ac recti consensum sumus. Ceterum vel ex his ipsis a nobis allatis exemplis pater, intellectum purum non esse figmentum Mathematicorum, quemadmodum memini objici ab iis, qui nullam ejus notionem habent imaginibus nimium additi, immo partem facultatis cognoscendi superiorem ab inferiori non satis distinguunt.

§. 315.

Cur intellectus noster nunquam prorsus purus.

Quoniam nos notionum nostrarum analyfin in iis terminare solemus, quæ ope sensuum clare quidem, attamen confuse percipimus; *intellectus* a sensu atque imaginatione nunquam liber est, consequenter *nec unquam prorsus purus est* (§. 314.).

Facti probatio ab experientia pendet. Non igitur opus est, quam ut notiones nostras excutiamus. Omnium vero optime hoc intelligitur, si disciplinæ nostro more in systemata inter se connexa redigantur. Quodsi enim vi citationum notionem aliquam resolvamus, donec perveniamus ad eas, quæ non amplius resolvuntur in alias; exemplo apparet, utrum notiones istæ, quas tanquam primitivas spectamus, contineant quidpiam nonnisi confuse perceptum, atque claritatem ab imaginibus trahant, nec ne. Quodsi phænomena mundi materialis seu visibilis, ex notione elementorum seu substantiarum simplicium, quæ mundum quendam invisibilem constituunt, a priori deducere valeremus; cum sic cognitionem universi ab imaginibus separaremus, illustre co-

gnitionis ad intellectum purum spectantis exemplum haberemus, quod ad cognitionem mundi divinam aliquanto propius accederet, quemadmodum ex Theologia naturali manifestum evadet.

§. 316.

Notio intellectus, quam dedimus, communi usui loquendi non contrariatur; inconstantie tamen loquendi contraria. *Notio intellectus an usui loquendi conveniat.*
 Non ignotum est vulgo brutis tribui sensum atque imaginationem; denegari autem intellectum. Ad intellectum igitur referri debet cognitio, quæ ab ideis sensualibus atque phantasmatis distincta est. Sensuales ideæ atque phantasmata sunt illæ rerum imagines, quibus confuse repræsentantur cognoscibilia, quod satis in nobismetipsis experimur, modo ad sensationes nostras (§. 95.), quibus res præsentis percipimus (§. 59. 65.) & perceptiones rerum absentium, quas habemus, attendamus (§. 92. 93.). Ad intellectum igitur pertinet distincta rerum perceptio. Quamobrem intellectus definiri debet per facultatem res distincte repræsentandi, quemadmodum fecimus (§. 275.). Quare cum usum loquendi observet, qui vocibus seu terminis eas tribuit notiones, quibus res repræsentantur iis in communi sermone indigitatæ (§. 139. Log.); notio nostra intellectus communi usui loquendi non contrariatur.

Enimvero nemo ignorat, sæpissime intellectus vocabulum sumi pro facultate cognoscendi omni, quocunque modo cognoscibile nobis repræsentemus, sive confuse, sive distincte: quo in significato etiam sensum atque imaginationem, seu totam facultatis cognoscendi partem inferiorem sub eadem complectimur. Quare cum vocabulum intellectus communi loquendi usu nunc sumatur pro sola facultate cognoscibilia distincte repræsentandi in sensu strictiori; nunc pro omni facultate cognoscendi in sensu latiori: communis usus loquendi inconstans est. Quoniam vero nos vocabulo intellectus fixum tribuimus significatum, a quo ut recedatur nefas existimamus

(§. 143.)

(§. 143. *Disc. præl.*); notio nostra intellectus inconstantia loquendi contrariatur.

In notione igitur intellectus determinanda observavimus leges methodi. A recepto enim vocabuli hujus significato non recedimus (§. 142. *Disc. præl.*); idem tamen in eodem significato constanter adhibemus (§. 143. *Disc. præl.*).

§. 317.

*Cognitionis
universalis
definitio.*

Cognitio universalis dicitur, quæ constat notionibus universalibus.

Quanam notiones sint universales, alibi dudum docuimus (§. 54. *Log.*).

§. 318.

*Quanam
ad eam re-
ferantur.*

Quoniam notiones generum & specierum sunt universales (§. 54. *Log.*), & propositionibus universalibus respondentes notiones (§. 520. *Log.*) non minus universales esse intelliguntur; *Notiones generum & specierum atque propositionum universales ad cognitionem universalem spectant.*

Ita in Elementis Geometriæ traditur cognitio universalis. Etenim in iis non occurrunt nisi definitiones generum ac specierum atque propositiones universales. Quicquid igitur in Elementis Geometriæ occurrit; ad cognitionem magnitudinis universalem spectat. Immo disciplinæ in universum omnes cognitionem rerum universalem nobis offerunt.

§. 319.

*Cognitionis
singularis
definitio.*

Cognitio singularis dicitur, quæ universalis non est, aut, si mavis, quæ constat notionibus individuorum.

Entis universalis & singularis differentia, quæ hic supponitur, alibi jam a nobis explicata fuit (§. 225. & seqq. *Ontol.*).

§. 320.

*Quanam
ad eam re-
ferantur.*

Quoniam facta hominum atque naturæ, quæ actu contingunt vel olim contingere, omnimode determinata (§. 226. *Ontol.*), adeoque individua sunt (§. 227. *Ontol.*); *factorum tam hominum, quam naturæ actu contingentium cognitio singularis est (§. 319.).*

Facta

Facta hominum & naturæ recensentur in historia; illa quidem in historia simpliciter sic dicta, hæc vero in historia naturali. Cognitionem adeo singularem historia nobis offert.

§. 321.

Cognitio particularis est, quæ notionibus particularibus constat. Dicitur autem *Notio particularis*, qua ea repræsentantur, quæ quibusdam individuis ad idem genus, vel eandem speciem referendis communia sunt. *Cognitionis particularis definitio.*

Condimus definitionem notionis particularis ad imitationem definitionis, quam de universali notione dedimus (§. 54. Log.).

§. 322.

Quoniam igitur omni propositioni (§. 520. 521. Log.), Quenam adeoque & particulari, notio quædam respondet; quæ propositioni particulari respondet notio, & ipsa particularis intelligitur. *ad eam referantur.* Ad cognitionem itaque particularem propositiones particulares spectant.

Propositiones particulares nullum sibi locum vindicare videntur in disciplinis. Neque enim ad historiam referri possunt, quæ singulares tradit propositiones ac notiones individuorum: neque ad scientiam spectant, utpote quæ universalis est. Quamobrem adhuc ostendendum est, quemnam usum habeat cognitio particularis & ubi eadem tradenda.

§. 323.

Si notio subjecti, sub qua prædicatum ei convenit, sufficienter determinari nequit; propositiones particulares condendæ sunt. Etenim si notio subjecti, sub qua prædicatum ei convenit, sufficienter determinari nequit, cum posita determinatione subjecti ponatur quoque prædicatum sub eadem eidem tribuendum (§. 131. Ontol.); ignoratur utique, quandoam individuo sub dato genere, vel data specie contento prædicatum tribui debeat, consequenter individua ista sub notione quadam universali, tanquam genere quodam accidentali, hoc est, ex determinationibus accidentalibus ad imitationem generum ex *Propositio- nes quando particula- res condenda.*

(Volfii Psychologia.) Gg deter-

determinationibus essentialibus constitutorum formato, comprehendendi nequeunt. Quamobrem fieri nequit, ut propositio universalis condatur (§. 242. Log.). Quoniam itaque subiectum propositionis terminus communis est, species nampe vel genus; prædicatum vero nonnisi sub quibusdam determinacionibus accidentalibus definitioni generis, vel speciei superaccedentibus convenit, quæ cum ignorentur non constat, quænam sint illa individua, quibus simul sumtis prædicatum istud tribui debeat; propositio nonnisi particularis condi potest (§. 243. Log.).

Exempla occurrunt in superioribus (§. 182. & seqq.). Observamus alios pluribus actibus iteratis facilitatem ideas reproducendi & reproductas recognoscendi sibi comparare; alios paucioribus actibus iteratis ad id opus habere (§. 182.). Enimvero non observamus simul determinationes in subiecto prærequisitas, ut vel pluribus, vel paucioribus actibus repetitis istam facilitatem sibi compareret. Quamobrem fieri nequit, ut duo quasi genera hominum, aut, si mavis, duas quasi species eorundem constituamus, ex quorum notionibus deducatur facilitas ideas reproducendi reproductasque recognoscendi vel pluribus, vel paucioribus actibus iterandis tanquam prædicatum, consequenter hæc propositiones duæ universales formari possunt, quæ sint determinatæ, & in quibus prædicatum unumquodque assignetur suo subiecto, cui convenit. Quoniam itaque tanrummodo constat, esse quædam hominum individua, quibus facilitas ideas reproducendi & reproductas recognoscendi paucioribus actibus iteratis comparatur; esse etiam quædam, quibus eadem pluribus actibus iteratis acquiritur; propositiones omnino condere non licet nisi has particulares: *Quidam homines paucioribus actibus iteratis facilitatem ideas reproducendi reproductasque recognoscendi sibi comparant & Quidam homines pluribus actibus iteratis facilitatem ideas reproducendi reproductasque recognoscendi sibi comparant.* Idem eodem modo patet in exemplis centenis aliis, cum propositiones indeterminatæ multo frequentiores sint determinatis.

§. 324.

*Propositio-
num parti-
cularium
locus.*

locus est.

*Propositionibus particularibus in doctrina probabilium
Etenim si propositio particularis est, quædam saltem deter-*

determinationes nobis perspectæ sunt, ob quas prædicatum sub-
jecto tribuendum, non vero omnes (§. 243. *Log.*). V. gr. Novi-
mus saltem subjectum ad hoc genus, vel hanc speciem referri
debere, non autem perspectas habemus determinationes acci-
dentales, quæ determinationibus essentialibus, quibus genus
vel species constituitur (§. 247. *Ontol.*), superaccedere debent,
ut prædicatum eidem tribui possit, vel, si quæ etiam determi-
nationes accidentales ad hoc requisitæ adsint, non tamen omnes
perspectæ sint, cum alias propositio foret universalis (§. 242.
Log.). Quare cum in propositionibus hypotheticis requisita
ad veritatem sint definitio atque conditio adjecta, seu definitio
atque determinatio subjecti (§. 584. *Log.*), qua nempe ejus status
determinatur, in quo prædicatum ei tribui potest (§. 228. *Log.*);
propositio autem tantummodo probabilis sit, si prædicatum
subjecto tribuitur ob quædam requisita ad veritatem (§. 578.
Log.); propositionum quoque particularium usus esse nequit,
nisi ubi probabilia admittuntur, adeoque in doctrina probabilium
locus iisdem est.

Quando itaque doctrina probabilium magis excoletur, propositio-
num quoque particularium usus magis cluescet.

CAPVT III.

De tribus intellectus operationi-
bus in specie.

§. 325.

Tres sunt intellectus operationes (quas vulgo mentis opera-
tiones vocamus); quibus circa cognoscibilia versamur, operatio-
notio cum simplici apprehensione, judicium & discursus. *Numerus*
Propositionem hanc jam demonstravimus in Logica (§. 52.), *lectus.*
quam demonstrationem ibidem vide.

Doctrina de operationibus intellectus ad Psychologiam spectat, in qua propria ejus sedes est. Quoniam tamen in Logica docetur, quomodo operationibus mentis sit utendum ad veritatem investigandam & inventam ab aliis agnoscendam; quædam de operationibus mentis erant præmittenda, ne deessent principia, unde regulæ logicæ demonstrarentur. Atque ideo capite quodam integro de tribus mentis operationibus in genere ea proposuimus, quæ in Psychologia tradenda fuerant. Quoniam tamen hic denuo proponere non liber, quæ ibidem legi possunt; talia nunc potius persequemur, quæ ibidem dicta non sunt, nisi quatenus quædam repeti consultum videtur, quod ex anterioribus ulterior quædam lux iisdem affundi possit.

§. 326.

Prima intellectus operatio in cognitione intuitiva,

Si in cognitione intuitiva acquiescimus, prima intellectus operatio absolvitur, dum in ideis duorum vel plurium individuorum simul nobis occurrentibus ad ea successive attentionem dirigimus, quæ in iisdem eadem sunt. Dum enim attentionem nostram successive dirigimus ad ea, quæ in ideis duorum vel plurium individuorum simul nobis occurrentibus eadem sunt; magis nobis conscii sumus, quod jam in pluribus eadem percipiamus, quam quod percipiamus alia (§. 235. & 237.), atque adeo operatione intellectus ea a subjectis, quibus insunt, quasi separamus. Distincte igitur percipimus, quæ ad genus vel speciem illarum rerum pertinent (§. 38. 283.), consequenter genera & species nobis distincte repræsentamus (§. 24.). Quare cum generum & specierum repræsentatio sit notio (§. 49.), distincta autem notio intellectus operatio sit (§. 275.) eaque prima (§. 53. Log.); si in cognitione intuitiva acquiescimus, prima mentis operatio absolvitur, dum in ideis duorum, vel plurium individuorum simul nobis occurrentibus ad ea successive attentionem dirigimus, quæ in iisdem eadem sunt.

Hoc modo patet, quomodo nobis genera & species rerum in universali repræsentare debeamus. Quod alius non datur modus in cognitione intuitiva genera & species rerum repræsentandi, ex eo intelligitur, quod universalia, seu genera & species non existant nisi in singularibus

ribus (§. 56. Log.) & ad notionem entis in universalis non pertineant nisi determinaciones intrinsecæ pluribus singularibus, seu individuis communes (§. 230. Ontol.). Ponamus e. gr. duas arbores, cerasum atque prunum, oculis nostris una objici, ita ut utramque uno intuitu comprehendere valeamus. Quodsi jam attentionem nostram ad folia utriusque arboris simul dirigimus; nobis conscius sumus, nos in utraque percipere folia, & magis quidem conscius sumus, quam quod alia vel in iisdem arboribus, vel extra eas una percipiamus. Quodsi jam porro attentionem nostram promovemus ad iurculos in utraque arbore simul; eorundem eodem prorsus modo conscius nobis sumus. Et idem tenendum est de ramis atque truncis. Hac ratione absque omni vocabulorum vel aliorum signorum usu ea nobis distincte representamus, quæ arboribus communia sunt, atque adeo notionem hujus generis ingrediuntur, quod arboris nomine indigitamus. Atque ita simul intelligitur, quid sit mente separare ea, quæ individuis communia sunt. Neque vero utilitate sua caret nosse, quomodo in cognitione intuitiva prima intellectus operatio sese exerat, quoniam notionibus generum atque specierum claritas affunditur, si cognitio intuitiva cum symbolica conjungatur.

§. 327.

Si notionem generis, vel speciei alicujus nobis jam acquisivimus, prima mentis operatio circa istud genus, vel speciem istam versata in posthac absolvitur, si in idea unius individui ad ea successive attentionem promoves, quæ pluribus communia deprehensa fuisse meministi. *Modus unitive cognoscendi, quæ ante jam cognita fuerant.* Quodsi enim notionem generis vel speciei alicujus nobis jam acquisivimus; illud in universalis nobis representare valeamus (§. 49.) & quia operatione intellectus distincte idem representatur (§. 275.), quæ ad notionem generis ac speciei spectant, tanquam sigillatim enunciabilia (§. 281.), distinguere valeamus (§. 38.). Quamobrem cum notionem generis ac speciei tibi acquisiveris, dum in ideis duorum vel plurium individuum ad ea successive attentionem direxisti, quæ in iisdem eadem sunt (§. 326.): ubi in objecto aliquo ad genus istud, vel speciem istam pertinente ea intueris, quæ ad notionem generis vel speciei spectant, actuum quoque mentis tibi conscius evadis, quibus

bus ea a subjectis pluribus tanquam communia separasti (§. 104.). Quamobrem cum ea tanquam communia recognoscas (§. 173.); genus posthac vel speciem tibi repræsentare, consequenter primam intellectus operationem, quæ notio (§. 53. Log.), adeoque rei in universali repræsentatio est (§. 49.), absolvimus in cognitione intuitiva, si in idea unius individui successive attentionem ad ea promovemus, quæ pluribus communia a nobis deprehensa fuisse meminimus (§. 226.).

Videmus adeo genera ac species nobis jam cognita facilius in cognitione intuitiva repræsentari posse, quara si nondum cognita fuerint. Eadem vero est propositionis presentis utilitas, quæ alterius. In primis juvat intueri ideam rei ipsius, ubi notionem ejus distinctam alteri communicare tenemur: id quod non modo attentionem nostram ad ea, quæ loquimur, conservat; verum etiam adjumento est, ne quid oblivioni tradamus, quod ad notionem rei distinctam requirebatur.

§. 328.

Prima mentis operatio in cognitione symbolica.

In cognitione symbolica prima mentis operatio absolvitur recensione vocabulorum, vel aliorum signorum, quibus ea indigitantur, quæ notionem rei distinctam ingrediuntur. Etenim in cognitione symbolica tantummodo verbis enunciamus, quæ in ideis continentur, vel aliis signis eadem repræsentamus, ideas vero ipsas verbis aut signis aliis indigitatas non intuemur (§. 289.). Quare cum in cognitione intuitiva prima mentis operatio absolvatur, si attentionem successive in idea rei ad ea dirigimus, quæ notionem distinctam generis vel speciei ingrediuntur (§. 326. 327.), singula autem hæc enunciabilia sunt (§. 281.), adeoque vocabulis, vel signis aliis indigitari possint (§. 280.); in cognitione symbolica prima mentis operatio absolvi debet recensione vocabulorum, vel repræsentatione aliorum signorum, quibus ea denotantur, quæ notionem rei distinctam ingrediuntur.

Ita prima mentis operatio in cognitione symbolica arboris absolvitur, si dicimus vegetabilia, quod ex trunko, ramis, surculis & foliis constat: etenim sigillatim recensemus verba, quibus ea indigitantur, quæ

quæ in arboribus tanquam communia distinguimus, consequenter quæ notionem arboris in genere, quatenus distincta est, ingrediuntur. Non autem jam nobis quæstio est, utrum notio distincta sit completa atque determinata, atque oratione ista talis notio significetur, ut hæc definitionis loco inservire possit (§. 152. Log.). Sufficit enim hic ea sigillatim enunciari, quæ mente ab idea rei separantur, dum distincte nobis genus vel speciem repræsentare conamur. Pendet enim cognitio symbolica ab intuitiva, quam supponit & ad quam refertur. Quicquid igitur huic deest, idem etiam illi deesse debet.

§. 329.

Quoniam vocabula sunt signa nostrarum perceptionum, vel rerum per eas-representatarum (§. 271.); dum verba recensemus, quibus ea indignantur, quæ notionem rei distinctam ingrediuntur, ea singula ad perceptiones rerum in cognitione intuitiva locum habentes referre tenemur, etsi ad notionem eidem respondentem non attendamus, quod eadem ex crebro usu satis intelligere arbitremur (§. 132. Log.). Quamobrem *operatio intellectus prima in cognitione symbolica præsupponit operationem ejusdem primam in intuitiva* (§. 326. & seqq.).

Dependentia cognitionis symbolica ab intuitiva in prima mentis operatione.

Hæc probe notanda sunt, ne demus sine mente sonos, nobisque persuadeamus, nos notionem rei habere, dum vocabula recensere valeamus: quæ reductionem in eo consistit, ut ideam alicujus individui in nobis excitemus, sive sensuum, sive imaginationis ope, ac attentio nostra successive ad ea dirigatur, quæ in re percepta insunt, atque deinde vocabula ad eadem referantur, prout singulis vi significatus, quem obtinent alias, subinde etiam vi etymologiæ ac compositionis, denotandis apta deprehenduntur, quatenus scilicet in etymologia vel compositione ratio denominandi latet, ad rem vocabulo denotatam manuducens, nisi ipsimet vocabula ad ea significanda in cognitione intuitiva transfulerimus atque hujus facti meminerimus. Dedimus exemplum reductionis hujus luculentum in Horis subsecivis A. 1730. Trim. Vern. num. II. ubi definitionem justitiæ *Ulpiani* a cognitione symbolica ad intuitivam reduximus. Immo exempli quoque loco ibidem esse possunt, quæ de notionibus justitiæ commutativæ ac distributivæ diximus. Nimirum ingens interpretationis subsidium in reductione cognitionis symbolicae

ad

ad intuitivam consistit, ut adeo non inanem operam sumat, qui differentiam cognitionis utriusque ac dependentiam symbolicae ab intuitiva intimius perspicere conatur.

§. 330.

*Definitio
primæ operationis
intellectus.*

Prima intellectus operatio est plurium in re una sigillatim facta representatio. Etenim in cognitione intuitiva præsens nobis est rei idea (§. 326. 327.), adeoque nobis rem istam representamus (§. 48.). Jam vero in idea nostram attentionem successive dirigimus ad ea, quæ pluribus individuis communia vel intuemur (§. 326.), vel meminimus (§. 327.), consequenter nobis conscii sumus, quod hæc potius percipiamus, quæ rei insunt, quam rem ipsam (§. 235. 237.), adeoque ea, quæ in re distinguuntur, sigillatim nobis representamus (§. 24.). Est igitur in cognitione intuitiva prima intellectus operatio plurium in re una sigillatim facta representatio.

Jam in cognitione symbolica verbis enunciamus, quæ in ideis continentur, vel aliis signis eadem representamus (§. 289.). Quamobrem cum in cognitione intuitiva prima mentis operatione plura in re una sigillatim nobis representemus *per demonstrata*; in cognitione symbolica, quæ recensione vocabulorum vel aliorum signorum absolvitur, quibus ea indigitantur, quæ notionem rei distinctam ingrediuntur (§. 328.), sigillatim quoque plura in re una prima mentis operatione symbolice representantur.

Propositio præsens vicem definitionis primæ intellectus operationis, quæ distincta notio est, subire valet. Neque id quenquam turbare debet, quod eandem demonstremus: etenim definitiones nominales tamdiu absque demonstratione sumuntur, quamdiu nil quicquam aliud significatur, quam nos hoc vocabulo indigitare velle ens, cui hæc determinationes simul sumptæ insunt, parum solliciti, utrum ista eidem enti simul inesse possint, nec ne. Enimvero quamprimum aliquid affirmamus, veluti quod determinationes istæ simul eidem enti inesse possint, vel quod quid insit rei jam aliter definitæ, etsi hoc ad eandem definiendam sufficiat, vel etiam insit rei confuse saltem perceptæ certoque nomine denominatæ;

pro-

probatione utique opus est. Nostri enim arbitrii est, num quid hoc potius, quam alio nomine compellare velimus, ut absurdus foret qui probationem requireret; alii arbitrii nostri non est, ut quædam simul eisdem subiecto inesse, vel una cum aliis inesse possint, Utrumque igitur probandum.

§. 331.

Prima intellectus operatione repræsentantur ea, quæ rei cuidam insunt, tanquam inter se & a re, cui insunt, diversa. Prima mentis operatione plura in re una sigillatim repræsentantur (§. 330.). Quare cum per se pateat, ea cum inrer se, tum a re ipsa differre, quæ sigillatim repræsentari possunt; prima intellectus operatione ea, quæ rei cuidam insunt, tanquam inter se & a re, cui insunt, diversa repræsentantur.

Prima operationis intellectus limites.

Si operationes intellectus accurate distinguere velimus; limites unicuique assignandi sunt, ne ad diversas operationes spectantia confundantur. Limites primæ operationi constituit propositio præsens, ultra quos non progreditur. Inde enim statim fit transitus ad secundam, ubi intellectus ulterius progredi voluerit: quemadmodum ex sequentibus patebit.

§. 332.

Facultas in uno multa distinguendi dicitur Acumen. Quo plura igitur quis in objecto aliquo distinguere valet, eo acutior est altero: ut adeo Gradus acuminis dentur. Etenim alios plura in objecto aliquo distinguere valere, alios pauciora, quotidie experimur.

Acuminis definitio.

In acumine æstimando cognitio intuitiva & symbolica probe discernenda. Fieri enim potest, ut quis sit acutior altero, etsi pauciora enunciare possit, quam alter, ob defectum vocabulorum, vel ignorantiam eorundem. Sive enim adhuc desit vocabulum, sive idem ignoretur, fieri non potest, ut quod attentione in id conversa sigillatim percipimus enunciemus (§. 280.). Ubi vocabulum adhuc deest ad rem quandam indigitandam; non omnes in novis excogitandis sunt audaces.

§. 333.

Acumen successive exercitatione perficitur, seu, Gradus acuminis exercitatione comparantur. Acumen enim consistit in modo.

Gradus acuminis

Hh

in modus.

(Wolffi Psychologia.)

in facultate multa in uno distinguendi (§. 332.). Quare cum per primam intellectus operationem repræsententur ea, quæ rei cuidam insunt, tanquam inter se & a re, cui insunt, diversa (§. 331.), adeoque a se invicem distinguantur in re percepta; id vero fiat, attentione nostra successive ad ea, quæ rei perceptæ insunt, directa (§. 326.); non alio modo acumen comparatur, quam quo attentionem acquirimus, sine qua ipsum esse nequit *per demonstrata*. Enimvero attentionem ejusque diversos gradus exercitatione comparari constat (§. 248.). Quamobrem acumen etiam exercitatione comparari debere apparet.

Patet idem a posteriori. Etenim unusquisque, modo ad seipsum attentus fuerit & pristinorum memoriam tenaciter servaverit, in seipso experietur, acumen suum successive incrementa capere, si in eo exercendo continui fuerimus. Domesticam hic allegare possum experientiam, qui, cum toties per tantum temporis intervallum eadem docuerim, in docendo autem spreto scripturæ subsidio, nec memoriæ implorato auxilio, attentionem omnem in ideas rerum lucidas aut earum vicaria repræsentamina convertam eandemque successive beneficio regularum methodi aliorumque principiorum psychologicorum atque artificiorum heuristicorum in ea dirigam, quæ in ideis istis continentur, satis superque successiva acuminis incrementa animadverti.

Ex iis, quæ pro acumine per exercitationem comparando in medium adduxi, intelligitur, præter attentionem plura adhuc in idem influere, quæ nonnisi exercitatione comparantur. Sed ea demum ex sequentibus patebunt & in philosophia morali excutientur, ubi de mediis acuminis comparandi acturi sumus.

§. 334.

Scala generum & abstractorum.

Genera superiora sunt magis abstracta inferioribus & datur quedam scala generum, adeoque & abstractorum, in qua continuo ad magis superiora, adeoque & magis abstracta, ascenditur. Species enim sunt similitudo entium singularium, five indivi-

dividuorum (§. 233. *Ontol.*), genera similitudo specierum (§. 234. *Ontol.*) & genera superiora similitudo inferiorum (§. *cit.*). Quare cum specierum & generum notiones formentur per abstractionem (§. 283.); species ab individuis, genera a speciebus, genera superiora a proxime inferioribus continuo abstrahuntur. Species adeo primum, quod abstrahitur; genera abstrahuntur ab eo, quod abstractum fuit; adeoque magis abstracta sunt speciebus. Et eodem modo ostenditur, genera superiora esse continuo magis abstracta proxime inferioribus.

Quoniam itaque species sunt primum, quod abstrahitur, ideo abstractorum primam classem constituunt. Quia a speciebus abstrahuntur genera, hoc est, ab iis, quæ in prima abstractorum classe collocantur, adeoque abstracta sunt ab abstractis; cum modus abstrahendi differat a priori, qui speciebus convenit, peculiarem omnium abstractorum classem constituunt, adeoque secundam. Eodem modo patet, quæ abstrahuntur ab abstractis in secunda classe collocatis, constituere classem tertiam & ita porro, quousque progredi licet. Nascitur adeo quædam abstractorum scala, a qua ab individuis ascendimus ad abstracta & inde continuo a minus abstractis ad magis abstracta, atque a generibus inferioribus ad superiora.

Hæc scala generum & abstractorum maximæ foret utilitatis, modo eam accuratam haberemus. *Aristoteles* hanc esse voluit scalam prædicamentorum. Facile autem apparet, quæ hic dicuntur, cum categoriis *Aristotelicis* conferenti, quanto eadem intervallo ab hac scala distent. Quodsi disciplinæ in universum omnes in systema veri nominis fuerint reductæ, ut notionum analysis magis redigatur in potestatem nostram; de scala hac condenda & successive magis magisque perficienda cogitare licebit. Neque enim res tam ardua levi opera perfici potest. Data autem hæc scala magis in potestate erit ars illa characteristica combinatoria, de qua tam magnifica capite superiori demonstravimus. Patebit nimirum, quomodo per determinationes primitivas, quales sunt, quæ in philosophia prima sumuntur, prodeant derivativæ, & his continuo atque ulteriores: id quod perspectum atque cognitum in arte ista supponitur.

§. 335.

Gradus acuminis.

Quoniam vi acuminis in uno multa distinguimus (§. 332.), adeoque ad abstractiones eodem maxime opus habemus (§. 282.); pro diversis gradibus in scala abstractorum variat acumen (§. 334.), consequenter *Acumen admittit diversos gradus pro diversis gradibus abstractorum.*

Nimirum quo quis generaliora seu universaliora in re percepta perspicit, eo acutior est. Æstimationem vero recipiunt gradus acuminis ex scala abstractorum.

§. 336.

Acumen pervidendi abstracta in concretis.

Acumen, quo perspicimus universalia, præsertim in scala generum seu abstractorum altiora, in singularibus, dicimus *Acumen pervidendi abstracta in concretis.*

Denominationi huic inest veritas, ita ut si termini simplices explicentur, quæ complexum ingrediuntur, prodeat notio termino complexo respondens. Singularibus enim universalia insunt, variis gradibus scalæ abstractorum respondentia, & concretum dicitur subiectum, cui illa inexistunt (§. 110. Log.). Qui vero illa ab hoc actu mentis separare novit, is abstracta, quæ concreto insunt, pervidet. Mentionem hujus acuminis injeci in philosophia prima (not. §. 450.): in qua etiam (not. §. 490.) monui, quo auxilio indigeat istud acumen & quantæ utilitatis sit in veritatibus arduis ac principiis fecundissimis ex rebus maxime obviis eruendis. Quod si philosophi hoc acumine usi fuissent, dudum certiora, fecundiora & utiliora in disciplinis tradidissent. Utile in primis hoc acumen est in philosophia ad sensum communem reducenda, de qua reductione jam alias diximus (not. §. 125. Ontol.).

§. 337.

Auxilium istius acuminis.

Quoniam notiones ontologicæ, utpote enti in genere convenientes (§. I. Ontol.), talia repræsentant, quæ enribus in universum omnibus communia sunt, adeoque in scala abstractorum suprema occupant loca (§. 334.); notiones ontologicæ dirigunt attentionem ad universalia, quæ rebus insunt, & alias attentioni nostræ sese facile subducerent, consequenter juvant acumen pervidendi abstracta in concretis (§. 336.).

Mirifice hæc propositio illustratur per ea, quæ de notionibus directricibus differui in Horis subsecivis A. 1729. Trim. Vern. num. IV. Ibi enim potissimum ostendi, quomodo notionēs ontologica vicem directricium subeant. Neque enim negandum est, alias quoque notionēs generales esse directrices, cum in eas quadret harum definitio.

§. 338.

Quoniam etiam in aliis disciplinis traduntur notionēs *Ulteriora auxilia.* generales, quæ certis quibusdam entibus communia sunt, veluti in Physica, communia meteoris, metallis, vegetabilibus; in Moralibus virtuti omni tam intellectuali, quam morali, aut etiam omni intellectuali, morali omni; eodem, quo ante (§. 337.) modo patet, *notiones generales in disciplinis dirigere attentionem ad universalis, quæ certis quibusdam singularibus*, veluti meteoris, metallis, vegetabilibus, aut virtuti cuidam tam intellectuali, quam morali, *insunt, & alias attentioni nostræ sese facile subducerent*, consequenter *notiones generales in omni disciplina juvant acumen pervidendi abstracta in concretis.*

Dici non potest, quantum jacent notionēs universales, quas disciplinæ fecundas offerunt, acumen nostrum, de quo jam nobis sermo est, si sæpius ad singularia obvia applicentur. Hac enim applicatione opus est, quod omne acumen exercitatione perficiatur (§. 333.). Neque vero existimandum est, quod beneficio illarum notionum tantummodo in singularibus perspiciamus, quæ in notione ista generali continentur: etenim acumen extenditur quoque ad alia universalis, quæ simul insunt, & attentionem nostram subterfugissent, nisi jam beneficio notiois generalis nobis perspectæ in singulari hoc quæsissemus, quæ in eadem continentur. Immo ita successive suggeritur acumen, ut etiam absque istis notionibus ad universalis in singularibus istis nondum nobis animadversa perspiciamus.

§. 339.

Analysis notionum dicitur, qua notio rei resolvitur in *Analysis notionum.* notionēs eorum, quæ ipsas ingrediuntur, & notionēs horum singulæ denuo in alias simpliciores ac ita porro, quantum datur,

Quæ rebus insunt, vel insunt tanquam partes, ex quibus componuntur; vel insunt tanquam diversa, etiam in indivisibili. In priori casu partes majores continuo resolvuntur in minores; in posteriori discernuntur quantitates ac relationes diversæ, & in his denuo distinguuntur, quæ tanquam diversa concipi possunt. In rebus corporeis, præsertim organicis, partes differunt qualitatibus, quantitate ac relationibus, atque adeo posterior analysis cum priori conjungenda. Quodsi disciplinæ in universum omnes in systemata inter se connexa fuerint redacta; hæc analysis & clarior, & magis in potestate erit. Apparet hoc ex Logica Germanico idiomate edita, ubi exempla notionum adæquatarum, quales hac analysi prodeunt (§. 96. *Log.*), dare licuit provocando ad disciplinas ceteras eodem idiomate evulgatas ac ostendendo, quomodo ea, quæ ingrediuntur definitionem rei, definiantur in anterioribus, & quæ has definitiones ingrediuntur, denuo definiantur vel in anterioribus ejusdem disciplinæ, vel in disciplinis anterioribus.

§. 340.

Profunditas intellectus definitio.

Profunditas intellectus dicitur facultas notiones distinctas in alias simpliciores continuo resolvendi, prouti scilicet analysis notionum requirit. Quamobrem *intellectus tanto profundior, quo longius in analysi notionum progredi quis potest.*

Apparet adeo, quod, si disciplinæ in systemata inter se connexa redigantur, eo ipso intellectus reddatur profundus. Vix enim aliquam lucidam habemus profunditatis intellectus, nisi disciplinas systematicè pertractatas excutere nobis datum fuerit. Ut adeo appareat necessitas pariter ac utilitas disciplinas in istiusmodi systemata redigendi. Et jam intelligere licet, cur omne nostrum tempus, quod ab aliis negotiis nobis vacat, in disciplinis mathematicis ac philosophicis in istiusmodi systemata compingendis collocemus. Neque enim exigui momenti censi debet profunditas intellectus, quemadmodum in Moralibus luculentius ostendetur.

§. 341.

Gradus istius profunditatis quomodo æstimantur.

Gradus profunditatis intellectus æstimantur ex gradibus notionum adæquatarum. Intellectus enim tanto profundior est, quo longius in analysi notionum progredi potest (§. 340.), consequenter quo longius notiones eorum, quæ notio-

nem

nem rei cujusdam distinctam ingrediuntur, in alias simpliciores resolvere valet (§ 339.), adeoque quo magis notiones insunt adæquata (§. 95. *Log.*). Quare cum prima resolutio notionis distinctæ in notiones distinctas notarum sit primus gradus notionis adæquata; secunda resolutio notionum distinctarum notarum, quæ datam notionem ingrediuntur, in notiones distinctas notarum, quæ illas ulterius ingrediuntur, constituat gradum secundum notionis adæquata & ita porro, donec perveniat ad notiones irresolubiles (§. 96. *Log.*); primus quoque gradus profunditatis intellectus esse debet, quæ is pertingit ad primum gradum notionis adæquata; secundus gradus profunditatis intellectus esse debet, quæ is pertingit ad secundum gradum notionis adæquata & ita porro. Gradus igitur profunditatis intellectus æstimantur ex gradibus notionum adæquatarum.

Hinc luculentius apparet, quod intellectus profunditatem difficulter consequi, multo minus profunditatem æstimare liceat, nisi disciplinis in systemata inter se connexa redactis operam indefessam navaveris. Hinc sane Mathematici consequuntur profunditatem intellectus. Notandum tamen, quod in disciplinis pertractandis incipiamus a notionibus simplicioribus & continuo progrediamur ad alias, quas eadem ingrediuntur, consequenter contraria via ad notiones adæquatas perveniamus, quam quæ in earum analysi procedere solemus. Ponamus e. gr. tibi esse tertium gradum profunditatis, habebis itaque notionem adæquatam tertii gradus. Dum eam tibi in disciplinis acquisivisti, a gradu tertio incipiens ad secundum & inde porro ad primum progressus es. Forsan consultius tibi videbitur, inverso ordine numerare gradus, ita ut primus gradus constitutur in resolutione notionum in irresolubiles, a quibus discendi initium sit in disciplinis. Enimvero duplex obstat ratio, quo minus id fiat. Etenim non in omni casu ad notiones irresolubiles perveniri potest, immo nec ad tales, quæ pro irresolubilibus haberi possunt, ut adeo ultimus quidam gradus in analysi constitui non possit, quem ordine inverso appellare liceat primum. Deinde analysis notionum incipit a notis, quæ datam aliquam notionem distinctam ingrediuntur, adeoque

que in analyfi hac primus omnino gradus notionis adæquaræ constituendus est in eo, quo notio nostra incipit esse adæquata. Neque enim tum quæstio est, quomodo ad hanc notionem pervenerimus.

§. 342.

*Cognitionis
symbolicæ
in acumine
ac profunditate
partes.*

Cognitione symbolica & *acumen*, & *profunditas intellectus* *facilitatur atque extenditur*. Acumine enim multa distinguimus in uno (§. 332.), idemque diversos gradus pro diversitate graduum abstractorum admittit (§. 335.) Enimvero si qua ab alio abstrahimus, adeoque & in uno distinguimus (§. 282.), eaque vocabulis peculiaribus designamus, abstractiones fiunt magis claræ ac distinctæ (§. 284.). Quamobrem si ea, quæ in re una acuminæ distinguimus, vocabulis peculiaribus designentur; multo facilius eadem a se invicem distinguere & abstractiones continuare valemus. Acumen igitur usu vocabulorum *facilitatur atque extenditur*. Enimvero symbolica est cognitio, qua verbis enunciantur, quæ in ideis continentur, atque ideo in iis a se invicem distinguuntur & continuo abstrahuntur (§. 289.). Symbolica igitur cognitione *acumen intellectus* *facilitatur atque extenditur*.

Profunditas intellectus est facultas *notiones distinctas* in alias simplices continuo resolvendi (§. 340.). Quamobrem *profunditatem intellectus* *facilitant atque extendunt*, quæ notiones distinctas juvant. Patet vero *per demonstrata*, notiones usu vocabulorum fieri magis distinctas. Quoniam itaque in cognitione symbolica verbis enunciamus, quæ in rebus contenta a se invicem distinguimus (§. 289.); cognitione utique symbolica *profunditas intellectus* *facilitatur atque extenditur*.

Propositio præsens tum quoad *acumen*, tum quoad *profunditatem* a posteriori quoque confirmatur, cum quilibet utrumque in seipso idem experiri possit, modo exemplum aliquod acuminis ac profunditatis symbolice expressum sumat, atque singula eo ordine sibi intuitive per ideas exhibere conetur, quæ

quæ verbis in symbolica repræsentatione indignantur. Quanta hic sese offerat difficultas intelliget, etiam si verba attentioni dirigendæ in eam partem, in quam verti debet, inserviant. Quod si ergo ponamus, nos omni prorsus destitui verborum vel aliorum signorum auxilio; haud difficulter perspicemus, quod nec acuminis, nec profunditatis eximium quendam gradum consequi detur.

Atque ita apparet indispensabilis vocabulorum ad perceptiones nostras designandas & nexus indissolubilis inter cognitionem intuitivam & symbolicam necessitas. Etenim sublato hoc nexu vix cavebis, ne vocabula sint sine mente soni, ubi symbolicæ cognitioni nimium tribuis, aut non multorum cognitionem acquies, ubi in intuitiva sola harere volueris. Idem confirmabunt operationes intellectus ceteræ. Quamobrem maximopere suadendum, immo urgendum est, ut & plurima in rebus distinguere atque universalia ab iisdem abstrahere, & quæ distinguimus, quæ abstrahimus, singula suo proprio nomine efferre discamus. Ita demum præclarum acuminis ac profunditatis gradum a nobis acquiri experiemur.

§. 343.

Actus iudicii affirmativi in cognitione intuitiva absolvi- *Actus iudicii*
tur, si ea, quæ tanquam a re diversa spectamus, porro tanquam affirmativi
eidem inexistencia vel ad ea quocunque modo pertinentia conside- *in cognitione*
remus. Istiusmodi actum intellectus dari, per exempla eunti *intuitiva.*
 patet. Videmus ferrum ignitum & ignem, qui ipsi inest, tanquam ab eo diversum spectamus, vel dum ferrum minime ignitum simul videmus, aut aliter visum vi imaginationis nobis repræsentamus, vel etiam ignem alias visum imaginatio præsentem sistit (§. 117.). Quod si jam porro ignem tanquam ferro inexistentem in præsentem statu consideremus; ferrum ignitum esse iudicamus. Similiter si duo intuemur simul objecta iuxta se invicem collocata & excessum longitudinis unius tanquam diversum a longitudine communi spectamus, eandem tamen tanquam ad objectum unum spectans consideramus; actus iudicii in cognitione intuitiva absolvitur, quando obje-

ctum unum altero majus esse judicamus, seu quando affirmamus objectum unum esse altero majus. Nimirum non alia re hic opus est, quam ut ad nosmetipsos attendamus, dum judicamus, observaturi quid in mente contingat, dum vocabula, quibus judicium enunciamus, missa facimus, atque ea deinde comparemus cum illis, quæ de operatione prima intellectus dicta sunt, separaturi quæ ad hanc pertinent: ita enim relinquentur ad actum judicii spectantia, modo in discernendis iis, quæ in mente nostra contingunt, fueris satis acutus. Jam vero actum istum intellectus judicium appellamus, idemque affirmativum (§. 39. 204. Log.) atque adeo patet, actum judicii affirmativi in cognitione intuitiva absolvi, si rei tanquam inexistentis vel alio quocunque modo ad idem spectans spectemus, quod ab eo tanquam diversum considerabamus.

Vidimus actum notionis terminari in eo, quod ea, quæ rei insunt, tanquam inter se & a re, cui insunt, diversa spectamus. Hunc igitur cum excipiat alter, quo eadem tanquam rei inexistencia, aut ad eam quomodocunque spectantia consideramus, in quo judicium consistit vi propositionis præsentis: ubi notio aut, si mavis, simplex rei apprehensio definit, ibi judicium incipit. Simplex adeo eorum, quæ rei insunt, vel ad eandem pertinent atque ipsius rei apprehensio est veluti transitus a notione ad judicium: suppono enim rem simpliciter apprehendi, quatenus attentionem tuam in ea defigis. Enimvero ut intelligatur, quid sit considerare aliquid tanquam inexistentis vel alio quocunque modo spectans ad alterum, non inconsultum videtur idem clarius explicari, quemadmodum ex superioribus constat, quomodo actu mentis aliquid a re separamus, dum idem tanquam ab ea diversum spectamus (§. 326. 327.).

§. 344.

*Quando
quid ut al-
teri inexi-
stens vel ad
idem spe-
ctans consi-
deretur.*

Considerare aliquid tanquam alteri inexistens, sive alio modo ad idem spectans idem est ac attentionem suam in inexistentia, aut relatione ejus, quod a re diversum est, ad eandem defigere.

Neque enim rem aliter considerare licet, nisi quatenus attentio nostra circa eandem versatur, ut ejus nobis magis simus consci, quam aliorum, quæ simul percipiuntur. Unde consideramus aliquid tanquam alteri

alteri inexistens, quatenus efficitur, ut hujus inexistentiæ nunc magis nobis simus consci, quam aliorum, sc. ut nobis consci simus nos inexistentiæ jam percipere, non vero æque consci simus, quod alia præterea percipiamus.

§. 345.

Si prædicatum subiecto simpliciter repugnet, actus judicii
negativi absolvitur, si subiectum tibi repræsentet, cui idem repu-
gnat, & subiectum aliud, cui idem inest, ac id, quod alteri inest,
consideres tanquam ab eo diversum, idemque referens ad prius con-
sideres tanquam eidem non inexistens, seu tanquam id, quo differt
subiectum ab altero. Talem actum intellectus esse possibilem, nemo non quovis momento in seipso experiri potest: quod vero idem is sit, quem judicii negativi nomine compellamus, ita ostenditur. Scilicet in judicio negativo præsentis casus notionem prædicati, quæ subiecto repugnat *per hypoth.* adeoque eidem inesse nequit (§. 310. *Log.*), a notione subiecti separamus. Jam cum notionem subiecti nobis intuitive repræsentare nequeamus, nisi quatenus ad eam pertinentia actu mentis separamus ab idea ejus, aut, si judicium determinatum non est, quatenus ideam subiecti intuemur; subiectum utique nobis sive sensu, sive vi imaginationis repræsentare atque in idea ejus attentionem nostram defigere tenemur. Similiter quia prædicatum, quod ab eodem removendum, intuitive nobis exhibere nequimus, nisi quatenus ideam alicujus individui, cui inexistit, intuemur & in ea attentionem dirigimus ad id, quod eidem inexistit (§. 327.); subiectum quoque nobis repræsentare tenemur, in quo prædicatum istud inest, & attentione in idem directa idem nobis repræsentare debemus tanquam a re, cui inest, diversum (§. 331.). Quod si igitur jam idem refert ad subiectum alterum ipsumque consideres tanquam eidem non inexistens; actu mentis quasi idem separas ab eodem. Atque ita fecisti, quod ad judicium negativum sufficit *per demonstrata*. Actus igitur judicii negativi in cognitione intuitiva hisce absolvitur.

Quodsi a posteriori idem cognoscere volueris, eodem modo procedendum est, quo paulo ante in notitiam actuum ad iudicium affirmativum requisitorum in cognitione intuitiva pervenimus (§. 343.). Nimirum sumendum est exemplum propositionis negativæ atque vocabulis, quibus effertur, remotis attendendum, quid in ideis remaneat iisdem respondens. E. gr. Si iudicium negativum fuerit sequens, quod charta non sit ferrea, & misso vocabulo chartæ aliquid in ideis remanere debet, folium chartæ tibi repræsentare atque in hoc phantasma attentionem dirigere debes. Jam si misso vocabulo, quo prædicatum denotatur, nempe ferri, in ideis aliquid remanere debet, laminam quandam ferream tibi repræsentare atque in hoc phantasma non minus attentionem tuam dirigere debes, quam in prius & quidem in eodem in specie in ea, quæ ad ferrum spectant, ut te jam ferrum perciperet tibi sis conscius. Quodsi denique judicare debes, chartam non esse ferream, utrumque phantasma inter se conferre atque attentionem tuam in non existentiam ferri in charta dirigere teneris; alias enim in simplici apprehensione chartæ ac ferri quiescis. Patet itaque actum iudicii negativum eo modo absolvi, quem in propositione determinavimus.

Actus iudicii negativum in cognitione intuitiva difficilius est actus iudicii affirmativi. Etenim in casu posteriori id, quod subiecto tribuendum, in ipso subiecto percipitur, aut saltem mediante eo, quod in alio simul percepto percipitur, veluti si effectus quidam subiecto tanquam causæ tribuendus: sed in casu priori id, quod ut non existens alteri considerandum venit, tanquam inexistenti uni considerari debet, ut adeo actus iudicii negativum supponat actum affirmativum, immo ipsam complectatur. Quamobrem si quis ea, quæ de cognitione intuitiva dicuntur, in se experiri voluerit; is primum experimenta capere debet de actu iudicii affirmativi & ubi hic rem bene ac ex voto succedere experitur ad experimenta de actu iudicii negativum capienda progredi tenetur. Cognitione nimirum symbolica aduerti difficius absque vocabulorum usu iudicant, immo cum difficile sit iudicium in cognitione intuitiva
sola,

sola, antequam sermonis usu pollent homines, de rebus sibi obviis vix ac ne vix quidem judicant.

§. 346.

Si prædicatum subjecto simpliciter non repugnet, actus judicii *Actus judicii*
negativi absoluitur, si subjectum, cui idem non inest, in oppositis ca- *negativi in*
sibus tibi repræsentantes, in quorum uno prædicatum eidem inest, in alte- *cognitione*
ro non inest, ac id, quod uni inest, consideres tanquam diversum ab *intuitiva*
eo, idemque referens ad prius consideres tanquam eidem non inexistens, *casus poste-*
seu tanquam id, quo subjectum unum differt ab altero. Quodsi *rior.*
 propositionem præsentem cum altera præcedente conferas, differ-
 entiam aliam non intercedere animadvertes, nisi quod hic
 idem subjectum in idea bis ponatur, cum in casu anteriori po-
 nantur duo subjecta diversa. Quamobrem quæ ad probandam
 propositionem præcedentem in medium adducta sunt, etiam ad
 præsentem transferri possunt ac debent, ut adeo non opus sit ea
 denuo huc transcribi.

Quodsi a posteriori idem cognoscere volueris, eodem
 prorsus modo procedendum est, quo in casu anteriori proce-
 dendum esse docuimus, hac sola differentia adhibita, quam in-
 tercedere inter propositionum casus modo annotavimus. E. gr.
 Si iudicium negativum fuerit sequens, quod charta non sit alba,
 folium chartæ albæ & folia chartæ non albæ, sed diversis colori-
 bus tincta tibi repræsentare, atque tum in colorem album, tum
 in colores ab albo diversos attentionem dirigere debes, eo prorsus
 modo, quem ad propositionem præcedentem præcepimus.
 Quoniam vero folia chartæ diversis coloribus tincta tibi tan-
 tummodo ideo repræsentas, quod charta, quæ non alba est, di-
 versis aliis coloribus, non uno tincta esse possit, in præsentī casu
 autem perinde est, quo colore tincta sint; attentionem tuam
 pro arbitrio in aliquod folium alio, quam albo colore tinctum
 convertere atque id ad album referre debes, ut in non inexisten-
 tiam coloris albi tandem attentionem tuam dirigere valeas,

quemadmodum præcepimus ante. Nimirum si actus judicii negativi in hoc casu plenus esse debet, ubi diversi status subjecti uni, qui de eodem negatur, opponi possunt, hujus quoque oppositionis tibi conscius esse debes. Alias enim notio, quæ judicio negativo respondet, defectu aliquo laborabit, cum modus inexistentiæ negligatur.

Equidem vulgo in judiciis non attenditur modus prædicandi, hoc est, utrum prædicatum sit necessarium, an contingens, ita ut ideo Scholastici propositiones modales a ceteris distinxerint, adeo ideo superfluum videri poterat, in eo casu, ubi judicium negativum contingens est, contingentis quoque modi prædicandi rationem haberi. Quoniam tamen actus judicii plenus nobis explicandus est, ejus ratio a nobis utique habenda venit, sit ita in judiciis imperfectis, ubi modus latet, quidpiam omitti posse. Præterea notandum est, quod, ubi mens ideis ad modum prædicandi cognoscendum sufficientibus fuerit instructa, cum non album sibi repræsentaturus nullam habeat rationem, cur idem sibi potius hoc colore, quam alio tinctum objectum repræsentare debeat, nisi forsitan accidentalem, objecta ejusdem speciei pluribus diversis coloribus tincta occurrere possint (§. 117.), ut adeo multitudinis mentionem injici oportuerit, ne in capiendis experimentis turbemur. Atque ita apparet, si vel maxime ad modum prædicandi non attendamus, hoc tamen non obstante propositionem præsentem ita explicari debuisse, ut in omni casu explicet, quid in judicio intuitivo obtineat. In judicio affirmativo hac sollicitudine opus non est, cum subjecto prædicatum in omni casu actu insit, quod eidem tribuitur, sive constanter insit, sive contingenter, ut adeo judicium modale distinguatur a non modali, quamdiu determinatum non est, ut scilicet notio subjecti non contineat singulas determinationes, quibus positus ponitur prædicatum.

§. 347.

*Alius modus
exprimendi
judicium ne-
gativum
contingens.*

Quod si prædicatum, quod de subjecto negatur, subjecto quoque alterius speciei inesse possit; actus judicii negativi, in eo casu, quo prædicatum subjecto simpliciter non repugnat, eodem modo absolvi potest, quo absolvitur in casu prædicati subjecto simpliciter repugnantis (§. 345.). Nimirum in hoc casu perinde

ac in superiori, in quo prædicatum subiecto simpliciter repugnat, prædicatum, quod in dato casu non inesse sumitur, inest rei alterius cuiusdam speciei, nisi quod in casu simplicis repugnantia necessario insit subiecto diversæ speciei, in præsentī autem etiam inesse possit subiecto ejusdem speciei. Quoniam autem hæc differentia in actu iudicii negativi, quatenus in cognitione intuitiva terminatur, non attendenda venit; iudicium negativum in præsentī casu eodem utique modo absolvi potest, quo in casu simplicis repugnantia necessario absolvitur (§. 345.).

Nimirum differentia inter utrumque casum intercedens in actu iudicii negativi eodem modo absolvendi non aliam differentiam parit, quam quod in uno modus iste sit necessarius, in altero etiam alius esse possit. Ceterum exemplum propositionem præsentem illustrans idem esse potest, quo in propositione præcedente uti sumus. Ponamus nimirum iudicium negativum, quod in cognitione intuitiva sola terminandum, esse sequens: charta non est alba. Quod si candellam ceream albam tibi in memoriam revocaveris & chartæ folium quocunque colore tinctum, actus iudicii negativi eodem prorsus modo absolvetur, quo supra docuimus, eundem absolvi, ubi iudicandum, chartam non esse ferream (§. 345.).

§. 348.

Si iudicium fuerit determinatum, in idea subiecti contineri debent omnes determinationes, quibus prædicatum determinatur, & in eas simul attentio dirigenda, ubi actus iudicii in cognitione intuitiva terminari debet. Etenim si iudicium fuerit determinatum, subiectum repræsentari debet sub ea notione, ut in ea contineatur ratio, cur eidem conveniat prædicatum, seu id, per quod determinatur prædicatum (§. 320. Log.). Quare cum determinationes istæ vel in subiecto, vel extra subiectum contineri debeant; subiectum exhiberi debet ita, ut eidem insit in casu primo, quod inesse præsupponitur, antequam prædicatum eidem convenit, vel una cum eodem exhibendæ sunt res ceteræ, in quibus determinationes istæ continentur.

nentur. Quoniam vero ea, quæ ad notionem subjecti spectant, mentis actu a ceteris separanda veniunt, idem autem contingit attentione nostra in eadem directâ (§. 326. 327.); in determinationes omnes notionem subjecti ingredientibus attentionem simul dirigere tenemur. Quoniam vero iudicium determinatum a vago non differt, nisi quod in isto notio subjecti contineat omne id, per quod prædicatum determinatur, in hoc minime; ubi actus iudicii ea continet, quæ ad notionem subjecti spectant, cetera eadem sunt ut in omni iudicio reliquo.

E. gr. Ponamus iudicium determinatum, quod lapis ex alto cadens celeriter moveatur, in sola cognitione intuitiva terminari debere. Necessè igitur est, ut tibi repræsentantes turrim aliquam & lapidem ex fenestra superiori demissum. Quoniam hic tantummodo altitudinis habetur ratio; in eam quoque simul dirigenda est attentio, dum eandem in lapide ac motu ejus desigis. Cetera eodem modo sunt, quem supra exposuimus (§. 343.). Poteris quoque tibi loco turris repræsentare puteum profundum & lapidem intra eum cadentem, ubi in profunditatem dirigenda est attentio, quæ respectu lapidis cadentis altitudo dicitur.

§. 349.

*Actus iudicii
affirmativi
contingentis
in cognitione
intuitiva.*

Quod si iudicium affirmativum contingens exprimere debet modum, quo prædicatum inest; in idea eidem respondente subjectum bis repræsentari debet, ita ut prædicatum in uno casu insit, in altero non insit, & attentio dirigenda tum in existentiam in uno, tum in non existentiam in altero. Etenim si attentionem dirigis in existentiam prædicati in subjecto, hoc ipso tibi conscius es subjecto huic convenire hoc prædicatum. Si vero attentionem dirigis in non existentiam prædicati in altero subjecto ejusdem speciei, hoc ipso tibi conscius es, subjecto hujus speciei etiam non convenire prædicatum. Quare si attentionem in utramque simul dirigis, hoc ipso tibi conscius es prædicatum hoc subjecto illius speciei & convenire posse, & non convenire posse (§. 235. 237.). Atque adeo tibi conscius, quod prædicatum subjecto contingenter insit (§. 296. Ontol.).

E. gr.

E. gr. Judicium affirmativum contingens est, quod charta sit rubra. Si in cognitione intuitiva terminari debet; representare tibi debes folium chartæ rubræ & folium chartæ albiæ, atque attentionem tuam dirigere in inexistentiā rubedinis in uno & inexistentiā albedinis in altero simul. Ita tibi conscius eris non minus albedinem, quam rubedinem inexistere posse, consequenter albedinem non necessario, sed contingenter inesse. Qui novit, quomodo abstracta intuitive cognoscamus (§. 327.); ei nulla in his supererit difficultas. Eaimvero si qui fueriat, qui abstracta in imaginibus inmeri nequeunt, ubi a vocabulis, quibus denotantur, separantur; illi desiderari quid existimabunt, ubi nihil desideratur. Sane notio contingentiae in cognitione intuitiva non continetur, nisi quatenus nunc esse quod alio tempore non erat, aut in diversis locis simul eodem tempore esse opposita nobis conscii sumus.

§. 350.

In cognitione symbolica secunda mentis operatio absolvi- Secunda
mentis ope-
ratio in co-
gnitione
symbolica.
tur recensio vocabulorum, quibus subjectum & ceteræ ejusdem
determinationes accidentales, si quæ adsunt, prædicatum & ne-
xus ejusdem cum subjecto in affirmativis, repugnantia in negati-
vis exprimuntur. Etenim in cognitione symbolica verbis tan-
tummodo enunciamus, quæ in ideis continentur, res vero ipsas
verbis indigitatas non intuemur (§. 289.). Quare cum in co-
gnitione intuitiva actus judicii, seu secunda mentis operatio
(§. 53. Log.), absolvatur, si prædicatum tanquam a subjecto di-
versum, mox tamen iterum idem tanquam eidem inexistens, aut
non inexistens spectamus (§. 343. 345. & seqq.), in judicio
autem determinato contingente simul attentionem dirigimus
in determinationes accidentales, a quibus prædicatum pendet
(§. 348.); in cognitione symbolica secunda mentis operatio ab-
solvitur, si vocabulis enunciemus subjectum, determinationes
ejus accidentales, si quæ adsunt, prædicatum & nexum hu-
jus cum subjecto in affirmativis, repugnantiam cum eodem in
negativis.

Exemplis idem sit manifestum. Etenim judicium affirmativum,
quod his verbis exprimitur, *charta est alba*, aperte loquitur, vocabulo
(Volfii Psychologia.) Kk char-

charta indigitari subiectum, cui albedo inest; vocabulo *alba* indigitari albedinem tanquam subiecto inhaerentem & vocula *est* tandem indicari nexum albedinis & chartæ nunc actu præsentem, seu actualem inexistentialitatem albedinis tanquam prædicati in *charta* tanquam subiecto. Quicquid igitur est in idea rei ad iudicium spectans, id vocabulis exprimitur. Recensentur nimirum vocabula, quibus indicatur & subiectum, & prædicatum cum inexistentialitate possibili, & nexus tandem prædicati cum subiecto seu inexistentialitate actualis. Similiter iudicium affirmativum, quod his verbis effertur, *lapis ex alto delapsus celeriter movetur*, non minus aperte loquitur, vocabulo *lapis* indigitari subiectum, vocabulis *ex alto delapsus* determinationes accidentales eidem iungendas, vocabulis denique *celeriter movetur* prædicatum & simul nexum ejusdem cum subiecto, quatenus nimirum *celeriter movetur* idem significat ac *est celeriter motus*, seu *est in motu celeri constitutus*, quia copula *est* latet in flexione verbi *moveri*. Exprimitur autem vocabulis duobus prædicatum, quia eidem responderet notio complexa, nimirum non simplex motus notio, sed gradus etiam celeritatis eidem convenientis. Jam vero in hoc iudicio non attendenda veniunt nisi subiectum, determinationes accidentales, harum actualitas, seu nexus cum subiecto, prædicatum cum sua determinatione, & hujus cum subiecto nexus. Recensentur igitur verba, quæ singulis indigitandis sufficiunt, modo notaveris, quæ flexionibus vocabulorum in Grammatica explicatis indignantur. Idem denique non minus manifestum est in iudicio negativo, quod hisce verbis exprimitur: *Charta non est alba*. Etenim vocabulo *charta* indigitatur subiectum, vocabulo *alba* prædicatum cum possibilitate inexistendi in aliquo subiecto, vocula *est* nexus seu actualitas inexistentialitatis prædicati in subiecto & vocula denique *non* repugnantia inter prædicatum & subiectum. Vides igitur in cognitione symbolica exprimi iudicium negativum, quatenus recensentur vocabula, quibus subiectum & prædicatum ac utriusque repugnantia exprimitur.

§. 351.

Prærogati-
va cognitio-
nis symboli-
cæ in secun-
da mentis
operatione.

Si iudicia vocabulis efferruntur, magis distincta sunt, seu in cognitione symbolica iudicia magis distincta sunt, quam in intuitiva. Etenim si iudicia vocabulis efferruntur, subiectum, prædicatum, singulæ determinationes subiecti, si quæ præterea acci-

accidentales adfunt, nexusque prædicati cum subiecto in affirmativis, & repugnantia in negativis vocabulis peculiaribus exprimuntur (§. 350.), consequenter quæ in notione iudicio respondente sigillatim enunciabilia insunt, sigillatim quoque enunciantur (§. 280.), cum in iudiciis intuitivis, quæ simul & una cum aliis peregrinis seu ad notionem iudicio respondentem non pertinentibus percipiuntur, nonnisi a peregrinis atque a se invicem separentur, quatenus memoriam habemus attentionis in singula sigillatim directæ (§. 343. 345. & seqq.). Cum adeo in priori casu ad notionem propositioni respondentem spectantia & sigillatim enunciabilia facilius distinguamus, quam in posteriori cognitione intuitiva; si iudicia vocabulis efferuntur, magis distincta fiunt (§. 38.), consequenter in cognitione symbolica iudicia magis distincta sunt, quam in intuitiva (§. 289.).

Quæ de secunda mentis operatione tam in cognitione intuitiva, quam symbolica diximus, non exiguam habent utilitatem in iudiciis perpendendis, ut rite intelligantur, & in propositionibus accurate explicandis: ut adeo inprimis animum ad ea attentum afferre debeant, qui Scripturam sacram aliis interpretantur. Excitatur attentio nostra & mens efficitur acutior: id quod ex propositionum antea allatarum (not. § 350.) exemplis apparet. Enimvero propter summam rei utilitatem non piget uno vel altero adhuc exemplo docere, quomodo iudicia sint expendenda, ut nihil eorum prætermittatur, quod in propositione significativum occurrit. Sit igitur exempli loco propositio: *Folium est viride*. Subiectum denotatur vocabulo *folium*, quod ut intelligatur, folii idea in animo excitanda, vel vi sensus, quatenus idem actu visui obicitur, vel vi imaginationis, quatenus olim visi recordamur. Prædicatum indigitatur vocabulo *viride*: quod, cum adjectivum sit, denotat colorem viridem cum possibilitate inexistenti. Quare ne sit sine mente sonus, idea coloris viridis excitanda eodem, quo ante, modo, quatenus nempe tibi repræsentas subiectum aliquod hoc colore tinctum & attentione in hunc colorem directæ eum a subiecto suo separare debes. Enimvero quia adjectivum simul denotat possibilitatem inexistenti in aliquo subiecto; non modo attentio dirigenda est in inexistentiam in hoc subiecto, verum etiam in non inexistentiam in alio subiecto. De-

nique nexus prædicati cum subiecto denotatur vocula *est*, adeoque attentio quoque dirigenda est in inexistentiam albedinis in lilio. Nimirum ita intelligitur iudicium, ubi in notionibus confusis acquiescis. Quodsi vero notiones desideres distinctas, ideis substituendæ sunt definitiones aut, si mavis, cum iisdem jungendæ, quoniam definitiones absque iis non intelliguntur, nisi quatenus memineris, te olim vel alias cum iisdem ideis coniunxisse. Sit exempli loco porro dictum Salvatoris Luc. VI. 45. *Bonus homo de bono thesauro cordis proferet bonum.* Subiectum hic denotatur duobus vocabulis *bonus homo*, quibus notio complexa responderet. Nimirum hominem hic considerare debes cum bonitate eidem inherente. Atque adeo quaeritur, quidnam hic bonitatis nomine denotetur. Ejus itaque definitio subiecto explicando inservit. Porro prædicatum denotatur vocabulis *proferre bonum de bono thesauro cordis sui*, cui denuo notio complexa responderet. Nimirum hic denuo quaeritur, quid sit bonum & quomodo illud proferatur, quid cordis nomine veniat & quid thesaurus ejus dicatur & quo denique sensu thesaurus iste bonus appelleretur. Per flexionem denique verbi indicatur nexus inter prædicatum atque subiectum: quod cum sit presentis temporis, hujus quoque habenda ratio est. Quodsi distincte nexum intelligere volueris, ex notione boni hominis reddenda ratio est, cur is proferat bonum de bono thesauro cordis sui. Quoniam vero verba sine ideis, ad quas referuntur, sunt sine mente sonus; ubi in explicatione propositionis claritas desideratur, singulis his per definitiones explicandis suæ quoque jungendæ sunt ideæ. Unde campus dicendi amplissimus nascitur interpreti, etsi non dicat, quod a scopo alienum sit. Quamdiu vel unam ignoraveris definitionem ipsique respondentem ideam; impossibile est, ut alteri explices verborum istorum sensum. Neque enim vocabula, si unum *homo* exceperis, ex eorum numero sunt, quæ per ideas confusas alteri intelligibilia redduntur. Etsi igitur hæc pervulgata fiat, ut talia moneri superfluum videatur; constat tamen longe plurimos esse, qui non capiunt, quænam ad propositionem aliquam intelligendam requirantur, & quomodo alter, qui eam non intelligit, perducatur ad cognitionem intuitivam propositione ista symbolice expressam. Inde est, quod audias interpretes sapissime talia proferre, quæ rei potius confundendæ, quam intelligendæ inserviunt. Qui ad ea attenderit, quæ hic inculcantur, is in posterum sibi cavebit, ne memoriæ mandet vocabula, quæ intelligere sibi videtur, quod usus familiaria eadem reddidit, etsi nullam propositioni integræ jungere possit

notionem, neque ideam, unde illam abstrahere licet, aut saltem non jungat notionem ex intentione loquentis eidem respondentem. Idem etiam doceri potest exemplis judiciorum negativorum, ubi non alia intercedit differentia, nisi quod vocula negandi non prædicatum a subiecto removeatur.

§. 352.

In cognitione symbolica notio complexa, quæ judicio respondet, & judicium clarissime differunt. Nam si judicium exprimitur his verbis: charta est alba; notio complexa exprimitur istis: charta alba. Vel si judicium enunciatur hoc modo: Ferrum candet; notio complexa eidem respondens indigitatur vocabulis: ferrum candens. Nimirum in judicii expressione indigitatur quoque nexus prædicati cum subiecto; in posteriori nexus iste sigillatim non exprimitur.

*Differentia
notionis
complexæ a
judicio.*

In cognitione symbolica propositio facillime convertitur in terminum complexum, consequenter cum termino complexo notio complexa (§. 108. Log.), propositioni judicium respondeat (§. 41. Log.); hac conversione innotescit, qualis idea in animo suscitanda, ut cognitio symbolica in intuitivam vertatur. Nimirum excitanda est idea rei, in qua insunt ea, quæ notionem subiecti ingrediuntur, una cum prædicato. E. gr. Si dicatur, lilia sunt alba, terminus complexus est, lilia alba. Excitanda igitur idea, quæ lilia alba veluti oculis spectanda exhibet, ac in hoc phantasma dirigenda attentio, ubi judicii actum exercere volueris modo supra præscripto. Nil obstat, quod in hac idea occurrant multa ad notionem complexam minime spectantia: sufficit enim adesse, quæ ad eam spectant, ut actus mentis & terminorum seu vocabulorum auxilio separari possint, ubi propositionem intelligere volueris, cognitionem intuitivam cum symbolica jungendo.

§. 353.

Quoniam cognitio symbolica judicia distincta reddit (§. Cur in judicando symbolicam cognitionem intuitivæ præferre dicando co-

351.) ; in judicando symbolicam cognitionem intuitivæ præferre dicando co-

Factum experientia constat: ratio redditur in propositione. Pauci sane sunt, qui actus judicii absque vocabulorum, vel aliorum signorum intuitivæ usu absolvere valent, in sola cognitione intuitiva acquiescentes, quem præferatur, admodum ante docuimus (§. 343. 345. & f.). Tacite autem nobismetipsis loqui-

loquimur, dum vocabulorum ideas in nobis excitamus, perinde ac si eadem auditu perciperentur: quod ubi fit, vocabula mentem quoque subire dicuntur.

§. 354.

Ratio cur
individuis
obviis tri-
buamus no-
mina gene-
ris vel spe-
ciet.

Si rei perceptæ sive sensu, sive vi imaginationis nomen generis vel speciei tribuimus; rei huic competere notionem generis vel speciei judicamus & memoria nobis suggerit generi vel speciei huic convenire hoc nomen. E. gr. Ponamus te dicentem: Hoc ens, quod nunc video, est columba: Dico, te judicare, enti, quod nunc vides, ea convenire, quæ ad speciem entium columbæ nomine denotatorum requiruntur & vi imaginationis te meminisse significatus vocabuli (§. 273.), consequenter tibi conscium esse, quod enti istiusmodi, quale vides, tributum sit hoc nomen (§. 226.), atque judicare enti istiusmodi convenire hoc nomen; ac ideo tandem dicere: hoc ens, quod vides, esse columbam. Nimirum dico, te intuentem columbam judicare, quod sit ens istiusmodi; memoriam tibi suggerere, quod enti istiusmodi tribuatur nomen columbæ; tandem te judicantem erumpere in hæc verba: Hoc ens, quod jam video, est columba. Quoniam enim nihil est sine ratione sufficiente, cur potius sit, quam non sit (§. 70. *Ontol.*); ratio quoque sufficiens dari debet, cur videns columbam judicet, quod sit columba & iudicium suum ita enunciet. Hoc ens, sc. quod video, est columba. Ponamus itaque te columbam sive sensu, sive vi imaginationis percipere ac in simplici apprehensione acquiescere, non vero judicare, quod ens hoc sit istiusmodi; nulla sane erit ratio, cur mentem fubeat, quod antea cognoveras, enti istiusmodi, ex communi nempe loquentium usu, tribui nomen columbæ (§. 273.), neque amplius erit ratio, cur subinde videns columbam non judices, quod sit columba; subinde autem judices, quod sit. Admittendum itaque est, te nomen generis, vel speciei, v. gr. in casu dato nomen columbæ individuo tribuentem, judicare, quod sit ens istiusmodi. Nimirum si columbam intueris, & in simplici ap-

apprehensione acquiescis, nulla adest ratio, cur nomen columbæ mentem tuam subire debeat; in casu vero altero, ubi judicas, quod sit ens istiusmodi, hoc est, individuum ad aliquod genus, vel aliquam speciem referendum, adest ratio sufficiens, cur nomen istud in mentem venire debeat (§. cit.): ergo in casu posteriori venit in mentem nomen columbæ, in priori minime. Atque adeo apparet, ad rationem sufficientem, cur columbæ visæ tribuas hoc nomen, referri debere judicium, quod sit ens istiusmodi. Ponamus jam porro, tibi nondum innotuisse, quod ens istiusmodi ex communi loquentium usu dicatur columba: nulla denuo erit ratio, cur tibi in mentem venire debeat, quod ens istiusmodi dicatur columba (§. 273.). Per se autem patet, nisi in mentem veniat, ens istiusmodi esse columbam; nec te judicare, quod ens a te jam visum sit columba. Quod si ergo intelligere volueris, cur videns columbam judices, quod sit columba; necesse est ut supponas, quod judices, ens, quod vides, esse istiusmodi, & tibi in mentem veniat, ens istiusmodi esse columbam. Ratio igitur sufficiens, cur judicas, ens hoc, quod vides, esse columbam, in eo continetur, quod eam intuens judices esse ens istiusmodi & memoria tibi suggerat, ens istiusmodi esse columbam (§. 56. *Ontol.*). Quare cum ratio sufficiens ponenda sit iudicii, ut iudicio locus esse possit (§. 118. *Ontol.*); si videns columbam judicare debes, ens hoc, quod vides, esse columbam, & columbam intuens judicare debes, quod sit ens istiusmodi, & in memoriam tibi venire debet, quod ens istiusmodi dicatur columba.

Demonstrationem propositionis præsentis ad exemplum obvium idemque facillimum applicare libuit, ut facilius intelligeretur. Absit autem, ut quis ideo hæc subtilitates metaphysicas tanquam res nullius momenti contemnat: in re enim obvia profunda quædam latet sublimitas, quæ ad arcana mentis recludenda plurimum facit. Suo sane tempore, quando praxin morum tradituri sumus, usus hic elucescet. Hic notes velim, hæcenus rationes eorum, quæ in mente humana contingunt, ignorari, quod ad obvia attendere noluerint philosophi. Equi-

dem

dem si communem morem sequi voluissimus, ex principiis hisce ardua magis deducere lucuisset, quæ iis suppressis in medium prolata magis excitassent attentionem illorum, qui ad pompam philosophantur; sed nobis jam propositum est ostendere, quomodo a levibus initiis incrementa fumant scientiæ,

§. 355.

Idem ulterius expenditur.

Si rei, quam sensu vel vi imaginationis percipis, notionem generis vel speciei convenire judicas, & jam antea didicisti nomen eidem generi vel speciei conveniens; eidem quoque rei hujus generis, vel speciei nomen tribues. Etenim quia rei, quam sensu vel imaginationis vi percipis, notionem generis vel speciei convenire judicas & jam antea didicisti generi vel speciei convenire nomen istud per hypoth. tibi succurrere debet, quod generi, vel speciei huic, aut potius individuo ad hoc genus, vel speciem hanc spectanti conveniat hoc nomen (§. 273.). Ponitur adeo ratio sufficiens, cur id nominis individuo, quod intueris, tribuas (§. 56. Ontol.), consequenter eidem quoque nomen hoc tribuere debes (§. 118. Ontol.).

Propositio hæc est inversa prioris, adeoque eodem exemplo illustrari potest, ad quod demonstrationem propositionis præcedentis applicavimus. Ceterum si attente consideres, quæ in duabus hisce propositionibus & earum demonstrationibus continentur; diversos status mentis, qui in contemplatione alicujus objecti occurrere possunt, facile a se invicem distingues. Etenim si objectum aliquod percipis, aut attentionem tuam in eodem defigis, aut non defigis. In casu priori aut judicas de eo, quod hæc eidem insint, aut non judicas. Quodsi judicas, quæ eidem insint; aut nomen rei, cui talia insunt, tibi perspectum est, aut non perspectum est. Si objectum percipis, nec attentionem in ea defigis; idea ejus iterum evanescit, nec alias ex se genitas in mente relinquit, neque etiam nomen rei succurrit; etsi hoc tibi fuerit perspectum. Quodsi vero judicas, quod ea ipsi insint, quæ ad genus, vel speciem constituendum requiruntur, & nomen generis, vel speciei non fuerit perspectum; nec in hoc casu nomen ipsi tribuendum succurrit. Quodsi denique judicas, quod insint generis, vel speciei requisita, hoc est, in similitudinem cum aliis individuis attentionem tuam convertis, ac nomen in-

individuo ad istud genus, vel istam speciem referendo tribuendum perspectum fuerit; nomen quoque istud individuo obvio tribuis. Ceterum in presente ac præcedente propositione non supponimus notionem generis vel speciei esse distinctam, sed sufficit, quod adsit confusa. Unde iudicium de re percepta, quod eidem insint determinationes generis vel speciei, verbis exprimi nequit. Atque ideo tantummodo diximus, quod ens a nobis perceptum sit istiusmodi. Etenim nobis probe consci sumus, quale sit, verbis tamen in gratiam alterius idem exprimere non valemus. Quamobrem cum plurimorum attentioni sese subducant, quæ verbis exprimere non valent; plurimi quoque, immo fortassis plerique, non advertunt, nomen rei tribuendum non succurrere, nisi prævio de re iudicio, quod eidem insint omnia generis vel speciei requisita.

§. 356.

Si ope definitionis nomen rei obviæ vindicare volueris; & judicare debes, eidem convenire notas definitionem ingredientibus, & definitionem tibi in memoriam revocare debes. Etenim definitio exprimit notionem completam atque determinatam termino cuiusdam respondentem (§. 152. Log.), consequenter generis, vel speciei termino isto tanquam nomine suo indigitatæ. Enimvero si nomen generis, vel speciei tribuis individuo obvio, & judicare debes notionem generis, vel speciei eidem convenire; & meminisse præterea, quod eadem hoc nomine indigitetur (§. 354.). Ergo si ope definitionis nomen rei obviæ vindicare volueris; & judicare debes, quod eidem conveniat definitio, hoc est, quod convenient singulæ notæ eam ingredientibus (§. 153. Log.), atque definitionem, quæ notas istas simul sumtas cum termino seu nomine quodam connectit (§. 152. Log.), in memoriam tibi revocare debes.

Quomodo nomen definitionis ope rei vindicetur.

Paret idem a posteriori. Ponamus te vi definitionis quadrati hoc nomen figuræ mensuræ vindicare velle. Id ut fieri possit, numeras latera figuræ & judicas, quod sint quatuor, consequenter quod figura habeat quatuor latera. Latera inter se confers & deprehendis, quod singula sint inter se æqualia, consequenter

(Wolffii Psychologia.) L1 quod

quod figura mensuræ latera æqualia habet. Denique consideras angulos & deprehendis, quod anguli singuli sint recti, consequenter quod figura singulos angulos rectos habeat. Hinc formas iudicium compositum, quod propositione composita & quidem copulativa exprimitur (§. 315. Log.): Figura mensuræ habet quatuor latera eademque æqualia ac singulos angulos rectos. Quodsi jam tibi confiterit atque in memoriam venerit, figuram, quæ quatuor habet latera, eaque æqualia, & singulos præterea angulos rectos, dici quadratum; ideo vi hujus definitionis figuræ mensuræ tribuis nomen Quadrati, hoc est, iudicas: Figura mensuræ est Quadratum. Pone, te vel ignorare definitionem Quadrati, aut saltem eam tibi non succurrere, vel non formare iudicia intuitiva de numero quaternario atque æqualitate laterum, nec non de specie angulorum, quod sint recti: in casu priori dices, te quidem videre, qualis sit figura mensuræ, sed ignorare, quale ipsi tribuendum sit nomen; in casu altero affirmabis te ignorare, qualis hæc sit figura. Ast ubi & iudicia dicta intuitiva formas, & definitionis, quam alias cognovisti, recordaris; tum demum dices, figuram mensuræ esse quadratum.

Ex allato exemplo, quo veritatem propositionis præsentis a posteriori ita stabilivimus, ut in ejus locum facile quodvis aliud surrogari possit, satis superque apparet, ab eo, qui propositionem præsentem admittere non vult, aut concedendum esse, posse nomen ope definitionis vindicari rei obviæ, etiamsi definitionem vel ignores, aut ejusdem non recorderis, vel notas in eadem contentas rei obviæ non convenire iudices. In priori casu statum mentis iudicantis, quod id nomen conveniat rei obviæ, confundi cum eo, quo ignoras, quodnam eidem tribui debeat nomen; in posteriori vero eundem confundis cum altero, quo ignoras, qualis sit hæc figura, adeoque erras (§. 631. Log.); etenim in casu propositionis & nosti, qualis sit figura, & quod eidem tribuendum sit nomen: neutrum ignoras.

§. 357.

Quando no-
men gene-
ris

Si in casu dato rei perceptæ ad genus suum relatæ tri-
buitur nomen speciei; nomen generis eodem modo primum ipsi
vindi-

vindicatur, quo ipsi vindicatur sigillatim, & deinde eodem speciei rei prorsus modo vindicatur quoque nomen speciei. Quoniam enim genera & species in individuis existunt (§. 56. Log.), individuum tibi obvium intuens & attentionem successive ad alia aliaque, quæ insunt, dirigens observas tum ea, quæ ad notionem generis, tum ista, quæ ad notionem speciei spectant. Enimvero quoniam determinationes specificæ simul continent genericas (§. 237. Ontol.), adeoque hæ pauciores sunt; facilius intelligitur, ad quodnam genus pertineat individuum obvium, quam ad quamnam speciem pertineat, & ubi non minus nomen generis, quam speciei perspectum fuerit, aut definitionem utriusque familiarem experiaris; tam generis, quam speciei nomen eidem tribuere debes (§. 354. 355.) & quidem primum nomen generis, deinde quoque nomen speciei, cum nomen generis jam in mentem veniat, determinationibus specificis nondum singulis perspectis (§. 273.).

Exempla ad corollarium subsequens in medium afferenda propositionem quoque præsentem illustrabunt, quæ non alio fine in medium affertur, quam ut actiones atque passiones mentis distincte resolvere discamus.

§. 358.

Quoniam nominibus individuorum destituti nomine generis vel speciei utimur ad eadem significanda, præfixo pronomine demonstrativo, quemadmodum in vulgus notum est; postquam nomen generis individuo obvio vindicavimus, eodem in nomen individui converso, huic porro vindicantes nomen speciei de genere singulariter prædicamus speciem.

E. gr. Videntes columbam dicimus. Hæc avis est columba. Primum igitur judicamus, ens istud singulare, quod videmus, esse avem (§. 355.). Deinde eidem imponimus nomen hujus avis per modum nominis proprii. Reflectentes porro super eodem individuo eidem quoque tribuimus nomen speciei (§. 354.). Atque ita tandem incidimus in judicium, quod his verbis effertur: Hæc avis est columba. Similiter ponamus nos videre pentagonum aliquod regulare. Figuram

hanc intuentes numeramus latera & quinque deprehendentes eidem vi definitionis pentagoni, quod sit figura, cujus perimeter quinque lateribus constat, vindicamus nomen pentagoni iudicantes scilicet, figuram hanc esse pentagonum aliquod (§. 356.). Deinde ad discernendum hoc individuum ab aliis figuris eidem imponimus nomen huius pentagoni per modum nominis proprii. Porro latera inter se conferentes atque angulos, non minus hos inter se æquales, quam illa sibi invicem æqualia deprehendimus. Unde vi definitionis pentagoni regularis, quod sit æquilaterum & æquiangulum, eidem porro vindicamus nomen pentagoni regularis (§. cit.). Atque ita tandem iudicamus: Pentagonum hoc est pentagonum regulare. Quod si initio respicias ad æqualitatem laterum & angulorum, figuræ vindicabis nomen figuræ regularis atque deinde nomen ipsi proprium erit, hæc figura regularis. Deinde porro numerans latera eidem vindicabis nomen pentagoni, sicque tandem iudicabis: Hæc figura regularis est pentagonum. Nimirum in hoc casu figura regularis consideratur tanquam genus, pentagonum vero tanquam species, cum in priori pentagonum spectetur ut genus, pentagonum vero regulare ut species. Apparet adeo, quam multi præsupponendi sint status animæ, antequam iudicare possis, quod hæc avis sit columba, vel hoc pentagonum sit regulare, aut hæc figura regularis sit pentagonum. Sed status istos mentis distinctius perpendemus in sequentibus.

S. 359.

*Individuum
obvium
ad suum
genus
suamque
speciem
reductio.*

Dum individuo obvio, seu rei quomodocunque perceptæ nomen generis vel speciei vindicamus; eam a rebus aliis separamus & ad suum genus vel speciem suam tanquam peculiarem entium classem reducimus. Individuo enim obvio, seu rei quomodocunque perceptæ tribuimus nomen generis vel speciei, quod notionem vel definitionem generis aut speciei eidem convenire agnoscimus (§. 355. 356.), consequenter quod ea insint, quæ in omnibus individuis ad eandem speciem, vel idem genus referendis eadem sunt (§. 233. 234. 195. Ontol.). Individuum adeo obvium per has determinationes communes a ceteris entibus, quibus eadem simul non insunt, separamus atque adeo ad suum genus, vel speciem suam tanquam peculiarem quandam entium classem referimus.

Ex propositione præfente elucescit usus propositionum præcedentium, cur scilicet condantur genera atque species, nec minus speciebus, quam generibus tribuantur peculiaria nomina, scilicet ut res obvia quæcunque ad suum genus suamque speciem referri possit: id quod non modo in scientiis perutile est, verum etiam in applicandis scientiarum præceptis ac dogmatis indispensabilis necessitatis per ea, quæ jam ulterius sequuntur, intelligitur.

§. 360.

Si prædicata generum atque specierum absoluta nobis innotuerint & rem quandam obviā ad genus aliquod vel speciem aliquam referimus; eidem quoque prædicata generis vel speciei istius tribuimus. Etenim dum eam obviā ad suum genus vel speciem suam reducimus, judicamus: Individuum hoc est hujus generis, vel hujus speciei, tribuendo scilicet ipsi tanquam prædicatum nomen generis vel speciei (§. 358.). Quoniam nobis jam antea innotuerunt prædicata generis, vel speciei istius, per hypoth. memoriæ mandavimus judicia, quæ exprimuntur istiusmodi propositionibus: Generi A competit prædicatum B, vel speciei C competit prædicatum D, consequenter cum notio generis vel speciei sit iudicio præfenti ac præterito communis, dum rem obviā ad suum genus, vel speciem suam reducimus, in anima quoque reproduci debet notio iudicio isti, generi A competit prædicatum B, vel speciei C competit prædicatum D resuscitari debet (§. 117.). Rei igitur ad suum genus vel suam speciem relatæ tribuimus istud prædicatum, judicantes individuo huic convenire prædicatum B vel D.

Idem confirmatur a posteriori. Ponamus enim nobis innotuisse columbam mansuescieri posse, ut evolans redeat & te columbam videntem judicare *avis hæc est columba*: ubi in memoriam venerit, columbas mansuescieri posse, judicabis utique ulterius: *avis hæc mansuescieri potest*, vel etiam *hæc columba mansuescieri potest*.

Patet igitur propositiones categoricas in casu singulari applicari minime posse, nisi ante res obviæ ad suum genus, vel speciem suam reducantur.

§. 361.

*Prædicato-
rum hypo-
theticorum
applicatio.*

Si prædicata generum vel specierum hypothetica nobis innotuerint & rem obviæ ad genus aliquod vel speciem aliquam pertinere, atque præterea conditionem præsentem esse agnoscimus, sub qua generi huic vel speciei prædicatum istud tribuitur; prædicatum quoque hypotheticum rei isti tribuimus. Quoniam prædicata hypothetica subjecto tribuuntur sub adjecta conditione (§. 218. Log.); notioni generis vel speciei aliæ adhuc determinationes superaccedere debent, ut prædicata ista generi vel speciei convenire possint. Quodsi ergo istas determinationes genericis, vel specificis adjicias, habebis ea, quæ in individuis eadem esse debent, ut ipsis prædicata ista communia sint, consequenter determinationibus istis ad genericas vel specificas accedentibus, novæ quædam entium classes constituuntur, veluti nova quædam genera novæque species (§. 195. 233. & seq. Ontol.). Quamobrem ubi judicas rem obviæ ad hoc genus vel hanc speciem esse referendam, atque præterea conditionem præsentem adesse, sub qua huic generi, vel speciei prædicatum aliquod fit tribuendum; eandem ad novum hocce genus, vel novam hancce speciem refers. Quoniam itaque præterea tibi nota sunt prædicata novo huic generi, vel novæ huic speciei tribuenda *per hypoth.* eadem quoque rei obviæ tribuere debes (§. 360.).

Idem eodem modo independentè a propositione præcedente demonstrare licet, quo propositionem præcedentem demonstravimus. Etenim quia judicas individuum aliquod ad genus quoddam, vel speciem quandam referri debere ac præterea adesse conditionem quandam, seu notioni generis vel speciei alias quasdam superaccedere determinationes; iudicium tuum tale est: Individuum A pertinet ad genus, vel speciem B
eidem-

eidemque præterea accidunt determinationes C. Quoniam porro tibi innotuit prædicatum aliquod generi, vel speciei B hypotheticum, seu sub conditione C eidem tribuendum *per hypoth.* alio tempore memoriæ mandasti iudicium: Generi, vel speciei B sub conditione C convenit prædicatum B. Quare notio iudicio intuitivo præsentis respondens & notio conveniens iudicio alteri communia habent ea, quæ notionem generis ac speciei ingrediuntur, atque præterea conditionem constituunt, sub qua generi vel speciei isti prædicatum convenit. Dum igitur formas iudicium intuitivum, hoc alterum quoque tibi in mentem venire debet (§. 117.), tibi que conscius eris, quod antea jam idem formaveris (§. 173. 174.), consequenter agnoscis individuo huic prædicatum istud D tribuendum esse.

Idem confirmatur a posteriori. Ponamus nobis innotuisse, quod folia arborum autumnò decidunt, & jam adspicere folia arboris & perpendere, quod autumnus cœperit: patebit nos iudicare, quod folia arboris nunc decidere debeant. Hic igitur habes prædicatum aliquod hypotheticum foliorum, nempe quod decidunt, si fuerit autumnus. Folia arboris, quam intueris, refert ad suum genus, cum folia esse agnoscis, & conditionem præsentem esse intelligis, dum jam autumnum esse memineras. Folia igitur dum jam decidere debere iudicas, rei perceptæ ad genus suum relatæ tribuis prædicatum hypotheticum, quod conditionem præsentem esse agnoscis, sub qua prædicatum istud generi illi tribuendum, & quia meministi, generi illi sub conditione ista convenire hoc prædicatum.

Si cui nondum satis evidentes videntur propositiones, in quibus statuitur de prædicatis vel absolutis, vel hypothetici in individuo alicui obvio tribuendis; is eodem modo ex principio rationis sufficientis propositionem utramque demonstrare potest, quo supra demonstravimus, quod rei perceptæ tribuendum sit aliquod nomen (§. 354. 355.). Quoniam enim ibi-

ibidem nomen rei tribuendum sese habet per modum prædicati; si in locum nominis substituas prædicatum vel absolutum, vel hypotheticum, cetera eadem erunt cum superioribus.

Nimirum non habebis rationem sufficientem, cur rei tribuas prædicatum absolutum, nisi agnoscas eam pertinere ad hoc genus vel hanc speciem, & memineris generi huic, vel speciei convenire hoc prædicatum. Nec habebis rationem sufficientem, cur eidem tribuas prædicatum hypotheticum, nisi agnoscas eam pertinere ad hoc genus vel hanc speciem atque præsentem esse hanc conditionem, & præterea memineris, generi huic, vel speciei sub hac conditione convenire hoc prædicatum.

§. 362.

Modus vindicandi rebus nomina & prædicata.

*Dum vi notionis confusæ vel definitionis rei quomodo-
cunque perceptæ nomen, vel vi judicii cujusdam categorici, aut
hypothetici prædicatum aliquod absolutum, aut hypotheticum
vindicamus; ex duobus judiciis notionem communem habenti-
bus formamus tertium combinando notiones diversas communi
omissæ. Dum enim rei obviæ A vindicamus nomen C; judica-
mus, A esse B, seu in A contineri determinaciones B, & memoria
nobis suggerit B dici C, seu ens, cui insunt determinaciones B,
dici C; atque hinc formamus judicium, rem obviæ A dici de-
bere C (§. 355. 356.). Habemus igitur duo judicia, A est B & B
dicitur C, quorum notio communis est, quæ litera B designatur.
Hac vero ommissa formamus judicium componendo A & C, scilicet:
A dicitur C (§. cit.). Quamobrem dum nomen C vindicamus
rei obviæ A, ex duobus judiciis notionem communem habentibus
formatur judicium tertium componendo notiones diversas.*

Similiter dum rei obviæ A vindicamus prædicatum absolutum D; judicamus A esse B seu dici C & memoria nobis suggerit C seu ens, quod dicitur C, esse D, atque hinc formamus judicium, A esse D (§. 360.). Habemus igitur denuo duo judicia A est C & C est D, quorum notio communis designatur litera C,
atque

atque inde formatur tertium A est D, omiſſa notione communi C componendo notiones diverſas A & D. Patet adeo denuo ſi prædicatum abſolutum rei cuidam obviæ vindicatur, ex duobus judiciis notionem communem habentibus formari tertium componendo notiones diverſas.

Quodſi D denotet prædicatum hypotheticum & A deſignet notionem generis vel ſpeciei cum cōditione eidem ſuperaddita, ſeu determinationibus accidentalibus eſſentialibus, ex quibus iſta conſtat (§. 136. *Ontol.*), ſuperaccedentibus, quarum vi ipſi A competit prædicatum D; præcedens demonſtratio loquitur, ſi prædicatum hypotheticum rei cuidam obviæ vindicatur, ex duobus judiciis notionem communem habentibus formari tertium omiſſa notione communi combinando notiones diverſas.

In exemplis ſpecialibus idem magis obvium eſt, & quidem in priori caſu evidentius, ſi nomen individuo vindicatur vi definitionis. Etenim ſi figuræ, quæ menſæ eſt, latera numeras eaque inter ſe confers, eadem numero quinque ac inter ſe æqualia deprehendis. Si præterea angulos examinas, eos rectos deprehendis. Inde igitur formas judicium, quod hac propoſitione effertur: Figura menſæ conſtat quinque lateribus, inter ſe æqualibus & ad angulos rectos ſibi invicem junctis. Vi definitionis Quadrati Figura conſtans quinque lateribus inter ſe æqualibus & ſub angulis rectis ſibi invicem junctis eſt Quadratum. Atque ideo judicas, Figuram menſæ eſſe Quadratum. Habes igitur duo judicia, quibus notio communis reſpondet, nempe figuræ conſtantis quinque lateribus inter ſe æqualibus & ſub angulis rectis ſibi invicem junctis. Judicium, quod ex hiſce duobus formatur, conſtat duabus notionibus in ceteris diverſis, figuræ ſcilicet menſæ & nominis Quadrati. Patet igitur veritas propoſitionis in caſu primo. Vidimus ſuperius ideo, quod agnoſcis avem hanc, quam vides, eſſe columbam, & quod memineris, columbam manſueſcieri poſſe, formari judicium, quod hæc avis, quam jam vides, ſeu hæc columba manſueſcieri poſſit. Habes hic denuo duo judicia, quæ notionem communem habent, nimirum avis hæc eſt columba & columba manſueſcieri poteſt. Ac omiſſa notione communi columbæ ex ceteris notionibus diverſis hujus avis & manſuefactionis formas novum judicium, quod hiſ verbis

(*Wolffii Pſychologia.*) Mm enun-

enunciatur : hæc avis mansuefieri potest. Eodem prorsus modo sese res habet in casu tertio, ubi prædicatum hypotheticum individuo vindicatur.

§. 363.

Idem expenditur in cognitione symbolica.

Quoniam in cognitione symbolica notionibus vocabula sive termini, judiciis propositiones respondent (§. 289. *Psych. & 36. 41. Log.*). Si vi notionis seu definitionis rei perceptæ nomen, vel vi propositionis categoricæ aut hypotheticæ prædicatum aliquod absolutum vel hypotheticum vindicamus; ex duabus propositionibus terminum communem habentibus formamus tertiam ex duobus terminis diversis.

Patet idem ex datis modo (not. §. 362.) exemplis : ut adeo non opus sit aliis.

§. 364.

Propositio- nis incognita ex cognitis formatio.

Si rei perceptæ vi notionis seu definitionis, vel vi propositionis categoricæ aut hypotheticæ prædicatum aliquod absolutum vel hypotheticum vindicamus; ex duabus propositionibus cognitis formatur tertia adhuc incognita. Etenim in primo casu de individuo quodam obvio judicamus, quod ipsi convenient determinaciones hujus generis vel speciei, & memoria nobis suggerit, individuo ad hoc genus vel hanc speciem pertinenti competere hoc nomen, ac ideo judicamus individuo obvio competere hoc nomen. Primo igitur iudicio intuitivo respondet propositio nota, quippe quæ nobis reflectendo super re percepta innotescit (§. 257.). Iudicio secundo respondet propositio, quam antea jam cognovimus, ubi eam memoriæ mandavimus. Tertium vero nunc demum nobis innotescit mediantibus iis, quæ ante cognita fuere. Dum igitur vi definitionis vel notionis nomen aliquod objecto obvio vindicamus; ex duabus propositionibus cognitis formamus tertiam, ad quam in præsentī sine istis non pervenissemus. Similiter in secundo casu judicamus, rei obviæ convenire hoc nomen, vel rem obviā esse hujus generis aut speciei, nobisque succurrit, rei, cui hoc nomen convenit, vel quæ hujus generis aut speciei est, convenire hoc prædicatum, atque

atque ideo ulterius judicamus : rei nobis obviæ convenire hoc prædicatum (§. 360.). Habemus igitur tria judicia, quorum tertium formatur ex duobus prioribus ante cognitis, consequenter dum vi propositionis categoricæ rei obviæ prædicatum absolutum vindicamus ; ex duabus propositionibus cognitis formamus tertiam antea nondum nobis cognitam, seu ad quam absque illis duabus jam non pervenissemus.

Denique in casu tertio, ubi prædicatum hypotheticum rei obviæ vindicatur, judicamus eidem convenire hoc nomen, sive genus hoc aut hanc speciem, hancque præsentem esse conditionem, & memoria nobis suggerit propositionem, quæ antea nobis innotuit, rei hujus generis vel speciei (§. 361.) sub hac conditione convenire hoc prædicatum, atque inde formatur propositio, ad quam absque istis in præsentem non pervenissemus : Rei obviæ convenire hoc prædicatum hypotheticum. Habemus igitur denuo duas propositiones, quibus præcognitis pervenitur ad tertiam, quæ alias nobis in mentem minime venisset. Patet adeo, dum ope propositionis hypotheticæ rei obviæ prædicatum hypotheticum vindicamus, ex duabus propositionibus ante cognitis perveniri ad tertiam, ad quam alias non pervenissemus.

Vulgo hoc non advertitur. Etenim hodie plurimi sibi persuadent, propositionem tertiam, quæ ex ceteris formatur, ante cognitam esse debere, quam ceteræ formari possint : de quo præjudicio inferius plura dicentur. Apparet vero hinc necessitas penitus evolvendi mentis operationes, cum iis ignoratis viri præstantissimi in præjudicia scientiæ noxia incidant. Etenim qui ad operationes mentis a nobis explicatas attendit, is mirabitur, qui fieri potuerit, ut acumen virorum egregiorum fugerit, quod adeo obvium videtur, ut contemni mereatur

§. 365.

Dum ex propositionibus quibusdam cognitis formatur *Illatio quid* alia, quæ antea nobis nondum cognita erat, vel quæ jam alias in *sit.* mentem non venisset; *hanc ex istis colligere* dicimur, vel etiam

Mm 2

infer-

inferre. Est igitur *Illatio* propositionis unius ex aliis formatio propositionis unius ope aliarum, terminis, ex quibus constat, inde desumptis.

Damus hic saltem definitionem nominalem, cujus realitas constat ex anterioribus. Neque enim jam definimus, num illatio alio adhuc modo fieri possit, quam in antecedentibus a nobis factum est, ubi res obvias ad sua genera suasque species reducere iisdemque prædicata tam absoluta, quam hypothetica vindicare docuimus.

§. 366.

*Definitio
ratiocina-
tionis.*

Tertia mentis operatio (quæ & *Ratiocinatio* dicitur) est iudiciorum ex aliis præviis formatio.

Fluit definitio hæc nominalis ex anterioribus, unde ejus patet realitas. An vero latius pateat iis, quæ in præcedentibus dicta sunt, inferius demum constabit.

§. 367.

*Quando
ratiocine-
mur.*

Quoniam ex duobus iudiciis præviis formamus tertium, dum vel vi notionis confusæ seu definitionis, vel ope iudicii categorici, aut hypothetici rei cuidam obviæ nomen, sive genus suum, aut speciem suam, vel prædicatum absolutum, aut hypotheticum vindicamus (§. 363. 364.); *dum rei cuidam obviæ nomen, seu genus vel speciem, aut prædicatum aliquod absolutum vel hypotheticum vindicamus; ratiocinamur.*

Sunt adeo exempla, quibus propositiones illustravimus antecedentes, *ratiocinia.*

§. 368.

*Ratiocinio-
rum symbo-
lica expref-
sio.*

In cognitione symbolica ratiocinia exprimuntur propositionibus determinatis, quibus efferuntur iudicia, ex quibus constant. Dum enim ratiocinamur, ex iudiciis quibusdam præviis formamus aliud, ad quod tum sine istis non pervenissemus (§. 366.). Enimvero in cognitione symbolica recensentur vocabula, quibus subjectum & ceteræ ejusdem determinaciones accidentales; si quæ adsunt, prædicatum & nexus ejusdem cum subjecto in affirmativis, repugnantia in negativis exprimuntur

(§. 350.)

(§. 350.), consequenter judicia propositionibus exprimimus (§. 41. *Log.*). Ratiocinium igitur in cognitione symbolica exprimitur propositionibus determinatis, quibus efferuntur judicia, ex quibus constat.

Quoniam, dum scribimus, verbis efferimus, quæ in notionibus nostris continentur, exempla ante allata propositionem præsentem illustrant. Monuimus jam in Logica (§. 332.) ratiocinium verbis distincte propositum dici syllogismum, ibidemque omnem syllogismorum theoriam, quantum ad praxin sufficit, tradidimus. Quamobrem quæ ibidem legi possunt, hic a nobis repetenda non sunt.

§. 369.

In cognitione symbolica ratiocinia sunt magis distincta, quam in intuitiva. In cognitione enim symbolica ratiocinia exprimuntur propositionibus determinatis, quibus efferuntur judicia, ex quibus constant (§. 368.). Enimvero non modo in cognitione symbolica singula judicia sunt magis distincta, quam in intuitiva (§. 351.); verum etiam singula a se invicem clarius distinguuntur, quam in cognitione intuitiva: quod posterius per se patet. In cognitione igitur symbolica ratiocinia sunt magis distincta, quam in intuitiva (§. 38.).

Idem quoque probari potest a posteriori. Formetur enim syllogismus quicunque suis constans propositionibus legitime dispositis. Advocentur singulis propositionibus ideæ respondentes & jam missis terminis seu vocabulis actus judicandi absolvetur in ideis, quemadmodum supra docuimus (§. 343. & seqq.): nullus dubito fore, ut unusquisque in semetipso experiatur, quantum intersit, utrum ratiocinans in sola cognitione intuitiva acquiescere, an vero ad symbolicam confugere velit.

Quam parum distincta sint ratiocinia in cognitione intuitiva, vel ex primo casu liquet, in quo nomen rei obviæ vi notionis confusæ vindicatur (§. 364.). cum plurimi ne moniti quidem animadvertant perfectum ratiocinium adesse, propterea quod præmissæ propositionibus determinatis efferri nequeant. Multo autem clarior apparet ratiocinatio, ubi vi definitionis idem nomen rei obviæ vindicatur, propterea

quod singula judicia propositionibus determinatis exprimi possunt (§. 356.).

§. 370.

*Ratiocinio-
rum effectus*

In omni ratiocinio aut nomen, aut prædicatum aliquod vel absolutum, vel hypotheticum subjecto cuidam vindicatur. Quicquid enti alicui inest, id vel inter essentialia, vel attributa, vel modos locum habet (§. 149. *Ontol.*). Quoniam genera & species per essentialia determinantur (§. 247. *Ontol.*), ipsa autem per alia, quæ enti simul insunt, tanquam priora minime determinantur (§. 143. *Ontol.*), adeoque in ente, quod concipi debet, primo loco ponenda sunt (§. 142. *Ontol.*); de ente per essentialia determinato prædicari potest nomen generis, vel speciei, quo tale ens designatur (§. 270.). Et quia attributa, nec non modorum atque relationum possibilitates, quæ per modum attributorum insunt, de eodem ente absolute (§. 215. *Log.*), modi autem ac relationes de subjecto suo nonnisi conditionate enunciantur (§. 217. *Log.*), attributa prædicata absoluta sunt, modi & relationes hypothetica. Quare cum de nullo ente prædicari possit nisi nomen, aut prædicatum aliquod absolutum, vel hypotheticum *per demonstrata*; per ratiocinia autem ex propositionibus quomodocunque cognitis formetur alia quædam, quæ alias jam nobis in mentem minime venisset (§. 366. 368.), adeoque subjecto alicui tribuatur aliquod prædicatum (§. 200. *Log.*); in omni ratiocinio aut nomen aliquod, vel prædicatum quoddam absolutum, aut hypotheticum subjecto cuidam vindicatur.

Ratiociniorum itaque est usus, ut constet, quodnam rei obviæ conveniat nomen generis ac speciei, consequenter ad quod genus, ad quamnam speciem referri debeat, & quænam ipsi convenient prædicata cum absoluta, tum hypothetica. Quamobrem quo plura prædicata ad genera sua speciesque suas relata cognoveris; eo ad ratiocinandum aptior eris. Hinc patet necessitas disciplinarum: patet etiam, quænam in iisdem tradi debeant, scilicet definitiones accuratæ & propositiones determinatæ, tum categoricæ, in quibus prædicata absoluta determi-

nant.

nantur per essentialia, quæ definitiones ingrediuntur; tum hypothetica, in quibus prædicata hypothetica determinantur per accidentalia essentialibus in definitione contentis superaddentia.

§. 371.

Definitio rei convenire dicitur, si eidem insint singulæ *Definitio,*
notæ definitionem ingredientibus. *Genus vel species rei convenire* *genus &*
dicitur, si eidem insint determinationes singulæ genericæ, vel *species quan-*
specificæ. *donam rei*

Uterior horum explicatio quoad definitionem petenda ex doctrina *convenire*
logica de definitionibus (§. 152. Log.); quoad genus & speciem ex do- *dicantur.*
ctrina ontologica de ente universali (§. 236. & seqq. Ontol.). Præmit-
timus autem terminorum horum explicationem, ut sequentes ratio-
nandi leges rectius intelligantur.

§. 372.

Regule ratiocinandi seu syllogismorum dicuntur, per quas *Regule syl-*
ratiocinia explicari possunt, seu quas anima observat, dum legiti- *logismorum*
me ratiocinatur. Dicitur autem *legitime ratiocinari*, si propo- *quantam di-*
tio illata fuerit vera. *cantur.*

Regulæ illæ syllogisticæ explicantur in Logica (§. 366. & seqq.).

§. 373.

Lex ratiocinandi dicitur principium generale ratio- Leges ratio-
norum seu regularum ratiocinandi. *cinandi qua-*

Rationem denominandi vide superius (not. §. 84), quemadmo- *nam dicantur.*
dum jam indicavimus supra (not. §. 116.).

§. 374.

Leges ratiocinandi sunt. 1. Cui competit definitio aut no- *Leges ratio-*
tio confusa eidem respondens, eidem competit definitum, seu nomen *cinandi.*
ista definitione explicatum & contra. 2. Cui competit genus vel
species, eidem quoque competunt prædicata absoluta generi vel spe-
ciei isti tribuenda. 3. Cui præter genus vel speciem conveniunt
determinationes quædam accidentales, eidem quoque conveniunt
prædicata sub istis determinationibus accidentalibus generi & spe-
ciei isti tribuenda. Etenim dum ratiocinamur, rei aut nomen
aliquod

aliquod vindicamus, aut prædicatum absolutum, vel hypotheticum (§. 370.). Quoniam nomen rei ideo tribuitur, quod eidem conveniat definitio, vel notio confusa eidem respondens (§. 355. 356. 371.), consequenter & definitio vel notio confusa eidem respondens convenire debet, si nomen eidem tribuendum esse ponis; per propositionem istam, *cui convenit definitio, eidem convenit definitum & contra*, intelligitur, cur ratiocinans tribuat rei vel nomen aliquod, vel definitionem aliquam, consequenter ratio, cur id fiat, in eadem continetur (§. 56. *Ontol.*). Est adeo principium ratiocinandi (§. 866. *Ontol.* & §. 367. *Psychol.*), consequenter lex ratiocinandi (§. 373.).

Similiter prædicatum absolutum ideo tribuimus rei, quod rem ad genus istud, vel speciem illam referimus, cui istud convenire nobis constat (§. 360.), consequenter quia genus, vel species eidem convenit (§. 371.). Quoniam itaque per propositionem istam, *cui convenit genus vel species, eidem quoque conveniunt prædicata absoluta generi vel speciei tribuenda*, intelligitur, cur ratiocinans tribuat rei hoc prædicatum absolutum (§. 367.); in propositione hac continetur ratio ratiocinii (§. 56. *Ontol.*), consequenter ipsa principium ratiocinii est (§. 866. *Ontol.*). Est igitur lex ratiocinandi (§. 373.).

Denique prædicatum hypotheticum ideo tribuimus rei, quod rem obviam ad genus aliquod vel speciem aliquam pertinere, præterea conditionem præsentem esse agnoscamus, ob quam generi isti vel speciei prædicatum hoc hypotheticum tribuitur (§. 361.), consequenter quia eidem præter genus conveniunt etiam determinationes quædam accidentales (§. 371.). Quare cum per propositionem istam, *cui præter genus vel speciem conveniunt determinationes quædam accidentales, eidem quoque conveniunt prædicata sub istis determinationibus accidentalibus generi vel speciei tribuenda*, intelligatur, cur hoc prædicatum hypotheticum eidem tribuatur, in propositione hac

conti-

continetur ratio, cur prædicatum hypotheticum rei sit tribuendum (§. 56. *Ontol.*), consequenter principium est (§. 866. *Ontol.*) & quidem, cum prædicatum hypotheticum rei tribuens ratiocinetur (§. 367.), principium ratiocinatorum. Est igitur lex ratiocinandi (§. 373.).

Coincidit cum hac lege *Dictum de omni Logicorum* (§. 346. 348. 349. *Log.*).

§. 375.

Si rei cuidam obviæ notas definitionem aliquam ingredien- *Nomen*
tes junctim sumtas non convenire agnoscimus, atque definitionis illi- *quando rei*
us memores nobis conscii sumus, rei, cui definitio ista convenit, tri- *denegetur.*
buendum esse hoc nomen; idem rei obviæ convenire non posse judica-
mus. Quoniam enim nomen generis, vel speciei alicujus tribui volumus enti, cui determinationes istæ genericæ, vel specificæ insunt, quibus notio generis vel speciei continetur (§. 271. *Psych.* & 236. *Ontol.*), nomen quoque istud, stante significato vocabuli, quem non immutari supponimus, tribui nequit nisi enti, cui determinationes genericæ, vel specificæ simul insunt, consequenter cui genus, vel species convenit (§. 371.). Quare cum definitionem rei obviæ non convenire agnoscamus & nobis conscii simus hanc esse definitionem rei, cui id nominis tribuitur *per hypoth.* judicare utique debemus, nomen istud rei obviæ tribui minime posse.

Idem quoque confirmatur a posteriori. Ponamus enim nos agnoscere, quod figura mensæ quatuor habeat latera, ac inde inferre, quod non habeat tria. Ponamus porro in memoriam nobis venire, figuram, quæ tribus lateribus continetur, esse triangulum, consequenter quæ tribus lateribus non continetur, non esse triangulum. Nemo non ideo judicabit, figuram mensæ non esse triangulum.

Nimirum ratio, cur rei alicui tribuendum sit nomen aliquod, est definitio. Quare si hæc rei non convenit, nec ratio ponitur, ob quam nomen eidem tribuendum. Ergo nec nomen eidem tribui potest.

(*Wolffii Psychologia.*)

Nn

§ 376.

§. 376.

Alter casus.

Quoniam notio confusa continens notas, quæ definitionem ingrediuntur, definitioni æquivalet, seu eidem generi vel speciei convenit, cui definitio convenit, quod per se patet; Si obviæ cuidam rei notionem aliquam confusam non convenire agnoscimus atque meminimus, nomen aliquod indigitare rem, cui notio ista convenit; nomen rei obviæ non convenire judicamus (§. 375.).

Pertinet huc exemplum, quando scilicet judicamus, ens, quod videmus, non esse avem, vel etiam avem, quam videmus, non esse columbam. Propositio præfens eodem modo demonstrari poterat, quo præcedens.

§. 377.

Quando definitio denegetur.

Si rei cuidam obviæ nomen aliquod convenire non posse agnoscimus atque meminimus, rei hoc nomine indigitatæ convenire definitionem aliquam; eidem quoque definitionem convenire non posse judicamus. Quoniam enim nomen aliquod rei tribuimus, ut indigitemus eidem convenire definitionem aliquam (§. 271.), si nomen rei non convenire potest, nec definitionem eidem tribuere licet. Quare si agnoscimus rei cuidam obviæ nomen aliquod convenire non posse atque meminimus rei hoc nomine indigitatæ convenire definitionem aliquam; eidem quoque definitionem hanc convenire minime posse utique judicare debemus.

E. gr. Si constet figuram mensæ non esse triangulum, atque recordemur, triangulum esse figuram quæ tria latera habet; utique judicamus figuram mensæ non habere tria latera.

§. 378.

Quando notio quadam confusa rei denegetur.

Quoniam notio confusa continens notas, quæ definitionem aliquam ingredi debent, definitioni æquivalet; si rei cuidam obviæ nomen aliquod convenire non posse agnoscimus atque meminimus rei hoc nomine indigitatæ convenire notionem aliquam

aliquam confusam ; eidem quoque notionem hanc confusam convenire non posse judicamus (§. 377.).

E. gr. Si nosti avem a Titio visam non esse columbam, atque imaginatio præsens tibi sistat phantasma columbæ ; judicabis utique phantasmate isto minime representari avem a Titio visam.

§. 379.

Si rei cuidam obviæ nomen aliquod convenire agnoscimus, seu eam ad hoc genus vel speciem istam referri debere agnoscimus atque meminimus rei hoc nomine denotatæ, seu ad hoc genus vel speciem istam spectanti repugnare aliquod prædicatum absolutum ; idem quoque rei obviæ tribui non posse judicamus. Quando rei denegetur prædicatum absolutum.

Etenim si rei aliquo nomine denotatæ, seu ad genus aliquod, vel speciem aliquam relatæ prædicatum aliquod absolutum repugnat, ex eo intelligitur, quod prædicatum aliquod rei cuidam convenire nequeat, quod ipsi hoc nomen conveniat, vel quod ad genus, vel speciem istam spectet, consequenter in judicio, quod res obvia ad hoc genus, vel speciem istam spectet, ratio continetur, cur prædicatum convenire non possit (§. 56. Ontol.). Quare cum agnoscamus, rei obviæ convenire nomen aliquod, vel eam ad hoc genus, aut speciem istam referendam esse, per hypoth. ratio ponitur, cur prædicatum istud absolutum rei obviæ convenire minime possit, consequenter prædicatum istud convenire eidem nequit (§. 118. Ontol.). Recte igitur judicamus, prædicatum istud absolutum rei obviæ convenire minime posse.

E. gr. Si nobis constet figuram mensæ esse Quadratum atque meminimus, Quadratum non habere tres angulos ; utique judicamus, figuram mensæ non habere quatuor angulos. Similiter si constet, avem, quam videmus, esse hirundinæ, atque recordemur, hirundinem cavæ inclusam vivere non posse ; utique judicamus, avem hanc, quam videmus, cavæ inclusam vivere non posse. Nemo autem miretur nos rationem sufficientem appellare notionem subjecti seu nomen, quo eadem denotatur, cui prædicatum aliquod repugnat, cur prædicatum istud rei convenire non possit ; neque enim invita definitione rationis sufficientis (§. 56. Ontol.) dantur etiam rationes sufficientes ad negandum.

§. 380.

*Quando
denegetur
prædicatum
hypotheti-
cum.*

Quodsi nobis constet rei cuidam obviæ tribuendum esse nomen aliquod, vel eam ad hoc genus, aut speciem istam referendam esse ac præterea adesse conditionem quandam seu determinationes quasdam accidentales, atque meminerimus generi vel speciei isti sub hac conditione, seu his superaddentibus determinationibus accidentalibus repugnare aliquod prædicatum; idem rei obviæ non convenire judicamus. Quoniam enim generi vel speciei sub hac conditione repugnat prædicatum *per hypoth.* ex eo intelligitur, quod rei ejus generis vel speciei posita ista conditione prædicatum convenire non possit, consequenter notio generis vel speciei cum conditione ista ratio est, cur hoc prædicatum rei ad idem genus, vel eandem speciem pertinenti convenire minime possit (§. 56. *Ontol.*). Quare cum nobis constet rem obviæ esse hujus generis, vel speciei atque conditionem esse præsentem, sub qua prædicatum generi vel speciei huic repugnat *per hypoth.* ratio sufficiens ponitur cur eidem hoc prædicatum convenire nequeat, consequenter utique eidem convenire non posse perspicimus (§. 118. *Ontol.*). Judicamus itaque rei obviæ prædicatum hoc convenire minime posse.

Ponamus nos perspicere, quod semen sit commissum terræ aridæ, & meminisse quod semen terræ aridæ commissum non germinet: utique judicabimus, semen, quod jam terræ commissum est, germinare non posse.

§. 381.

Alius casus.

Si nobis constet rei cuidam obviæ tribuendum esse nomen aliquod, sive genus, vel speciem, & meminerimus, generi vel speciei isti sub data quadam conditione vel datis quibusdam determinationibus accidentalibus convenire aliquod prædicatum, hanc autem conditionem, vel istas determinationes accidentales abesse videamus; rei quoque prædicatum istud non convenire judicamus. Quoniam enim prædicatum generi, vel speciei competere non intelligitur, nisi posita ista conditione, seu de-
ter-

terminationibus accidentalibus ad essentialis notionem generis, vel speciei constituentes accedentibus; hæ notioni generis vel speciei junctæ absolvunt rationem sufficientem, cur prædicatum hypotheticum generi, vel speciei convenire possit (§. 56. *Ontol.*) Quare cum prædicatum demum ponatur, posita ratione sufficiente (§. 118. *Ontol.*); conditione absente, vel determinationibus accidentalibus non extantibus, prædicatum hypotheticum rei datæ convenire non posse perspiciamus, atque adeo judicamus, prædicatum hypotheticum rei obviæ non convenire.

E. gr. Ponamus nos videre lapidem & meminisse lapidem calidum calefacere. Quodsi porro deprehendamus, lapidem, quem videmus, non esse calidum; utique judicabimus, lapidem hunc, quem videmus, non posse calefacere. Certe nos ita judicare, quovis momento experiri licet. Quodsi ad judicia hominum fuerimus attenti & super iis reflectentes principia universalia abstrahamus; in omnes illas propositiones a posteriori incidemus, quas hic de ratiociniis a priori stabilimus omnes muneris, quod philosopho incumbit (§. 6. *Disc. pralim.*), partes adimpleruri.

§. 382.

In omni ratiocinio negativo aut nomen aliquod, aut prædicatum vel absolutum, vel hypotheticum aliquod de subjecto quodam negatur. Quoniam per ratiocinium negativum illud intelligimus, quo conclusio negativa inferitur; non alia prædicata per ratiocinium negativum a subjecto removeri possunt, quam quæ per affirmativa eidem vindicantur. Jam vero in omni ratiocinio affirmativo, quo scilicet prædicatum aliquod subjecto vindicatur, aut nomen, aut prædicatum aliquod absolutum, vel hypotheticum subjecto alicui vindicatur (§. 370.). Ergo in omni ratiocinio negativo aut nomen aliquod, aut prædicatum vel absolutum, vel hypotheticum removeri debet.

Ratiociniorum negativorum adeo hic usus est, ut præcaveamus errores in judicando, ne scilicet rei tribuamus nomen, quod eidem minime convenit, aut ne eandem ad genus aliquod vel speciem referamus,

cui subſtare nequit, ac ne porro eidem tribuamus prædicata, quæ in eam vel nunquam, vel ſaltem in præſenti convenire nequeunt. Quodſi nunquam per errorem judicaremus, ſed in ratiocinando exacti eſſemus; ratiociniis negativis non haberemus opus.

§. 383.

Quando ratiocinamur.

Dum vi definitionis, aut notionis eidem æquipollentis nomen, aut vi judicii cujuſdam categorici, vel hypothetici prædicatum abſolutum, vel hypotheticum a re quadam removemus; ratiocinamur. Quando enim vi definitionis aut notionis confuſæ eidem æquipollentis nomen, aut vi judicii cujuſdam categorici, aut hypothetici prædicatum aliquod abſolutum, aut hypotheticum a re quadam removemus, ex duobus præviis judiciis formamus tertium (§. 375. & ſeqq.). Quare cum ratiocinamur, dum ex judiciis aliis præviis judicia formamus (§. 366.); in omni caſu propoſitionis ratioeinamur.

Sunt adeo exempla, quibus propoſitiones antecedentes illuſtravimus, ratiocinia.

§. 384.

Leges ratiocinandi negative.

Leges ratiocinandi ſunt: 1. Cui non convenit definitio, aut notio confuſa eidem reſpondens, ei nec convenit definitum & contra. 2. Cui convenit genus, vel ſpecies, eidem quoque non convenit prædicatum abſolutum generi, vel ſpeciei iſti repugnans. 3. Cui præter genus, vel ſpeciem convenit conditio, ſub qua prædicatum aliquod eidem generi, vel ſpeciei repugnat; eidem quoque prædicatum iſtud non convenit. 4. Cui genus & ſpecies convenit, ſed non convenit conditio, ſub qua prædicatum aliquod eidem tribuendum; ei nec prædicatum hoc convenit. Etenim nomen, vel genus aliquod, aut ſpeciem aliquam rei non convenire ex eo intelligimus, quod non conveniat eidem definitio, vel notio confuſa huic æquipollens (§. 375. 376.), conſequenter in propoſitione, cui non convenit definitio, aut notio confuſa eidem æquipollens, ei nec convenit nomen definitioni, vel notioni iſti reſpondens, continetur ratio, cur nomen a ſubjecto ſit removendum

dum (§ 56. *Ontol.*). Est igitur principium (§. 866. *Ontol.*). Quoniam itaque ratiocinamur, dum nomen aliquod subiecto convenire vi definitionis aut notionis eidem æquipollentis negatur (§. 383.); propositio ista principium ratiocinandi est, adeoque lex ratiocinandi (§. 373.).

Similiter cum ex eo intelligatur, quod rei alicui definitio, vel notio quædam confusa eidem æquipollens convenire nequeat, quod nomen definitioni, vel notioni isti respondens non conveniat; eodem prorsus modo ostenditur, legem ratiocinandi esse hanc propositionem: *Cui non convenit nomen, cui definitio quedam, vel notio confusa aliqua respondet, ei nec convenit definitio vel notio ista.*

Prædicatum aliquod absolutum rei non convenire ex eo intelligimus, quod ipsi conveniat genus, vel species, cui prædicatum istud repugnat (§. 379.). Quamobrem denuo, ut ante ostenditur, legem ratiocinandi esse propositionem: *Cui convenit genus, vel species, eidem nec convenit prædicatum absolutum generi isti, vel speciei repugnans.*

Prædicatum aliquod hypotheticum rei cuidam non convenire intelligimus tum ex eo, quod ipsi præter genus, vel speciem conveniat ista conditio, sub qua generi huic, vel speciei prædicatum aliquod repugnat (§. 380.): tum ex eo, quod ipsi genus quidem, vel species, sed non conditio conveniat, sub qua prædicatum generi isti, vel speciei convenit (§. 381.). Quamobrem eodem prorsus modo etiam ostenditur, esse non minus hanc propositionem, *Cui præter genus, vel speciem convenit conditio, sub qua prædicatum aliquod eidem generi, vel speciei repugnat; eidem quoque prædicatum istud non convenit, quam alteram, Cui genus & species convenit, sed non convenit conditio, sub qua prædicatum aliquod eidem convenit; ei nec prædicatum hoc convenit, legem ratiocinandi.*

Coincidit cum legibus istis ratiocinandi *Dictum de nullo* Logicorum (§. 347. & seqq. *Log.*). Exempla perenda sunt ex anterioribus (not. §. 375.

§. 375. & seqq.). Sunt autem leges hæc ratiociniorum negativorum, quemadmodum superiores (§ 374.) affirmativorum. In casu hypothetico leges duæ simul subinde obtinent, si ad ideam respicias, non ad verba, quæ variari possunt, illa existente eadem: id quod exemplis redditur manifestum. Ponamus lapidem esse frigidum, adeoque non calidum. Aut igitur ex eo, quod sit frigidus, aut ex eo, quod non sit calidus, colligitur, quod non calefaciat. In casu priori ponitur conditio, cui prædicatum repugnat; in posteriori tollitur conditio, sub qua prædicatum ponitur. Similiter ponamus porro parietem esse rubro panno tectam, adeoque non albam. Aut igitur ex eo, quod rubro panno tegatur, aut ex eo, quod albus non sit, colligitur, quod imagines per foramen exiguum intromissas non exhibeat claras atque satis distinctas. In casu priori ponitur denuo conditio, cui prædicatum repugnat; in posteriori tollitur conditio, sub qua prædicatum ponitur. Atque hæc ratio est, cur plerumque lex altera non attendatur, sed simul sub priori tacite comprehendatur.

§. 385.

Modus ratiocinandi conditionatus.

Si quid esse agnoscimus atque meminimus, ideo etiam aliud quid esse debere; hoc alterum quoque esse judicamus. Etenim si quid ideo est, quia alterum est; ex eo quod hoc est, etiam illud esse intelligitur, consequenter illud ratio sufficiens est, cur hoc sit (§. 56. *Ontol.*). Quare cum agnoscamus hoc esse, propter quod alterum esse debet *per hypoth.* rationem sufficientem poni agnoscimus. Et quia meminimus, si hoc est, etiam alterum esse debere; id, quod ponitur, esse rationem sufficientem alterius nobis confecti sumus. Quoniam itaque posita ratione sufficiente ponitur etiam id, quod per eam potius est, quam non est (§. 118. *Ontol.*); alterum quoque esse debere utique judicamus.

Idem patet a posteriori. Ponamus nos observare, quod ventus orientalis spiret, atque in plagam, unde spirat, respicientes judicare, quod spiret. Quod si nobis in mentem veniat, quod ante cognovimus: Si ventus orientalis spirat, tempestas serena est, & in hanc propositionem attentionem nostram perinde ac in priorem convertimus; nos judicare experimur, quod tem-

tempestas sit serena. Duas hic habemus propositiones, 1. Ventus orientalis spirat, & 2. tempestas est serena. Experientia & ratione constat, si ventus orientalis spirat, tempestatem esse serenam, adeoque generaliter, si id est, quod propositione una affirmatur, esse etiam alterum, quod affirmatur propositione altera. Observamus vero prius esse, ac ideo judicamus, quod etiam sit alterum.

Spēctamus nimirum hic duo a se in vicem diversa tanquam inter se connexa, ut posito uno ponatur etiam alterum. Et idem sane obtinet in omni ratiocinio categorico, de quo antea diximus. Etenim nomen rei tribuitur sub conditione definitionis, seu eidem æquipollentis notionis confusæ; prædicatum absolutum sub conditione eadem, prædicatum hypotheticum sub conditione expressa definitioni superaddita. E. gr. Si judicamus columbam mansuescieri posse, supponimus avem esse columbam & inde colligimus, quod mansuescieri possit. Quare si verum est, avem esse columbam; verum etiam est, eam mansuescieri posse. Similiter si judicamus, lapidem calidum calefacere, supponimus lapidem esse calidum ac inde colligimus quod calefaciat. Quare si verum est, lapidem esse calidum; verum etiam est, eum calefacere. Propositione adeo præsentē nituntur ratiocinia positiva non minus categorica, quam hypothetica.

§. 386.

Si quid non esse agnoscimus atque meminimus, ideo etiam aliud quid non esse debere; hoc alterum quoque non esse judicamus. Etenim si quid ideo esse nequit, quia alterum non est; ex eo, quod hoc non est, intelligitur cur illud etiam non sit, consequenter non existentia hujus est ratio sufficiens non existentia illius (§. 56. Ontol.). Quare cum agnoscamus hoc non esse, propter cujus non existentiam nec alterum esse potest per hypoth. rationem sufficientem poni agnoscimus, cur alterum non sit. Et quia meminimus, si hoc non est, nec aliud quid esse posse, vel ideo etiam aliud quid non esse debere per hypoth. id., quod ponitur, esse rationem sufficientem (Vossii Psychologia.)

tem cur alterum esse nequeat nobis conscii sumus. Quoniam itaque posita ratione sufficiente ponitur etiam id, quod per eam potius est, quam non est (§. 118. *Ontol.*), adeoque posita ratione sufficiente, cur aliquid esse non possit, etiam id, quod per eam potius non est, quam esse potest, esse nequit; alterum quoque non esse debere utique judicamus.

Idem confirmatur a posteriori. Ponamus nos observare, lapidem non esse calidum. Quodsi nobis in mentem veniat: si lapis non est calidus, nec calefacit, & in hanc propositionem attentionem nostram perinde ac in priorem convertamus, nos judicare experimur, quod lapis non calefaciat. Duas hic habemus propositiones, 1. Lapis non est calidus & 2. Lapis non calefacit. Experientia & ratione constat, si lapis non est calidus, quod propositione una esse negatur, nec alterum esse, quod propositione altera negatur. Observamus vero prius non esse, ac ideo judicamus, quod etiam alterum non sit.

Duæ hæ notiones negativæ, quæ duabus propositionibus negativis respondent, ex quibus hypothetica componitur, ita inter se connexæ sunt, ut una posita ponenda etiam sit altera, consequenter ut, si unum negetur, negandum etiam sit alterum: ut adeo casus propositionis præsentis contineatur sub priori, si per fictionem negativa notio spectetur ut positiva: quo respectu affirmamus aliquid non esse, dum idem esse negamus. Ad hanc fictionem dudum attenderunt Logici non modo in casu præsentis, verum etiam in aliis (§. 208. *Log.*), ubi negationem explicant per affirmationem, quod quid non sit, ad salvandos conceptus universales. Et in præsentis quidem casu, poni dicitur, quod esse vel non esse judicamus (§. 406. *Log.*). Quamobrem & Logici utramque propositionem mediante hoc termino in unam contrahunt.

§. 387.

Alius modus.

Si quid non esse agnoscimus atque meminimus, idem esse posito quod sit aliud, etiam hoc non esse, agnoscimus. Ponamus nos agnoscere B non esse, atque meminisse, si A est, etiam B esse;

B esse; dico nos judicare, quod A non sit. Etenim si judicare velimus, A esse, judicandum quoque quod sit B (§. 385.). Quare cum B non sit *per hypoth.* A non esse utique judicandum (§. 53. *Ontol.*).

Quodsi exemplum quodvis singulare substituas, idem confirmabitur a posteriori & ad te ipsum attentus agnosces, non aliam efferationem, cur ita judices, quam eam, quæ in demonstratione adducta fuit. E. gr. Si observamus tempestatem non esse serenam, atque recordemur, si ventus orientalis spirat, serenam esse tempestatem; hinc utique colligimus, ventum orientalem non spirare. Quæritur cur ita colligamus, respondemus quod alias tempestas serena esse deberet.

Nimirum si posito A ponitur etiam necessario B, fieri non potest, ut, si A sit, B non sit. Quare utique ex eo, quod B non est, colligendum, etiam A non esse. Multa in exemplis singularibus evidentiæ sunt, quæ ad universalitatem revocata obscura evadunt.

§. 388.

Lex ratiocinandi est: Posito propositionis hypotheticæ Lex ratio- antecedente ponitur consequens & sublato consequente tollitur ciniorum antecedens. Quoniam enim in propositione hypothetica con- *hypothetico-* sequens ideo est, quia antecedens est (§. 385. 386.) & antecedens *rum.* non est, quia consequens non est (§. 387.), ex eo, quod antecedens ponitur, intelligitur cur ponatur consequens & ex eo, quod consequens tollatur, intelligitur, cur tollatur antecedens, consequenter in propositione: *Posito propositionis hypotheticæ antecedente ponitur consequens & sublato consequente tollitur antecedens*, continetur ratio, cur judicandum sit in casu priori consequens esse, in posteriori antecedens non esse (§. 56. *Ontol.*), adeoque propositio ista principium est (§. 866. *Ontol.*). Enimvero dum ita judicamus, ex duabus propositionibus datis formamus tertiam, consequenter ratiocinamur (§. 366.). Est igitur propositio ista lex ratiocinandi (§. 373.).

Hac lege nimirum nituntur syllogismi hypothetici, quemadmodum alias docuimus (§. 409. & seqq. Log.).

§. 389.

*Modus ratiocinandi disjuncti-
ve.*

Si duorum aut plurium uno existente cetera non existant, unum vero eorum semper existat; propterea quod unum existere constat judicamus cetera non esse & , ubi cetera non esse intelligimus, unum eorum esse. Propositio hæc coincidit cum fundamento syllogismorum disjunctivorum, quod in Logica (§. 417.) exposuimus. Non igitur opus est, ut eam denuo probemus, præsertim cum adeo evidens sit, ut absque omni probatione concedi debeat.

Ponamus nimirum aut A, aut B, aut C esse. Quodsi fuerit C, non erit A, non erit B. Et si nec C, nec B fuerit, erit A. Idem clarius patet in casu speciali. Quoniam substantia omnis aut simplex est, aut composita, ideo animam aut simplicem esse constat, aut compositam. Ponamus jam porro probari, quod non sit composita. Nemo non protinus judicabit, quod sit simplex. Similiter constat semper esse aut diem, aut noctem. Ponamus constare, quod dies fuerit, cum aliquis nasceretur. Hinc ergo colligimus, quod nocte natus non fuerit.

§. 390.

Lex ratiocinandi minorum disjunctivorum.

Lex ratiocinandi est: Posito uno membro propositionis disjunctivæ, tolli cetera & ceteris sublati poni unum, ac uno sublato indeterminate poni ceterorum unum. Etenim ex eo, quod membrum unum ponatur, intelligitur cur cetera tollantur, & ex eo, quod tollantur cetera vel eorum unum, intelligitur, cur ponatur unum vel determinate, vel indeterminate, consequenter in propositione præsentem continetur ratio, cur judicemus quid esse, vel non esse (§. 56. Ontol.), adeoque propositio ista principium est (§. 866. Ontol.). Habemus autem duas propositiones, alteram disjunctivam, alteram categoricam, vel disjunctivam iterum, qua aliquid ponitur, vel aliquid aut plura tolluntur, atque hisce præviis formatur tertia, qua quid esse affirmatur, vel negatur, adeoque vi propositionis præsen-

tis judicantes ratiocinamur (§. 366.). Propositio igitur præsens principium ratiocinandi *per demonstrata*, consequenter lex ratiocinandi (§. 373.).

Quomodo hinc deducantur modi syllogismorum disjunctivorum, in Logica docuimus (§. 419. & seq.).

§. 391.

In ratiociniis ex notionibus aliis præviis nascitur alia. *Notionum
ortus ex
ratiociniis,*

Quando enim ratiocinamur, judicium aliquod ex aliis præviis formamus (§. 366.), consequenter in cognitione symbolica ex propositionibus determinatis præviis formatur alia (§. 368.). Quoniam vero omni propositioni veræ notio aliqua respondet (§. 520. 521. Log.); in ratiociniis ex præviis notionibus aliis nascitur alia.

Idem patet a posteriori. Ponamus enim me pirum intuentem judicare, quod sit arbor, atque recordantem, quod arbor omnis autumnno folia deponat, colligere, quod pirus, quam intueor, autumnno folia sit depositura. Tum igitur ita ratiocinamur. Pirus hæc arbor est. Arbor omnis autumnno folia sua deponit. Ergo & hæc pirus folia sua autumnno deponet. Propositioni primæ, quæ est minor syllogismi (§. 340. Log.), respondet notio, qua pirus exhibetur tanquam arbor, quatenus in idea piri præsentis attentionem nostram dirigimus ad ea, quæ piro cum arboribus ceteris communia sunt, veluti ad truncum, ramos, furculos atque folia. Propositioni secundæ respondet notio arboris autumnno folia deponentis, quatenus nobis in memoriam revocamus ideam alicujus arboris, qualem folia deponentem conspeximus autumnali tempore, una cum aliis perceptionibus, quas ista tempestate simul habuimus. Propositioni denique tertiæ respondet notio aut, si mavis, idea exhibens hanc arborem, qualis conspicietur autumnali tempore folia depositura. Ex duabus igitur notionibus præviis nascitur tertia & in cognitione intuitiva ex duabus ideis

tertia nascitur. Idem eodem modo patet in quocunque casu alio ratiocinii categorici. Enimvero non minus idem patet in casu ratiocinii hypothetici: id quod vel eodem exemplo, quod modo dedimus, probari potest, si ratiocinium categoricum ad hypotheticum revocetur. Etenim ponamus, nos ut ante pirum intuentes judicare, quod sit arbor, atque perpendentes, quod, si arbor sit, folia sua autumnno deponere debeat, colligere, quod hæc, quam intuemur, pirus folia sua deponere debeat. Ecquis non videt, nos ita ratiocinari: Si hæc pirus arbor est, folia sua autumnno deponet. Atqui hæc pirus arbor est. Ergo folia sua autumnno deponet. Enimvero quis non simul videt, subsumptioni & conclusioni, utpote iisdem cum minore ac conclusione syllogismi categorici, eandem respondere notionem, propositioni autem hypotheticæ notionem ex utraque compositam sive ideam, qua pirus exhibetur tanquam arbor foliis prædita & deinde tanquam eadem deponens una cum perceptionibus tempestatu autumnalis signis. Idea enim, quæ primo se sistit, antecedenti respondet: eadem vero deinde successive immutatur, ut respondeat consequenti. Sed idem casus convertitur quoque in ratiocinium hypotheticum a categorico diversum. Ponamus enim nos ad perceptiones nostras attento judicare, quod sit autumnus, atque recordantes, quod autumnno decidant folia arborum, consequenter judicantes quod, si autumnus sit, hæc pirus sive hæc arbor folia sua depositura sit, colligere, quod hæc arbor folia deponere debeat. Hoc modo igitur hypothetice argumentamur: Si autumnus est, pirus hæc folia deponet. Atqui autumnus est. Ergo pirus hæc folia sua deponet. Antecedenti respondet notio autumnu, quam in idea exhibemus per ea, quæ ista tempestate diversa a nobis sensu percipiuntur: consequenti autem notio, quæ in idea arboris folia sua deponentis continetur. Propositionem adeo hypotheticam nobis repræsentamus per ideam ex utraque compositam,

fitam, quatenus successive attentio ab una ad alteram promovetur. Subsumptioni respondet notio antecedentis solitaria. Nascitur adeo hic aliqua notio ex aliis præviis. Eodem prorsus modo idem intelligitur in quocunque casu alio iudicii hypothetici.

Plurimum prodest ad distinctam mentis humanæ cognitionem, ut status mentis expendamus, qui in ratiociniis successive se invicem excipiunt. Quamobrem acumen sibi comparaturi, quo in animæ interioribus rimandis opus est; ratiocinia complura tam categorica, quam hypothetica revocet ad notiones complexas atque ideas, quæ successive in mente nascuntur, dum ratiocinamur. Valde proficuum hoc nobis est in philosophia morali, quemadmodum suo loco plenius constabit.

§. 392.

Quoniam in ratiociniis ex notionibus quibusdam præviis nascuntur aliæ, ad quas tunc temporis absque istis non pervenissemus (§. 391.); ex ratiociniis intelligitur, quomodo in mente notiones aliæ ex aliis nascantur, consequenter Ratiocinia *Usus ratiociniorum in explicanda successione idearum.* Et in cognitione symbolica syllogismi notionum atque idearum, in quibus ista continentur, successioni explicandæ inserviunt.

Ufus hic Syllogismorum prorsus egregius est antea non animadvertus. Primus mentionem ejus injeci in Lexico Mathematico sub voce *demonstratio*. Dixi deinde plura de eodem in Ratione Prælectionum Sect. 2. c. 3. §. 28. p. 147. atque in Metaphysica patrio idiomate conscripta §. 341. & seqq. quæ in compendio proposuit Thummingius in Institut. Psycholog. §. 79. Ut vero plenius intelligatur, aliquot adhuc theoremata specialia condenda sunt.

§. 393.

Si iudicium intuitivum notionem communem habet cum præterito aliquo iudicio, quod memoria tenemus, & formatum ex terminis eorum diversis iudicium denuo communem quandam notionem habet cum iudicio aliquo præterito, quod memoria tenemus ac ita porro; series cogitationum continuatur per *Modus prius continuationis seriet perceptionum.* leges

leges ratiocinandi. Etenim si iudicium, quod formatur, intuitivum notionem communem habet cum iudicio aliquo præterito, hocque memoria tenemus, atque adeo idem reproducere ac reproductam recognoscere valemus (§. 180.); vi notionis communis iudicium præteritum reproducimus (§. 104.) terminisque diversis iudicii utriusque combinatis iudicium discursivum formatur (§. 362.), sicque pervenitur ad iudicium, quod alias mentem nostram tunc temporis non lubiiffet (§. 366.). Quod si attentionem nostram in hoc iudicium dirigimus & id notionem quandam communem habet cum alio præterito, quod itidem memoria tenemus; eodem, quo ante, modo ostenditur, nos ad iudicium aliquod discursivum pervenire, ad quod alias non pervenissemus. Unde facile patet, eadem lege quantocunque temporis intervallo seriem cogitationum ratiocinando continuari posse, modo non desint iudicia præterita, quorum ope præsentium recordamur.

Liquet idem a posteriori in exemplis obviis. Ponamus Titium mane evigilare, auditaque hora quinta surgere, vestes induere, preces ad Deum fundere, in Bibliis sacrosanctis legere ac deinde ad labores consuetos progredi. Ponamus majoris evidentia gratia, omnia hæc fieri ex intentione agentis, ita ut habeat animum agendi, quod agit. Quod si jam meditemur, quomodo successive cogitationes animum subeant; id explicari non posse animadvertes nisi per ratiocinii notionem. Nimirum Titius, dum evigilat, audit horologium sonitu campanæ indicare horam quintam. Super perceptione sua reflectens iudicat, horam quintam jam audiri: quo facto propositi sui recordatur, hora quinta esse surgendum, ac inde infert, sibi jam esse surgendum. Latere in hisce syllogismum sequentem: Quando hora quinta auditur, surgendum mihi est. Nunc auditur hora quinta. Ergo nunc mihi surgendum est: ecquis non videt? Proposito singulari surgendi non futurum fuisse locum, nisi duo status mentis præ-

cessissent, qui præmissis respondent vi principii rationis sufficientis concluditur. Ponamus enim te non audire horam quintam sonitu campanæ jam indicari, aut saltem super perceptione non reflectere; nulla erit ratio, cur surgendi propositum tibi in mentem veniat (§. 104.): id quod & a posteriori innotescit, modo ad diversos status diverso tempore obtinentes attendere consueveris. Ponamus te quidem audire, quod horologium loquatur horam quintam, immo te animum ad perceptionem præsentem reflectentem judicare, quod hora quinta jam audiat, nunquam autem tibi fuisse propositum hora quinta surgendi: nec intelligere licet, quomodo vi solius perceptionis præsentis, vel etiam iudicii de eo, quod percipitur, perveniatur ad propositum singulare, nec nos in casu utroque ad idem pervenire experimur. Quodsi vero supponas te jam antea propositum surgendi animo concepisse & jam audire, quod horologium loquatur horam quintam, qua surgere decrevisti, teque jam judicare, quod hora ista audiat, non modo hinc intelliges, cur propositi tui recorderis (§. 104.), verum etiam cur propositum singulare jam surgendi locum habeat (§. 360.), consequenter propositi huius rationem sufficientem habes, atque in hoc solo casu tibi esse propositum surgendi speciale, siquidem immediate ex perceptione sonitus horologii horam quintam loquentis & memoria propositi antea animo concepti oriri debet, ipso opere experieris. Quodsi jam porro propositum hoc exequeris tibi que executionis conscius es, hoc ipso iudicas, te jam surgere. Quare si antea animo concepisti propositum vestimenta induendi, dum surgis; huius propositi meminisse (§. 104.) atque hinc porro ut ante inferre debes, vestimenta jam esse induenda. Propositum adeo singulare induendi vestimenta distincte explicabile per hunc syllogismum. Quando surgo, vestimenta sunt induenda. Jam surgo. Ergo jam vestimenta induenda sunt. In præsentī casu non esse rationem sufficientem

tem propositi vestimenta induendi singularis, nisi utraque præmissa prævia; eodem prorsus, quo ante, modo ostenditur. Quodsi dubites, te judicare, quod surgas, dum tibi conscius es te surgere; id inde intelliges, quod quæsitus, quid facias, respondeas te surgere. Propositio enim hæc exprimit iudicium, quod in præsentī casu supponimus. Similiter dum tibi conscius es, te vestimenta induere; iudicas utique quod jam vestimenta induas &, actu finito, quod eadem indueris: unde quæsitus quid facias, vel quid feceris, respondes te vestimenta induere vel induisse. Quare si jam animo tuo sedet propositum, ubi vestimenta induisti, preces ad Deum fundendi; hujus propositi recordatus colligis preces ad Deum jam esse fundendas. Atque adeo modus, quo determinatur actualitas propositi hujus singularis, denuo explicabilis per syllogismum, scilicet sequentem: Quando vestimenta induero, preces ad Deum sunt fundendæ. Atqui vestimenta jam induo. Ergo preces ad Deum sunt fundendæ. In hoc enim demum contineri rationem sufficientem actualitatis propositi specialis fundendi ad Deum preces eodem, quo ante, modo innotescit. Dum propositum tuum ipso opere executus preces ad Deum fudisti & te hoc fecisse tibi conscius es; perinde ac ante intelligitur, te judicare quod jam preces ad Deum fuderis. Atque ita ulterius propositi tui recordaris, quod precibus ad Deum fuis textus in sacrosanctis Bibliis sit legendus. Actualitas adeo hujus propositi per syllogismum sequentem explicabilis: Quando preces ad Deum fudi, textus in sacrosanctis Bibliis legendus. Atqui jam preces ad Deum fudi. Ergo jam textus in Bibliis legendus. Denique dum hoc propositum ipso opere executus tibi conscius es, quod jam textum in Bibliis legas, ulterioris propositi recordaris, quod a lectione Bibliorum ad labores consuetos te conferre debeas. Hinc igitur infers ad labores consuetos nunc esse accedendum. Propositum adeo singulare accedendi ad labores consuetos quomodo nascatur, denuo per syllo-

sylogismum hunc explicari potest. Quando textus in Bibliis lectus fuit, ad labores consuetos accedendum. Atqui jam textus in Bibliis lectus fuit. Ergo jam ad labores consuetos accedendum. Et ita per ratiocinia, saltem per latentia, series perceptionum continuatur ac appetituum, donec nova quadam sensatione interrumpatur. Idem innumeris aliis exemplis non minus obviis confirmare licet, modo ad singula animum attentum afferre & attentionem allatam in iisdem conservare didiceris: quod etsi adeo leve videatur, ut puerile reputetur, non tamen adeo leve deprehenditur, quemadmodum putatur, prout tentantibus apparebit.

Quæ a posteriori ad confirmandam propositionem præsentem in medium allata sunt, illustratione aliqua indigent, ne ad præcipianda judicia adducantur qui sibi acumine præstare videntur, quo destituuntur. Notandum itaque est, quando status animæ per syllogismos explicabiles esse asseveramus, id non ita accipiendum esse, ac si mens nostra syllogismos formales formet tacite quasi sibimet ipsi loquendo, quemadmodum accidere solet animum ad perceptiones suas reflectentibus; sed id unice defendi, quod perceptiones ac in iis latentes notiones singulis syllogismi propositionibus respondentes in mente successively se invicem excipiant, quodque perceptio respondens conclusioni consequatur ex perceptionibus, quæ per præmissas exprimuntur, quemadmodum ex præmissis in syllogismo consequitur conclusio. E. gr. Dum hora quinta auditur, non opus est, ut mentem subeant hæc verba: Hora quinta jam auditur; sed sufficit me mihi conscius esse ejus, quod auditu percipio, & significatus ejusdem confuse tantummodo recorder, immo prorsus obscure, ut mihi ejusdem vix ac ne vix quidem conscius sim: sufficit enim ita in ideis exhiberi quæ verbis hæc indignantur: Jam hora quinta auditur. Similiter dum propositi surgendi hora quinta recorder; non opus est ut hæc verba mussem: Hora quinta mihi surgendum est. Ergo jam surgendum est; sed sufficit adesse in mente perceptiones, quibus continentur notiones propositionibus istis respondentes. Perceptiones nimirum constituunt status mentis, qui per modificationes animæ a se invicem discernuntur, quæ a facultatibus mentis oriuntur secundum leges in Psychologia stabilitas. In ipsa autem demonstratione propositionis jam docuimus, vi principii rationis sufficientis

tis diversos illos status in mente admittendos esse, qui singulis syllogismi propositionibus respondent, & eo modo consequi statum, quem conclusio exprimit, ex ceteris, qui per præmissis indignantur, quomodo ex præmissis conclusio consequitur. Deinde porro notandum est, quemadmodum eadem conclusio ex diversis præmissis inferri potest; ita etiam statum mentis, qui eidem conclusioni respondet, ex diversis statibus præviis consequi posse atque solere. Sufficit itaque statum istum in omni casu ita consequi ex præviis, ut modus, quo consequitur, per syllogismum explicabilis sit. Absit itaque ut quis in dubium vocet ea, quæ ad confirmandam propositionem præsentem a posteriori in medium adducta sunt, quod ea in se aliter experiatur. Huc etiam pertinet, quod, quemadmodum judicia intuitiva subinde etiam per ratiocinia tanquam discursiva inferantur, ita quoque status mentis, qui perceptionibus sensualibus continetur, ex aliis statibus præviis consequantur. Ita horam audiri quintam judicamus non semper ideo quod sonitus campanæ aures feriat; sed idem sæpius colligimus ex perceptionibus aliis, veluti lumine solis orientis ab ædificio aliquo reflexi, vel actionibus aliorum hominum isto tempore edi solitis & ita porro. Notandum denique me exemplum maxime vulgare studio elegisse, ut propositio præsens facilius intelligeretur ac idea exemplaris analyseos cogitationum menti ingeneraretur. Absit itaque ut contemnatur id, in quo inexpectata latet profunditas & quod maximam philosophantibus utilitatem spondet, propterea quod per obvia intelligatur. Usus præterea insignis paulo post eluceſcet in notione demonstrationis ad communem revocanda.

§. 394.

Alius modus, quo series cogitationum continuatur.

Si ope notionis complexæ formantur plura judicia intuitiva ac per ea perveniatur ad totidem discursiva, hinc vero denuo formetur notio complexa, vel formantur notiones complexæ plures, ac inde deducantur judicia alia per modum intuitivorum, per quæ ad alia discursiva pervenitur; series cogitationum per ratiocinia continuatur. Etenim si ope notionis complexæ formantur plura judicia intuitiva ac per ea pervenitur ad totidem discursiva; tot ratiociniis opus habemus, quot sunt judicia discursiva, quæ ex intuitivis colliguntur (§. 393.). Dum vero ex notionibus complexis, quæ judiciis istis discursivis simul sumtis respon-

dent,

dent, formantur denuo alia judicia per modum intuitivorum ac eorum ope ad alia discursiva pervenitur; tot denuo ratiociniis opus habemus, quot prodeunt judicia discursiva (§. cit.). Series igitur cogitationum in hypothesi propositionis præsentis per ratiocinia continuatur.

Idem confirmatur a posteriori exemplis obviis. Ponamus nos conspicerere pruna immatura. Duo igitur formare licet judicia intuitiva, nimirum quod fructus hi sint pruna, & quod iidem sint pruna immatura. Ponamus jam porro judicantibus in memoriam venire, quod pruna multum habeant in re œconomica usum. Inferemus ergo: fructus, quos conspiciamus, multum habere in re œconomica usum. Judicium hoc discursivum verbis sæpissime efferimus, dum pruna contuemur. Ponamus denique judicantibus pruna esse immatura incidere, quod pruna immatura diarrheas excitare possint, aut minimum tormina ventris. Inferemus ergo: fructus hos, quos conspiciamus, diarrheas excitare posse, aut minimum tormina ventris. Judicia discursiva combinata exhibent hoc judicium, quod quasi intuitivum est: fructus hi multum in re œconomica usum habere ac diarrheas, aut tormina minimum ventris excitare posse. Quod si igitur memoria tibi suggerat judicium aliquod præteritum, aut minimum notiones, unde istud nascitur, fructum, qui in re œconomica multum habet usum, & diarrheas aut tormina ventris excitare potest, esse & utilem, & noxium; inde ulterius colliges, fructus hosce, quos conspicias, esse & utiles, & noxios. Si porro recorderis, pruna esse in re œconomica utiles, quando clibano torrentur, aut in aheno coquantur, ut in pultem abeant; hinc porro colliges, fructus, quos conspicias, esse utiles, quando in clibano torrentur, aut in aheno coquantur, ut in pultem abeant. Similiter si porro memineris pruna immatura recenter comesta tormina ventris, vel diarrheas excitare, adeoque noxios esse; inde similiter colli-

gis, fructus, quos conspicias, esse noxios, quando recentes comeduntur. Quodsi jam iudicium discursivum, ad quod antea pervenisti, cum hisce conferas; inde iudicium novum quasi inquisitivum formas: Fructus, quos conspicias, esse utiles, si in clibano torrentur, vel in aheno coquantur, ut in pultem abeant; esse autem noxios, si recenter comeduntur. Quamobrem ulterius recordatus usum esse appetendum, abusum noxium vitandum; hinc tandem colligis, fructus, quos conspicias, esse vel in clibano torrendos, vel in aheno coquendos, ut in pultem abeant. Quodsi denique in mentem veniat, te & prunis tostis, & prunis in pultem redactis habere opus, & quantitatem, quæ tibi suppetit, utrisque sufficere intelligis operatiociniorum, quæ brevitatis causa omittimus; hinc tandem inferis, partem fructuum, quos conspicias, in clibano torreri, partem reliquam in aheno coqui debere, ut in pultem abeant, atque ita pervenitur ad iudicium decretorium de usu prunorum, quæ non prorsus hoc anno ad maturitatem pervenere,

Quæ de casu præcedente annotavimus (not. §. 393.) ; ea etiam mutatis mutandis ad præsentem applicari possunt. Meretur tamen casus præsens singularem attentionem, ne per præcipitantiam in præjudicium noxium incidas, usum syllogismorum in explicanda continuatione seriei perceptionum vel prorsus rejiciens, quando occurrunt, qui per theorema præcedens explicari nequeunt, vel ad casum saltem priorem restringens, cum in posteriori frustra progressum perceptionum per theorema præcedens explicare coneris. Præterea observandum usum theorematis præsentis esse difficiliorem usu præcedentis, cum ad idem applicandum majore attentione opus sit, quam quæ ad applicationem anterioris requiritur. Quamobrem consultum est, ut quandam applicandi prius facilitatem tibi contrahas, antequam de applicatione posterioris cogites. Ceterum admiratione careret, quod anima secundum leges perceptiones suas continuat, quas ignorat, & quas intellectas sæpe non agnoscit, immo ubi eas jam novit, a se observari vix ac ne vix quidem advertit. Etenim eodem prorsus modo res sese habet in motibus mechanicis corporis. Se-

cundum leges staticas incedimus & corpus nostrum in quoslibet situs componimus. Plerique tamen hominum illas ignorant & , si qui eas intelligunt, eas a se observari ignorant, nec ad motus ac situs corporis explicandos transferre valent, ita ut exiguus admodum sit eorum numerus, qui hunc illarum usum facere possit. Nemo igitur miretur, si eadem in perceptionibus obtineant, quæ quod in motibus corporis obtineant, in dubium vocari nequit. Absit autem, ut tibi persuideas semper recurrendum hic esse ad syllogismos categoricos: sapius enim & hypotheticis, & disjunctivis, & aliis quibuscunque argumentandi modis locus est, prout casus tulerit. Non opus est, ut exempla anxia sollicitudine conquirantur. Si quis enim in posterum ad series perceptionum suarum attenderit, is quæ desiderantur, ipsemet domestica experientia supplebit.

§. 395.

In demonstrationibus cogitationes eodem modo procedunt, Identitas quo series notionum ac perceptionum communiter continuantur. legum demonstrationis & continuationis seriei perceptionum communium.
 In demonstratione enim ostensiva ex definitione, vel hypothesei integra formatur propositio per modum iudicii intuitivi, aut ex illius partibus plures formantur propositiones atque sumuntur tanquam minores syllogismorum. In memoriam revocata propositione alia antea nobis jam cognita, quæ terminum cum ista communem habet, ac in locum majoris in syllogismo surrogata, inferitur conclusio & eodem modo inferuntur conclusiones plures, si plures ex definitione vel hypothesei formatæ fuerint propositiones. Conclusiones deinde sumuntur ut præmissæ novorum syllogismorum, vel plures simul spectantur, ut notio complexa, formaturque inde propositio, quæ sumitur ut præmissa novi syllogismi, atque præmissis istis ubi jungimus propositiones alias terminum communem habentes, novæ ulterius inferuntur conclusiones. Atque hoc pacto cogitationum series continuatur in demonstrationibus ostensivis (§. 351. 352. Log.). Neque diverso ab hoc modo, eadem continuatur in demonstrationibus apogogicis, nisi quod propositio contraria

traria ei, quæ demonstrari debet, sumatur ut ante definitio, vel hypothesis (§. 553. Log.). Enimvero eodem prorsus modo series perceptionum communium continuatur (§. 393. 394.). In demonstrationibus adeo cogitationes eodem modo procedunt, quo series notionum ac perceptionum communiter continuantur.

Parallelismum hunc primum ostendi in Lexico Mathematico, cum usum syllogismorum in explicanda cogitationum serie ostenderem (not. §. 392.). Ad eum clarius percipiendum conducit, ut & series quædam cogitationum obviarum eo modo resolvantur, quo in confirmandis theorematibus hac spectantibus a posteriori resolutionem instituimus (§. 393. 394.), & demonstrationes aliquot geometricæ ea lege resolvantur, qua idem fecimus indolem demonstrationis illustraturi (§. 551. & seqq. Log.). Quodsi enim solutiones istas inter se contuleris, non ovum ovo istis similis deprehendes. Etsi autem quis existimare posset, resolutionem seriei cogitationum obviarum in syllogismos faciliorem esse resolutione demonstrationum in eosdem; ipso tamen facto contrarium experietur. Atque hinc patet ratio, cur iste perceptionum progressus hactenus non satis sit animadversus, nec a nobis forsitan animadversus fuisset, nisi ante in demonstrationibus resolvendis diu multumque versati fuisset, quam in notionem progressus perceptionum inquisivisset. Suademus igitur ut alii exemplum nostrum imirentur, qui parallelismum hunc penitus introspicere gestiunt: id quod sua non carere utilitate, ex sequentibus elucet.

§. 396.

Ordo cogitandi in demonstrationibus.

Quoniam in demonstrationibus cogitationes eodem modo procedunt, quo series notionum ac perceptionum communiter continuantur (§. 395.); in demonstrationibus cogitationes procedunt ordine maxime naturali.

Atque hinc intelligitur, cur demonstrationes adeo evidentem reddant veritatem, modo in iis concipiendis fueris versatus, & principia, quæ easdem ingrediuntur, fuerint familiaria, ita ut memineris, te jam antea eadem perspexisse. Pater simul, cur demonstra-

tiones,

tiones, quas consummatas appello (§ 855. Log.), ceteris præsent, & cur in nova Elementorum Mathematicos editione non postrema cura fuerit, quam demonstrationibus consummandis impendi,

§. 397.

Et quoniam probatio probabilis a demonstratione non differt nisi principiis (§. 588. Log.), consequenter cogitationes in eadem eodem ordine procedunt, quo in demonstratione se invicem excipiunt; *in probatione quoque probabilis cogitationes probabilis, procedunt ordine maxime naturali* (§. 396.).

Qui idem minime perspiciunt, probationes evolvere vel non solent, vel non possunt. Atque adeo non magis mirari convenit, si quando ordinem istum distincte non percipi observamus, quam ubi eum in serie perceptionum obviarum non animadverti experimur. Si probationes non fuerint spuriae, sed genuinae; ad eam constanter formam reduci possunt per distinctam explicationem, ut ordo iste eluceat. Cur in spuriis resolutio non succedat, patebit paulo post.

§. 398.

Quoniam probatio omnis vel probabilis est, vel demonstratio, prouti vel certo, vel probabiliter cognoscimus, quod probari debet (§. 574. 578. Log.); *in omni probatione cogitationes ordine naturali procedunt* (§. 396. 397.).

Probationem hic intelligi genuinam, non spuriam ex modo dictis patet (not. §. 397.). Est nempe genuina, quæ vel certo, vel probabiliter evincit, quod erat probandum: spuria autem, quæ a genuina probationis forma deficit, adeoque nec veritatem, nec probabilitatem propositionis evincit, quæ probari debebat.

§. 399.

Quia in probatione omni cogitationes ordine naturali procedunt (§. 398.), adeoque eodem; *demonstrationes & probationes probabiles ejusdem cum illis formæ* (§. 588. Log.)

(Wolffii Psychologia.)

Qq

An omni discipline conveniant demonstrationes & probationes genuinae formæ.

omni disciplina conveniunt , nec Mathesi vi objecti propriæ sunt.

Cum demonstrationes & probationes probabiles ejusdem cum ipsis formæ in Mathesi tantummodo usu receptæ fuerint , in disciplinis autem ceteris probationum legitima evolutio hætenus desiderata fuerit ; enatum hinc est præjudicium , quasi demonstrationes & probationes etiam probabiles ejusdem cum ipsis formæ sint Mathesi propriæ vi objecti , de quo agit , nec ad alias disciplinas , in quibus nobis non cum quantitate , sed qualitatibus rerum negotium est , extendi possint. Postquam vero accuratiori methodo philosophari coepimus , idem successive evanescit , aliis exemplum nostrum imitantibus. Ercum in Horis subsecivis A. 1730. *Trim. brum. n. 2. Trim. vern. n. 2. & Trim. astivo n. 2.* & regulis , & exemplis docuerimus , quomodo in ipso Jure civili accurata methodus adhiberi debeat , & Cl. Cramerus , Collega conjunctissimus , qui jura accurata methodo maximo cum applausu proficitur , in argumento singulari de pacto hereditario renunciativo filie nobilis specimen singulare demonstrationum in Jure dederit , & Cl. Schreiberus in Elementis Medicinæ physico-mathematicis eandem methodum ad artem salutarem applicaverit ; non dubitamus fore , ut præjudicium istud ignaviæ patrescians & incrementis eruditionis solidæ noxium tandem profusus extirpetur.

S. 406.

Cur syllogi.

Si quis analysin demonstrationum logicam negligit , nec
formales in iis expendendis eum sequitur ordinem , qui ex analysi appa-
ret ; is syllogismos formales eorundemque concatenationem in
strationibus istis non animadvertit. Qui enim analysin demonstrationum
non animad- logicam negligit , is eas in syllogismos formales non resolvit ,
vertantur. nec syllogismos ac propositiones eo ordine collocat , quo se in-

vicem in demonstratione ordinata excipiunt (§. 551. & seqq. item §. 799. *Log*) , consequenter distincte non cognoscit , quinam syllogismi demonstrationem ingrediantur , quo ordine se invicem excipiant & quomodo vi præmissarum perveniatur ad conclusiones , adeoque notionem distinctam syllogismorum demonstrationem ingredientium & concatenationis eorum-

dem

dem non consequitur (§. 682. *Log.*). Quodsi quis porro in demonstrationibus expendendis eum non sequitur ordinem, qui ex analysi apparet; is non format ex notione subiecti iudicia intuitiva, nec eorum ope in memoriam revocat principia terminum communem cum iis habentia, ac inde conclusiones infert, neque etiam in conclusiones ita illatas mentis aciem dirigit, ut ope termini unius in eadem obvii in memoriam sibi revocet propositionem aliam, quæ terminum communem habet, ac vi cujus novam infert conclusionem. Fieri igitur non potest ut vel confusa demonstrationis ordinatæ seu naturalis idea animo ejus ingeneretur, dum demonstrationes expendit (§. 799. 690. *Log.*). Quoniam igitur nec distinctam, nec confusam notionem resolubilitatis demonstrationum in syllogismos formales & concatenationis horum consequitur, qui analysin demonstrationum logicam negligit, nec in iis expendendis eum sequitur ordinem, qui ex analysi apparet; ut syllogismos formales eorundemque concatenationem in demonstrationibus animadvertat, fieri nequit (§. 80. 83. *Log.*).

Domestico idem confirmare possum exemplo. Quamdiu enim vulgari modo Mathesin edoctus in expendendis demonstrationibus non naturalem secutus fui ordinem, sine quo ex notione subiecti prædicatum distincte erui nequit, nec syllogismos formales adverti, qui demonstrationem ingrediuntur, nec genuinam eorundem concatenationem percipi. Enimvero ubi methodo analytica inquisivi, quomodo ex definitione, vel hypothesi, tanquam assumptio, eruatur prædicatum tanquam quæsitum legitima ratiocinatione, in analysin logicam demonstrationum incidi, syllogismos formales, qui easdem ingrediuntur, detexi & eorum concatenationem perspexi. *Cartesius* in *Dissertatione de methodo* p. m. n. se animadvertisse ait, syllogismorum formas aliaque fere omnia Logicæ præcepta non tam prodesse ad ea, quæ ignoramus, investiganda, quam ad ea, quæ scimus, alius exponenda; vel etiam ut ars *Lullii* ad copiose & sine iudicio de iis, quæ nescimus, garriendum. Non igitur agnovit ex sumpta definitione vel hypothesi theorematibus tanquam cognita constante

ratiociniorum nexu inferri tandem prædicatum tanquam ignotum, ubi demonstrationem rite expenderis, ut cogitationes naturali ordine procedant. Unde apparet, ipsum de syllogismo non ex veritate pronunciare sententiam, quod analysin demonstrationum logicam neglexerit, nec in iis expendendis eum secutus fuerit ordinem, qui ex analysi apparet. Magis abjecte de syllogismo sentit de *Tschirnhausen* in *Medicina Mentis* part. 2. p. m. 28. 29. ubi ne quidem hunc ejus usum largitur, quem in veritate cognita clarius aliis exponenda concessit *Cartesius*, sed rationem nexus inter prædicatum atque subiectum, quem demonstratio manifestat, multo facilius absque syllogismo perspicui contendit: id quod denuo arguit, quod demonstrationis naturalis seu ordinatæ ac naturalis coagitandi modi nullam habuerit notionem distinctam. In eandem sententiam ivit *Lockius* de *Intellectu humano* lib. 4. c. 17. f. 295, qui fidenter pronunciat, nos optime tunc ratiocinari, quando argumenta contemplamur, prout inter se connexa sunt, sine regulæ cujusvis, aut syllogismi subsidio, atque prolixè contra syllogismos disputat tandemque concludit, præcipuum syllogismorum usum esse in scholis, ubi homines haud puderet idearum, quæ inter se plane conveniunt, convenientiam negare, vel extra scholas apud eos, qui didicere ibi sine rubore aliquo idearum connexionem negare, quæ ipsis perspicua est. Patet autem ex iis, quæ de demonstratione disserit lib. 3. c. 2. §. 2. & seqq. f. 236. ipsum ad genuinam demonstrationum analysin animum non adverterisse. Quoniam tantorum virorum auctoritate hætenus plurimi fuerunt impediti; nostrum esse putavimus hæc monere, ut sublato impedimento veritati utili assensus adjiciatur. Etenim ut præjudicium nocuum vitemus cavendum est, ne in Probationibus, ipsis demonstrationibus perpendendis communem sequamur morem, ut scilicet ad conclusionem respicientes omnium primo ex nobis ipsis vel aliis queramus, cur propositio ista vera sit, seu prædicatum subiecto conveniat & responsionis loco medium terminum allegemus, mox porro quesituri, num vi ejus prædicatum subiecto tribui possit, ac adesse hic vim concludendi probaturi per allegationem propositionis majoris. Sane quamdiu hoc pacto demonstrationes geometricas perpendi, genuinam earum indolem perspicere minime potui. Sit ita viros insignes de *Tschirnhausen* & *Lockium* tunc collegisse, quod absque syllogismorum formalium subsidio ita multo facilius veritatem perspiciamus. Neque usquam demonstratio ordinata ac completa, quam

uno nomine consummatam appello, ab eo expectanda erit, qui non alia via in demonstrationibus aliorum concipiendis incedit.

§. 401.

Si eidem notioni complexæ propositiones diversæ respondere Ortus syllogismi possunt, & ex iis in ratiocinando ea eligitur, quæ in formam syllogismi cryptici non quadrat; Syllogismus crypticus oritur. Etenim cum propositiones, quibus eadem notio complexa respondet, sint æquipollentes (§. 278. Log.), salva veritate, quæ notioni inest, non verbis (§. 513. Log.), una alteri substitui potest, cumque vi termini communis cum propositione aliqua data in memoriam revocari possit, quæ ad formam syllogismi non quadrat (§. 104.), eam retinemus, prouti occurrit. Quoniam igitur formæ syllogismi non convenit, etsi æquipolleat alteri, quæ in eandem quadrat *per demonstrata*; syllogismus equidem legitimus est, seu in regulas non peccat, unde formam suam habet, ejus tamen genuina forma non apparet. Est igitur crypticus (§. 365. Log.).

Hanc esse genuinam rationem cryptici syllogistici a posteriori confirmatur. E. gr. Syllogismus crypticus sequens est (not. §. 439. Log.): Dimidium parallelogrammi est triangulum super eadem basi & ejusdem altitudinis. Sed hæc figura est triangulum cum parallelogrammo eandem basin & altitudinem habens. Ergo hoc triangulum est dimidium parallelogrammi. Notio complexa respondens propositioni majori exhibet rationem duplam parallelogrammi ad triangulum super eadem basi & altitudinis ejusdem, vel rationem subduplam trianguli ad parallelogrammum super eadem basi & ejusdem altitudinis. Propositiones igitur æquipollentes sunt: Dimidium parallelogrammi est triangulum super eadem basi & ejusdem altitudinis & Triangulum cum parallelogrammo super eadem basi constitutum & ejusdem altitudinis est dimidium parallelogrammi, ita ut salva notione, seu veritate rei, unam alteri substituere valeas. Similiter si dicas, hæc figura est triangulum cum parallelogrammo eandem basin & altitudinem habens, siue affirmes, hoc triangulum

cum parallelogrammo constitui super eadem basi & esse ejusdem altitudinis, una denuo eademque nono utrique propositioni responderet, Quodsi duabus propositionibus prioribus utaris tanquam præmissis, syllogismus crypticus est, quemadmodum in Logica (*loc. cit.*) jam ostendi; quodsi vero posteriores in eorum locum surroges, a crypti liberatur syllogismus & in sequentem formæ unque manifestæ degenerat: Omne triangulum cum parallelogrammo super eadem basi constitutum & ejusdem altitudinis est dimidium parallelogrammi. Hoc triangulum cum parallelogrammo constitutum super eadem basi & ejusdem altitudinis est. Ergo hoc triangulum est dimidium parallelogrammi. Quodsi exempla cetera, quæ de syllogismis crypticis dedimus in Logica, attentius consideres, iisdem non minus, quam eo, quod modo in medium attulimus, veritatem propositionis præsentis confirmari intelliges. Cryptes in ratiocinando frequentissimæ sunt ac in primis ab iis non emendantur, qui distinctam formæ syllogismorum notionem animo comprehensam non habent. Accidit igitur ut non sufficienter ad talia attenti sibi aliter ratiocinari videantur, quam forma syllogistica præscribit, ita ut ea omnibus ratiociniis præscribi non posse judicetur. Intimius hæc perspicier, qui inter judicia & propositiones distinguere noverit ac cognitionem symbolicam ad intuitivam reducere didicerit, quemadmodum supra præcepimus.

§. 402.

Ortus figura
secundæ
& tertiæ
syllogismo-
rum.

Quoniam syllogismi figura secundæ & tertiæ sunt cryptici syllogismi in prima (§. 385. 397. Log.); Syllogismi in secunda & tertia figura ortum trahunt ex eo, quod eidem notioni complexæ propositiones diversæ respondere possunt & ex iis in ratiocinando seligatur, quæ in formam syllogismorum primæ figuræ non quadrat. (§. 401.).

Idem confirmari potest exemplo. In figura secunda argumentamur (*not.* §. 383. Log.): Nullum triangulum habet quatuor angulos. Omne Quadratum habet quatuor angulos. Ergo Nullum Quadratum est triangulum. Nonio propositioni respondens majori exhibet repugnantiam inter figuram trianguli & quatuor angulos. Enimvero

vero eadem notio convenit quoque propositioni huic: Quæcunque figura habet quatuor angulos, illa non est triangulum, seu Nulla figura, quæ habet quatuor angulos, est triangulum. Quodsi vero hanc propositionem priori æquivalentem substituis; syllogismus in prima figura prodit. Quod adeo syllogismus secundæ figuræ loco alterius in prima prodierit ratiocinanti, id quidem inde est, quod notioni complexæ majori convenienti respondeant duæ propositiones æquivalentes, quarum una quadrat in formam figuræ primæ, altera in eandem non quadrat, hæc autem posterior adhibita fuerit loco prioris, quia iudicanti quadratum quatuor habere latera occurrat propositio, quod nullum triangulum quatuor angulos habeat, cum in figuram trianguli & quadrati intentus iudicare deberet figuram nullam, quæ quatuor angulos habet, triangulum esse. Idem eodem modo deprehenditur in exemplis ceteris quibuscunque syllogismorum secundæ figuræ. E.gr. In modo *Cælestes* argumentamur (*not. §. cit.*): Omne triangulum habet tres angulos. Nullum quadratum habet tres angulos. Ergo nullum quadratum est triangulum. Propositioni majori responder notio, quæ figuram tribus lineis comprehensam cum tribus angulis exhibet. Enimvero vicejusedem notionis iudicare etiam licet, quod nulla figura, quæ tres angulos non habet, sit triangulum. Quodsi hanc propositionem in locum prioris surroges, prodit syllogismus in prima figura: Nulla figura, quæ tres angulos non habet, est triangulum seu quæcunque figura non habet tres angulos, ea triangulum non est. Atqui Nullum quadratum habet tres angulos. Ergo Nullum Quadratum est triangulum. Hinc igitur de novo per propositionem præsentem explicari potest, cur loco syllogismi in prima figura prodeat syllogismus in secunda. Superest ut exemplum in tertia figura exhibeamus, quo veritas propositionis præsentis eidem confirmetur. In modo *Felapton* ita argumentamur (*not. §. 390. Log.*): Nullus vere doctus invidet alteri doctrinam. Omnis vere doctus est homo. Ergo quidam homo non invidet alteri doctrinam. Propositioni minori responder notio, quæ exhibet veram doctrinam tanquam homini competentem, non omni, sed cuidam saltem. Quamobrem vi ejusdem notionis iudicare licet, quod quidam homo sit vere doctus. Quodsi hanc propositionem surroges in locum prioris, prodit syllogismus in prima figura: Nullus vere doctus invidet alteri doctrinam. Quidam homines sunt vere docti. Ergo Quidam homines non invident alteri doctrinam. Hic igitur
de novo

denuo per propositionem præsentem dari potest ratio, cur ratiocinanti prodeat syllogismus figuræ tertiæ loco primæ.

§. 403.

An per syllo-
gismos per-
veniat ad
conclusionem
incognitam.

Vi præmissarum ante cognitarum perveniri datur ad conclusionem nondum cognitam. Probant id exempla, quibus notationum ortum ex ratiociniis (§. 391.) & modum continuationis seriei perceptionum (§. 393. 394.) a posteriori stabilivimus. Etenim ibidem formavimus iudicium aliquod intuitivum, quod minoris locum tuebatur in syllogismo. Ejus ope in memoriam nobis revocavimus propositionem aliam, quam alias cognoveramus (§. 104.), & inde combinatis terminis diversis formata fuit propositio, quæ conclusioni syllogismi respondet. Præmissæ igitur ante cognitæ nobis erant, quam conclusio innotesceret, adeoque vi præmissarum ante cognitarum perveniri datur ad conclusionem nondum cognitam. Idem eodem modo patet ex analysi demonstrationum tam ostensivarum (§. 551. 552. Log.), quam apogogicarum (§. 553. 559. Log.).

Vulgo propositio præsens in dubium vocatur, immo prorsus negatur, quod in eadem affirmatur, & contrarium defenditur, scilicet quod nota esse debeat conclusio cum medio termino, antequam syllogismus formari possit, propterea quod in scholis adolescentes ex datis conclusione atque medio termino syllogismos construere docentur. Præjudicium hoc adeo invaluit, ut nec viri acumine præstantes ab eodem prorsus fuerint immunes. Exemplo nobis est *Cartesius*, quem modo negantem vidimus, syllogismos formales alium habere usum quam ad ea, quæ scimus, alia exponenda, vel ad copiose & sine iudicio de iis, quæ nescimus, garriendum: id quod etiam *Erhardus VVeigelius* in Philosophia, quam vocat, Mathematica probat. Enimvero si quis ea attente considerat, quæ ad evincendam veritatem propositionis præsentis in medium adduximus; is a præjudicio isto liberabitur, etsi eodem imbutum tenaciter habeat animum, modo habuerit animum veritatis cupidum.

§. 404.

In syllogismo tam categorico, quam hypothetico status mentis futuris nascitur ex præsente mediante præterito. In syllogismo enim categorico, siue is locum habeat in serie perceptionum explicanda (§. 392.), siue in demonstrationibus (§. 395.), in ratiocinando enascatur. propositio minor est iudicium intuitivum, major vero propositio est iudicium, quod vi minoris memoria nobis suggerit (§. 393. 394. *Psychol.* & §. 551. & seqq. *Log.*). Iudicium intuitivum cum tribuat enticuidam, quæ in ipsius notione continentur (§. 51. *Log.*); entis illius idea animo præsens obversari debet, dum iudicamus, consequenter minor propositio in syllogismo categorico exprimit statum mentis præsentem. Quando operis alicujus syllogismi inferitur conclusio, termini præmissarum diversi combinantur (§. 365.), consequenter subjectum nobis repræsentantes cum prædicato præsentem quandam mentis statum in nobis experimur. Quare etiam in hoc casu, ubi conclusio syllogismi antecedentis sumitur loco minoris in sequente, minor propositio exprimit statum mentis præsentem. Quoniam maiorem propositionem memoria nobis suggerit, notionem isti respondentem (§. 520. 521. *Log.*) jam antea habuimus (§. 226.), consequenter ea exprimit statum mentis præteritum, qui denuo præsens sit. Jam vero ex terminis diversis in propositione maiore ac minore componitur conclusio (§. 365.), quæ exprimit statum aliquem mentis præsentem per demonstrata. Patet itaque in syllogismo categorico statum mentis, qui præsens fieri debet, adeoque futurum enasci ex præsentem quodam mediante præterito alio.

Similiter in syllogismo hypothetico, siue is in demonstratione, siue in serie perceptionum explicanda locum habeat (§. 392. 395.), antecedens quod ponitur, vel consequens quod tollitur, est iudicium intuitivum, vel conclusio per syllogismum antecedentem illata, vel ex plurium syllogismorum conclusioni.

fionibus per modum iudicii intuitivi formata propositio (§. 395. 394. *Psychol.* & §. 551. & seqq. *Log.*), consequenter sicuti in categorico exprimit statum mentis præsentem. Propositionem hypotheticam, cujus antecedens ponitur, vel consequens tollitur, memoria nobis suggerit, adeoque eodem, quo ante, modo patet, quod statum mentis præteritum exprimat, qui denuo præsens sit. Jam vero in conclusione ponitur consequens, vel tollitur antecedens (§. 410. *Log.*), quam exprimere statum aliquem mentis præsentem ex iis, quæ modo demonstrata sunt, evidens est. Patet igitur denuo in syllogismo quoque hypothetico statum mentis, qui præsens fieri debet, adeoque futurum enasci ex præsentem quodam mediante præterito alio.

Idem probatur a posteriori in medium allatis exemplis, quibus propositionis veritas redditur illustrior. Etenim si pirum intuentes judicamus eam esse arborem ac recordati arbores autumnum folia deponere inferimus, quod hæc pirus folia sua deponere debeat autumnum; triplicem omnino in nobis experimur mentis statum. Primus nimirum est, quo pirum intuentes ejus nobis conscii sumus atque judicamus, quod ex arborum numero sit: quem esse præsentem nemo in dubium vocat. Dum recordaris arbores autumnum folia deponere, tibi utique repræsentas, quod antea expertus es multiplici vice, adeoque statum mentis præteritum tibi repræsentas. Non potuisses foliorum autumnum decidentium recordari, nisi decidentia antea observasses, adeoque status præteritus necessario præsupponendus, antequam ratiocinans minori possis jungere majorem. Dum denique judicas, pirum hanc autumnum folia sua deposituram vel deponere debere, tertius oritur status mentis, a duobus ceteris & tempore, & re diversus. Enimvero quia non judicasses, pirum hanc folia sua autumnum deposituram esse, nisi antea judicasses, pirum hanc esse arborem & arborem folia sua deponere autumnum; status iste mentis,

quo

quo tibi repræsentas pirum tanquam folia deposituram autumnum, adeoque statum aliquem arboris futurum, enascitur ex præsentem aliquo mentis statu mediante præterito. Et idem eodem modo patet in quocunque exemplo alio syllogismi categorici.

Non minus clara est propositionis præsentis veritas in casu syllogismi hypothetici. Ponamus enim nos judicare nunc esse autumnum, & recordatos, si autumnus est, arbores folia deponere debere, inferre quod nunc arbores folia sua deponere debeant; evidens est nos denuo triplicem mentis statum in nobis experiri, qui ordine se invicem excipiunt. Primus nimirum est, quo judicamus esse autumnum, quocunque tandem modo ad hoc judicium perveniamus. Sufficit enim statum istum tunc temporis esse præsentem, quo judicamus nunc seu hoc tempore esse autumnum. Dum recordaris, si autumnus est, arbores folia sua deponere debere, tibi utique repræsentas, quod multiplici vice expertus es, adeoque statum quendam mentis, qui ex pluribus præteritis compositus est. Non potuisses recordari hujus judicii, nisi antea idem ex multiplici experientia derivasses, aut idem ex eadem formares, quatenus eorum, quæ expertus es, recordaris. Arque ita patet mentis aliquem statum præteritum denuo reproduci. Dum denique judicas, arbores nunc folia sua deponere debere; tertius oritur status mentis ex anterioribus, ab iis & tempore, & re diversus, consequenter ex præsentem aliquo mediante quodam præterito. Et idem eodem modo patet in quocunque exemplo alio syllogismi hypothetici.

Non puto fore aliquem, qui in dubium vocet, diversos judicandi actus diversos esse status mentis: alias enim ex definitione status (§. 705. *Ontol.*) facillima foret probatio. Etenim quis dubitat, judicandi actus, quorum alius alium sequitur, esse e numero mutabilium, quæ menti insunt? Et, ubi dubitaverit, per notionem mutabilis convincetur (§. 290. *Ontol.*). Quare cum mutabilium determina-

tione enascatur status rei (§. 705. *Ontol.*); singuli isti judicandi actus, quibus ratiocinatio absolvitur, totidem mentis status constituunt peculiare. Et si autem propositio præsens inter res levis momenti referenda videri possit, ut ejus veritatem tanto apparatu adstrui superfluum habeatur; suo tamen tempore in Moralibus patebit, quantum momentum in eo positum sit, ut intelligamus, quomodo status præteriti influant in præsentem.

§. 405.

*Quomodo status
futurus
e præsentis
prodeat vi
syllogismi
categorici.*

Quoniam in syllogismo categorico præmissæ terminum communem habent, in conclusione autem termini præmissarum diversi combinantur (§. 333. *Log.*); vi syllogismi categorici status futurus prodit ex præsentis atque præterito, quatenus præsens quidpiam ex præterito habet. Patet idem in exemplo quocunque singulari. Sumamus obvium, ad quod paulo ante (§. 404.) provocavimus: Hæc pirus est arbor. Omnis arbor folia sua deponere debet autumnino. Ergo hæc pirus folia sua autumnino deponere debet. Præmissæ terminum communem habent arborem, atque adeo in statu præsentis, qui minori respondet, & præterito, ad quem major refertur, commune quidpiam deprehenditur, scilicet arboris representatio. Ut conclusio prodeat, combinantur termini præmissarum diversi, quibus pirus & foliorum autumnali tempore depositio denotantur. Status igitur mentis, quo sibi representat pirum tanquam folia deponentem una cum autumnali tempore, nascitur ex præsentis & præterito, quatenus præsens ac præteritus quidpiam commune habent, seu quatenus quidpiam est in præsentis, quod erat in præterito.

Quod ex præsentis ac præterito statu præsens enasci minime potuisset, nisi uterque quidpiam commune habuisset, tum ex eo intelligitur, quod sine medio termino non possit inferri conclusio; tum etiam inde patet, quod posita minore non simul posita fuisset major.

§. 406.

Vi syllogismi hypothetici status futurus prodit ex præfente *Modus quo*
atque præterito, quatenus præfens cum futuro in præterito conti- *status futu-*
netur. Syllogismorum hypotheticorum duo sunt modi, ponens *rus oritur*
 & tollens (§. 409. 410. Log.). In ponente ponitur antecedens *vi syllogismi*
 & vi ejus in memoriam revocatur propositio hypothetica, si *hypothetici.*
 antecedens est, etiam consequens est, ac inde inferitur, quod
 consequens sit (§. 409. Log.). Quoniam itaque positio antecede-
 ntis designat statum quendam mentis præsentem, propositio
 vero hypothetica, quæ in memoriam revocatur, præteritum,
 nec consequens poneretur, nisi posito antecedente memoriam
 subiret propositio ex antecedente atque consequente composita;
 evidens est statum mentis, qui positione consequentis determi-
 natur, oriri ex præfente atque præterito, quatenus præfens, po-
 sitio scilicet antecedentis, atque futurus, seu novus qui oritur,
 positio nimirum consequentis, in præterito, propositione nimirum
 hypothetica, simul continentur.

In modo tollente tollitur consequens & vi ejusdem in
 memoriam revocatur propositio hypothetica, si antecedens est,
 etiam consequens est, ac inde inferitur, quod antecedens non
 sit (§. 409 Log.). Quoniam itaque sublatio consequentis de-
 signat statum quendam mentis præsentem, propositio vero hy-
 pothetica, quæ in memoriam revocatur, præteritum, nec an-
 tecedens tolleretur nisi sublato consequente memoriam subiret
 propositio ex antecedente atque consequente composita; evi-
 dens est, statum mentis, qui sublatione antecedentis determi-
 natur; oriri ex præfente atque præterito, quatenus præfens,
 sublatio scilicet consequentis, atque futurus, sublatio nimirum
 antecedentis, in præterito, propositione nimirum hypothetica,
 simul continentur.

Idem etiam confirmatur a posteriori exemplo quocunque singulari syllogismi hypothetici. Ponamus enim nos in historico aliquo scripto legere, quod, cum quid fieret, arbores foliis condecoratae fuerint, atque in memoriam nobis revocari propositionem hypotheticam, si arbores foliis condecoratae sunt, hiemem non esse, indeque colligere, quod tunc temporis, quo illud contigit quod narratur, hiems non fuerit; evidens est ex statu praesente, quo judicas, arbores foliis fuisse condecoratas, cum quid fieret, & statu praeterito quo tibi innotuit, si arbores foliis condecoratae sunt, hiemem non esse, ideo enasci statum novum, quo judicas, tunc non fuisse hiemem, quo contigit quod narratur, quod in statu praeterito judicaveras, si arbores foliis condecoratae sunt, hiemem non esse, adeoque non minus id, quo status praesens determinatur, nempe representatio arborum foliis condecoratarum, quam id, quod ei, qui producit, proprium est, representatio temporis ab hieme diversi, in eodem continetur.

Eodem prorsus modo id in modo tollente liquet: ad quem exemplum idem facile accommodatur, si propositionem hypotheticam ita efferas: Si hiems est, foliis condecoratae non sunt arbores. Etenim quando judicas, foliis condecoratas esse arbores, tum consequens tollitur, & dum judicas non esse hiemem, antecedens tollitur. Ita nimirum ratiocinaris: Arbores foliis condecoratae sunt. Si hiems est, arbores foliis condecoratae non sunt. Ergo hiems non est. Status itaque judicantis non esse hiemem nascitur ex statu praesente judicantis arbores foliis condecoratas esse & praeterito judicantis, si hiems est, arbores foliis condecoratas non esse, propterea quod is, qui nascitur, una cum praesente in praeterito simul continetur.

In propositione præfente continetur ratio a priori, cur status mentis, qui conclusionem syllogismi hypothetici designatur ex præfente aliquo & præterito simul nascatur. Attentus enim ex ipsis facultatibus animæ intelligit quomodo idem contingat. Atque eadem tenenda sunt de propositione præcedente quoad syllogismos categoricos.

§. 407.

Vi syllogismi quoque disjunctivi status futurus mentis pro- *Modus*
dit ex præfente atque præterito, quatenus præfens cum futuro in quo vi syl-
præterito simul continetur. Etenim in syllogismo disjunctivo *ogismi dis-*
membro uno vel pluribus membris positis tollitur vel membrum *unctivi sta-*
alterum, vel cetera membra tolluntur, aut unum quod relictum *tus mentis*
seu non positum fuerat, & contra ceteris sublaris ponitur unum *unus ex al-*
 (§. 417. *Log.*). Quamobrem si membrum vel plura membra, *tur.*
 quæ ponuntur, consideres ut antecedens propositionis hypotheticiæ; erit membrum, quod tollitur, consequens ejusdem: si membrum, quod tollitur, vel plura membra, quæ tolluntur, consideres ut antecedens propositionis hypotheticiæ; erit membrum, quod ponitur, consequens ejusdem, atque in utroque casu syllogismus disjunctivus degenerat in hypotheticum modi ponentis (§. 410. *Log.*). Enimvero in syllogismo hypothetico status futurus mentis, qui determinatur conclusionem, nascitur ex præfente, quem refert antecedentis positio, & præterito, qui propositione hypothetica designatur, propterea quod is, qui nascitur, una cum præfente in præterito continetur (§. 406.). Ergo etiam vi disjunctivi eidem æquipollentis status præfens ex præfente ac præterito nascitur, propterea quod præfens ac is, qui nascitur, in præterito simul continentur.

Idem clarissime perspicitur a posteriori in exemplo quocunque syllogismi disjunctivi. E. gr. Syllogismus sequens disjunctivus est (§. 419. *Log.*): Aut anima est substantia simplex,
 aut

aut composita. Sed est substantia simplex. Ergo non est composita. Quoniam itaque minor respondet iudicio assumpto, quo mediante propositio disjunctiva in memoriam revocatur (§. 117.) ; status judicantis animam non esse substantiam compositam nascitur ex statu judicantis quod sit simplex, propter ea quod præcessit status judicantis, aut animam esse substantiam simplicem, aut compositam. Idem eodem patet, si exemplum aliud quodcunque elegeris.

Quod de syllogismis categoricis, hypotheticis & disjunctivis evicimus, idem de ratiocinatione polysyllogistica & mixta composita ostendi poterat, de qua diximus alias (§. 494. & seqq. Log.). Enimvero cum hæc facile per se intelligat, qui ad anteriora animum advertit ; ut plura eam in rem dicamus opus non est.

§. 408.

Status, quo sensu gravidus & imprægnari dicatur.

Status præsens dicitur gravidus futuri, quatenus ex eo & vi ejus futurus sequitur. Dicitur idem imprægnari a præterito, quatenus mediante præterito aptus efficitur, ut inde sequi possit futurus, seu, quatenus accedente præterito ex eo sequitur futurus.

Modos hos loquendi hic explicare libuit, cum subiinde de anima usurpentur, & ex iis intelligantur, quæ modo de syllogismis demonstrata sunt ; quemadmodum ex corollario sequente patet.

§. 409.

Quando status præsens sit gravidus & imprægnatus a præterito.

Quoniam tam in syllogismo categorico, quam hypothetico, immo disjunctivo utpote huic æquipollente vi demonstrationis præcedentis (§. 407.) status mentis futurus nascitur ex præsentem mediante præterito, seu quando hic ad illum accedit (§. 404. & seqq.) ; in syllogismo tam categorico, quam hypothetico & disjunctivo status præsens est gravidus futuri, quod imprægnetur a præterito.

Atque

Atque ita ad sensum manifestum & obvium reduximus verba, quæ ad notiones confusas relata sublimè quid spirare videntur & ægre percipiuntur. Nostra enim philosophia, quam non ad pompam compositam esse jam alias monuimus, ad obviam perspicuitatem reducit sublimia atque profunda, ut vel ideo contemnenda videantur iis, qui inexpectatam profunditatem in obviis pervidere adfueri non sunt: neque enim magnificis verbis elata ad casus intricatos atque difficiles applicamus, quæ ex obviis perspicuitatem hauriant. Agedum itaque applicemus corollarium præsens ad unum vel alterum exemplum, ut penitus comprehendatur. Categorica ita argumentamur. Hæc pirus, quam contuemur, arbor est. Arbor folia sua deponit autumnò. Ergo etiam hæc pirus folia sua deponit autumnò. Judicium primum intuitivum est, quod formatur de re oculis nostris obversante atque ex eo sequitur discursivum, quod eadem hæc pirus folia sua autumnò deponat, quia id ante cognovimus de arbore quacunque. Ex statu præsentè per se non sequitur futurum, neque enim ideo judicas, quod hæc pirus folia sua autumnò deponat, quia cognoveras pirum hanc esse arborem, atque adeo per se status præsens futuri gravidus non est. Enimvero ideo fieri potest, ut iudicio intuitivo, quod pirus hæc sit arbor, perveniatur ad discursivum, quod folia sua deponat autumnò, quod olim cognovisti, arborem folia deponere autumnò, atque iudicii hujus præteriti recorderis. Atque ita status præsens imprægnari potest a futuro, quatenus vi termini communis in memoriam revocari potest iudicium præteritum, dum in præsens attentionem dirigis. Et a præterito actu imprægnatur præsens, quatenus iudicium præteritum actu in memoriam revocatur. Sicque gravidus actu efficitur futuri, atque jam vi ejusdem nascitur qui futurus erat, dum ex præsentè inferitur conclusio. Facile autem apparet, cur præsens status ante imprægnari debeat a præterito, quam futuri actu si gravidus: fieri nimirum potest, ut ad idem iudicium intuitivum diversa accedant iudicia præterita atque adeo vi ejusdem iudicii intuitivi ad diversa perveniatur iudicia discursiva. E. gr. In nostro exemplo, quando judicas pirum, quem contueris, esse arborem, ubi memoria tibi suggerit propositionem olim cognitam, quod arbor omnis vere frondes emittat, ad iudicium discursivum pervenis, hanc pirum frondes vere emitte, a superiori utique diversum. Quod si recorderis, arborem omnem nutrimentum per radices attrahere; iudicium discursivum, ad quod pervenitur, hoc erit, quod hæc pirus nutrimentum per radices attrahat.

Ponamus jam porro, te hypothetice argumentari: Hæc pirus arbor est. Si pirus arbor est, folia sua autumnno deponet. Ergo pirus hæc folia sua autumnno deponit. Quia judicium intuitivum, hæc pirus arbor est, in præterito hypothetico, si pirus hæc arbor est, folia sua autumnno deponit, continetur, nec minus in eodem continetur quod inde infertur, pirus hæc autumnno folia sua deponit; status præsens gravidus futuri efficitur denuo, dum a præterito imprægnatur. Nisi enim ad judicium intuitivum accederet hypotheticum, conclusionem inferre minime liceret.

§. 410.

Ratio sufficiens illationis conclusionis in consequentia immediata an insit præmissæ.

In consequentiis immediatis non continetur ratio sufficiens in præmissa, cur inde inferatur conclusio. Patet id per exempla cuncti. E. gr. Ex contradictoria oppositione ita argumentamur: Omnis invidus miser est. Ergo falsum est quendam invidum non esse miserum. Sane ex eo, quod judicas, omnem invidum miserum esse, non intelligis, cur mentem subeat judicium, falsum esse, quod quidam invidus non sit miser. In priori itaque judicio, quæ præmissa est, non continetur ratio sufficiens, cur posterius potius, quam aliud mentem tuam subeat (§. 56. *Ontol.*).

Idem per indirectum ita ostenditur. Ponamus rationem sufficientem contineri in præmissa, cur mentem subeat conclusio. Quoniam posita ratione sufficiente ponitur id, quod propter eam potius est quam non est (§. 118. *Ontol.*); necesse est, ut, si quis cogitet, omnem invidum esse miserum, ejus mentem subeat propositio falsum esse quendam invidum non esse miserum; id quod experientiæ repugnat, quæ aperte loquitur contrarium, scilicet quod præterea aliud quid adhuc requiratur, veluti quod utraque propositio memoriæ simul impressa fuerit, ut una refricet memoriæ alterius (§. 117.).

Similiter ex subalternatione ita argumentamur: Omnis homo est mortalis. Ergo quidam est mortalis. Patet hic denuo ut ante in præmissa, omnis homo est mortalis, non

con-

contineri rationem sufficientem, cur animum tuum subeat conclusio, quidam homo est mortalis. Et si sumas, in illa rationem sufficientem hujus contineri, idem eodem, quo ante, modo experientia repugnare deprehendes. Immo plures sunt propositiones, quæ per legem imaginationis (§. 117.) tibi succurrere possunt, quam quæ hic conclusionis loco ponitur, veluti quod tu sis homo, quod Rex sit homo & ita porro.

Si quis a rectis ad obliqua argumentatur: Omne triangulum est figura. Ergo qui triangulum describit, figuram describit; perinde liquet, ex præmissa non patere, cur tibi succurrat conclusio, consequenter nec in ea contineri rationem sufficientem, cur ope ejus ad conclusionem pervenias. Et ita sese res habet in exemplo quocunque alio.

Enimvero propositio præsens in genere quoque demonstratur hunc in modum. Quod si mentis aciem in præmissam intendis, distinguere non potes nisi subjectum & prædicatum (§. 199. 200. *Log.*). Quamobrem si ad subjectum attendis, in memoriam revocatur propositio terminum, quo idem denotatur, communem habens: si ad prædicatum attendis, memoriam subibit propositio terminum, quo hoc indigitatur, communem habens, si scilicet intentio fuerit propositionis alicujus in memoriam revocandæ (§. 117.), quoniam citra hanc intentionem etiam succurrere possunt ideæ præteritæ, rem eandem, quæ subjecti vel prædicati vicem tenet, cum aliis una perceptis repræsentantes (§. cit.). Quare cum plures esse possint propositiones, quæ eum data præmissæ locum tuente terminum communem habent; nulla adest ratio, cur ea potius succurrat, quæ conclusionis loco est, quam ceterorum aliqua. Sola igitur præmissa rationem sufficientem non continet, cur inde ad conclusionem pervenias.

Non jam quaeritur, an ex præmissa legitime inferatur conclusio, ut argumentationi insit vis concludendi; sed an data præmissa sola nec alio quopiam præsupposito vi facultatum mentis perveniri possit ad conclusionem: quod posterius hac propositione negatur.

S. 4II.

*Ratio cur
per conse-
quentiam
immedia-
tam ratio-
cineris.*

Si de propositione data judicia logica formes & perspecta fuerint theoremata de propositionibus se mutuo ponentibus; ex propositione data tanquam præmissa inferes conclusionem. Etenim si de propositione data iudicium aliquod logicum formes, tibi que perspectum fuerit theorema aliquod, quod posita istiusmodi propositione ponenda etiam sit alia quædam; hæc propositio mentem tuam subibit (§. 117.), adeoque hinc inferes, posita propositione priori ponendam quoque esse aliam quandam beneficio syllogismi categorici (§. 360. 361.): quod dum facis, per immediatam consequentiam ex propositione data inferes aliam.

Idem confirmatur a posteriori. Ponamus te aciem mentis convertere in propositionem, qua affirmatur, omnem hominem esse mortalem, atque perpendere propositionis huius universalitatem; iudicium logicum de eadem formas, scilicet quod propositio sit universalis, seu, quod eodem recidit, quod hic aliquid affirmetur de omni (§. 242. Log.). Quare si perspectum tibi fuerit theorema logicum, posita quacunque propositione universali, adeoque in casu præsentis, ea, qua affirmatur, omnem hominem esse mortalem, ponendam quoque esse quamvis subalternantem, veluti hic eam, qua affirmatur, quosdam homines esse mortales (§. 451. Log.); vel si perspectum tibi fuerit theorema, quicquid affirmatur de omni, illud etiam affirmandum de quovis, adeoque & de quibusdam sub omni contentis (§. 346. Log.), consequenter quod de omni homine affirmatur, idem quoque affirmandum esse de quibusdam hominibus; propositionis alterutrius recordatus (§. 117.) utique inferes, quosdam homines esse mortales.

Idem pater in omni casu reliquo consequentiarum immediatarum. Sed præstat per modum corollarii deducere cetera, cum iisdem insint principia generalia, quæ sic rectius memoriæ mandantur & in futuros usus ad ratiocinandum asservantur.

§. 412.

Si de propositione universali formes judicium logicum, quod Ratio illa sit universaliter vera, & familiaris fuerit propositio, si verum est ^{tionis in con-} prædicari quid universaliter posse de omni, falsum est id particu-^{sequentis} lariter prædicari non posse de quibusdam sub omni contentis; inde ^{i immediatis} inferri in casu speciali ex universaliter affirmante, falsum esse præ-^{ex oppositio-} dicatum ejus negari posse de quibusdam subjecti. Etenim si de propositione universali judicas, quod sit universaliter vera, & familiaris fuerit propositio, si propositio universaliter vera est, prædicatum ejus de quibusdam subjecti removeri nequit per *hypoth.* hujus recordatus (§. 117.) inferri prædicatum propositionis datæ non posse removeri de quibusdam subjecti. Quamobrem in casu speciali, veluti quod omnis homo sit mortalis, vi syllogismi illius generalis inferri, falsum esse, quod quidam homines non sint mortales (§. 411.).

Confirmatur veritas propositionis præsentis a posteriori eodem, quo usi sumus, exemplo. Ponamus enim te attendere ad propositionem, omnis homo est mortalis, & judicare, quod universaliter verum sit, omnem hominem esse mortalem. Beneficio hujus judicii tibi succurrit propositio: si universaliter verum est, omnem hominem esse mortalem, falsum est quosdam homines non esse mortales. Atque hinc inferri: falsum esse, quod quidam homines non sint mortales. Et hac demum ratione patet, cur ex eo, quod judicaveras omnem hominem esse mortalem, pervenias ad propositionem, falsum esse quod quidam homines non sint mortales.

Probe notandum est, quemadmodum dictum de omni & nullo non distincte intelligitur ab omnibus ratiocinantibus, qui eodem utuntur; ita quoque syllogismum generalem non intelligi ab omnibus, qui specialibus utuntur, quibus generalis inest. In scientiis autem, ubi universalium habetur ratio, nec singularia aut specialia istis æquipollentia locum habent, syllogismi generales explicandi sunt, quorum deinde applicatione argumentationem magis potestati nostræ subjecimus. Accedit, quod sic universaliter intelligamus veritatem hujus argumentationis, ut eidem in quovis casu securius fidere possimus.

§. 413.

Modus inferendi consequentiam immediatam ex universaliter negante.

Si de propositione universaliter negante judices, quod sit universaliter vera, & familiaris tibi fuerit propositio, si verum est, prædicatum negari de omni subjecto, falsum est id negari non posse seu id affirmari posse de quibusdam subjecti; inde in casu speciali inferes ex propositione universaliter negante, falsum esse quod prædicatum ejus de quibusdam subjecti affirmari possit. Veritas propositionis eodem modo evincitur, quo veritatem præcedentis evicimus: sufficit itaque eandem exemplo aliquo a posteriori confirmari. Ponamus te judicantem: Nullus homo est omniscius. Quod si judices propositionem hanc esse universaliter negantem veram; memoriam subibit propositio: Si universaliter verum est, quod nullus homo sit omniscius, falsum est, quosdam homines esse omniscios. Atque adeo inferes: Falsum est, quosdam homines esse omniscios.

Quæ de probatione propositionis præsentis dicta sunt, eadem quoque de sequentibus corollariis tenenda: ut adeo eadem non nisi a posteriori confirmari opus sit,

§. 414.

Si ad ideam propositioni datæ respondentem intentus ob- *Modus il-*
 serves, posse formari alias eidem equipollentes & recorderis *lationis in*
 propositionum equipollentium posita una alteram quoque poni; *consequen-*
 ex una alteram inferes. Ponamus te judicare, quod pater a- *tia imme-*
 met filium. Ad ideam propositioni respondentem intentus *diata in*
 tibi repræsentas patrem atque filium & amorem patris erga *casu equi-*
 filium. Vides autem iudicium ex eo, quod tibi repræsentas, *pollentia.*
 formaturus, accipi posse loco subjecti vel patrem, vel filium
 ac in casu quidem priori dicendum esse, quod pater amet fi-
 lium; in posteriori, quod filius ametur a patre. Posita idea,
 ponitur propositio utraque. Atque adeo iudicas: Si pater
 amat filium, filius amatur a patre. Et hinc inferes, filium
 a patre amari.

Idem eodem prorsus modo pater in aliis propositionibus equi-
 pollentibus. Immo pater, idem eodem modo ostendi de propositio-
 nibus quibuscunque se mutuo ponentibus, ut, si una vera sit, altera
 quoque vera sit, & contra si una falsa sit, falsa quoque sit altera.

§. 415.

Si de propositione universaliter negante iudices, quod sit *Illatio per*
 universaliter negans, atque recorderis, si propositio fuerit *consequen-*
 universaliter negans, de omni prædicato negari posse subjectum; *tiam imme-*
 ex propositione universaliter negante inferes, de omni prædica- *diata in*
 to propositionis datæ negandum esse subjectum. Ponamus te ju- *casu con-*
 dicare, quod nullus avarus sorte sua contentus sit, atque *versionis*
 perpendere propositionem hanc esse universaliter negantem: *simplicis,*
 recordatus quod de omni prædicato negari possit subjectum,
 seu in applicatione ad casum præsentem, quod, si nullus
 avarus sorte sua contentus sit, nullus quoque sorte sua con-
 tentus sit avarus, inde inferes: nullum sorte sua contentum
 esse avarum.

Dicitur

Dicitur hæc conversio apud Logicos simplex, cujus fundamentum demonstravimus alibi (§. 454. Log.). Vi autem propositionis logicæ obtrineatur ne conversam propositionis alicujus universaliter negantis ullo in casu demonstrari opus sit.

§. 416.

*Illatio in
altero casu
conversio-
nis simpli-
cis.*

Si de propositione particulariter affirmante judices, quod sit particulariter affirmans, atque recorderis, si propositio fuerit particulariter affirmans, etiam de prædicato particulariter affirmari posse subjectum; ex propositione particulariter affirmante inferes, quod de ejus prædicato particulariter affirmari debeat subjectum. Ponamus te judicantem, quod quidam doctus sit moderatus, atque perpendentem, quod hæc propositio sit particulariter affirmans. Recordatus quod de prædicato particulariter affirmari possit subjectum, inferes, quendam, qui est moderatus, esse doctum, principio nempe logico generali ad casum præsentem specialem applicato hunc in modum: Si quidam doctus moderatus est, quidam, qui est moderatus, doctus est.

Principium logicum alibi jam demonstravimus (§. 455. Log.).

§. 417.

*Illatio a di-
versis ad
composita.*

Si de eodem subjecto prædicentur plura vel absolute, vel sub eadem conditione, atque iudicantes plures hic adesse propositiones ejusdem subjecti, sed diversi prædicati recordemur, si plures sint propositiones ejusdem subjecti, sed diversi prædicati, exinde formari posse propositionem unam ejusdem subjecti, cujus prædicatum ex prædicatis ceterorum compositum; inde inferimus in dato casu speciali quod subjecto conveniat prædicatum ex prædicatis ceterarum propositionum compositum. Ponamus te judicantem, quod omnis planeta illuminetur a sole, quod omnis planeta cingatur atmosphæra, quod omnis planeta sit corpus mundi

mundi totale. Quodsi perpendis, plures hic adesse propositiones, quarum idem est subjectum, scilicet planeta, sed prædicata sunt diversa, quodque prædicata illa diversa subjecto tribuantur absolute; recordaris in tali casu subjecto absoluto tribui posse prædicatum ex quatuor istis compositum; inde infer, planetam esse corpus mundi totale a sole illuminatum, quod atmosphaera cingitur. Quodsi dubites, an propositio illa, quam in præsentem supponimus, scilicet quod subjecto communi plurium propositionum tribui possit prædicatum ex prædicatis illarum simul sumtis compositum, admitti possit tanquam vera: ecce tibi ejus demonstrationem! Si subjecto absolute posito vel sub data conditione convenit prædicatum, in priori casu ratio sufficiens, cur prædicatum subjecto tribui debeat, est definitio, in posteriori conditio adjecta (§. 130. *Ontol.*), adeoque posito in casu primo subjecto absolute, in casu secundo sub eadem conditione, ponitur prædicatum in casu priori absolutum, in posteriori hypotheticum (§. 118. *Ontol.*). Quare si plura fuerint prædicata de eodem subjecto vi ejusdem notionis enunciata diversis propositionibus, posita notione subjecti omnia simul ponuntur, consequenter ex propositionibus pluribus formari potest una, in qua subjecto eadem notione comprehenso tribuitur prædicatum ex prædicatis plurium propositionum compositum.

Utitur hoc modo inferendi in demonstrationibus, quando ex conclusionibus per plures syllogismos elicitis deducimus propositionem unam, quæ tanquam præmissa assumitur, ut filum ratiocinationis ulterius produci possit. Dicitur hæc *illatio a divisis ad composita*, quæ frequentissime occurrit in demonstrationibus geometricis.

§. 418.

Si subjecto tribuitur prædicatum compositum ex pluribus aliis, quæ sigillatim eidem salva ejus notione tribui possunt, Consequen-
(*Wolffii Psychologia.*) *Ti* *ria a compo-*
sito ad di-
visa.

Et judicantes prædicatum propositionis datæ esse resolvable in plura quæ subjecto eidem prorsus immutato tribui possunt, recordamur propositionis hujus, si prædicatum fuerit resolvable in plura alia, quæ subjecto prorsus immutato sigillatim tribui possunt, inde formari posse plures propositiones ejusdem subjecti, in quibus prædicata ista sigillatim eidem tribuuntur; ex propositione data inferemus propositionem ejusdem subjecti, in qua prædicatum aliquod sigillatim eidem tribuitur, quod notionem prædicati propositionis datæ ingreditur. Ponamus te judicantem, quod Petrus sit juvenis doctus, & perpendentem, quod prædicatum sit compositum ex duobus aliis, nempe esse juvenem & esse doctum, animadvertere, quod utrumque sigillatim Petro tribui possit, cum quis juvenis esse possit, etiam si doctus non sit, & doctus esse possit, etiam si non sit juvenis. Ex propositione data, quod Petrus sit juvenis doctus, utique inferes, quod sit juvenis, vel etiam quod sit doctus. Ceterum propositio generalis, cujus vi ex propositione data infertur altera, eodem modo ostenditur, quo in propositione præcedente evicimus veritatem propositionis, quæ principium consequentiæ largiebatur.

Hic quoque arguendi modus subinde in demonstrationibus Mathematicorum occurrit, diciturque consequentia immediata a composito ad divisa.

§. 419.

Lemma quo Si tam subjectum, quam prædicatum ad formam nominis, continetur separata copula, si tale nondum fuerit, reductum ponitur in fundamentum consequentiæ immediate a rectis ad obliqua. *casu obliquo* Et eadem utrique accedat notio, ut duæ hinc resultent propositiones; una inde formari potest propositio vel hypothetica, vel categorica, si prior, quam subjectum datæ ingreditur, ponatur loco antecedentis in propositione hypothetica vel subjecti loco in categorica; posterior vero loco consequentis in hypothe-

tica, loco prædicati in categorica. In omni enim propositione categorica subjectum, quatenus per ejus notionem determinatur prædicatum, & prædicatum, quatenus per subjecti notionem determinatur, cum posita notione subjecti ponatur prædicatum (§. 131. *Ontol. vel §. 115. ejusd.*), idem ens designant, adeoque sibi invicem substitui possunt in notionibus quibuscunque complexis, salva earundem veritate. Quamobrem si utrique accedat eadem notio, & tam subjectum, quam prædicatum ad formam nominis reductum, abjecta copula, si talem nondum habuerit, ponatur in casu obliquo & una propositio sic formata admittitur tanquam vera; etiam altera tanquam vera admitti debet. Quare si prior sumatur pro antecedente, erit posterior consequens propositionis hypotheticæ (§. 405. 407. *Log.*). Ex propositione adeo categorica data efficitur hypothetica, si ad terminos rectos in obliquos conversos accedat notio quædam communis. Quodsi jam antecedens propositionis hypotheticæ convertatur in subjectum & consequens in prædicatum; propositio categorica prodit hypotheticæ æquipollens (§. 278. *Log.*). Quamobrem ex propositione categorica data elicitor quoque categorica alia, si ad terminos obliquos accedat notio quædam communis.

Idem confirmatur a posteriori. Ponamus enim dari propositionem categoricam, *Triangulum est figura*. Si jam copulam *est* abjicias & uterque terminus *triangulum* atque *figura* ponantur in accusativo, accedente notione communi, actu nempe describentis, veluti *Petrus vel alius quicumque describit triangulum* & *Petrus vel alius quicumque describit figuram*; duas utique habes propositiones, quarum posita una ponitur altera. Quare si prior, *Petrus describit triangulum* ponatur pro antecedente; posterior autem, *Petrus describit figuram*, pro consequente; propositionem habes hypotheticam, cujus manifesta est consequentia, scilicet si *Petrus triangulum describit*, *figuram describit*. Quodsi ergo eam

revoces ad categoricam, Petrus triangulum describens, figuram describit; propositio hæc non minus evidens erit vi datæ, quod triangulum sit figura. Quodsi indeterminate subjectum exprimere velis, scilicet per quemcunque; propositio hypothetica, si triangulum describit, figuram describit, & categorica, quicumque triangulum describit, figuram describit, non minus evidentes sunt quam in casu anteriori.

Idem quoque liquet in eo casu, in quo prædicatum ad formam nominis reducendum, antequam in casu obliquo poni possit. Sit e. gr. propositio data: Arbor habet folia. Quoniam hic copula latet in verbo *habet*, ea revocatur ad sequentem, in qua copula expresse ponitur, arbor est ens folia habens, atque in præsentī enunciatione, arborem esse & esse ens folia habens, unum idemque sunt, neque enim in notatione arboris præsupponuntur, quam quæ ad folia determinanda requiruntur. Quodsi jam accedat notio alia, scilicet quod quis arborem cædat, ut propositio prodeat, Aliquis arborem cædit; per se patet, quod cædat id, quod folia habet, adeoque veram quoque esse hanc propositionem quod aliquis cædat aliquid, quod folia habet, vel aliquis cædat ens folia habens. Qui propositionem priorem ponit, alteram tollere nequit. Habemus adeo propositionem hypotheticam ex utraque compositam; si quis arborem cædat, ens folia habens seu quid, quod folia habet, cædit, vel categoricam, qui arborem cædit, cædit quid, quod folia habet, vel ens folia habens, posito scilicet quod arbor folia habeat, quemadmodum ad propositiones has eliciendas sumebatur.

Facillimum est cumulare exempla, quibus propositionis præsentis veritas continetur. Ecce tibi aliquot! Pluvia guttatim destillat. Ergo qui pluviam colligit, is colligit quod guttatim destillat, vel si quis pluviam colligit, is quod guttatim destillat, colligit. Homo hic est

est ebrius. Ergo qui hominem hunc interficit, ebrium interficit. Petrus est philosophus. Ergo qui Petrum aggreditur, philosophum aggreditur, vel qui cum Petro disputat, cum philosopho disputat, vel qui Petro quid donat, philosopho donat, vel quod Petro donatur, philosopho donatur. Promiscue nimirum quilibet casus obliquus poni potest, cum in probatione non exprimitur, quinam casus obliquus poni debeat. Continet igitur propositio præfens fundamentum *consequentia immediata a rectis ad obliqua*, quam vocant Logici. Omnisimur hoc in Logica, quod continetur sub principio generali propositionum se mutuo potentiis tanquam sub genere species (§. 458. Log.). Quoniam tamen intellexi hæere nonnullos circa consequentiam istam immediatam, quando doceri debet, quomodo a propositione data, in qua termini ponuntur in casu recto, perveniatur ad alteram, in qua termini occurrunt in casu obliquo, id autem vi propositionis sequentis doceri nequeat, nisi propositio præfens præmittatur; eam hic per modum lemmatis apponere lubuit.

§. 420.

Si de propositione data categorica judices terminos, ex quibus constat, poni in casu recto, atque recorderis accedente ad ferendi in utrumque in casu eodem obliquo positum eadem notione posse formari propositionem aliam sive hypotheticam, sive categoricam, & succurrat notio terminis obliquis adjicienda; ex propositione data per immediatam consequentiam inferes aliam, in qua subjectum & prædicatum habent notionem quandam communem adjectam in priori casu subjecto propositionis datæ oblique posito, in posteriori autem prædicato ejusdem itidem oblique posito. Ponamus dari propositionem: Triangulum est figura. Quodsi jam judices, subjectum, nempe triangulum, & prædicatum, scilicet figura, poni in casu recto, atque recorderis posse formari propositiones, in quibus ponitur uterque terminus in casu obliquo, accedente notione quadam tertia, veluti quod quis triangulum describat: ex propositione data utriusque inferes, quod, qui triangulum describit, figuram describat. Ha-

bes nimirum jam rationem sufficientem, cur a propositione data, Triangulum est figura, pervenias ad alteram; Ergo qui triangulum describit, figuram describit: quemadmodum supra generaliter ostendimus (§. 411.). Ratio vero illationis patet ex propositione præcedente. Similiter ponamus dari hanc propositionem: Pater amat liberos. Quodsi propositionem hanc convertas in aliam ipsi æquipollentem, Pater est amans liberos; apparet, utrumque terminum poni in casu recto. Quare si recorderis, propositiones illas esse veras (§. 419.), in quibus ad terminos istos in casu obliquo positos accedit notio quædam communis, atque tibi succurrat patrem offendi posse; hinc utique infer: qui patrem offendit, amantem liberos offendit, seu eum offendit, qui liberos amat.

Hæc de consequentiis immediatis sufficere possunt: ex iis enim abunde patere arbitror, tum quo fundamento nitatur illatio, tum quomodo a propositione data ad eam perveniamus, quæ per consequentiam immediatam inde inferitur. Duo nimirum hæc a se invicem probe distinguenda sunt. De fundamento illationis potissimum solliciti sumus in Logica atque ideo idem ibidem stabilivimus, totumque huc redit, quod dentur propositiones se mutuo ponentes, ut, adeo posita una, ponatur etiam altera. In modum, quo a propositione una tanquam præmissa pervenitur ad alteram tanquam conclusionem, inquirimus in Psychologia. Atque ideo jam potissimum ostendimus ex natura mentis, quomodo vi facultatum ejusdem a præmissa ad conclusionem perveniat. Notandum vero est non opus esse, ut quis theorematum ista, quibus nititur fundamentum consequentiarum immediatarum, distincte cognoscat, si iisdem in ratiocinando uti velit. Sufficit nota esse exempla, ad quorum imitationem argumentamur in casibus aliis similibus. Et istiusmodi exempla sic ferente occasione nobis innotescunt sæpius, ut necessitate quadam impulsus in ea delabamur. Neque dubium est, modum inferendi per consequentiam immediatam ita primitus innotuisse, antequam ad regulas fuerit revocatus. Qui in notionibus confusis acquiescunt, nec fundamentum illarum perspiciunt, etsi evidentia illationis percipiantur eorum animus; nec rationem perspiciunt, qui fieri possit,

possit, ut propositione quadam data perveniatur ad conclusionem. Neque idem aliter sese habet in ratiocinatione syllogistica, quemadmodum unusquisque ex seipso experiri potest.

§. 421.

In consequentiis immediatis status mentis futurus nascitur ex presente mediante præterito. Ex propositione enim data per consequentiam immediatam infertur conclusio, quatenus iudicium logicum formas de propositione data, ejus ope recordaris alicujus theorematis de propositionibus se mutuo ponentibus, & vi hujus ponis propositionem, quæ cum data simul ponitur (§. 411.). Jam iudicium logicum exprimit statum præsentem, theoremata, cujus recordaris, statum præteritum, sive illud distincte consideres, sive in exemplo latens confuse perspicias, & conclusio, quæ infertur, statum futurum, nec infertur conclusio ex propositione data, nisi iudicium logicum formetur & theorematis illius recorderis. Status igitur futurus, dum per consequentiam immediatam ratiocinaris, enascitur ex præsentem mediante præterito.

Quomodo status mentis ex aliis in ratiocinatione per consequentiam immediatam nascatur.

Idem confirmatur a posteriori. Etenim si argumentaris: Omnis homo est mortalis. Ergo quidam homo est mortalis; ad conclusionem non pervenis, nisi judices, propositionem datam, omnis homo est mortalis, esse universalem, seu universaliter verum esse, quod homo sit mortalis, atque perpendas, quod de omni homine prædicari potest, idem etiam prædicari posse de quibusdam. Iudicium vero, quod propositio hæc, omnis homo est mortalis, sit universaliter vera, designat statum mentis præsentem. Dum recordaris, de quibusdam hominibus prædicari debere, quod de omni homine prædicatur; iudicium, quod olim te tulisse meministi, exprimit statum præteritum. Denique iudicium, quod quidam homines sint mor-

mortales, futurum statum exprimit, qui ex ceteris nascitur, seu nonnisi præviis ceteris in mente locum habet. Status igitur in hoc casu nascitur ex præsentē mediante præterito.

Quæ igitur de syllogismis categoricis & hypotheticis (§. 404.) & disjunctivis (§. 407.) demonstrata sunt; ea etiam in consequentis immediatis locum habent: id quod probe notandum est, ut universalitatem principii intelligas, quod modum enunciat, quo status mentis unus ex altero consequitur.

§. 422.

*Quomodo
status men-
tis ex aliis
nascatur,
dum quid
imagina-
mur.*

Dum aliquid imaginaris, status mentis, qui futurus erat, nascitur ex præsentē mediante præterito. Etenim dum aliquid imaginamur, vi perceptionis præsentis producimus præteritam, quæ cum præsentē commune quid habet (§. 117.). Quare cum perceptio præsens constituat animæ statum præsentem, præterita vero præteritum &, dum præterita denuo producitur, status aliquis nascitur, qui futurus erat (§. 584. *Ontol.*); dum aliquid imaginamur, status mentis, qui futurus erat, nascitur ex præsentē mediante præterito.

Dedimus supra (§. 104. & seqq.) exempla complura, quæ propositionem præsentem illustrant atque confirmant, ut adeo eadem huc denuo transferri, vel ab iis diversa in medium afferri supervacaneum existimari debeat.

§. 423.

*Quomodo
status præ-
sens sit gra-
vidus futuri
in imagi-
nando.*

Quoniam, dum aliquid imaginamur, ex statu præsentē producitur qui futurus erat mediante præterito (§. 422.) & quidem ideo, quia præsens cum præterito commune quid habet (§. 117.), atque adeo præsens mediante præterito aptus efficitur, ut inde sequi possit futurus; etiam *dum aliquid imaginamur status præsens gravidus futuri, quod a præterito imprægnatur (§. 408.).*

Propositionem hanc adjicimus ut appareat principii superioris (§. 409.) universalitas : Quem in finem porro adjicimus propositionem sequentem.

§. 424.

Dum per consequentiam immediatam aliquid inferimus, Quomodo status præsens est gravidus futuri, quod a præterito imprægnatur. Eodem fere modo demonstratur, quo propositio præcedens. Nimirum dum per consequentiam immediatam ex præmissa inferimus conclusionem; status, qui futurus erat, enascitur ex præsentem mediante præterito (§. 421.) & quidem ideo, quod præteritus præcesserit, alias non exiturus, quemadmodum ex anterioribus liquet (§. 411. & seqq.), consequenter vi præteriti. Quare cum status præsens sit gravidus futuri, quatenus ex eo & vi ejus futurus nascitur (§. 408.) & præsens a præterito imprægnatur, quatenus mediante præterito aptus efficitur, ut inde sequi possit futurus, seu quatenus accedente præterito ex eo sequitur qui futurus erat (§. cit.) ; dum per consequentiam immediatam aliquid inferimus, status præsens est gravidus futuri, quod a præterito imprægnatur.

Atque ita nos abunde satis explicavimus, quæ ad tres mentis operationes penitus intelligendæ requiruntur & regulis logicis uberiorem lucem affundunt. Suo autem tempore patebit, quod non minus lucem affundant regulis moralibus, quibus praxis philosophiæ moralis continetur.

CAPVT IV.

De Dispositionibus naturalibus & Habitibus intellectus.

§. 425.

Quicquid menti sine prævio exercitio inexistit, natura inesse dicitur : quod vero non inexistit, nisi prævio exercitio, quidacqui-
(Wolffii Psychologia.)

Uu

*Quid natura inest ;
ac- ratur.*

acquiri dicitur. Utrumque etiam de corpore accipi potest. Quare cum exercitium actuum specie vel genere eorundem absolvatur (§. 195.) : Id acquiritur , quod menti vel corpori non inexistit nisi iteratis sæpius actibus specie vel genere iisdem.

E. gr. Ars scribendi in nobis non existit nisi prævio scribendi exercitio : homini itaque naturalis non est, sed acquiritur. Ex adverso facultas sentiendi inest homini absque ullo prævio exercitio ; adeoque eidem naturalis.

§. 426.

*Dispositio
quid sit.*

Possibilitas acquirendi potentiam agendi, vel patiendi, dicitur *dispositio*, ad agendum scilicet, vel patiendum. Quodsi hæc *dispositio* natura inest, *naturalis* appellatur.

Ita nobis inest *dispositio* naturalis ad scribendum : etenim potentiam scribendi acquirere valemus. Similiter nobis inest *dispositio* naturalis ad saltandum & equitandum , ac pugillandum, quia potentiam saltandi, equitandi, pugillandi acquirere valemus.

§. 427.

*Difficultas
agendi in
quonam
consistat.*

Difficulus agere dicitur, qui actiones simplices ad compositionem requisitas nonnisi tarde ac interjectis moris edere valet. *Difficultas* adeo agendi æstimatur longitudine temporis actioni simplici edendæ impensi & mora (seu tractu temporis) inter simplices interjecta, itemque frustaneis conatibus.

E. gr. Si quis scribere velit, singulas literas delineare debet & in una eademque litera plures ductus pennæ necessarii sunt. Sunt adeo tot actus simplices, seu minus compositi, quot literæ delineandæ, ad scripturam requisiti, & in singulis literis delineandis tot distinguuntur actus magis simplices, quot ductus diversi in una litera observantur. Difficulus adeo scribit, qui tarde literas depingit & inter singulorum literarum delineationes a scribendo tantisper cessat, ut mora intercedat, qua non scribitur. Major adhuc est scribendi difficultas, si quis non continuo ductu pingit literam eandem, sed singulos ductus singulis tempusculis absolvit, morula quadam inter singulos interjecta. Non confundenda est hæc difficultas cum impotentia scriben-

scribendi, quando quis ductus literarum nondum delineare valet, seu calamum movere nequit, prout litera pingenda postulat, & si difficultati scribendi quidpiam impotentiae adhæreat.

§. 428.

Difficultati agendi opponitur *Promptitudo agendi*, qua quis *Habitus* actiones simplices ad compositam requisitas cito nec ullis inter *quid* di- eas interjectis morulis producere valet. Atque hæc agendi *catur*. promptitudo est id, quod *Habitus* appellari suevit.

Ita prompte scribit, qui sine mora non modo singulas literas, verum etiam integras voces & totam earum seriem scribit, atque eidem habitus scribendi, quem speciali nomine artem scribendi dicimus, tribuitur. Similiter prompte ratiocinatur, qui sine hæsitatione ratiocinatur ac ratiocinia inter se concatenat, quemadmodum fieri solet, ubi quis in demonstrationibus Mathematicorum diu multumque fuerit versatus atque tum habitu ratiocinandi pollere dicitur.

§. 429.

Difficultas agendi dicitur *Dispositio*, eaque *naturalis*, si na- *Dispositio* tura insit, seu sine prævio exercitio inexistit; *acquisita* vero, si non *quid* dica- inexistit, nisi prævio exercitio. *tur*.

Ita difficultas scribendi, qualem initio experimur, dum arti addiscendæ nos applicamus, dicitur dispositio ad scribendum, eaque *acquisita*, cum non sine prævio exercitio in nobis existat: eam enim præcedit impotentia scribendi, quæ homini naturalis est, ut tolli possit, quatenus homo per naturam aptus est ad artem scribendi sibi comparandam, quatenus nempe per structuram manus atque brachii possibiles sunt motus ad scribendum requisiti. Quare cum agendi possibilitas potentia nomine veniat (§. 716. *Ontol.*); homini inest potentia quædam naturalis scribendi remota, quatenus nonnisi difficulter ad actum perducitur ac nonnisi præviis aliis.

§. 430.

Habitus nonnisi exercitio acquiritur & dispositio mediante Habitus
U u 2 *exercitio*

quomodo *exercitio in habitum convertitur.* Quicquid enim acquiritur, *producat.* nonnisi prævio exercitio acquiritur (§. 425.). Ergo etiam habitus, qui acquiritur, nonnisi prævio exercitio acquiri potest.

Idem ostenditur per indirectum. Ponamus habitum menti inesse sine prævio exercitio. Eidem igitur naturæ inest, non vero demum acquiritur (§. 425.): quod cum hypothesin evertat, absurdum est.

Confirmatur idem a posteriori. Ars scribendi habitus est (*not.* §. 428.). Artem vero scribendi non acquirimus, nisi prævio exercitio. Similiter promptitudo ratiocinandi habitus est; sed eam non acquiri nisi exercitio manifestum est. Saltandi & equitandi ars habitus est, neque vero hæ artes aliter acquiruntur quam exercitio.

Idem patet de ceteris habitibus quibuscunque, quos comparandos demum nobis esse, siquidem nobis inesse debeant, constat.

Quodsi jam porro homini insit quædam dispositio in habitum convertenda; habitum nondum inesse, sed demum acquiri debere per se patet. Enimvero non acquiritur, si nondum insit nisi prævio exercitio, quemadmodum modo ostendimus. Ergo dispositio in habitum converti nequit nisi prævio exercitio.

Maximæ utilitatis est nosse, quod habitus non comparetur nisi prævio exercitio, cum sic notionem directricem habeamus ad modum, quo habitus datus comparetur, investigandum utilem. Elucescet in primis utilitas in philosophia morali. Nescio qui fiat, ut contra principium agant tantum non omnes, quod verum & exploratum nemo non agnoscat. Ecquid enim frequentius est, quam homines sibi persuadere, quod habitus animæ possideant, etsi exercitationum sibi non sint memores, quibus eos sibi comparaverint? Quid frequentius est, quam homines appetere habitus mentis, minime autem sollicitos esse de exercitiis, quibus eos sibi comparent.

§. 431.

Habitus acquisitus continuo usu & conservatur, & perficitur. *Conservatio & ulterior perfectio habitus.*
Quoniam enim exercitio acquiritur (§. 430.), impossibile est, ut amittatur, quamdiu istud durat. Quamobrem cum tamdiu duret, quamdiu ex habitu agimus (§. 195.) & in hoc ipso usus ejusdem consistat; continuo usu habitus acquisitus conservatur.

Similiter cum exercitio acquiri debeat, quicquid ad habitum pertineans acquiritur (§. 430.), habitus autem perficiatur, si quid ejus acquiritur, quod nobis nondum inerat, quemadmodum ex notione perfectionis colligeret licet (§. 503. *Ontol.*); continuo habitus usu ulterius perfici debet.

Idem confirmatur a posteriori. Ita enim experimur artem saltandi & equitandi conservari, eandemque ad gradum exquisitiorem perducere, si continuo saltemus ac equitemus. Similiter habitus demonstrandi, quem tibi comparavisti, conservatur &, si quid eidem adhuc deest, ulterius acquiritur, adeoque perficitur (§. 503. *Ontol.*), si in demonstrando fueris continuus.

Illud probe notandum est, si quid habitui adhuc desit, defectu cognito, ad exercitium esse deveniendum, quod absolvitur actionibus, quæ deficiunt: etenim ejusdem actionis frequens repetitio in causa est, ut eam posthac promte edamus. Principium hoc non minus utile est quam præcedens, cum jam pateat, quid a nobis fieri debeat, ut habitus semel acquisitus perduret.

§. 432.

Habitus acquisitus amittitur diu intermisso ejus usu. Aut *Quomodo enim amittitur, dum eo continuo uteris, aut dum usum ejus diu habitus intermittis.* Enimvero constat eum conservari (§. 431.), adeoque non amitti, continuo usu. Amitti igitur debet diu intermisso ejusdem usu.

Confirmatur idem a posteriori. Artem enim saltandi

& equitandi dediscit qui per longum temporis spatium non salrat, nec equitat. Artem demonstrandi dediscit, qui per longum temporis spatium demonstrationem nullam concipit. Et idem eodem modo obvium est de habitu quocunque alio.

§. 433.

*Quomodo
contrarius
habitus si-
mul acqui-
ratur.*

Habitus acquisitus amittitur & contrarius simul acquiritur, editis continuo actionibus eidem contrariis. Etenim si actiones habitui acquisito contrarii eduntur, ex habitu non agis (§. 28. *Ontol.*), atque adeo usus ejusdem intermittitur: quod ubi continuo fit quando agendi occasio offertur, usus illius diu tandem intermittitur. Quare cum habitus acquisitus amittatur diu intermisso ejus usu (§. 432.); habitus acquisitus amitti debet editis continuo actionibus eidem contrariis.

Quod si continuo edantur actiones habitui contrariæ, exercitium eidem contrarium ponitur (§. 195.). Quare cum actionibus contrariis habitus contrarius acquiratur (§. 430.); editis continuo actionibus habitui acquisito contrariis habitus eidem contrarius acquiritur.

Patet igitur *per demonstrata*, habitum acquisitum amitti & simul contrarium acquiri, editis continuo actionibus eidem contrariis.

Maximi momenti est hæc propositio in moralibus, cum hinc pateat ratio, cur homines ex virtute prolabantur in vitia, ut virtutem dediscentes vitiis adfuescant.

§. 434.

*Differentia
cognitionis
a priori &
posteriori.*

Quod experiundo addiscimus, a posteriori cognoscere dicimur: Quod vero ratiocinando nobis innotescit, a priori cognoscere dicimur. Mixta est cognitio, quæ partim a posteriori, partim a priori acquiritur.

E. gr. Solem lucere experiundo addiscimus attenti scilicet ad ea, quæ videmus (§. 664. *Log.*). Lucem igitur Solis a posteriori cognosci-

scimus. Ex definitione trianguli ratiocinando colligimus rationem æqualitatis trium angulorum ad duos rectos : eam igitur a priori cognoscimus. Ex effectibus Solis, quos a posteriori cognoscimus, mediante notione ignis ratiocinando colligimus, quod sit ignis : mixta igitur est cognitio, qua nobis constat Solem esse ignem. Nostra cognitio ut plurimum mixta est, magis tamen ad eam, quæ a priori datur, accedit, ubi ex principiis a posteriori stabilitis continua ratiociniorum serie colligimus, quæ nobis antea nondum cognita fuerunt.

S. 435.

Quicquid cognoscimus, vel a posteriori cognoscimus, vel a priori. Quicquid enim cognoscimus, ea vel cognoscimus attendendo ad ea quæ percipimus & attentionem nostram successive ad alia aliaque, quæ rebus insunt, promovendo ; vel ex iis, quæ nobis jam antea innotuere, colligendo quæ nobis adhuc ignota sunt : id quod per antecedentia abunde patet, cum aliarum facultatum mentis nobis non simus conscii, quam per quas prædicto modo ad cognitionem rerum pervenitur, neque alius cognitionis nobis conscii simus, nisi quæ alterutro modo comparatur. Enimvero quicquid attentione sola ad perceptiones nostras nobis innotescit, id experiundo addiscimus (§. 664. Log.), adeoque a posteriori cognoscimus (§. 434.) : quicquid vero ex iis colligimus, quæ nobis jam innotuere, cum antea ignotum esset, id ratiocinando nobis innotescit (§. 366.), adeoque idem a priori cognoscimus (§. 434.). Quamobrem quicquid cognoscimus, vel a posteriori, vel a priori cognoscimus.

Maximæ utilitatis est propositio præsens, cum notionem directricem contineat inquirendi in veritatem eorum, quæ affirmantur, vel negantur. Etsi autem propositio vulgaris sit, ejus tamen usus hactenus non invaluit, qui esse potest ac debet. Ac neglecta huic deberur, quod vulgo multa affirmantur & negantur sine sufficiente ratione ad negandum, vel affirmandum, quodque plurimi, immo plerique non utantur facultatibus mentis in cognitione multa sibi comparanda, quemadmodum poterant. Ipsa experientia abunde

edocti

edocti sumus, quantum conducatur propositiōem hanc esse nobis familiarem, ut mentem subeat memoria, quoties nobis occurrit iudicium absque probatione omni, vel saltem absque sufficiente.

§. 436.

*Quomodo
a posteriori
quid cognoscatur,*

Quicquid a posteriori extra nos cognoscimus sensuum duce cognoscimus : Quicquid vero in mente cognoscimus, ope apperceptionis cognoscimus. Quicquid enim a posteriori cognoscimus, experiundo cognoscimus (§. 434.), adeoque sola attentione ad perceptiones nostras (§. 466. *Leg.*). Jam vero res præsentes, quæ extra mentem nostram sunt, sensu (§. 67.), res absentes vi imaginationis percipimus (§. 92.), atque vi quidem imaginationis nonnisi eas, quæ sensu ante perceperamus (§. 117.), ut adeo sola vi imaginationis non cognoscatur, nisi quod ante cognitum fuerat. Quamobrem quicquid extra nos a posteriori cognoscimus, sensu duce cognoscimus.

Jam mens ea, quæ in ipsa sunt, appercepit, quatenus perceptionis suæ sibi conscia est (§. 25.). Quare cum attentione ad perceptiones nostras nihil de iis, quæ in nobis sunt, cognoscamus, nisi quatenus eorum nobis conscii sumus, quod per se patet : nihil in nobis a posteriori cognoscere valemus nisi ope apperceptionis.

Modum cognitionis a posteriori uberius declaravi in Logica capite integro (§. 669. & seqq. *Leg.*), quamvis ibidem quoque tradantur, quæ admixtam cognitionem referuntur : neque enim absque ratiocinatione a posteriori multum proficere licet, ubi universales notiones easque distinctas tibi comparare volueris, quales in scientiis veniunt. Quomodo autem in mentis nostræ cognitione a posteriori progrediamur, ex ipsa præsente tractatione innotescit, ubi nonnisi illa profarimus, quæ a posteriori nobis innotescent, etsi placeat istud cognitionis genus, quo a priori simul stabiliuntur, quæ a posteriori innotescent.

§. 437.

Sola vi

Sola imaginatione duce non cognoscimus, nisi quæ fingimus.
Ima-

Imaginando enim non percipimus nisi res antea sensu perceptas (§. 117.), adeoque nobis non innotescit ejus ope, nisi quod jam ante duce sensuum cognoveramus. Quoniam vero imaginationis vi producta phantasmata dividere (§. 140.) atque componere (§. 143.), sicque phantasmata rerum sensu nunquam perceptarum producere valemus, licet in iisdem nihil contineatur, quod non jam ante sensu fuerat perceptum; ope imaginationis quædam cognoscimus, quæ ita sensu non perceperamus. Enimvero si phantasmatum divisione ac compositione phantasma rei sensu nunquam perceptæ producitur, aliquid fingimus (§. 144.). Sola igitur imaginatione duce non cognoscimus nisi quod fingimus.

imaginationis quædam cognoscantur.

Quoniam phantasmatis imaginationis vi productis veritas nonnisi ex accidente inest, quatenus scilicet contingit ea in eodem combinari, quæ sibi mutuo non repugnant; ubi de cognitione veritatis sermo est, ejus vulgo non habetur ratio. Patebit tamen suo loco, facultati fingendi esse in arte inveniendi locum, quatenus phantasmata examini rationis submitti possunt, ut eorum appareat realitas, si quam habent.

§. 438.

Quicquid a priori cognoscitur, vi intellectus eruitur. Quomodo

Quicquid enim a priori cognoscitur, id ratiocinando nobis innotescit (§. 434.). Sed ratiocinatio intellectus operatio est (§. 366.). Ergo quicquid a priori cognoscitur, vi intellectus cognoscitur.

quid a priori cognoscatur.

Idem evidentius adhuc ostenditur sequentem in modum. Quicquid a priori cognoscitur, id ratiocinando nobis innotescit (§. 434.). Enimvero dum ratiocinamur, ob notas, quæ definitionem rei ingrediuntur, in re quadam obvia animadversas aut quocunque modo deprehensas eidem tribuimus nomen ista definitione explicatum (§. 374.), consequenter eidem genus aliquod, vel speciem aliquam convenire judicamus (§. 371.); aut ob genus & speciem rei competentem porro tribui-

(Wolffii Psychologia.)

Xx

mus

mus prædicatum aliquod absolutum generi vel speciei isti tribuendum, vel denique ob determinationes quasdam accidentales præter genus vel speciem rei convenientes eidem tribuimus prædicatum sub conditione istarum determinationum eidem tribuendum (§. 374.): nec absimili modo ratiocinatio sese habet, si quando negativa fuerit (§. 384.). Quamobrem si ratiocinia fuerint categorica, in re, quam cognoscimus, distinguimus determinationes genericas & specificas (§. 236. *Ontol.*), aliasque accidentales, atque prædicata alia vi illarum determinationum eidem convenientia, consequenter res istas distincte nobis repræsentamus (§. 38.), adeoque vi intellectus (§. 275.). Quodsi fuerint hypothetica, vel disjunctiva, ex judicio uno de re quadam admissio tanquam vero vi propositionis hypotheticæ, vel disjunctivæ judicas, admittendum quoque esse de re eadem judicium quoddam aliud (§. 388. 390.). Nec aliter sese res habet in consequentiis immediatis (§. 411. & seqq.). Enimvero dum judicamus, in subjecto distinguimus prædicatum eidem tribuendum a determinationibus, vi quarum eidem tribui debet (§. 343. 348.), vel ab eodem removendum (§. 345.), adeoque denuo rem istam tibi distincte repræsentas (§. 38.), consequenter vi intellectus (§. 275.). Quamobrem sive per ratiocinia categorica, sive hypothetica & disjunctiva, sive denique per consequentias immediatas ad judicium aliquod antea nobis incognitum perveniamus; vi intellectus ad idem pervenitur, consequenter quicquid a priori cognoscitur, vi intellectus cognoscitur (§. 434.).

Ex hac propositione intelligitur, intellectus cultura opus esse, ubi cognitio, quæ a priori acquiritur, curæ cordique tibi fuerit.

§. 439.

*Concursus
omnium
operatio-
num mentis
ad cogni-
tionem a
priori.*

Ad cognitionem, quæ a priori datur, omnes in universum intellectus operationes concurrunt. Intellectus enim operationum rationes tres sunt, notio, judicium, atque discursus sive ratio-

tio-

tiocinatio (§. 325.). Enimvero quando ratiocinamur, ex judiciis quibusdam præviis alia formamus (§. 366.), consequenter cum ratiocinatio sit tertia, iudicium secunda mentis operatio (§. 53. *Log.*); tertiæ intellectus operationi locus non est sine secunda. Porro quando iudicamus & quidem determinate, quemadmodum in ratiocinatione opus est (§. 374. 384. &c.), in idea subiecti determinationes singulas a se invicem & a re, cui insunt, & adsunt, distinguimus, vi quarum prædicatum eidem tribuendum, sive eadem intrinsecæ fuerint, sive extrinsecæ (§. 348.), consequenter primæ mentis operationi quoque locus est (§. 331.). Quare cum ratiocinando eruatur, quicquid a priori cognoscitur (§. 434.); ad cognitionem, quæ a priori est, omnes mentis operationes concurrunt.

Idem intuitiva quadam ratione a posteriori intelligitur, si acumen mentis in demonstrationem aliquam in ratiocinia sua resolutam (§. 551. & seqq. *Log.*) convertas.

Ex propositione præsentia intelligitur, tanto aptiorem unumquemque esse ad res a priori cognoscendas, quanto singulas intellectus operationes promptius elicere valet. Quamobrem præsens de facultatibus mentis tractatio utilitate sua non caret, cum hac cognitione plurimum juvemur in veritate investiganda & ab aliis proposita distincte concipienda.

§. 440.

Habitus distincte ratiocinandi & ratiocinia concatenandi *Soliditas* dicitur *Soliditas*, intellectus scilicet. *quid sit.*

Nimirum non simpliciter ratiocinandi habitus soliditatis nomine venit, sed quatenus ratiocinationes sunt distinctæ & eorum quoque concatenatio distincta est.

§. 441.

Distincte ratiocinatur, qui successive singula iudicia format, *Distincta* prout ratiocinium ingrediuntur. *ratiocinatio*

Quoniam in superioribus docuimus (§. 354. & seqq.), quo ordine iudicia in ratiociniis sibi invicem succedant, si naturali mentis impetu sunt, *quoniam.*

nec quicquam coacti admittitur, facultatibus mentis inferioribus perperam sese ingerentibus; non opus est, ut distinctam ratiocinationem porro hic explicemus. Ejus quoque ideam animo ingenerat, qui demonstrationes Mathematicorum eo modo resolvit, quo idem fecimus (§. 551. & seqq. *Log.*) ac ad imitationem hujus analyseos demonstrationes evoluit, ubi in his concipiendis versatur: scilicet, quod multas admittat crypses, ut syllogismorum genuina forma minime appareat.

§. 442.

*Gradus soliditatis unde accedit ad notiones irresolubiles. Gradus soliditatis unde accedit ad notiones irresolubiles. Quoniam notiones irresolubiles, seu quæ in alias simpliciores resolvi nequeunt, sunt omnium primæ; propositionibus respondent, quæ probationem ulteriorem non recipiunt. Quare si quis principia demonstrandi, quæ sunt præmissæ generales in ratiociniis (§. 561. *Log.*), eo usque continuare valer, donec ad notiones irresolubiles propius accedat; is distincta ratiocinia eorumque concatenationem tanto longius continuare valer, quo propius ad istas accedit. Quoniam itaque soliditas in habitu distincte ratiocinandi & ratiocinia continuandi consistit (§. 440.); habitus hic vero tanto major est, quo longius quis illam catenam producere potest; tanto utique quis solidior est, quanto in probandis principiis propius ad notiones irresolubiles accedit.*

Tanto quis solidior est, quo in probandis principiis propius accedit ad notiones irresolubiles. Quoniam notiones irresolubiles, seu quæ in alias simpliciores resolvi nequeunt, sunt omnium primæ; propositionibus respondent, quæ probationem ulteriorem non recipiunt. Quare si quis principia demonstrandi, quæ sunt præmissæ generales in ratiociniis (§. 561. *Log.*), eo usque continuare valer, donec ad notiones irresolubiles propius accedat; is distincta ratiocinia eorumque concatenationem tanto longius continuare valer, quo propius ad istas accedit. Quoniam itaque soliditas in habitu distincte ratiocinandi & ratiocinia continuandi consistit (§. 440.); habitus hic vero tanto major est, quo longius quis illam catenam producere potest; tanto utique quis solidior est, quanto in probandis principiis propius ad notiones irresolubiles accedit.

Præsens propositio fundamentum graduum soliditatis continet. Ex eadem vero apparet, soliditatem in tertia mentis operatione esse, quod in prima est profunditas. Habet enim aliquid similitudinis analyseos notionum, de qua supra diximus (§. 339), cum analysei demonstrationum, quam alias exhibuimus (§. 551. & seqq. *Log.*). Sicuti enim analysei notionum notio rei resolvitur in notiones eorum, quæ ipsam ingrediuntur, & notiones horum singulæ denuo in alias simpliciores, quamdiu datur; ita analysei demonstrationum demonstratio data resolvitur in ratiocinia, quæ eam ingrediuntur, & principiorum demonstrandorum demonstrationes denuo resolvuntur in sua ratiocinia, quamdiu datur. Quemadmodum itaque profunditas ex analysei notionum; ita soliditas ex analysei demonstrationum æstimatur.

§. 443.

§. 443.

Qui solidus est, habitu demonstrandi & probandi pollet. Quinam
 Qui enim solidus est, habitu distincte ratiocinandi & ratio- *habitu de-*
 cinia concatenandi pollet (§. 440.). Quare cum in demon- *monstrandi*
 stratione ac probatione quacunque legitima syllogismi conca- *polleat.*
 tenentur (§. 496. 498. Log.), quibus ratiocinia distincte pro-
 ponuntur (§. 332. Log.); qui solidus est, demonstrandi habitu
 pollet.

Hinc Geometradicuntur solidi, quod habitu demonstrandi pol-
 leant, & studio mathematico, praesertim geometrico, non sine laude
 incumbentes ceteris viris eruditis solidiores esse dicuntur, quod eo-
 dem demonstrandi habitum sibi comparant, quo probationes insuf-
 ficientes, quales vulgo occurrunt, a sufficientibus distinguunt, nec
 in praebendo assensu nondum sufficienter probatis adeo faciles sunt.
 Commendatur itaque hoc etiam nomine studium mathematicum ad
 intellectum perficiendum, quatenus ejusdem tractatione solidi effi-
 cimus.

§. 444.

Qui solidus est, demonstrationes consummatas dare valet & A quonam
contra. Qui enim solidus est, distincte ratiocinari & ratio- *demonstra-*
 cinia concatenare valet (§. 440.). Quare cum distincte ratio- *tiones con-*
 cinetur, qui successive singula judicia format, prout ratioci- *summata*
 nia ingrediuntur (§. 441.); qui solidus est, is in demonstrando *perveniant.*
 nullum principium praetermittit, quod demonstrationem in-
 gredi fas est, adeoque demonstrationem condit completam
 (§. 854. Log.), atque propositiones singulas eo ordine collocat,
 quo in analysi demonstrationis comparent, ut & ratio appa-
 reat cur jam ratiocinanti succurrant, & legitima ratiocinio-
 rum concatenatio eluceat, consequenter demonstrationem
 condit ordinatam (§. 799. Log.). Jam vero demonstratio, quæ
 & ordinata est, & completa, consummata est (§. 855. Log.).
 Quamobrem qui solidus est, demonstrationes consummatas
 dare valet.

Ponamus jam ex adverso, quod quis dare possit demonstrationes consummatas. Quoniam demonstrationes consummatæ sunt ordinatæ completæ (§. 855. *Log.*); ideo demonstrationes completas easque ordinatas dare valet. Jam vero in demonstrationibus completis continentur omnia demonstrandi principia vel explicite, vel implicite, prout res ipsa exigit, ut vel explicite afferantur, vel implicite demonstrationem ingrediantur (§. 854. *Log.*), & in demonstratione ordinata propositiones singulæ eo ordine se invicem excipiunt, quo in ratiociniorum serie, in quam demonstratio resoluta abit, continentur (§. 799. *Log.*). Quamobrem qui demonstrationes consummatas dare valet; ei perspectæ sunt propositiones singulæ, quæ demonstrationem ingrediuntur, idemque novit, quo ordine collocandæ sint in singulis ratiociniis, & quo ordine ipsa ratiocinia se invicem excipere debeant, consequenter successive singula judicia formare valet, prout ratiocinia ingrediuntur, adeoque distincte ratiocinatur (§. 441.) atque ratiocinia legitime concatenat. Qui ergo demonstrationes consummatas dare valet, is solidus est (§. 440.).

Non est, quod objicias in scriptis summorum Mathematicorum occurrere demonstrationes consummatas, quas tamen soliditatis laude privari nemo non absolum judicabit. Enimvero non ana est responso. Fieri nimirum potest, ut quis studio det demonstrationes inconsummatas, sicuti multi demonstrationes prorsus omitunt, quas dare poterant, vel ut lectorem in partem quandam inventoris vocent eum voluptate hinc resultante non privaturi, quemadmodum *Cartesio* visum fuisse constat; vel ne vilescant, quæ nimis facile intelliguntur, quemadmodum viro insigni *de Tschirnhausen* placuit; vel ut profanum vulgus a lectione arceatur, quod de utilitate ex quaestu statuens veritates pretiosas æstimare minime novit, quemadmodum philosophis olim Græcis ac inter hos *Aristoteli* arrisisse novimus; vel denique alia quacunque de causa. Absit igitur ut quis existimet, eum demonstrationes consummatas dare non potuisse, qui inconsummatas dedit! Enimvero demus Mathematicum quandam insignem demonstrationes consummatas dare minime

nime posse ! Non ideo omnis ipsi deneganda erit soliditas, sed aliquis saltem ejus gradus : solidior utique futurus, si dare valeret. Ecquis vitio vertet, virtutem aliquam moralem ita definiri, ut summum comprehendat gradum, etsi qui ejus laude fruuntur, eum attingere non possint. Fixum requirunt disciplinae terminorum significatum, qui adeo gradui, quem hic vel ille attingit, attemperari nequit, fixus quippe non futurus, cum nulla ratio suadeat, ut in desinendo hunc potius gradum respicias, quam alium.

§. 445.

Qui solidus est, non admittit tanquam vera, nisi sufficienter probata, atque sufficienter explicata. Qui enim solidus est, habitu demonstrandi pollet (§. 443.), adeoque judicare valet, utrum quid sit sufficienter probatum, nec ne. Quamobrem cum non ignoret, propositionem esse veram, quæ demonstrari potest (§. 544. *Log.*), & tum eandem nobis esse certam si prædicatum subiecto convenire demonstrare valemus (§. 568. *Log.*), vel quod eidem conveniat observamus (§. 567. *Log.*); utique tanquam verum non admittet nisi sufficienter probatum. *Quanam solidus admittat tanquam vera.*

Jam vero exploratum est, nos judicare haud quaquam posse, utrum propositio sit sufficienter probata, nec ne, quamdiu terminus quidam in eo occurrit, quem penitus nondum intelligimus, consequenter quando propositio nondum sufficienter explicata, cum ignoretur, quid probari debeat. Quare cum qui solidus est non admittat nisi sufficienter probata per demonstrata; idem nec admittere valet nisi sufficienter explicata.

Accidit hinc, ut solidus nonnullis dicatur, qui non admittit nisi sufficienter probata & explicata, quamvis non satis accurate. Differunt enim esse solidum & solida discernere ab iis, quæ talia non sunt. Solidus tunc demum erit, si ipse sufficienter explicet ac probet, quæ affirmat, vel negat: id quod sequente propositione ostenditur.

§. 446.

*Quinam fit
solidus.*

Qui sufficienter probat, quæ affirmat, vel negat, solidus est. Quoniam enim ideo propositionem datam probamus, ut certi reddamur eam esse veram; propositio vero tum deum nobis certa est, quando demonstrare valemus prædicatum subjecto convenire (§. 568. *Log.*); qui sufficienter probat, quæ affirmat, vel negat, eadem demonstrat &, ubi nulla ex parte desiderari patitur industriam suam, demonstrationes datæ completas atque ordinatas (§. 854. 799. *Log.*), adeoque consummatas (§. 855. *Log.*). Enimvero qui demonstrationes consummatas dare valet, solidus est (§. 444.): solidus igitur est, qui sufficienter probat, quæ affirmat, vel negat.

Patet igitur, solidum definiri posse per eum, qui sufficienter probat, quæ affirmat, vel negat, modo constat quidnam sufficienter probeatur, nempe quod evincitur per demonstrationes, easque inprimis consummatas. Quoniam vero demonstrationes istas ingrediuntur quoque principia a posteriori stabilita; per se patet, ad sufficientem probationem quoque requiri, ut a posteriori stabiliantur, quæ ab experientia hauriuntur.

§. 447.

*Nexus probationis
& explanationis
sufficientis.*

Qui sufficienter quid probat, idem quoque sufficienter explicat. Qui enim sufficienter quid probat, is idem demonstrat, quemadmodum ex demonstratione præcedente patet. Enimvero si qua propositio demonstratur, ex iis, quæ notionem subjecti ingrediuntur, seu de eodem sumuntur, ratiocinando colligitur prædicatum (§. 551. & seqq. *Log.*), consequenter antequam demonstratio inchoari potest, enumerandæ sunt determinationes subjecti, quarum vi prædicatum eidem tribuitur, & notio prædicato respondens communicanda, ut constet, quid ex illis colligi debeat. Sufficienter igitur eandem explicat (§. 1129. *Log.*), consequenter qui eandem sufficienter probat, eam etiam ante sufficienter explicat.

Patet

Paret igitur sufficientem eorum, quæ affirmantur & negantur, explicationem & sufficientem probationem necessario inter se connecti, ita ut hac posita ponatur etiam illa, etsi non vice versa posita illa hæc quoque ponatur.

§. 448.

Solida doctrina dicitur, quæ constat propositionibus sufficienter probatis seu demonstratis, adeoque & sufficienter explicatis (§. 447.). *Solida doctrina quænam dicatur.*

Solidam doctrinam proponere studemus in scriptis nostris, ringentibus licet adversariis, qui sibi ab eadem metuunt. Rationes patient ex sequentibus.

§. 449.

Quoniam in methodo philosophica, quæ cum mathematica eadem (§. 139. *Discurs. prælim.*), non utendum est terminis, nisi accurata definitione explicatis (§. 116. *Disc. præl.*), nec principiis nisi sufficienter probatis (§. 117. *Disc. præl.*), neque admittitur propositio, nisi quæ ex principiis sufficienter probatis deducitur (§. 118. *Disc. prælim.*); *doctrina methodo philosophica, seu mathematica proposita solida est.* *Quæ methodo doctrina solida tradatur.*

Absit autem, ut quis sibi persuadeat, se solidam proposuisse doctrinam, ubi methodum mathematicam, quam nos & philosophicam dicimus, infelicitè imitatur, ut externam ejus speciem saltem mentiatur imitamentum! Distinget doctrinam solidam ab ea, quæ ad speciem saltem composita est, qui methodi leges ex Logica perspectas accurata Marheseos ac philosophiæ tractatione sibi familiares reddidit, u eas promptè applicare possit.

§. 450.

Cui scientia est, is solidus est & doctrinam solidam possidet. Cui enim scientia est, is ea, quæ scit, demonstrare (§. 598. *Log.*); atque adeo sufficienter probare valet (*not.* §. 599. *Log.*). Enimvero qui ea, quæ affirmat, vel negat, sufficienter probare valet, solidus est (§. 448.). Ergo cui scientia est, is solidus est. *Quinam eam possideat.*

Similiter qui ea , quæ affirmat , vel negat , hoc est , singulas quas tuetur propositiones (§. 41. 204. Log.) demonstrare vel sufficienter probare valet , is doctrinam solidam habet (§. 448.). Ergo cui scientia est , is doctrinam solidam possidet.

Si quis attentior fuerit ad ea , quæ hic demonstrantur ; differentiam inter scientiam & soliditatem animadvertet. Nimirum soliditas spectatur in intellectu citra respectum ad cognoscibilia , quæ animo comprehendimus , attendendo tantummodo ad modum , quo circa cognoscibilia versamur ; scientia vero includit cognoscibilia , quæ nobis innouere , atque eadem exprimit cum modo cognitionis , quatenus is per applicationem inest ipsi cognitionis actui singulari. Apparet itaque arctus soliditatis ac scientiæ nexus , ita ut non detur scientia sine aliquo soliditatis gradu. Æstimantur autem gradus scientiæ ex multitudine eorum , quæ scimus : gradus autem soliditatis , cui cum objecto nihil est negotii , alio prorsus fundamento nituntur (§. 442.).

§. 451.

*Quantum
sciamus.*

Tantum scimus , quantum memoria retinemus. Pone enim , nos quid memoria non retinere : ejus ergo ideam animo reproducere reproductamque recognoscere minime valemus (§. 180.). Quare cum ea sciamus , quæ demonstrare valemus (§. 598. Log.), ea vero , quorum ideam reproducere ac reproductam cognoscere minime valemus , multo minus demonstrare valemus , quia hic potissimum respicimus ad objectum cognitionis (not. §. 450.); quorum ideam reproducere minime valemus , consequenter quorum nulla nobis amplius est idea , ea nec scimus. Ergo non scimus , nisi quæ memoria retinemus , seu , quod perinde est , tantum scimus , quantum memoria retinemus.

Propositio pervulgata est ; sed hic eam ad fixam notionem terminis philosophicis conformem reduximus.

§. 452.

*Scientia
quando
pereat.*

Quoniam qui rei oblitus est , ejus ideam reproducere vi
ima-

imaginationis nequit (§. 216.), adeoque nec eam memoria amplius retinet (§. 180.) : *Qui ejus, quod sciverat, obliviscitur, ipse amplius scientiam non habet.*

Unde patet, quomodo scientia, quam nobis comparavimus, imminui possit.

§. 453.

Habitus distincte ratiocinandi ac ratiocinia concatenandi re- *Oblivio*
manet, etiamsi obliviscaris eorum, de quibus distincte ratioci- *qua non*
natus habitum istum tibi comparasti. Habitum enim distincte *noceat, ha-*
ratiocinandi ac ratiocinia concatenandi tibi comparasti, non *bitui ac-*
quod de iis præcise rebus ratiocinatus es, de quibus di- *quisito.*
stincta ratiocinia formasti & formata concatenasti; sed quod
tantummodo ratiocinia formasti & concatenasti ac hoc ipso
notionem distinctæ ratiocinationis & legitimæ ratiociniorum
concatenationis tibi comparasti (§. 430.). Quoniam itaque ob-
jectum, de quo ratiocinatus es, ad hoc nil quicquam confert,
ut intelligas, cur habitum distincte ratiocinandi & ratiocinia
concatenandi tibi comparaveris, sed sola sufficit actuum ra-
tiocinationis ac concatenationis frequentia; ratio quoque suf-
ficiens illius habitus in sola horum actuum frequentia conti-
netur, nec quicquam ad eam facit objectum, de quo ratiocinia
distincta formasti & concatenasti (§. 56. Ontol.). Quare cum
posita ratione sufficiente habitus ponatur & ipse (§. 118. Ontol.),
adeoque ad hoc, ut ponatur, vel tollatur, nil quicquam
faciat, quod ad rationem sufficientem pertinet; habitus quo-
que distincte ratiocinandi & ratiocinia concatenandi adhuc po-
ni, adeoque remanere potest, etiamsi oblitus fueris eorum,
de quibus distincta ratiocinia formasti & formata concate-
nasti.

Patet hinc habitum distincte ratiocinandi & ratiocinia legitime concatenandi conservari, quem studio mathematico tibi comparasti, etiamsi Matheseos prorsus obliviscaris, modo habitu illo utaris extra Mathesin (§. 431.). Quamobrem studium mathematicum, quod comparandi istius habitus gratia nemo non exquisita industria tra-

etare debet, non est inutile, etiam si nullus sit tibi futurus olim theorematum usus, sed singula in spem futuræ oblivionis addiscantur.

§. 454.

Ars inveniendi quod sit & quod detur.

Habitus ex veritatibus cognitis alias incognitas colligendi dicitur *Ars inveniendi*. Exemplo inprimis Mathematicorum probatur, quod *detur ars inveniendi*. Constat nimirum eos ex iis propositionibus, quas demonstrant, continuo alias eruerere, quæ antea ignorabant. Immo etiam in Astronomia ex observationibus talia deducunt, quæ non observarunt, immo quæ nec reperta observari possunt. Integræ quoque dantur disciplinæ, quæ artes inveniendi speciales sunt, veluti Arithmetica, Trigonometria & inprimis Algebra. Quod vero etiam extra Mathefin arte inveniendi opus sit, non minus a posteriori probari potest. Exemplo docui, quomodo ars inveniendi exerceri possit in Tentamine de vera causâ multiplicationis frumenti, patrio idiomate aliquoties recusi.

Artem hanc inveniendi data opera explicaturi sumus, ceteris philosophiæ partibus absolutis, siquidem Deus nobis vires animi ac corporis tamdiu conservaturus ac otium largiturus, ut telam cœptam pertexere liceat.

§. 455.

Ars inveniendi quod duplex.

Quoniam quicquid cognoscitur, vel a priori cognoscitur, vel a posteriori (§. 435.); *ars inveniendi duplex est*, nimirum *ars inveniendi veritatem a posteriori*, & *ars inveniendi eandem a priori*.

Quamobrem olim artem inveniendi tradituri totam tractationem in duas dividemus partes, quarum altera tradet modum investigandi veritatem latentem a posteriori; altera vero modum eandem eruendi a priori: quemadmodum fecimus in Logica, ubi usum aliquem Logicæ in arte inveniendi monstraturi *Capit. 2. & 3. sect. 2. part. 2.* aliqua hujus artis prælibavimus.

§. 456.

Observatio est experientia, quæ versatur circa facta naturæ sine nostra opera contingentia. *Experimentum* est experientia, quæ versatur circa facta naturæ, quæ nonnisi interveniente nostra opera contingent.

Observationis & experimenti differentia.

Definitionem experimenti jam dedimus alibi (§. 747. *Log.*); eam tamen hic reperi consultum duximus, ubi eam ab observatione discerni necessarium fuit. Exemplis differentia inter observationem & experimentum fit clarior. E. gr. Cælum obducitur nubibus nulla nostra opera intercedente. Cum nubes præsentis intuemur nobisque conspecti sumus ejus, quod videmus; cælum nubibus obductum esse observamus. Enimvero si ope antliæ pneumaticæ ex globo cupreo cavo aër educitur & ad bilancem appensus leviorprehenditur, quam fuerat ante, cum aëre plenus esset; experimento mihi innotescit, globum aëre plenum esse vacuo graviolem: neque enim globus evacuetur nisi opera mea interveniente, nec adeo levior efficitur sine opera mea.

§. 457.

Ars inveniendi a posteriori veritatem incognitam eruit vel *Ars inveniendi a posteriori* *ex observationibus, vel ex experimentis.* A posteriori enim incognitam a posteriori cognoscimus quod experiundo cognoscimus (§. 434.). Quoniam itaque experientia vel in numero observationum, vel ex experimentorum est (§. 456.); ars quoque veritatem a posteriori inveniendi vel ex observationibus, vel ex experimentis eruere debet.

quod duplex.

Duplex adeo datur ars inveniendi a posteriori, scilicet ars observandi & ars experimentandi.

§. 458.

Ars observandi est, qua veritates ex observationibus eruntur.

Artis observandi definitio.

Utuntur hac arte Physici ac Medici, ac imprimis Astronomi. Utuntur quoque eadem in Psychologia empirica, quam hic tradimus.

§. 459.

*Artis ex-
perimen-
tandi defi-
nitio.*

Ars experimentandi, est, qua experimentis veritates eru-
untur.

Hac arte utuntur haecenus Physici fere soli : eidem tamen locus est in omni philosophia, ipsa Theologia naturali. Quamobrem aliquoties me jam monuisse memini, quod datur etiam Theologia naturalis experimentalis, immo philosophia experimentalis ad omnes omnino philosophiæ partes extendatur.

§. 460.

*Veritas
quomodo a
priori eru-
atur.*

Si veritas a priori eruitur, ex notionibus, hoc est, definitio-
nibus ac propositionibus, per ratiocinia colligitur. Ad cogni-
tionem enim, quæ a priori datur, omnes in universum in-
tellectus operationes concurrunt (§. 439.), consequenter no-
tio, iudicium & discursus seu ratiocinatio (§. 325.). Enimvero
iudicia nova ex aliis præviis formantur ratiocinando (§. 366.),
adeoque definitiones & propositiones cognitæ ad objecta, de
quibus meditamur, applicando (§. 366. & seqq.). Quare si a
priori veritas eruenda, ex definitionibus ac propositionibus,
seu notionibus jam acquisitis colligenda.

Confirmatur idem a posteriori exemplo Mathematico-
rum, qui hac arte potissimum utuntur. Si quis in Algebra cum
attentione ad talia fuerit versatus, veritatem propositionis ab-
unde perspicit.

§. 461.

*Artis in-
veniendi a
priori defi-
nitio.*

Hinc *Ars inveniendi a priori*, quæ per eminentiam *Ars
inveniendi* dicitur, est, qua ex notionibus acquisitis, hoc est,
ex definitionibus ac propositionibus jam cognitæ ratiocinan-
do colligitur veritas adhuc incognita.

Ars inveniendi a priori, si a Mathesi pura discesseris, cum arte
observandi ac experimentandi conjungenda. Exemplo nobis sunt
Astronomi, qui artem inveniendi veritatem a priori cum arte obser-
vandi conjungunt, Exemplo sunt Physici, qui eandem cum arte ex-
peri-

perimentandi combinant, immo cum arte observandi & experimen-
tandi simul.

§. 462.

Quoniam veritates a priori non inveniuntur, nisi ex de- *Quanam*
finitionibus ac propositionibus cognitis (§. 461.) ; *Quo plures ars invent-*
definitiones ac propositiones quis iam cognovit, eo ad inveniendum endi a priori
veritatem latentem a priori aptior; si cui vero nulla adhuc perspectæ præsuppo-
sunt, is in inveniundo inanem operam sumit. *nat.*

Quamobrem si multæ jam prostant definitiones ac propositiones
ab aliis inventæ, eas sibi ante perspectas reddere debet, qui animum
ad inveniendum applicat, quam de veritate proprio Marte eruenda
cogitet. Non ignora mihi sunt exempla eorum, qui, cum præclara
præstare potuissent, oleum ac operam omnem perdiderunt, quod præ-
cipitato gradu ad inveniendum procederent.

§. 463.

Et quia veritas a priori ratiocinando colligitur (§. 461.); *Requisitum*
veritatem a priori investigaturus habitu ratiocinandi polleat necesse *alterum in-*
est, consequenter cum soliditas in habitu distincte ratiocinandi *ventoris.*
& ratiocinia concatenandi consistat (§. 440.), *inventorem solidum*
esse oportet.

Equidem distincta ratiocinatio in inventore non absolute necessaria,
cum vel experientia doceat, multis iisque egregiis inventis celebres a di-
stinctis ratiociniis esse alienos, immo subinde distinctæ ratiocinationis
ac legitimæ ratiocinorum concatenationis ne quidem distinctam habe-
re notionem: nemo tamen negaverit, ratiocinationem distinctam non
uno nomine præferendam esse confusæ, qui utriusque differentiam ex-
pertus est, quemadmodum alio loco ostensurus sum,

§. 464.

Primi inventores ex veritatibus vulgo obviis, quas invenerunt, Principia,
collegerunt Veritas enim latens eruitur ex veritatibus jam cogni- *quibus usi*
tis (§. 461.). Quare cum primis inventoribus veritates aliæ *primi in-*
cognitæ non fuerint, nisi quæ etiam vulgo obviæ erant; ex verita- *ventores.*
tibus vulgo obviis collegerunt, quas invenerunt.

Hinc

Hinc videmus ipsum *Euclidem* in *Elementis* notiones communes, quibus confusus utitur vulgus in ratiocinando, ad distinctas reduxisse & ope earum ex figurarum definitionibus obviis theoremata ac problematum resolutiones deduxisse. Ostendi in *Ontologia*, non unum occurrere in *Elementis Euclideanis* axioma, cui non respondeat notio quædam communis, ac ideo ibidem principia ontologica ad notiones communes reduxi. Immo observavi, ipsa *Algebræ* ac *scientiæ* hac superioris, unde principia sua mutuatur, principia a notionibus vulgi derivari, nec nisi per has penitus intelligi ac demonstrari. Ex his vero jam patet ratio, cur primi in aliquo genere inventores non eo usque progrediantur, quo postea successores ipsorum inventis in rem suam usi progrediuntur.

§. 465.

Syllogismorum in inveniendousus.

Syllogismi sunt medium inveniendi veritatem. Per syllogismos ratiocinia distincte exprimuntur (§. 332. *Log.*), consequenter iisdem utendum, quando distincte ratiocinamur. Jam vero per ratiocinia colligitur ex definitionibus ac propositionibus cognitis, quod a priori invenitur (§. 460.) & inventorem solidum esse oportet (§. 463.), adeoque distincte ratiocinari (§. 440.). Ut igitur debet syllogismis. Quamobrem cum inventori finis sit veritatis latentis investigatio (§. 932. *Ontol.*), atque ex syllogismo intelligatur, quomodo hunc finem consequatur (§. 366.), consequenter is rationem contineat cur finis intentus ad actum perducatur (§. 58. *Ontol.*); syllogismus medium est inveniendi veritatem (§. 937. *Ontol.*).

Communiter syllogismum a ratiocinio non distinguunt, quemadmodum nec propositionem seu enunciationem a iudicio. Atque tunc multo evidentius est, syllogismos esse medium inveniendæ veritatis. Neque enim legitime ratiocinamur, nisi ratiocinia regulis syllogisticis convenient, quas ex legibus ratiocinandi supra stabilitis deduci ex *Logica* patet. Cumque paulo ante monuerimus (not. §. 463.); ratiocinationi distinctæ non unam esse prærogativam, ob quam confusæ merito præfertur, optandum omnino foret ut inventores distinctis ratiociniis adsuescerent, nec a forma syllogismorum recederent, multa rædia, quæ alias devorare debent, evitaturi ac plures lapsus, quos non facile advertunt, declinaturi.

§. 466.

§. 466.

Si ratiocinia regulis logicis non fuerint conformia ; per ea non ^{Quando} necessario infertur propositio vera. Etenim si ratiocinia regulis ^{per ratiocinia} logicis conformia non sunt ; nec legibus ratiocinandi conformia (§. 373.). Quare cum leges ratiocinandi violari nequeant, quamdiu ex præmissis veris conclusio vera necessario inferri debet (§. 374. 384. 388. 390. 411.), si ratiocinia regulis logicis seu syllogismorum conformia non fuerint, nec ex veris præmissis necessario infertur conclusio vera. ^{stio vera inferatur.}

Hinc ad *ratiocinium legitimum & syllogismum legitimum* , per quem illud distincte explicatur, requiritur, ut nec in materia peccet, nec in forma, hoc est, ut nec alterutra præmissa falsa sit, nec syllogismus regulis syllogismorum contrarietur. Dico autem si ratiocinia regulis logicis conformia minime fuerint, seu in forma peccent (§. 635. *Log.*) ; per ea non necessario inferri propositionem veram : etenim fieri potest ex accidente, ut propositio sit vera. Enimvero tum non sequitur ex præmissis, neque veritas ejus vi formæ agnoscitur.

§. 467.

Sine ratiociniis, quæ regulis logicis conformia sunt, nulla Ratiocinia a priori invenitur veritas. Si enim veritas inveniri debet a prio- ^{in invenien-} ri, ex definitionibus ac propositionibus cognitis per ratiocinia ^{do qualia,} colligenda (§. 460.). Ponamus jam ratiocinia ista regulis logicis non esse conformia : ergo ex datis seu cognitis per ea non necessario infertur propositio vera (§. 466.). Patet igitur sine ratiociniis, quæ regulis logicis conveniunt, a priori nullam inveniri veritatem.

Non obstat, quod dentur inventores, quibus contrarium videtur. Neque enim omnes ratiocinia sua distincte resolvere norunt: id quod tamen requiritur, siquidem formam legitimam agnoscere velis.

§. 468.

Quoniam ratiocinia per syllogismos distincte explicari pos- ^{Idem ulte-} sunt ^{rius expen-} ditur,
 (Wolffii Psychologia.) Z z

sunt (§. 332. Log.), adeoque si ratiocinia regulis logicis conformia sunt, & ipsi iisdem conformes, seu præscriptam a Logicis formam servare debent; *ratiocinia, quibus in inveniendoutimur, per syllogismos formales explicabilia sunt.*

Et si non opus sit syllogismos formales semper adhiberi ab inventore; necesse tamen est ut ratiocinia ejus distincte evoluta per syllogismos formales explicentur. Immo conducit syllogismis quoque formalibus uti in meditando, ut ratiocinia eo ordine se invicem excipiant, quo in demonstrationum resolutione (§. 551. & seqq. Log.) se invicem consequuntur. Ita nimirum meditans in majore luce versatur, ubi distincte ratiocinatur, quam ubi confusis ratiociniis indulget. Facilius advertit, ubinam hæreat aqua & de quibus principiis ipsi sit dispiciendum, antequam ulterius progredi possit. Minus defatigatur meditatione sua ac citra tedium eandem continuat. Immo lapsus quoque facilius evitat, quam confusis ratiociniis intentus. Absit itaque ut puerile judicemus, quod tantæ utilitatis est & accuratioris laudem meretur. Est etiam syllogismorum formalium aliquis usus in dirigendo intellectu ad ea, quæ cogitationem nostram subire debent: sed de hoc aliisque pluribus, quibus syllogismorum formalium præstantia doceri poterat, ex instituto olim dicemus in arte inveniendi.

§. 469.

*Artificia
heuristica
quid sint.*

Artificia heuristica dicuntur regulæ, quibus mens apta efficitur per principia ipsi perspecta veritatem incognitam erudiendi, quam solo ratiocinandi habitu adjuta per ea eruere non poterat.

Hæc artificia in Arte inveniendi exponenda sunt, ac ad ea respicienda, quando inventores invicem comparaturus eorundem artem quasi ad mensuram revocare volueris.

§. 470.

*Artificio-
rum heur-
isticorum
necessitas.*

Principia ac demonstrandi habitus ad veritatem latentem investigandum non semper sufficiunt; sed aliis præterea artificijs heuristicis sæpius opus est. A posteriori veritatem asserti probare licet per exempla ex Mathesi petita. Ecquid enim in ipsis Geometriæ elementis communius est, quam ex data
notione

notione subjecti deduci non posse prædicatum vi aliorum theorematum jam satis perspectum, nisi ante per constructionem quandam geometricam effeceris, ut principia ista applicari atque adeo ex iis, quæ per constructionem dantur, ratiocinando colligi possit quod quæritur? Sane si mensuram trium in triangulo rectilineo simul sumtorum angulorum invenire velis; per theoremata de angulorum alternorum intra parallelas constitutorum æqualitate & ratione æqualitatis angulorum ad idem punctum constitutorum duos ad rectos eandem non erues, nisi ante ducta linea per verticem trianguli cum basi parallela effeceris, ut theoremata ista applicari possint. Vide Rationem prælectionum sect. 1. c. 1. §. 38. Similiter rationem quadrati hypotenusæ ad quadrata laterum ex notione quadrati & trianguli ratiocinando non colliges per theoremata de triangulorum congruentia & ratione trianguli ad parallelogrammum super eadem basi & intra easdem parallelas cum ipso constitutum, nisi per constructionem ante effeceris, ut theoremata ista applicari possint (§. 417. *Geom.*). Ad illas igitur constructiones requiruntur artificia heuristica generalia & ipsæ constructiones sunt istiusmodi artificia specialia (§. 469.), consequenter patet sine artificiis heuristicis per principia cognita veritatem incognitam erui non posse, etiam si habitu ratiocinandi ac ratiocinia concatenandi, adeoque demonstrandi (§. 496. 498. *Log.*) polleas. Algebra, quæ ars inveniendi specialis est, plura continet istiusmodi artificia, quæ vi definitionis hic a nobis data (§. 369.) facile agnosces, modo in ejus tractatione attentionem ad regulas afferre volueris, quæ ibidem describuntur. Istiusmodi artificium est ars characteristicæ, cujus beneficio veritates geometricæ ac arithmeticæ ab imaginibus separantur, ut quæsitum ex datis per calculum erui possit: id quod absque ista characteristicâ fieri minime posset. Simile artificium est in resolutionibus problematum specialium eorum ad abstracta seu generalia reductio (§. 156. *Algebr.*) &

in problematum physico - mathematicorum resolutionibus eorundem ad Geometriam puram reductio , qua usus est *Jacobus Bernoulli* in Actis Eruditorum Anni 1690. p. 218. cum problema physico - mechanicum de curva æquabilis descensus solveret. Optica etiam atque Astronomia exempla istiusmodi artificiorum suppeditat; sed ea, quæ retulimus , ad stabiliendam veritatem propositionis præsentis abunde sufficiunt.

Quandonam istis artificiis opus sit, ex definitione eorundem, quam dedimus (§. 469.), perspicue admodum claret, ac suo loco in Arte inveniendi ex instituto docebitur.

§. 471.

Fundamentum reductionis heuristicæ.

Si quod objectum notionem quandam communem cum altero habet ; quæ vi ejusdem de uno innotuere ad alterum quoque applicantur. Etenim si objecta duo notionem quandam communem habent ; eatenus similia sunt (§. 195. Ontol.), adeoque tanquam species ad idem genus referri possunt, etsi eidem non immediate seu proxime subsint (§. 234. Ontol.), vel etiam instar individuum ejusdem speciei considerari possunt (§. cit.). Quare cum quæ generi conveniunt, speciebus quoque singulis tribui possint, & quæ speciei conveniunt , eadem quoque individuis singulis competant (§. 346. Log.); quicquid de objecto uno vi notionis communis innotuit , idem quoque ad objectum alterum applicari potest.

E. gr. Additio in Arithmetica & numeratio pecuniæ in vita communi notionem quandam communem habent. In utroque casu sunt diversæ species integrorum , majores componuntur ex minoribus tanquam partibus, & minores reducendæ sunt ad majores continuo, donec in maxima , quæ prodit, subsistatur, seu reductio ad majorem fieri nequit. Quamobrem si has determinaciones consideres tanquam essentielles cujusdam entis , notio communis æquipollebit notioni generis & quæ inde colliguntur in casu uno, ea etiam applicari possunt ad alterum. Quodsi ergo pecuniæ numeratio tibi perspecta fuerit, inde additionis modum colliges (§. 98. 99. Arithm.). Eodem prorsus modo ad subtractionem applicavimus , quæ de erogatione pecuniæ obvia

obvia sunt, sicque regulas subtractionis eruiamus (§. 103. *Arithm.*). In philosophia practica ex notione communi personæ singularis & integræ cujusdam Reip. deducimus officia gentium erga gentes applicando ad gentes integras, quæ de personis singularibus in statu naturali viventibus demonstrata sunt.

§. 472.

Principium reductionis appello artificium, quo objectum aliquod, de quo quid quæritur, reduco ad aliud notionem quandam communem habens, ut ea, quæ de hoc nobis innotuere, vi notionis communis ad illud quoque applicari possint. *Principiū reductionis definitio.*

Principium hoc maximi usus est in omni arte inveniendi, quemadmodum suo tempore clarius ostendemus. Præter exempla modo (not. §. 471.), enumerata plurima occurrunt in Mathesi, nec talia ignota sunt in philosophia nostra. In Elementis Geometriæ circulus reducitur ad polygonum, ut inde colligatur modus investigandi aream ejus (§. 410. *Geom.*); Cylindrus eodem fine ad prisma (§. 541. *Geom.*) & sphaera ad Pyramidem seu corpus ex pyramidibus, quarum vertices in centro coeunt, compositum reducitur (§. 550. *Geom.*). In Algebra trinomium, quadrinomium & polynomium quodcunque reducitur ad binomium, ut per genesin potentiæ binomiæ pateat genesis multinomiæ (§. 101. 102. *Analys.*). Hoc vero reductionis principium ideo in medium adducimus, ut artificii heuristici aliquod proffarer exemplum, sicque luculentius confirmaremus, quæ de principiorum heuristicorum necessitate ac utilitate paulo ante asseruimus (§. 470.). Multa de principii hujus usu inculcanda sunt specialia, cum plures admittat casus a se invicem utiliter distinguendos; sed de his dicendi locus erit in Arte inveniendi.

§. 473.

Ars inveniendi generalis est, quæ circa quodlibet objectum versatur. *Ars vero inveniendi specialis est*, quæ circa determinatum quoddam objectum versatur. *Artis inveniendi generalis & specialis differentia.*

Differentia petitur ab objecto, ut adeo tot sint species artis inveniendi, quot sunt species cognoscibilium. Hinc habemus artem inveniendi Mathematicorum, quæ communiter Algebra, rectius

Analysis appellatur. Hæc enim non versatur nisi circa quantitates, atque adeo nonnisi veritatibus mathematicis inveniendis inservit. Est etiam artis inveniendi species quædam Arithmetica, quæ circa numeros determinatos versatur, atque adeo docet modum inveniendi numeros determinatos ex datis aliis. Datur etiam ars inveniendi specialis, qua veritates morales investigantur: datur alia, quæ physicis veritatibus detegendis destinatur. Ars vero inveniendi generalis eas tradit regulas, quæ in omni veritatum eruendarum genere usum habent, sive ex mathematicæ sint, sive physicæ, sive morales, sive alterius cujuscunque generis. Et si autem nos aliquando artem inveniendi generalem tradituri simus; non tamen prorsus negligemus artes inveniendi speciales, ut appareat quomodo eadem continuo novis regulis locupletari regulæque, quæ in potestate sunt, ad usum transferri possint.

§. 474.

Regula speciales artis inveniendi unde deducantur.

Regulae speciales artis inveniendi specialis ex veritatibus de illo objecto, circa quod ea versatur, erutis deducuntur. Patet hoc a posteriori ex Analysis Mathematicorum, præsertim si nostro more methodo analytica pertractetur. Etenim si quis cum attentione elementa nostra Analyseos tam finitorum, quam infinitorum perlegit; is animadvertet, quomodo vi regularum generalium detegantur theoremata mathematica, quorum ope per easdem regulas regulæ posteriores hujus analyseos eruuntur, & quomodo ope harum regularum denuo investigentur theoremata alia, quæ aliis ulterioribus regulis inveniendis inserviunt. E. gr. ope calculi literalis eruitur compositio quadrati aut, si mavis, ejus genesis, in casu radices binomiæ: ex hac autem genesis eruitur regula pro æquationibus quadraticis affectis ad puras reducendis (§. 261. Arithm. & §. 143. Analys. finit.). In philosophia practica universali damus specimina regularum specialium artis inveniendi ex veritatibus moralibus erutarum. Plura occurrent suo tempore in Arte inveniendi.

§. 475.

Quoniam regulæ speciales artis inveniendi continuo ulte- *Unde arti*
 riores ex veritatibus jam inventis eruuntur (§. 474.); Quo plu- *inveniendi*
 res veritates in aliquo genere scientiarum fuerint repertæ, eo plu- *augmen-*
 res quoque regulæ artis inveniendi speciales inveniri possunt. *tum capias.*

Absonum igitur est arti inveniendi operam navare velle, ante-
 quam veritates jam inventas cognoveris. Neque enim intelliges fa-
 tis regulas, multo minus earundem veritatem perspicies easque dextre
 applicabis, nisi veritates habueris perspectas, quibus regulæ istæ ni-
 tuntur. Crescit adeo ipsa ars inveniendi cum numero veritatum in-
 ventarum. Atque hæc ratio est, cur artem inveniendi ultimo de-
 mum loco tradituri simus, ubi omnem disciplinarum ambitum pro
 instituti nostri ratione emensuri fuerimus. Et probe notari velim, vi-
 vos egregios, qui in veritate latente investiganda strenui sunt, ope
 veritatum inventarum incidere in regulas, quibus ad ultteriores dete-
 gendas utuntur, utut ipsimet defectu attentionis atque acuminis sin-
 gularis, quod hic requiritur, non advertant se esse regularum inve-
 niendi inventores. Acquiescunt in notionibus confusis, quæ in exem-
 plis latent: unde in posterum ad exempla respiciunt eademque imi-
 tantur, quando iisdem regulis opus habent.

§. 476.

Facilitatem observandi rerum similitudines Ingenium ap- *Ingeniū de-*
 pellamus. Ingeniosus vero est, qui ingenio pollet, hoc est, *finis.*
 qui similitudines rerum facile observat.

Datur aliquod acumen in observandis similitudinibus rerum, ne-
 que hoc omnibus idem est. Utile quoque est hanc acuminis speciem
 ab aliis facultatibus animæ distingui. Nullum vero reperio nomen
 quod eidem magis conveniat, quam ingenii, etsi admodum vagus
 sit ejusdem significatus. Neque fixum hunc significatum ab usu lo-
 quendi abhorreere existimo, adeoque sequentem propositionem addi
 consultum judio.

§. 477.

Notio ingenii, quam dedimus, non abhorret ab usu lo- *Ingeniū no-*
 quendi. Constat enim præ ceteris ingeniosos dici Poëtas, Ora- *tio usui lo-*
 tores *quendi con-*
 formis.

tores ac Histriones. Ac Poëtis quidem ob tropicam dicendi rationem id nominis tribuitur. Utuntur allegoriis & metaphoris, quæ in similitudine rerum fundantur. Quare cum inprimis eum ingeniosum judicemus, ubi aptanobis videtur ac inexpectata metaphora vel allegoria, quod similitudo sit clarissima, etsi eam non facile quis per se observaturus fuisset; vel hoc solo argumento patet, ingenium hoc tribui Poëtæ ob facilitatem observandi similitudinem rerum. Ita sæpissime Poëtæ ipsa metri lege adducti genus pro specie ac speciem pro genere per synecdochen ponere coguntur: quod ubi apte fieri solet, ut nulla hinc oriatur in dicendo obscuritas, ingeniosi dici solent. Quoniam itaque ingeniosus hic dicitur, qui in generibus ac speciebus discernendis acutus est, genera autem ac species qui discernit, similitudines rerum observat (§. 233. 234. *Ontol.*); patet denuo ob synecdoches convenientem usum neminem dici posse ingeniosum, nisi qui acumine observandi similitudines rerum pollet. Similiter Oratores dicuntur ingeniosi ob convenientem usum metaphorarum, allegoriarum & similitudinum: unde eodem modo, quo ante, colligitur ita judicantibus non aliam ingenii esse notionem, quam quod ipsum in facilitate rerum similitudines observandi constet. Histrionibus ingenium tribuitur ob dicta & facta, quando ex iisdem elucet aliquod in observandis rerum similitudinibus acumen: quod ubi deficit, dicta & facta vix oblectant vulgum imperitum. De rebus obviis exempla in medium afferri opus non est (§. 666. *Log.*). Ex hactenus dictis abunde patet, dum ingeniosos appellamus alios, ad facilitatem observandi similitudines rerum animum adverti, quamvis distincte vulgo non agnoscat sub aliis peregrinis, quæ una percipiuntur, quasi sepulta (§. 693. *Log.*).

Quamobrem ut constet, quomodo tanta enata fuerit inconstantia loquendi, in ea inquirendum est, quæ cum ingenio necessario connexa sunt atque adeo semper una percipiuntur. Quodsi vero
quis

quis propositionem præsentem ægre admiserit ; is per nos iudicet ingenii significatum , qui definitione nostra continetur (§. 476.) , usui loquendi communi non respondere : non tamen ideo habebit , unde definitionem nostram impugnet. Definitio enim nostra nominalis est , adeoque arbitraria : placet nimirum nobis vocem istam in hoc significato accipere. Sufficit autem significatum esse realem , cum istiusmodi facilitas observandi similitudines rerum detur. Neque in leges styli philosophici impingimus , dum nomini significatum fixum imponimus. Necessesse enim est facilitatem observandi similitudines rerum peculiari nomine distingui : Quodsi vero nomina singula perpendas , quæ de otibus mentis usurpantur , non reperiēs aliam , quæ ad facilitatem prædictam indigitandam adhiberi possit , præterquam ingenium.

§. 478.

Imaginationem vivacem appello , qua phantasmata adeo *Imaginatio clara* producuntur , ut tibi probe conscius sis eorum , quæ in *vivax quavis* eiusdem continentur. *nam dicatur.*

Differunt nimirum phantasmata gradu claritatis : id quod experientia constat , & vis imaginandi major , vel minor est pro gradus istius diversitate in diversis subjectis.

§. 479.

Ingenioso imaginatio vivax est. Ingeniosus enim rerum *Imaginatio ingeniosi* non modo præsentium , verum etiam absentium similitudinem *facile* observat (§. 476.). Quare cum ideæ rerum absentium *qualis sit.* vi imaginationis producantur (§. 92.) , adeoque phantasmata sint (§. 93.) ; hæc inter se , vel ideas sensuales cum his comparans , facile observat , quæ in utrisque eadem sunt (§. 195. *Ontol.*) , consequenter sibi probe conscius est eorum , quæ in phantasmatis continentur. Imaginatione adeo vivace utitur (§. 478.).

Hinc apparet , cur teste *Cicerone* ingenium sumi dicatur pro vi facile fingendi in hominibus , observante *Goclenio* in Lexico. Etenim facultas fingendi in producendis phantasmatis rerum sensu nunquam

perceptorum divisione ac compositione phantasmarum consistit (§. 144.). Quo vivacior igitur imaginatio est, eo quoque facultas fingendi felicior. Quamobrem cum imaginatio vivax cum ingenio necessario conjungatur, atque inde pendeat facilitas fingendi, cujus effectus facilius percipiuntur, quam ingenium; non mirum videri debet, si in notionem ingenii intento imponat, quod cum eo conjunctum facilius percipitur suaeque claritate alterum obscurat.

§. 480.

*Memoria
cur polleat
ingeniosus.*

Qui ingenio, idem & memoria pollet. Qui enim ingenio pollet, facile observat rerum nunc & olim perceptarum similitudines (§. 476.), adeoque rerum olim perceptarum ideas facile reprodūcit & reproductas recognoscit, vi nempe ejus, quod in re nunc percepta idem est cum eo, quod in olim percepta distinguebatur (§. 117.). Memoria igitur pollet (§. 175.).

Apparet ex demonstratione propositionis praesentis felicitatem imaginationis ac memoriae cum ingenio una conjungi. Unde & Cicero apud Goclenium non modo observat, ingenium sumi etiam pro vi memoriae; verum notanter dicit, ingenium vim feliciter ac facile fingendi in hominibus ac vim memoriae continere. Accidit vero hinc ex eadem, qua ante (not. §. 479.), ratione, ut ingenium denotare dicatur vim memoriae; quasi excellentem quandam ejus gradum hac voce indigitassent olim Romani,

§. 481.

Cur inventores ingenio opus habeant.

Inventores ingenio opus habent. Inventores enim utuntur principio reductionis, quo objectum, de quo aliquid quaeritur, reducunt, ad aliud notum, quod notionem communem cum isto habet (§. 472.), adeoque facile discernere debent ea, quae in rebus diversis eadem sunt, consequenter eorundem similitudinem (§. 195. Ontol.). Opus igitur habent facilitate observandi similitudinem rerum, consequenter ingenio (§. 476.).

Hinc

Hinc ingenium aptum efficit hominem ad inveniendum : id quod non modo in eo casu apparet, quo principio reductionis utuntur inventores ; verum etiam in aliis casibus, quemadmodum alias ostendimus. Atque hinc denuo factum est, ut jam veteres animadverterint, ingenium quoque denotare vim inveniendi in hominibus ; atque ideo Cicero affirmit, ingenium continere vim feliciter ac facile inveniendi ac fingendi in hominibus & vim memoriae. Ex hactenus dictis (§. 479. & seqq.) abunde intelligitur, cur in notione distincta ingenii constituenda cespitaverint cum veteres, tum recentiores, quodque nos eruerimus proprium vocis significatum, quem intenderunt, quotquot ad alia cum ingenio necessario connexa, suisque peculiaribus nominibus insignita attentionem suam direxerunt. Ceterum exemplum valde luculentum hic habemus, quo comprobatur difficultas inveniendi notionem distinctam, quando notæ notionem rei formandam ingredientiæ sub aliis peregrinis quasi sepultæ (§. 693. Log.).

§. 482.

Veritates universales inter se connectuntur. Veritates uni- *Veritatum*
versales seu determinatas propositiones universales in discipli- *universali-*
nistales deprehendimus, ut aliæ ex aliis demonstrari possint: ob *um nexus.*
quam rationem scilicet non modo veritates mathematicas per singulas disciplinas diffusas ita ordinamus in Elementis Mathematicos universæ, ut aliæ ex aliis continuo demonstrantur; verum etiam in disciplinis philosophicis easdem ita ordinare studemus. Quatenus vero propositio una inservit demonstrandæ alteri, eatenus ex una intelligitur cur altera vera sit: id quod per se patet, modo ad exempla demonstrationum attendas. Una igitur in se continet rationem, cur altera sit vera (§. 56. Ontol.). Propositiones adeo determinatæ universales connectuntur inter se, quatenus sunt veræ (§. 10. Cosmol.), consequenter veritates universales inter se connectuntur.

Veritatum universalium nexus fundatur in nexu rerum, quem in Cosmologia stabilivimus part. I. sect. I. c. I. quemadmodum veritas logica in veritate rerum transcendentali (§. 499. Ontol.). Et nisi istiusmodi nexus daretur, nec systemata veri nominis condi possent, qualia in Horis subsecivis A. 1729. trim. brum. n. 3. descripsimus. Quamobrem quo

majorem operam eruditi in conscribendis systematis collocaturi sunt, eo clarius quoque nexum veritatum universalium perspicient talemque dari ipso opere convincentur.

§. 483.

*Rationis
definitio-*

*Ratio est facultas nexum veritatum universalium intuen-
endi seu perspicendi.*

Leibnitius in discursu de conformitate rationis ac fidei Theodiceæ præmissio §. 23. rationem definit per catenam veritarum. Catenam sumit in significato improprio, neque aliud per eam intelligit nisi nexum eo sensu acceptum, quem stabilivimus in Cosmologia §. 10. Etsi enim nullibi mentem suam distincte explicaverit; æquitas tamen in interpretando postulat, ut non alio sensu catenæ nomen accipiamus (§. 907. 922. *Log.*). Et cum ex contextu appareat, sermonem ipsi esse de veritate doctrinæ, non facti: quin, veritates universales intelligi debeant dubium non est. Definitio igitur *Leibnitiana* in eo differt a nostra, quod rationem non habeat pro facultate animæ, sed pro objecto, circa quod intellectus versatur. Enimvero cum nemo non fateatur, rationem vulgo sumi pro facultate animæ, minime autem pro objecto cognitionis nostræ; nihilque obstat, quo minus significatum receptum retineamus; ab eo quoque sine urgente necessitate recedendum non esse duximus (§. 142. *Disc. prælim.*).

§. 484.

*Receptus
significatus
vocabuli
rationis
stabilitus.*

*Significatus vocabuli rationis, ut a nobis sumitur, usui lo-
quendi conformis.* Quodsi Sempronius probe perpendit, quænam ex actione aliqua emergere possint emolumenta, quænam inde redundare queant damna, nec actionem edit, qua sibimetipsi nocere potest; ex ratione seu eidem convenienter agere dicitur. In quonam, quæso, hic consistit ratio? Nonne ideo eum rationi convenienter agere dicis, quod perspicit, quænam ex actionibus suis consequuntur, adeoque nexum inter actiones istiusmodi, de quibus jam deliberat, utrum committendæ sint, an omittendæ, & ea, quæ ex iisdem consequuntur, damna, sive emolumenta. Quodsi ergo ratio su-

matur

matur subjective pro facultate mentis ; in præsentī casu utique erit facultas inspicendi nexum veritatum universalium : neque enim de actione in singulari iudicium discursivum ferre licet, nisi beneficio propositionum universalium (§. 374. 388. &c.). Patet igitur significatum vocabuli paulo ante stabilitum (§. 483.) esse usui loquendi conformem (§. 139. Log.).

Idem etiam ostenditur a contrario. Ponamus enim Sempronium edere actionem, quæ in damnum ipsius manifestum tendit. Nemo non affirmabit, eum contra omnem rationem agere. Cur vero, quæso, hoc affirmatur ? Nonne ideo, quod non perpendit damnum ex actione emergens, idque facile prævidendum, consequenter quod non perspicit nexum inter actionem ac inde emergens damnum ? Ratio hic denuo objective sumpta aliud denotare nequit nisi nexum veritatum universalium, qui ratiocinando innotescit, adeoque subjective sumpta denotat facultatem nexum istum perspicendi (§. 150. Log.).

Eodem prorsus modo veritas propositionis præsentis confirmatur, si ad casus alios respicias, in quibus rationis vocabulo utimur a sermone communi non recedentes. Quando enim de eo significato loquimur, quem usus loquendi eidem tribuit, ad communem utique sermonem respiciendum (§. 139. Log.).

§. 485.

Rationi conforme vel consentaneum vocatur, quod cum veritatibus cognitis seu propositionibus universalibus veris connectitur. *Rationi contrarium* est, quod veritatibus universalibus contradicit.

Esti autem quid sit rationi conforme, vel contrarium ; fieri tamē potest, ut nec conformitatem in casu priori, nec contrarietatem in posteriori agnoscamus. Cavendum vero, quod sæpe fieri solet, ne rationi contrariari iudicemus, quod eidem conforme minime agnoscimus. Nec minus cavendum, quod creberrime accidit, ut rationi repugnare creda-

Quid rationi conveniat, quid contrarietur.

credamus, quod eidem conforme demonstrare minime valeamus.

§. 486.

*Quenam
rationi
conformia
sint.*

Quod directe demonstrari potest, rationi conforme est. In demonstratione enim ostensiva sive directa ex notione subjecti colligitur, prædicatum convenire subjecto (§. 549. Log.) & quidem beneficio definitionum, axiomatum & propositionum jam ante demonstratarum, vel a posteriori evictarum (§. 498. Log.). Quoniam itaque per definitiones, axiomata & propositiones ante demonstratas, aut a posteriori evictas intelligitur, propositionem directe demonstratam esse veram (§. 568. 564. Log.); in illis definitionibus, axiomatis ac propositionibus continetur ratio, cur per hæc principia demonstrata propositio sit vera (§. 56. Ontol.), adeoque hæc cum istis connectitur (§. 10. Cosmol.). Enimvero definitiones (§. 252. Log.) & axiomata ceteræque propositiones propositiones universales sunt (§. 551. 552. Log.). Quicquid ergo directe demonstratur, rationi conforme est (§. 485.).

Equidem in Logica nullibi demonstravimus, principia demonstrandi esse propositiones universales. Quod si tamen quis perpendit ea, quæ de demonstratione ostensiva (§. 551. 552. Log.) dicta sunt, & animo recolit, quæ de propositionum universalitate tradita sunt (§. 242. 249. & seqq.); illarum universalitatem facile agnoscit, ut adeo nec opus judicemus idem per modum lemmatis hic demum demonstrari. Si quis tamen scrupulosior fuerit; ei satis facit sequens demonstratio. In ratiociniis, quæ demonstrationem ingrediuntur, propositiones antea stabilitæ sunt majores syllogismorum in prima figura (§. 551. 552. Log.). Sed majores syllogismorum primæ figuræ semper universales sunt (§. 366. Log.). Propositiones igitur, antea stabilitæ, quibus utimur in demonstrando, universales sunt.

§. 487.

*Quenam
rationi
contraria
sint.*

Si ex propositione data colligitur, quod propositioni cuidam veræ contradicit; illa rationi contraria est. Propositio enim, falsa est, ex qua colligitur, quod veræ cuidam contradicit

dicit propositioni (§. 556. *Log.*), consequenter ex aliis veris colligi nequit (§. 537. *Log.*). Quoniam itaque per alias propositiones veras, easque universales (*not.* §. 486.) non intelligitur, cur prædicatum conveniat subiecto; ratio nexus prædicati cum subiecto nulla in aliis propositionibus veris universalibus continetur (§. 56. *Ontol.*), consequenter propositio, de qua nobis jam sermo est, cum aliis propositionibus veris minime connectitur (§. 10. *Cosmol.*). Rationi igitur conformis non est (§. 485.), adeoque eidem contraria (§. *cit.*).

Ex duabus propositionibus hisce intelligitur, quomodo evincatur, esse quid rationi conforme, vel contrarium. Nimirum conformitas cum ratione patet per demonstrationem directam; difformitas per apogogicam, modo in posteriori casu notetur, non assumi propositionem datæ contrariam, ut inde colligatur absurdum, sed ipsam potius, quæ datur, propositionem. Ita patet, veritates omnes geometricas esse rationi conformes, cum ibidem continuo aliæ ex aliis demonstrantur. Cumque nos idem moliamur in philosophia, non aliud docere intendimus, quam quidnam sit rationi consentaneum.

§. 488.

Ratio major ei est, qui plurium veritatum universalium nexum perspicit, quam illi, qui pauciorum nexum perspicit. Ideo enim ratio alteri tribuitur, quod nexum veritatum universalium perspicere valet (§. 483.), adeoque ratio unius differt a ratione alterius, quod unus plurium veritatum universalium nexum perspicere possit, alter pauciorum. Multitudine igitur veritatum, quarum nexus introspicitur, constituuntur gradus rationis (§. 746. *Ontol.*). Quare cum gradus unus altero major sit (§. 751. *Ontol.*) & ob hunc ipsum rei tribuatur magnitudo, cui idem convenit; ratio quoque illius major est, qui plurium veritatum universalium nexum perspicit, quam ejus, qui pauciorum nexum perspicit.

Habemus hinc primum fundamentum graduum rationis, ubi gradus derivantur ab objecto materiali, veritatibus scilicet universalibus

salibus, circa quas versatur ratio. Sed datur præterea aliud graduum fundamentum, de quo notanda est propositio sequens.

§. 489.

Gradus rationis ab objecto formalis pendentes.

Ratio ei major est, qui nexum veritatum universalium inter se in serie longiori continuare valet, quam qui eundem in serie breviori producere valet. Eodem fere modo propositio præfens demonstratur, quo præcedens. Nimirum quia ratio est facultas nexum veritatum universalium introspectiendi (§. 483.), ipso autem facto deprehenditur in connectenda veritate quadam data cum aliis continuo ascendi posse ad alias generaliores, vel etiam descendi posse ad alias specialiores; ratio unius differt quoque a ratione alterius, quod unus nexum veritatum universalium inter se in serie longiori continuare valeat, alter autem non nisi in breviori. Longitudine adeo istius seriei constituuntur gradus rationis (§. 746. *Ontol.*). Quare cum gradus unus altero major sit (§. 751. *Ontol.*) & ob hunc ipsum tribuatur rei, cui gradus iste convenit, magnitudo; ratio quoque illius major est, qui nexum veritatum universalium inter se in serie longiori continuare valet, quam qui eundem in serie breviori producere potest.

Series veritatum inter se connexarum innotescit ex systematis veri nominis. In Elementis Matheseos universæ disciplinas mathematicas inter se connexas dedimus. Quare si quis a prima orditur & non modo in ea continuo progreditur, verum etiam inde gradum ad disciplinas posteriores promovet; is in serie veritatum inter se connexarum continuo descendit. Quod si vero propositionem aliquam in disciplina quacunque assumit ac inde ad principia, quæ in demonstrationem influunt, eodem modo retrogreditur, quo idem in successiva assensus genesi determinanda facere solemus (*not. §. 992. Log.*); in serie veritatum inter se connexarum ascendimus. Veritates quoque philosophicas per singulas disciplinas inter se connectimus, ut inde nascantur scalæ, per quas continuo & ascendere, & descendere licet. Quare ideam quoque seriei veritatum inter se connexarum ex philosophia nostra sibi comparare valet.

§. 490.

Experientia non est ratio. Experientia enim est cognitio eorum, quæ sola attentione ad perceptiones nostras patent (§. 664. Log.), atque singularium (§. 665. Log.). Quoniam itaque vi experientiæ tantummodo cognoscitur, quod aliquid sit, vel fiat, veritatum autem universalium nexus non perspicitur; ex adverso beneficio rationis nexus veritatum universalium perspicitur (§. 483.); experientia ratio non est, sed eidem contradistinguitur.

*Diversitas
rationis ac
experien-
tia.*

Hinc ea, quæ experientia nobis innotescunt, opponimus iis, quæ rationis beneficio cognoscuntur. Neque adeo a ratione commendamus eum, qui multa rerum experientia instructus. In vernaculo imprimis idiomate experientiam a ratione accurate distinguimus, quando nobis de aliorum cognitione sermo est. Ac utile omnino est experientiam a ratione probe distingui, ne, quod frequenter accidit, miremur, cur homines, quibus amplissimus est rationis usus, hæreant in rebus leviculis, quæ nonnisi experientia innotescunt, propterea quod ab experientia ipsorum alienæ sunt.

§. 491.

Quicquid beneficio rationis cognoscimus, a priori cognoscimus. Quicquid enim cognoscimus, vel a priori cognoscimus, vel a posteriori (§. 435.). Enimvero quod a posteriori cognoscimus, experiundo addiscimus (§. 434.). Quare cum experientia non sit ratio (§. 490.); quod a posteriori cognoscitur, rationis beneficio non cognoscitur. Quicquid igitur rationis beneficio cognoscitur, a priori cognosci debet.

*Qualis sit
cognitio, ra-
tionis bene-
ficio acqui-
sita.*

§. 492.

Quoniam itaque a priori cognoscimus, quod ratiocinando nobis innotescit (§. 434.), quæ vero beneficio rationis cognoscimus, a priori cognoscimus (§. 491.); *Quicquid beneficio rationis cognoscimus, ratiocinando cognoscimus.*

*Idem porro
expenditur.*

Hinc & ratiocinia nomen trahunt a ratione, quod per ea rationis usus sese exerat, nec absque iis in homine detur.
(Wolffii Psychologia.)

§. 493.

*Rationis
defectus
unde agno-
scatur.*

Quoniam beneficio rationis non cognoscitur, nisi quod ratiocinando eruitur (§. 492.) ; *Sicui enti deest facultas ratiocinandi, eidem quoque deest ratio.*

Habemus igitur principium, per quod probari potest, utrum ens aliquod habeat usum rationis, an eodem destituatur, immo utrum enti alteri sit ratio, an vero hac facultate prorsus destituatur. Principii hujus multiplex usus non modo in Psychologia rationali, verum etiam in philosophia practica atque Jurisprudentia : id quod ipsa ejusdem applicatione suis locis utiliter facta luculenter admodum constabit.

§. 494.

*Quomodo
beneficio
rationis
quid cogno-
scatur.*

Quicquid beneficio rationis cognoscitur, id ex aliis propositionibus sive judiciis atque definitionibus, quæ antea nobis innotuerè, colligitur. Quicquid enim beneficio rationis cognoscitur, id ratiocinando colligitur (§. 492.). Enimvero dum ratiocinamur, ex definitionibus & judiciis aliis præviis, quemadmodum ex legibus ratiocinandi apparet (§. 374. 384. 388. &c.) colligitur propositio alia. Ergo quicquid beneficio rationis cognoscitur, id ex definitionibus aliisque propositionibus s. judiciis præviis colligitur.

§. 495.

*Rationis pu-
ra ac non
pura diffe-
rentia.*

Ratio pura est, si in ratiocinando non admittimus nisi definitiones ac propositiones a priori cognitæ. Pura non est, si in ratiocinando præterea admittuntur, quæ a posteriori cognoscuntur.

Ratio pura in Arithmetica, Geometria & Algebra. Quodsi dubium moveant quædam axiomata, quæ vi notionum communium a posteriori manifestarum admittuntur ; illud protinus evanescet, ubi ad animum revocaveris in philosophia prima eadem a priori fuisse demonstrata. In Physica ratio minime pura est, cum ibidem ubivis assumantur, quæ de rebus a posteriori innotescunt, quemadmodum & in Astronomia moris est.

§. 496.

Quando ratio pura non est, experientia cum eadem in cognoscendo concurrat. Quando enim ratio pura non est, in ratiocinando admittuntur præter definitiones ac propositiones, quæ a priori innotuerunt, etiam aliæ, quæ a posteriori cognoscuntur (§. 495.). Enimvero quicquid a posteriori cognoscimus, experiundo cognoscimus (§. 434.). Cum ratione igitur hoc in casu experientia in cognoscendo concurrat.

§. 497.

Concursus rationis & experientiæ in cognoscendo *Con-* *Connubium*
nubium rationis & experientiæ dici solet. *rationis ac experientiæ.*

Connubium hoc maximi facio in universa philosophia, cum & ad certitudinem cognitionis plurimum faciat, & progressum in scientiis mirifice javer. Atque ea ratio est, cur in ipsa hac Psychologiæ parte, in qua cognitioni animæ a posteriori studemus, rationem tamen ubivis in subsidium vocemus, quasi de cognitione a priori essemus solliciti. Ac eundem quoque morem in philosophia experimentalis servamus.

§. 498.

Scientia ex ratione; historia ab experientia ortum trahit. Quicquid enim scimus, id demonstrare valemus (§. 594. Log.), adeoque per ratiocinia concatenata ex definitionibus & propositionibus jam antea evictis colligitur (§. 498. Log.), atque ex his intelligitur veritas illius (§. 568 564. Log.), consequenter perspicitur rationem in iisdem contineri, cur illud verum sit (§. 56. Ontol.), & quod cum istis definitionibus atque propositionibus connectatur (§. 10. Cosmol.). Quoniam adeo scientia nexum inter veritates universales manifestat *per demonstrata; ex ratione proficiscitur* (§. 483.).

In historia recensentur ea, quæ sunt atque fiunt, sive in mundo materiali, sive in substantiis immaterialibus (§. 3. Disc. prælim.). Ea, quæ sunt, vel fiunt, tanquam singularia (§. 226. 227. Ontol.), experientiæ debentur (§. 665. Log.). Historia igitur ab experientia ortum trahit.

Qui adeo de scientia sibi comparanda solliciti sunt, illi rationem amplificare student.

§. 499.

*Cognitio
philosophica
quod ratio-
nis sit.*

Cognitio philosophica rationis est. Qui enim cognitione philosophica instructus est, rationem perspicit eorum, quæ sunt, vel sunt (§. 6. *Disc. præl.*), adeoque nexum rerum tam co-existentium, quam sibi mutuo succedentium (§. 10. *Cosmol.*), consequenter propositionum universalium verarum, seu veritatum universalium (§. 505. *Log.*). Est itaque rationis (§. 483.).

Studio igitur philosophiæ veri nominis, hoc est, istiusmodi, qualem nos definimus (§. 29. *Disc. præl.*) & colimus, ratio perficitur, ut hinc philosophiæ eluceat præstantia.

§. 500.

*An error
a ratione
proficiscatur.*

A ratione nullus proficiscitur error. Beneficio rationis enim perspicimus nexum veritatum universalium (§. 483.). Quare cum veritates universales inter se connectantur, quatenus propositio una in se continet rationem, cur altera sit vera (§. 10. *Cosmol.*); beneficio rationis intelligimus, cur propositio aliqua vera potius sit, quam falsa (§. 56. *Ontol.*). Quoniam itaque ratione usus propositionem falsam pro vera habere nequit; a ratione error proficisci minime potest (§. 623.).

Qui adeo rationem acculant tanquam seductricem, quasi nos ad perniciosissimos ac gravissimos errores seduceret; terminum in alio prorsus significatu accipiunt, quam quem eidem supra (§. 483.) non invito usu loquendi (§. 484.) tribuimus. Nunc enim per rationem intelligunt quosdam de rebus naturalibus errores; nunc pravos hominis cupiditates, quibus in malum pronus fertur; nunc nescio quodeunque aliud. Atque hinc clamant, rationem adversari fidei ac virtuti: quod ipsorum iudicium tamdiu verum est, quamdiu ex sua judicant notione usu loquendi minime comprobata! Absit autem, ut idem pro vero habeamus in legitimo termini significatu. Neque etiam ullibi terminus hic in significatu perverso in Scriptura Sacra occurrit, modo versionem a textu authentico distinguas. Sane *Lutherus* in versione Germanica decem vocabula Hebraica & triginta fere

Græca

Græca per vocabulum Βερνunft , quod rationem significat, interpretatur , quæ non esse ejusdem significatus facile quis prævidere valet. Equis enim sibi persuadeat, in lingua Hebraica, quam pauperem esse constar, eandem rem decem diversis nominibus insigniri? Equis sibi persuadeat, Græcos triginta excogitasse vocabula ad rem unam eandemque denotandam? Vocabulum λόγος apud Græcos rationem significat, unde Logicæ nomen est, quam ideo Latine philosophiam rationalem dicimus. Sed hoc nuspiam legitur in malam partem acceptum.

§. 501.

Qui actiones suas secundum experientiam moderantur ; in Quales homines sunt casu simili imitantur olim facta. Patet hoc per experientiam *mines sunt in actionibus suis,* maxime obviam. Homines enim plerique tantum non in omnibus actionibus , immo gravissimis negotiis ; omnes vero homines in aliquibus saltem actionibus experientia magistra utuntur.

Immo facile ostenditur, cur idem fieri debeat. Etenim quid fieri debeat in casu singulari dato , nemo judicare valet, nisi jam cognoverit, quid in istiusmodi casu fieri debeat (§. 361.), nisi inventorem agere jubeatur (§. 461.) , quem casum jam non supponimus. Enimvero quicquid cognoscimus , vel a priori cognoscimus, vel a posteriori (§. 435.): quamobrem quid fieri conveniat in istiusmodi casu, vel ratiocinando nobis innotuit, vel experiundo idem didicimus (§. 434.). Nemo non novit in disciplinis , quæ docentur , non tradi theorias negotiorum maxime communium , immo gravissimorum, & si quæ in iis continentur, paucissimos homines disciplinis vacare. Quoniam itaque destituuntur propositionibus determinatis , juxta quæ judicent in casibus datis ; secundum notiones judicare tenentur, quas a posteriori seu per experientiam acquisiverunt. Vi igitur similitudinis casus præsentis cum alio quodam præterito hunc sibi repræsentant cum eo , quod in eo factum fuerit

(§. 105.) , quodque tum istud factum fuerit sibi conscius sunt (not. §. 173) , atque adeo idem in hoc casu fieri debere iudicant.

Etsi res pervulgata sit, meretur tamen attentionem philosophi. Non igitur tædet in eam inquirere penitus, ut in actionibus nostris satis circumspiciamus.

§. 502.

Qui in actionibus suis sint empirici; quinam rationales.

Homines in actionibus suis dicuntur empirici qui secundum experientiam actiones suas moderantur. In actionibus autem suis rationales dicuntur, qui secundum rationem easdem moderantur.

Ex iis, quæ in demonstratione propositionis præcedentis dicta sunt, apparet, neminem in actionibus suis rationalem esse posse, nisi qui habet animum theoria ex cultum, ut in dato casu propositiones universales, quas in disciplinis didicit, vi ipsemet invenit, ad facta singularia & negotia applicare possit (§. 501.).

§. 503.

Expectatio casuum similium.

Expectationem casuum similium dicimus modum dirigendi actiones per olim facta in casu simili.

Perinde est, si imitemur facta aliena, si propria in casu simili.

§. 504.

Similitudo ejus apparet cum ratione.

Expectatio casuum similium rationi similis videtur. Qui enim casus similes expectant, ut agere possint, actiones suas dirigunt per olim facta in casu simili (§. 503.), imitando scilicet, seu denuo faciendo, quod fecerunt alii, vel ipsemet fecerunt (§. 501.). Id autem ideo fieri, & experimur, & intelligimus, quod eundem eventum in præsentis casu speremus, quem in simili antea experti sumus. Videmur adeo perspicere nexum inter actionem & eventum in casu dato, consequenter expectatio casuum similium rationi similis videtur (§. 483.).

§. 505.

§. 505.

In expectatione casuum similium tertia latet mentis operatio, seu ratiocinium confusum in ea continetur. Etenim ubi pravia experientia didicimus, in quodam casu aliquid fieri posse vel debere; casu eodem recurrente notionis illius meminimus (§. 105. 226.), atque idem jam fieri posse, vel debere judicamus. Perceptio casus praesentis propositioni minori, memoria praeteriti cum facto praeterito majori & iudicium inde enatum conclusioni respondet, ut perinde sit ac si ita argumentaremur: Casus praesens talis est. In casu tali hoc fieri debet. Ergo in praesenti hoc fieri debet. Latet igitur in expectatione casuum similium ratiocinium, utpote explicabile per syllogismum (§. 332. Log.); sed cum mens propositiones singulas non distinguat a se invicem, non nisi confusum (§. 39.).

§. 506.

Quoniam igitur etiam in hoc expectatio casuum similium rationi similis (§. 492. Psychol. & §. 195. Ontol.) ; expectatio casuum similium est id, quod analogum rationis dici solet. *Analogum rationis quid sit.*

Atque ita ad notionem distinctam reduximus analogum rationis veterum, ut adeo appareat, istud admitti posse tanquam principium explicandarum actionum hominis. Quod vero etiam ad brutorum actiones explicandas faciat, in Psychologia rationali ostendemus.

§. 507.

Si casus praesens revera fuerit similis praeterito, non tantummodo ex parte talis deprehendatur; expectatio casuum similium rationi equipollet. Etenim si casus praesens revera similis fuerit praeterito, idemque nunc fit, quod in praeterito fiebat; utrobique determinantis eadem sunt (§. 114. 181. Ontol.). Eadem igitur etiam sunt determinata (§. 192. Ontol.). Quoniam igitur hic determinatum istud est, quod posita in tali

tali casu tali actione , seposito alio quocunque obstaculo extrinseco, consequitur (§. 112. *Ontol.*); quicquid in casu præterito ex actione consecutum fuit, idem etiam in præsentem consequi debet. Quare cum jam perinde sit ac si nexum inter actionem & id, quod inde consequitur, perspiceremus, atque adeo ratione in determinanda actione uteremur (§. 483.); expectatio casuum similium, ubi casus præsens revera similis fuerit præterito, in locum rationis surrogari potest, eidemque adeo æquipollet.

§. 508.

dem ulterius expenditur.

Quoniam itaque similitudo casuum cognoscitur ex identitate circumstantiarum, per quas determinantur (§. 195. *Ontol.*); *Si circumstantias casus præteriti distincte cognoscas; expectatio casuum similium rationi æquipollet.*

Ita distincte singulas circumstantias casus agnoscimus, quando judicamus, aquam ebullire, si aheni cupreo infusum imponatur tripodi eidemque ignis subjiciatur. Notio igitur hæc a posteriori acquisita non minus certo dirigit actiones nostras circa ebullitionem aquæ, ac si beneficio rationis nobis constaret, cur aqua ebullire debeat.

FINIS PARTIS PRIMÆ PSYCHOLOGIÆ EMPIRICÆ.



PSYCHOLOGIÆ
EMPIRICÆ

PARS II.

PSYCHOLOGY

EMPIRICAL

PART II

PSYCHOLOGIÆ EMPIRICÆ

P A R S II.

DE

FACVLTA TE

A P P E T E N D I

IN SPECIE DE COMMERCIO INTER
MENTEM ET CORPUS.

S E C T I O I.

DE FACVLTATIS

APPETENDI PARTE

INFERIORI.

CAPVT I.

De Voluntate ac Tædio, nec non
Notione boni ac mali.

§. 509.

HActenus contemplati sumus facultatem cognoscendi: *Institutum*
progrediendum ulterius est ad facultatem appetendi, *authoris.*
Appetitus nascitur ex cognitione ; non tamen per
saltum. Quamobrem distincte nunc nobis exponen-
dum, quomodo ex notionibus nascatur appetitus. Equidem ad
facultatem appetendi penitus agnoscendam conducunt quoque
notiones certitudinis ac probabilitatis cognitionis humanæ, nec

non opinionis ac erroris , de quibus nondum diximus: quoniam tamen jam alibi de singulis hisce notionibus abunde dictum integris capitibus (§. 564. & seqq. Log.), ut denuo repetantur, quæ ibidem jam dicta sunt , opus non est. Quamobrem iis suppositis tanquam aliunde notis ad progressum a cognitione ad appetitum explicandum nos conferimus dicturi de voluptate ac tædio, notionibusque boni ac mali, propterea quod ex cognitione nascitur primum voluptas, inde porro judicium de bonitate objecti, ac hinc demum resultat appetitus ; in casu autem opposito ex cognitione rei ortum primo trahit tædium , inde porro judicium , quod ea mala sit , tandemque hinc resultat averfatio. Appetitus atque averfationis genesis distincte agnosci meretur , cum hæc cognitio sit fundamentum totius philosophiæ moralis , immo ex hoc fonte limpidio deducatur omnis juris principium.

§. 510.

Perfectionis vera ac apparentis differentia. *Perfectio vera* dicitur, quam rei inesse vi notionis perfectionis demonstrari potest , aut, sit mavis, quæ eidem revera inest. *Perfectio autem apparens* a nobis vocatur, quam per errorem eidem tribuimus. Idem tenendum de imperfectione.

Notionem perfectionis in genere dedimus in philosophia prima (§. 503. Ontol.). Inde notio perfectionis rei cujuscunque in specie ratiocinando colligitur. Et ubi hoc succedit clarissime constat, perfectionem rei revera inesse, ut adeo pragmatica sit definitio prior perfectionis veræ, quam dedimus, ut ut eidem æquipolleat altera. Quoniam vero non omnes notione distincta perfectionis utuntur, quando de perfectione rerum judicium ferunt; præjudicia eidem substituere solent. Unde accidit, ut per errorem judicent perfectum, quod tale non est; præjudicii tamen sui falsitatem non agnoscentes rem perfectam esse sibi persuadent. Qui adeo præjudiciis excecati sunt, iis perfectum videtur, quod tale non est. Atque ita perfectio quædam apparens datur.

§. 511.

Voluptas est intuitus, seu cognitio intuitiva perfectionis cujuscunque, sive veræ, sive apparentis. *Voluptatis definitio.*

Notionem hanc voluptatis distinctam debemus *Cartesio*, quem admodum jam monuimus in *Horis subsecivis* A. 1729. *Trim. ast. num. 1. §. 2.* Diserte enim in epistola ad *Elisabetham* Principem Palatinam: *Tota nostra voluptas*, inquit, *posita est tantum in perfectionis alicujus nostræ conscientia*, ac præterea monet, in æstimanda perfectione homines sæpius confundere quod apparet cum eo, quod est. Quoniam quid intuitive cognoscimus, quatenus ideæ ejus, quam habemus, nobis conscii sumus (§. 286.); apparet *Cartesium* voluptatem deducere a cognitione intuitiva perfectionis. Nimirum qui voluptatem ex re percipit, perfectionem ejus sibi repræsentat quodque hoc faciat sibi conscii est. Dum vero idem monet, homines in æstimanda perfectione sæpius confundere quod apparet cum eo, quod est; haud obscure innuit, voluptatem non minus percipi ex perfectione apparente, quam ex vera, seu hic perinde esse sive judicium ejus, qui rem perfectam esse judicat, verum sit, sive falsum. Maximi momenti est, ut discamus, voluptatem non minus percipi ex perfectione apparente, quam vera, cum in eo situm sit semen omnis mali moralis.

§. 512.

Notio voluptatis, quam dedimus, experientiæ consentanea. *An illa sit experientiæ conformis.* Nemo non novit, nos voluptatem percipere ex imagine, v. gr. uvæ, quam prototypo suo adeo similem deprehendimus, ut idem adesse existimemus. Neque enim hic voluptas percipitur ex objecto, quod repræsentatur, veluti in præsentē casu ex uva, cum gemina voluptate non perfundamur uvas conspicientes, licet earum nobis probe conscii simus judicantes, quod uvæ sint, quas videmus. Neque voluptas inde est, quod ad imaginem propius accedentes agnoscamus, nos minime ex veritate judicasse, dum uvam pictam pro naturali habebamus, cum tædio potius afficiamur, quando certiores reddimur judicium nostrum nos fefellisse. Ideo igitur voluptas oritur, quod similitudinis uvæ pictæ cum natu-

tali nobis conscii sumus & ejus inde convincamur, quod pictam cum naturali confuderimus. Enimvero in similitudine imaginis cum prototypo perfectio ejus consistit. Quamobrem voluptas tota in eo sita est, quod perfectionis imaginis tibi conscius sis, seu, quod perinde est, quod eam intuitive cognoscas. Equidem nemo non fatetur, perfectionem imaginis ex similitudine ejus cum prototypo æstimandam esse: quod si tamen quis probationem desideret, haud difficulter eam damus. Nimirum dum pictor imaginem delineavit, veluti dum in dato casu uvam pinxit, non aliud intendit, quam prototypon, cujus imaginem fecit, veluti uvam, in tabula repræsentare. Quoniam imago prototypo suo simillima supponitur, quæ in imagine distinguuntur eadem sunt cum iis, quæ in prototypo distinguere licet (§. 195. *Ontol.*). Nihil adeo datur in imagine, quod non repræsentet aliquid in prototypo, & nihil datur in prototypo, quod non repræsentetur in imagine. Singula igitur, quæ in imagine distinguuntur, cum sint repræsentamina prototypi & omnia simul repræsentamen totius prototypi; singula imaginis inter se consentiunt atque in hoc consensu, consequenter in similitudine, perfectio imaginis consistit (§. 503. *Ontol.*). Similiter voluptatem percipimus ex eo, quod horologium horas singulas singulasque ejus partes accurate indicet. Enimvero in hoc consistit perfectio horologii, quod eo fine construitur, ut tempus indicet (*not. §. 503. Ontol.*). Voluptas igitur ex horologio percipitur, quatenus nobis conscii sumus perfectionis ejusdem. Architecturæ peritus insigni prorsus voluptate perfunditur, quando contemplatur ædificium juxta regulas architectonicas constructum. Enimvero si in ædificii structura omnia cum regulis Architecturæ consentiunt, ut scilicet inde ratio reddi possit, cur unumquodque eorum tale esse debuerit; ædificium perfectum est. Architecturæ igitur peritus conscius sibi est perfectionis ædificii, quando ex eodem voluptatem percipit. Sunt qui voluptatem per-
cipi-

ciunt ex vita dissoluta, quod ita ex ingenio suo vivant ab arbitrio aliorum prorsus independentes. Tum vero per errorem istam independentiam pro perfectione status habent, atque adeo voluptate perfunduntur, quatenus sibi conscius sunt perfectionis cujusdam apparentis. Absit igitur, ut eos casus, in quibus voluptatem percipiens nullius perfectionis veræ sibi conscius esse potest, notioni voluptatis, quam dedimus, opponamus.

Probe hic notandum est, non necesse esse, ut quis in genere judicet objectum, quod percipit, esse perfectum: sufficit enim perfectionem quandam sive veram, sive apparentem saltem confuse percipi. Ita non opus est, ut judices imaginem prototypo similem esse perfectam; sed sufficit, ut tibi conscius sis similitudinis. Nec opus est ut judices horologium esse perfectum; sed sufficit ut tibi conscius sis, quod tempus accurate indicet. Neque etiam opus est ut quis judicet vitam dissolutam esse perfectam; sed denuo sufficit, ut sibi conscius sit, se agere quod lubet. Judicium enim, quo statuitur, in eo, cujus tibi conscius es, consistere perfectionem rei perceptæ in notionibus confusis involvitur, ut non agnosceatur nisi ab eo qui singulari acumine illas evolvere & ad distinctas revocare valet.

Si perfectio fuerit vera §. 513.

Si perfectio fuerit vera & qui ejusdem sibi conscius est rem *Constantia* esse perfectam demonstrare possit; voluptas constans est, hoc est, voluptatis *unde* semper oritur, quotiescunque illius sibi conscius est. Quod si enim vera fuerit perfectio, eam rei inesse vi notionis perfectionis demonstrari potest (§. 510.) & quoniam hanc demonstrationem dare valet, qui ejusdem sibi conscius est *per hypoth.* in numero perfectionum esse, quod in re percipit, certus est (§. 568. Log.); neque verendum ut ejus unquam mutetur judicium. Quoniam igitur semper judicat istam rem esse in numero perfectionum, quotiescunque eam percipiens attentionem suam in eam dirigit; judicii quippe pristini ac sensus certitudinis memor (§. 117. 213.); voluptas quoque semper oritur, quoties quis sibi conscius perfectionis illius (§. 511.).

Con-

Confirmatur idem a posteriori. Similitudo imaginis est perfectio vera &, qui demonstrare valet, imaginis perfectionem in similitudine consistere, nullo præjudicio se abripi patietur ut sibi persuadeat contrarium. Immo in præsentē casu absque demonstratione per attentionem ad notiones confusas certi evadimus, in similitudine consistere imaginis perfectionem. Enimvero quamprimum percipis similitudinem objecti cum prototypo, voluptate quoque perfunderis, nec unquam accidit contrarium, ut displiceat imago propter similitudinem. Ita qui ex cognitione veritatis voluptatem percipit, vel ex eo, quod veritatem inveniat; is ex eadem voluptatem constanter se percipere experitur, quoties de cognitione veritatis cogitat, vel se jam veritatem antea adhuc latentem vel sibi incognitam eruisse experitur. Quod vero in utroque hoc casu perfectionis veræ sibi sit conscius, alias ostendi in Horis subsecivis A. 1729. Trim. æst. n. I. cum de voluptate ex cognitione veritatis percipienda agerem.

Esti vero ex dictis satis superque appareat, constantem esse voluptatem, quæ percipitur, quando tibi perfectionis veræ fueris conscius, ubi eam certo cognoveris; idem tamen adhuc sequentem in modum ostendere lubet. Qui vi demonstrationis cognovit, v. gr. artem inveniendi esse summam intellectus humani perfectionem, is veritatis convictus semper ita judicabit, quoties de arte inveniendi cogitandi occasio ipsi suppeditatur. Quoniam itaque artis inveniendi sibi inexistentis conscius in omni casu, quo de eadem judicat, tanquam perfectionis intellectus sui; in omni casu ponitur ratio eadem voluptatis (§. 511.). Quamobrem necesse quoque est in omni casu poni voluptatem eandem (§. 189. *Ontol.*). Voluptatem igitur percipit, quotiescunque artem inveniendi in se percipit, consequenter voluptas constans est.

Non puto, fore aliquem, qui propositionem præsentem in perversum sensum trahat inde illaturus, quod probentur, quæ per definitionem manifesta sunt, neque adeo probatione indigent. Etenim ut
volu-

voluptatem percipias, non sufficit ut tibi conscius sis ejus, quod in numero perfectionum est; verum etiam conscius tibi esse debes, quod sit in perfectionum numero. Si enim ignores pertinere hoc, cujus tibi conscius es, ad rei perfectionem; voluptate nulla perfunderis. Quod si per errorem judices idem in numerum imperfectionum referendum esse; tædio prorsus afficietur animus, quemadmodum deinceps patebit. Interest autem nosse, quandonam voluptas constans sit, cum hinc amplissimam deducturi simus in moralibus praxin.

§. 514.

Voluptas vera est, quæ ex vera perfectione oritur: apparens Voluptatis vero, quæ oritur ex apparente. *vera ac apparentis*

Utile est in Moralibus voluptatem veram ab apparente distingui. *parentis differentia.*
Plerique enim hominum in scelera sese præcipites dant, quod apparentem voluptatem cum vera confundunt.

§. 515.

Quoniam voluptas constans est, si perfectio fuerit vera *Voluptas vera qualis.*
& demonstrare possis, quod sit vera (§. 513.), tum vero quodque certius sis voluptatem esse veram (§. 514.); *voluptas vera constans est tum in se spectata, tum respectu subjecti, a quo agnoscitur.*

Nimirum etsi voluptas vera in se constans sit, quatenus nulla datur ratio intrinseca, cur mutetur; ex accidente tamen fieri potest, ut in aliquo subjecto non sit constans, sed mutetur, quatenus is eam non agnoscit, adeoque judicium verum, cujus minime convictus est, in erroneum abire potest, quemadmodum ex sequentibus clarius elucescet.

§. 516.

Quo major fuerit perfectio, vel talis saltem apparet; eo Gradus per- major quoque est voluptas. Ponamus evidentia gratia perfectionis.

ctionem A esse dimidiam perfectionis alterius B: erit B bis A seu $B = 2A$. Ponamus porro ex perfectione A ortum trahere voluptatem C: erit illa perfectio A ratio sufficiens voluptatis C (§. 129. Ontol.). Quoniam itaque posita adhuc alia perfectione A poni debet alia adhuc voluptas C (§. 189. Ontol.); evidens est posita perfectione bis A poni voluptatem bis C,
(Wolffii Psychologia.) Ddd con-

consequenter ex perfectione , quæ est dupla ipsius A , oriri voluptatem duplam ejus , quæ a perfectione A ortum trahit. Est vero perfectio B dupla perfectionis A *per hypothesin*. Ergo ex perfectione B dupla oritur voluptas ejus , quæ ex perfectione A ortum trahit. Quia idem eodem modo patet , si rationem perfectionum quameunque aliam supponas ; in genere patet , voluptatem fore tanto majorem , quo major fuerit voluptas.

Enimvero si voluptas oritur , perinde est siue perfectio fuerit vera, siue apparens (§. 511.), consequenter siue rei perceptæ actu inest, siue tantummodo per errorem eidem tribuatur (§. 510.). Quamobrem si perfectio B saltem appareat dupla perfectionis A , non minus ac in casu veritatis ex illa ortum trahere debet voluptas dupla ejus , quæ ex perfectione A oritur. Quamobrem si perfectio saltem major apparet ; voluptas quoque major esse debet.

Idem confirmatur a posteriori. Majorem ex similitudine imaginis voluptatem percipimus, si major fuerit , quam ubi minor deprehenditur. Major autem similitudo major imaginis perfectio est , quemadmodum ex iis colligitur , quæ de perfectione imaginis supra (§. 512.) demonstrata sunt. Voluptas itaque in hoc casu major est , quia perfectio major est , seu quia majoris perfectionis nobis sumus conscii. Videmus etiam voluptatem imminui , si quis artis peritus ostenderit tantam non esse similitudinem , quanta videbatur. Pars igitur voluptatis debebatur ei , quod tantummodo apparebat , seu per errorem rei tribuebatur. Atque hinc intelligitur , voluptatem quoque esse majorem , si perfectio tantummodo major apparet. Idem eodem modo patet in casibus aliis. Nemo negat , artem inveniendi majorem esse mentis perfectionem quam ab aliis inventa penitus intelligendi. Ecquis vero est qui non propria experientia edoctus fateatur , se majore voluptate perfundi , ubi per propriam meditationem veritatem

laten-

latentem eruit, quam ubi ab aliis inventa evolvens eadem intellecta veritati consentanea deprehendit? Hic igitur denuo major voluptas ex majore perfectione oritur, seu ideo majore fruimur voluptate, quod perfectionis majoris nobis conscii simus. Enimvero si quis videtur sibi invenisse veritatem, v. gr. quadraturam circuli, cum tamen in errorem inciderit, quem examine instituto ipsemet deprehendit; non minore voluptate perfunditur, quam si veritatem, quam quæsierat, actu invenisset. Atque adeo denuo apparet, voluptatem quoque esse majorem, si per errorem majoris perfectionis tibi tantummodo conscius videaris.

Observavit hoc jam *Cartesius* ad ea respiciens, quæ unusquisque in seipso experiri potest, nisi eo destituatur acumine, quod ad distinguenda ea, quorum nobis de nobis in nobis conscii sumus, requiritur. Diserte nimirum proficitur, quamlibet voluptatem ex magnitudine perfectionis eam producentis metiendam esse; homines tamen sapius confundere quod apparet cum eo, quod est: quibus verbis inquit, se ad notitiam horum via experientiæ pervenisse. Neque vero difficultatem facessere debet, quod apparentia ejus, quod non est, gradum voluptatis intendere possit. Voluptas enim non oritur, quod rei, quam percipimus, insit perfectio & quod hanc quoque percipiamus; sed quod ejus tanquam inexistentis nobis conscii simus, adeoque eam inesse judicemus, sit ita quod actus judicandi non distincte appareat, perceptionibus animæ evolutis demum detegendus. Quoniam igitur voluptas ab actu judicandi pendet; actus res judicandi veritatem non semper attingit: illi quoque locus esse debet, sive verum sit judicium, sive falsum. Magni igitur momenti est seriam ad voluptatem, quam ex rebus percipimus, afferre attentionem, ut tempestive rectificentur judicia, si quando ea a vero aberrare contingat, ne error noxius vix animadversus serpat appetitum corrupturus.

S. 517.

Quo certius nobis est, vel videtur judicium de perfectione Gradus rei, eo majorem inde percipimus voluptatem. Voluptas enim alius per-oritur, quatenus perfectionem in re, quam percipimus, in-fectionis.

tuemur, aut intueri nobis videmur (§. 311.), adeoque non quatenus actu inest, sed quatenus eam rei perceptæ inesse judicamus. Quamobrem cum certitudo efficiat, ut agnoscamus judicium esse verum (§. 564. *Log.*), magis quoque nobis conscius sumus quod perfectionem rei intueamur, si certum, quam si minus certum fuerit judicium, consequenter intuitus perfectionis clarior est vel saltem talis videtur. Quamobrem cum major esse debeat voluptas, ubi perfectionem clarius intuemur, quam ubi eam minus clare intuemur, cum in casu posteriori latens aliqua dubitatio impediatur ex parte voluptatis genesis (§. 511.); major utique esse debet voluptas, si certius fuerit, vel apparuerit nobis de perfectione rei judicium.

Idem quoque patet a posteriori. Etenim architectus, qui convictus sibi videtur de veritate regularum architectonicarum, vel etiam actu convictus est, majorem voluptatem percipit ex ædificio, ubi ejus cum regulis architectonicis consensum deprehendit, quam alter, qui ejusdem sibi conscius est, sed regularum architectonicarum veritatem non perspicit eas tantummodo intellectas memoriæ mandavit, ut norit easdem ab architectis observari, minime autem convictus sit eas necessario observari debere. Hinc major voluptas oritur ex eo, quod unius judicium de perfectione ædificii magis certum sit, vel judicanti saltem videatur, quam judicium alterius. Inde etiam est, quod si utriusque judicium fuerit erroneum, alter majorem voluptatem percipiat; alter vero minorem, prouti unus magis sibi persuasus videtur de veritate judicii, quam alter. Atque hic potissimum casus inservit, ubi veritatem propositionis præsentis a posteriori confirmare volueris.

Probe hic considerandum, certitudinem judicii (quod in demonstratione assumsimus) producere claritatem in appercepiendo, ut perinde sit, ac si objectum aliquod majore lumine illustratum intueremur. Constat autem melius videri ac agnosci, quæ clariora sunt, quam quæ obscuriora apparent. Unde & in casu certitudinis
majo-

majoris perfectio magis agnoscitur, quam in casu minoris, consequenter in illo magis tibi conscius es perfectionis, quam in altero.

§. 518.

Tædium est intuitus, seu cognitio intuitiva imperfectionis *Tædi de-*
cujuscunque, sive veræ, sive falsæ. Dicitur etiam Molestia. *fectio.*

Tædium hic sumitur pro opposito voluptatis, propterea quod nullum occurrit vocabulum, quod vi etymologiæ voluptati opponatur, quemadmodum in vernacula Lust & Unlust sibi mutuo opponuntur. Ex eo vero, quod tædium voluptati opponi debeat, ejus definitio ex definitione hujus facile elicitur. Perfectioni enim opponitur imperfectio: Quare cum ex perfectione oriatur voluptas, ex imperfectione eodem modo quod voluptati opponitur oriri debet, quo hoc ex perfectione ortum trahit. Quemadmodum vero in genesi voluptatis non attenditur veritas judicii; ita quoque in genesi tædii ad eam non respicitur. Sufficit te tibi esse cujusdam conscius, quod tuo judicio ad imperfectionem tanquam genus suum refertur.

§. 519.

Notio tædii, quam dedimus, experientie conformis. Po- *Notio tædii*
namus enim hominem, qui imaginibus delectatur iisdemque *experientie*
pretium statuit, videre imaginem prototypo suo prorsus dis- *conformis.*
similem & rudi prorsus Minerva pictam. Quodsi attentionem suam in dissimilitudinem dirigit, non eam amplius percipit voluptatem, quam percepturus fuerat, ubi eam prototypo similem deprehendisset; sed visus quasi adspectu offenditur, ita ut oculos statim avertat, nec precibus alterius ad eam contemplandam adduci se patiatur. Equidem tædium non semper adeo clare percipitur, quemadmodum voluptas, propterea quod a tædio abhorrentes attentionem ad imperfectiones non tam studiose dirigimus, quemadmodum ad perfectiones eandem dirigere solemus, ubi ipsa voluptas stimulo est ad eandem continuandam, cum ex adverso tædium impediat, quo minus eandem conservemus. Quamobrem supposui hominem, qui imaginibus delectatur & easdem in pretio habet, ne quis experimentum capiens contrarium experiri sibi videatur tædium leve

ac vix nascens non advertens. Confirmat idem exemplum Architecti, qui ob voluptatem, quam percipit, a contemplatione ædificii affabre extructi sese abduci nullis persuasionibus patitur nisi necessitati, quod durum telum jure habetur, sit obediendum. Etenim ubi ad ædificium accedit, quod opus artificis venditatur, suamque attentionem in ea dirigit, unde perfectio æstimatur; quamprimum animadvertit regulis architectonicis contraria, tædio correptus oculos ab eodem avertit, nullis precibus adducendus ut in eodem contemplando attentionem suam defigat, addita ratione, quod ægre quasi fiat oculis, ut eos eidem obvertere minime possit. Dum voluptatem ex re quadam percipimus, conscii nobis sumus perfectionis eidem inexistentis (§. 511.), sed simul perfectionis nostræ, quatenus scilicet intellectus perfectionem arguit iudicium de perfectione rei alterius, ut adeo *Cartesius* in definienda voluptate tantummodo rationem habuerit perfectionis ejus, qui voluptatem percipit, seu perfectionis subjectivæ. Ita Architectus de perfectione ædificii judicans conscius sibi est scientiæ architectonicæ, quam possidet & qua destitutus sibi conscius esse minime posset ædificii perfectionis, quod contemplatur. Enimvero dum imperfectionem rei agnoscimus, tantum abest ut cujusdam imperfectionis nostræ simul nobis conscii simus, ut potius nostri intellectus perfectionem inde colligamus, quod illam agnoscere valeamus. Quamobrem in casu primo voluptas ex re quadam percepta intenditur per eam, quæ ex nobismetipsis percipitur; in altero autem tædium ex re percipiendum impeditur per voluptatem, quæ ex nobismetipsis percipitur, ut adeo hic sit quidam quasi conflictus alicujus tædii atque voluptatis, illudque percipiatur, quo unum istorum excedit alterum. Quoniam itaque circumspecta requiritur observatio, ubi tædium ex imperfectione rei perceptum agnoscere volueris; ad eos inprimis casus omnem attentionem converteri consultum est, in quibus nostræ tantummodo imper-

fectio-

fectionis nobis conscii sumus. Nemo non ignorat præcipitantiam in judicando & defectum attentionis in numerum imperfectionum mentis referri, quemadmodum mentis perfectio est non statuere nisi de rebus sufficienter discussis & sufficientem ad istiusmodi discussiones asserre attentionem. Ponamus jam nos errorem committere ex præcipitantia in judicando, vel attentionis defectu atque postea agnoscere, quod errorem commiserimus & qua de causa eundem commiserimus. Nemo non in se tædium deprehendet, immo conscius sibi erit, se ideo tædio affici quod præcipitantiam in judicando non evitaverit, vel quod attentionem suam desiderari passus fuerit. Tædio igitur afficimur, quod nobis conscii sumus imperfectionis cujusdam nostræ. Ponamus vero nobis errorem videri, qui non est, atque ex falso eundem tribuere vel præcipitantia in judicando, vel defectui attentionis; non minus tædium in nobis oriri animadverteremus, quam ubi revera vel ex præcipitantia in judicando, vel defectu attentionis errorem commisimus. Tum vero tantummodo videmur nobis ex præcipitantia judicasse; videtur tantummodo nobis defecisse attentio nostra, consequenter conscii nobis non sumus nisi apparentis cujusdam imperfectionis (§. 510.). Atque hinc apparet, tædio quoque nos affici ob imperfectionem apparentem, ut adeo hic non attendatur discrimen inter judicium verum atque falsum. Sufficienter itaque probatum esse existimamus, notionem tædii, quam stabilivimus (§. 518.), esse experientiæ consentaneam.

Quoniam ex tædio ortum tandem trahit aversatio; maximi momenti est notionem tædii distinctam habere. Dabimus fidem oculatam in philosophia morali, ubi omnem praxin morum ex natura mentis humanæ deducemus sicque deductam experientiæ consentaneum confirmabimus. Ceterum quæ de voluptate annotata sunt (not. §. 512.); ea etiam ad tædium applicanda, scilicet quod sufficiat imperfectionem quandam sive veram, sive apparentem saltem confuse

fuse percipi, nequaquam autem opus esse, ut quis in genere judicet, objectam, quod percipit, esse imperfectam.

§. 520.

*Constantia
tædii.*

Si imperfectio fuerit vera & qui ejusdem sibi conscius est, rem esse imperfectam demonstrare possit; tædium constans est, hoc est, semper oritur, quotiescunque illius sibi conscius est. Quod si enim vera fuerit imperfectio, eam rei inesse vi notionis imperfectionis demonstrari potest (§. 510.) & quoniam hanc demonstrationem dare valet, qui ejusdem sibi conscius est per hypothes. ideo certus est, quod in re percipit ad imperfectionem ejus pertinere (§. 568 Log.), neque adeo verendum est fore, ut ejus mutetur judicium. Cum igitur semper judicet istud ad imperfectionem rei pertinere, quod in eadem percipit, quotiescunque rem percipiens suam in istud attentionem dirigit, judicii quippe pristini ac sensus certitudinis memor (§. 117. 213.); tædium quoque semper oritur, quoties quis sibi conscius est ejus, quod ad rei perceptæ imperfectionem refert, adeoque tædium ipsius constans est.

Idem adhuc alia ratione ostenditur. Qui vi demonstrationis cognovit, quidpiam ad rei cujusdam imperfectionem pertinere; is veritatis convictus (§. 990. Log.) semper ita judicabit, quoties de eo cogitandi occasio datur. Cum igitur in omni casu, quo de eodem judicat, ejus sibi conscius sit tanquam imperfectionis cujusdam rei tribuendæ, in omni casu eadem ponitur tædii ratio (§. 518.). Quoniam itaque necesse est idem quoque in omni casu tædium poni (§. 189. Ontol.); tædium constanter oriri debet, quoties istius sibi conscius est, quod ad rei imperfectionem pertinet.

Confirmatur etiam idem a posteriori. Præcipientia in judicando & defectus attentionis debitæ imperfectio mentis humanæ est, id quod nemo in dubium vocare audet atque ex notione imperfectionis generali (§. 504. Ontol.) haud difficulter ostenditur. Enimvero quamprimum qui id cognovit,

vit,

vit, sibi conscius est se ex præcipitantia judicasse, vel attentionem debitam desiderari passum fuisse; tadium oritur, nec unquam accidet contrarium, nisi quando quis non agnoscit, quanta illa sit naturæ mentis humanæ imperfectio.

Magni momenti est nosse, quandonam tadium constans sit, cum in Moralibus hinc derivetur constantia propositi non committendi mali, immo inde pendeat constans mali odium: quemadmodum suo loco dilucide constabit.

§. 521.

Quo major fuerit imperfectio, cujus tibi conscius es, vel Tadii gravis saltem apparet; eo majus quoque est tadium, quod inde oritur.

Ponamus evidentiam gratia, imperfectionem quandam B esse duplam alterius cujusdam imperfectionis A; dico tadium D, quod ex B provenit, fore duplum tadii C, quod ex A oritur. Quoniam enim ex imperfectione A oritur tadium C *per hypoth.* consequenter tadium C per imperfectionem A determinatur (§. 113. *Ontol.*); posita denuo ista imperfectione A, orietur quoque indetadium C (§. 189. *Ontol.*), adeoque posita imperfectione bis A ponetur tadium bis C. Est vero imperfectio B dupla alterius A *per hypoth.* adeoque B est bis A (§. 142. *Arithm.*): Ergo ex B oriri debet tadium bis C, consequenter quod inde oritur tadium D est duplum tadii C, quod ex A oritur. Quoniam idem eodem modo in quacunque ratione alia imperfectionum ostenditur; evidens est tanto majus ex imperfectione percipi tadium, quanto ipsa major fuerit.

Quoniam vero tadium oritur, quatenus tibi conscius es imperfectionis, atque perinde sit sive judicium tuum fuerit verum, sive falsum, ut tantummodo appareat quod est (§. 518.); majus quoque erit tadium, quod ex imperfectione oritur, si hæc tantummodo major appareat.

Confirmatur idem a posteriori. Ponamus enim duas imagines, quæ prototypo suo dissimiles sunt, offerri artis pictoriæ perito. Ponamus primæ, quæ ostenditur, minorem esse

diffimilitudinem, quam alterius, quæ secundo loco monstratur. Nonne ad conspectum primæ protinus in hæc verba erumper: *Apagesis!* Nihil mihi negotii est cum imagine istiusmodi? Quodsi vero jam altera ostendatur, nonne averfis oculis accelerata voce clamabit: *Apage te!* *Apage te a me cum tua ista imagine!* *Læditur oculus adspectu!* Ex his vero clarissime perspicitur, majorem imperfectionem majus parere tedium, minorem minus, cum major dissimilitudo imaginis major utique imperfectio sit quam minor. Similiter ponamus commissum esse errorem ex præcipitantia in judicando. Tanto major censetur præcipitantia, quo facilius a nobis evitari potuisset. Quando vero judicaveris præcipitantiam istam a te facile evitari potuisse, tedium majus percipies, quam ubi firmiter persuasus fueris eam a te non adeo facile, immo vix ac ne vix quidem evitari potuisse. Quare cum imperfectio major sit præcipitantia major in judicando, quam minor; majus in præsentē casu oritur tedium ex imperfectione majore, seu quod tibi majoris fueris conscius imperfectionis. Quodsi quis tibi ostendit, præcipitantiam in judicando, cujus te rem esse cognoscis, non adeo facile evitari posse, quemadmodum tibi videtur; quamprimum non amplius tanta ea videtur, quam videbatur antea; tedium quoque imminui percipies. Atque hoc ipso probatur, majus tedium oriri etiam ex eo, quod imperfectio, cujus tibi conscius es, major appareat. Abunde igitur veritas propositionis præsentis a posteriori confirmatur.

Cui curæ cordique est, ut, quæ de facultate appetendi docentur, eorum certam ac nulli prorsus dubitationi obnoxiam notitiam sibi comparer; is ad hominum actiones assiduam afferre debet attentionem. Ubi enim theoremata nostra sibi familiaria reddiderit; facile observabit hisce perspicillis munitus, quæ alias attentionem ipsius effugiunt. Merentur autem hæc dogmata ut firmo assensu comprehendantur, quod insignem prorsus in philosophia morali spondeant utilitatem.

§. 522.

Quo certius nobis est, vel videtur iudicium de imperfectione; Uterior eo majus inde tædium percipimus. Quoniam tædium in cognitione intuitiva imperfectionis sive veræ, sive apparentis totum ^{gradus} tædii, consistit (§. 518.), quemadmodum voluptas in cognitione intuitiva perfectionis (§. 511.), consequenter definitiones non nisi in eo differunt, quod in una loco perfectionis ponatur imperfectio; ideo quæ a qualitate iudicii pendent, in utroque casu eadem esse debent. Quamobrem cum a maiore certitudine iudicii de perfectione rei pendeat major gradus voluptatis (§. 517.); major etiam gradus tædii pendere debet a maiore certitudine iudicii de imperfectione, cujus tibi conscius es, vel conscius esse videris.

Quodsi propositionem superiorem de dependentia majoris voluptatis a maiore certitudine iudicii de perfectione rei præsupponere nolueris; propositio præsens eodem prorsus modo demonstrari potest, quo illa ipsa propositio superior demonstrata fuit.

Habemus adeo duplex fundamentum graduum tam voluptatis, quam tædii, scilicet magnitudinem perfectionis, vel imperfectionis, cujus nobis consci sumus, & gradum certitudinis iudicii de ista perfectione, vel imperfectione. Quodsi theoremata ista stilo mathematico efferre libuerit, dicendum erit: 1. Voluptatem esse in ratione composita perfectionum, quarum nobis consci sumus, ac certitudinis iudiciorum de istis perfectionibus: 2. Tædium esse in ratione composita imperfectionum, quarum nobis consci sumus, ac certitudinis iudiciorum de istis imperfectionibus. Unde consequitur: Si eadem fuerit perfectio, vel imperfectio, voluptatem vel tædium esse gradui certitudinis iudicii de perfectione, vel imperfectione proportionalem, & 4. si eadem fuerit iudiciorum de perfectione, vel imperfectione, cujus nobis consci sumus, certitudo; voluptatem, vel tædium esse perfectioni, vel imperfectioni, cujus nobis consci sumus, proportionale. Theoremata hæc ad *Psycheometriam* pertinent, quæ mentis humanæ cognitionem mathematicam tradit & adhuc in desideratis est. In ea autem doceri debet, quomodo magnitudinem perfectionis ac imperfectionis nec non certitudinem iudicii metiri debeamus, adeoque mensura perfectionis ac imperfectionis, item-

que certitudinis iudiciorum constituenda: neque enim theoremata ante ullius usus sunt, quam utraque mensura fuerit inventa. Hæc non alio fine a me adducuntur, quam ut intelligatur, dari etiam mentis humanæ cognitionem mathematicam, atque hinc *Psycheometriam* esse possibilem, atque appareat animam quoque in iis, quæ ad quantitatem spectant, leges mathematicas sequi, veritatibus mathematicis, hoc est, arithmeticis & geometricis cum contingentibus non minus in mente humana, quam in mundo materiali permixtis.

§. 523.

*Voluptatis
ac tædii sim-
plicis &
mixti diffe-
rentia.*

Voluptas simplex est, quæ ex eo oritur, quod unius tantummodo perfectionis tibi conscius es. *Voluptas vero mixta est*, quæ ex eo oritur, quod plurium perfectionum simul tibi conscius es. Similiter *Tædium simplex est*, quod ex eo oritur, quod unius tantummodo imperfectionis tibi conscius es. At *Tædium mixtum est*, quod inde oritur, quod plurium imperfectionum simul tibi conscius es.

Quoniam in Moralibus plurimum interest, ut distincte cognoscamus, unde voluptas oriatur ac tædium, ut præjudicia detegantur virtuti inimica, vitio amica; consultum fuit voluptatem simplicem a mixta & tædium simplex a tædio mixto distingui, ut ope harum definitionum excitemus attentionem, sine qua acumen nullum est ad diversas voluptatis atque tædii rationes seu causas agnoscendas & a se invicem separandas, ne per errorem uni tribuatur, quod a pluribus concurrentibus derivandum.

§. 524.

*Voluptas
mixta
qualis.*

Si plures perfectiones simul confuse percipis, voluptas mixta oritur, quæ instar unius apparet. Si enim plures perfectiones simul confuse percipis, eas a se invicem non distinguis (§. 39.), adeoque non tanquam plurium, consequenter tanquam unius tibi conscius es. Quoniam igitur voluptas in cognitione intuitiva illarum tota consistit (§. 511.), ex singulis quidem perfectionibus ortum trahunt voluptates singulæ, sed quæ in unam confunduntur, atque adeo voluptas mixta oritur (§. 523.), quæ instar unius seu simplicis apparet (§. cit.).

Pater hinc ratio, cur voluptatem mixtam dixerimus, quæ a perfectionibus pluribus simul perceptis ortum trahit. Quemadmodum mixtum oritur ex plurium miscibilium confusione, ut particulae imperceptibiles invicem uniantur & massæ mixtionem ingredientibus massam unam constituent; ita quoque voluptas mixta nascitur ex voluptatum plurium confusione, ut inde oriatur una quædam voluptas. Sicuti autem miscibilia resolvuntur in particulas, quæ invicem unita constituunt corpuscula mixti, & horum unione demum prodit integrum corpus mixti; ita voluptates simplices, quæ in tempore existunt, partes successivas habere intelliguntur, quæ per tempuscula, quibus durant, determinantur, & confusæ ita momentaneæ voluptates exhibent id, quod corpusculis mixti in mixto materiali responderet, atque momentaneis istiusmodi voluptatibus continuo sibi invicem succedentibus nascitur tandem instar entis successivi voluptas mixta integra, quæ toto tempore, quo durat, percipitur. Inest igitur denominationi veritas (§. 252. 253. *Cosmol.*) atque adeo notio voluptatis mixtæ non modo per notionem mixti materialis explicari potest, sed datur etiam notio utrique mixto communis, quam inde abstrahere haud difficulter licet. Ista autem notio communis utilitate sua non destituitur. Ex ea enim apparet, notiones confusas & perceptiones confusas instar mixti alicujus concipi posse: id quod inter principia heuristica Psychologiæ propria referri debet, plurimumque confert ad interiorem mentis humanæ cognitionem, eamque totam quantam pragmaticam ob eximium prorsus in philosophia morali usum.

§. 525.

Si plures imperfectiones simul confuse percipimus; tædium Tedium mixtum oritur, quod instar unius apparet. Probatur propositio mixtum præsens eodem prorsus modo, quo veritatem præcedentis evincimus.

Ex propositione præsenre ac præcedente intelligitur cautione opus esse, si a posteriori confirmare voleris, quæ de magnitudine voluptatis (§. § 16. 517.) ac tædii docuimus (§. § 21. 522.).

§. 526.

Si imperfectio aliqua & perfectio simul clare percipiuntur; tædium & voluptas simul percipiuntur. Etenim si imperfectio & voluptatis co-existentia.

perfectio percipitur clare, tedium oritur (§. 518.): Si vero perfectio clare percipitur, voluptas nascitur (§. 511.). Quoniam vero contradictionem nullam involvit, ut duas simul res percipias, in quarum una imperfectionem, in altera perfectionem intueris (§. 30. *Ontol.*); impossibile igitur non est (§. 79. *Ontol.*), adeoque fieri potest ut imperfectionis alicujus ac perfectionis alicujus tibi simul conscius sis, etsi simul percepta a se invicem non distinguas, adeoque confusa sit simultanea perceptio (§. 39.), consequenter si contingat imperfectionem aliquam & perfectionem simul a te clare percipi, tedium & voluptas simul oriri debent.

Quemadmodum perfectio & imperfectio simul perceptæ confunduntur, ut confusa quædam inde nascatur perceptio; ita quoque tedium ac voluptas confunduntur, ut mixtum quid oriatur. Quod si vero contingat, ut magis tibi conscius sis perfectionis, quam imperfectionis, attentione ad illam magis, quam ad hanc conversa (§. 237.); voluptas quoque pravelebit adversus tedium, ut illa præ hoc percipiat. Nulla in propositione præsentem latet contradictio. Neque enim supponimus nos conscios esse perfectionis ac imperfectionis simul in eodem objecto; sed in objectis diversis.

§. 527.

*Voluptas
prævalens
adversus
tedium &
contra.*

Quoniam perceptiones fortiores obscurant debiliores, ita ut debiliores prorsus non appercipiamus (§. 76. 99.), consequenter debiliorum nobis prorsus non consci sumus (§. 25.); voluptas vero tota in perfectionis cujusdam (§. 511.), tedium in imperfectionis cujusdam cognitione intuitiva seu conscientia consistat (§. 518.): si perceptio imperfectionis claritate sua multum superat perceptionem perfectionis, voluptas præ tedio non percipitur; & vicissim si perceptio perfectionis claritate sua multum superat perceptionem imperfectionis, tedium præ voluptate non percipitur.

Intelligimus hic perceptionem claram, quæ cum apperceptione conjungitur, ut scilicet nobis consci sumus ejus, quod percipimus, atque id agnoscere valeamus. Confirmat autem propositionem præ-

sen-

sentem experientia. Ponamus enim nos intueri imaginem maximam parrem prototypo suo similem, sed in parte dissimilem, simulque conscius esse & similitudinis, & dissimilitudinis. Quod si attentionem magis convertas in similitudinem, quam dissimilitudinem, ut illius multo magis tibi conscius sis quam hujus (§. 237.), voluptatem quoque ita percipies, ut tædii tibi prorsus non sis conscius. Idem obtinet in casu opposito.

§. 528.

Si voluptas plurimum superet tædium, tædium prorsus Obscuratio non appercepitur. Et vicissim si tædium plurimum superet voluptatem, voluptas prorsus non appercepitur. Ponamus voluptatem & tædium simul percipi: cum voluptas pariter ac tædium in eas resolvi possint partes, in quas tempus, quo durant, resolvitur; particulæ voluptatis ac tædii momentaneæ concipi possunt instar corpusculorum mixti (§. 253. *Cosmol.*), consequenter tota voluptas totumque tædium per tractum temporis continuatum tanquam compositum quoddam continuum ex istis corpusculis, seu tanquam mixtum (§. 252. *Cosmol.*). Perceptio igitur voluptatis ac tædii simultanea comparari potest cum visione duorum coloratorum invicem permixtorum, aut cum gustu duorum saporum invicem permixtorum. Enimvero si colorati unius quantitas exigua admodum fuerit; mixtum pro simplici habetur sensuum iudicio. Et similiter si saponi unius quantitas veluti salis aquæ admixti valde exigua fuerit, aut contemnibilis; sapor salis nullus percipitur. Quare nec tædium appercepitur si voluptatem, cui coëxistit, plurimum superet; nec tædium appercepitur si voluptate plurimum superatur.

Idem etiam hac ratione ostenditur. Quoniam voluptas plurimum superat tædium *per hypoth.* ejus quoque tanto magis conscius tibi esse debes, quam tædii, quanto illa hoc major est, consequenter perceptio voluptatis sensationi fortiori, perceptio autem tædii debiliori respondet (§. 74. 75.). Enimvero sensatio fortior obscurat debiliorem, ita ut subinde debiliorem

rem prorsus non appercipiamus (§. 76.) : voluptas igitur fortior obscurare debet tædium, ut subinde tædium prorsus non appercipiamus. Patet idem eodem modo sese habere, si tædium voluptatem superet, ut hæc subinde prorsus non appercipiat, consequenter perinde sit ac si nullam, vel nihil ejus perciperemus.

Confirmatur idem a posteriori. Etenim si dolorem quendam percipimus, ejus sensus quasi extinguitur voluptate quadam maxima, qua perfundimur, attentione nostra conversa tota imperfectionem quandam rei, veluti in veritatem, quam meditando eruimus, ac in eadem diu defixa.

Primum demonstrandi genus neminem offendet qui in Mathefi fuerit versatus, præsertim si problematum physicomechanicorum resolutiones perpenderit : neque enim ignorabit in quantitativis rerum demonstrandis admitti fisiones. Quamobrem cum nobis hic jam sit negotium cum quantitate voluptatis ac tædii ; iisdem fisionibus haud ægre locum conceder. Perpendenda præterea sunt de modo perceptiones confusas instar mixtarum massarum considerandi paulo superius (not. §. 524.) dicta : ita nimirum omnis protinus evanescet difficultas. Quod si vero quis nondum satis exercitatum habuerit animum, ut fisiones in demonstrando admittere recuset ; is voluptatem ac tædium cum sensationibus comparet, quemadmodum in demonstratione altera fecimus. Qui perspicaciores sunt, me non monente animadvertent, obscurationem perceptionis debilioris a fortiori factam, quam quoad sensatiores a posteriori sumimus (§. 76.), eodem modo demonstrari posse, quo reducendo simultaneam tædii ac voluptatis perceptionem ad mixtum, seu massam mixtam, propositionem præsentem demonstravimus.

§. 529.

Prædominium voluptatis, vel tædii.

Voluptas prædominari dicitur, si tanta fuerit, ut tædium, si quod adfuerit, non appercipiat. Et vicissim *Tædium prædominari* dicitur, si tantum fuerit, ut voluptas, si qua adfuerit, non appercipiat. *Prædominium* adeo *voluptatis* consistit in totali obscuratione tædii, & vicissim *Prædominium tædii* consistit in totali obscuratione voluptatis.

Posse

Possè voluptatem pariter ac tædium prædominari, per propositionem præcedentem patet.

§. 530.

Si quis perfectionem aliquam intimius perspicit aut agnoscere sibi videtur, quam alter tamen non agnoscit; ille summa voluptate perfunditur, cum hic ne minimum quidem ejus percipiat. Quoniam enim perfectionem aliquam intimius perspicit, aut eam perspicere sibi videtur *per hypoth.* voluptas videtur magnitudini perfectionis agnitæ (§. 516.) & gradui certitudinis seu persuationis proportionata (§. 517.), adeoque fieri potest, ut summa perfundatur voluptate, scilicet si summæ cujusdam perfectionis sibi certo conscius, aut conscius esse videtur. Enimvero quoniam alter perfectionem vel prorsus non cognoscit, vel saltem tantam non judicat, quantum judicat alter, *per hypoth.* hic vel nulla voluptate perfunditur (§. 511.), vel saltem non tanta, quanta perfunditur alter (§. 516.). Fieri adeo potest, ut unus summa voluptate perfundatur, cum alter ne minimum quidem ejusdem ex eadem re percipiat.

Cur non omnes eandem voluptatem ex re eadem percipiant.

Idem confirmatur a posteriori. Si ædificium aliquod juxta regulas Architecturæ ita fuerit extructum, ut nihil in eo deprehendatur, cujus ex iisdem ratio reddi non possit, architectus peritus ex contemplatione ejusdem summam percipit voluptatem, cum illius ignarus nihil prorsus ejus sentiat. Architectus peritus agnoscit consensum ædificii cum regulis architectonicis, adeoque ejusdem perfectionem & securus de veritate istarum regularum extra omnem dubitationis aleam positum existimat suum de illa judicium. Enimvero architecturæ ignarus regulas istas ignorat, adeoque perfectionis ædificii conscius sibi esse nequit. Ecce igitur tibi duas personas quarum una perfectionem aliquam intimius perspicit, altera vero eandem non agnoscit. Illa perfunditur voluptate summa; hæc ne minima quidem tangitur. Veritas adeo propositionis præsentis experientiæ consentanea. Quod si ad alia respi-

cias exempla eademque acumine conveniente perlustras, inde eodem modo veritatem eandem confirmabis.

Non urgemus, quod architecturae peritus dum perfectionem aedificii intratur sibi simul conscius sit perfectionis architecti, cujus consilio aedificium fuit extractum; immo non urgemus, quod propriae quoque perfectionis sibi conscius sit, dum videt se perfectionem aedificii latentem deprehendere & in apicam productam aestimare posse. Sufficit enim ad confirmandam propositionem praesentem exemplum perfectionis simplicis, praesertim cum non repugnet, perfectionem simplicem agnosci posse majorem composita, immo etiam revera simplex composita major esse queat, neque etiam implicet, ut perfectio simplex superet mixtam.

*Cur artis
periti ex
operibus ar-
tificis vo-
luptatem
percipiant.*

Quoniam artis periti perfectionem operis intimius perspicere eamque metiri valent, cum imperiti nihil ejus cognoscant; *Artis periti ex operibus artificis periti plurimum voluptatis percipiunt, etsi imperiti nullam inde percipiant (§. 530.).*

Corollarii hujus veritas per propositionem praecedentem primo statim intuitu manifesta, cum tanquam species sub suo genere sub eadem contineatur. Quamobrem quoque eam a posteriori confirmaturi selegimus exemplum, quod est corollarii casus specialis.

§. 532.

*Voluptas
ex cogni-
tione ac
inventione
veritatis
percepta.*

Ex distincta rerum cognitione ac imprimis ex inventione veritatis voluptas insignis percipitur. Qui enim res distincte cognoscit, ille ipso opere perspicit, quamnam differentia inter notiones distinctas & confusas, judicia determinata ac indeterminata, ratiocinia denique distincta & confusa intercedat (§. 325. 275.), consequenter perfectionis intellectus sui sibi conscius est, quam ad distinctam rerum cognitionem sufficere experitur, cum tot alii res distincte cognoscere nequeant. Quamobrem ex distincta rerum cognitione voluptatem percipit (§. 511.).

Quilibet, qui veritatem proprio Marte eruere valet, propria experientia didicit, majorem requiri perfectionem intellectus

lectus ad veritatem incognitam proprio Marte eruendam, quam ad eam, quæ ab aliis inventa fuit, cognoscendam. Quamobrem dum veritatis a se inventæ sibi conscius est, perfectionem intellectus sui intuetur. Ex inventione igitur veritatis voluptatem percipit (§. 511.), eamque insignem (§. 516 517.).

Confirmatur idem a posteriori. Neque enim solum hic provocare licet ad domesticam experientiam; verum etiam viri alii egregii idem de se testantur, quod scilicet non magis sinceram voluptatem unquam perceperint, quam ex cognitione, ac inprimis inventione veritatis. Exemplo nobis est de *Tjebirnhausen* in *Medicina Mentis* part. 1. p. 13. Inprimis aurem hic præ cæteris nominandus est *Hieronymus Cardanus*, qui tanti æstimavit voluptatem, quæ ex cognitione veritatis percipitur, cæterisque quibuscunque prætulit, ut, cum jam senex morti proximus esset, juramento confirmaret, nolle sese vitæ suæ partem residuam commutare cum vita juvenis omnium rerum affluentia abundantis, sed illiterati. Constat autem *Cardanum* non in nuda factorum notitia substituisse, sed in rationes quoque eorundem penetrasse, utut ipsi non semper licuerit esse adeo felici, ut in veras incidere.

Plurima sunt, quæ de voluptate ex cognitione veritatis percipienda demonstrari possunt. Enimvero cum de hoc argumento dixerimus in *Heris subsec. A. 1729. Trim. æst. num. 1.* immo in specie ostenderimus *Trim. autumn. num. 1.* quænam voluptas ex cognitione veritatis revelatæ proficiat; non opus est ut hic simus prolixiores.

§. 533.

Si quis ignorat, utrum id, quod in re quadam, vel in Indifferentia percipit, in perfectionum, an vero in imperfectionum numerum referri debeat; nec voluptate ulla, nec tædio inde afficiatur. Quoniam enim ignorat, num id, quod in re quadam, vel in se percipit, in numerum perfectionum referri debeat; nullius perfectionis sibi conscius est. Quare cum voluptas

non oriatur, nisi alicujus perfectionis tibi fueris conscius (§. 511.); nullam inde voluptatem percipere potes. Porro quoniam ignoras, num id, quod in te, vel re quadam alia percipis, in numerum imperfectionum referre debeas; nullam quoque imperfectionem intueris, scilicet ut tibi conscius sis, esse imperfectionem, quam intueris. Quare cum tædium non oriatur, nisi ex intuitiva imperfectionis alicujus cognitione (§. 518.); nullum quoque tædium inde percipere potes. Quamdiu itaque ignoras, utrum id, quod in re quadam vel in te percipis, in perfectionum, an vero in imperfectionum numerum referri debeat, nec voluptate ulla, nec tædio inde afficeris.

Idem confirmatur a posteriori. Si quis enim Architecturæ imperitus fuerit, is ignorat utrum ornatus ædificii in numerum perfectionum, an in numerum imperfectionum sit referendus. Quod si ergo nullo præjudicio captus, nec in necessitate judicandi constitutus ut alicui der locum, judicium suum suspendit; nec tædium aliquod, nec voluptatem ex illo percipit, sed, si qui fuerint, quibus idem placet, fuerint etiam alii, quibus displicet, ipse indifferenti prorsus est animo: sit ita ceteri magna animi commotione pro diverso gradu voluptatis ac tædii inter se disceptent, an ornatus laudari, an reprehendi mereatur.

Status hic indifferentiæ probe notari meretur, cum maximi sit in philosophia morali momenti. Ceterum obtinet is tantummodo respectu objecti cujusdam præsentis: fieri enim potest ut eodem tempore animo præsentia sint objecta alia, unde vel voluptas, vel tædium percipitur.

§. 534.

*Mutatio
voluptatis
ac tædii.*

Si quis demonstrare nequit id, quod in numerum perfectionum, vel imperfectionum refert, in eo genere locum mereri; ejus voluptas, vel tædium mutari potest. Mutatur autem in statum indifferentiæ, ubi ignorantiam suam quis agnoscit: mutatur in oppositum, ubi judicium pristinum in contrarium mutatur. Si

quis

quis enim demonstrare nequit, id, quod in numerum perfectionum, vel imperfectionum refert, in eo genere locum mereri; is certus non est, utrum judicium suum sit verum, an falsum (§. 570. *Log.*), sit ita quod sibi certus videatur. Quoniam igitur fieri potest, ut ignorantiam suam agnoscat; judicium suum in posterum vel suspendet, vel contrarium amplectetur. Quodsi judicium suum posthac suspendit; se ignorare agnoscit, utrum in numerum imperfectionum, vel perfectionum referri debeat, quod antea vel in istum, vel in hunc retulit. Nulla igitur voluptate, vel tædio afficitur, etsi antea vel voluptatem, vel tædium inde percipiebat (§. 533.). Quodsi vero judicium mutat in contrarium, & antea judicavit, in perfectionum numero quid esse; idem nunc in numerum imperfectionum referet. Quare cum in casu priori voluptate perfunderetur (§. 511.), nunc tædio afficietur (§. 518.). Enimvero si antea judicavit in numero imperfectionum quid esse; idem nunc in numerum perfectionum referet. Quare cum in casu priori tædio afficeretur (§. 518.); nunc voluptate perfundetur (§. 511.). Quoniam itaque fieri potest, ut voluptas, quæ ex re quadam percipiebatur, non amplius ex eadem percipiatur, vel ut ejus loco tædium animum occupet, ubi demonstrare nequis esse in genere perfectionum, quod in earundem numerum refert *per demonstrata*; voluptatem in hoc casu mutari posse patet (§. 290. *Ontol.*). Et eodem modo patet, mutari etiam posse tædium, ubi demonstrare non potueris esse in genere imperfectionum, quod in eorundem numerum refert. Enimvero quoniam animus tædio afficitur, qui antea voluptate perfundebatur, ubi in numerum imperfectionum refert quod antea in perfectionum genere esse judicaveras, & vicissim animus voluptate perfunditur, qui antea tædio afficiebatur, ubi in numerum perfectionum refert, quod antea in imperfectionum genere esse judicaveras *per demonstrata*; in casu autem utroque judicium de perfectione rei, vel imperfectione ejusdem

mutentur in contraria (§. 297. *Log.* & §. 511. 518. *Psych.*), sitque etiam tædium voluptati contrarium (§. *cit.*), voluptas, vel tædium in contrarium mutatur, ubi iudicium de perfectione, vel imperfectione in contrarium mutatur. Et quoniam animum nec voluptas, nec tædium amplius occupat, ubi ignorantiam tuam agnoscis de perfectione, vel imperfectione rei iudicaturus *per demonstrata*; patet porro statum voluptatis, vel tædii mutari in statum indifferentiæ, ubi ignorantiam tuam agnoscis iudicaturus de perfectione, vel imperfectione rei, cum antea de alterutra per præcipitantiam statuisses.

Principium hoc faciendum est in praxi morali, cum per id in potestatem nostram redigantur, quæ in eadem non sunt.

§. 535.

*Tædium
quale sit
ens.*

Tædium non in nuda voluptatis privatione consistit, sed positivum quid est. Oritur enim ex intuitiva imperfectionis alicujus cognitione (§. 518.), adeoque non tantummodo abest cognitio intuitiva perfectionis. Quare eum voluptate privemur, quando abest cognitio intuitiva perfectionis (§. 511.); tædium non in nuda privatione voluptatis consistit. Est igitur quid positivum.

Nimirum quæ in sola privatione consistunt, ea tantummodo agnoscunt rationem deficientem: quæ autem rationem positivam habent, quæ positiva ponuntur (§. 118. *Ontol.*); ea & ipsa positivum quid sunt. Atque ideo datur inter voluptatem atque tædium status quidam intermedius, in quo neutri locus est (§. 533.), cum inter positivum & privativum non detur medium, veluti inter lumen & tenebras, inter notitiam & ignorantiam nihil intermedii concipitur. Unde propositio præsens ex principio status intermedii inter voluptatem ac tædium demonstrari poterat. Propositio vero hæc suum iterum habet usum in praxi morali, neque inter steriles nugas referenda, propterea quod terminis ontologicis constet prædicatum, ob præjudicium commune de sterilitate Ontologiæ.

§. 536.

*Quales sint
perceptio-*

Voluptas & tædium ortum trahunt ex perceptione confusa

fusa perfectionis & imperfectionis. Oriuntur enim voluptas ^{nes, in qui-}
ac tædium extemplo, dum perfectionem aliquam, vel im- ^{bus volu-}
perfectionem in re percepta intuemur: id quod unusquisque in ^{ptas ac tæ-}
seipso experitur. Enimvero cum cognitio intuitiva, qualis ^{dium con-}
cum ad voluptatem (§. 511.), tum ad tædium requiritur (§. 518.), ^{stit.}
demum distincta evadit, ubi attentionem nostram successive
promovemus ad ea, quæ ideæ rei insunt (§. 682. *Log.*); tædi-
um ac voluptas distinctam perfectionis ac imperfectionis per-
ceptionem minime præsupponunt.

Idem confirmatur a posteriori. Omnes homines volu-
ptate perfunduntur ac tædio afficiuntur. Plerisque autem ho-
minibus perceptiones nonnisi confusæ sunt, paucis distinctæ.
Necesse igitur est, ut ex confusa perceptione, non ex distincta
ortum trahant voluptas atque tædium. Immo quod
etiam illi, qui res distincte percipiendi facultatem habent, per-
fectionem, vel imperfectionem nonnisi confuse percipiant,
dum voluptate perfunditur, vel tædio afficitur ipsorum ani-
mus; in casibus specialibus patet evidentissime. Nimirum
quando veritatem quandam profundam, quam comprehen-
dere ægre poteramus, multo tandem studio atque labore per-
spicimus penitus: quamprimum nobis conscii sumus nos eam
jam intelligere ac vim demonstrationis percipere, toti volu-
ptate perfundimur. Voluptas hic ex eo est, quod nobis con-
scii sumus perfectionis alicujus intellectus, quatenus is ad ve-
ritates, quæ ægre comprehenduntur, intime perspiciendas
aptus. Quæriti enim cur voluptate perfundamur responde-
mus, hanc esse causam quod multo tandem studio atque la-
bore veritatem ægre comprehendendam comprehenderimus,
consequenter quod nobis conscii sumus, intellectum nostrum
esse ad ea comprehendenda aptum, quæ non facile compre-
hendi possunt. Subinde etiam simul intuemur perfectionem
inventoris perpendentes, quomodo ex assumtis deduxerit quæ-
situm. Quæriti enim cur voluptatem sentiamus responde-
mus,

mus , quod inventor tam apposite ex assumptis deduxerit quaesitum , consequenter quod nobis conscius simus , qua arte inveniendi imbutus fuerit inventor. Enimvero neque intellectus nostri , neque inventoris perfectionem distincte nobis representamus , dum voluptate perfundimur , utraque in idea confusa latet , quam intuemur ; attentione vero ad eandem conversa reflectendo demum distincte agnoscitur. Idem adhuc clarius perspicitur in exemplo architecti , quo jam antea usus sumus in praesente negotio. Dum enim aedificium distincte contemplatur consensum eorum , quæ in eodem observat , cum regulis architectonicis nonnisi confuse percipit , imaginatione regulas representante (§. 117.) & memoria easdem recognoscente (§. 175.). Etenim actus contemplationis junguntur cum actu imaginationis atque memoriæ , sed quatenus simul sunt in unum confunduntur , & perceptionem confusam visus sociam constituunt. Sane unusquisque statim novit , consensum cum regulis nonnisi confuse percipi posse , qui novit regularum numerum & temporis angustias cogitat , quo tota contemplatio absolvitur : fieri enim non posse videt ut per distincta ratiocinia regulæ ad ea , quæ observat , applicentur , vel determinationes ab aedificio abstractæ & ad regulas relatae eadem judicentur , quæ per regulas præcipiuntur.

Quoniam igitur constat perceptionem perfectionis , in qua voluptas consistit , esse confusam ; non opus est , ut exemplis confirmemus , perceptionem quoque imperfectionis , in qua tædium consistit , confusam esse. Neque enim ulla est ratio cur vel leviter suspicemur , perceptionem imperfectionis aliam esse debere , quam perfectionis , ut in illa tædium consistat , quemadmodum in hac voluptas. Si cui tamen volupe fuerit peculiaribus hic uti exemplis , quibus eadem de tædio confirmet , quæ de voluptate evicta sunt ; is cogitet architectum ex aedificii contemplatione tædium percipientem , quod dissen-

sum

sum ædificii cum regulis architectonicis intuetur. Ita enim ad casum dissensus animadversus nulla opera transferet, quæ de casu consensus observari docuimus.

Quoniam cognitio intuitiva perfectionis ac imperfectionis ideis confusis tota absolvitur, in qua voluptas atque tædium consistit; plerique nemini quidem advertunt, quod non percipiant voluptatem, vel tædium, nisi quatenus perfectionis, aut imperfectionis cujusdam sibi conscius sunt, sive ea vera sit, sive apparens, ut adeo vulgo deficiat principium, ex quo de voluptate ac tædio ratiocinentur. Patebit autem in progressu, præsertim in philosophia morali fecunditas notionis *Cartesiana* suis limitibus a nobis circumscriptæ. Etsi enim *Cartesius* de tædio non fuerit locutus, nullo tamen negotio notio voluptatis mutatis mutandis ad tædium extenditur.

§. 537.

Voluptas apparens cum vera confunditur, quia consistit in Voluptatis perceptione perfectionis confusa. Quoniam enim perfectio con-^{apparentis}fuse percipitur *per hyp.* ideo fieri potest ut perfectio appareat, quæ non est, immo quod prorsus in numero imperfectionum ^{et vera confusio.} est. Quamobrem cum voluptas apparens ex perfectione apparente, vera autem voluptas ex vera perfectione oriatur (§. 514.) ; vera voluptas confunditur cum apparente, quia consistit in perceptione perfectionis confusa.

Maximi momenti est propositio præsens, cum plurimum interfit in moralibus nosse, ubinam lateat fomes mali.

§. 538.

Si quis investigat notionem distinctam perfectionis, cujus sibi conscius esse vel videtur ; is voluptatem veram ab apparente distinguit, aut saltem apparenti non fidit. Etenim si quærit notionem distinctam perfectionis, cujus sibi conscius est; perfectionem veram ab apparente distinguit, aut saltem agnoscit, se ignorare, utrum id, cujus sibi conscius est, in numerum perfectionum, an in numerum imperfectionum referri debeat. Quamobrem in casu primo voluptatem apparentem a vera distinguit ; in secundo agnoscit se ignorare, utrum ea vera sit, Quomodo evitetur.

(*VVollsti Psychologia.*) Ggg an

an apparens (§. 514.), adeoque in casu altero veretur, ne tantummodo appareat, quæ non est, consequenter eidem non fedit.

Elucet hinc summa utilitas cognitionis distinctæ perfectionum, tum earum, quæ rebus insunt, tum illarum, quæ in nosmetipsos cadunt.

§. 539.

Doloris definitio.

Dolor est solutio continui in corpore, vel actu facta, vel ex nimia fibrillarum tensione metuenda.

Definimus hic dolorem, quatenus in corpore est, cum communiter vocabulum ita accipiat. In mente vero quomodo percipiat, in Psychologia rationali docebimus.

§. 540.

Significatus vocabuli doloris num usui loquendi conformis.

Significatus, quem vocabulo doloris tribuimus, est usui loquendi conformis. Sentimus enim dolorem, si vulneramur, v. gr. si digito vulnus infligitur. Vulnus, in quo dolorem percipimus, oritur, dum continuum in cute ac fibris musculorum dissecis solvitur. Nihil ergo ibidem, ubi dolor hæret, deprehenditur, quam solutio continui. Quamobrem per dolorem, qui digito vulnerato, vel alii parti corporis vulneratæ inhæret, nihil intelligere possumus, quam solutionem continui. Quodsi dolor quidam percipitur, ubi nec cutis, nec fibræ disruptæ apparent; observationes microscopice docent, fibrillas tenues esse disruptas, & ex aliis phænomenis colligitur, majores, vel cutem esse disruptioni proximas propter nimiam tensionem: etenim non minus cutis, quam fibræ tendi possunt, tensione autem nimia rumpuntur, cum nonnisi determinatum quendam tensionis gradum ferre possint citra disruptionem.

Subinde etiam vocabulum doloris pro opposito voluptatis accipitur, quod nos tædii nomine insignire maluimus, ut evitaretur ambiguitas in loquendo. Et quoniam tædium ingens tristitiæ nomine venit, dolor animi tristitia quoque appellari solet. Sed nostrum est singula a se invicem distinguere, quæ diversa sunt, & vocabulis, quæ quod res agnatas sibi invicem significant vulgo confunduntur,

fixum

fixum atque determinatum tribuere significatum, ut ne desint notiones ad ratiocinandum aptæ.

§. 541.

Dolor tædii species est. Etenim dum pars quædam corporis dolet, vel cutis, vel fibræ rumpuntur, vel saltem ruptioni proxima sunt (§. 539.). Enimvero si fibræ musculorum, vel fibrillæ aliarum partium, veluti filamenta nervorum aut etiam cutis & cuticulæ dirumpuntur, vel dissecantur, partes istæ ad functiones suas ineptæ sunt, immo ad destructionem sui ac subinde corporis totius ob læsam functionem tendunt, nisi denuo continua fiant, in quibus continuitas dissoluta. Quare cum tum illa corporis pars imperfectione aliqua laboret (§. 504. *Ontol.*); dum mens solutionem continui in corpore percipit, imperfectionis cujusdam corporis sibi conscia est. Quoniam ergo in eo consistit tædium, quod imperfectionis cujusdam nobis conscii sumus (§. 518.); dolor quædam tædii species est.

Unde jam apparet ratio, cur dolor cum tædio, seu voluptatis opposito valgo confundatur (*not.* §. 540.). Pater etiam ratio, cur dolorem a tædio distinguamus, cum non conveniat nomen speciei imponi generi, ubi accurate loqui volueris. Nemo igitur reprehendet, quod voce tædii ad genus denotandum transtulimus, cum desit vocabulum commodum ad voluptatis oppositum indigitandum, quale in vernaculo idiomate prostat (*not.* §. 518.).

§. 542.

Id, ex quo voluptatem percipimus, placere nobis dicitur. *Placere &* Ast *displacere* dicitur id, ex quo tædium percipitur. Unde *displacere* oppositum voluptatis, quod tædium appellavimus (§. 518.), *quam di-* etiam *Displacencia* vocari poterat, si posterius hoc nomen magis *cantur.* arrideret.

Placet nobis imago prototypo suo similis, & quæsti cur placeat respondemus, propter similitudinem eam nobis placere. Ast in similitudine perfectio imaginis consistit, & quatenus hujus similitudinis nobis sumus conscii, voluptatem ex imagine percipimus. Placet igitur

tur imago ideo, quod ex eo voluptatem percipiamus. Ex adverso displicet nobis imago prototypo suo dissimilis & quæsi cur displiceat respondemus, propter dissimilitudinem eam nobis displicere. Ast in dissimilitudine imperfectio imaginis consistit, & quatenus hujus dissimilitudinis nobis conscii sumus radium ex imagine percipimus. Displicet igitur imago, quod ex eo radium percipiamus.

§. 543.

*Pulchri &
deformis
definitio.*

Quod placet, dicitur *pulchrum*: quod vero displicet, *deforme*.

Communem esse significatum vocabuli obvia experientia constat. Et quoniam liquet eadem magistra non idem placere omnibus, ideo valuit proverbium: *saum cuique pulchrum*. Vocabulum pulchritudinis generale est, quod varias admodum sub se species comprehendit pro diversitate rerum, quibus pulchritudo tribuitur. Sed commode destituimur vocabulo, quo oppositum pulchritudinis generaliter indigitemus. Quamobrem vocabulum ad idem significandum transferre debuimus, quod significatum restrictiorem habere deberet. Destituimur commodis dictionibus haud raro in Psycho'ogia, quod distinctæ animæ cognitio vulgo non satis in potestate sit. Ceterum ipsa definitio nominalis pulchritudinis huc inservit, ut, in quonam ea consistat, reperiamus.

§. 544.

*Pulchritudo
in quonam
consistat.*

Pulchritudo consistit in perfectione rei, quatenus ea vi illius ad voluptatem in nobis producendam apta. Quodsi enim res pulchra est, nobis placet (§. 543.), adeoque voluptatem in nobis excitat (§. 542.). Quare cum tum demum res voluptatem in nobis producendam apta sit, quando perfectione quadam instruitur (§. 511.); pulchritudo rei consistere nequit, nisi in perfectione ejusdem, quatenus ea vi hujus ad voluptatem in nobis producendam apta est.

E. gr. Imaginem pulchram dicimus ob similitudinem cum suo prototypo, propterea quod hanc percipientes voluptate perfundimur, nobisque ideo placet imago. Pulchritudo igitur imaginis consistit in similitudine ejus cum prototypo, quatenus vi ejusdem ad voluptatem in nobis producendam apta. Quare cum similitudo sit perfectio imaginis & in ejus cognitione intuitiva voluptas consistat, quatenus est perfectio
ejus.

eiusdem (§. 511.); pulchritudo imaginis in perfectione eiusdem consistit, quatenus per eam imago apta est ad voluptatem in nobis producendam. Ex præsentē autem propositione intelligitur, cur pulchritudo tam rebus materialibus, quam immaterialibus tribuatur. Patet quoque per eam pulchritudinem non destitui fundamento firmo, quemadmodum vulgo putatur, nec ab arbitrio hominum eorumque opinione variabili unice pendere.

§. 545.

Hinc definiri potest *Pulchritudo*, quod sit rei aptitudo *Pulchritudinis definitio.* producendi in nobis voluptatem, vel, quod sit observabilitas perfectionis: etenim in hac observabilitate aptitudo ista consistit.

Pone nimirum rei quandam inesse perfectionem, sed quæ a nobis observari non possit. Cum perfectionis huius tibi conscius esse nequeas, utpote tibi imperceptibilis *per hypoth.* nec ideo voluptatem ex re percipies (§. 511.), consequenter nec hoc nomine res ista tibi placebit (§. 542.), adeoque nec pulchram esse iudicabis (§. 543.). Hinc in Architectura pulchritudinem definivimus per perfectionem, quatenus sentitur.

§. 546.

Pulchritudo vera est, quæ ex perfectione vera oritur: *Pulchritudinis vera* *Apparens* autem dicitur, quæ oritur ex apparente.

Nimirum quibus vera pulchritudo convenit, ea quoque pulchra *Et apparentis differentia.* sunt, cum ipsamet apta sint ad voluptatem in nobis producendam. At ea, quibus apparens tantummodo pulchritudo convenit, pulchra tantummodo videntur, sed non sunt: neque enim ipsamet in nobis per se voluptatem producere possunt, sed perdet voluptas ab erronea nostra de eo, quod rei inest, opinione, qua mutata voluptas non amplius producitur, nec pulchrum dicitur amplius, quod ante vocabatur pulchrum. Quando igitur res pulchra tantum apparet, non apta est ad producendam in nobis voluptatem, quod destituatur perfectione observabili.

§. 547.

Deformitas consistit in imperfectione rei, quatenus hæc *Deformitatis* *per illam* apta est ad tædium in nobis producendum. Si enim res de- *in quo consistat.* formis est, nobis displicet (§. 543.), adeoque ex re tædium percipi-

mus (§. 542). Quoniam igitur ex re tadium quoddam percipitur, quatenus nobis imperfectionis cujusdam eidem inexistentis consci sumus (§. 518.); res deformis judicatur, quatenus per imperfectionem eidem inexistentem ad tadium in nobis producendam apta est.

Habemus igitur fundamentum firmum, quo nititur deformitas rei, idque positivum, ut ideo & ipsa quidpiam in re positivi sit. Immo habemus principium demonstrandi rerum deformitatem. Patet etiam cur deformitas non tantum rebus materialibus conveniat, verum etiam immaterialibus tribui possit.

§. 548.

*Deformita-
tis definitio.*

Hinc definiri potest *Deformitas* rei, quod sit aptitudo in nobis tadium producendi, vel, quod sit observabilitas imperfectionis: etenim in hac observabilitate seu perceptibilitate aptitudo ista consistit.

Pone nimirum rei inesse imperfectionem quandam, sed quæ a nobis observari non possit. Cum imperfectionis hujus tibi conscius esse nequeas, utpote tibi imperceptibilis *per hypoth.* nec ideo tadium ex re ista percipies (§. 518.), consequenter nec hoc nomine eadem tibi displicebit (§. 542.), adeoque nec deformem judicabis (§. 543.). Necesse igitur est, ut imperfectionem rei percipiamus, si ejus nobis deformitas constare debet.

§. 549.

*Deformita-
tis vera &
apparentis
differentia.*

Deformitas vera est, quæ ex imperfectione vera oritur: *Apparens* autem dicitur, quæ oritur ex apparente.

Nimirum ea deformia sunt, quibus vera deformitas convenit, cum ipsamet per se apta sint ad tadium in nobis producendum. Ast ea, quibus apparens tantummodo deformitas convenit, deformia tantummodo videntur, non sunt; neque enim ipsamet in nobis per se voluptatem producere possunt, sed eam demum producere valent accedente opinione nostra erronea de eo, quod rei inest, qua mutata, tadium non amplius producitur, nec deforme dicitur amplius, quod antea tale vocabatur. Quando igitur res deformis tantummodo apparet, non apta est ad producendum in nobis tadium, quod imperfectione observabili, seu perceptibili destituatur.

§. 550.

§. 450.

Si quas sensationes ad perfectionem status nostri referimus ; ex iis voluptatem percipimus. Si quas enim sensationes ad perfectionem status nostri referimus, iis præsentibus perfectionis cujusdam nostræ nobis conscii sumus. Quare cum in eo, quod perfectionis cujusdam nostræ nobis conscii sumus, voluptas consistat (§. 511.) ; si quas sensationes ad perfectionem status nostri referimus ; ex iis voluptatem percipimus.

*Quando
sensatio
voluptatem
pariat.*

Idem confirmatur a posteriori. Infantes, dum lacte matris nutriuntur, observant sic tolli famem atque sitim, sensationes molestas, & utraque sedata corpori esse bene. Nascitur hinc notio perfectionis status, quam cum dulcedine lactis conjungunt, ut adeo per notiones confusas ad perfectionem status referre adsuêscant dulcium saporem. Quando igitur pueri facti dulcia comedunt, perfectionis illius status sui sibi conscii voluptatem inde percipiunt (§. 511.). Enimvero ubi successu præjudicium istud infantia tollitur, nec amplius ex esu dulcium tanta percipitur voluptas, quanta a puero percipiebatur. Quodsi vero continuo dulcium esu præjudicium foveatur, nec aliis præjudiciis seu veris judiciis debilitetur ; adulti quoque adhuc ex dulcium esu eam percipiunt voluptatem, qua infantes ac pueri perfundebantur. Qui ad vitæ humanæ perfectionem spectare judicant, quod cibis lautis ac opiparis fruamur ; ex earum usu voluptatem insignem percipiunt : qui vero isto præjudicio non tenentur, parem cum iis non sentiunt voluptatem.

Sensationes adeo non per se voluptatem pariunt, sed quatenus ipsis adhæret de perfectione status opinio. Unde accidit, ut tanta ea in re deprehendatur diversitas in diversis subjectis, nec ex se judicare quis possit alios. Cæterum ista opinio, quæ se sensationibus sociam præbet, successively nascitur : unde est quod plerique ignorant, unde ea sit, cumque idea maxime confusa contineatur, ne eam agnoscant quidem, quando ejusdem sibi conscii sunt. Puto autem talia

italia clariora futura per ea, quæ in Psychologia rationali de natura mentis humanæ a priori demonstraturi sumus. Latet in opinionibus istiusmodi aliquid veri, etsi ipsæ erroneæ sint, ac ideo incautis imponunt.

§. 551.

*Quando
sensationes
tædium
quoddam
pariant.*

Si quas sensationes ad imperfectionem status nostri referimus ; ex iis tædium percipimus. Si quas enim sensationes ad imperfectionem status nostri referimus , iis præsentibus imperfectionis cujusdam nobis conscii sumus. Quare cum tædium in cognitione intuitiva imperfectionis consistat (§. 518.) ; si quas sensationes ad imperfectionem status nostri referimus, ex iis tædium percipimus.

Idem confirmatur a posteriori. Fames ac sitis ad imperfectionem status nostri pertinent. Quare cum utramque percipimus, imperfectionis cujusdam status nostri conscii nobis sumus. Enimvero experientia constat , utramque sensationem esse molestam & nos non minus ex siti, quam fame tædium percipere.

Quæ ad propositionem præcedentem de opinione sensationum focia dicta fuere ; ea etiam ad præsentem transferenda.

§. 552.

*Voluptates
sensuum
quænam
sint.*

Voluptates sensuum , vel etiam delectationes sensuales dicuntur, quæ ex sensationibus ortum trahunt.

Ita Voluptates sensuum sunt , quæ ex sapore , gustu , tactu oriuntur. Nos enim ex sapore, gustu atque tactu non minus, quam ex ceteris sensationibus voluptatem percipere, experientia docemur.

§. 553.

Tædia sensuum quænam sint.

Tædia sensualia , vel etiam tædia sensuum dicuntur, quæ ex sensationibus oriuntur.

Ita tædium percipimus ex fectore, ex sapore quodam amaro, vel austero ; id quod denuo obvia experientia constat.

§. 554.

Boni definitio.

Bonum est , quicquid nos statumque nostrum perficit, seu,

seu, quod perinde est, quicquid nos ac statum nostrum internum & externum perfectiores reddit.

E. gr. Ars inveniendi intellectum nostrum perfectiorem reddit: id quod nemo non sine probatione concedit, suo autem loco ex notione perfectionis demonstraturi sumus (§. 503. *Ontol.*). Dicitur itaque ars inveniendi bona. Similiter sanitas statum corporis nostri internum perfectiorem reddit, seu corporis quædam perfectio est, quod denuo nemo in dubium vocat, nos autem ex eadem perfectionis notione alibi demonstrabimus. Sanitas igitur bona est, ac ideo bona dicitur. Pecunia statum nostrum externum perfectiorem reddit, id quod itidem ex eadem perfectionis notione suo loco ostendimus, etsi facile sine probatione concedatur. Pecunia igitur bona est, ac ideo bona quoque dicitur. Ars inveniendi mentis quædam perfectio est, sanitas corporis, adeoque status internus per eas redditur perfectior, sicuti per nummos externus. Unde liquet, quod perinde sit, sive dicas, nos perfici, sive affirmes, statum nostrum internum perfectiorem reddi.

§. 555.

Quod statum internum, atque nos perficit, *bonum internum* est: quod vero statum externum perficit, dicitur *bonum externum*. *Bonorum interiorum & exteriorum differentia.*

Ita ars inveniendi & sanitas sunt bona interna; pecunia vero bonum externum est (not. §. 554.). Vocabulum status in genere accipitur, quatenus internum & externum tanquam duas species distinctas sub se complectitur in definitione *Boni* in genere (§. 554.). Sunt vero etiam quædam bona interna, quæ non ad statum internum, sed ad essentiam hominis pertinent, veluti ipse intellectus, quem bonum esse, quatenus consideratur tanquam facultas animæ naturalis, nemo non largitur. Atque hinc factum est, ut non modo in communi sermone, verum etiam apud philosophos bonum & perfectum pro synonymis habeantur. Ita omne ens dicitur esse bonum, quod idem est ac perfectum.

§. 556.

Dividuntur Bona in *Bona animi, corporis & fortune, Bona animi*, prout vel ad animam, vel ad corpus, vel ad statum nostrum *corporis & fortune*. *corporis & fortune.*

Ita virtus est bonum animi, quod per eam anima perfectior evadit, quam absque eadem esset. Sanitas est bonum corporis, quod per eam corpus perfectius est, quam absque eadem esset. Opes denique sunt bonum fortunæ, quod per eas status externus perfectior redditur, quam absque iisdem foret.

§. 557.

Boni veri

*& apparentis
differen-
tia.*

Bonum verum est, quod revera nos statumque nostrum perficit. Ast *Bonum apparens* est, quod nos statumque nostrum tantummodo perficere videtur.

Constat hinc quanti intersit, ut perfectionem nostram rite æstimare discamus, ne bona apparentia cum veris confundamus: id quod vulgo ab hominibus fieri solet distincta eorum, quæ ad perfectionem sui pertinent, cognitione destitutis.

§. 558.

*Voluptas
cognitionis
boni socia.*

Si bonum cognoscimus, voluptatem ex eo percipimus. Quoniam enim bonum nos statumque nostrum sive internum, sive externum perficit (§. 554.); si idem cognoscimus, perfectionis cujusdam, quæ in nos cadit, nobis conscii sumus (§. 11.), consequenter voluptatem inde percipere debemus (§. 511.).

Confirmatur idem a posteriori. Ars inveniendi insignis, immo maxima intellectus humani perfectio est. Si quis idem agnoscit, de arte inveniendi non cogitat judicans, quod sit bona, quin voluptate perfundatur animus. Qui novit pecuniam statum nostrum externum reddere perfectiorem; ex pecunia, quam accipit vel sibi esse cogitat, voluptatem percipit. Ast infantes, qui hac notitia destituuntur, nullam ex pecunia voluptatem percipiunt, pomum aut saccharum nummo aureo præferentes.

Nimirum quando bonum cognoscimus, judicare debemus, quod objectum, cujus ideam jam intuemur, sit bonum. Non autem judicamus quod sit bonum, nisi quatenus intuemur perfectionem, quam nobis confert. Solis vocabulis, quæ non satis intellecta memoriæ mandavimus, nihil efficitur. Nascuntur ideæ ac appetitus ex ideis & appeti-

petitibus, non ex vocabulis, quibus significantur, etsi vocabula apta sint ad eas in memoriam nobis revocandas. Hæc probe tenenda sunt, ubi ea experimento in nobis sumto comprobare voluerimus, quæ de ideis & appetitibus ex se invicem nascentibus docentur.

§. 559.

Si bonum, quod cognoscimus, verum est, voluptas ex eo percepta vera est; si vero bonum, quod cognoscimus, apparens est, aut sit. bonum verum nobis tantummodo tale apparet; voluptas ex eo percepta nonnisi apparens est. Etenim si bonum verum est, nos statumque nostrum revera perficit (§ 557.). Quod si ergo bonum verum cognoscimus; veram istam perfectionem nobis repræsentamus (§. 510.), atque adeo bonum verum cognoscentes veræ cujusdam perfectionis nobis conscii sumus. Quæ igitur inde percipitur voluptas (§. 511.), ex vera perfectione oritur, adeoque voluptas hæc quoque vera est (§. 514.).

Quod si bonum fuerit nonnisi apparens, id nos statumque nostrum tantummodo perficere videtur (§. 557.). Quare si bonum apparens cognoscimus, per errorem eidem tribuimus, quod nos statumque nostrum perficiat, cum perfectio habeatur, quæ non est (§. 510.). Quæ igitur inde percipitur voluptas (§. 511.), ex apparente perfectione oritur, adeoque voluptas hæc apparens est (§. 514.).

Quod si bonum fuerit quidem verum, sed nobis nonnisi tale apparet; non agnoscimus, quod nos statumque nostrum vere perficiat; sed dum ita judicamus, pro perfectione tantummodo habemus, quæ non est (§. 557.). Quare cum voluptas ex vero bono percepta non sit vera, quia bonum verum est, sed quia cognoscimus, quod sit bonum verum *per num. 1.* vera non est voluptas, quæ ex eo percipitur. Sed quia voluptas ex bono ideo percepta, quod per errorem inter perfectiones referamus, quæ inter eas locum non habet *per num. 2;*

quæ ex vero bono percipitur voluptas, quatenus nobis tantummodo tale apparet, nonnisi apparens est.

Maximi momenti est propositio præsens in moralibus, ubi in primis probe considerari meretur, quod bonum, quod in se verum est, quoad cognoscentem tamen æquipollere possit apparenti, scilicet quando quis per errorem pro bono habet, quod quidem tale est, sed alia prorsus de causa. Utitur iudicans principio erroneo, non vero, dum ex iis, quæ de re percipit, colligit eam esse bonam.

§. 560.

Boni criterium fallax.

Quoniam voluptas non tantummodo percipitur ex eo, quod bonum est, verum etiam ex eo, quod bonum apparet, immo fieri potest, ut ex vero etiam bono voluptas tantummodo apparens percipiat; ideo *Bonum quid iudicari nequit ex eo, quod voluptatem inde percipiamus.*

Ita nimius vini haustus bonus non est, etsi, qui nimio potui indulgent, voluptatem ex eo percipiant.

§. 561.

Notio erronea boni.

Cum qui sensuum iudicio stant bonum quid ex eo iudicare soleant, quod voluptatem inde percipiant, prouti obvia experientia constat; *Notio boni, quæ vulgo est, erronea.*

Erroneæ huic notioni tribuendum, quod homines in vitia proclives ruant, quodque legem naturæ infestam sibi reputent, quod eadem prohibeantur, quæ bona existimantur. Sed de his plura dicendum in moralibus.

§. 562.

Voluptatis apparentis mutabilitas.

Voluptas apparens mutari potest. Apparente enim voluptate perfunditur animus, quando apparentis cujusdam perfectionis tibi conscius es (§. 514.). Quoniam itaque perfectio apparens per errorem rei tribuitur, cum talis non sit, vel rei, cui tribuitur, non inest (§. 510.); per se patet, quod demonstrare nequeas voluptatem apparentem cum vera confundens esse idem in perfectionum numero, quod pro tali habes, vel rei competere veram quandam perfectionem (§. 507. Log.).

Quare

Quare cum hoc in casu voluptas mutari possit (§. 534.) ; voluptas apparens mutabilis est.

Confirmatur idem experientia. Videmus enim homines ex rebus nonnullis insignem prorsus percipere voluptatem, ex quibus successu temporis nullam prorsus percipiunt. Quodsi vero in rationem inquisiveris, non aliam certe deprehendes, quam quod mutaverint suam de iis sententiam, experientia edocti tales eas non esse, quales videbantur.

Ex hoc fonte voluntatis ac appetitus omnis mutabilitas promanat, ut adeo appareat, quantum intersit voluptatem veram ab apparente distingui: quod quomodo fieri possit, ex superioribus patet (§. 538.).

§. 563.

Si quis ignorantiam suam de perfectione rei agnoscit, quam eidem antea tribuerat ; voluptas apparens evanescit : si vero in ^{Quomodo} numerum imperfectionum refert, quod antea inter perfectiones col- ^{voluptas} locaverat, voluptas apparens in tædium mutatur. Si quis enim ^{mutetur.} agnoscit, se ignorare utrum id in numerum perfectionum, an imperfectionum referri debeat, quod in numerum perfectionum retulerat ; ejus voluptas mutatur in statum indifferentiæ, quod nec voluptate ulla, nec tædio afficitur (§. 534.). Quamobrem si voluptate apparente antea perfusus fuit, quemadmodum hic supponitur ; voluptas apparens evanescit.

Quodsi quis in numerum imperfectionum refert, quod antea inter perfectiones collocaverat ; iudicium ejus mutatur in contrarium, cum voluptas atque tædium sint contraria (§. 297. Log. & §. 511. 518. Psych.), consequenter voluptas in tædium mutatur (§. 533.). Quodsi ergo eo in casu voluptate apparente usus fueris, quemadmodum hic supponitur ; voluptas apparens in tædium mutatur.

Utrumque confirmatur a posteriori iisdem prorsus observationibus, quibus præcedens confirmatur. Etenim in casu

speciali, vel singulari, voluptas ex re quadam percepta nunquam mutatur, nisi vel evanescat, vel in tedium mutetur.

Ceteram propositio præfens maximam utilitatem affert in moralibus, ubi confusio voluptatis veræ cum apparente probe perpendenda, ne in nosmetipsos injuri finis & nubem pro Junone amplectentes in miseriam nos præcipites demus, ubi felicitati inhiamus. Voluptate enim apparente decipiuntur mortales, ne verum rebus pretium statuant, quemadmodum fieri debebat.

§. 564.

Constantia

& inconstantia voluptatis ex eo, quod bonum est vel appareat, percepta.

Voluptas, quæ ex vero bono, quatenus agnoscitur, percipitur, constans est; quæ vero percipitur ex apparente, vel etiam ex vero, quatenus pro apparente perperam habetur, mutabilis. Quicquid enim bonum verum est, id nos statumque nostrum revera perficit (§. 557.). Quodsi ergo ut tale agnoscatur, veram quandam perfectionem intuemur, adeoque voluptas, quæ ex eo oritur (§. 511.), vera est (§. 514.), consequenter constans est (§. 515.).

Quodsi bonum fuerit apparens, nos tantummodo statumque nostrum perficere videtur (§. 557.). Quare si quis idem cognoscit, is tantummodo apparentis cujusdam perfectionis sibi conscius est, consequenter voluptas, qua tunc perfunditur animus ejus (§. 511.), apparens est (§. 514.), adeoque mutabilis (§. 563.).

Quodsi verum bonum visum fuerit apparens, ut idem scilicet pro bono habueris ex eadem ratione, ob quam apparens tale videtur; in præsentē casu, ubi omnia a judicio nostro pendunt, apparenti æquipollet. Quamobrem voluptas ex eo percepta mutabilis esse debet *vi num. 2.*

Quandonam evanescat, quandonam in tedium abeat, ex propositione præcedente intelligitur. Sanitas cum verum bonum sit, voluptas, quæ inde percipitur, constans est. Quotiescunque enim incommoda morborum in aliis perspicimus iisdem opposita commoda sanitatis, quibus frueris, tibi repræsentas; voluptatem ex sanitate percipis. Nunquam autem verendum est fore ut tædio afficiatur animus, propterea quod te sanum intueris. Quodsi qui sunt, qui ex sanitate voluptatem

tem

tem nullam percipiunt, id quidem inde est, quod sanitatis commoda ignorent, neque adeo eandem tanquam perfectionem sibi repræsentent. Cibus, qui bene sapit, sed sanitati corporis nocet, bonum apparens est. Enimvero quæ ex ejus esu percipitur, voluptas intædium degenerat, ubi experimur sanitati corporis noxium.

§. 565.

Quicquid nos statumque nostrum sive internum, sive externum imperfectiores reddit, *Malum quid sit.*

Ignorantia intellectum nostrum imperfectiorem reddit, omnemque mentem, quemadmodum suo loco ex notione imperfectionis (§. 504. *Ontol.*), clarius demonstraturi sumus. Ignorantia igitur mala est. Dolor statum mentis imperfectiorem reddit, adeoque malus est. Morbus corpus nostrum imperfectius reddit, aut, si mavis, statum ejus intrinsicum, atque ideo malus est. Cibus sanitati noxius corporis statum imperfectiorem reddit, atque adeo & ipse malus est. Inimicitia statum nostrum externum imperfectiorem reddit, & propterea mala est.

§. 566.

Quod nos statumque nostrum internum imperfectiores reddit, *Malum internum* est; quod vero statum externum imperfectiorem reddit, *Malum externum* est.

Ita ignorantia est malum internum, quia mentem ejusque statum imperfectiorem reddit: est enim status mentis status internus. Idem judicium de dolore, quatenus ejus nobis conscius sumus, adeoque ejusdem perceptio & apperceptio ad statum mentis spectat. Morbus est malum internum, quia corporis statum imperfectiorem reddit. Inimicitia est malum externum, quod statum nostrum externum imperfectiorem reddat.

§. 567.

Mala animi sunt, quæ ad animam spectant. *Mala corporis* sunt, quæ ad corpus pertinent. *Mala denique fortune* sunt, quæ statum nostrum externum concernunt.

Ignorantia est malum animi; morbus malum corporis; inimicitia malum fortunæ, præsertim si culpa caret, ubi denominationi inest veritas.

§. 569.

§. 568.

*Maliveri
& apparen-
tis differen-
tia.*

Malum verum est, quod revera nos statumque nostrum imperfectiones reddit. *Malum apparens* est, quod nos statumque nostrum tantummodo imperfectiones reddere videtur.

Ita malum verum est ignorantia, ea enim mens humana revera imperfectior redditur, quam foret si eadem destitueretur. Immo & imperfectior est status mentis ob ignorantiam, qua laborat: id quod satis superque experimur, ubi ob ignorantiam vel consilii inopes nescimus, quid sit agendum, etsi in agendi necessitate sumus constituti, vel per errorem inde enatum in damna incidimus. Similiter malum verum est morbus, qui non modo impedimento est, quo minus munitis nostris obeundis vacemus; sed & ipsi vitæ insidiatur corpus integrum destructurus. Enimvero medicamentum ingrati saporis malum apparens est, propterea quod tantummodo statum nostrum imperfectiorem reddere videtur, quatenus ejus sapor nobis molestus est. Quoniam enim sanitati corporis restituendæ inservit, bonum utique est & inter bona externa refertur, quatenus status noster externus perfectior est, quo istiusmodi medicamenti compotes fieri possumus.

§. 569.

*Tadium ex
malo cogni-
to perce-
ptum.*

Si malum cognoscimus, tadium ex eo percipimus. Si enim malum agnoscimus, non modo ejus ideam in nobis excitamus, verum etiam tale esse nobis consilii sumus atque adeo intuitiva mali cognitione instructi sumus (§. 286.). Quare cum malum ex eo agnoscatur, quod nos statumque nostrum imperfectiones reddat (§. 565.); cognitionem intuitivam imperfectionis cujusdam habemus nostræ, consequenter tadio afficimur (§. 518.).

Idem etiam confirmatur a posteriori. Quando v. gr. incommoda ignorantia actu percipimus, sive quod consilii inopes non videamus, quid decernendum sit, ubi in necessitate decernendi sumus constituti; sive quod nobis repræsentemus damna, in quæ vel nosmetipsi, vel alii ob ignorantiam incidimus; ignorantiam nobis tanquam malum repræsentamus (§. 565.).

(§. 565.). Equis vero est, qui non percipiat tædia in hoc statu ab ignorantia suboriri solita? Similiter qui ægroto præsens incommoda morbi perspexit, quibus affligitur, atque eadem ad statum suum referens sibi repræsentat damna, quibus obnoxius foret, si morbo istiusmodi laboraret; is morbum sibi repræsentat tanquam malum. Dum vero ea, quæ sibi repræsentat, intuetur, tædium ex morbo percipit. Atque adeo denuo patet, quod tædium percipiat ex malo quod idem agnoscat, seu intuitive cognoscat.

Non necesse est ut cognitio nostra vera sit; sed valet propositio etiam in eo casu, ubi erronea, ita ut nobis videatur malum, quod non est, quemadmodum in propositione sequente ostenditur.

§. 570.

Si malum agnoscere nobis videmur, tædium ex eo percipitur. Si enim malum agnoscere nobis videmur, non modo rem tanquam malam nobis repræsentamus, verum etiam huius de eadem iudicii conscii nobis sumus, atque adeo cognitione mali, utut apparentis, intuitiva instructi sumus (§. 286.). Quamobrem cum malum ex eo appareat, quod nos statumque nostrum tantummodo imperfectiores reddere videtur (§. 568.); cognitionem intuitivam imperfectionis cujusdam nostræ apparentis habemus, consequenter tædio afficimur (§. 518.).

Idem etiam confirmatur a posteriori. Quando quis videt ab hominibus in dignitate quidem constitutis, sed iis tamen improbis famam suam calumniis proscindi, quod scientia ceteris præstat; scientiam tanquam illius opprobrii, quo afficitur, causam sibi repræsentans, eadem statum suum imperfectiorem reddi existimat. Tædium vero tum percipit ex eo, quod scientia animum imbuerit, immo sapius impatiens scientiæ indignatur. Quodsi tamen ad se redit animus, ex scientia voluptatem percipit, ex calumniis tædium: sed tum

agnoscit, scientia mentem effici perfectiorem, calumniandi habitum autem deformare mentem calumniatorum.

Nimirum quando malum agnoscimus, vel agnoscere nobis videmur, judicare debemus, quod objectum, cujus ideam jam intuemur, sit malum. Non autem judicamus, quod sit malum, nisi quatenus inruemur imperfectionem, quam nobis confert. Solis vocabulis, quæ non satis intellecta memoriæ mandavimus, nihil efficitur. Monuimus idem jam superius (not. §. 558.), in casu simili: ob insignem tamen, quam præstat, utilitatem, monitum hoc denuo inculcandum erat.

§. 571.

Tædii mutabilitas.

Tædium, quod ex vero malo, quatenus agnoscitur, percipitur, constans est: quod vero percipitur ex apparente, vel etiam ex vero, quatenus pro apparente perperam habetur, mutabile. Quodsi enim malum fuerit verum, statum nostrum revera imperfectiorem reddit (§. 568.). Quare cum idem a nobis agnoscatur *per hypoth.* quod id statum nostrum imperfectiorem reddat certi sumus (§. 564. *Log.*). Quoniam itaque sensus certitudinis adhæret iudicio nostro, quoties idem recurrit (§. 117.), cur idem mutetur ratio nulla subest, adeoque mutari nequit (§. 70. *Ontol.*). Quare cum semper judicemus, malum esse, quod tale agnoscimus; quoties de eo cogitamus, imperfectionis cujusdam nostræ nobis conscius sumus, adeoque tædium semper oritur (§. 518.), consequenter constans est.

Enimvero si malum tantummodo fuerit apparens, nos statumque nostrum tantummodo imperfectiorem reddere videtur, revera autem non reddit (§. 568.). Quoniam itaque iudicium falsum pro vero habet (§. 505. 506. *Log.*), adeoque errat (§. 623. *Log.*); fieri potest ut errorem suum agnoscat, consequenter ut malum non amplius judicet, quod judicaverat (§. 623. 506. *Log.*). Quoniam itaque de eo, quod malum judicaverat, cogitans nullius amplius imperfectionis sibi consci-

us est (§. 565.); nullum quoque tædium inde amplius oriri potest (§. 518.).

Ponamus jam porro malum quidem revera esse, quod pro tali habetur, sed ex ratione, quæ fallit, pro tali haberi: evidens est respectu cognoscentis idem malo apparenti æquipollere. Quare cum res tota redeat ad iudicium cognoscentis, quoties cum tædio nobis negotium est (§. 518.); quæ de mutabilitate tædii ex malo apparente orti demonstrata sunt, adhuc subsistunt. Quamobrem tædium quoque, quod ex malo vero percipitur, quatenus pro apparente habetur, mutabile.

§. 572.

Quoniam tædium non modo percipitur ex eo, quod malum agnoscamus (§. 569.), verum etiam ex eo, quod idem agnoscere nobis videamur (§. 570.); *malum quid judicari nequit ex eo, quod tædium inde percipiamus.* *Malicritium fallax.*

Ita scientia mala non est, etsi, qui ob eam calumniis proscinditur atque opprobriis afficitur ab idiotis invidis, eam malam judicet, quamdiu in agnoscendo malo acumen suum desiderari patitur in notionibus confusis non separans a notione scientiæ, quæ ad eam minime pertinent. Habere autem hæc propositio amplissimum in moralibus usum, quemadmodum suo loco abunde constabit, ubi praxin moralem tradituri sumus.

§. 573.

Notio mali, quæ vulgo est, erronea est. Vulgus enim malum quid judicat ex eo, quod tædium inde percipiamus. Enimvero malum quid ex eo judicari nequit, quod tædium inde percipiamus (§. 572.). *Notio igitur mali, quæ vulgo est, falsa (§. 506. Log.), adeoque erronea est (§. 623. Log.).* *Notio erronea mali.*

Notio deceptrix mali omnis pravitatis fomes: quamobrem plurimum interest, ut eam rectificemus, ne bonum pro malo reputemus. Ipsa autem experientia abunde confirmat, quantum fallantur homines juxta istam notionem mala dijudicantes. Erroneæ huic

notioni tribuendum, quod homines a virtute abhorreant & lege naturali nescio quod onus sibi imponi existiment, quod talia eadem præcipiantur, quæ ipsorum iudicio vitam tædiis plenam efficiunt. Sed de his plura dicenda erunt suo loco in moralibus. Quæ enim de facultate appetendi traduntur, ea sunt genuina ac proxima totius philosophiæ moralis principia, quemadmodum suo loco luculenter constabit.

§. 574.

*Quid per se
sequatur ex
altero.*

Ex A per se sequitur B, si in A ratio sufficiens continetur, cur inde sequatur B.

Ita ex vulnere cordi inflicto per se sequitur mors, quoniam per id intelligitur, cur inde mors sequatur, consequenter ratio sufficiens in eodem continetur, cur inde sequatur (§. 56. *Ontol.*). Atque ideo vulnus cordi inflictum dicitur per se lethale. Ita in eo, quod triangulum tria habet latera, continetur ratio sufficiens, cur etiam tres, non plures, nec pauciores habere debeat angulos. Ergo ex eo, quod triangulum tria latera habet, per se sequitur, quod etiam tres angulos habere debeat.

§. 575.

*Per accidens
quid sequatur.*

Ex A per accidens sequitur B, si in A non continetur ratio sufficiens, cur inde sequatur B, sed potius in alio, quod eidem aliunde superaccedit, non tamen necessario.

Ita ex vulnere manui inflicto per se non sequitur mors; sequi tamen potest per accidens, quatenus e. gr. propter absentiam chirurgi nimia sanguinis copia ex vena dissecta profluit, vel culpa chirurgi aut ægroti sphacelus supervenit. Unde in hoc casu vulnus dicitur lethale per accidens.

§. 576.

*Ex malo
apparente
quomodo
tædium
sequatur.*

Ex malo apparente non per se, sed tantummodo per accidens sequitur tædium. Si enim malum tantummodo apparet, non verum; nos statumque nostrum imperfectiores minime reddit (§. 566.), adeoque fieri nequit ut, dum idem intueris, veræ cujusdam imperfectionis tibi conscius sis. Quamobrem

obrem cum tædium ex idea rei ideo sequatur, quia eidem idea imperfectionis cujusdam adhæret (§. 518.); in idea mali apparentis ratio sufficiens non continetur, cur inde tædium sequatur (§. 56. *Ontol.*), consequenter tædium inde per se sequi nequit (§. 574.).

Quoniam tamen malum apparens nos statumque nostrum tantummodo imperfectiones reddere videtur (§. 568.), idea rei quidpiam superaccedere debet, ob quod vel nos imperfectiones, vel statum nostrum imperfectionem reddere videtur. Quamobrem cum propterea nobis imperfectionis cujusdam conscii simus, in quo totum tædium nostrum consistit (§. 518.); ratio cur ex malo apparente sequatur tædium, non in ipso, sed in alio potius continetur, quod eidem aliunde superaccedit, consequenter ex malo apparente tantummodo per accidens sequitur tædium (§. 575.).

Idem confirmatur a posteriori. Medicamentum saporis ingrati malum apparens est. Qui vero ex eodem tædium percipiunt, non sibi repræsentant virtutem ejusdem, quam in morbo fugando ac sanitate amissa restituenda exerit; sed nescio quæ damna cogitant, quæ sapore ingrato corpori infert. Non igitur in ipsa medicamenti idea continetur ratio sufficiens tædii (§. 56. *Ontol.*); sed in iis potius, quæ per errorem eidem attribuuntur, in diversis subjectis diversa, adeoque hic distincte non recensenda. Tædium itaque ex medicamento saporis ingrati non nisi per accidens sequitur (§. 575.). Hinc videas alios, quibus sapor medicamenti non minus molestus, absque ullo tædio eodem uti, immo non sine voluptate, ubi sibi virtutem ejusdem idea confusa repræsentant (§. 536.).

Ut igitur a malo apparente nobis caveamus, acute distinguere debemus quidnam rei superaccedat, unde tædium emanat.

§. 577.

Ex bono vero per se nunquam sequi potest tædium. Et per se ex bono enim bonum verum aut agnoscitur, aut non agnoscitur. Po-
no vero un-
namus quam se-
quatur.

namus bonum verum agnoscere : voluptatem igitur ex eo percipimus (§. 558.), eamque veram (§. 559.) atque constantem (§. 564.). Quamobrem fieri nequit ut tedium inde unquam sequatur, cum alias constans minime esset, sed mutabilis (§. 290. *Ontol.*), consequenter per se tedium inde sequi impossibile (§. 574. *Pfych.* & §. 118. *Ontol.*).

Idem etiam hoc modo ostenditur. Bonum verum nos statumque nostrum revera perficit (§. 557.), adeoque si idem cognoscimus, perfectionis cujusdam nostræ semper nobis consci sumus, consequenter ratio sufficiens voluptatis ponitur, non tædii (§. 511. 518. *Pfych.* & §. 56. *Ontol.*). Quoniam itaque in notione boni nulla continetur ratio sufficiens tædii, nec ex eo per se tedium sequi potest, ubi agnoscitur (§. 574.).

Ponamus jam porro bonum verum non agnoscere. Aut igitur in dubio relinquatur, utrum bonum sit, an malum; aut pro malo habetur. Quodsi in dubio relinquatur, utrum quid bonum sit, an malum; nec perfectionis cujusdam tuæ, nec imperfectionis tibi conscius es (§. 554. 565.). Quare cum voluptas tota in eo consistat, quod perfectionis cujusdam tibi conscius fueris (§. 511.); tedium vero totum consistat in eo, quod imperfectionis cujusdam tibi sis conscius (§. 518.); per notiones boni atque mali non intelligitur, quomodo inde tedium sequi possit, consequenter ratio sufficiens tædii in notione boni veri non agniti non continetur (§. 56. *Ontol.*), adeoque nec ex bono vero non agnito, sed in dubio relicto tedium per se sequi potest (§. 574.). Quodsi denique bonum verum perperam pro malo habetur, malum nonnisi apparens est (§. 568.). Quare cum ex malo apparente per se non sequatur tedium (§. 576.); ex bono vero nec in hoc casu tedium per se sequi potest.

Quoniam itaque ex bono vero tedium per se sequi nequit, sive agnoscatur, sive in dubio relinquatur, sive denique pro
malo

malo habeatur *per demonstrata*; ex bono vero per se tædium nunquam sequi potest.

Idem etiam confirmatur a posteriori. Scientia & virtus moralis quæcunque bonum verum est, quemadmodum nemine, qui sanæ mentis est, refragante sumere licet, suo loco demonstrandum. Quoties qui scientia imbutum habet animum, vel virtute instructus est, scientiam atque virtutem in-tuetur, prouti est, semper inde voluptatem percipit. Quodsi contingat homines invidos atque malitiosos vexas creare eidem detestandas, ut inde tædio afficiatur animus & impatiens detestetur scientiam atque virtutem, non tamen hic tædium percipitur ex scientia & virtute, sed revera ex invidia & malitia aliorum, qua deformatur ipsorum animus, ac inde manantibus vexis, quibus ipsemet perturbatur. Non igitur ex scientia & virtute morali quacunque per se sequitur tædium, etsi per accidens fieri possit, ut alii inde desumant ansam tædia nobis creandi. Hæc adeo clara sunt, ut animum ad scientiam atque virtutem moralem, qua aliorum nobis odia conflavimus, advertentes inter mille tædia, quæ nobis creantur, voluptatem inde percipiamus, atque ita tædia vincamus. Provocare hic poteramus ad exempla domestica, nisi satis manifestum esset, nos propria experientia hac in re non esse destitutos.

Maximi momenti est præsens propositio in moralibus, cum in ea contineatur fundamentum constantiæ virtutis inconcussum, quemadmodum suo loco evidenter demonstraturi sumus.

§. 578.

Quodsi ergo contingat, ex eo, quod bonum verum est, sequi Quomodo tædium, cum tædium omne aut per se, aut per accidens inde tædium ex sequi debeat (§. 574. 575.), per se autem sequi non possit (§. bono vero sequatur. 577.) ; idem nonnisi per accidens inde sequi potest.

Testatur idem exemplum, ad quod in confirmanda propositione præcedente modo provocavimus. Etenim ex scientia & virtute nun-

nunquam tibi tædia procreata fuissent, nisi invidia ac odia aliorum supervenissent. Ex scientia igitur & virtute non procreantur tædia nisi per accedens (§. 575.).

CAPVT II.

De appetitu sensitivo & aver-
satione sensitiva.

§. 579.

*Definitio
appetitus in
genere.*

Appetitus in genere est inclinatio animæ ad objectum pro ratione boni in eadem percepti.

E. gr. Ponamus Titium ex Sempronio Medico audire, quod cibus aliquis ad sanitatem conservandam conducatur. Quodsi cognoscat, quanta corporis perfectio sit sanitas, iudicabit cibum esse bonum tribuens eidem bonitatis gradum pro magnitudine perfectionis, quam in sanitate collocat (§. 554.). Enimvero dum ita iudicat, se ad cibum istum propendere animadvertet, eumque adeo appetet. Atque ita realitas definitionis a posteriori patet, quam quilibet in seipso experitur.

§. 580.

*Appetitus
sensitivi
definitio.*

Appetitus sensitivus dicitur, qui oritur ex idea boni confusa. Unde independenter ab appetitu in genere definiri potest, quod sit inclinatio animæ ad objectum pro ratione boni sive veri, sive apparentis in eodem confuse percepti.

E. gr. Ponamus Titium gustu percipere saporem vini gratum ac in perceptione confusa acquiescentem iudicare, quod sit bonum. Cieri hinc sentiet appetitum, qui is est, quem sensitivum dicimus. Quoniam appetitus noster usplurimum sensitivus est, exempla ejus obvia sunt, ut adeo singulis momentis non desinat, modo attentionem afferas sufficientem in iis casibus, in quibus ex consuetudine quid appetere solemus.

§. 581.

§. 581.

Aversatio in genere est reclinatio animæ ab objecto, pro ratione mali in eodem percepti, seu quod nobis in eodem percipere videmur. *Aversatio-
nis definitio.*

E. gr. Si Titius ex Sempronio Medico audit, cibum aliquem sanitati damnum inferre, referens exempla eorum, qui eodem usi in morbos graves atque periculosos inciderant; cibum istum averfatur, immo ori jam ingestum evomit. Hic igitur averfatur cibum, quod eum sibi tanquam malum repræsentet, alias eundem propter saporem admodum gratum comesturus. Dum vero cibum averfatur, anima quasi reclinatur ab eodem, quatenus cupit eum procul a se abesse: id quod capitis reclinacione & motu manuum, qualis esse solet quidpiam a se remoturi, significamus, ubi quis eundem nobis offert. Quemadmodum autem in definitione appetitus notione clara inclinationis contenti fuimus; etsi confusa; ita similiter hic in notione clara quidem, sed confusa reclinacionis acquiescimus. Etenim quid sibi velit tam inclinatio, quam reclinatio animæ, unusquisque in se quovis momento experiri potest, cum continui sint appetitus atque aversationes, ita ut vix assignari possit aliquod momentum, quo non aliquid appetamus, vel aversemur. In Psychologia autem rationali demonstraturi sumus, in quonam ista inclinatio & reclinatio consistat. Absit autem, ut quis sibi persuadeat nos voce uti in significato metaphorico, nec proprium quendam eidem hic tribuere! Etsi enim vocabula a rebus corporeis eorumque situ petantur; id tamen minime obstat, quo minus in doctrina de anima proprius quidam significatus ipsis tribuatur (§. 148. Log.).

§. 582.

Aversatio sensitiva est, quæ oritur ex idea mali confusa. *Aversatio-
nis sensitiva
definitio.*
Quamobrem independenter ab aversatione in genere definiri potest per reclinacionem ab objecto pro ratione mali in eodem confuse percepti, seu quod in eo nobis confuse percipere videmur.

E. gr. Ingentem quis percepit dolorem, instrumento chirurgico vulneri intruso, vel alio modo ad idem applicato. Quod si ergo alio tempore chirurgus idem instrumentum ad vulnus applicare voluerit; imago idem doloris revocat (§. 117.), ut scia præsentem
(Wolffii Psychologia.) Kkk per-

perceptioni jungatur. Quamobrem ab instrum. isto abhorret vulneratus, & ejus ad vulnus suum applicationem averfatur. Vocatur autem hæc averfatio sensitiva, quia a sensu tandem ortum trahit: id quod etiam de appetitu sensitivo tenendum.

§. 583.

Scholasti-
cum phra-
seologia ex-
plicata.

Scholastici appetitum sensitivum appellare etiam solent *Appetitum simpliciter*. Dividunt autem appetitum ita acceptum, seu sensitivum, in concupiscibilem & irascibilem. *Appetitus concupiscibilis* appellatur, qui nobis appetitus sensitivus dicitur (§. 580.). *Appetitus* autem *irascibilis* vocatur facultas ista, quam nos averfationis sensitivæ nomine insignivimus. Ita enim *Franciscus de Oviedo*, Societatis Jesu, in Cursu philosophico Tom. 2. Tract. de Anima Controv. 4. punct. 3. §. 2 f. 53. a. *Appetitus*, inquit, sensitivus dividitur in partem concupiscibilem & irascibilem, quæ divisio non est potentiarum differentium, sed actuum diversorum ab eadem potentia provenientium: quatenus enim appetitus in bonum inclinatur, *concupiscibilis* dicitur, & quatenus malum fugit, *irascibilis* appellatur. Quodsi quis terminis Scholasticorum uti voluerit; is ad eosdem facile accommodabit notiones nostras sequentem in modum. *Appetitus* in genere est facultas mentis, qua in bonum quomodocunque perceptum inclinamur, a malo autem reclinamur. *Appetitus sensitivus* est, qui ad bonum vel malum confuse perceptum refertur. *Appetitus concupiscibilis* est inclinatio animæ in bonum confuse perceptum. *Appetitus irascibilis* est reclinatio a malo confuse percepto.

Non omnes appetitum concupiscibilem ab irascibili eodem modo distinguunt. *Thomista* enim appetitum concupiscibilem ferri dicunt in bonum; irascibilem in bonum arduum: contra quos disputat *Joannes Poncius* in Cursu philosophiæ ad mentem *Scoti* in Tract. de anima disp. 4. quæst. 2. concl. 3 f. 791, appetitus partem concupiscibilem describens per illam, qua fertur in bonum, sive arduum, sive non, illud persequendo, quibuscunque actibus illud persequitur, exceptis actibus, quibus vindicative persequitur impedimenta ipsius; irascibilem vero per illam, qua persequitur impedimenta ipsius vindicative, & hanc sententiam menti *Scoti* consen-

taneam probat. Enimvero si terminis istis uti volueris, convenientius est, ut appetitum concupiscibilem ad appetitum boni cujuscunque, irascibilem vero ad fugam mali referas, cum boni, in quod anima fertur, appetitum a fuga mali, quod averfatur, distingui necesse sit. Inanes vero sunt lites Scholasticorum de terminis, quos pro arbitrio definitionibus nominalibus explicare licet, utut convenientius sit eas ita explicari, ut in praxi, cujus gratia distinguuntur, commodum habeant usum.

§. 584.

Appetitus sensitivus cum aversatione sensitiva dicitur *Facultatis Facultatis appetitivæ pars inferior*. Appetitus enim perinde ac Aversatio hic sumitur non pro actu, sed pro actus possibilitate seu potentia, quæ facultatis nomine venit (§. 29.).

Denominatio hæc fit ad imitationem alterius, qua tactu ac cognoscendi in partem inferiorem ac superiorem dividimus: responderet autem pars facultatis appetitivæ inferior parti cognoscitivæ facultatis inferiori, a qua pender.

§. 585.

Si nec appetimus, nec averfamur objectum cognitum, *Status indifferentes* esse dicimur, & status animæ, quo est ad objectum, quod sibi repræsentat, *indifferens*, *status indifferentiæ* dicitur. *Status indifferentiæ* dari experientia confirmatur.

E. gr. Si quis videt ad ripam fluminis multos lapillos, eosque contemplatur; eos tamen nec appetit, nec averfatur. Immo si quos manu apprehendit, ut eos accuratius contemplari possit; ipsos tamen deo abjicit, ut adeo solius contemplationis gratia eos appetat, sine autem hoc potius ipsos suos esse nolit, ad statum indifferentiæ a contemplatione rediens.

§. 586.

Repræsentatio boni est ratio sufficiens appetitus; repræsentatio mali ratio sufficiens aversationis. Quoniam enim nihil est sine ratione sufficiente, cur potius sit, quam non sit (§. 70. Ontol.); ratio quoque sufficiens adesse debet, cur aliud potius appetamus, quam non appetamus; cur potius aversemur, quam non aversemur. Jam vero experientia con-

stat, quando aliquid appetimus nos idem nobis repræsentare tanquam bonum; quando aliquid averſamur, nos idem repræsentare nobis tanquam malum; quando autem quid nec appetimus, nec averſamur, nos ignorare, utrum nobis bonum sit, an malum, vel judicare, quod neutrum sit. Quamobrem cum ex bono voluptatem percipiamus, quando idem cognoscimus (§. 558.), ex malo contra percipiamus tædium, quando idem cognoscimus (§. 569.); ex eo, quod quid bonum judicamus, intelligi potest, cur idem potius appetamus, quam averſemur, & ex eo, quod quid malum judicamus, intelligi potest, cur idem potius averſemur, quam appetamus, aut non averſemur. Erit igitur repræsentatio boni appetitus; repræsentatio mali averſationis ratio sufficiens (§. 56. *Ontol.*).

Utilitatis maximæ est cognoscere, quænam sit tam appetitus, quam averſationis ratio sufficiens. Ita enim non minus hanc, quam istam in potestatem nostram redigimus, quemadmodum ex moralibus constabit.

§. 587.

*Status indifferentiæ
quando
obtineat.*

Si quid nobis nec tanquam bonum, nec tanquam malum repræsentamus; in statu indifferentiæ sumus. Etenim si quid nobis non repræsentamus tanquam bonum, non adest ratio sufficiens appetitus (§. 586.). Quamobrem cum sine ratione sufficiente nil quicquam esse possit (§. 70. *Ontol.*); nec quid appetere possumus, si idem nobis non repræsentamus tanquam bonum. Quare cum eodem modo ostendatur, nos non appetere posse illud, quod nobis non repræsentamus tanquam malum, evidens est, si quid nobis nec tanquam bonum, nec tanquam malum repræsentamus, nos idem nec appetere, nec averſari, consequenter in statu indifferentiæ esse (§. 585.).

Idem confirmatur a posteriori. Pertinet huc exemplum, quod ad illustrandum statum indifferentiæ in medium attulimus (*not §. cit.*), & addi possunt centena alia, cum non alia

re opus sit, quam ut attentionem nostram dirigamus in objecta, quæ ad nos statumque nostrum relata nec bona, nec mala deprehenduntur. Ac utile est attendere ad objecta, ad quæ nos indifferentes habemus, ut defectum perceptionis boni atque mali advertamus, sicque veritas propositionis præsentis continuo magis magisque clarior nobis evadat.

Quodsi objicias representationem boni non esse unicam rationem sufficientem appetitus, nec aversionis rationem sufficientem unicam esse representationem mali, necesse est, ut aliæ præterea rationes sufficientes tam appetitus, quam aversionis nominentur. Quodsi quis suspicionem ex ignorantia enatam attendi velit; is perpendat objecta non movere appetitum, nisi quatenus ad nos referuntur: ea enim, quæ nos nullo modo tangunt, non curamus. Enimvero si ad nos referuntur, vel nos statumque nostrum perficiunt, vel nos statumque nostrum imperfectiores reddunt, vel denique nihil ad hunc scopum conferunt. Quamobrem appetitus præter representationem boni (§. 554.), aversio præter representationem mali (§. 565.) rationem aliam habere nequit: utraque deficiente, deficit cum appetitus, tum aversio, atque adeo status indifferentiæ est, quemadmodum fert præsens propositio. Quodsi quis perpendit, cur indifferens sese habeat ad hoc vel istud objectum, quod ipsi offertur, hinc porro facile perspiciet, quod nonnisi per boni aut mali representationem ex statu indifferentiæ in alium transferri possit.

§. 588.

Quoniam fieri nequit, ut judicemus, quomodo objectum aliquod ad nos statumque nostrum sese habeat, consequenter utrum bonum, an malum sit (§. 554. 565.), quamdiu ignotum nobis est (§. 1218. Log.); *ignotum nec appetimus, nec aversamur; sed indifferentes nos ad idem habemus* (§. 586. 587.).

Idem animadverterunt veteres, ideo inculcantes pervulgatum istud: *Ignoti nulla cupido.*

§. 589.

Quamprimum rem quandam nobis representamus tanquam bonam; eam appetimus. Etenim quamprimum rem quamdam

dam nobis repræsentamus tanquam bonam, ratio sufficiens appetitus ponitur (§. 586.), consequenter etiam ipse appetitus (§. 118. *Ontol.*), adeoque rem istam appetimus.

Idem unusquisque in semetipso experitur, modo distinguendis iis, quorum libimet ipse in seipso conscius est, satis fuerit acutus.

Probe autem tenendum, in præsentē propositione, quemadmodum in ceteris omnibus, supponi, nihil adesse, quod in determinationem prædicari influere possit præter ea, quæ in notione subiecti deprehenduntur, consequenter in casu præsentē nos nobis obiectum repræsentare tanquam bonum, nihilque a nobis cogitari quod iudicium nostrum nobis suspectum reddere possit, tantum abest ut contrariam in partem rationes fortiores nobis occurrant. Hæc trutinari debet, qui veritatem propositionis per experimenta in se ipso sumta comprobare voluerit.

§. 590.

*Quomodo
aversatio
determinetur.*

Quamprimum rem quandam nobis repræsentamus tanquam malam; eam averfamur. Etenim quamprimum rem quandam nobis repræsentamus tanquam malam, ratio sufficiens averstationis ponitur (§. 586.), consequenter etiam averratio (§. 118. *Ontol.*), adeoque rem istam averfamur.

Eadem hic repetenda sunt, quæ ad propositionem præcedentem annotata sunt.

§. 591.

Objecta appetitus sensitivi.

Si qua ex re voluptatem percipimus, in eam fertur appetitus, seu eam appetimus, quamdiu in notione boni confusa acquiescimus. Si qua enim ex re voluptatem percipimus, eam nobis repræsentamus tanquam bonam, quamdiu sensuum iudicio stamus (§. 561.), adeoque in notione boni confusa acquiescimus (§. 536.). Sed quamprimum rem quandam nobis repræsentamus tanquam bonam, eam appetimus (§. 589.) & ex idea boni confusa nascitur appetitus sensitivus (§. 580.). Ergo si ex re quadam voluptatem percipimus, eam appetimus, quamdiu in idea rei confusa acquiescimus.

Idem

Idem confirmatur a posteriori. Ex cibo, qui bene sapit, voluptatem percipimus: sed quamprimum eum videntes saporis grati recordamur, eum appetimus. Similiter si ex odore grato floris voluptatem percipimus; eundem videntes & odoris, quem spargit, memores eundem appetimus. Infantes dulcedine capiuntur. Appetunt itaque quæ dulcia sunt.

Quoniam plerique homines nonnisi confusam boni ideam habent, atque adeo in eadem acquiescere tenentur; immo in universam omnes secundum notionem, quam habent, confusam judicare solent, præsertim quando objectam sensui, vel imaginationi primum obicitur, exempla, quibus propositio præsens confirmatur, adeo obvia sunt, ut nemini desit occasio in semetipso capiendi experimentum, quamprimum libido animum inceserit.

§. 592.

Si quæ ex re tædium percipimus, eam averſamur, quamdiu in Objectum notione mali confusa acquiescimus. Si quæ enim ex re tædium percipimus, eam nobis repræsentamus tanquam malam, quamdiu sensuum judicio stamus (§. 573.), adeoque in notione mali confusa acquiescimus (§. 536.). Sed quamprimum rem quandam nobis repræsentamus tanquam malam, eam averſamur (§. 590.), & ex idea mali confusa nascitur averſatio sensitiva (§. 582.). Ergo si ex re quadam tædium percipimus, eam averſamur, quamdiu in notione mali confusa acquiescimus.

Idem confirmatur a posteriori. Tirones initio ex diligentia tædium percipiunt, in cujus rationes jam non inquirimus. Sed eos diligentiam ac assiduitatem averſari palam est, unde nisi adsit alius stimulus negligentes fiunt. Patet igitur quod diligentiam averſentur non modo ideo, quod ex eadem tædium percipiunt; verum etiam quod averſatio tamdiu durat, quamdiu juxta hanc notionem mali de diligentia judicamus, nec nobis succurrunt rationes aliæ, quæ nos judicium mutare cogunt, vel attentionem ab eodem avertunt.

§. 593.

§. 593.

Notio boni
confusa,
qualis.

Si nobis rem tanquam bonam confuse repræsentamus, ideam boni ingrediuntur voluptates quæcunque ex re ista, vel cum eadem antea simul perceptæ. Dum enim rem percipimus, vi imaginationis reproducenda quoque est idea voluptatis antea perceptæ sive ex re ista, sive una cum ista (§. 104), modo diu, vel sæpius simul percepta fuerit (§. 107.), ac vi memoriæ eandem recognoscimus (§. 175.), adeoque nobis conscii sumus, quod eam antea ex re ista, vel cum eadem perceperimus (§. 173). Enimvero voluptates diversæ tempore diverso ex re ista vel cum eadem perceptæ fuerunt *per hypoth.* & quoniam ad rem totam attentionem dirigis, *itidem per hypoth.* nulla hic adest ratio, cur una potius, quam altera memoriam subire debeat, adeoque omnes simul eandem subire debent. Quamobrem cum plures simul reproductæ a se invicem non distinguantur; ideam quandam confusam constituunt (§. 39.). Jam qui sensuum judicio stant, adeoque in notione boni confusa acquiescunt (§. 54.), bonum quid ex eo judicant, quod voluptatem inde percipiant (§. 561.). Idea igitur ista confusa, quam voluptates cum re data, vel ex eadem diu perceptæ ingrediuntur, est illa ipsa idea, qua rem istam nobis repræsentamus tanquam bonam, consequenter quando nobis rem tanquam bonam confuse repræsentamus, ideam boni ingrediuntur voluptates quæcunque ex re ista, vel cum eadem antea simul perceptæ.

Idem patet a posteriori, si ideas confusas evolvere noveris, ut distincte appareat, quid in iis contineatur. Ponamus Titium contemplari vinum in poculo vitreo contentum, memoriam ejus subibit voluptas diversis temporibus partim ex sapore vini, partim ex conversatione cum convivis, aut alia quacunque de causa inter pocula percepta. Quamobrem ubi ratio reddenda, cur bonus judicetur vini haustus; nunc hanc, nunc aliam rationem reddi animadvertes, prouti attento-

tionem suam in particularem quandam perceptionem præsentem dirigit (§. 109.) ; immo rationes complures cumulari deprehendes, subinde parum quadrantes, prouti successive in aliam aliamque perceptionem præsentem attentionem dirigit (§. cit.). Quamobrem si quis veritatem propositionis præsentis experimento in se sumto confirmare voluerit; is in evolvendis ideis boni confusus assiduus esse debet, attentionem suam successive dirigendo in singula, quæ in perceptione præsentente continentur. Ita enim sua veluti sponte sese offerent, quæ vi imaginationis veluti præsentia sistuntur, modo non fueris impatiens in reflectendo super re præsentente ac attendendo ad phantasmata vi imaginationis producta. Hæc autem patientia multo demum exercitio & præviis habitibus aliis acquiritur, veluti habitibus reflexionis, attentionis, acuminis, prouti unusquisque in semetipso experiri poterit.

Maximi momenti est propositio præsens in Moralibus. Etenim notio boni fit maxime deceptrix, quod eam ingrediantur voluptates, quæ ex eadem re vel prorsus non percipiuntur, vel saltem simul percipinequeunt. Ita enim bonum apparet majus, quod longe minus haberi debet, etiamsi sensuum judicio stetur. Quamobrem plurimum refert, ut perceptiones boni confusas evolvere discamus, quo vim deceptricem cognoscentes tanto facilius nobis ab eadem caveamus. Etenim pluribus exemplis edocti, quanam perceptionibus istiusmodi insit vis deceptrix, omnis confusa boni perceptio posthac nobis suspecta evadet.

§. 594.

Si nobis rem tanquam malam confuse representamus, ideam Notio mali mali ingrediuntur tædia quæcunque ex re ista, vel cum eadem confusa antea simul percepta. Dum enim rem percipimus, vi imaginationis reproducenda quoque est idea tædii antea percepti five ex re ista, five una cum ista (§. 104.), ac vi memoriæ eandem recognoscimus (§. 175.), adeoque nobis conscii sumus, quod id antea ex re ista, vel cum eadem percipimus (§. 173.). Enimvero tædia diversa diverso tempore ex re ista, vel cum eadem per-

cepta fuerunt *per hypoth.* & quoniam ad rem totam simul attentionem dirigis, *itidem per hypoth.* nulla hic adest ratio, cur unum potius, quam alterum memoriam subire debeat, adeoque omnia simul memoriam subire debent. Quamobrem cum tardiorum plurium idearum simul reproductarum a se invicem distinguere nequeant; ideam quandam confusam constituunt (§. 39.). Jam qui sensuum iudicio stant, adeoque in perceptione mali confusa acquiescunt (§. 275.), malum quid ex eo judicant, quod tardium inde percipiant (§. 573.). Idea igitur ista confusa, quam tardia cum re data, vel ex eadem diu vel sæpius percepta ingrediuntur, est illa ipsa idea, qua rem istam nobis repræsentamus tanquam malam, consequenter quando nobis rem tanquam malam confuse repræsentamus, ideam mali ingrediuntur tardia quæcunque ex re ista, vel cum eadem antea simul percepta.

Idem confirmatur a posteriori, si ideas confusas evolvere noveris. Ponamus Titium contemplari vinum in poculo vitreo contentum, & antea jam sæpius nimiam vini hausti quantitatem ex ventriculo iterum per vomitum ejecisse, postero autem die languorem in omnibus artubus, dolores capitis, nauseam vini ac tardia complura ex male ob ebrietatem factis percepisse; conspecto vino singula ista memoriam subibunt. Quamobrem ubi ratio reddenda, cur malum judicetur haurire largiter vinum; nunc hanc, nunc aliam reddi, ac plures rationes cumulari perinde ac in casu præcedente percipimus.

Quæ ad propositionem præcedentem annotata fuerunt, etiam hic repetenda sunt. Ceterum adhuc tenendum est, cum eadem re una percipi, quæ percipiuntur, sive ea sensui, sive imaginationi præsens fuerit. Unde etiam huc spectant tardia ex eo percepta, quod ex re quadam consequitur, quatenus conjunguntur cum re in memoriam revocata. E. gr. Ponamus te in ebrietate non perpendentem ea, quæ silentio premenda erant, effutire, ac postero die Titium tibi vexas creare, quod ea dixeris, quæ in detrimentum fortunæ ipsius cedunt;

cedunt; ex vexisistis tædium percipis. Recordatus vero, te ebrium propalasse, quæ taceri debebant, ac ideo tibi vexas creari; ebrietatem tanquam causam tædiorum consideras ac ideo tædii ideam cum nimio vini haustu, unde ebrietas manavit, connectis, ut de hoc cogitanti tædium succurrat.

§. 595.

Si plures voluptates ex re quadam, vel cum eadem antea perceptæ ideam boni ingrediuntur, appetitus fortior, seu major est, quam si pauciores in eadem continentur. Quoniam enim rem appetimus, quatenus ex ea voluptatem percipimus, quando in notione confusa boni acquiescimus (§. 591.); si autem plures voluptates ex re quadam, vel cum eadem perceptæ ideam boni ingrediuntur, idea boni confusa est (§. 39.); ex singulis voluptatibus singuli appetitus oriuntur in unum confusi non minus, ac voluptates, ex quibus resultant, in unum confunduntur. Quodsi illatio nondum satis evidens videatur, facile evidentior redditur. Etenim ponamus in idea boni contineri voluptates A, B, C, D olim perceptas, numero nimirum quatuor, sed gradu a se invicem differentes. Quodsi solam voluptatem A consideres, nascetur inde appetitus quidam H, & eodem modo ex eo, quod cogites voluptatem B, nascetur appetitus I; ex eo, quod solam cogites voluptatem C, vel D, nascetur appetitus K vel L (§. 591.). Enimvero cum in idea boni contineantur voluptates A, B, C & D, easque omnes simul cogites, quando ideam istam habes, *per hypoth.* nihil obstat, quo minus ex singulis adhuc nascentur appetitus sui, immo cum positis voluptatibus omnibus simul in idea, quam habes, ponatur ratio sufficiens omnium appetituum simul, qui ex singulis nascuntur, omnes quoque appetitus H, I, K, L poni debent (§. 118. *Ontol.*). Quoniam igitur simul oriuntur & in unum objectum tendunt, plures simul eundem appetitum constituunt, adeoque tanquam totidem partes appetitus ejusdem considerandi veniunt (§. 341. *Ontol.*). Quamobrem cum appetitus constans ex appetitibus

H & I fit pars appetitus constantis ex appetitibus H, I, K & L, *per demonstrata*; appetitus constans ex appetitibus H & I minor est appetitu constante ex appetitibus H, I, K & L (§. 352. *Ontol.*). Enimvero appetitus constans ex appetitibus H & I oritur, quando ideam boni ingrediuntur voluptates A & B; appetitus vero constans ex appetitibus H, I, K & L nascitur, quando in idea boni continentur voluptates A, B, C & D *per demonstrata*. Ergo si ideam boni plures voluptates ex re quadam, vel cum eadem antea perceptæ ingrediuntur; appetitus major est, quam si pauciores in eadem continentur.

Atque adeo patet, quomodo fieri possit, ut appetitus continuo fortior evadat, si sæpius iteretur, occasione eandem rem appetendi sæpius oblata.

§. 596.

*Aversatio
sensitiva
quomodo for-
tior evadat.*

Si plura tædia ex re quadam, vel cum eadem percepta ideam mali ingrediuntur, aversatio fortior, seu major est, quam si paucioribus in eadem sit locus. Ostenditur eodem prorsus modo, quo propositio præcedens, modo voluptatibus tædia & appetitibus aversiones substituas. Unde demonstratio propositionis præcedentis facile transmutatur in demonstrationem propositionis præsentis, eodem scilicet modo, quo paulo ante (§. 594.) demonstrationem quandam anteriorem (§. 593.) in aliam formam transfudimus.

Per hanc propositionem patet, quomodo fieri possit, ut aversatio continuo fortior evadat, si sæpius iteretur, occasione eandem rem averfandi sæpius oblata. Patet etiam, quousque in potestate nostra positum sit ut aversionem fortiorem efficiamus.

§. 597.

*Bonum
quando ma-
ius appareat.*

Si voluptates complures cum re quadam antea perceptæ ideam boni ingrediuntur; bonum majus videtur, quam ipso sensuum iudicio deprehenditur. Quoniam voluptates complures cum re quadam antea perceptæ ideam boni ingrediuntur *per hypoth.* ponamus

mus evidentia gratia, ideam boni ingredi voluptates A, B, C & D ac mixtam L constituere. Quoniam itaque voluptates A, B, C, D simul unam constituunt voluptatem L, singulae erunt quasi partes hujus (§. 341. *Ontol.*). Voluptas igitur sola A minor est voluptate L (§. 357. *Ontol.*). Quamobrem cum voluptates olim cum re perceptae non omni tempore ex eadem, vel cum eadem percipiuntur, quod per se patet; si in dato casu ex re data tantummodo percipiatur voluptas A, minor utique percipitur, quam quae percipienda in idea boni repraesentatur. Quamvis ergo ex voluptate percipienda aestimetur bonum, adeoque sensuum judicio stetur; bonum tamen majus apparere debet, quam postea deprehenditur, ubi voluptates complures cum re quadam antea perceptae ideam ejus ingrediuntur.

Idem etiam confirmatur a posteriori. Ponamus enim A denotare voluptatem ex sapore vini perceptam; B vero voluptatem ex praesentia amici, C voluptatem ex discursu praesentium, D denique voluptatem ex renovata plurium amicorum absentium memoria perceptam. Dum igitur vinum hausisti, plurima voluptate perfructus fuit animus. Experieris autem, quod in tali casu haustus vini majus bonum judicetur, quam postea deprehenditur, si vel solus, vel etiam cum aliis vinum postea hauseris.

Notiones boni magis nobis imponunt, quo difficilius successu temporis deteguntur rationes voluptatis accidentales, quae non semper & ubique adsunt.

§. 598.

Si tadia complura cum re quadam antea percepta ideam Tedium mali ingrediuntur; malum majus videtur, quam ipso sensuum judicio quando ma-
deprehenditur. Eodem modo ostenditur, quo propositio pra-
cedens, modo voluptatibus tadia & bono malum substituas. *reut.*

Idem quoque confirmatur a posteriori. Si quis enim sa-

pius ex suo de aliis iudicio tædia, eaque subinde satis grandia percepit; ei de aliis iudicare præsentibus aliis majus malum videbitur, quam alteri, qui nunquam adhuc tædii quidpiam ex eo percepit, quod de aliis libere animi sententiam dixerit. Quodsi quis ad casus quoscunque sibi obvios attentionem suam dirigere adsuverit, animumque suum ad eos reflectere noverit; is plurima deprehendet exempla, quibus propositionis præsentis veritatem confirmet.

Quod paulo ante (not. §. 597.) de fallacia notionum boni diximus, ea etiam ad malum applicanda. Ceterum utilissimum est fallacias in utroque casu detegere, quod magnitudo appetitus atque aversationis inde pendeat. Omnis autem philosophiæ moralis scopus in eo consistit, ut directionem appetitus in potestatem nostram redigamus, ne facile agamus id, cujus nos postea poeniteat.

§. 599.

*Gradus
appetitus
ac aversa-
tionis sensi-
tiva.*

Appetitus sensitivus & aversatio sensitiva habet gradus.

Quoniam enim appetitus sensitivus & aversatio sensitiva facultates animæ sunt (§. 584.) , adeoque determinationes (§. 112. 122. Ontol.) , quæ sine alio assumpto, scilicet per definitionem, intrinseca continentem (§. 154. Log.) intelligi possunt (§. 580. 582.) ; qualitates animæ sunt (§. 452. Ontol.). Quare cum unus appetitus sit altero fortior (§. 595.) , adeoque salva definitione communi vel tempore diverso in eodem subiecto, vel eadem in diversis subiectis differat; tam appetitus sensitivus, quam aversatio sensitiva gradus habet (§. 746. Ontol.).

Hinc appetitus & aversatio æstimationem recipit, etsi mensura nondum sit reperta. Nobis hic sufficit nosse, quod dentur gradus non minus in appetitu sensitivo, quam in aversatione sensitiva; id quod utile est ad naturam affectuum intelligendam.

§. 600.

*Mutabili-
tas istorum
graduum.*

Gradus appetitus sensitivi ac aversationis sensitivæ in eodem subiecto mutantur, si iudicia de bono & malo mutantur. Quoniam enim appetitus sensitivus & aversatio sensitiva gradus habent (§. 599.) , unus appetitus altero & una aversatio altera

altera major est (§. 751. *Ontol.*), adeoque gradus oriuntur ex magnitudine, qua bonum (§. 595.) vel malum nobis repræsentamus per multitudinem & magnitudinem voluptatum ac tædiorum ex re, vel cum eadem perceptorum (§. 596.). Enimvero voluptas, quæ ex bono apparente percipitur, vel etiam ex vero, quatenus pro apparente perperam habetur, mutabilis (§. 564.), similiterque tædium, quod ex malo apparente, vel etiam ex vero, quatenus pro apparente habetur, percipitur, mutabile (§. 571.). Quamobrem cum mutatis voluptatibus ac tædiis bonum non amplius tantum appareat, quantum videbatur antea (§. 597.), nec malum quoque tantum videatur, quantum antea videbatur (§. 598.); nec tantus quoque appetitus est, quantus antea fuerat, vi eorum, quæ demonstrata sunt. Mutato igitur judicio de magnitudine boni vel mali, mutantur quoque gradus appetitus sensitivi, ac aversionis sensitivæ.

Idem confirmatur a posteriori. Videmus enim homines, qui objectum aliquod vehementer appetunt, postea in idem vix ferri. Quæsiiti respondent, se nunc non amplius pro tanto bono habere, quantum ipsis antea videbatur. Atque adeo clarissime patet, mutato judicio de magnitudine boni mutari quoque gradum appetitus, quem adeo imminui posse experimur, ut pro nullo prorsus haberi debeat. Simile quid contingit in aversione, quam continuo minui posse, ut tandem prorsus evanescat, nemo non novit, qui ad ea attendere adsuevit, quæ quotidiana sunt.

Propositio præsens maximi momenti est in praxi morali, quem admodum suo tempore constabit.

§. 601.

Si quod antea videbatur bonum, nunc malum habeatur, Appetitus appetitus mutatur in aversionem: si vero quod antea malum & aversio videbatur, nunc bonum habeatur, aversio mutatur in appetitum. Quoniam enim initio objectum nobis videbatur bonum, *um mutatio.*

num, *per hypoth.* ipsum appetebamus (§. 589.). Enimvero quoniam mutata sententia idem nunc a nobis judicatur malum *per hypoth.* ipsum averſamur (§. 590.). Quamobrem si nunc malum habeatur, quod antea bonum videbatur; appetitus in averſationem mutatur.

Similiter quoniam in altero casu objectum propositum initio nobis videbatur malum, *per hypoth.* idem averſabamur (§. 590.). Enimvero quoniam mutata sententia idem nunc a nobis bonum judicatur, quod antea malum habebatur, averſatio in appetitum mutatur (§. 589.).

Propositio præſens non minus maximi momenti est in praxi morali, ac præcedens. Ceterum notandum est, propositionem præſentem ita explicandam esse, ut appetitu & averſatio denotent facultates animæ, ne a significato vocabulorum fixo recedere videamur. Nimirum appetitus dicitur mutari in averſationem, quando loco facultatis appetendi sese exerit facultas averſandi, ita ut nunc averſemur, quod antea appetebamus. Et idem intelligendum est de casu opposito. Propositionem autem, cujus frequens usus est, breviter enunciari consultum fuit: quo in casu etiam Mathematici compendia loquendi amant. Exemplo est theorema Pythagoricum, quod ita efferri solet: Hypothenusa potest latera.

§. 602.

*Ea ulterius
expenditur.*

Si voluptas apparens in tedium mutatur, appetitus in averſationem degenerat: si vero tedium apparens in voluptatem abit, averſatio in appetitum degenerat, quando scilicet in notione boni & mali confusa acquiescimus. Etenim si ex re quadam voluptatem percipimus & in notione boni confusa acquiescimus, eam appetimus (§. 591.): si vero ex eadem tedium percipimus, eam averſamur, posita eadem conditione (§. 592.). Quodsi ergo voluptas apparens in tedium mutatur, quod antea appetebamus, nunc averſamur, adeoque appetitus in averſationem degenerat, quamdiu in notione boni ac mali confusa acquiescimus. Quodsi vero tedium apparens in voluptatem mutatur, quod antea averſabamur, nunc ap-

appetimus, adeoque aversatio in appetitum degenerat, quando in notione boni ac mali confusa acquiescimus.

Idem patet a posteriori. Qui ex sapore vini voluptatem percipit & in notione boni confusa acquiescit, ipsum ob saporem appetit. Quodsi inebriatus postero die dolorem capitis & languorem artuum nauseamque ventriculi sentit; illud averfatur. Quod igitur antea appetebat ob voluptatem inde perceptam, id nunc averfatur ob tædium, quod in locum voluptatis succedit. Similiter si quis initio tædium percipit ex studio geometrico, idem averfatur. Enimvero ubi aliquos fecit progressus, ut vim demonstrationum percipiens voluptatem ex eodem percipiat, idem appetit. Quod adeo antea averfatur ob tædium; idem nunc appetit ob voluptatem, quæ in locum illius successit.

Quoniam plerique homines in notione boni ac mali confusa acquiescunt; principii præsentis multus usus est in praxi morali, tum etiam in mutabilitate appetitus hominum dijudicanda.

C A P V T III.

De affectibus.

§. 603.

Affectus sunt actus animæ, quibus quid vehementer appetit, vel averfatur, vel sunt actus vehementiores appetitus sensitivi & aversionis sensitivæ. *Affectus definitio.*

Appetitus ac aversionis actus gradu differre ostendimus (§. 599.), atque hinc constat, rem definitam esse possibilem. Quodsi ergo definitionem præsentem pro nominali accipis, non est quod contra eam objicias. Enimvero quoniam vocabulum ex usu loquendi jam sortitum est significatum quendam, non temere immutandum (§. 142. *Disc. prælim.*); definitionem nostram ab usu loquendi non abhorre demonstrandum;

(*Wolffii Psychologia.*)

M m m

§. 604.

§. 604.

*An sit usus
loquendi
conformis.*

Definitio affectuum usui loquendi conformis. Patet id per exempla eunti. Ponamus virum, qui rerum naturalium cognitione delectatur, incidere in librum experimentis & observationibus refertum. Quoniam sibi repræsentat idea quadam confusa voluptatem insignem ex ejus lectione percipiendam, eum vehementer appetit (§. 595.). Enimvero dum hic appetitus vi superiorum in eodem sese exerit, affectum gaudii ac desiderii eidem tribuimus. Immo si ipsemet statum mentis suæ exprimere debet; se gaudio efferri, quod librum hunc nactus fuerit, & impatiente desiderio lectionis ejusdem teneri affirmat. Similiter si quis virtutis amans videt hominem vitiis deditum, eum adeo aversatur, ut nudo conspectu ejusdem offendatur. Omnes affirmant, quod eum odio persequatur ingente, & ipsemet statum mentis internum significaturus ait se eum tantopere odisse, ut intueri non possit. In confesso est penes omnes, gaudium, desiderium, & odium esse in numero affectuum. Quoniam itaque hos affectus animæ tribuimus ob appetitus, vel aversationis actum vehementiorem; per affectum nisi istiusmodi actum in communi sermone indigitare solemus. Quamobrem cum definitio nostra nomen affectuum tribuat actibus animæ, quibus quid vehementer appetimus, vel aversamur (§. 603.); eadem quoque usui loquendi conformis (§. 139. Log.).

Idem ex speciali affectuum expositione clarius elucescet. Quot enim sunt affectuum species, tot dari possunt exempla, quæ tanto aptius loquuntur, quod iisdem confirmari debet, quanto clariiores sunt affectuum notiones speciales. Experimenti etiam loco esse potest, si ea, quæ ex notione affectus a priori deducuntur, cum observationibus conferantur. Quod si enim cum notionibus communibus consentiant, ipsa quoque affectus in genere notio cum iisdem consentire debet.

§. 605.

Affectus ex confusa boni & mali representatione oriuntur. *Affectus*
Sunt enim actus vehementiores appetitus sensitivi & aversatio- unde orian-
nis sensitivæ (§. 603.). Sed appetitus sensitivus oritur ex idea
boni confusa (§. 580.), aversatio autem sensitiva ex idea ma-
li confusa (§. 582.). Ergo etiam affectus ex confusa boni &
mali idea, seu representatione ejusdem oritur (§. 48.).

Idem confirmatur a posteriori. Pertinent huc exempla,
quibus propositionem præcedentem confirmavimus. Quando
enim confuse nobis repræsentamus aliquid tanquam bonum, vel
malum, illud bonum judicamus, ex quo voluptatem percipi-
mus; malum vero, unde tædium percipimus. (§. 561. 573.).

Propositionis præsentis veritas per inductionem singularum spe-
cierum magis confirmabitur, si quis eandem admittere noluerit, nisi
proprio experimento edoctus.

§. 606.

Quoniam per voluptatem, quam ex re quadam percipi- *Qualitas*
mus, nobis eam confuse repræsentamus tanquam bonam (§. *affectuum.*
561.) & per tædium, quod ex eadem percipimus, tanquam
malam (§. 573.); affectus autem ex confusa boni & mali repræ-
sentatione oriuntur (§. 605.); *affectus*, tanquam appetitus & a-
versationes vehementiores (§. 603.), *cum insigni voluptatis, vel*
tædii gradu conjunguntur.

Species affectuum singulæ corollarium hoc a posteriori confir-
mant, prouti ad inferius dicenda attendenti palam fiet.

§. 607.

Quoniam in omni affectu insignis quidam voluptatis, vel *Num tædi-*
tædii gradus adest (§. 606.); *Voluptas ac tædium perperam pro*
affectuum speciebus habentur. *um ac volu-*

Dici potius poterat, affectus esse voluptatem ac tædium diversi *ptas sint*
mode modificata. Etsi enim voluptate ac tædio perfundi possis, et- *species affe-*
iamsi nullo affectu cearis; non tamen ideo pro specie quadam affe- *ctuum.*

Quum voluptatem ac tedium in genere spectata habere licet: id quod facile ex notione generum & specierum intelligitur (§. 241. & seqq. Ontol.).

§. 608.

*Affectus
quinam
jucundi
sunt.*

Affectus jucundi sunt, qui in appetendo consistunt, seu cum magno voluptatis gradu conjunguntur.

Hæc duo sibi invicem æquipollere ex antea demonstratis liquet: ut adeo non demum opus sit demonstrari, quod posito uno ponatur etiam alterum.

§. 609.

*Affectus
molesti qui-
nam discan-
tur.*

Affectus molesti sunt, qui in averfando consistunt, seu cum insigni tædii gradu conjunguntur.

Hæc duo sibi invicem æquipollere denuo ex antea demonstratis abunde liquet, ut unum ex altero demonstrari opus non sit.

§. 610.

*Affectus
quinam
mixti di-
cuntur.*

Affectus mixti sunt, qui ex jucundis & molestis constant, seu in quibus voluptas ac tedium invicem permiscetur.

Dari affectus mixtos ex speciali pertractatione constabit.

§. 611.

*Quamnam
affectus cor-
pori muta-
tionem in-
ducant.*

Quando anima affectibus commovetur, sanguis ac fluidum nerveum in corpore motu extraordinario agitur. Res facti a posteriori probatur. Nemo dubitat iram in numerum affectuum referri debere. Jam vero si quis ad iram concitatur, facies rubet, sudor in capite præsertim erumpit, vultus ac gestus mutantur, quamvis non in singulis eodem prorsus modo. Sunt qui cum impetu celeri verba injuriosa protrudunt; sunt qui dentes incisivos fortiter comprimunt, quasi adesset quod mordere deberent, & truculenta facie præsentem intuentur, quasi oculos instar telorum in eum vibraturi. Sunt qui pedibus equorum instar calcitrant & manus perinde agitant, ac si maximo impetu quid a se protrudere conarentur.

tur.

tur. Sunt, ut alia taceamus, qui res quascunque primum ob-
vias maximo impetu projiciunt. Sunt qui manus fortiter com-
primunt. Rubor faciei cum a sanguine sit, hunc vi corporis
magno impetu versus extremas corporis partes propelli colli-
gitur. Calor, qui sudorem promovet, cum a celeritate motus
pendeat, quo sanguis in arteriis ac venis fertur; inde denuo
colligitur sanguinem vi maxima cordis per arterias propelli.
Idem manifeste loquitur pulsus arteriarum, ex quo tactui ob-
vium est, sanguinem maximo impetu adversus tunicas
arteriarum propelli quasi easdem perforaturum. Atque
ita patet, mutari tam celeritatem, quam directionem sangui-
nis, dum quis ira exandescit, consequenter eundem motu
extraordinario cieri. Mutatio vultus & gestuum fiunt medi-
ante musculorum motu: muscoli non moventur sine motu
fluidi nervei. Ex mutatione adeo vultus & gestuum colligi-
tur extraordinarius fluidi nervei, aut si mavis, spirituum ani-
malium motus, quando ira exandescit animus. Idem eo-
dem modo patet in terrore. Si quis enim in terrorem conji-
citur, facies tota pallet, manus frigent, cor palpitat. Ma-
nus & pedes sæpius immoti in eodem situ detinentur, quem
tenent, ubi terrore corripitur animus. Similiter oculi immo-
ti hærent. Sunt qui aperto ore silent: sunt alii qui suspiria
trahunt. Sunt qui instar statuarum immoti perstant: sunt qui
præ langore humi prosternuntur, & ita porro. Quoniam
pallor faciei inde est, quod sanguis ex partibus corporis extre-
mis versus interiora recedit, cor palpitat quod nimia san-
guinis copia affluit, cui propellendæ vis ejus vix sufficit: ex
utroque colligitur, sanguinem motu extraordinario ferri per ve-
nas atque arterias, dum in terrorem conjicimur. Ex muta-
tione autem vultus atque gestuum eodem prorsus, quo ante,
modo intelligitur fluidum quoque nerveum motu extraordi-
nario moveri. Quod si cui exempla modo allata non suffi-
ciant: is ad alia in quacunque affectuum specie attendat velim.

Ubivis enim deprehendet indicia manifesta motuum extraordinariorum tum sanguinis, tum fluidi nervei.

Merentur sane hæc phænomena, quæ accuratius observentur, ut tandem obtineatur theoria vultus ac gestuum in singulis affectuum speciebus. Etsi enim per ea, quæ modo commemoravimus, in diversis subiectis hæc non prorsus eadem sint; principia tamen generalia singulis insunt, quæ decenter inde abstracta constituunt notiones theoriæ condendæ inservientes. Neque vero hæc theoria sterilis ac inutilis censeretur: in philosophia enim morali insignis ejusdem elucescet utilitas, præsertim in inclinationibus hominum naturalibus ac moribus conjectandis, nec non in certis Physiognomiæ fundamentis constituendis. Quoniam jam in Psychologia versamur, nobis potissimum res est cum affectibus, quatenus in anima sunt eademque mutationem inducunt. Quatenus enim iidem corporis statum alterant, ad Physicam spectant, ubi in rationes eorum inquirimus, quæ corpori accidunt. Quamobrem sepositis iis, quæ ad corpus spectant, affectuum differentias in anima scrutari lubet.

§. 612.

*Voluptatis
gradus
gradibus
boni quibusnam
proportionales.*

Si bonum majus nobis videtur, major quoque inde percipitur voluptas, Et contra si qua ex re major percipitur voluptas, majus bonum videtur. Quodsi enim quid majus bonum nobis videatur, majoris cujusdam perfectionis conscii nobis esse videmur (§. 554.), consequenter majorem quoque voluptatem inde percipimus (§. 516.).

Ponamus nos majorem ex re data voluptatem percipere, quam ex re quadam alia: majoris utique perfectionis nobis conscii esse videmur (§. 518.), consequenter maius bonum videtur re altera (§. 554.).

Propositione hac habemus opus in mox sequentibus, adeoque præmittenda fuit. Ceterum ex demonstratione ejusdem clarius patet, cur sensuum judicio stantes seu in confusis notionibus acquiescentes, bonum judicemus illud, ex quo voluptatem percipimus, quemadmodum antea supposuimus tanquam experientia comprobatum: utut notio fallax sit, quod voluptas etiam percipi tur ex eo, quod bonum tantummodo apparet, non vero est (§. 561.).

§. 613.

Si malum majus nobis videtur, majus quoque inde percipitur tedium, & contra si qua ex re majus percipitur tedium, majus quoque malum videtur. Etenim si quid majus malum nobis videtur, majoris cujusdam imperfectionis nobis conscii esse videmur (§. 565.), consequenter majus quoque tedium inde percipimus (§. 521.).

Tædii gradus quomodo mali gradibus proportionentur.

Contra si ex re quadam majus tedium percipitur, majoris imperfectionis nobis conscii esse videmur (§. 521.), adeoque malum majus apparet (§. 565.).

Hac quoque propositione in sequentibus instar principii demonstrandi utemur, adeoque ipsa quoque hic præmittenda fuit. Ceterum ex ejus etiam demonstratione elucet, cur sensuum judicio stantes adeoque in notionibus confusi acquiescentes malum judicemus illud, ex quo tedium percipimus, quemadmodum antea supposuimus tanquam experientia comprobatum.

§. 614.

Voluptatum insigne prædominium est id, quod Gaudium dicimus.

Gaudii definitio.

Nomina affectuum cum vim significandi habeant ex communi usu loquendi, id omnino agendum est, ut definitiones nominales, etsi alias arbitrariæ, eidem accommodentur. Quamobrem nostrum quoque est ostendere, quod significatui, quem eadem ex communi usu loquendi habent, conformes sunt. Quoniam vero id fieri nequit, nisi præmissis principiis demonstrandi, ideo demonstratio definitionibus neque adiungi, neque immediate subjici potest. Exemplum gaudii est, si quis monetarum rariorem fuerit amans eidemque dum caput dolet, quædam offertur, quam diu frustra quæsit, atque tum tanta perfunditur voluptate, ut doloris capitis non amplius sibi conscius sit. Tum enim gaudere dicitur, quod nactus fuerit nummum tantopere exoptatum.

§. 615.

Quoniam voluptas prædominatur, si tanta fuerit, ut tedium, si quod adfuerit, non appercepiatur (§. 529.); Si gaudeamus, tanta voluptate perfundimur, ut tedium, si quod adfuerit, non appercepiamus (§. 614.).

Quomodo gaudeamus.

Atque

Atque hinc intelligitur ad definitionem gaudii illustrandam ap-
prime quadrare exemplum, quod modo (*not. §. 614.*) in medium ad-
duximus. Quoniam enim tantam supposuimus voluptatem, ut do-
lor capitis non apperipiatur, qui antea tam molestus erat; volupta-
tem prædominari supposuimus.

§. 616.

*Gaudium
quomodo
oriatur.*

Si quod nobis datur, vel quod habemus, tanquam insigne bonum idea confusa nobis representamus; gaudium in nobis oritur, & magnitudo ejus magnitudini boni, quæ nobis videtur, respondet. Si enim quod nobis datur, vel quod habemus, tanquam insigne bonum nobis representamus; voluptatem quoque ex eo percipimus (§. 558. 559.), quamdiu representatio confusa (§. 536.), eamque tanto majorem, quanto majus nobis videtur bonum (§. 612.). Quamobrem cum voluptas ingens superet tædium minus, quod forsitan tum simul percipitur, seu percipi posset, tædium istiusmodi, si quod adest, non percipitur, aut, si quod adesset, non perciperetur (§. 528.). Quare cum voluptas tum prædominetur (§. 529.), gaudium oritur (§. 614.), cumque voluptatis magnitudo magnitudini boni, quæ videtur, respondeat, *per demonstrata*; magnitudo gaudii magnitudini boni, quod nobis videtur, respondet.

Idem confirmatur a posteriori. Si quis librum quendam, in quem incidit, judicat esse bonum, propterea quod sibi representat fructus ex lectione ejusdem percipiendos, de quibus olim distincte cogitavit, idea quadam confusa; gaudio perfunditur. Quod si plures gaudeant hac eadem de causa: unius tamen gaudium majus esse gaudio alterius, ex vultu, gestu, voce ac verbis colliges. Quod si in differentiam inquisiveris, illum, qui majore gaudio effertur, respondentem audies, se diu multumque istiusmodi librum quæsisse, cujus jam compos fiat, manifesto indicio in gaudium præsens multos influere status præteritos. Percipies præterea eundem, qui tantopere gaudet, ingens pretium statuere fructibus ex
lectio-

lectione libri percipiendis; id quod his vel geminis verbis exprimit, librum hunc sibi esse dono vel mille aureorum chariorem; se mille thaleris, quam libro isto carere malle. Alterius vero responsiones, cujus gaudium tantum non deprehenditur, ab hisce dissident. Istæ erunt, ex quibus colligi nequit tot status præteritos in præsentem statum gaudii influere, nec tantum colligi potest affectionis pretium.

Quoniam gaudium totum quantum a gradu voluptatis pendet, quæ percipitur (§. 614.), hinc vero porro prædominii quantitas æstimanda (§. 529.); ignorata Psychimetria, in qua ea, quæ animæ insunt, ad mensuram revocantur, impossibile est ut demonstratio talium, quæ quantitatem involvunt, sit omnibus suis numeris absoluta.

§. 617.

Si gaudium in nobis oritur, propterea quod quid nobis datur, vel quod quid habemus, ipsum nobis repræsentamus tanquam valde bonum *Conversio propositionis præcedentis.* *Et quanto magis gaudemus, tanto majus bonum nobis existimatur.* Etenim si gaudium in nobis oritur, voluptas insigniter prædominatur (§. 614.), adeoque tanta est, ut tædium, si quod adfuerit, non apperipiatur (§. 529.). Quoniam itaque insignis cujusdam perfectionis tunc nobis conscii sumus (§. 511.), gaudium vero oritur ideo, quod quid nobis datur, vel quod quid habemus *per hypoth.* id ipsum quod nobis datur, vel quod habemus, tanquam valde bonum nobis repræsentare debemus (§. 554.).

Enimvero quanto magis gaudemus, tanto major esse debet volupras prædominans (§. 614.); adeoque tanto majoris perfectionis conscii nobis videmur (§. 516.), consequenter bonum tanto videtur majus, quod gaudii causa nobis est (§. 554.).

Quæ ad confirmandam propositionem præcedentem a posteriori in medium adducta fuere, ea etiam propositionem præsentem confirmant.

§. 618.

*Definitio
gaudii
num usui
loquendi
conformis.*

Definitio gaudii, quod sit prædominium insigne voluptatum, est communi usui loquendi conformis. In confesso est apud omnes nos gaudere de bono præsentē : unde *Cartesius* in Tractatu de Passionibus animæ part. 2. art. 61. Consideratio, inquit, præsentis boni excitat in nobis gaudium, cum bonum nobis proponitur ceu ad nos spectans. Constat ex demonstratis idem sequi ex notione, quod gaudium in prædominio voluptatum insigni consistat (§. 616. 617.). Quamobrem definitio hæc communi usui loquendi conformis. Etsi autem *Cartesius* affirmare videatur, omne bonum ad nos spectans excitare gaudium, nec vulgo aliud dicatur; experientia tamen repugnat. Quamvis igitur nos addiderimus determinationes duas necessarias, scilicet quod idea boni confusa esse debeat & quod bonum eximium judicari debeat; non tamen ideo recedimus ab usu loquendi. Sane qui has determinationes tacent; non ideo easdem negant, vel in dubium vocant. Et, si vel maxime easdem negarent, vel in dubium revocarent; id tantummodo defectum attentionis vel acuminis argueret: tantum abest ut quid a prædominio voluptatum insigni diversum gaudii nomine indigitent. Immo non desunt, qui determinationis unius, scilicet quod boni idea confusa sit, disertam mentionem injiciunt, quamvis alio nomine. Ita *Joh. Baptista du Hamel* in philosophia morali Tract. 3. disp. 2. quæst. 3. artic. 1. Philos. vet. & novæ Tom. 2. p. m. 245. de affectibus in genere monet, quod circa bonum, aut malum sensibile versentur. Unde patet, quod ipsius quoque judicio bonum sensibile gaudium excitare debeat. Jam vero bonum dicitur sensibile, quatenus confusa ejus nobis est idea nostra phrasi. Quamobrem laudatus autor agnoscit, boni ideam confusam esse debere, si quidem gaudium ex ea oriri debet.

Modum hunc probandi conformitatem definitionis nominalis cum usu loquendi facile capiet, qui in demonstrando fuerit versatus.

tus. Facilius adhuc capiet, qui præterea noverit, quæ de determinato demonstravimus in Ontologia. Præterea probe notandum est, quod hæcenus autores perinde ac vulgus pauciora sæpius dicant, quam in ideis ipsorum continetur. Et nostra sane philosophia huic defectui medetur.

§. 619.

Prædominium tædii insigne est id, quod *Tristitia* ap- *Tristitia*
pellatur. *definitio.*

Tristitia gaudio opponitur: unde ex definitione gaudii intelligitur, quomodo ea definire debeat. Quoniam itaque gaudium definitur per prædominium insigne voluptatum (§. 614.), voluptati autem tædium opponitur in eo significato, quo nos vocabulo isto utimur (not. §. 518.); tristitia utique definienda est per prædominium tædii insigne.

§. 620.

Si tristes sumus, tanto tædio afficitur animus, ut voluptatem, si qua adsit, non appercipiamus, aut, si qua adesset, non apperciperemus. Etenim si tristes sumus, tædium prædominatur (§. 619.). Tantum igitur est, ut tædium, si quod adfuerit, non appercipiat, aut, si quod adesset, non apperciperetur (§. 529.). *Qualis sit tristitia.*

Idem etiam confirmatur a posteriori. Ponamus nobis nunciari mortem amici charissimi: nemo non novit, quod tunc tristitia afficiatur animus. Ponamus nobis offerri cibum, quem nunquam sine voluptate comedimus: nemo non novit, nos nullius voluptatis nobis esse conscios, dum eundem capimus. Equis enim est qui nesciat nos in isto animi statu affirmare, quod cibus jam nobis non sapiat? Immo recordati istiusmodi statuum haud raro in hæc verba erumpimus; nos nec voluptatem percepturos ex illo cibo, quo alias valde delectamur, quando tristitiæ gradum significare voluerimus. Atque hinc vulgo obtinet, ut gradum tristitiæ, quo quis affligitur, indicaturi enarremus quod ex hac, vel ista re voluptatem nullam perceperit, etsi eadem alias valde delectetur.

In vernaculo sermone, qui verbis ac phrasibus abundat ad res quasvis apte exprimendas, multo clarius singula patent non modo in omni affectuum doctrina; verum per universam philosophiam, præsertim practicam. Vix enim occurrit aliquis mentis status, cui indigitando non destinetur peculiaris quædam loquendi formula; qua vulgus sæpius rectius utitur eruditis, quorum de phrasologia præjudicia verba a rebus separant, veritate significatus neglecta.

Unde tristitia oritur.

§. 621.

Si quod nobis præsens est, tanquam malum ingens idea confusa nobis representamus; tristitia in nobis oritur & magnitudo ejus magnitudini mali, quæ nobis videtur, respondet. Si enim quid nobis representamus tanquam nobis malum, imperfectionis ejusdam nostræ nobis conscii sumus (§. 565.), quamdiu scilicet idea mali confusa est (§. 536.). Quodsi ergo malum ingens videtur, ingentis cujusdam imperfectionis nobis conscii esse videmur, consequenter tædium quoque, quod oritur, ingens est (§. 521.). Quamobrem, si qua adsit voluptas, quam plurimum superat, eam non appercipimus, aut, si talis adesset, eam non apperciperemus (§. 528.), adeoque tædium prædominatur (§. 529.). Tristitia igitur oritur (§. 619.). Quoniam vero imperfectionis magnitudini respondet tædii magnitudo (§. 521.), magnitudini autem ejusdem imperfectionis mali etiam magnitudo respondet (§. 565.); tristitia, quæ in magnitudine tædii consistit (§. 619.), magnitudini mali, quæ nobis videtur, respondet.

Idem etiam confirmatur a posteriori. Pertinet huc exemplum, quo ad confirmandam propositionem anteriorem usi sumus (§. 620.). Quod enim amicus mortuus fuerit, quem impense amabamus, malum nobis reputamus, tantoque majus malum istud existimatur, quanto majus bonum amicitia ejus nobis videbatur. Amissio enim boni ingentis ingens malum ab omnibus reputatur. Patet igitur tristitiam hic oriri ex opinione mali ingentis nobis præsentis. Et quoniam tristitia tanto major est, quanto charior nobis fuerit amicus, consequen-

sequenter quanto majus malum nobis videtur jactura ejusdem; tristitiæ magnitudinem respondere magnitudini mali palam est.

Notio tristitiæ communis est non minus ac gaudii: unde ex eo, quod quis tristis est, colligimus ei mali quidpiam accidisse; quemadmodum ex eo, quod gaudet, colligimus ipsum bono quodam potitum esse. Enimvero quod propositio possit converti, demonstrandum nobis est; quem in finem addimus propositionem sequentem.

§. 622.

Si tristitia in nobis oritur ex eo, quod accidit, id nobis ^{Idem ulte-} *tanquam malum haud parvum confuse representare debemus, &* ^{Trius expen-} *quanto tristiores sumus, tanto majus æstimatur malum. Si dicitur.* enim in nobis tristitia oritur ex eo, quod accidit; tædium ex eo percipitur, idemque prædominatur (§. 619.), adeoque tantum est, ut voluptas, si qua adsit, non percipiatur, aut, si qua adefset, non apperciperetur (§. 529.). Quoniam itaque tædium voluptatem plurimum superare debet (§. 528.); ingentis cujusdam imperfectionis sibi conscius esse debet (§. 521.). Neceffe igitur est ut id, quod accidit, tanquam malum haud parvum sibi representet (§. 565.) & quidem confuse (§. 536.). Et quia tædii magnitudo a magnitudine imperfectionis (§. 521.), consequenter mali pendet (§. 565.); tanto majus malum ex opinione nostra esse debet, quanto tristiores sumus.

Quæ ad propositionem præcedentem confirmandum in medium adduximus, ea etiam ad præsentem confirmandam conducunt. Est enim præsens conversa præcedentis: propositionibus autem, quarum una in alteram converti potest, eadem notio respondet, consequenter idem quoque exemplum utrique confirmandæ inservit.

Propositio adeo præsens & præcedens eadem notione communi exhibentur.

§. 623.

Quoniam tristitia afficimur, si quid nobis tanquam ma- ^{Definitio} lum ^{tristitia} ^{realis.}

lum haud parvum repræsentamus, quod nobis præsens est (§. 621.) & ex adverso si tristitia in nobis oritur ex eo, quod accidit, id nobis tanquam malum haud parvum idea confusa exhibere debemus (§. 622.); *Tristitia* definiri potest per affectum, qui in nobis oritur ex opinione rei præsentis, quam nobis confuse tanquam malum haud parvum repræsentamus.

Hoc ideo monemus, quod *Cartesius* ipsumque secuti utuntur definitionibus realibus.

§. 624.

Gaudii definitio realis.

Similiter quia gaudio afficimur, si quod nobis præsens est tanquam insigne bonum idea confusa repræsentamus (§. 616.) & ex adverso si gaudium in nobis oritur ob rei cujusdam præsentiam, eam nobis tanquam nobis valde bonam confuse repræsentare debemus (§. 617.): *Gaudium* definiri potest per affectum, qui in nobis oritur ex opinione boni præsentis confuse percepti & quidem haud parvi.

Idem tenendum est de sequentibus affectuum speciebus.

§. 625.

Conformitas definitionis tristitiæ cum usu loquendi.

Tristitiæ significatus, quem in definitione nominali eidem attribuimus, est usus loquendi conformis. Nemo non ex tristitia alterius colligit, accidisse ipsi quidpiam mali, manifesto indicio, quod malum nobis præsens pro tristitiæ causa unica habeatur. Similiter si quid alicui accidit mali, nemo non inde colligit, quod tristis esse debeat, manifesto indicio, quod malum nobis præsens habeatur pro necessaria tristitiæ causa. Ex communi igitur notione tristitia est affectus, qui oritur ex mali præsentis opinione. Quod vero tacite supponatur malum ingens, saltem opinione nostra, hinc conficitur, quod ubi alteri mali quidpiam accidit, & hoc tamen non obstante minime contristatur, rationem reddituri malum vel extenuemus, vel ostendamus cur alteri tale non videatur, veluti si tristitia non afficitur animus ex morte agnati proximi, quod eum non amaverit, neque adeo sibi malum existimet, se agnato suo fuisse

fuisse orbatum. Definitio igitur tristitiæ realis, quam dedimus (§. 623.), cum notione communi convenit, quam & *Cartesius* retinet in Tract. de Passione animæ part. 2. art. 61. tristitiæ in nobis excitari affirmans mali præsentis consideratione, cum nobis proponitur ceu ad nos spectans. Enimvero tristitiæ definitionem realem deduximus ex propositionibus (§. 621. 622.), quas vi nominalis demonstravimus. Quoniam itaque definitio realis definitioni nominali æquipollet, quod scilicet una ex altera demonstrari potest; definitio quoque nominalis, quod sit radii prædominium insigne, notioni communi, consequenter usui loquendi conformis (§. 139. Log.).

Idem etiam sic ostenditur. Notio communis tristitiæ colligitur ex duabus propositionibus, quas ex observationibus deduximus. Easdem propositiones deduximus ex definitione tristitiæ nominali (§. 621. 622.). Ergo definitio nominalis notioni communi convenit.

§. 626.

Si quod uni bonum ingens videtur, alteri tale non videatur, aut minus saltem bonum habeatur; ille gaudio multo effertur, hic autem vel nullo afficitur, vel saltem multo minore. Quodsi cui videatur malum, quod ab altero pro bono habetur; ille tristitia, hic gaudio afficitur. Ponamus enim Titio bonum ingens videri, quod ipsi datur, insigni gaudio efferrī debet (§. 616.). Ponamus idem Mevio pro bono non haberi, nullo quoque gaudio inde afficietur (§. 624.). Ponamus idem Sempronio pro bono quidem haberi, sed multo minori, quam Titio videtur; gaudio quidem afficietur, sed multo minore, quam quo Titius effertur (§. 616.). Ponamus denique idem Cajo pro malo haberi, quod a Titio & Sempronio pro bono reputatur; erit ipsis tristitiæ causa (§. 623.), quod ceteris gaudium creat (§. 624.).

Atque ita apparet, quomodo eodem posito objecto unus gaudere possit, alter vero contristari. Quomodo unus multo, alter exiguo

quo gaudio afficiatur; immo quando uni gaudium creat objectum, quod alteri nullum creat. Propositionis præsentis veritas a posteriori adeo manifesta est, ut eam inde confirmari non sit opus. Ceterum propositio ipsa, quemadmodum omnis affectuum doctrina plurimum utilitatis habet in philosophia morali, cum affectus per eam potestati nostræ subjiciantur.

§. 627.

*Gaudii &
Tristitia
mutabili-
tas in eo-
dem subje-
cto.*

Quoniam perinde est, siue duo eodem, vel diverso tempore contrariam de objecto foveant sententiam, ut unus idem judicet bonum, alter malum, vel saltem minus bonum, aut rem omnem in dubio relinquit; siue unus diverso tempore diversum foveat de objecto aliquo ad se relato judicium; quæ de diversis subjectis in propositione præcedente demonstrata sunt, ea etiam ad unum idemque subjectum diverso tempore applicari possunt. Quamobrem si quis alio tempore malum judicet, quod antea bonum judicaverat, cum antea gauderet, alio tempore contristabitur & contra. Porro si quis alio tempore minus bonum, vel malum judicet, quod antea majus visum fuerat, cum antea plurimum gauderet, vel contristaretur, nunc gaudio vel tristitia minore afficietur. Denique si quis alio tempore in dubio relinquit, utrum quid bonum sit, nec ne, quod antea bonum, vel malum judicaverat; cum antea gauderet, vel contristaretur, alio tempore nec gaudebit, nec contristabitur.

Supponimus hic unam eandemque personam diverso tempore considerari posse tanquam duas personas diversas, si contrariam foveat de objecto aliquo opinionem. Neque enim duæ personæ in præsentem negotio considerantur tanquam diversæ, nisi quatenus contraria sunt de objecto eodem ad se relato judicia. Diverso igitur tempore una eademque persona eodem modo differt a seipsa, quo duæ personæ eodem tempore a se invicem differunt. Quamobrem & personam unam eandemque diverso tempore positam spectare licet tanquam duas, & vicissim duas personas eodem tempore, vel etiam tempore diverso tanquam unam eandemque personam bis positam; tem-

poris nimirum in præsente negotio nulla habetur ratio, quemadmodum ex definitione gaudii & tristitiæ reali liquet (§ 623, 624.), ex qua intelligitur, nec in genesis gaudii, nec in tristitiæ genesis influere tempus, quo iudicium fertur. Latet in his principium heuristicum maximæ utilitatis, quod ab eo facile eruetur, qui universalia abstrahere noverit. Ceterum me non monente patet, posse propositionem præsentem independentem ab antecedente eodem prorsus modo demonstrari, quo antecedentem demonstravimus. Dantur autem propositiones quædam universales, quibus utraque & præcedens, & præsens, una cum plurimis aliis per modum corollarii continetur, quas hic apponi non inconsultum duximus.

§. 628.

Si quis affectus ex boni, vel mali representatione oritur; Affectus & quod eodem commotus bonum, vel malum judicaverat, postea quando in medio relinquit, quale sit; is cum antea affectu commovebatur, nunc nullo commovebitur. Quoniam enim affectus ex confusa boni & mali representatione oriuntur (§. 605.); per eam intelligitur, cur potius oriantur, quam non oriantur, consequenter hæc ipsa confusa boni malique representatio affectuum ratio sufficiens est (§. 56. Ontol.). Quamobrem si quis nec malum, nec bonum iudicat, quod antea ipsi malum, vel bonum, visum fuerat, sed quale sit in medio relinquit, is nullo affectu alio tempore commoveri debet, cum antea affectu quocunque commoveretur.

Hoc pacto patet, quomodo fieri possit ut, quem objectum aliquod ad affectum quendam concitavit, eundem in posterum idem objectum non amplius ad eundem affectum perducatur. Enimvero cum fieri etiam possit, ut quem objectum quoddam non movet, in eodem postea idem objectum aliquem sive jucundum, sive molestum causetur; sequens addenda venit propositio,

§. 629.

Si quis objectum aliquod ad se relatum nec bonum, nec Affectus malum iudicat, postea autem pro bono, vel malo ingente reputatur; cum antea illud affectum excitaret nullum, postea quendam causabitur. Quoniam enim affectus ex boni & mali confusa

repræsentatione oriuntur (§. 605.), Sempronius autem objectum aliquod ad se relatum nec bonum, nec malum judicat; nullus quoque in eodem affectus orietur. Enimvero quoniam postea idem objectum ad se relatum tanquam bonum, vel malum sibi repræsentat; affectus jam in eodem orietur. Quamobrem cum objectum nullum antea excitaret affectum, postea quendam causabitur.

Tacite supponimus ceteras determinationes, quæ requiruntur, ut affectus ex repræsentatione boni & mali oriantur, veluti quod esse debeat confusa, quod boni, vel mali determinatus quidam requiratur gradus & quæ sunt his gemina, ne præter necessitatem simus prolixiores, quam par erat. Nimirum talem hic & in similibus casibus supponimus boni malique repræsentationem, qualis ad gignendum affectum sufficit. Talia monemus in gratiam tyronum sciolorum, qui cum cæcutiant sibi acumine præstare videntur.

§. 630.

*Cur in uno
affectum
quendam
producat
objectum in
alio nullum,*

Si quis objectum aliquod tanquam bonum, vel malum sibi repræsentat, quod alter nec bonum, nec malum judicat; cum ille affectu commovetur, hic ab omni prorsus immunis est. Eodem prorsus modo ostenditur, quo propositionem anteriorem (§. 628.) ostendimus.

Poteramus quoque idem ex propositionibus anterioribus per modum corollari colligere vi principii, de quo abunde dictum est in antecedentibus, scilicet quod personæ duæ spectari possint instar unius bis positæ, ubi temporis nulla habetur ratio (not. §. 627.).

§. 631.

*Affectus
molesti in
jucundum
mutatio &
contra.*

Si quis objectum aliquod alio tempore sibi repræsentat tanquam bonum, quod antea malum judicaverat; cum idem affectum molestum provocasset, nunc jucundum causabitur & contra. Quoniam enim in Sempronio affectus quidam oritur ex consideratione mali per hypoth. ex malo autem, quod cognoscimus, tædium percipimus (§. 569.); affectus iste cum magno tædii gradu conjungitur, adeoque molestus est (§. 609.). Enimvero quia mutata sententia Sempronius postea bonum judicat, quod antea malum

malum ipsi visum fuerat *per hypoth.* affectus, qui tum oritur eodem objecto ad ipsum relato, ex consideratione boni ortum trahit. Quare cum ex bono, quod cognoscimus, voluptatem percipiamus (§. 558.); affectus iste cum insigni voluptatis gradu conjungitur (§. 506.). Est igitur affectus jucundus (§. 608.). Patet adeo Sempronium, qui objectum aliquod sibi repræsentat tanquam bonum, quod antea malum ipsi visum fuerat, nunc affectum jucundum experiri, quem antea sentiebat molestum.

Ponamus jam ex adverso Sempronium sibi repræsentare objectum tanquam bonum, dum affectus oritur. Quoniam ex bono, quod cognoscimus, voluptatem percipimus (§. 558.); affectus iste cum insigni gradu voluptatis conjungitur (§. 606.). Est igitur affectus jucundus (§. 608.). Enimvero quia mutata sententia Sempronius postea malum judicat, quod antea bonum ipsi visum fuerat *per hypoth.* affectus, qui tum oritur, eodem objecto ad ipsum relato, ex consideratione mali oritur. Quare cum ex malo, quod agnoscimus, tedium percipiamus (§. 569.); affectus iste cum insigni tædii gradu conjungitur. Est igitur affectus molestus (§. 609.). Patet adeo Sempronium, qui objectum aliquod sibi repræsentabat tanquam malum, quod antea bonum ipsi visum fuerat, nunc affectum experiri molestum, quem antea sentiebat jucundum.

§. 632.

Quoniam personæ duæ in præsentē negotio considerari possunt instar personæ unius ejusdemque diversis temporibus diversimode de eodem subjecto ad se relato judicantis (not. §. 627.); si unus objectum aliquod sibi repræsentat tanquam bonum, quod alter sibi repræsentat tanquam malum, cum ille affectum jucundum experitur, hic molestum sentiet (§. 631.).

*Affectus
oppositi ab
eodem ob-
jecto in duo-
bus subje-
ctis exci-
tati.*

Me non monente palam est posse hanc propositionem independenter ab antecedente eodem modo demonstrari, quo antecedentem

demonstravimus. Ex propositione autem præsentē intelligitur, cur idem objectum oppositos prorsus in diversis subjectis excitet affectus; non vero opus est ut objectum sit numero idem; sed sufficit esse genere, vel specie idem.

§. 633.

Amoris definitio.

Amor est dispositio animæ ad percipiendam voluptatem ex alterius felicitate.

Dispositio hæc data occasione deducitur in actum, atque tum affectus oritur, quam amoris nomine insignimus. Fert tamen usus loquendi, ut ipsam dispositionem amoris nomine indigitemus, cum amorem tribuamus illi, qui non actu commovetur, nisi ubi sentit alterius felicitatem.

§. 634.

Effectus amoris.

Quodsi ergo is, qui alterum amat, ejus felicitatem cognoscit, ex ea actu voluptatem percipit (§. 633.). Pone enim eum intueri felicitatem alterius, nullam tamen inde percipere voluptatem. Animus igitur ejus non est ita dispositus, ut ex felicitate alterius voluptatem percipiat, consequenter eum non amat (§. cit.): id quod hypothesin evertit.

Ex actu amoris dispositionem illam colligimus, atque probaturi, quod alterum quis amet, ad eundem provocamus.

§. 635.

Gaudium amantis.

Qui alterum impense amat, de felicitate ejus gaudet, tantoque magis gaudet, quanto magis eum amat. Qui enim alterum impense amat, is plurimum voluptatis ex alterius felicitate percipit (§. 633.). Quodsi ergo tanta evaserit voluptas, ut tædium, si quod adesset, non apperciperet; voluptas prædominatur (§. 529.). Quamobrem cum in prædominio voluptatum gaudium consistat (§. 614.); si alterum impense quis amat, de felicitate ejus gaudet.

Quoniam amor non aliter sese exerit, quam voluptatis perceptione (§. 633.): quo magis quis alterum amat, eo major est voluptas, quam ex felicitate alterius percipit. Quare cum gaudium tanto majus sit; quanto major est illa voluptas,

quæ

quæ prædominatur (§. 614.); gaudium tanto majus erit, quanto major fuerit amor.

Felicem vulgo judicamus eum, cui multa donantur & tanto feliciorē judicamus, quanto majus est donum, quod accipit. Quodsi ei, quem amamus, donum offertur, nos perinde gaudemus, ac si ipsimet idem accepissemus. Hinc audies affirmantes, quod tantopere gaudeamus, ut majus non foret gaudium, si ipsimet donum istud accepissemus, & felicem prædicantes accipientem. Quo major fuerit amor, eo magis nos gaudere, unusquisque in seipso experiri potest. Tenendum vero fieri posse, ut contrariis affectibus impediatur amoris actus, veluti si invidemus alteri felicitatem, quod ea nos carere deprehendamus. Etsi enim felicitatem alterius, quem amamus, appetamus, fieri tamen potest, ut adsint rationes, cur alterum aliqua in re nobis feliciorē esse nolimus. Ponamus v. gr. Mevium ambire spartam, quam ornare possit: ponamus porro eum impense amare Titium. Quodsi tamen in Titium confertur munus, quod ipsemet ambit, præsertim ubi repulsam ægerrime fert, ex eo voluptatem non percipit, quod Titius ad munus istud promotus fuerit. Hinc audies asserentem, se non invidere Titio felicitatem suam. Se summo gaudio elatum iri, si ad munus multo præstantius admotus fuisset, modo huic non fuisset præfectus. Abstrahimus in scientiis ab omnibus impedimentis, quæ offerri possunt, atque adeo cautos esse oportet, qui eorum experimenta vel in se, vel in aliis capere voluerint, quæ de anima hic traduntur.

§. 636.

Per *felicitatem* hic intelligimus statum, quo voluptas vera *Felicitatis* perdurat. Dicitur *felicitas vera* ad differentiam *apparentis*, quæ definitio. est status, quo quis voluptate apparente fruitur.

§. 637.

Infelicitas est status, quo tædia perdurant.

000 3

Infelicitas
In. tis definitio.

Infelicitatem non opus est distingui in veram & apparentem. Etsi enim ex eo tedium sit, quod per errorem de re aliqua statuatur; non tamen negari potest, tedium istud quandam infelicitatis partem constituere. Sane homines haud raro præter rationem sese reddunt infelices, quod vitam cum tædio transigant, quam sine eo transigere poterant.

§. 638.

*Quenam
ad felici-
tatem ho-
minis quid
conferant.*

Quoniam itaque voluptas quælibet vera felicitatem ingreditur, quemadmodum pars totum (§. 636. *Psych.* & §. 341. *Ontol.*); quicquid voluptatem veram homini creat, id ad felicitatem ejus quidpiam confert. Unde porro est, quod ad felicitatem hominis conferre quid videatur illud, quod voluptatem apparentem eidem creat.

Si quis ex divitiis voluptatem percipit; is divites prædicat felices. Si quis scientiæ fuerit cupidus, ut ex ea plurimum capiat voluptatis; is eum felicem esse judicat, qui animum multa scientia imbuendi amplissimam nactus est occasionem. Quemadmodum quemlibet sua trahit voluptas, ita etiam variant hominum de felicitate judicia. Hic parum refert, utrum judicium sit veritati consentaneum, nec ne. In moralibus autem veritas distinguetur ab eo, quod apparet.

§. 639.

*Quenam
ad infeli-
citatem quid
conferant.*

Similiter quoniam tedium quodlibet ad infelicitatem ejus pertinet (§. 637.); quicquid homini tedium creat, id ad infelicitatem ejus quidpiam confert. Unde porro est quod ad infelicitatem hominis conferre quid videatur istud, quod eidem tedium creat.

Atque hinc apparet, quomodo quis seipsum reddere possit infelicem, scilicet si sibi meripsi tædia præter necessitatem creet.

§. 640.

*Effectus
amoris.*

Qui alterum amat, ex ejus voluptate voluptatem percipit, & ideo gaudet, quod gaudet alter, si idem fuerit de subiecto gaudii judicium. Qui enim alterum amat, is ex felicitate ejus voluptatem percipit (§. 634.). Quoniam itaque quælibet voluptas vera ad felicitatem alterius pertinet, quælibet autem vo-

luptas

luptas apparens ad eandem pertinere videtur (§. 636.); igitur qui alterum amat & secundum veritatem iudicat ex voluptate vera, qua fruitur alter; qui vero secundum apparentiam iudicat, ex qualibet apparente voluptate alterius voluptatem percipit.

Quoniam igitur porro gaudium in voluptatum prædominio consistit (§. 614.); qui voluptatem ex alterius voluptate percipit, gaudere ideo debet, quod gaudet alter, si quidem idem fuerit de objecto gaudii ueriusque iudicium. Quoniam itaque amans ex voluptate amati voluptatem capit *per demonstrata*; amans quoque gaudet, quando gaudet amatus, si idem fuerit de objecto gaudii iudicium.

Idem confirmatur a posteriori. Si quis amans alterum intelligit ei quid obligasse, unde voluptatem percipit; se in partem voluptatis istius venire ait amorem suum in alterum significaturus. Quoniam phrasæ vulgo receptæ notionibus communibus respondent; iisdem conforme est, quod amans ex amati voluptate voluptatem ipsemet percipiat. Ponamus Titium amare Sempronium & Sempronio offerri donum pretiosum, ob quod insigniter gaudeat tanto munere auctus. Titius de eo certior factus ipsemet gaudebit, immo gaudebit magis subinde, quam Sempronius. Gaudii huius non aliam reddit rationem, quam quod ipsi perinde sit ac si donum ipsemet accepisset, quodque Sempronio non magis idem inuideat, quam sibi metipso: quo ipso satis superque significat, se voluptatem Sempronii suam facere & commune esse gaudium, si causa gaudendi illi suppeditetur. Inde etiam est, quod, qui alterum amat, eidem voluptatem creare studeat, quod eadem in ipsummet redundet. Immo inde est, quod propositio præsens breviter ita efferri soleat: Voluptas amicorum communis est, itemque gaudium amicorum commune est. Neminem offendat, quod addiderimus restrictionem, si idem fuerit de objecto gaudii iudicium. Etsi enim experientia ali-

quando

quando refragari videatur, quando scilicet gaudemus, quod nobis narratur alterum, quem amamus, summa cum voluptate vitam transigere; non tamen ideo revera contrariatur, si rem curatius spectes. Etenim cum de objecto voluptatis, seu gaudii, tanquam nobis ignoto prorsus non judicemus; taceat iudicium alterius approbamus ipsumque iustam gaudendi causam habere supponimus. In aliis autem casibus manifesta est restrictio. Ponamus enim Titium impense amare Sempronium; hunc autem nubere virgini, quæ cum dives esse putetur non est ac præterea iis donibus caret, quæ felix matrimonium efficiunt. Gaudebit equidem Sempronius, sed non gaudebit Titius, quod aliud sit Titii, quam Sempronii de hoc matrimonio iudicium. Quod si autem ponamus Sempronii iudicium esse verum, Titii autem iudicium a veritate aberrare: utique & Titius gaudebit, errore suo agnito, cum iam non sit affectus contrarius, qui idem impediatur. Si quis ad ea, quæ quotidie obvia sunt, attentum afferat animum; is plurima observabit, quæ propositionis præsentis veritatem confirmant, ut plura eam in rem addi non sit opus.

Potest etiam propositio præsens converti. Quoniam vero ex conversa patet signum haud fallax amoris inde peti posse, quod quis ex voluptate alterius voluptatem percipiat, vel gaudeat, quod gaudeat alter; eandem subjici operæ pretium ducimus. Habent signa affectuum plurimum usum in philosophia morali, ejus in primis parte semiotica & in arte conjectandi hominum mores.

§. 641.

*Signum
amoris.*

Si quis ex voluptate alterius voluptatem percipit, vel id eo gaudet, quod alter gaudet; is alterum amat. Quoniam enim voluptas omnis ad felicitatem pertinet, vera quidem ad veram, apparens ad apparentem (§. 636.); qui voluptatem percipit ex voluptate alterius, ejus animus dispositus esse debet ad voluptatem ex alterius felicitate percipiendam, adeoque alterum amat. (§. 633.).

Quod si quis ideo gaudet, quod gaudet alter, cum gau-
di-

dium in prædominio voluptatum insigni consistat (§. 614.); animus ejus erit dispositus ad voluptatem ex voluptate alterius percipiendam. Sed cui ita dispositus est animus, is alterum amat, *per demonstrata*. Ergo alterum amat, qui ideo gaudet, quod gaudet alter.

A posteriori confirmatur propositio per ea ipsa, quæ ad confirmandam præcedentem in medium adduximus. Constat etiam vulgo homines ex eo colligere, quod quis alterum amet, si ex voluptate alterius voluptatem ipsemet percipit, ac ideo gaudet, quod gaudet alter, & quasi attonitos hæreere, ubi supponentes amorem animadvertunt contrarium, ignorata ratione, ob quam effectus amoris impeditur.

§. 642.

Si quis alterum amat, ex ejus tædio ipsemet tædium percipit, ac ideo contristatur, quod alter tristis sit. Si quis enim alterum amat, is volup- *Alius amoris effectus.* tatem percipit ex voluptate alterius, immo gaudet ideo, quod gaudet alter (§. 640.), consequenter ex insigni voluptate alterius insignem & ipse percipit (§. 614.). Quoniam itaque voluptas alterius tanto majus bonum nobis videtur, quo major est voluptas, quæ a nobis ex ista percipitur (§. 612.) ; oppositum eidem tædium malum nobis videri debet, idque tanto majus, quo majus ipsum fuerit, consequenter nos ex eodem tædium percipere debemus, atque tanto majus, quo majus ipsum est (§. 613.), atque adeo contristari debemus, si tristitia afficitur alter, quem amamus (§. 619.).

Idem confirmatur a posteriori. Ponamus enim Mevium vehementer amare Titium, atque ob mortem patris sui præmaturam Titium plurimum contristari. Mevius videns Titium mortem patris tantopere lugere, ipse quoque contristatur, effusis lachrymis. Hæc adeo explorata sunt, ut, quando Titium lachrymas fundentem videmus, quod Mevium flentem contuetur, inde colligamus Titium a Mevio amari. Im-

Immo dum audientes nuncium de morte parentis amici cuiusdam nostri a lachrymis nobis temperare non possumus, in hæc verba erumpimus: eheu ! quantum lugebit Titius mortem parentis sui ? quanta tristitia perfundetur animus ejus ? Unde satis superque intelligitur, tristes esse nos non alia de causa, quam quod Titium tristitia affici colligimus ex morte patris. Quia igitur amamus Titium, ideo contristamur, quod ipse tristis est. Quodsi quidam occurrunt casus, in quibus tristes non sumus, quando eum tristem videmus quem amamus, impedimentum ex circumstantiis facile detegitur, quale est opinio, quod alter præter rationem tristitiæ indulgeat, ut vel temeritati ejusdem succenseamus.

Probe notandum est non minus de objecto gaudii, quam tristitiæ, idem referri non ad amantem, sed ad amatum, dum amans judicat utrum bonum sit, nec ne: immo sæpius amantem in judicando sequi opinionem amati, non suam animi sententiam. Atque ideo diximus, idem esse debere amantis & amati judicium. Quodsi amans idem objectum ad se referret, atque gauderet, quod sibi bonum existimaret, tristis esset, quod idem sibi malum esse putaret; non ex amore proveniret gaudium, nec ab eo ortum duceret tristitia. Fieri tamen potest, immo plerumque solet, ut gradu differant judicia amantis atque amati (§. 597. 598.). Nimirum quando imaginatio in idea voluptatis actædii confusa aliena miscet (§. 524.); fieri non potest, ut imaginatio diversis subjectis eadem suggerat (§. 104.).

*Signum
amoris.*

§. 643.

Si quis ex tædio alterius tædium percipit, vel ideo contristatur, quod alter tristis sit; is eundem amat. Qui tædium ex alterius tædio percipit, cum tædium omne ad infelicitatem spectet (§. 639.), ita dispositum habet animum, ut ex infelicitate alterius tædium percipiat. Infelicitatem igitur alterius tanquam sibi malam repræsentare debet, atque tanquam malum tanto majus, quanto majus tædium est, quod inde percipitur (§. 613.). Alterius igitur felicitatem sibi repræsentare debet

tan-

tanquam bonam, cum bonum perinde opponatur malo ac voluptas tædio opponitur, consequenter ex felicitate alterius tanto maiorem voluptatem percipere debet, quanto majus bonum eadem ipsi videtur (§. 612.). Quoniam itaque animus ipsi dispositus est ad voluptatem ex alterius felicitate percipiendam ; alterum amat (§. 633.).

Quæ ad confirmandam propositionem præcedentem in medium adducta fuere , etiam ad confirmandam præsentem faciunt, quæ nonnisi conversa anterioris est. Inprimis hic probe notandum, quod nemo non amorem alterius inde colligat, quod alterius tædia ac tristitiam nostra faciamus.

§. 644.

Si quis ex voluptate alterius voluptatem percipit ; is ex tædio alterius tædium percipere debet & contra. Etenim si ex voluptate alterius voluptatem percipimus, eam nobis repræsentare debemus tanquam bonum tanto majus, quanto major est voluptas, quæ inde percipitur (§. 612.), consequenter quod voluptati opponitur, seu ejus contrarium, cum malum bono opponatur, seu ejus contrarium sit, repræsentare nobis debemus tanquam malum. Enimvero quod voluptati opponitur, tædium est (not. §. 518.). Ergo tædium nobis alterius repræsentare debemus tanquam malum, consequenter tædium percipere debemus ex tædio alterius (§. 613.).

A voluptate ad tædium argumentatio.

Non absimili modo ostenditur, quod qui tædium percipit ex tædio alterius, voluptatem quoque ex alterius voluptate percipere debeat.

Oppositionem boni & mali ex notione oppositionis demonstrari superfluum existimamus. Ceterum propositionem hanc, qua ad præcedentes demonstrandas uti poteramus, hic subnectere libuit, cum ad subsequentes nonnullas brevius absolvendas conducatur.

§. 645.

Si quod nobis placet in altero observamus ; amor oritur. Amor quoque si enim quod nobis placet in altero observamus, voluptatem modo oritur.

ex eo, quod observamus, percipimus (§. 542.). Quamobrem cum id tanquam alteri inhærens, vel ad eum spectans consideremus; voluptatem ex eo percipimus, quod alteri voluptati esse ex eo, quod nobis voluptati sit, colligimus. Atque ita disponitur animus ad voluptatem ex alterius voluptate percipiendam, consequenter amor oritur (§. 633.).

Patet idem omnium clarissime in iis casibus, ubi animum adversus alterum indifferentem, vel prorsus ab eo aversum habemus. Quando enim aliquamdiu cum eo commercium habemus, atque deinde in ipso observamus, quæ nobis placent, veluti animi dotes quasdam, quæ nobis in pretio sunt; amorem erga eum in nobis oriri deprehendimus: quo præsentem jam optamus felicitatem ejus & quando ipsi quid obligit, quod volupe est, adeoque ad felicitatem ejus spectat, vel spectare videtur (§. 638.), ex eodem & ipsi voluptatem percipimus, manifesto indicio animum nostrum jam esse dispositum ex felicitate ejusdem voluptatem percipiendi.

Non jam inquirimus, cur amorem nostrum quasi in se trahant objecta, ex quibus voluptatem percipimus; talia enim reservanda sunt Psychologiæ rationali. In empirica sufficit, vel a posteriori unice stabiliri modum, quo dispositio ad percipiendam voluptatem ex felicitate hujus personæ in singulari in nobis excitetur, ut amoris excitatio potestati nostræ subjiciatur: id quod multiplici modo proderit in moralibus.

§. 646.

*Amoris
origo ulte-
rius expen-
ditur.*

Si nobis representamus bonum, quod alteri inest, vel ad eum quomodocunque pertinet; amor oritur. Etenim si nobis representamus bonum quoddam alterius, sive alteri inest, sive quomodocunque ad eum pertineat, id nobis tanto majus videtur, quo major est voluptas, quæ ex eodem percipitur (§. 612.). Quamobrem cum bonum alterius placere nobis debeat (§. 542.); si nobis bonum quoddam alterius representamus, aliquid in eo observamus, quod nobis placet. Enimvero si quid in altero observamus, quod nobis placet, amor

oritur

oritur (§. 645.). Amor igitur oriri debet, si nobis repræsentamus bonum, quod alteri inest, vel quomodocunque ad eum pertinet.

Confirmatur idem a posteriori. Si quis pulchritudinem in bonorum numerum refert (quod salva rei veritate fieri posse alibi ostendemus); is eum amat, cujus forma pulchritudine sese commendat, quamprimum eundem videt, et si ipsi antea prorsus esset ignotus. Similiter si quis divitiis ingens pretium statuit; is alterum amat, quod divitem esse cognoscit. Si cui eruditio in delitiis est; is alterum amat, quod eruditione præstantem agnoscit. Exempla ubivis obvia sunt, quibus propositionis præsentis veritas confirmatur, ut levi attentione opus sit ad ea observanda.

Ceterum eadem exempla ad confirmandam propositionem præcedentem quoque adhiberi possunt. Neque est quod miremur, cum ex pulchritudine, divitiis, eruditione voluptatem capiat, qui eadem in bonorum numerum refert. Ita vero nobis placet pulchritudo, placent divitiæ, placet eruditio. Ex eo igitur, quod nobis placet in altero, amor oritur, dum ex pulchritudine, divitiis ac eruditione alterius ortum trahit.

§. 647.

Si quod in altero observamus, nobis tanquam nobis bonum repræsentamus, amor in alterum oritur. Idem adhuc
Idem adhuc
ulterius ex-
 Si enim quod in altero observamus, idem nobis tanquam nobis bonum repræsentamus, ex eo penditur.
 etiam tanto majorem voluptatem percipimus, quo majus nobis bonum istud videtur (§. 612.), adeoque id nobis placet (§. 542.). Enimvero si quid in altero observamus, quod nobis placet, amor oritur (§. 645.). Ergo amor etiam oriri debet, si quod in altero observamus, nobis tanquam nobis bonum repræsentamus.

Idem confirmatur a posteriori. Si quis gloria delectatur sibi que gloriæ ducit cum divitibus ac hominibus in dignitate constitutis conversari; is divitias ac dignitatem aliorum sibi repræsentat tanquam bonas sibi (§. 554.). Enimvero constat eos, qui ita sentiunt, amare divites ac homines in dignitate constitutos. Patet igitur hoc in casu amorem oriri ex eo, quod nobis bonum judicamus istud, quod in altero observamus. Immo vix dabitur

casus aliquis, quo quod nobis tanquam bonum repræsentamus in altero, idem non simul etiam tanquam nobis bonum repræsentamus, ubi idem ad statum nostrum referimus: id quod palam fit, ubi notiones confusas, quibus ea, quæ ad alterum spectant, exhibentur tanquam bona, evolvimus, ut appareat, quænam in iis contineantur. Rationes nimirum cur illud bonum judicemus, vel etiam cur illud placeat, quod in altero observamus, excutiendæ sunt; ita facile constabit, quatenus eadem a nobis petantur, quibus placent quæ sunt alterius.

Propositio præsens a posteriori adeo evidens est, ut *Cartesius* in *Traçtatu de Passionibus animæ* part. 2. art. 56. ideo existimaverit, amorem omnem oriri ex eo, quod quid tanquam bonum respectu nostri repræsentetur.

§. 648.

*Quando
oriatur
amor.*

Si amor in nobis oritur, in altero quid deprehendimus, quod nobis placet, vel quod nobis tanquam bonum vel simpliciter, vel respectu nostri repræsentamus. Si enim amor in nobis oritur, animus noster disponi debet ad voluptatem percipiendam ex felicitate alterius (§ 633.). Quare cum ad felicitatem alterius pertineat, vel saltem pertinere videatur, quod voluptatem ipsi creat (§. 638.); animus disponi debet ad percipiendam voluptatem ex eo, quod nobis placet in altero (§. 542.), consequenter si amor oritur, aliquid in altero deprehendimus, quod nobis placet.

Quoniam vero bonum judicatur tanto majus, quo major est voluptas, quæ ex re percipitur (§. 612.) & amor oritur, si quid in altero deprehendimus, ex quo voluptatem capimus *per demonstrata*; si amor oritur, in altero quid deprehendere debemus, quod nobis tanquam bonum repræsentamus, consequenter perinde est, siue id nobis repræsentemus tanquam bonum respectu nostri, siue non habito respectu ad nos.

Quæ ad confirmandas propositiones præcedentes in medium adducta fuere; ad hanc quoque applicari possunt.

*Amoris
definitio
realis.*

§. 649.

Amor est affectus, qui oritur ex eo, quod quid in altero obser-

observamus, quod nobis placet, seu si quid in altero nobis repræsentamus tanquam bonum, præsertim respectu nostri.

Definitionis hujus realis, quæ excitationem amoris declarat, veritas patet ex propositionibus proxime præcedentibus. Equidem dubium oriri poterat ex definitione *Cartesiana*, annon repræsentatio ejus, quod in altero observamus, tanquam boni fieri debeat semper respectu nostri; sed præterquam quod attentione utenti contrarium jam patet ex antecedentibus, dubium hoc removebimus totum, quantum est, quando paulo post evincemus definitionem amoris, quam dedimus, esse usui loquendi conformem: quod antequam fieri possit, alia nonnulla adhuc præmittenda sunt.

§. 650.

Qui alterum amat, is voluptatem alterius appetit & contra. *Effectus*

Qui enim alterum amat, ex ejus voluptate voluptatem percipit, ac ideo gaudet, quod gaudet alter (§. 640.), consequenter voluptatem ex alterius voluptate tanto majorem percipit, quanto majorem hanc deprehendit (§. 614.). Voluptas igitur alterius tanto majus ipsi bonum videtur, quanto major voluptas est, quam ex eadem percipit (§. 612.). Enimvero quamprimum nobis rem quandam repræsentamus tanquam bonam, eam appetimus (§. 589.). Quamobrem qui alterum amat, alterius quoque voluptatem appetere debet.

Similiter quoniam appetimus, quod bonum nobis repræsentamus (§. 589.); qui alterius voluptatem expetit, is eam tanquam bonam sibi repræsentare debet. Enimvero si bonum cognoscimus, voluptatem ex eo percipimus (§. 558.). Quare qui alterius voluptatem appetit, ex ea voluptatem percipit. Quia igitur alterum amat, qui ex voluptate ejus voluptatem percipit (§. 641.); qui voluptatem alterius appetit, eundem amat.

Poterat idem brevius inferri ex propositione superiori (§. 591.), quod in notione boni confusa acquiescentes (qui casus in negotio affectuum semper obtinet) rem appetamus, ex qua voluptatem percipimus. Inde enim consequitur, quod voluptatem quoque alterius appetere debeamus, si ex ea voluptatem percipimus. Subinde autem in philosophia consultum est, ut demonstrationes fiant ampliores

res eademque præferantur contractionibus, quo earum vis tyronibus facilius percipiatur.

§. 651.

Effectus contrarius in averfando tadio alterius consistens.

Qui alterum amat, is tadium ejus averfatur. Etenim qui alterum amat, ex ejus tadio tadium & ipse percipit (§. 642.). Quare cum affectus ex confusa boni & mali repræsentatione oriantur (§. 605.), quamdiu autem in notione mali confusa acquiescimus, eam rem averfamur, ex qua tadium percipimus (§. 592.); qui alterum amat, is tadium ejus averfari debet.

Utimur hic demonstratione contractione, ubi eodem modo demonstrari poterat propositio, quo præcedentem demonstravimus, ut varietas in demonstrando appareat.

§. 652.

Effectus alii amoris.

Qui alterum amat, is voluptatem eidem creare; tadium vero ab eo avertere studet. Qui enim alterum amat, is voluptatem ejus appetit (§. 650.). Quamobrem cum unusquisque in se experiatur, quod ea consequi studeat, quæ appetit; voluptatem quoque alteri, quem amat, creare studet.

Similiter qui alterum amat, is tadium ejus averfatur (§. 651.). Quare cum denuo unusquisque in se experiaur, quod ea a se amoliri studeat, quæ averfatur; tadium quoque alterius a se amoliri studere debet, consequenter operam dare, ut idem ab altero, quem amat, avertat.

Utrumque a posteriori confirmatur. Si quis alterum amat, ei dono dare solet, quæ eidem accepta esse novit, hanc quæsitus cur id faciat reddens rationem, quod eidem voluptatem creare, vel gaudio eum perfundere velit. Eadem de causa in gratiam alterius, quem amamus, facere solemus, quod alias a nobis non fieret, quia id ipsi volupe esse novimus. E contrario cavere solemus, ne quid fiat, quod alteri displicet, quem amamus, hanc reddentes rationem quod ipsi tadia creare nolumus. Neminem fore puto, qui non habeat, quem

quem sincero amore prosequatur. Quamobrem ad semetipsum attendat, quo sit in eum animo. Annon latus ambabus manibus amplectatur occasionem personæ amatæ voluptatem, vel gaudium creandi? Annon evitet cura sollicita omnem occasionem alteri tædia creandi? Annon studiose celet, ne ad ejus, quem amat, aures perveniat, quod ipsi tædio esse possit?

Equidem non nego subinde alio fine talia fieri posse, quæ alteri voluptati sunt, quam voluptatis eidem creandæ gratia: sed negotium ex amore proficisci factum, si vel maxime quid fiat personæ, quam amamus, gratia, vel eidem quid detur. Neque tam sincerus erit amor, si vel maxime ex eodem proficisci videtur factum. Erit enim quidpiam amori admixtum, quod ab eodem alienum est, ad rationem tamen quam maxime pertinet, cur quid fiat in gratiam personæ amatæ. Executiendi sunt casus obvi, ut rationes speciales in apicem productæ clariora reddant, quæ affirmamus. In iis, quæ ad animam spectant, singulari acumine opus est, ut ea, unde quid pendeat, ab alienis separemus,

§. 653.

Significatus, quem vocabulo amoris tribuimus, communi Significatus amoris
usui loquendi conformis. Sane *Aristoteles* 2. Rhetoric. amare idem esse ait ac velle alicui, quæ bona arbitramur illius, non sui *an commu-*
 causa, & ea pro viribus efficere. Ex nostra amoris definitione nominali necessaria consequentia deduximus, quod, qui *ni usui lo-*
 alterum amat, ejus voluptatem appetat (§. 650.) eique voluptatem creare studeat (§. 652.). Enimvero cum ea bona judicemus alteri, quæ voluptatem eidem creant (§. 612.); patet nostræ definitionis amoris conveniens esse, ut appetamus ea, quæ alteri bona arbitramur, ipsius gratia, eademque efficere studeamus. Notio igitur amoris, quæ *Aristoteli* est, eum nostra convenit. *Goclenius* in Lexico significatum vocabuli amoris proprium explicaturus monet, eodem denotari actum voluntatis elicitum, quo volo alicui bonum. Per voluntatem hic intelligit appetitum omnem, adeoque si amor pro affectu sumitur, vocabulo hoc appetitus sensitivus denotatur. Con-

(*Wolffii Psychologia.*)

Qq9

ve-

venit ista definitio amoris cum significatu , quem vocabulo tribuit *Aristoteles*. Quamobrem cum ostenderimus , significatum *Aristotelicum* cum nostra definitione consentire , nec ab eadem definitio *Gocleniana* dissentire potest. *Cartesius* , quemadmodum jam supra (not. §. 649.) notatum est , de amore , sicuti affectibus ceteris , definitionem realem condit. Definit affectum hunc per eum , qui excitatur , cum aliquid ut bonum respectu nostri nobis repræsentamus. Definitio hæc realis ab ea , quam nos dedimus (§. 649.) , non nisi in eo differt , quod repræsentationem boni restringat. Si enim *Cartesio* credimus , amor non oritur nisi quod in altero deprehendimus nobis repræsentemus tanquam bonum respectu nostri. Oriri hoc in casu amorem , ostendimus (§. 647.): neque hoc mirum videri debet. Etenim si judicamus , id , quod alteri inest , esse nobis bonum ; utique supponere debemus aliquam boni notionem , qua istiusmodi quid citra respectum ad nos repræsentatur tanquam bonum. Quod vero non necesse sit id , quod in altero deprehendimus , bonum judicari respectu nostri , vel exinde colligitur , quod , si amor non excitatur nisi bonum repræsentetur respectu nostri , nulla jam appareat ratio , cur qui alterum amat , is voluptatem eidem creare , tædium vero ab eo avertere studeat (§. 652.). Enimvero non opus est verbis , ubi rerum testimonia adsunt. Ecquis enim nescit nos amare homines ob virtutes tam intellectuales , quam morales , etsi ex iisdem nihil in nos boni redundet ? Absit autem ut quis sibi persuadeat , *Cartesium* contradicere *Aristoteli* affirmanti , quod amare sit velle alicui , quæ bona arbitramur , illius , non sui causa. Etenim *Aristoteles* definitione nominali explicat , in quonam amor consistat. *Cartesius* vero definitione reali docet , quo modo amor oriatur. In modo , quo amor oritur , non consistit amor , nec causa amoris eadem esse debet cum objecto amoris. De amoris objecto *Aristoteli* sermo est , de ejusdem causa *Cartesio*. Quamobrem si vel maxime amoris causa esset bonum , quod nobis

nobis in altero respectu nostri representamus ; id tamen non impedit quo minus amor consistat in eo . quod appetamus illa, quæ alteri bona sunt, ipsius, non nostri gratia. Tale quid fieri, experientia satis superque loquitur. Ponamus enim Titium nobis in angustiis constitutis præter omnem expectationem tulisse opem. Nemo non novit oriri hinc in nobis Titii amorem & ex hoc fluere studium eidem voluptatem creandi eaque faciendi , quæ ipsi bona arbitramur, non nostri, sed ipsius respectu. Jam hic amor oritur ex eo, quod bonum judicamus respectu nostri, si *Cartesiano* acumine utamur, nec ultra id mentis aciem intendamus ; hoc tamen non obstante amor sese exerit per studium benefaciendi alteri, quem amamus, adeoque supponit dispositionem animi ad voluptatem ex eo, quod alteri bonum arbitramur, percipiendam. Quod si majore acumine utaris, quam *Cartesio* uti visum fuit; omnino animadvertes placere nobis in altero studium alteri inserviendi, ejusque gradum æstimari ex magnitudine boni , quod inde in nos profectum est. Atque adeo, si rigorose statuere velis, non tam amor ex eo oritur, quod studium inserviendi alterius nobis fuerit valde proficuum ; quam quod ex isto inserviendi studio voluptatem capimus. Istius autem ideam cum consecuti sumus ex ea, quam nobis tulit, ope, cumque ex hac magnitudinem ejusdem æstimemus, consequenter absque ea amor non orietur , hoc pacto bonum quoad nos influit in ortum amoris, scilicet per modum causæ remotæ, aut, si mavis, rationis remotæ. Enimvero quod definitio nostra amoris a communi usu loquendi non abhorreat, clarissime ex eo elucet, quod, quæ ex illa a priori deduximus, cum experientia conspirent. Quoniam enim ea, quæ experientiæ obvia sunt, vocabulis in communi significatu acceptis exprimimus ; sequitur utique communem vocabuli amoris significatum cum eo convenire debere, quem nos in definitione nominali (§.633.) eidem vindicavimus, quod communi sermone utentes ad amo-

rem referant, quæ vi definitionis nostræ eidem vindicanda sunt.

Non jam inquirimus in rationem, quæ *Cartesio* persuasit non oriri amorem, nisi quatenus rem quandam nobis repræsentamus ut bonam respectu nostri; ea enim evidentior evadet ex sequentibus ac ex Psychologia rationali clarissimam lucem consequetur.

§. 654.

Amor rerum inanimatarum & animalium.

Si in re inanimata, vel etiam in animalibus deprehendimus quidpiam, quod nobis multam affert voluptatem, rem istam, vel animal istud pro gradu voluptatis hujus amamus. Si enim in re sive inanimata, sive animata, quid deprehendimus, quod nobis multam voluptatem affert; ea quoque nobis multum placet (§. 542.). Enimvero cum affectus ex ideis confusis ortum ducant (§. 605.), inter res inanimatas, quæ nullius felicitatis capaces sunt, & animantia bruta, quæ ejusdem capacia apparent (§. 636.), non distinguimus (§. 39.). Quamobrem cum amor oriat ex eo, quod quid in altero observamus, quod nobis placet (§. 649.); amor quoque oriri debet, si quid in re inanimata, vel in animali bruto observamus, quod nobis placet, consequenter quod voluptati nobis est (§. 542.).

Enimvero quoniam amor oritur ex voluptate, quam ex re altera percipimus, per se patet, quod tanto major esse debeat, quanto major voluptas est. Si negas, vel dubitas; idem facile ostenderetur. Ponamus enim voluptatem C, ex qua amor oritur, æquivalere duabus voluptatibus A & B, & ex voluptate A, si sola fuerit, oriri amorem D, ex altero vero B, si itidem sola fuerit, oriri amorem B. Quoniam voluptates istæ sibi invicem non repugnant, sed una in eodem subjecto esse possunt, ut mixta oriatur voluptas, quæ instar unius apparet (§. 524.); nulla jam est ratio, cur non amores D & E simul oriri debeant, voluptatibus A & B simul positis, adeoque simul oriuntur (§. 11a. Ontol.). Voluptatibus A & B simul sum-

tis

tis æquivalet voluptas C *per hypoth.* adeoque salvo effectu, qui inde sequitur, istis substitui potest. Quare ex voluptate C idem oriri debet amor, qui ex A & B simul oritur, consequenter major, quam qui ex sola voluptate A, vel B ortum ducit. Oritur adeo amor pro gradu voluptatis rei amatae.

Idem etiam confirmatur a posteriori. Nos res inanimatas & animantia bruta amare, nemo non novit. Immo non erit homo, cui non exempla amoris hujus domestica suggerat experientia, modo memoriam consulere velit. Audimus quoque a loquentibus affirmari, quod Titius amet nummos, Mevius canes, Sempronius musicam, Cajus literas, seu eruditionem. Constat vero in eo casu Titium ex nummis, Mevium ex canibus, Sempronium ex musica, Cajum ex literis, seu eruditione voluptatem capere. Quodsi ulterius in rationem voluptatis inquisiveris, eam non semper deprehendes eandem, etsi ex eodem objecto capiatur. Ita Titius ex nummis voluptatem capit, quatenus sunt rariores: sunt tamen alii, qui ex iisdem voluptatem capiunt, quatenus nos reddunt divites: sunt porro alii, qui ex iisdem voluptatem capiunt, quatenus nobis ad alia comparanda inserviunt. Id igitur, quod in nummis observamus, & unde voluptatem capimus, non semper idem est, quando ex iis voluptas percipitur. Eodem modo rem deprehendimus in casibus ceteris, ad quos provocavimus, & quibuscunque aliis.

Inde quoque factum est, quod *Cartesius* in definitione amoris rem quaecunque objectum ejusdem constituerit. Quodsi tamen probe expendatur, in quoniam proprie loquendo amor consistat, notionem confusam ad distinctam revocando, quemadmodum a nobis factum est (§. 633.); facile constabit, proprie loquendo non posse amari nisi entia, quæ sunt felicitatis capacia: cetera autem dum amantur, amorem minus proprie dici, ac per errorem quandam oriri.

§. 655.

Si rem inanimatam amamus, ad perfectionem ejus promovendam proni sumus. Si quid enim amamus, animum dispositum

*Effectus
amoris rei
inanimatae.*

fitum habemus ad voluptatem eidem creandam (§. 652.), consequenter ad ipsum, vel statum ejus perficiendum (§. 511.). Quamobrem si opinione amantis res inanimata, quam amat, perfectionis cujusdam capax est, ad eam promovendam pronus est amans.

Idem confirmatur a posteriori. Ponamus enim, nobis donari imaginem, quæ repræsentat personam formæ commendabilis, etsi ea ex ingenio tantummodo artificis picta. Si cui ea valde placet; is amorem testaturus eandem osculatur atque in hæc verba erumpit: velle sese auro eandem includere, siquidem sua esset. Immo respondet quærenti, cur sumtus profundere velit: se nimis amare imaginem istam. Unico hoc exemplo satis superque liquet, amantem pronum esse ad perfectionem rei amatæ promovendam, modo opinione ipsius alicujus perfectionis capax sit. Non nego mille in medium afferri posse exempla amoris, quo res inanimatas prosequimur, & hoc tamen non obstante amantem esse procul remotum ab eadem ornanda. Enimvero in singulis istis casibus aut amantis opinione nulla cadet in rem amatam perfectio, aut, si quæ in eam cadit, sibi tamen deesse vires agnoscit ad eam actu promovendam. Nec deest voluntas, ubi tale quid agnoscit; modo non deessent vires.

§. 656.

*Amoris
animalium
brutorum
effectus.*

Si animantia bruta amamus, ad eorum voluptatem & perfectionem promovendam proni sumus. Quoniam animantia bruta, si non omnia, saltem pleraque voluptatis capacia judicamus; si vero alterum amamus voluptatem eidem creare studemus (§. 652.): nil sane obstat, quo minus in præsentem quoque casu idem amoris effectus sequatur, consequenter si animantia bruta amamus, iis quoque voluptatem, quæ opinione nostra in ea cadit, creare studemus (§. 118. Ontol.). Quod si animantia bruta instar rerum inanimatarum consideremus, non attenta voluptate, quæ in ea cadere videtur, amor eorum idem

idem esse debet qui rerum inanimatarum (§. 118. *Ontol.*). Enimvero si res inanimatas amamus, perfectionem earum, quæ opinione nostra in eas cadit, promovere studemus (§. 655.). Ergo si animantia bruta & res inanimatæ pari jure a nobis censentur; perfectionem earundem promovere studemus. Idem etiam sequitur ex priori. Etenim si animantia bruta, quæ amamus, voluptatis capacia judicamus; eis voluptatem creare studemus *per demonstrata*. Enimvero cum nobis constet, voluptatem in sensu perfectionis consistere (§. 511.); eorum quoque perfectionem, quæ opinione nostra in ea cadit, sive intrinseca fuerit, sive extrinseca, promovere studemus.

Confirmatur idem a posteriori. Exempla clarissima omnium præbent canes, præsertim catelli. Qui canes, vel catellos amant, illi iisdem cibos præbent, quos ipsimet avidè appetunt, sibi persuadentes hæc animantia eandem voluptatem ex iis percipere, dum eos avidè devorant, quam nos ex gustu capimus, dum eos masticamus & masticatos ad deglutitionem promovemus. Inde est quod matronæ culcitas molles fieri curent, in quibus catelli requiescant, quoniam ipsimet culcitis mollibus insidere malunt, quam scamnis duris. Inde est quod de iis ornandis cogitent, cum hunc ornatum ad perfectionem extrinsecam referant, utpote ipsamet ornatu delectari solitæ. Immo videas indignantes, qui illos dolore afficiunt, more amantium tædia ab iis avertere studentes, voluptati quippe contraria (§. 652.). Gemina sunt exempla eorum, qui equos amant: nec desunt exempla animalia bruta aversatione digna amantium. Sed talia cumulari, quæ obvia sunt, opus non est; sufficit excitari attentionem & præberi principia, juxta quæ attentio ad ea dirigitur, quæ observanda veniunt.

Quæ de amore rerum inanimatarum & brutorum animantium dicta sunt, palam loquuntur, in quonam eorum amor consistat. Quare cum fieri non possit, ut cum amore hominum prorsus conveniat, quod bruta felicitatis non sint capacia, si accurate loqui volueris,

ris, multo minus autem aliqua in res inanimatas felicitas cadat; ut peculiarem amoris rerum inanimatarum & brutorum, quatenus iisdem æquiparantur, definitionemi subjiciamus, non inconsultum ducimus.

§. 657.

Amor rerum inanimatarum quid sit.

Amor rerum inanimatarum est dispositio animæ ad voluptatem ex ipsis percipiendum. *Quod si quis animantia bruta iisdem æquiparat*, quatenus scilicet ea non considerat tanquam voluptatis capacia, sed tanquam ea, unde voluptas percipi potest; *amor eorum idem est*, qui rerum inanimatarum: id quod per se patet, cum hoc in casu sub istis quasi comprehenduntur, aut utraque tanquam eidem generi substantia considerentur. *Quod si vero eadem animantia bruta hominibus æquiparentur*, amor eorum idem est, qui hominum: id quod non minus per se patet, cum hoc in casu homines & bruta tanquam eidem generi substantia considerentur.

Ex definitione præsentē patet, quantum inter definitionem rerum inanimatarum & hominum intersit. Nimirum ratione subiecti amantis nulla foret differentia, nisi aliqua intercederet ratione objecti amati. Quod si enim res inanimatæ felicitatis forent capaces, ut & ipsæmet voluptate frui possent; amor rerum omnium atque hominum foret idem. Quoniam vero res inanimatæ incapaces deprehenduntur, nec bruta veræ voluptatis capacia sunt; amor rerum inanimatarum non tendit nisi ad eum earundem statum, quo plus voluptatis ex iis percipere vellemus, non in visuri iisdem voluptatem propriam, si qua frui possent; voluptas enim, qua fruitur amatus, continuo redundat in amantem. Ceterum ex definitione amoris rerum inanimatarum ratio reddi potest eorum omnium, quæ homines hoc amore impulsī faciunt rei amatæ gratia.

§. 658.

Differentia gaudii de re inanimata & amoris ejusdem.

Quoniam de re præsentē gaudemus, adeoque ex ea voluptatem percipimus insignem (§. 614.), quatenus eam judicamus bonam respectu nostri (§. 624.); eandem vero amamus, quatenus id maxime volumus, ut voluptati ipsæmet esse possit, adeoque eandem percipimus citra respectum ad nos

(§. 657.);

(§. 657.) ; *gaudium de re inanimata & amor rei inanimatæ differunt.*

Atque hinc apparet, juxta definitionem *Cartesii* non adeo claram esse differentiam inter amorem rei inanimatæ, atque gaudium de eadem, quod amorem oriri velit, quatenus rem nobis repræsentamus tanquam bonam respectu nostri, etsi non negemus, etiam ex ipsius mente superesse aliquam adhuc differentiam inter hosce affectus, quatenus nimirum supponit gaudium versari circa bonum nobis præsens, amorem vero circa id, quod quidem bonum judicatur respectu nostri, non tamen consideratur, tanquam nobis præsens. Dantur tamen casus, ubi ægre gaudium ab amore distinxeris, veluti si librum amas ob doctrinam solidam in eo contentam, nisi multo acumine utaris.

§. 659.

Qui alterum amat, is eundem considerat tanquam seipsum. Effectus
 Qui alterum amat, is ex voluptate alterius voluptatem percipit, *amoris finis*
 ac ideo gaudet, quod gaudet alter, si idem fuerit de objecto *gularis*.
 gaudii judicium (§. 640.) ; ex tædio autem alterius ipsemet tædium percipit, ac ideo contristatur, quod alter tristis est (§. 642.).
 Voluptas igitur amati amanti communis est ; gaudium ac tædium amati amanti commune est ; tristitia amati amanti communis est. Jam si quis voluptatem ac tristitiam alterius spectet tanquam suam, gaudium & tædium alterius tanquam suum ; is alterum considerat tanquam seipsum : id quod per se patet, cum non aliud indigitare soleamus hac phrasi quam illam tædii, voluptatis, tristitiæ atque gaudii communionem. Quamobrem qui alterum amat, is eum considerat tanquam seipsum.

Idem confirmatur a posteriori. Nihil sane frequentius est, quam ut amantes asseverent, se sibi facta putari, quæ personis, immo animalibus ac rebus inanimatis amatis sive bene, sive male fiunt. Hinc etiam invaluit phrasis, qua amanti amatus alter Ego dicitur. Ex his igitur satis superque apparet, quod amans alterum, quem amat, consideret tanquam seipsum,

seu in iis, quæ alteri bene, vel male fiunt, eum spectet tanquam personam cum se eandem.

Effectus hic amoris adeo obuius est, ut vulgo ad eum tanquam primo omnium sibi obuium attentionem suam omnium primo dirigant, qui de amore cogitant. Est autem prorsus eximius, cum inde totius generis humani felicitas manet, siquidem juxta rationis normam rectificetur: id quod in moralibus pluribus docebitur.

§. 660.

Unio se mutuo amantium.

Quoniam qui alterum amat, is eundem tanquam seipsum considerat (§. 659.); *amans cum amato unitur, ut tanquam persona eadem cum amante spectari possit, qui amatur, Et si duo se mutuo amant, amore ita uniuntur, ut instar unius personæ spectari debeant.*

Hinc amor vulgo vocatur affectus unionis, quemadmodum videre est apud *Goclenium* in Lexico. Immo quoniam acumen non exporrigitur ultra ea, quæ propinqua sunt ac primo obtutui sese offerunt, amorem definiri solent per affectum, quo quis tendit ad unionem cum re aliqua. Inest huic descriptioni aliquid veri, si debito modo explicetur, quemadmodum a nobis factum est; sed qui ab osculis amantium, vel osculatione rerum amatarum ideam amoris arcessunt, non satis intelligunt, quid sibi velint, atque notione fecunda destituuntur. Ceterum ex dictis apparet, definitionem nostram, ex qua distinctam unionis amantium, vel amantis cum re amata notionem deduximus, a communi usu loquendi non abhorreere atque adeo uberius confirmatur, quod jam ante evicimus (§. 653.). Et hujus potissimum gratia unionis istius explicationem dare libuit, ne cui notiones nostræ videantur suspectæ, qui conveniente acumine in iis, quæ ad animam spectant, perlustrandis nondum uti didicit.

§. 661.

Odii definitio nominibus.

Odium est dispositio animæ ad volupratem percipiendam ex alterius infelicitate.

Dispositio hæc deducitur ad actum data occasione, atque tum actu affectu agitur animus, quem odii nomine insignimus. Fert autem usus loquendi, ut ipsam dispositionem odii nomine compellemus, quoniam odium tribuimus illi, qui affectu eo tempore non agitur

§. 662.

§. 662.

Quodsi ergo is, qui alterum odit, ejus infelicitatem cognoscit; ex ea actu felicitatem percipit (§. 661.). Pone enim eum, *Quando sese exerat.* qui alterum odit, intueri infelicitatem ejusdem, nullam tamen inde percipere voluptatem. Animus igitur ejus ita dispositus non est, ut ex infelicitate alterius voluptatem percipiat, consequenter eum non odit (§. 661.) : id quod hypothesei repugnat.

Ex actu odii dispositionem illam colligimus, atque probaturi quod quis alterum odio prosequatur, ad illum provocamus, cum dispositio in sensum non incurrat, adeoque observari non possit.

§. 663.

Qui alterum plurimum odit, de infelicitate ejus gaudet, Gaudium tantoque magis gaudet, quanto magis eum odit. Qui enim al- *ejus, qui* terum plurimum odit, is plurimum voluptatis ex alterius in- *alterum* felicitate percipit (§. 661.). *odit.* Quodsi ergo tanta evaserit voluptas, ut tedium, si quod adesset, non apperciperetur; voluptas prædominatur (§. 529.). Quamobrem cum in prædominio voluptatum gaudium consistat (§. 614.) ; si quis alterum plurimum odit, de infelicitate ejus gaudet.

Quoniam odium non aliter sese exerit, quam voluptatis perceptione (§. 663.) ; quo magis quis alterum odit, eo major est voluptas, quam ex infelicitate alterius capit. Quare cum gaudium tanto majus sit, quanto major est illa voluptas, quæ prædominatur (§. 634.) ; gaudium tanto majus erit, quanto majus fuerit odium.

Infelicem judicamus eum, qui, cum munus ambiat, cui præfici poterat, repulsam fert. Quodsi quis Titium oderit & percontanti num munus, quod ambit, in ipsum collatum fuerit, narratur, quod repulsam tulerit ; gaudebit utique de repulsa, tantoque magis gaudebit, quanto majus fuerit odium adversus Titium conceptum. Ceterum ne ad experimenta

delapsuri confundamur; probe omnino tenendum est, fieri posse ut affectu quodam contrario impediatur gaudium alias secuturum, veluti si quis magis contristetur de repulsa, quam una tulit amicus, quem amore complectitur, qui superat odium adversus Titium conceptum. Cum enim hic tristitia atque gaudium simul oriri debeant; ille utique affectus prævalebit, qui alterum superat.

Odium opponitur amori. Sicuti enim amans ex felicitate; ita qui alterum odit, ex ejus infelicitate voluptatem percipit. Quamobrem mutatis mutandis ad casum odii transferuntur, quæ de casu amoris dicta sunt. Etsi autem hoc non difficulter fiat; a nobis tamen hic fieri, minime autem lectoris ingenio relinqui debet, propterea quod propositionibus de odio in moralibus tanquam principiis utemur, quæ adeo expressis verbis hic ponendæ ac demonstrandæ sunt, ut ad eas provocare possimus.

§. 664.

*Effectus
odii.*

Qui alterum odit, ex ejus tædio voluptatem percipit, & ideo gaudet, quod alter tristitia afficiatur, vel tædio. Qui enim alterum odit, is ex infelicitate ejus voluptatem percipit (§. 661.). Quoniam igitur quodlibet tædium ad infelicitatem alterius pertinet (§. 639.); qui alterum odio persequitur, ex tædio ejus voluptatem capit.

Quoniam igitur porro gaudium in voluptatum prædominio consistit (§. 614.); qui ex tædio alterius voluptatem, adeoque ex tristitia alterius insignem voluptatem percipit (§. 619.); gaudere utique debet, quod alter tristitia afficiatur. Quamobrem cum qui alterum odio persequitur, ex tædio ejus voluptatem percipiat *per demonstrata*; idem quodque gaudere debet, quod tristitia afficitur alter.

Idem confirmatur a posteriori. Si quis odio alterum persequitur, quamprimum audit, ei tædia creata esse, vel vexas mille creati, quæ plurimorum tædiorum causa sunt, lætus exultat, quasi bono quodam egregio potitus fuisset. Hinc audias affirmantem, sibi adeo gratas esse vexas alterius, ac si
sibimet

fibimet donum pretiosum oblatum fuisset. Se non tantopere gavisurum, si vel centum aurei ipsi donarentur, & quæ sunt his gemina verba, quæ odium sequuntur manifestum. Unde & nemo non ex hoc gaudio odium colligit, quo quis alterum prosequitur. Quoniam phrasæ receptæ notionibus communibus respondent; iis conforme est, quod, qui alterum odio prosequitur, gaudeat ex eo, quod alteri tædia creentur, vel vexæ plurimorum tædiorum causæ. Quodsi odium fuerit ingens, ut ejus, qui alterum eodem prosequitur, judicio majoribus vexis dignus existimeretur alter; in hæc verba erumpere solet: se multo magis gavisurum, si nescio quæ vexæ iisdem majores eidem crearentur.

Non provocamus ad exempla specialia, quæ magno numero quotidie obvia sunt, cum nihil sit frequentius hominum odiis. Sufficit generaliter indicasse ea, ad quæ specialia levi attentione agnita referuntur. Casus speciales admodum variant, nec cuivis iisdem familiares sunt. Insunt autem iisdem generalia, omnibus nota, quæ speciales casus levi attentione utentibus in memoriam revocant (§. 105.). Quamobrem scopus veritatem propositionis a posteriori confirmaturi postulat, ut ista potius generalia in medium afferamus, quam casibus specialibus recensendis tempus minus utiliter teramus: id quod non modo hic, sed in omni casu simili observandum.

§. 665.

*Si quis ex alterius tædio voluptatem percipit, vel ideo Signum
gaudet, quod alter tristitia afficitur; is alterum odit.* Quoniam ^{odit.}
enim tædium omne, seu omne id, quod tædium alteri creat, ad infelicitatem ejus refertur (§. 639.); qui ex tædio alterius voluptatem percipit, ejus animus dispositus esse debet ad voluptatem ex alterius infelicitate percipiendam. Alterum igitur odisse debet (§. 661.). Quodsi quis ideo gaudet, quod alter tristitia afficitur, cum gaudium in prædominio voluptatum consistat (§. 614.); animus ejus dispositus esse debet ad voluptatem ex tristitia alterius percipiendam, consequenter

cum tristitia in prædominio tædiorum consistat (§. 619.), animus ejus dispositus est ad voluptatem ex alterius tædio percipiendam. Sed cui ita dispositus est animus, is alterum odit *per demonstrata*. Ergo alterum odit, qui ideo gaudet, quod is tristitia afficiatur.

Idem confirmatur a posteriori per ea, quibus propositionem præcedentem confirmavimus. Sane ibidem jam monuimus, quod nemo non ex voluptate, quam quis ex tædio alterius capit, & multo magis ex eo, quod gaudet, quia tædio, vel tristitia afficitur alter, colligit odium, quo alterum persequitur, in admirationem summam abripiendus, si contrarium sibi observare videatur.

Habemus adeo signum odii minime fallax. Omnis autem de signis doctrina plurimam utilitatem spondet in moralibus.

§. 666.

A voluptate ad tædium & a tædio ad voluptatem argumentatio,

Si quis ex voluptate alterius tædium percipit, ac ideo contristatur, quod gaudet alter; is ex tædio alterius voluptatem percipere ac ideo gaudere debet, quod alter contristatur & contra si quis ex tædio alterius voluptatem percipit, ac ideo gaudet, quod alter contristatur, is ex voluptate alterius tædium percipere, ac ideo contristari debet, quod alter gaudet. Etenim si quis ex voluptate alterius tædium percipit, eam sibi tanquam malum tanto majus repræsentare debet, quanto majus est tædium, quod ex ea percipit (§. 613.). Quoniam igitur voluptati contrarium est tædium (§. 511. 518.), perinde ac bonum contrarium malo (§. 554. 565.); tædium alterius in numerum bonorum referre debet. Quamobrem cum ex eo, quod bonum nobis videtur, voluptatem tanto majorem capiamus, quanto majus nobis bonum istud videtur (§. 612.); ex tædio alterius voluptatem percipere debet.

Jam tristitia in prædominio tædiorum consistit insigni (§. 619.). Quamobrem cum tædium alterius in numerum bonorum referat, qui ex voluptate alterius tædium percipit

per

per demonstrata; tristitiam quoque pro tanto majore bono habere debet, quanto major eadem deprehenditur. Enimvero ex eo, quod bonum nobis videtur, tanto majorem voluptatem percipere debemus, quanto majus nobis bonum istud apparet (§. 612.): ergo qui ex voluptate alterius tedium percipit, adeoque contristatur, quod gaudet alter (§. 511. 518.); is summam quoque voluptatem ex alterius tristitia capere, adeoque ideo gaudere debet, quod alter tristitia afficitur (§. 518.).

Non absimili modo ostenditur, quod qui ex tedium alterius voluptatem percipit, ac ideo gaudet, quod alter contristatur; is ex voluptate alterius tedium percipere ac ideo contristari debeat, quod gaudet alter.

Confirmatur quoque propositio a posteriori. Hinc audias dicentes, bonum esse, quod alteri tedia creentur, ubi gaudio efferuntur, quamprimum ipsis narrantur vexæ, quæ creantur aliis. Patet adeo tedia & tristitiam alterius in bonorum numerum referri ab hominibus. Ex adverso etiam audias affirmantes, malum esse, quod alteri omnia ex voto cedant, ubi tristitia afficiuntur, quamprimum ipsis narrantur, quamnam fortuna secunda illi obtigerint. Unde liquet, gaudium ac voluptatem alterius etiam in malorum numerum referri ab hominibus.

Propositionem præsentem instar lemmatis hic præmittimus ad demonstrandas sequentes. Utemur eadem quoque in sequentibus.

§. 667.

Si quis alterum odit, ex ejus voluptate tedium percipit, Alius odii ac ideo contristatur, quod gaudet alter. Si quis enim alterum odit; is voluptatem percipit ex tedium ejus (§. 664.). Enimvero qui ex tedium alterius voluptatem percipit, is ex voluptate alterius tedium capit (§. 666.). Ergo qui alterum odit, ex voluptate ejus tedium percipit.

Similiter qui alterum odit, ideo gaudet, quod tristitia affici-

ficitur alter (§. 664.). Sed qui ideo gaudet, quod alter tristitia afficitur ; is propterea contristatur , quod alter gaudet (§. 666.). Ergo qui alterum odit, is contristatur , propterea quod alter gaudet.

Idem confirmatur a posteriori. Ponamus enim Titium odisse Sempronium atque ideo in votis habere , ut muneri, quod ambit , minime præficiatur. Quodsi jam contrarium evenit, eum vel tædio , vel tristitia affici intelliges, prouti vel majus, vel minus fuerit odium, quod adversus ipsum concepit. Inde est, quod rationem reddituri, cur ægre ferat Sempronium præfectum esse muneri, cum ex ea nulla utilitas in ipsum redundet, si collatum fuisset in alterum, nec ullum inde incommodum, multo minus damnum in ipsum proficiscatur, quod Sempronius ad idem promotus fuerit, odium Titii allegemus, quo adversus Sempronium flagrat.

§. 668.

*Signum
odii.*

Si quis ex voluptate alterius tædium percipit, ac ideo contristatur, quod gaudet alter ; is alterum odit. Qui enim ex voluptate alterius tædium percipit, ac ideo contristatur, quod gaudet alter, is ex tædio alterius voluptatem capit, ac ideo gaudet, quod alter tristitia afficitur (§. 666.). Enimvero qui ex tædio alterius voluptatem capit, vel prorsus gaudet, dum alter tristitia afficitur, is eum odit (§. 665.). Odit igitur alterum, qui ex voluptate ejus tædium percipit, vel contristatur, propterea quod alter gaudet.

Ad confirmandam propositionem præsentem a posteriori facit, quod eadem tanquam signo odii utantur, quemadmodum ex iis intelligitur, quæ ad propositionem præcedentem a posteriori confirmandam in medium adduximus.

Ab hoc usu commendatur propositio præsens, cujus rei rationes in superioribus jam dedimus (not. §. 665.).

§. 669.

*Effectus
odii.*

Qui alterum odit, is tædium ejus appetit, & contra. Et enim

enim qui alterum odit, ex ejus tædio voluptatem capit ac id eo gaudet, quod alter tristitia afficitur (§. 664.), consequenter voluptatem ex alterius tædio tanto majorem capit, quanto majus hoc deprehendit (§. 614. 619.). Tædium igitur, quo alter afficitur, tanto majus bonum ipsi videtur, quanto major est voluptas, quam inde percipit (§. 612.). Enimvero quamprimum nobis rem quandam repræsentamus tanquam bonam, eam appetimus (§. 599.). Quamobrem qui alterum odit, alterius quoque tædium appetere debet.

Quod si quis tædium alterius appetit, is idem sibi repræsentare debet tanquam bonum (§. 587. 589.), consequenter tanto majorem inde percipere debet voluptatem, quo majus bonum judicat tædium alterius (§. 612.). Animus adeo ipsi dispositus est ad voluptatem ex tædio alterius percipiendam, consequenter alterum odit (§. 660.).

Non dubito fore aliquos, quibus contradictorium videbitur, tædia alterius ac ea, quæ tædia ipsi creant, consequenter quæ nemo non mala judicat, in numerum bonorum referri. Tenendum itaque est, tædia non in se considerata in numerum bonorum referri, sed bonum judicari, quod alteri creentur. Non vero repugnat, bonum judicari, quod alter malo quodam afficiatur. Similiter e contrario non repugnat malum judicari, quod quis bono afficiatur, etsi bonum in se spectatum in malorum numerum referri nequeat. Unde patet, quomodo intelligendæ sint phrasæ ex voluptate alterius tædium, ex tædio voluptatem percipere, etsi idem jam manifestum sit ex demonstrationibus superioribus. Nimirum voluptas non percipitur ex tædio, quo alter afficitur, quatenus in se spectatur, sed quatenus alteri creatur, adeoque si rigoroſe loqui velis, ex eo, quod alteri creatur, non ex tædio ipſo. Similiter tædium non percipitur ex voluptate, qua alter delectatur, quatenus in se spectatur, sed quatenus alteri creatur, adeoque si verba exacte exprimere debent, quod eisdem efferre decreveris, dicendum est, tædium percipi ex actu, quo alteri creatur voluptas.

§. 60.

Qui alterum odit, is voluptatem ejus averſatur. Qui Eff. Etus
enim alterum odit, ex voluptate ejus tædium percipit (§. 667.). *alius odii.*
(Wolffii Psychologia.) Sss Qua.

Quare cum affectus ex confusa boni & mali repræsentatione oriantur (§. 605.), quamdiu autem in notione mali confusa acquiescimus, adeoque quamdiu alterum odio persequimur, eam rem averſamur, ex qua tædium percipimus (§. 592.); qui alterum odit, is voluptatem ejus averſatur.

Exiis, quæ modo (not. §. 669.) ad propositionem præcedentem dicta sunt, intelligitur, quo sensu voluptatem averſemur. Nimirum nemo averſatur voluptatem, quatenus in se spectatur; sed averſatur tantummodo actum, quo alteri voluptas creatur, quemadmodum nemo appetit tædium, quatenus in se spectatur, sed tantummodo actum, quo alteri tædium creatur. Sed ubi acumen ad ea, quæ diversa sunt, discernenda non omnibus suppetit; phrasibus receptis utilicet, quæ, cum id involvant, quod acumine aperte distinguuntur, citra erroris periculum adhiberi possunt.

§. 671.

*Effectus
odii.*

Qui alterum odit, is tædia eidem creare; voluptate vero quò minus perfundatur, impedire studet. Qui enim alterum odit, is tædium ejus appetit (§. 669.). Quamobrem cum unusquisque in se experiatur, quod ea consequi studeat, quæ appetit, alteri quoque tædia creare studet, quem odit.

Similiter qui alterum odit, is voluptatem ejus averſatur (§. 670.). Quare cum denuo unusquisque in se experiatur, quod ea a se amoliri studeat, quæ averſatur, voluptatem quoque alterius a se amoliri studeat opus est, consequenter id agere debet, ut quovis modo impediat, ne alter voluptate fruatur, quem odit.

Utrumque a posteriori confirmatur. Si quis alterum odit, is alios adversus eum instigat, qui eundem injuriis afficiunt, propterea quod novit ipsi hoc modo tædia creari. Narrat de eo, quæ in detrimentum famæ ipsius tendunt, propterea quod novit hoc modo ægre ipsi fieri, ubi famæ suæ adversa in publicum sparsa esse intelligit. E contrario impedire solet, quantum in se est, ne munus in eum, quem ambit, conferatur, propterea quod novit insigni prorsus voluptate per-

perfusum iri, si eodem potiretur. Quodsi hunc casum ad priorem referre malis, quod ad eundem quoque mutata intentione ejus, qui alterum odit, referri possit; perpendas velim Titium, qui odio persequitur Sempronium, impedire quo minus Mevius eidem donet librum tantopere ab eo exoptatum, ne fruatur gaudio, quo eundem elatum iri prævidet.

§. 672.

Qui alteri tædia creare, ac voluptatem, qua perfrui potest, odii erat, impedire studet; is alterum odit. Qui enim alteri tædia *signum* creare studet, is eadem appetit, quod per se patet. Enimvero qui tædia alterius appetit, is eundem odit (§. 669.). Ergo qui tædia alteri creare studet, is eum odit.

Similiter qui impedire studet, quo minus alter voluptate fruatur; is eandem aversatur: id quod denuo per se patet. Enimvero qui voluptatem alterius aversatur, is eundem odit (§. 670.). Ergo alterum odit, qui impedire studet, quo minus is voluptate fruatur.

A posteriori confirmatur propositio, quod vulgo ex studio alteri ægre faciendi ac impediendi felicitatem alienam nemo non odium colligat.

§. 673.

Si quem nobis representamus tanquam noxium, seu nobis aliisque malum; odium adversus eum oritur. Etenim si nobis alterum repræsentamus tanquam noxium, adeoque tanquam nobis aliisque malum (§. 565.), eum aversamur (§. 590.), atque adeo eundem a nobis procul remotum esse cupimus, ne noxius esse possit, immo in destructionem ejus fertur appetitus. Quoniam adeo interitum ejus nobis repræsentamus tanquam bonum (§. 554.), ex eo voluptatem percipimus tanto quidem majorem, quanto majus bonum istud nobis videtur (§. 612.). Disponitur itaque animus ad voluptatem

tem percipiendam ex tadio alterius (§. 518.), consequenter odium oritur (§. 665.).

Idem confirmatur a posteriori. Si quem novimus nobis adversum, quamdiu appetitus ratione non reguntur; ejus mortem appetimus, in votis quam maxime habentes ut moriatur. Quando vero ita dispositus est animus; experimur quoque nobis voluptati esse fortunam adversam, qua alter utitur, consequenter nos eundem odio persequi (§. 661.). Observamus haud raro idem ita sese habere, etiamsi alterum amaverimus, antequam nobis adversaretur. Atque in hoc inprimis casu evidentissime omnium liquet odium ex eo oriri, quod alterum nobis repræsentemus tanquam noxium, seu tanquam nobis malum. Enimvero animo nostro ingenerari quoque odium adversus alterum experimur, si nobis constet de ejus aliis nocendi animo, quos vel amamus, vel in quos indifferenti animo sumus. In priori casu facile admittitur absque observatione, propterea quod eum, quem amamus, tanquam nosmetipsos spectamus (§. 659.). Posterior adeo casus huc potissimum spectat, ne exceptioni ulli locus sit. Quod si vero quem odio prosequimur, cui agre fit ab altero; odium adversus facientem oriri nequit, quod appetamus istiusmodi facta, quæ alteri tadia creant (§. 669.). Hic adeo casus removendus.

Communiter odia hominum ex eo oriuntur, quod alios sibi adversos experiantur, ut adeo veritas propositionis præsentis a nemine in dubium revocari possit, modo ad ea attendere velit, quæ quotidie obvia sunt. Quod si quis etiam absens nobis nocere possit, appetitum nostrum ferri in mortem ejus, ipsa verba sæpissime produnt, quæ odio ducti proferimus. Suppono autem in omni affectuum doctrina, animum rationis lumine minime perfundi, quod affectus omnes dispellit. Si qui malitiosi sunt, eum, quem odio prosequuntur, e medio tollere student: at illi, a quibus tanta malicia remota est, in votis tantummodo habent, ut Deus mori jubeat eum, quem odio habent. Atque ad hos potissimum casus re-

spici-

spiciendum, ubi circa demonstrationem propositionis præsentis dubia quædam suboriuntur, quod prolixitatem nimiam evitaturi notionum analysin ad ultimum evidentie gradum producere non valeamus. Quodsi quis nobis tantummodo præsens molestus fuerit, absentiam ejus morti æquiparamus, cum respectu nostri perinde sit, ac si prorsus interiisset.

§. 674.

Si quod nobis displicet in altero observamus, vel unde tædium percipimus ; odium oritur. Si quod nobis displicet in altero observamus, ex eo tædium percipimus (§. 542.), atque adeo hypothesis eadem est sive supponamus, nobis quid observari in altero quod displicet, sive ponamus nobis quid observari in altero, unde tædium percipimus. Quamobrem cum id alteri tanquam inhærens, vel ad eum spectans consideremus, tædium ex eo percipimus, quod alteri inest, vel ad eundem spectat. Quoniam itaque affectus ex confusa repræsentatione oriuntur (§. 605.), in confusa autem repræsentatione subjectum ab eo, quod ipsi inest, non distinguimus (§. 39.); ex ipsa persona alterius tædium nobis percipere videmur, consequenter alterum tanquam nobis malum, vel noxium repræsentamus (§. 613.). Enimvero si quem nobis repræsentamus tanquam noxium, seu nobis aliisque malum, adversus eum oritur odium (§. 673.). Ergo odium adversus alterum oritur, si quod in altero observamus nobis displicet, vel si ex eo, quod in altero observamus, tædium percipimus.

Idem confirmatur a posteriori. Odimus subinde personam, quam primum eandem adspicimus, sola forma corporis, vel solo vultu offensi. Immo subinde quod nos offendit adeo leviculum est, ut ipsimet id minime appercipiamus, ideo affirmantes, nos odisse Mevium, sed non posse dicere quare: id tantummodo nos dicere posse, quod ipsum odio prosequamur. Quodsi vero quis accutior fuerit, is rationem odii deprehendit, etsi tanta non videatur, cur odio alter dignus sit,

ubi ratio integra non detegitur , propterea quod imaginationi plurimæ in isto odio tribuendæ sunt partes , non autem in apri- cum producuntur. Quodsi quis ea neglexerit , quæ in exci- tando odio imaginationi tribuenda veniunt ; ei sapissime du- bia videbuntur, quæ in se clarissima sunt. Cautione igitur opus est, ubi propositionem præsentem a posteriori confirmare vo- luerimus.

Homini naturale est tendere ad ea a se amolienda eorundem- que destructionem , quæ tædia ipsi creant.

§. 675.

*Idem ulterius ex-
penditur.*

Si nobis repræsentamus malum, quod alteri inest, vel ad eum quomodocunque pertinet; odium oritur. Si nobis repræsentamus malum, quod alteri inest, vel ad eum quomodocunque pertinet; tanto majus tædium inde percipitur, quanto majus malum istud videtur (§. 613.). Quamobrem cum tædium alterius displicere nobis debeat (§. 542.); si nobis malum, quod alteri est, repræsentamus, aliquid in eo observamus, quod nobis displicet, consequenter odium oriri debet (§. 674.).

Idem confirmatur a posteriori. Si quis deformitatem in malorum numerum refert (quod salva rei veritate fieri posse alibi ostendemus); is eum odit, quem deformem intuetur, etiam si antea ipsi fuerit ignotus. Hinc audies affirmantes, adeo deformem esse hominem, ut propenso in eum animo esse nequeamus. Ita vero loquentes eos deprehendes, qui formæ pulchritudine delectantur, consequenter qui hanc in bonorum nu- merum, adeoque eidem oppositam deformitatem in malorum numerum referunt.

§. 676.

*Idem adhuc
ulterius ex-
penditur.*

Si quod in altero observamus nobis tanquam nobis malum repræsentamus; odium adversus alterum oritur. Si quid enim in altero tanquam nobis malum repræsentamus, cum affe- ctus

ctus ex repræsentatione confusa oriantur (§. 605.), in ea autem, quod alteri inest non distinguimus ab eo, quod inest (§. 39.), alterum nobis tanquam nobis noxium repræsentamus, consequenter odium adversus alterum oritur (§. 673.).

Idem etiam sic ostenditur. Si quod in altero observamus tanquam nobis malum repræsentamus, nobis quid tanquam malum repræsentamus, quod alteri inest. Quare cum odium oriatur, si quid nobis in altero repræsentamus tanquam malum (§. 675.): odium quoque oriri debet, si quod in altero observamus tanquam nobis malum nobis repræsentamus.

Idem confirmatur a posteriori. Ponamus alterum propalasse, quæ nobis nocua sunt. Factum alterius nobis repræsentamus tanquam nobis malum (§. 565.). Nemo vero non novit istiusmodi factum esse odii causam, ita ut vel amorem in odium convertere possit.

Si rem curatius examines, omni fere in casu quod nobis displicet in altero nobis repræsentamus tanquam nobis noxium, quatenus scilicet id malum judicamus respectu nostri, quod tadium nobis creat.

§. 677.

Odium est affectus, qui oritur ex eo, quod quid in altero observamus, quod nobis displicet, seu si quid in altero nobis repræsentamus tanquam malum, præsertim respectu nostri. *Definitio
realis odii.*

Definitionis hujus realis, quæ excitationem odii declarat, veritas patet ex propositionibus proxime præcedentibus. Patet etiam ex eo, quod odium opponatur amor: id quod ex collatione definitionum realium odii atque amoris innotescit. Equidem dubium oriri poterat ex definitione *Cartesiana*, de qua mox dicemus disertius, an repræsentatio ejus, quod in altero observamus, tanquam mali fieri debeat respectu nostri: enimvero propositiones præcedentes contrarium loquuntur, præsertim si ad ea respicias, quæ ad eas confirmandas a posteriori in medium adducuntur.

§. 678.

Definitio odii tam nominalis, quam realis usui loquendi

*Significatus
odii num u-
sui loquendi
con-
formis.*

conformis. Definitionem realem ex nominali deduximus. Quamobrem si una earum fuerit usui loquendi conformis, etiam altera eidem conformis esse debet, & si quis unam earum admittit, is alteram etiam admittere tenetur. *Cartesius* loc. cit. (§. 649.) odium definit per affectum, qui oritur, si quid nobis repræsentatur ut malum respectu nostri. Hæc definitio, si consideretur ut propositio, non habet, quod a veritate aberrat (§. 676.) : restrictio tamen cum non in omni casu obtineat (§. 674. 675.), adæquata definitio non est, nisi dicas id, quod nobis displicet, vel quod ut malum nobis repræsentatur respectu ipsius subjecti, cui inest, vel aliorum hominum a nobis diverforum, repræsentari in eo tanquam nobis noxium, quod nobis sumus conscii tædii ex eo percepti. Quod si definitionem *Cartesii* hoc modo salves, quemadmodum salvari potest; nihil est quod in ea reprehendas, sed cum definitione reali, quam nos ex nominali deduximus, prorsus convenit (§. 677.). Atque adeo definitio nostra nominalis odii non contrariatur significatui, quem vocabulo tribuit *Cartesius*. In superioribus evicimus (§. 653.) definitionem nominalem amoris, quam dedimus, esse notioni amoris conformem, quam *Aristoteles* dedit. Quoniam notio odii notioni amoris opposita est, & nostra quoque hinc odii definitio nominalis definitioni odii nominali opposita (§. 633. 661.) ; hæc quoque a mente *Aristotelis* aliena esse nequit. Amare *Aristoteli* est velle alicui, quæ bona arbitramur, illius, non sui causa. Quare odisse eidem idem esse debet ac velle alicui, quæ mala arbitramur, illius, non sui causa. Velle in affectuum doctrina denotat actum appetitus sensitivi, quemadmodum jam supra (§. 653.) monuimus. Ex nostra odii definitione necessaria consequentia deduximus, quod, qui alterum odit, ejus tædium appetat (§. 669.), eique tædium creare studeat (§. 670.). Enimvero cum ea mala judicemus alteri, quæ tædium eidem creant (§. 613.); nostræ definitioni odii conveniens est, ut ea appetamus, quæ mala alteri

alteri arbitramur, ipsius causa, eademque efficere studeamus. Notio igitur nostrae odii cum notione *Aristotelica* consentit. Odii notionem non explicat *Goclenius* noster in *Lexico*: cum tamen amorem explicet per actum voluntatis, hoc est, appetitus sensitivi elicited, quo alicui bonum volumus; odium ipsi esse debet actus voluntatis elicited, quo alicui malum volumus. Notio *Gocleniana* convenit cum *Aristotelica*. Quoniam itaque ostendimus; *Aristotelicam* cum nostra consentire; hoc ipso palam est, quod etiam *Gocleniana* cum nostra consentire debeat (§. 223. *Ontol.*). Ceterum hic quoque mutatis mutandis repetenda sunt, quæ de restrictione *Cartesiana* in definitione amoris supra (§. 653.) annotata sunt. Denique perinde ut supra (*loc. cit.*), ex eo quoque colligitur, definitionem odii esse notioni communi conformem, quod, quæ inde a priori deduximus, eadem sunt cum iis, quæ vulgo ex odio profecta agnoscunt omnes.

Non difficile foret cum iis, quæ a nobis demonstrata sunt, conciliare aliorum philosophorum definitiones: sed operæ pretium non existimamus tantum operæ impendere rei satis manifestæ.

§. 679.

*Si in re inanimata, vel etiam in animantibus quidpiam Amor reprehendimus, quod nobis tedium creat, seu unde tedium ruminantibus percipimus; rem istam, seu animal istud odimus pro gradu tædi-
dii percepti.* Si enim in re sive inanimata, sive animata quid *animatum* reprehendimus, quod nobis plurimum tædii affert; ea nobis *animatum* multum displicet (§. 542.). Enimvero cum affectus ex ideis confusis oriatur (§. 605.), inter res inanimatas, quæ nullius infelicitatis capaces sunt, & animantia bruta, quæ ejusdem capacia apparent (§. 637.), non distinguimus (§. 39.). Quamobrem cum odium oriatur ex eo, quod quid in altero observamus, quod nobis displicet (§. 674.); odium quoque oriri debet, si quid in re inanimata, vel in animali bruto observa-
(*Wolffii Psychologia.*) Ttct mus;

mus, quod nobis displicet, consequenter quod nobis tædio est (§. 542.).

Quod vero odium majus, vel minus sit pro diverso gradu tædii, quod ex re ista, vel animali percipimus, eodem prorsus modo ostenditur, quo idem de amore evicimus (§. 654.), ut adeo non opus sit id denuo de odio demonstrari.

Idem etiam confirmatur a posteriori. Nos res inanimatas & animantia bruta odio prosequi, in confesso est apud omnes, nec facile erit quisquam, cui non exempla clarissima suggerat experientia domestica. Ponamus Titium inter strepitum non posse conservare attentionem & canem vicini esse ipsi latratu molestum. Quando eundem conspicit in platea, se ita eum odisse affirmat, ut sclopeto a quodam corpus ejus trajici vellet, ne amplius attentionem turbare posset. Similiter displicere deprehendimus nobis animal brutum propter formam ac inde odium adversus ipsum concipi, perinde ac adversus hominem, cujus forma displicet, si quidem formæ pulchritudinem in bonorum numerum, deformitatem in malorum numerum referimus. Quamobrem cavendum, ne ab uno objecto ad alterum argumentemur: neque enim omnibuseadem displicent, nec si qua displicent, in eodem displicent gradu.

Cartesius definitionem suam odii generaliter concepit, ut etiam ad res inanimatas applicari possit.

§. 680.

*Effectus
odii rei
inanimatæ.*

Si rem inanimatam odimus, ad ejus imperfectionem promovendam, immo ad ipsius quoque destructionem proni sumus. Si quem enim odimus, animum dispositum habemus ad tædium eidem creandum (§. 671.), consequenter ad ipsum, vel statum ejus imperfectiorem reddendum (§. 518.). Quamobrem si opinione ejus, qui rem inanimatam odit, eadem imperfectionis cujusdam, aut saltem destructionis fuerit capax; ad

ad eam promovendam pronus est , qui rem istam odio prosequitur.

Idem confirmatur a posteriori. Si nobis displicet imago propter dissimilitudinem, eam adeo odimus, ut ex conspectu nostro eam tolli jubeamus, immo ut nimio odio adducti arrepto cultro eam prorsus diffecemus, aut feralibus flammis tradamus. Germanis peculiaris phrasis est, qua hoc odium exprimunt & quæ tam de rebus inanimatis, quam hominibus ac animantibus brutis utuntur. Dicimus enim: *Ich bin dieser Sache, oder der Person, dem Thiere so gram, daß ich es nicht vor Augen leiden kan.*

In genere notandum est, linguam nobis vernaculam vocabulis ac loquendi formulis abundare ut ad singula, quæ de anima nostra observantur, apte ac perspicue exprimenda nunquam desit dictio. Quod si quædam occurrunt vulgo non observata, quæ tamen pura dictione exprimi jubentur; terminos aptos componere licet ex vocabulis obviis, quæ juxta ipsas leges etymologicas significatum insinuant, ut nomina rebus suis conveniant. Patet id ex operibus nostris philosophicis Germanico idiomate editis, ubi terminos maxime barbaros Scholasticorum, quæ aures latinas maxime offendunt, dictione Germanica pura reddidimus, quæ nihil continet, quod nauseam moveat puritati linguæ Germanicæ adæuetis. Unde sæpius me monuisse memini, quod, si a lingua Græca discefferis, non sit inter linguas ceteras, quæ ad philosophandum adeo apta videtur, ac quæ nobis vernacula est. Et hinc accidit, ut homines illiterati scripta nostra legentes solidam philosophiæ doctrinam sibi comparent tanto quidem successu, ut in conflictu cum viris eruditis palmam reportent, eosque doceant, quæ ipsi perperam intelligunt.

§. 681.

Si animantia bruta odimus, ad eorum tædia ac imperfectionem promovendam; voluptatem vero impediendam proni sumus. Odii bruto-
rum effectus.
Quoniam animantia bruta, si non omnia, saltem pleraque voluptatis ac tædii capacia judicamus, si vero alterum odio prosequimur, tædia eidem creare, ac præterea voluptate quo minus perfundatur, impedire studemus (§. 671.);

ubi animantia bruta odimus, iisdem quoque tædiacreatæ, quæ opinione nostra in ea cadunt, ac voluptatem, qua perfundi possent videntur, impedire debemus (§. 118. *Ontol.*). Quod si animantia bruta instar rerum inanimatarum consideremus, non attento tædio, nec attenta voluptate, quæ in eadem cadere videntur, odium eorum idem esse debet, quod rerum inanimatarum (§. 118. *Ontol.*). Enimvero si res inanimatas odimus, imperfectionem earum, quæ opinione nostra in eas cadit, promovere studemus, immo in earum destructionem ferimur (§. 680.). Ergo si animantia bruta & res inanimatæ pari jure a nobis censentur, imperfectionem quoque illorum promovere studemus, ac in eorum imperfectionem ferimur, ubi odio ea prosequimur. Idem etiam sequitur ex priori. Etenim si animantia bruta, quæ odimus, tædii capacia ac doloris judicamus; eis tædia creare studemus *per demonstrata*. Enimvero cum nobis constet, tædium in sensu imperfectionis consistere (§. 518.); eorum quoque imperfectionem, quæ opinione nostra in ea cadit, sive intrinseca fuerit, sive extrinseca, promovere studemus.

Idem confirmatur a posteriori. Exempla clarissima omnium præbent canes, quorum si quis osor fuerit, eos ferit, vel in eos invehitur quoties conspicit, nec aliam reddit rationem nisi quod adeo oderit, ut conspectum eorum ferre non possit. Immo videas gaudio exultantes ac in cachinnum effusos, si quis illis ægre facit quocunque modo, eumque instigantes, qui hoc facit. Ex adverso ægre ferentes audies, quod quis de iis ornandis cogitet, vel cibos præbeat delicatos. Palam igitur est eos, qui animantia bruta oderunt, ipsis tædia creare, quæ opinione sua in ea cadunt, ac eorum imperfectionem sive extrinsecam, sive intrinsecam promovere, si qua opinione eorum in ea cadit. Communissima vero sunt exempla, quod odio adducti animantia quædam destruamus, si ea ideo oderimus, quod nobis noxia experiamur, vel saltem existimemus.

Ex hæcenus evictis deduci potest definitio odii rerum inanimatarum ac animalium brutorum, quam ideo subjungere lubet.

§. 682.

Odium rerum inanimatarum est dispositio animæ ad tædium ex iis percipiendum. *Quodsi quis animantia bruta iisdem inanimatarum ac animantium brutorum definitio.* æquiparat, quatenus scilicet considerat non tanquam tædii capacia, sed tanquam ea, unde tædium percipi potest; *odium eorum idem est, quod rerum inanimatarum*: id quod inde colligitur, quod res inanimatæ cum animantibus brutis in hoc casu sub eodem veluti genere comprehendantur, scilicet sub genere entium, quæ tædii nullius capacia sunt, ita tamen comparata, ut ex iis percipiatur tædium. *Quodsi vero eadem animantia bruta hominibus æquiparentur; odium eorum idem est, qui hominum*: quod denuo inde colligitur, quod homines & animantia bruta veluti sub eodem genere contineantur, scilicet sub genere entium, quæ tædii capacia sunt simulque ita comparata, ut ex iis tædium percipi possit.

Ex definitione præsentē liquet, quænam differentia intercedat inter odium rerum inanimatarum, atque hominum. Nimirum ratione subiecti, cujus animus odio imbuatur, differentia foret nulla, nisi aliqua ratione objecti intercederet. Etenim si res inanimatæ tædii forent capaces, ut & ipsæmet eodem affici possent; odium rerum omnium idem foret, qui hominum, seu eodem odio prosequeremur res ceteras omnes, quo hominem nobis invisum prosequimur. Quoniam vero res inanimatæ tædii incapaces deprehenduntur, odium non tendere potest nisi ad statum destructionis, vel quod respectu ejus, qui odio in ipsas flagrat, æquipollet, ad statum absentia, seu remotionis e conspectu. Ex definitione hac odii rerum inanimatarum ratio redditur eorum omnium, quæ homines hoc odio impulsī faciunt.

§. 683.

Idem simul in unius hominis animo amorem ac odium ejusdem objecti eodem tempore excitare nequit, seu impossibile est, ut odii repudiem objectum eodem tempore eadem de causa simul amemus ac gnantia.

oderimus. Si enim Titius amat objectum A, amor ex eo oritur, quod quid in eodem observat, quod sibi placet (§. 649.), seu unde voluptatem percipit (§. 657.), veluti C. Quodsi idem objectum A, eadem de causa, simul eodem tempore odio prosequi debet; idem C, quod enti A inest, displicere eidem debet, & quidem eodem respectu, quo placet (§. 677.). Enimvero impossibile est ut idem C eodem tempore eidem simul placeat & displiceat, hoc est, non placeat (§. 542.). Ergo impossibile est ut idem objectum A eadem de causa simul animo Titii & amorem, & odium ingeneret.

In exemplis propositionis præsentis veritas manifestissima est. Si Titius Mevium amat ob fidelitatem singularem; impossibile est ut eum simul ob eandem fidelitatem odio prosequatur. Similiter si Titius Sempronium oderit ob deformitatem; impossibile est ut eundem simul ob eandem amet. Ceterum determinationes, ob quas repugnantia odii & amoris in præsentē propositione admittitur, probe notandæ sunt, ne instantiæ afferantur ad rhombum non facientes.

§. 684.

*Amoris ac
odii in oppo-
situm mu-
ratio.*

Si quod antea nobis placebat in altero, nunc displicet, vel quod antea nobis in altero repræsentabamus tanquam bonum, nunc nobis tanquam malum repræsentamus; quem antea amabamus, nunc ex eadem causa odimus & contra. Si quid enim nobis placet in altero, vel si nobis quid in eo repræsentamus tanquam bonum; amorem erga eum concipimus (§. 649.). Enimvero si idem nobis postea in altero displicet, vel si idem nobis repræsentamus tanquam malum; odium adversus eum concipimus (§. 677.). Patet igitur nos eum odisse, quem antea amabamus ex eadem causa, quia nunc displicet, quod antea placebat, vel quia nunc nobis tanquam malum repræsentamus, quod antea tanquam bonum repræsentabamus.

Eodem prorsus modo ostenditur, nos ex eadem causa amare, quod antea oderamus, si quod antea nobis displicebat in

in altero, nunc placet, vel si quod antea nobis repræsentabamus tanquam malum, nunc tanquam bonum nobis repræsentatur.

Idem confirmatur a posteriori. Ponamus Titium delectari studio critico & Sempronium eodem excellentem ipsi opem ferre plurimam ac ardorem ejus magis adhuc accendere, ut neglectis studiis aliis critico fere soli totus incumbat. Nemo non novit Titium eo in casu impense amare Sempronium tum ob excellentiam in hoc studiorum genere, tum ob opem, quam ipsi in eodem ferre solet. Ponamus vero porro Titium ex Academia reducem ineptum deprehendi ad munus ecclesiasticum, ob neglectum studii rheologici ac critici, cui totum se dedit, inutilitatem experiri, consequenter diligentiam olim in eodem adhibitam damnare. Malum ergo judicabit, quod Sempronius ipsi hoc studiorum genus magis persuaserit ipsique in eodem manus auxiliatrices tulerit. Ecquis vero est, qui nesciat, Titium jam odisse Sempronium, quem antea tantopere amaverat? Ex eadem igitur causa odit Sempronium, ex qua eundem amaverat, quia nunc sibi repræsentat tanquam malum, quod antea sibi repræsentabat tanquam bonum. Similiter videas juvenes, qui amant puellas, quod ipsis sui potestatem faciant. At ubi postea imprægnantur, ut ex concubitu plurima nascantur tædia; easdem odio prosequuntur, quod ipsis copiam sui fecerint tam facile. Facilitatem istam initio bonam judicabant; postea vero malam reputant. Sed initio inde amor; postea odium nascitur. Patet igitur ex eadem causa nasci amorem & odium diverso tempore, si quod antea bonum videbatur, nunc malum apparet.

Istiusmodi mutationes cur contingant, non est quod miremur. Amor enim ac odium sequuntur opinionem amantis ac odio flagrantis. Opiniones hominum mutabiles sunt ac haud infrequenter mutantur in contrarias. Quidni igitur & amor in odium, odium in amorem mutetur, manente causa amoris, quæ antea odii fuerat, vel odii, quæ antea fuerat amoris causa?

§. 685.

*Amoris ac
odii simul-
tancitas.*

Si in altero observamus, quæ nobis placent, vel tanquam bona nobis repræsentamus; alia vero, quæ displicent, vel tanquam mala nobis repræsentantur; eum simul amamus, ac odimus, prouti ad causam vel amoris, vel odii attendimus. Si quæ enim in altero observamus, quæ nobis placent, vel quæ tanquam bona nobis repræsentamus, amor oritur (§. 649.); si quæ vero in eodem observamus, quæ displicent, vel quæ tanquam mala nobis repræsentamus, odium oritur (§. 677.). Quamobrem si ad causam amoris attendimus, cur eum amemus, nil obstat; si vero ad causam odii respiciamus, cur eum non oderimus, nil obstat. In casu igitur priori eum amamus, in posteriori odimus. Animus igitur simul dispositus esse debet ad amorem ac odium, ita ut vel actus amoris, vel odii sequatur, prouti vel illius, vel hujus causa ponitur.

Idem quoque confirmatur a posteriori. Audies enim haud raro eos, qui odio prosequuntur alios, affirmantes, quod ipsos alias ament, hac tamen de causa amare minime possint.

Maximi momenti est propositio præsens, siquidem actiones hominum, quæ sibi mutuo contrariari videntur, inter se conciliare, vel etiam easdem præsentire volueris.

§. 686.

*Amor ac
odium
quando se
mutuo ex-
tinguant.*

Quodsi amor plurimum superet odium, vel odium plurimum superet amorem; in casu priori odium, in posteriori amor prorsus evanescit. Etenim si amor plurimum superet odium, multo vehementius tadium alterius aversamur (§. 651.), quam appetimus (§. 669.), consequenter aversatio tadium, amoris effectus (§. 886. Ontol.), prævalere debet. Quodsi ergo sapius in conflictu prævalet amor, hujus in posterum memores ubi causa odii nobis occurrit (§. 117.); ad eam non amplius attendimus, attentionem omnem causa amoris in se trahente (§. 238.). Odium igitur tandem evanescit.

Simili

Simili prorsus modo ostenditur, amorem evanescere in eo casu, in quo odium amorem plurimum superat.

A posteriori idem patet in iis casibus, ubi alios initio amamus, vel odimus, postquam autem multa nobis cum ipsis consuetudo intercessit, eos tandem odimus, vel amamus, odio adversus amorem, amore adversus odium prævalente. Ponamus Titium odisse Mevium ob deformitatem, ubi primo eundem conspicit: nunquam fieri poterit, ut ob eandem ipsum amet, cum deformitatem in malorum numerum referat formæ pulchritudine delectatus. Ponamus Mevium excellere arte poëtica & eadem mire delectari Titium. Impense Mevium a Titio amari debere palam est. Quoniam causa odii non magni momenti est, talis autem respectu Titii esse debet causa amoris; quin amor odium plurimum superet nemo non videt. Videmus vero Titium amare Sempronium ac odii posthac nullius sibi conscium esse. Evanescit igitur odium, dum ab amore plurimum superatur. Titium jam non mutasse sententiam suam, inde apparet, quod alios adhuc ob deformitatem oderit, & quæsitus cur Mevium non oderit respondeat, aliam hic subesse rationem, scilicet quod arte poëtica excellat. Dum itaque causam amoris tanquam odii absentis allegat, etsi hujus causa ponatur; haud obscure apparet amorem adversus odium prævalentem impedire, quo minus hic oriatur, cumque odium ante invalisset animum ejus, odium amore extinguitur, seu hoc continuo crescente continuo decrescit, donec tandem prorsus evanescat.

Fœcundissimum hoc principium est in moralibus, ubi de actionibus hominum ferendum est judicium: ac in primis ad talia respiciendum est in Arte conjectandi hominum mores, siquidem ex actionibus externis statum animi internum hariolari volueris. Difficilis sane deprehenditur ars ista, quod theoria status interioris animæ humanæ ignoretur, ad quam hæc de affectibus theoremata pertinent.

§. 687.

Tristitia ex alterius infelicitate percepta dicitur *Commiseratio*. Et quoniam tristitia in prædominio tædii insigni consistit. *Commiserationis definitio.*
(Wolffii Psychologia.) Uuu sistitio.

fistit (§. 619.); tædium quoque quodcunque ex infelicitate alterius perceptum Commiserationis nomine venit.

Nihil in hoc obtinet singulare, quod etiam tædium affectu isto comprehendatur, qui in ejus prædominio insigni potissimum consistit. Etenim a quovis tædii gradu nascitur affectus, ut adeo exiguus quidam ejusdem gradus exprimat statum tædii nascentis. Ideo etiam idem observavimus in definitionibus amoris (§. 633.) atque odii (§. 661.).

§. 688.

Fons commiserationis.

Quoniam qui alterum amat, ex ejus tædio ipsemet tædium percipit, ac ideo contristatur, quod alter tristis sit (§. 642.), consequenter tædium ex infelicitate alterius capit ac ob eam contristatur (§. 639.): *Qui alterum amat, ejusdem quoque commiseratur* (§. 687.).

Hinc etiam videas, commiserationem esse tanto majorem, quanto major fuerit amor: id quod ex ipsis amoris ac commiserationis notionibus facile ostenditur, nisi per se satis manifestum a nemine in dubium vocaretur.

§. 689.

Defectus commiserationis.

Si quis alterum non amat, nec ejusdem commiseratur. Quodsi enim alterum non amas, nec animus dispositus est ad voluptatem ex alterius felicitate (§. 633.), consequenter voluptate capiendam (§. 638.). Igitur nec dispositus est ad percipiendum tædium ex ejus tædio (§. 644.), adeoque nec tædium percipit ex ejusdem infelicitate (§. 639.). Ejusdem igitur non commiseratur (§. 687.).

Nihil sane frequentius est, quam ut indifferente animo vel ipsimet simus, vel alios esse experiamur in eos, qui miseri sunt, ut aliena miseria nos prorsus non tangat, vel alios. Quodsi in rationem hujus indifferentiæ inquisiveris, nullum in te affectum amoris in miseros istos deprehendes ac alios, qui eodem sunt animo, idem de se affirmare audies. Defectum hunc amoris indicaturi ajunt vulgo, te eos non odisse, cum nulla adsit odii causa. Malunt enim homines profiteri se ab odio, quam amore vacuum

vacuum habere animum. Quodsi vero ulterius instas ac ex iis quæris, an non ament eum, quem miserum intuentur; respondent sese quidem affirmare non posse quod singularem quandam animi propensionem erga ipsum in se sentiant, ne minimè tamen odii adversus eundem in animo suo alere. Hoc ipso satis aperte defectum amoris confitentur, qui eundem defectu odii excusare solent.

Propositionem hanc non posse converti, ex sequente patet.

§. 690.

Si quis alterum odit, ejus non commiseratur. Qui enim al- ^{Defectus} terum odit, ex ejus tædio voluptatem percipit ac ideo gaudet, ^{commiserationis} quod alter tristitia afficitur (§. 664.), immo tædia ipsi creanda appetit (§. 669.), ac ipsemet tædia eidem creare studet (§. 671.). Quare cum impossibile sit, ut ex alterius tædio eodem respectu simul & tædium, & voluptatem percipiamus (§. 511. 518.) ; qui alterum odit, ex alterius tædio tædium percipere nequit, nec contristari potest, quod alter contristetur. Ejus adeo non commiseratur (§. 687.).

Casus præsens plurimum differt a præcedente, etsi utrobique idem sit prædicatum. Etenim in præcedente abest ratio commiserationis, ut ea non posita nec ipsa poni possit: in præsentem autem adest impedimentum, quod obstat quo minus poni possit. Differentia hæc magnum momentum habet in praxi. Etenim si commiseratio in priori casu excitanda ; ingenerandus animo est amor erga miserum, cujus miseriam, seu infelicitatem intuetur is, quem ad commiserationem perducere volueris. At in casu posteriori non oritur commiseratio, nisi & odium tollatur, & hoc sublato amor gignatur. Facilius adeo in casu priori ad commiserationem perducitur, qui ab ea alienus est, quam in posteriori.

§. 691.

Si quis alterius non commiseratur, aut eum odit, aut non amat, Signum odii etsi non oderit. Siquis enim alterius non commiseratur, ex alte- ^{ac amoris} rius infelicitate tædium nullum percipit, nec ideo contristatur, ^{deficientis.} quod alter infelix sit, seu miser (§. 687.), adeoque eum non amat (§. 642.). Enimvero qui ex alterius infelicitate tædium nullum

percipit, nec ideo contristatur, quod alter infelix sit; ex ejusdem infelicitate voluptatem percipere, ac ideo gaudere potest, quod alter sit infelix, seu miser: id quod per se patet. Quodsi ergo hic casus obtineat, eum, qui miser est, odit (§. 665.).

Patet ex demonstratione propositionis præsentis, statum animi differre in duobus subjectis, si commiserationis defectus vel ex odio, vel ex defectu amoris proficiscitur. Quodsi odium celatur intra pectus absconditum latens, extus non semper apparet.

§. 692.

*Amoris
signum.*

Si quis alterius commiseratur, eum amat. Si quis enim alterius commiseratur, ex ejus infelicitate (§. 687.), consequenter ex ejus tædio (§. 639.) tædium ipsemet percipit, vel prorsus propterea contristatur. Eum igitur amat (§. 643.).

Est adeo commiseratio signum infalibile amoris (§. 952. Ontol.). Me autem non monente patet, commiserationem esse debere sinceram, non simulatam: id quod in omni casu simili observandum.

§. 693.

*Effectus
commiserationis.*

Si quis alterius commiseratur, is eum malo, quo affligitur, indignum judicat. Qui enim alterius commiseratur, is eum amat (§. 692.), consequenter tædium ejus averfatur (§. 651.) ac ab eo idem avertere studet (§. 652.). Quoniam igitur per se patet, quod eum malo indignum judicare debeat, quod averfatur, vel quod ab eodem avertere studet; si quis alterius commiseratur, eum malo, quo affligitur, indignum judicare debet.

Confirmatur idem a posteriori. Nihil enim communius est verbis commiserantium, quibus afflictos tantum malum non promeruisse pronunciant, quo premuntur.

§. 694.

Commiserationis causa.

Si quis alterum indignum existimat malo, quo affligitur, ejusdem commiseratur. Etenim si alterum indignum existimat malo, quo affligitur; idem utique averfatur ac, si per se staret, averteret, consequenter bonum alterius appetit, adeoque & voluptatem (§. 558.). Eum igitur amat (§. 650.), adeoque & ejus commiseratur (§. 688.).

Expe-

Experimur idem in nobis, quoties afflicti commiseramur. Haud obscure enim observamus affectum commiserationis præcedere iudicium de malo, quo affligitur alter, modo non ex consuetudine oriatur commiseratio, ut in tantillo temporis spatio quæ contingant distinguere a se invicem non valeamus. Neque enim commiseramur alterius, nisi malo, quo affligitur, nobis perspecto. Malum vero alterius nos non tangit, nisi eo in casu, quo alterum tale quid non promeruisse existimamus: per se enim patet, quod commiserationi non sit locus in casu opposito, quando alterum dignum iudicamus malo, quo afficitur. In tertio casu, quando scilicet alterum neque dignum, neque indignum iudicamus malo, quo afficitur; nos indifferente esse animo nec aliena curare experimur.

Ex propositione præsentē patet, quandonam commiseratio in nobis excitetur, modo ad eam dispositus sit animus. Disponitur autem ad eandem per amorem (§. 688. 692.), quo absente commiserationi locus non est, nisi simulata. Sed cum simulata nobis nihil negotii est.

§. 695.

Commiseratio oritur, si alterum indignum iudicamus malo, quo affligitur. Patet definitionis veritas per propositiones præcedentes (§. 693. 694.).

Commiserationis definitio realis.

Quod si forte desideres in definitione hac commiserationis reali non exprimi amorem, quo tamen absente eam oriri non posse modo pronuntiavimus, scrupulus facile eximitur. Etenim fieri non potest, ut alterum indignum iudices malo, quo affligitur, nisi eundem ames. Si enim alterum oderis, iudicabis utique dignum malo, quo premitur: si nec ames, nec oderis, malum alterius attentione tua indignum existimabis, neque adeo iudicium de eodem feres, tua scilicet sponte, sed idem suspendes. In primis autem tenendum est iudicia hic non præsupponi, quæ ex principiis rationis distincte colliguntur; sed quæ ex notionibus confusis oriuntur (§. 605.).

§. 696.

Definitio tam nominalis, quam realis commiserationis signi-

ficatui tus voca-

*buli commiserationis
num usui
loquendi
conformis.*

ficatui recepto ac communi usui loquendi conformis. Quoniam definitio realis ex nominali deducta fuit, quemadmodum ex antecedentibus (§. 687. & seqq.) palam est; quod de una ostenditur, de altera etiam valer. Sunt qui vocabulo misericordix, quam commiserationis uti malunt. Nos autem vocabulo commiserationis utimur, quod hodie inter philosophos *Cartesianos* receptum, & quod vulgo hac voce utimur eademque reddimus vocabulum Germanicum *Mitleiden*, quod citra omnem controversiam affectum illum exprimit, cum quo nobis iam negotium est. Vocabulum *Misericordix* reservamus virtuti, cujus comes est affectus ille, quando appetitus sensitivus cum rationali conspirat. Atque id denuo conveniens est sermoni Germanico, in quo virtus illa *Barmbergigkeit* appellatur: vocabulum autem hoc Germanicum per Latinum *misericordia* vertere solemus. Jam *Goclenius* in Lexico misericordiam definit per alienæ miseriæ in corde nostro sympathiam, qua utique, si possumus, subvenire compellimur. Per vocabulum sympathiæ clarissime indigitat, quod in hoc affectu idem sit animi status, qui est alterius miseria laborantis. Jam qui miseria affligitur, tristis est, aut minimum tædio afficitur. Ergo qui misericors est, seu nostra phrasi alterius commiseratur, tristis est, propterea quod alter contristatur, ac tædio afficitur, propterea quod alter eodem afficitur; tedium nempe percipit ex miseria alterius ac ob eandem, si ingens fuerit, contristatur. Definitio adeo misericordix *Gocleniana* convenit cum nostra nominali (§. 687.), nisi quod addatur, quod hoc affectu impellamur subvenire alteri, si possumus: id quod ex definitione exulare atque demonstrari debet. Adducit idem *Goclenius* aliam ex *Damasceno* definitionem, quod scilicet misericordia, seu commiseratio sit tristitia in alienis malis: quam cum nostra prorsus eandem esse satis superque apparet. Immo quam porro subjicit *Goclenius*, quod sit ægritudo animi ob alienarum miseriarum sensum, ea non minus cum nostra definitione

tione

tione nominali conspirat. Aegritudo animi enim opponitur voluptati atque adeo tædii synonymon est, quod ubi prædominatur insigniter, in tristitiam abit (§. 619.). Perinde igitur est ac si commiseratio definiretur per tristitiam, quæ ex alienis miseriis oritur, vel per tædium, quod ex alienis miseriis, quas nobis repræsentamus, percipimus. Quod si quis hic non perspiciat consensum cum definitione nostra, in re manifesta cœcutire debet. Miseria non aliud hic denotat, quam quod nos infelicitatis nomine indigitamus, vocabulo miseriæ diversum parumper significatum tribuentes, quem explicare non est hujus loci. *Cartesius* in Tractatu de passionibus animæ part. 2. art. 62. commiserationem definit per affectum, quem excitat malum, si ejus alterum indignum existimamus: id quod cum definitione reali, quam ex nominali collegimus, prorsus conincidit (§. 695.). Quod commiserationem tribuamus ei, quem tristem videmus ob miseriam alterius, vel aegritudine animi laborare comperimus, quod alterum tristem, vel miseria laborantem experitur; in casu autem opposito eandem denegamus ei, qui alterius miseria non tangitur, nemo non novit. Abunde igitur constat, nostram commiserationis notionem esse & recepto inter philosophos significatui ac communi loquendi usui conformem.

Operæ pretium est ostendere, quod definitiones nostræ affectuum significatui inter philosophos recepto, ac communi usui loquendi sint conformes, propterea quod doctrina affectuum utemur longe plurimum in moralibus, non autem ignoramus eos, quibus imbecille est judicium, sibi persuadere a communi loquendi usu recedi, siquidem distincta notione explicentur, quæ confusæ ipsorum notioni insunt, identitatem distinctæ atque confusæ non perspicentes. Experta loquimur citra ullius injuriam, nominato nemine, cum plures nominari possent, quorum non ignotum est in orbe erudito nomen.

§. 697.

*Qui alterius commiseratur, ad ejus tædia ac tristitiam Effectus
minu- commiserationis-*

minuendum pronus est. Etenim qui alterius commiseratur, eum amat (§. 692.). Ergo tædium ejus averfatur (§. 651.), im-
mo ab eo avertere ftudet (§. 652.), adeoque pronus effe debet
ad tædia alterius, confequenter & triftitiam (§. 619.), lenien-
dum, feu imminuendum.

Patet idem experientia, qua docemur, nos' confolari mi-
feros, ubi eorum commiferamur, ut dolores, quibus affligun-
tur, reddamus tolerabiliores, ac ægritudinem animi, qua la-
borant, leniamus.

§. 698.

*Effectus
alius.*

Quoniam proni fumus ad tædia ac triftitiam eorum minu-
endum, quorum commiferamur (§. 697.), nec eft in nobis
quod actum impediât, ubi idem in potestate noſtra poſitum
deprehendimus; eos, *quorum commiferamur, a malo, quod
iſſis tædia creat ac triftitiam cauſatur, vel dolorem, liberare
ſtudemus, ſi poſſumus.* Patet idem a poſteriori, quatenus
conſtat nos miſericordia compelli ad ſubveniendum miſeris,
ſi poſſumus, ut adeo *Goclenius*, quemadmodum paulo ante
monuimus (§. 696.), hunc commiſerationis effectum defini-
tioni ejus adjecerit.

Propoſitio præſens reſpondet notioni communi, ut nemine repu-
gnante definire Commiſerationem liceat per affectum, quo compelli-
mur ſubvenire miſeris, ſi poſſumus, modo addatur, quod liberationem
ex miſeria, vel imminutionem tædii, triftitiæ atque doloris intenda-
mus tanquam finem, ſeu quod agamus iſſius miſerigratia. Neque
enim ignorant, qui in actionibus hominum ſcrutandis acuti ſunt,
poſſe nos quoque ambitione, vel odio in alios homines compelli
ad miſeris ſubveniendum, ut famæ noſtræ conſulamus laudem miſe-
ricordiæ appetentes, vel ut aliis ægre faciamus, qui miſerum hunc
hominem ab omnibus deſtitui mallent auxiliis. Ceterum ex præſen-
te quoque propoſitione patet, cur *Lipſius* hunc affectum compellet
affectum liberantem, quod nempe tendit ad liberationem miſeri a
miſeria, quo affligitur.

§. 699.

*Effectus
adhuc alius.*

*Qui alterius commiſeratur, ab iis abſtinet, quæ eidem tæ-
dia*

dia creare, vel eum tristitia afficere poterant. Qui alterius commiseratur, ad ejus tædia ac tristitiam minuendum pronus est (§. 697.), immo a malo, quod tædia, tristitiam atque dolorem causatur, si potest, liberare studet (§. 698.). Impossibile igitur est, ut ipsemet eidem sciens ac volens tædia creet, vel eundem tristitia afficiat (§. 28. *Ontol.*), consequenter ab iis abstinere debet; quæ eidem tædia creare, vel eundem tristitia afficere poterant.

Idem clarissime patet a posteriori. Videmus enim homines celare eos, quorum commiserantur, ea omnia, quæ tædia ipsis creare, eosque tristitia afficere poterant, hanc reddentes rationem, quod eos tristitia afficere nolint, vel ubi jam tristes sunt, quod ipsorum tristitiam augere nolint. Immo ad iram concitati, ubi ad animum redeunt, & a malo alteri inferendo abstinere, affirmant nolle sese alteri inferre malum, quod ipsi inde percipiant dolorem, vel contristentur.

Hinc *Lipsius* commiserationem vocat affectum parcentem. An vero eadem, quod ille facit, definiri possit per affectum liberantem ac parcentem, altioris est indaginis, nec id sine ambagibus ostendi potest: demonstrandum enim est, ex eo, quod compellamur liberare alterum ac eidem parcere, deduci posse definitionem nostram sive nominalem, sive realem. Patebit autem id tum demum fieri posse, ubi sumitur utrumque fieri solius miseri gratia,

§. 700.

Qui ad alterius tædia ac tristitiam minuendum pronus est, Signum vel a malo, quod ipsi tædia creat, ac tristitiam, vel dolorem commiseratur, si potest, liberare studet, vel etiam ab iis abstinet, rationis. quæ eidem tædia creare, vel tristitiam causari poterant, alterius, non sui, aut tertii gratia; is ejusdem commiseratur. Et enim si ad alterius tædia ac tristitiam minuendum pronus est alterius, non sui, aut tertii cujusdam gratia; is tædia ac tristitiam alterius averfatur, quatenus sunt tædia alterius: quod per se patet. Ea igitur sibi repræsentat tanquam mala (§. 586.), consequenter cum affectus ex confusa mali repræsentatione (*Wolffii Psychologia.*)

orientur (§. 605.), ex iis tanto majus tædium percipit, quanto majora existimantur tædia alterius (§. 613.). Enimvero qui ex alterius infelicitate, consequenter ex tædiis alterius (§. 639.), tædium percipit; is alterius commiseratur (§. 687.). Quamobrem qui ad alterius tædia ac tristitiam minuendum pronus est; is ejusdem commiseratur, siquidem id fiat, ipsius, non sui, aut tertii gratia.

Quoniam vero jam porro patet, qui ad alterius tædia ac tristitiam minuendum pronus est, alterius, non sui, aut tertii gratia; eum quoque a malo, quod alteri tædium creat, ac tristitiam, vel dolorem causatur, si potest, liberare studet alterum, ipsius, non sui, aut tertii cujusdam gratia. Igitur hoc ipso evidens est, quod ejus quoque commiseretur, quem a malo, si potest, liberare studet, quod eidem tædia creat, vel tristitiam aut dolorem causatur, ipsius quidem, non sui, aut alterius gratia.

Non ab simili modo liquet, quod etiam alterius commiseretur, qui ab iis abstinet, quæ eidem tædia creare, vel eundem tristitia afficere poterant, modo id fiat alterius, non sui, aut tertii cujusdam gratia.

Poterat quoque propositio præsens brevius ita ostendi. Qui ad alterius tædia ac tristitiam minuendam pronus est, ipsius quidem, non sui, aut alterius gratia; is alterum indignum judicare debet tædiis ac tristitia, quibus affligitur: id quod per se patet. Ejusdem igitur commiseratur (§. 694.).

Hinc vero porro fluit ut ante, commiserationi locum esse etiam in casibus ceteris propositionis præsentis.

A posteriori etiam veritas propositionis innotescit. Nemo enim non agnoscit, eum alterius commiserari, qui ad ipsum a malo, quo affligitur, liberandum tendit, si tristitia infucata prodit id fieri ipsius, non sui, aut tertii cujusdam gratia, propterea quod unusquisque in se affectum commiserationis experitur, ubi non sine tristitia misero succurrit. Si vero quis
animo

animo minime tristi succurrit inopi ejusque miseriam sublevare studet ; tum saltem acutiores & qui a præcipitandis judiciis procul sunt remoti inde colligunt , quod non ex commiseratione procedant actiones ejusdem. Non tamen negandum est propositionem præsentem esse ex earum genere , quæ evidentius a priori agnoscuntur, quam a posteriori: propterea quod a posteriori oblatentem quandam determinationem, veluti quod hic misero succurratur, ipsius miseri gratia , dubitatur num idem valeat in omni casu ., an vero singulare quidpiam subsit cur in præsentem succedat. In confirmandis adeo istiusmodi propositionibus a posteriori respiciendum simul est ad probationem a priori, ut ita nebula, si qua superest, dispellatur.

Ex iis, quæ modo diximus de propositione præsentem aliisque similibus a posteriori confirmandis, apparet necessitas connubii rationis atque experientiae, cum alias vix fieri possit, ut propositionem a posteriori confirmandam rite determines, vel etiam ex iis, quæ observari possunt, alterum universalitatis convincas. Quamobrem ut iis, quæ a posteriori de anima innotescunt, lucem affunderemus, quæque experientia magistra addiscuntur, latius paterent, propositionum quoque rationes ex aliis anterioribus reddidimus, quæ in Psychologia empirica a posteriori hauriendæ sunt.

§. 701.

Si animalia doloris capacia existimamus atque tristitiæ, Animalium eaque amamus ; eorundum quoque commiseramur. Etenim si quando commiseramur animalia doloris ac tristitiæ capacia existimamus, ea hominibus miserrime commiseramur. quoad præsens negotium æquiparamus, cum nec hominem hic aliter nobis repræsentemus quam subjectum doloris ac tristitiæ capax. Enimvero si hominem amemus, ejus commiseramur (§. 688.). Ergo etiam si animalia amamus, eorum commiserari debemus , ubi ea tanquam doloris atque tristitiæ capacia existimamus.

Idem a posteriori patet, idque clarissime omnium exemplo foeminarum , quæ catellos amant. Quod si enim his vul-

nus quoddam infligatur, eorum perinde commiserantur, ac si homini, quem impense amant, id mali accidisset. Cum eos dolore affici existiment, contristantur verbisque affectum produnt, quo commoventur: immo ad opem iisdem ferendam pronæ sunt, nec ab iis abstinere, quæ ad dolores leniendos & vulnus sanandum faciunt. Immo qui animalia omnia, quæ hominibus noxia non sunt, amore quodam universali complectitur, qualis est eorum, qui omne humanum genus amore prosequuntur, ad benefaciendum singulis proni, ad nemini ægre faciendum apti, nisi ad iram ipsorum opinione justam provocati fuerint; illos tristitia commoveri videas, si quid mali ipsorum opinione acciderit animali cuicunque, quo ipsi tædium ac dolor creatur.

Non mirum, si animalium brutorum perinde ac hominum commiseremur, cum hominum non commiseremur quatenus homines sunt, sed quatenus dolore ac tristitia anguntur atque a nobis amantur: quod utrumque etiam in brutis communi saltem opinione locum habere constat, sit ita quod *Cartesiani* bruta in meras machinas convertentes aliter sentiant. Non obstat eorum theoria, ut, cum affectus ex confusis ideis oriantur, ipsimet exempli loco esse possint, ubi de propositione præsentē confirmanda agitur.

§. 702.

Commiseratio num locum habeat circa res inanimatas.

Si res inanimatæ, quas amamus, destruuntur vel quomodocunque deteriorantur; earum quasi commiseramur. Si enim res inanimatas amamus, animus dispositus est ad voluptatem ex ipsis percipiendam (§. 657.), consequenter ex earum destructione ac deterioratione tædium percipiendum (§. 644. 637.), immo ad tristitiam ob utramque (§. 619.). Quamobrem cum ejus commiseremur, ex cujus infelicitate tædium capimus, vel ob cujus infelicitatem tristitia afficimur (§. 687.), infelicitatis autem loco in rebus inanimatis, in quæ tædia ac tristitia non cadunt, loco sit earum destructio ac deterioratio (§. 637.); rerum inanimatarum, quas amamus, quasi commiseramur, ubi destruuntur, vel quomodocunque deteriorantur.

Idem

Idem etiam sic ostenditur. Si rem inanimatam amamus, ex ea voluptatem percipimus (§. 657.), adeoque indignam quasi judicamus, quæ destruat, vel deterioretur, cum tunc non amplius voluptatem ex ea haurire queamus. Enimvero si quem indignum judicamus malo, quo affligitur, ejus commiseramur (§. 695.). Ergo si res inanimata, quam amamus, destruitur, aut quomodocunque deterioratur, ejus quasi commiseramur.

Confirmatur etiam propositio præsens a posteriori. Ponamus enim aliquem amare imaginem, quæ est alterius, non sua. Quod si nævum quendam contrahat casu quodam; perinde nos miseret ejus ac si homini cuidam, quem amamus, mali quidpiam accidisset. Unde etiam audias affirmantes, quod tanta afficiantur tristitia ob sinistrum imaginis casum, quanta non afficerentur, si vel filio suo mali quidpiam accidisset. Luget casum sinistrum imaginis eodem modo, quo fata amici sinistra lugere solemus. Exempla etiam præbent vasa aliena fragilia, quæ amamus sive ob pulchritudinem, sive ob raritatem, ubi franguntur. Pertinet huc, quod sæpius homines suam erga res inanimatas commiserationem iisdem verbis restentur, quibus utuntur, quando eandem erga homines exprimunt.

Affectus ex ideis confusis oriuntur (§. 605.), in quibus res animatas ab inanimatis distinguimus quoad rationem commiserationis, ut adeo, dum talia rebus inanimatis accidere observamus, quæ homini mala existimamus, poni possit commiserationis ratio sufficiens, consequenter & ipsa commiseratio (§. 118. *Ontol.*). Adest nempe uti obique idea mali non nostri, adeoque alieni; adest amor ejus rei, in qua nobis malum istud repræsentamus. Adest igitur commiserationis ratio sufficiens (§. 688.).

§. 703.

Ex dictis apparet, quo sensu rerum inanimatarum commiserari dicamur. Est nempe *Commiseratio*, quæ homini tribuitur, respectu rerum inanimatarum, tristitia ob destructionem, nem,

nem, vel deteriorationem rei, opinione nostra destructionis, vel deteriorationis indignæ.

Commiseratio oritur, si alterum indignum judicamus malo, quo affligitur (§. 695.). Malum aliud rebus inanimatis accidere nequit, quam si deteriores, vel quoad substantiam, vel quoad usum, aut prorsus destruantur (§. 565.) : solenne nimirum est hominibus, quamdiu imaginationi litantur, de rebus inanimatis non secus judicare ac de animatis. Deteriorantur autem res quoad usum, si ad viliores transferuntur, cum nobiliori ab opifice destinantur. Quod si ergo judicamus, res mereri ut conserventur integræ, nec deteriores, ac indignas esse usu ignobiliori, cui aliæ viliores adhiberi possunt : ea utique adsunt, quæ ad commiserationem excitandam sufficiunt.

§. 704.

Commiseratio erga bruta.

Quod si quis animantia bruta rebus inanimatis equiparet, quatenus scilicet non considerantur tanquam tædii capacia, sed tanquam ea, quibus mali quidpiam accidere potest, vel quod deteriores, sive quoad substantiam, sive quoad usum, vel quod prorsus destruantur ; commiseratio erga ea eadem est, quæ erga res inanimatas sese exerit : id quod inde patet, quod tunc animalia bruta instar rerum inanimatarum nobis repræsentemus. Quod si vero eadem animantia bruta hominibus equiparantur, quatenus scilicet existimamus ea perinde ac homines malo, quod ipsis accidit, affligi ac dolore torqueri ; commiseratio eadem est, qua erga homines utimur, id quod denuo inde patet, quod tunc bruta animantia instar hominum nobis repræsentemus, quatenus ad hunc affectum sufficit.

Singulis hisce experientia consentanea est, modo ad ea, quæ inter homines quotidie accidunt, attentionem afferas, nec indigna iudices, quæ expendantur, generalibus, quæ istis insunt, solerter abstractis.

§. 705.

Invidia definitio.

Tristitia ex alterius felicitate percepta dicitur *Invidia*. Et quoniam tristitia in prædominio tædii insigni consistit (§. 619.) ;

tædi-

tædium quodcunque ex infelicitate alterius perceptum Invidia nomine venit.

Quæ supra ad definitionem commiserationis annotavimus, etiam huc trahenda sunt.

§. 706.

Si quis alterum odit, ei felicitatem invidet. Etenim si *Fons invidi-* alterum odit, ex ejus voluptate, consequenter felicitate (§. *dia*, 638.), tædium percipit, immo contristatur, quod alter gaudet (§. 667.). Quare cum tristitia, vel tædium ex alterius felicitate perceptum sit invidia (§. 705.); qui alterum odit, ei felicitatem invidet.

Idem confirmatur a posteriori. Ponamus enim Titium odio prosequi Mevium, ipsique narrari, quod is matrimonium cum virgine divite contraxerit. Ecquis est, qui nesciat hanc narrationem tædio fore Titio, immo eundem prorsus contristatum iri quod ejus opinione adeo felix sit Mevius? Tum vero invidet Mevio tantam felicitatem, atque adeo evidens est, Mevio invideri a Titio felicitatem, quod eum odio prosequatur. Et sane videmus tanto majorem esse solere invidiam, quanto majus odium est, quod adversus alterum concepimus.

§. 707.

Qui alterum odit, ea, quæ bona existimat, alteri invidet. Qui enim alterum odit, is ei felicitatem invidet (§. 706.), consequenter voluptatem omnem (§. 638.). Quamobrem cum quid tanto majus bonum videatur, quanto major est voluptas, quæ ex eo percipitur (§. 612.); qui alterum odit, ei bonum promiscue omne invidet, quod scilicet tale est opinione ejus, qui odio prosequitur alterum (§. 605.).

Quæ ad confirmandam propositionem præcedentem in medium adducta fuerunt, ad præsentem quoque trahenda sunt. Quod enim ad felicitatem alterius referimus, idem bonum esse opinione nostra nemo non novit. Et sane quis est, qui matrimonium

cum

cum virgine divite non referat in uumerum bonorum, si felicem existimat eum, qui istiusmodi matrimonium contrahit?

Affectus omnes sequuntur opinionem ejus, quem invadunt. Idem igitur in invidia quoque obtinere debet.

§. 708.

*Defectus
invidia.*

Si quis alterum non odit, is nec eidem invidet, quæ bona existimat. Quodsi enim alterum non odit, nec animus ejus dispositus ad percipiendum tædium, seu tristitiam ex alterius voluptate (§. 667.), adeoque nec tædium seu tristitiam percipit ex alterius felicitate (§. 638.), neque etiam ex iis, quæ bona existimat (§. 612.), consequenter ei non invidet, quæ bona existimat (§. 705.).

Idem confirmatur a posteriori. Quodsi enim invidiam cuidam objicias, se excusat hoc nomine, quod nesciat, ecurr alteri invidere debeat sua bona, cum nullo in ipsum odio laboret. Absentiæ adeo odii tribuit defectum invidiæ, propterea quod unusquisque in se experitur, ubi vacuum ab odio habuerit animum, eundem quoque invidia nulla tangi, quam odii continuo comitem alias esse novit.

§. 709.

*Absentia
invidiæ.*

Si quis alterum amat, is ei non invidet quæ existimat bona. Qui enim alterum amat, is ex ejus voluptate voluptatem percipit, ac ideo gaudet, quod gaudet alter, ubi idem fuerit de objecto gaudii judicium (§. 640.), immo voluptatem ejus appetit (§. 650.), eandemque eidem creare studet (§. 652.). Quamobrem cum impossibile sit, ut ex alterius voluptate eodem respectu simul & tædium, & voluptas percipiatur (§. 511. 518.); qui alterum amat, ex ejus voluptate, consequenter felicitate (§. 638.), tædium percipere nequit, multo minus ob eandem tristitia afficitur (§. 619.). Non igitur invidia laborat (§. 705.), neque adeo invidet alteri, quæ bona existimat.

Differt casus præsens a præcedente. Etenim in præcedente tantummodo deficit invidiæ ratio sufficiens; in præsentem adest impedi-

men-

mentum, quo minus invidia oriatur. Differentia hæc magnum momentum habet in praxi: id quod ex iis intelligitur, quæ paulo superius in casu simili (ad §. 690) annotata sunt.

§. 710.

Si quis alteri non invidet quæ existimat bona, is eum aut amat, aut non odit. Si quis enim alteri non invidet quæ existimat bona, ex ejus felicitate tædium nullum percipit, ac multo minus ob eandem contristatur (§. 705.), consequenter nec tædium percipit ex voluptate alterius (§. 638.), adeoque eum non odit (§. 667.).

Signum amoris ac odii deficientis.

Enimvero fieri potest ut, qui ex alterius felicitate tædium nullum percipit, ex eadem voluptatem percipiat. Quoniam igitur is, cui ira dispositus est animus, alterum amat (§. 633.); si casus iste obtinet, quando quis alteri non invidet, quæ existimat bona, is eum amat.

Patet ex demonstratione propositionis præsentis statum indifferentiæ obtinere respectu invidiæ in eo casu, quo quis alterum non odit, nec tamen amat; in duobus autem subiectis differre statum animæ, si invidiæ absentia vel ex odii absentia, vel amoris præsentia oritur.

§. 711.

Si quis alteri invidet quæ bona existimat, eum odit. Si quis enim alteri invidet quæ bona existimat, is ex infelicitate alterius (§. 705.), consequenter ex voluptate ejusdem (§. 638.), tædium percipit. Eum igitur odit (§. 668.).

Est adeo odii signum invidia (§. 952. *Ontol.*), quam absque odio dari impossibile.

§. 712.

Si quis alteri invidet, quæ bona existimat, is eum bono, quo potitus est, indignum judicat. Qui enim alteri invidet quæ bona existimat, is eum odit (§. 711.), adeoque voluptatem ejus averiatur (§. 670.), ac quo minus ea perfundatur animus ejus impendere studet (§. 671.). Eum igitur bono, quo potitus est, vel quod possidet, indignum judicat (§. 558.).

(*Wolffii Psychologia.*)

Yyy

Idem

Idem confirmatur a posteriori. Nihil enim communius est verbis hominum invidia erga alios laborantium, quibus alios bonum, quo potiti sunt, non promeruisse pronunciant, eos eodem indignos judicantes.

Sane si dignos judicarent bono alios, quod iisdem contigit, minime contristari possent ex eo, quod alteri beneficium.

§. 713.

*Invidia
causa,*

Si quis alterum bono, quo potitus est, vel fruitur, indignum judicat; invidia oritur. Si quis enim alterum bono, quo potitus est, vel fruitur, indignum existimat, is omnino bonum, quatenus alterius est, averfatur, ac si per se staret averteret, consequenter malum alterius appetit, adeoque & tædium (§. 613.) atque tristitiam (§. 619.). Eum igitur odit (§. 669. 672.), adeoque & invidet bona, quibus potitur, vel fruitur (§. 707.).

Experimur idem in nobis, quoties invidia oritur. Haud obscure enim observamus, affectum invidiæ præcedere iudicium de bono, quo potitur, vel fruitur alter, & nos quidem alterum indignum existimare bono isto. Sane non invidemus alteri bonum, quod non cognoscimus, vel non agnoscimus, nec expendimus, utrum eodem dignus sit, necne. Hinc audias verba, quæ invidia extorquet, hominem istum non esse dignum tanto bono. Immo si quis invidiam excusat, non aliam allegat rationem quam quod indignus sit bono, quo potitur, vel fruitur, atque hanc indignitatem probaturus bonum exaggerat, personam vero ejus, ad quam pertinet, extenuat, immo vituperat. Haud obscure vero hinc simul liquet, quod invidiam præcedat odium. Etenim displicet nobis bonum in altero, non uno ex capite: id quod in præsentem non inquirimus. Ergo ex eo, quod displicet, nascitur odium (§. 677.). Hinc vero sequitur tristitia, vel tædium, quod ex alterius bono percipitur, adeoque odium gignit invidiam (§. 705.), mediante quidem iudicio de indignitate personæ. Nimirum
odium

odium nos impellit ad averſandum bonum alterius, quatenus alterius eſt (§. 676.), tanto magis, quanto majori voluptati hoc ipſi eſſe exiſtimamus (§. 612.). Quoniam itaque ita compellimur ad iudicium, quod malum ſit alterum potiri, vel frui hoc bono (§. 582.), conſequenter ad iudicium de indignitate ipſius, neque enim malum exiſtimamus alterum potiri, vel frui bono, niſi quatenus eum indignum iudicamus, qui eodem potiatur, vel fruatur: ea ſingula in ſe experitur, qui in caſu naſcentis invidiæ animum ad ſemetipſum advertit, nec eo deſtituitur acumine, quod ad talia pervidenda requiritur.

Ex propoſitione præſente diſcimus, quandonam in nobis invidia oriatur, & quænam ad eam excitandam prærequirantur. Non perſequimur jam ea, quæ hinc pendent, cum in moralibus uberius de hiſce futuris ſit dicendi locus.

§. 714.

Invidia oritur, ſi alterum indignum iudicamus bono, quo *Invidia deſ-*
potitur, vel fruitur. Patet definitionis veritas per propoſitiones *nitio realis.*
præcedentes (§. 712. 713.).

Quoſi forte deſideres in definitione hac invidiæ reali non exprimi odium, quod tamen veluti parens invidiæ eſt, quemadmodum ex iis clariffime perſpicitur, quæ ad confirmandam propoſitionem præcedentem a poſteriori in medium adduximus, principiis noſtris in anterioribus ſtabilitis prorsus conſentanea; ſcrupulus eodem modo eximitur, quo ſupra (not. §. 695.) ſimilem in caſu ſimili eximimus. Nimirum ex iis ipſis, quæ ad propoſitionem præcedentem dicta ſunt, patet fieri non poſſe ut alterum indignum iudices bono, quo potitur, vel fruitur, niſi quatenus eum odiſti. Quod excipias fieri haud raro ſolere, ut etiam alteri invidiamus bonum, quo potitur, vel fruitur, etſi eundem amemus; difficultas hæc, etſi primo intuitu haud levis videatur, facillime tamen tollitur. Conſtat enim nos eandem perſonam ex diverſa cauſa amare poſſe, ac odiſſe, prouti ea, cum quibus nobis negotii eſt, vel ad cauſam amoris, vel odii referuntur.

§. 715.

Definitio tam nominalis, quam realis invidiæ ſignificatui *Significatus*
Yyy 2 *re-* *vocabuli*

invidia num recepto ac communi usui loquendi conformis. Definitionem usui loquendi conformis. realem deduximus ex nominali, quemadmodum & in theoria ceterorum affectuum factum est, ac in sequentibus a nobis fiet. Quamobrem & hic, & in sequentibus palam est, definitionem nominalem usui loquendi conformem esse debere, si realis eidem convenit & ex adverso realem abhorre ab eadem non posse, si nominalis ipsi responderet. Id hic repetiisse sufficiat, ne præter necessitatem reperendum sit, quod semel dictum vel aliquoties memoria retineri potest, ut ubivis nobis succurrat, quando ejusdem meminisse debemus. *Matthias Martinus* in Lexico philologico ex *Perotto* allegat, quod invidere proprie sit ex alicujus rebus secundis dolore affici. Facile apparet dolorem hic non sumi proprio in significatu, quo corpori tribuitur, nec animæ competit nisi ejus respectu (§. 539.); sed in sensu improprio, quatenus animæ tribuitur independentem a damno quodam corpori illato. Nihil ergo aliud vocabulo isto denotari potest quam voluptatis oppositum, quod nos tædii nomine insignivimus (*not.* §. 518.), & in cujus prædominio insigni tristitia consistit (§. 619.). Perinde igitur est ac si *Perottus* assereret, quod invidiæ proprie sit ex alicujus rebus secundis tædio ac tristitia affici. Atque hoc pacto invidia erit tristitia, vel tædium ex alterius rebus secundis perceptum. Enimvero quis est qui nesciat res secundas referri ad felicitatem hominis, cum ea dicantur, quæ voluptatem homini creant & ex quibus gaudio afficitur, consequenter quæ hominem vel felicem reddunt, vel saltem felicem reddere existimantur (§. 6, 6.)? Juxta *Perottum* itaque invidere proprie idem est ac ex alterius felicitate tristitia, vel tædio affici: id quod cum definitione nostra nominali prorsus consentit. Nec ab ea alienus est *Priscianus*, qui invidere idem esse affirmat ac non ferre alterum bene agentem videre. Bene agere nimirum, rebus secundis uti & felicem esse eundem hominis statum denotant. Qui vero ferre nequit, quod alterum rebus

secun-

secundis uti, vel felicem esse videat, ita ut quasi ægre fiat oculis, si in felicitatem alterius convertantur; is utique ex eadem tædio, vel tristitia afficitur. *Cicero*, observante *Manutio* invidentiam appellat, quod nobis invidia est, eaque dolorem ex alienis bonis denotari idem *Manutius* monet: id quod cum nostra definitione nominali prorsus convenire per antecedentia manifestum. Auctores isti, qui literas humaniores excoluere ac in eo studiorum genere celebritatem nominis sunt consecuti non alias habuere notiones, quam quæ communi usui loquendi respondent, & vi rationum etymologicarum significatum vocabulorum ad communem usum loquendi aptare solent. Quamobrem ex dictis abunde patet, definitionem nostram invidiæ nominalem communi usui loquendi apprimè convenire. *Cartesius* in Tractatu de Passionibus animæ part. 2. art. 62. definitionem realem invidiæ condit, quod scilicet oriatur ex eo, quod alterum indignum judicemus bono, quod ipsi præsens est, vel quod certo exiturum existimamus, ut veluti jam præsens nobis idem repræsentemus. Definitio igitur *Cartesii* realis eadem est cum ea, quam nos ex nominali nostra deduximus (§. 714.). Quamobrem cum usu loquendi communi non minus, quam cum nobis consentit *Cartesius*.

Diximus *Ciceronem* affectum, de quo nobis sermo est, invidentiam appellare. Rationem reddit *Manutius*, quod in definiendis animi morbis (per quos affectus intelligit) anceps invidiæ vocabulum vitare voluerit, quippe quod designet non modo dolorem ex alienis bonis, verum etiam infamiam ex adversa fama & publicam pravitatis alicujus opinionem, ut adeo nonnulli invidiam quoque pro odio sumi existimaverint. Enimvero cum nos vocabulum invidiæ nunquam usuri simus nisi in eo significato, quem ipsi vi definitionis vindicavimus, nobis ambiguitas vocabuli parum obstat. Quænam vero inter odium ac invidiam agnatio intercedat, ex antea demonstratis abunde patet.

§. 76.

Qui alteri bonum, quo fruitur, aut quod est conferen- Effectus in-
Yyy 3 dum, videt.

dum, invidet, is pronus est ad eum bono illo privandum, aut quo minus hoc obtineat impediendum. Si quis enim alteri invidet bonum, quo fruitur; is eum eodem indignum judicat (§. 712.), consequenter mallet eundem bono isto destitui. Quamobrem si potest lubens conferet, quod ad eum bono isto privandum facere potest, adeoque ad id pronus est.

Similiter si quis alteri invidet bonum, quod eidem conferendum; eum indignum judicat, cui id conferatur (§. 712.), consequenter mavult, ut idem non obtineat. Quamobrem pronus est ad impediendum, si potest, quo minus id obtineat alter.

Confirmatur idem a posteriori. Ponamus Mevium invidere Titio sponsam divitem: ecquis nescit, eum convitia congerere in Titium ac propalare famæ ipsius adversa, quæcunque noverit, immo quæ de ipso novit in malam partem vertere, ne quicquam eorum prætermittat, quæ ad sponsalia dissolvenda facere posse videntur? Quicquid sit, si vel maxime inanis sit omnis ejus conatus, ab eo tamen non abstinere, ne desit voluntas, etsi desint vires. Atque hoc ipso omnium clarissime perspicitur, quomodo invidia nos efficiat pronos ad privandum alios bono, quo fruuntur, vel quo potiti sunt. Ponamus Titium sponsalia nondum celebrasse, sed demum ambire. Quod si Mevius invideat eidem sponsam, quam ambit, perinde ac in casu anteriori sparget rumores Titio adversos, ut sæpissime nec a calumniis sibi temperet, præsertim ubi difficulter impediri posse existimat, ne sponsa petita Titio maneat. Exempla, quibus propositionis præsentis veritas confirmatur, notiora sunt, quam ut plura coacervari opus sit. Id tantummodo notandum venit, variari nocendi studium pro diversitate hominum, ita ut nunc majus, nunc minus ex invidia procedat: cuius quidem differentiarum ratio in casu singulari haud difficulter datur, modo præter affectuum theoriam habitus quoque morales fuerint perspecti.

Habitus istos morales explicabimus suo tempore in Ethica. Et theoria verioris Ethicæ cum Psychologia empirica conjungenda, ubi rationem reddere volueris diversitatis, quæ in hominum opinionibus & appetitibus circa idem objectum obtinet.

§. 717.

Qui alterum bono, quo fruitur, privare studet, vel impedire conatur, quo minus bono quodam fruatur, ipsius quidem, odii ac in- Signum
non sui, aut tertii cujusdam gratia; is alterum aut odit, aut ei
bona quæ existimat invidet. Qui enim alterum privare studet bono, quo fruitur, ipsius quidem, non sui, aut tertii cujusdam gratia, is id vel ideo facit, quod ferre nequeat voluptatem, quam inde percipit qui eodem fruitur, vel quod novit, eum ex jactura boni tædium, immo tristitiam percepturum, utque hoc fiat, maxime velit. Quodsi voluptatem ferre nequit, quam ex bono, quo fruitur, percipit alter; is sibi repræsentare debet tanquam malum, quod alter voluptate fruatur, vel prorsus gaudeat (§. 582.), consequenter ex voluptate ejusdem tædium tanto majus percipere debet, quanto magis sibi videtur malum, quod alter voluptate fruatur, vel gaudeat. Quoniam igitur ex alterius felicitate tædium, vel tristitiam percipit (§. 638.); quæ bona existimat ei invidet (§. 705.). Quodsi quis maxime velit, ut alter ex jactura boni, quo fruitur, tædium, vel tristitiam percipiat, is sibi repræsentare debet tanquam bonum, quod alter tædio, vel tristitia affligatur (§. 579.), consequenter ex tædio ac tristitia alterius tanto majorem percipere debet voluptatem, quanto magis sibi videtur bonum, ut alter tædio ac tristitia afficiatur (§. 612.). Quoniam igitur ex alterius infelicitate voluptatem percipit (§. 639.); eum odit (§. 661.). Patet igitur, qui alterum bono, quo fruitur, privare studet, eum vel odisse alterum, vel eidem invidere quæ existimat bona.

Quodsi quis impedire conetur, quo minus alter potiatur bono, quod consequi studet, vel quo lætandus videtur; eodem prorsus, quo ante, modo ostenditur, quod alterum vel oderit, vel ei quæ bona existimat invidet.

Hos duos casus cum non satis vulgo distinguant ex notionibus confusis de rebus judicantes, invidiæ tribuere solent, quod odio erattribuendum, immo ex adverso subinde odio tribuunt, quod invidiæ tribui debebat. Non igitur inconsultum est, ut eandem accuratius distinguamus.

§. 718.

*Invidie
signum.*

Qui alterum bono, quo fruitur, privare studet, vel impedire conatur, quo minus bono quodam potiatur, quod ferre non possit voluptatem, quam alter inde percipit, is alteri invidet quæ bona existimat. Demonstratio jam actu continetur in ea præcedentis.

Confirmatur idem a posteriori. Ponamus enim Mevium sponsalia celebrare cum virgine divite ac Titium omnem movere lapidem, ut ea impediat, hanc reddens rationem, quod Mevius indignus sit tantis divitiis, & exaggerans vitæ futuræ rationem, tanquam inconvenientem istiusmodi personæ, qualis sit Mevius. Nemo non inde colligit invidiam Titii adversus Mevium, citra omnem hæsitacionem affirmans, insidias a Titio strui Mevio ex mera invidia.

Probe notandum, dum propositiones a posteriori confirmamus, nos sæpius non aliud intendere quam ut ostendamus, eas esse notionibus communibus consentientes, adeoque in iisdem distincte explicari, quæ vulgo confuse percipiuntur, ut amplior ac certior notionum communium evadat usus.

§. 719.

*Odiif.
ignum.*

Si quis alterum bono, quo fruitur, privare, vel quo minus eodem potiatur, impedire studet, ut ipsi ægre fiat; is eum odit. Demonstratio propositionis præsentis jam actu continetur in demonstratione anterioris (§. 717.).

Confirmatur eadem a posteriori. Ponamus eundem casum, quo ad propositionem præcedentem illustrandum ac confirmandum usi sumus, scilicet quod Mevius cum virgine divite sponsalia contrahere intendat. Ponamus porro Titium id quovis modo impedire conari ac hunc exultantem prædicere

cere tædia in Mevium ex eo redundatura, quod consilia sua irrita experiatur. Evidens omnino est, eum satis palam prodere animum ad voluptatem ex alterius tædio ac tristitia percipiendam dispositum, consequenter odium, quo adversus Mevium flagrat (§. 672.). Nemo non exinde odium Tirii adversus Mevium colligit, hanc urgens rationem, quod non alia intentione felicitati alterius obicem ponat, quam ut eidem ægre fiat. Ideo sane affirmant unanimiter omnes, Titium ex inero odio fortunas Mevii evertere studere.

Eadem actiones hominum ex diversis fontibus profluere possunt: Ex motivis autem agnoscitur, ex quonam fonte propullulent: id quod in moralibus inprimis attendendum venit.

§. 720.

Si quis alterum dignum judicat bono, quo fruitur, aut quo potiri debet; is de eo gaudet. Quod si enim quis alterum dignum judicat bono, quo fruitur, aut quo potiri debet; is bonum judicare debet, quod alter bono isto fruatur, vel eodem potiri debeat (§. 579.). Ex hoc igitur bono tanto majorem percipere debet voluptatem, quanto magis ipsi videtur bonum, ut alter illo fruatur, vel potiatur (§. 612.). Quamobrem cum prædominium insigne voluptatum gaudium sit (§. 614.); ubi plurimum voluptatis percipit (qui casus in doctrina affectuum supponitur), prorsus gaudet. Qui igitur alterum dignum judicat bono, quo fruitur, aut quo potiri debet; ex eodem gaudio afficitur.

Idem confirmatur a posteriori. Ponamus Mevio collatum esse munus, quod ornare potest. Si eum dignum judicamus, quod ad hoc munus fuerit evectus; non alium affectum, si quis oritur, oriri experimur, quam gaudium: id quod his verbis exprimere solemus, quod nobis tanto gaudio id sit, ac si ipsimet ad dignitatem aliquam evecti fuisset, vel ipsimet ad munus istud promoti essemus.

Nullus igitur peculiaris affectus gignitur ex eo, quod alterum dignum judicamus bono, quod ipsi est; quemadmodum peculiaris

quidam affectus oritur ex eo, quod alterum indignum judicamus bono, quo gaudet, scilicet invidia (§. 713).

§. 721.

*Signum
amoris,*

Si quis alterum dignum judicat bono, quo fruitur, vel quo potiri debet, is eum amat. Quodsi enim quis alterum dignum judicat bono, quo fruitur, aut quo potiri debet, is ideo gaudet (§. 720.), consequenter gaudet, quod alteri sit materia gaudendi (§. 624.). Eum igitur amat (§. 641.).

Liquet idem a posteriori. Ponamus enim Mevium sponsalia celebrare cum virgine divite & Titium eum impense amare. Gaudebit Titius insigniter, non secus ac si sibi ingens quoddam bonum oblatum fuisset. Quodsi quasiveris, cur tantopere gaudeat, hanc inprimis reddet rationem, quod dignum judicet Mevium, cui tanta obtingat felicitas, nimius in recensendis argumentis, quibus id adstruat. Constat vero quod eundem amet ex ipsa amoris definitione (§. 633.). Ergo a posteriori quoque colligitur, quod is alterum amet, qui eum dignum judicat bono, quo fruitur, aut quo potiri debet.

Probe notandum est, quando alterum dignum judicamus bono, quo fruitur, vel quo potitur, non ex rei veritate procedere judicia; sed ea magis consistere in approbatione ejus, quod fit. Probamus in casu dato, quod fortuna faveat Mevio in sponsalibus celebrandis ac Mevium eum esse judicamus, cui favere debeat. Rationes, quæ nobis idem persuadent, eadem sunt, ob quas amorem oriri supra ostendimus (§. 645. & seqq.).

§. 722.

Causa gaudii.

Si quis alterum dignum judicat malo, quo affligitur, vel quod ipsi imminet; is ideo gaudet, in eo scilicet casu, quo affectus quidam oritur. Si quis enim alterum dignum judicat malo, quo affligitur, vel quod ipsi imminet, is bonum judicat, quod alter malo affligatur (§. 579.), consequenter ex eo, quod alter malo affligitur, vel quod ipsi malum quoddam imminet, tanto majorem voluptatem capit, quo magis bonum judi-

judicat, ut alter eodem affligatur (§. 612.), consequenter in eo casu, quo affectus oritur, gaudet (§. 614.).

A posteriori idem confirmatur inde quod, quando quis gaudio afficitur ex eo, quod alteri adversi quid accadat, quaeritur cur gaudeat respondere soleat, mereri alterum, qui magis adhuc affligatur, recensens rationes quibus sibi persuadet ac alteri se persuadere posse existimat, quod idem mereatur. Exempla quotidie obvia sunt, ut ad eadem attentionem excitasse sufficiat. Haud difficulter quod ad praecedentem propositionem attulimus ita immutatur, ut ad praesentem quadret.

Non igitur peculiaris quidam affectus oritur ex eo, quod alterum dignum judicemus malo, quo affligitur, cum gaudium istud ad odium pertineat (§. 663.): id quod ex propositione sequente luculentius constat.

§. 723.

Si quis alterum dignum judicat malo, quo affligitur, vel Signum quod ipsi imminet, is eum odit. Quodsi enim alterum dignum odii judicat malo, quo affligitur, vel quod ipsi imminet; ideo gaudet (§. 722.), consequenter gaudet, quod alter habeat, cur tristitia afficiatur (§. 623.). Eum igitur odit (§. 665.).

Si quis alterum indignum judicat bono, quo fruitur, vel quo potitur, is eum aut amat, aut odit, aut nec amat, nec odit. Ponamus, quod eum amet. Eidem igitur voluptatem creare ac tedium ab eo avertere studebit (§. 652.), consequenter ei opem feret, ut bono, quod gaudendi materiam praebet (§. 624.), potiatur, nec praesente priveretur (§. 612.). Impossibile igitur est, ut maxime velit eum bono, quo fruitur, privari nec eundem bono, quod consequi studet, potiri, consequenter ut eum indignum judicet bono, quo fruitur, vel quo potiri conatur (§. 28. Ontol.). Patet igitur, quod alterum amare nequeat, qui eum indignum judicat bono, quo fruitur, vel quo potitur.

Ponamus jam porro, eum, qui alterum indignum judicat bono, quo fruitur, vel potitur, ipsum nec amare, nec odisse. Quoniam alterum nec amat, nec odit, nec ex alterius felicitate, consequenter voluptate (§. 638.), adeoque eo, quod bonum alteri existimat (§. 612.), voluptatem capit (§. 633.), nec ex infelicitate, consequenter tædio (§. 639.), adeoque eo, quod malum alteri existimat (§. 613.), voluptate afficitur (§. 661.). Animo igitur indifferente est erga alterum, nec bonum judicans, ut ipsi bene sit, nec bonum existimans, ut eidem ægre sit (§. 612.). Eum adeo indignum judicare nequit bono, quo fruitur, vel quo potitur. Atque ita patet, qui alterum nec odit, nec amat, eum indignum bono, quo fruitur, vel quo potitur, judicare non posse.

Quoniam iraque fieri nequit, ut, qui alterum indignum judicat bono, quo fruitur, vel quo potitur, eum amet, aut nec amet, nec oderit; necesse est ut eundem oderit.

Demonstrationem posteriorem prolixiorē priori evidentix gratia addidimus, cujus in rebus psychologicis & moralibus maxime habenda ratio est, ut hoc nomine prolixiores sæpius præferendæ sint brevioribus.

§. 724.

Invidia ac odium cur se mutuo comitentur.

Quoniam invidia oritur, si quis alterum bono, quo fruitur, vel quo potitur, indignum judicat (§. 713.); alterum vero is quoque odit (§. 723.); *invidia ac odium individui comites sunt.*

Patet idem jam ex superioribus (§. 711.), quod alterum oderit, qui ipsi invidet quæ bona existimat.

§. 725.

Invidia adversus animalia bruta.

Si quis animalis cujusdam bruti statum meliorem suo existimat; is ei eundem invidet. Etenim qui statum bruti comparat cum statu suo, ac illum bonum, hunc malum existimat, adeoque illum appetit, hunc averfatur (§. 579. 581.), ut adeo sibi potius convenire istiusmodi statum judicet, qui est animalis bruti; is utique tædium percipiet ex statu animalis tanto majus,

jus, quanto magis malum judicat, quod bruto conveniat iste status, ipse vero eodem privetur (§. 613.). Tadium adeo percipit ex voluptate, quam bruto tribuit, consequenter ex ejus felicitate (§. 638.), adeoque eandem ipsi invidet (§. 705.).

Probatur idem a posteriori. Ponamus enim homini inopi denegari eleemosynam ab eo, qui canibus cibos devorandos objicit, quos ille cupediarum loco haberet. Nemo non novit, illum invidere canibus sortem suam, ac invidiam iisdem verbis testari, quibus eam erga homines prodere solemus.

Nemo statum bruti suo meliorem judicat, nisi qui suo minime contentus est. Unde exempla, quibus præsens illustratur propositio, ab iis præsertim personis petantur, quæ se miseros existimant. Per se autem patet, statum bruti eum esse debere, ut non impossibile quis judicet se in eodem collocari, vel idem saltem tacite supponat. Et hic non semper respicimus ad statum istum in singulari, sed sapissime tantummodo in universali, ita ut similem statum, mutatis mutandis suum esse vellet, qualem alicui bruto convenire existimat.

§. 726.

Si quis brutum aliquod indignum judicat bono, quo opinio- Invidia ad-
ne sua fruitur; invidia adversus ipsum oritur. Si quis enim *versus bru-*
 brutum indignum judicat bono, quo opinione sua fruitur; is *ta causa.*
 maxime vult, ut eodem, si fieri potest, privaretur, saltem mal-
 let idem eodem carere. Malum igitur judicat, quod brutum
 eodem gaudeat (§. 586.), consequenter ex eo tanto majore tæ-
 dio afficitur, quanto magis malum judicat, quod brutum eo-
 dem gaudeat (§. 613.). Tadium adeo percipit ex felicitate, quam
 bruto tribuit (§. 638.), consequenter invidia adversus ipsum
 corripitur (§. 705.).

Idem ostenditur hoc modo. Si hominem indignum ju-
 dicamus bono, quo fruitur, vel potitur, invidia adversus ipsum
 oritur (§. 713.). Enimvero tum hominem non consideramus
 tanquam hominem, hoc est, eum nobis non repræsentamus tan-
 quam ens ratione præditum, qua maxime differt a bruto; sed
 tanquam ens, quod fruitur, vel potitur eo, quod nostra opi-

nione ipsi bonum est, sed quo tamen idem indignum existimamus. Quamobrem cum id, quod bruto est, bonum existimamus ac idem eodem indignum judicamus; brutum eodem modo nobis repræsentamus, quo in casu nascentis invidiæ hominem nobis repræsentare solemus. Invidia igitur adversus brutum nasci debet (§. 118. *Ontol.*).

Confirmatur etiam a posteriori. Obvia inprimis sunt exempla in canibus, qui si lautis cibis pascantur, iisdem indigni judicantur a nonnullis. Qui vero ita sentiunt, invidiam adversus ipsos flagrantem in se experiuntur. Exempla alia in medium non adducimus, cum satis obvia sint.

§. 727.

Quasi invidia in res inanimatas.

Si quis in re inanimata quid deprehendit, quo eandem indignum existimat, id eidem quasi invidet. Quodsi enim quid in re inanimata deprehendimus, quo eandem indignam existimamus; nostra quidem opinione malum est, quod id eidem conveniat, consequenter exinde tædium tanto majus percipimus, quo magis malum existimatur, quod eidem ipsi inest (§. 613.). Quoniam igitur ex eo, quod bonum existimat, idem tædium percipit, quia alteri inest; idem ei quasi invidet (§. 705.).

Hanc quasi invidiam cadere in homines experientia loquitur. Fluit ex eodem studium privandi eo rem inanimatam, quo eam indignam judicamus, vel ubi id fieri non potest, saltem privandi voluntas: in quo quasi invidia convenit cum vera invidia (§. 716.).

§. 728.

Invidia erga res inanimatas.

Ex dictis apparet, quomodo invidia erga res inanimatas oriatur, & quo sensu homini ea tribuatur. Est nempe *Invidia* quæ homini tribuitur, erga res inanimatas tristitia, vel saltem tædium ex eo, quod ipsius opinione iis bonum inexistit, perceptum. Oritur autem *Invidia in res inanimatas*, si eas indignas judicamus bono, quod nostra opinione iisdem inexistit.

Defi-

Definitio realis invidiæ erga res inanimatas coincidit cum definitione reali erga homines (§. 714), atque hinc intelligitur, non absolum esse tribuere homini invidiam in res inanimatas, etsi facile ostendi possit eam esse a ratione alienam: id quod vero in omni affectuum genere multis modis obtinet. Nascuntur affectus ex confusis perceptionibus (§. 605.). Ecquis vero requisiverit opiniones hominum ex confusis perceptionibus ortas rationi semper consentaneas esse? Definitio nominalis invidiæ in res inanimatas transfert ad eas ex definitione nominali invidiæ erga personas, quæ salva earum natura in iisdem locum habere possunt (§. 705.). Quoniam enim res inanimatæ voluptatis capaces non sunt, utpote quas sui conscias esse repugnat (§. 511.); nec felicitas in eas cadit (§. 636.). Quoniam tamen bona ea sunt, quæ hominem felicem reddunt, quemadmodum ex notionibus boni, voluptatis ac felicitatis facile ostendi poterat & suo loco in philosophia practica universali a nobis ostendetur; igitur in re inanimata non datur, quod invidiam excitare posset, nisi bonum eidem opinione invidentis inexistens. Et quoniam confusis perceptionibus toti immergimur, dum invidia nos tangit; bonum in rebus inanimatis obvium utrum eas felices reddat, nec ne, non distinguimus, ut adeo facile idæ boni accedant, quæ alias, quando cum hominibus nobis est negotium, eidem conjuncta esse solent: Si quis quæ confusa sunt in perceptionibus nostris, acute a se invicem separare noverit; ei palam erit, quam sint perceptiones nostræ fallaces, ubi affectus gignunt.

§. 729.

Quod si quis animalia bruta rebus inanimatis equiparet, Invidia er-
quatenus scilicet tantummodo considerantur tanquam subje-
ctum boni cujusdam seposita attentione ad voluptatem, quæ
inde a nobis percipitur, ubi ejusdem compotes sumus; in-
vidia erga ea eadem est, quæ erga res inanimatas sese exerit:
id quod inde patet quod tunc bruta nobis eodem modo, quo
res inanimatas in casu nascentis invidiæ repræsentamus. Quod-
si vero animantia bruta hominibus equiparantur, quatenus
nempe felicitatem in ea cadere posse opinamur; invidia erga
ea eadem est, qua erga homines flagramus: id quod denuo
hinc elucet, quod bruta nobis tunc repræsentemus eodem
modo,

modo, quo nobis homines in casu nascentis invidiæ repræsentamus.

Qui ad ea attendere voluerit, quæ inter homines quotidie accidunt, notiones invidiæ adversus res inanimatas atque bruta lucidas consequetur: id quod in aliis quoque casibus similibus notandum.

§. 730.

*Irrisionis
definitio.*

Gaudium ex eo perceptum, quod opinione nostra alteri vitio verti potest, vel famam ejus quomodocunque lædit, dicitur *Irrisio*.

Ponamus e. gr. Titium spe sua excidisse, quam munus quoddam ambiens conceperat. Quodsi quis ideo gaudet, quod existimet repulsam fore ipsi ignominiosam; affectus irrisionis nomine venit.

§. 731.

*Irrisio ob
corporis defectus.*

Quodsi ergo quis existimet, corporis defectus naturales, vel etiam casu sinistro contractos esse alteri ignominie; ob eosdem eum irridet (§. 730.). Nihil fere frequentius in humano genere observare licet exemplis, quibus corollarii præsentis veritas confirmatur. Ponamus Titium claudicare. Quodsi id vitio eidem vertit Mevius atque idem animum dispositum habet ad voluptatem ex iis percipiendam, quæ alteri vitio verti posse existimat; eum utique claudicantem irridebit.

§. 732.

*Irrisio ob
damnum
vel fortunam
adversam.*

Similiter si quis existimat damnum, quod alter incurrit, vel fortunam, qua utitur, adversam eidem ignominie esse; ob damnum, quod incurrit, vel fortunam adversam eum irridet (§. 730.).

Confirmatur hujus quoque corollarii veritas a posteriori. Ponamus Titium jacturam facere mille thalerorum, propterea quod debitor non est solvendo. Quodsi Mevius hinc Titium imprudentiæ argui posse existimat, & animum dispositum habet ad voluptatem ex iis percipiendam, quæ alteri vitio verti possunt, ipsum utique irridebit. Ponamus porro Sempronium in dignitate constitutum non habere, unde vitam dignitati suæ convenienter toleret. Quodsi Mevii animus fuerit dispositus

ad

ad voluptatem percipiendam ex iis, quæ Sempronio ignominiosa existimat; eum utique irridebit.

Nimirum & in præsentē, & in præcedente corollario supponimus, quod quis ad alterum irridendum sit dispositus, neque aliud intendimus quam recensere irrisionis causas, quæ eam determinant in subiecto habili. Absit enim ut quis sibi persuadeat, omnem omnino hominem alterum ob defectus corporis naturales, damnum quod incurrit atque fortunam adversam, qua utitur, irridere debere. Possent aliæ irrisionis causæ speciales adhuc complures recenseri; sed supervacaneum existimamus ea coacervare, quæ unusquisque per se levi attentione assequi potest, ubi sibi in memoriam revocat, quæ ex communi experientia hausit.

§. 733.

Si quis alteri quid invidet, id ei bonum esse existimat. Ponamus Mevium invidere divitias Titio, dico eum divitias in numerum bonorum referre & tanquam bonum Titio præsens considerare. Quod si enim Titio invidet divitias, seu ex iisdem tedium capit, vel prorsus tristitia afficitur (§. 705.); eas ad felicitatem ipsius refert (§. 705.), adeoque in eorum numerum, quæ eidem voluptatem creant (§. 638.), consequenter bonum Titio præsens existimat (§. 612.).

Qualia sint ea, quæ aliis invidemus.

Nemo invidet alteri, quod ipsemet habere nolit; sed ea invidet, quæ ipse habere mallet, aut ex quibus, si ipsemet ea possidet, voluptatem percipit, vel gaudio afficitur. Sed nemo appetit, nisi quæ bona existimat (§. 579.), & ea, ex quibus voluptatem capit, in bonorum numerum refert (§. 612.), adeoque multo magis ea, ex quibus prorsus gaudio afficitur (§. 614.).

§. 734.

Si quis alteri invidet famam; ad eum irridendum pro- Undenam
nus est. Si quis enim alteri invidet famam, eam in numerum ad irrisionem
bonorum refert (§. 733.), consequenter ad status humani perfectionem eandem pertinere iudicat (§. 554.). Infamiam ita
que, aut quicquid famæ adversatur ad status imperfectionem, nemproni
consequenter in numerum malorum refert (§. 555.). Quoniam
itaque ex fama alterius, adeoque ex eo, quod opinione sua
famam.

(Wolffii Psychologia.)

Aaaa

alteri

alteri bonum est *per demonstrata*, consequenter quod ei voluptatem creat (§. 612.), tædium percipit ac tristitia afficitur (§. 705.); ex tædio, consequenter malo ejusdem (§. 613.), voluptatem percipere debet (§. 666.). Voluptatem adeo percipit, qui alteri famam invidet, ex infamia ejusdem, atque iis, quæ famæ ejusdem adversa sunt *per demonstrata*. Enimvero qui gaudio afficitur, adeoque & qui voluptatem percipit (§. 614.), ex infamia alterius atque iis, quæ famæ ejus adversa sunt; is eum irridet (§. 730.). Patet itaque eum, qui alteri famam invidet, habere animum ad irridendum eundem dispositum, seu, quod perinde est, ad eum irridendum pronum esse.

Confirmatur idem a posteriori. Luculenta admodum exempla inter eruditos occurrunt, qui invidia in alios ducti sæpissime alios se longe meliores aliis deridendos propinant, eosque irrident, quoties quid famæ ipsorum adversum sibi observasse videntur. Evolvenda hic sunt scripta illorum, qui alios impugnando famam consequi student. Horum in numero sunt pietatis pomposæ doctores, qui ambitionem cum ignorantia conjungentes magni videri volunt, inimici doctrinæ solidæ, quæ fucum non fert.

Equidem non ignoro fore aliquos, qui exempla doctorum pietatis pomposæ perperam hic allegari existimaturi sunt, quod humilitatis studiosi a fama acquirenda procul remoti sunt. Enimvero hi erunt, qui prætextu sibi imponi patiuntur. Nostri principis philosophicis, præsertim psychologicis & moralibus, tinctus fucum sibi facere non sinit: quæ ratio est cur hominibus, qui toti in eo sunt, ut fucum faciant aliis, Psychologia cum philosophia morali sudes in oculo sit.

§. 735.

Si quis alteri famam invidet ac in eo quid sibi observare videtur sua opinione famæ ipsius adversum; eum actu irridet. Etenim si alteri famam invidet, ad eum irridendum pronus est (§. 734.). Quare si quid in altero observat famæ ipsius adversum, saltem opinione sua, ratio adest sufficiens, cur al-

*Quando
quis alteri
rum actu
irrideat.*

terum

terum actu irrideat (§. 730. *Psychol.* & §. 56. *Ontol.*), consequenter eum actu irridere solet (§. 118. *Ontol.*).

Quæ ad confirmandum propositionem præcedentem allegata sunt, ea ad præsentem quoque corroborandam spectant, cum ex actuali irrisione, de qua præsens loquitur propositio, pronitatem ad irridendum alios, de qua in præcedente sermo est, colligamus.

§. 736.

Si quis alterum irridet, is ei famam invidet. Si quis enim *Irrisionis effectus.* alterum irridet, ex iis, quæ famæ ejus adversa sunt, gaudio (§. 730.), consequenter voluptate afficitur (§. 614.). Quoniam vero ea, quæ famæ adversantur, mala sunt (§. 565.) ac omnium opinione pro malis habentur; animus ejus dispositus est ad voluptatem percipiendam ex eo, quod alteri malum est, consequenter ex quo is tædio ac tristitia afficitur (§. 613.). Quare cum & dispositus esse debeat animus ad tristitiam ex ejus voluptate (§. 666.), consequenter felicitate percipiendam (§. 638.); invidia adversus ipsum laborat (§. 705.). Patet autem ex demonstratis, quod tædio, immo tristitia affici debeat ex aliorum fama. Famam igitur alteri invidere debet.

Apparet idem a posteriori ex eo, quod, si quis alterum irridens narrari audit, quæ eidem laudi sunt ac famæ ejus loquuntur, ea quovis modo extenuare, vel prorsus negare, aut, si in dubium vocare non possit, in malam partem interpretari conetur. Quoniam enim sic satis prodit, se ferre non posse laudes ac famam alterius; haud obscure significat, se alterum laude ac fama indignum judicare, consequenter ei laudes ac famam invidet (§. 714.).

Hinc videas potissimum eos irridere alios, qui soli laudari malent, nec quenquam laudari ferre possunt. Et quibus istiusmodi est animus, illi de nemine bene, de omnibus male loquuntur, omniaque in malam, nihil in bonam partem vertunt. Sed de his uberior dicendi locus erit in moralibus, ubi diversi hominum characteres ex

suis fontibus derivabuntur: id quod vi principiorum psychologicorum præstare licet.

*Effectus ir-
risionis.*

§. 737.

Si quis alterum irridet, is eum fama indignum judicat. Qui enim alterum irridet, is ei famam invidet (§. 336.). Enimvero si quis alteri, quæ bona existimat, invidet, is eum bono, quo potitus est, indignum judicat (§. 712.). Ergo qui alterum irridet, is eum fama indignum judicare debet.

Quæ ad præcedentem propositionem confirmandam in medium adduximus, ea ad præsentem quoque trahi possunt. Etenim ex iis, quæ de irridente alios observantur, deduximus, quod fama ac iis, quæ ad eundem spectant, alterum indignum judicare debeat.

§. 738.

*Irrisionis
signum.*

Si quis alterum fama indignum existimat, is ad eum irridendum pronus est ac si famæ adversi quid observat, actu irridet. Qui enim alterum fama indignum existimat, is eandem ipsi invidet (§. 713.). Enimvero si quis alteri invidet famam, is ad eum irridendum pronus est (§. 734.). Ergo qui alterum fama indignum judicat, ad eum irridendum pronus est, adeoque si in eo observare sibi quid videtur opinione sua famæ ejus adversum, eum actu irridet (§. 735.).

Elucet hoc a posteriori inprimis exinde, quod alterum irridentes hac ratione irrisionem tueantur, quod eadem dignus sit. Qui vero dignus irrisione judicatur, is dignus fama judicari nequit, adeoque ea potius indignus existimatur. Paret igitur, quod eum ideo irrideat, quia eundem fama indignum judicat.

Cavendum est, ne pro synonymis habeamus alterum indignum fama existimare & judicare quod famam non mereatur. Fieri enim potest, ut quis agnoscat alterum mereri famam, quam habet, & hoc tamen non obstante eadem alia de causa indignum pronunciet, quatenus opinione sua malum est, quod alteri sit istiusmodi fama. Non hic nobis res est cum veritate, sed cum opinionibus hominum, quæ

a veri-

a veritate sapissime dissident & absurda continent. Judicia hominum, a quibus affectus pendent, haud raro ex aliis affectibus pullulant: id quod evidenter perspicitur, ubi nexum affectuum inter se cognoverimus, qui partim ex Psychologia innotescit, partim ex philosophia morali agnoscitur.

§. 739.

Si quis alterum irridet, is eum iis dignum judicat, quæ famæ ^{*Irriſionis*} *ejus adverſa ſunt.* Si quis enim alterum irridet, is ex iis, quæ ^{*ratio.*} famæ ejus adverſa ſunt, voluptatem percipit, vel proſus gaudio afficitur (§. 730.), adeoque tanto magis bonum judicat, quod alterius famæ macula inuſta ſit, quanto major eſt voluptas, quam inde percipit (§. 612.). Quoniam itaque quam maxime probat, quod famæ alterius lædatur; eum utique dignum iis exiſtimare debet, quæ famæ ejus adverſa ſunt.

A poſteriori patet veritas propoſitionis, ubi attendimus ad verba alios irridendum, quibus approbant ea, quæ famæ aliorum adverſa ſunt, quatenus eidem adverſa ſunt. Ingeminare enim ſolent: bene, bene ſe res habet, quod iſtiusmodi quid paraverit alter, vel tale quid eidem acciderit. Immo ipſa verba, quibus irriſionem teſtatur, aut, ſi mavis, quæ affectus irriſionis protrudit, aperte loquuntur, quod alterum iis dignum exiſtimamus, ob quæ ipſum irridemus.

Sane ideo gaudemus, quod famæ alterius macula adſpergatur, quod ex voto id eveniat noſtro, conſequenter quod alterum dignum exiſtimemus hoc malo.

§. 740.

Si quis alterum dignum iis exiſtimat, quæ opinione ſua famæ ^{*Ortus irriſionis.*} *ipſius adverſantur; irriſio oritur.* Etenim ſi alterum dignum iis exiſtimat, quæ opinione ſua famæ ipſius adverſantur, cum ea in malorum numero ſint (§. 565.), ideo gaudet (§. 722.), conſequenter irriſio oritur (§. 730.).

A poſteriori confirmatur propoſitio præſens ex eo, quod irriſionem conjunctam experiamur cum approbatione, quod talia eveniant, quæ famam alterius lædunt. Omnium autem

optime id unusquisque experiri potest in seipso, si sibi met ipsi attendit, quando irridet alterum. Clarissime enim perspicitur, quod probet, hoc est, quod bonum judicet alterum fecisse, quæ famæ ipsius adversa sunt, quatenus volupe ipsi est videre, quod alter famæ suæ noceat, vel ea ab aliis lædatur.

Eo ipso nimirum, dum nobis conscii sumus, volupe nobis esse quod fama alterius laceffatur, intelligimus nos approbare quod tale quid eveniat, adeoque dignum judicare alterum, cujus fama laceffatur.

*Definitio
irrisionis
realis.*

§. 741.

Fluit ex hæcenus dictis definitio irrisionis realis. Est nimirum *Irrisio* affectus, qui oritur ex eo, quod alterum iis dignum existimamus, quæ opinione nostra famam ejus lædunt, aut ei quomodocunque adversantur.

Definitionis hujus realitas a posteriori quoque agnoscitur, quatenus eandem attentione in nos conversa in nobis ipsis observamus: id quod de omni omnino affectuum genere notandum. Facilius autem geneses affectuum in nobis observamus, quam in aliis, quod in aliis ex actionibus & mutationibus corporis externis aliisque, quæ contingunt, demum colligi debeat, cum in nobis intuitiva propemodum ratione agnoscamus eandem, modo in distinguendis iis, quæ ideis confusis insunt, satis fuerimus acuti. Mirifice tamen juvat acumen theoria, quam proponimus, cum ex ea constet, in quænam dirigenda sit attentio. Quamobrem ejusdem applicatione acquiritur successive acumen ideas eorum, quæ animæ insunt, confusas evolvendi: id quod alias, quemadmodum ipsimet experti sumus, non adeo facile acquiritur, ut potius plerique ab eo arceantur.

§. 742.

*Definitio
irrisionis
num usui
loquendi
conformis.*

Definitio tam nominalis, quam realis irrisionis significatui recepto ac communi usui loquendi conformis. Equidem *irrisio* vulgo non pro affectu, sed pro actione quadam externa sumitur, ad quam & vultus mutatio, & gestus peculiare referuntur: quod si tamen eandem attente consideres, omnes actiones simplices, quæ ad irrisionem spectant, unanimi omnium ju-

judicio, ex illo animi statu interno procedunt, eundemque supponunt, ita ut actum externum ex veritate nemini tribuere possis absque statu illo animi interno. Quamobrem cum nobis in Psychologia explicanda sint ea, quæ ad animam spectant, & singulos ejus status ex actionibus ac mutationibus corporis observabiles a se invicem distinguere atque ad notiones distinctas revocare teneamur; omnino nobis explicandum est, quinam status internus animæ huic, vel isti statui corporis respondeat. Neque a communi loquendi usu recedimus, si ad significandum eum animæ statum transferimus vocabula, quæ ad denotandum corporis statum vulgo adhibentur, qui sine isto dari nequit & quem pro vero non admittimus, sed pro simulato habemus, ubi a statu illo animæ sejungitur. Etenim quod status iste internus simul vocabulo isto denotetur, ex hoc ipso colligitur, quod externum corporis statum non dicamus verum, ubi cum interno animæ non conjungitur. Quemadmodum itaque jam olim *Aristoteles* ad animum retulit sensationes & mentem videre, mentem audire pronuntiavit, ac nos in superioribus non repugnante communi usu loquendi explicavimus, quid singuli sensus in anima denotent; ita quoque a communi usu loquendi minime recedimus, dum animæ statum internum explicamus, sine quo irrisioni nemo locum concedit. Enimvero quod irridens alterum gaudio afficiatur ex iis, quæ opinione sua alterius famæ nocent; nemo non observat, qui vel sibimetipsi attendit, ubi in eo statu constituitur, vel ad alios attendit, ubi irridet alios. Etenim affectus, quo verba irridentis protruduntur, vultus ac gestus ipsaque vox mutatur, est id, quo irrisionem veram a simulata, vel affectata distinguunt omnes. *Cartesius* in Tractatu de Passionibus animæ part. 2. art. 62. irrisionem facit comitem lætitiæ, aut, si mavis, gaudii ex malo alterius venientis; adeoque ipsum illud gaudium pro irrisione non habet. Sed id quidem inde est, quod irrisionis vocabulum restringat ad actus

exter-

externos, quibus significamus, nos alterum dignum existimare malo, quod eidem accidit, nec expendit gaudium istud singulari ratione esse modificatum, ut eodem jure pro peculiari affectu haberi possit, quo ipsemet invidiam ac commiserationem pro peculiaribus affectibus habet, et si utrumque tristitiæ speciem esse ultro agnoscat. Ecce enim tristitiæ species pro peculiaribus affectibus habet? Sane non alia de causa, quam quod tristitia hic diversimode modificetur, ut a simplici tristitia differat. Eadem vero de causa etiam irrisio pro peculiari affectu habetur, quod gaudium, cui in ea locus est, peculiari modo modificatur. Præterea *Cartesius* irrisionem extendit ad lætitiā ex omni malo ortam, quatenus alterum eodem dignum censemus: enimvero ostendimus jam superius, irrideri quoque alios ob damna, quæ ipsis inferuntur, & fortunam quamlibet adversam (§. 732.); ex demonstratione autem apparet, id fieri non nisi in eo casu, quo quis talia alterius famæ adversa existimat. Insidiantur irrisores continuo famæ alterius: id quod nemo non observare potest. Non igitur est, quod dubites, significatum vocabuli irrisionis in doctrina affectuum, non invito usu communi loquendi a nobis constitutum esse.

Latent in probatione propositionis præsentis principia generalia, quæ utiliter ad alios quoque usus adhibentur: sed sufficit ad ea excitari attentionem.

§. 743.

Risus definitio.

Risus nascitur ex iis, quæ nostra opinione absurda sunt.

Quoniam in irrisione risui quoque locus est, de eo ut hic agamus res ipsa postulat. Damus autem definitionem realem, cum nominalis haud facile dari possit, atque illa in primis satisfaciāt scopo, quem intendimus, scilicet ut sit nobis principium, ex quo de iis, quæ ad risum pertinent, feratur sententia. Veritatem definitionis a posteriori confirmamus. Ponamus enim *Luciliam* esse rei oeconomicæ admodum peritam. Ponamus porro *Mevium* de re oeconomicâ narrare, quæ ipsius opinione absurda sunt, seu contraria ratione sese habere

habere debebant. Nemo non novit fore ut Lucilia rideat. Memini Dn. de *Tschirnhausen* aliquando faminam nobilem hoc pacto ad risum commovisse, quam nunquam ridere posse constabat, ita ut præsentium judicio pro impossibili haberetur eam ad risum commovere. Utebatur hoc exemplo ad persuadendam aliis utilitatem definitionum realium, quas nominalibus multum præferebat.

§. 744.

Si irridens alterum id, quod alterius famæ adversum existimat, in se consideratum pro absurdo habet; risus, cum irrisione conjungitur. Risus enim oritur ex iis, quæ ridentis opinionione absurda sunt (§. 743.). Quamobrem si, quod irridens alterius famæ adversum existimat, pro absurdo habet, risum utique cum irrisione conjungere solet.

Exempla inter eruditos obvia sunt. Si Mevius existimat, Titium errasse & id famæ ipsius adversum judicat, ac eundem dignum censet hac macula, quam famæ suæ adspersit; eum irridet ac errorem, quem ipsi imputat, iis verbis exaggerat, quibus gaudium inde perceptum satis superque prodit. Quod si porro errorem istum pro maxime absurdo habet, una rider, immo Titium dignum esse, qui rideatur, non refutetur, audacter pronunciat, ac sese sibi a risu temperare non potuisse ultro fatetur. Si exemplum speciale desideres, ad similitudinem planetarum cum Tellure & incolas planetarum provoco. Etenim hodie adhuc dantur bene multi inter eruditos, quibus ista doctrina adeo absurda videtur, ut sibi a risu temperare non possint, ubi aliquem serio istud statuere audiunt. Quamobrem ubi in tales incideris, qui ad alios irridendos proni sunt, dum Astronomos & Physicos modernos irrident, simul rident.

Ex propositione præsentē liquet non semper risum cum irrisione conjungi, quamvis sæpissime jungatur, ut ideo affectui a risu nomen impositum fuerit.

§. 745.

Si quis existimat ea, quæ fecit alter, dignitati, aut personæ ejus repugnare; ad risum commovetur. Etenim si judicat, quod fecit alter, repugnare; ad risum commovetur. *Quando rideamus ob facta alio fecit.*

(Wolffii Psychologia.)

Bb bb

fecit alter, id dignitati, aut personæ ejus repugnare; idem pro absurdo habet, seu in eorum numerum refert, quæ absona habentur. Ad risum igitur commoveri debet. (§. 743.).

Confirmatur quoque propositio a posteriori. Ponamus Titium in dignitate ecclesiastica constitutum magnæ autoritatis esse. Ponamus porro eum in convivio vino inebriatum virginem osculari. Ridebit Mevius, qui hoc videt. Quod si quæfiveris, cur ideo rideat; non aliam reddet rationem, quam quod id parum conveniat gravitati, quæ cum dignitate ecclesiastica conjungi debet. Ad risum adeo commovetur, quod vino inebriari ac virgines osculari repugnet dignitati ecclesiasticæ, in qua quis constituitur, consequenter ideo, quod existimat ea, quæ alter facit, dignitati ac personæ ejus repugnare.

Fieri etiam potest, ut quidam ad indignationem provocentur, ubi rident alii: sed quænam hic causa subsit, docebitur inferius. Absit autem ut in istiusmodi exempla incidens theoriam nostram in dubium vocet! Ubi enim de risu agimus, non nobis res est cum impedimentis, quæ obstant, quo minus causa producat effectum alias producendum, si minime impediretur.

§. 746.

*Irrisionis
summus
gradus.*

Irrisionis summus gradus est, si quis gaudio afficitur ex infelicitate alterius præter ullam, ut apparet, rationem. Homines quosdam, ut videtur, præter omnem rationem sæpius latari atque in cachinnum resolvi, ubi aliis damnum quoddam accidere experiuntur, ut ut iidem ipsis sint prorsus ignoti, neque adeo appareat ratio ulla, cur id faciant, vel nulla adsit odii ac invidiæ causa; experientia clarissime loquitur. Germanis peculiare nomen est, quod istiusmodi hominibus imponunt. Vocant enim eos *Schadensfrohe*: quod vocabulum vi originis significat eum, qui damnis gaudet. Sed vocabulum Latinum non reperio, quo idem significetur.

Lingua Germanica instar Græcæ felix est in vocabulis componendis, quæ apte exprimunt, quod exprimere debent.

§. 747.

Si quis absque omni ratione infelicitate, seu damnis alienis gaudet; ratio tantummodo latet, non abest. Quoniam enim nihil est sine ratione sufficiente, cur potius sit, quam non sit (§. 70. Ontol.); necesse est, ut etiam detur ratio, cur quis gaudeat damnis quibuscunque alienis, aut infelicitate promiscue omnium. Quamobrem cum istiusmodi ratio nulla apparet; tantummodo latere, minime autem abesse potest.

An præter rationem damnis alienis gaudere quis debeat.

Confirmatur idem a posteriori. Etenim in casibus specialibus acutiores rationem latentem facile vident eamque in conspectum omnium producunt, modo pertinaciter oculos occludere nolint. Perspecta mihi sunt exempla; sed ut aliorum attentionem excitem, lubet sequentem subijcere propositionem.

In aliis quoque affectibus sæpius rationes latent, ut nulla prorsus adesse videatur. Exemplum jam habuimus de amore atque odio. Et de hoc valet illud Poëtæ:

Non amo te, Volusi, nec possum dicere quare:

Hoc tantum possum dicere: non amo te.

Etsi autem Poëta rationem reperire odii, aut amoris deficientis, minime potuerit; non tamen inde colligi potest, quod nulla ipsi fuerit. Si philosophus acutus interiora mentis ipsius perspexisset, quemadmodum ipsi aditus ad ea patebat; eandem dubio procul reperisset.

§. 748.

Si quis supra omnes eminere velit; is damnis alienis promiscue gaudet. Si quis enim supra omnes eminere velit, is nec parem ferre, nec superiorem valet, consequenter ipsi displicet, si quid alteri boni adesse videt, quod sibi vel adest, vel deest, atque adeo odium quoddam occultum oritur (§. 677.), indeque porro invidia serpit (§. 707.). Animus igitur ejus dispositus est ad voluptatem ex alienis damnis promiscue percipiendam (§. 661.), immo ad gaudendum iisdem (§. 663.). Cumque præterea idem dispositus sit ad tristitiam, vel tedium ex alienis

Quinam damnis alienis promiscue gaudeat.

nis bonis percipiendum (§. 705.); hac ipsa dispositione prior magis corroboratur ac sustentatur, aut, si mavis, alitur. Quamobrem ubi damna aliena cognoscit, iis promiscue gaudet.

Confirmatur idem a posteriori. Videmus enim homines, qui ambitione ducti supra omnes eminere volunt, voluptate affici ex damnis alienis, immo gaudere vel illorum damnis, quos amant, si qua in re eos vel pares, vel superiores experiantur. Immo si quos vides alienis damnis gaudere solitos, eos esse facta inquisitione reperies, qui neminem sibi parem, omnibus se superiorem esse mallent. Inest ad id naturalis dispositio, quæ sese a prima statim infantia exerit ac deinde adultæ ætate diversis de bonis opinionibus diversimode fovetur: quæ aliquando ex philosophia nostra morali clarius elucescent.

Ex hac ipsa propositione elucescit, cur mala aliena, quibus gaudemus, semper ad famam aliorum referamus. Etenim qui malis alienis gaudet, ideo bonum judicat alterum malo affigi, quod sic eum qua in re se inferiorem agnoscat, vel si ipsemet eodem laboret, sibi parem reperiat. Acumine tamen opus est, ubi affectus alii irrisioni se socios præbent, vel etiam plures affectus concurrentes agnatum irrisioni affectum mentiuntur. In appetitibus hominum plurima plerumque confunduntur, quæ a se invicem non separabit, nisi qui singulorum in se consideratorum theoriam animo comprehensam tenet. Hanc theoriam tradimus in Psychologia & philosophia morali. Ceterum ex hac propositione intelligitur, quod non desit gaudii ex alienis malis orti ratio, etsi ea non cuivis statim appareat, adeoque patet id, cujus gratia eandem præcedenti subjunximus.

§. 749.

Si quis iis, quæ bene a se facta opinatur, gaudet, *in se acquiescere* dicitur. Est adeo *Acquiescentia in seipso* gaudium ob bonum, quod patravimus.

Peculiarem affectus speciem constituimus gaudium ob bonum a nobis patratum, quod singulari ratione modificetur, ut a reliquo gaudio ipso sensu interno, seu quatenus ejus nobis contecti sumus, distingui possit.

Acquiescentia in seipso desinitio.

§. 750.

Si quis a se facta bene facta opinatur, iis gaudet, vel ex iis voluptatem percipit. Dum enim nobis repræsentamus bonum, quod patravimus, perfectionis nostræ statusque nostri, vel etiam perfectionis alienæ, quam promovimus, nobis conscii sumus (§. 554.): inprimis etiam nobis conscii sumus perfectionis nostræ, vi cujus ad id, quod opinione nostra bonum est, faciendum apri nobis videmur. Quare cum volupras in intuitiva cognitione perfectionis cujuscunque sive veræ, sive apparentis consistat (§. 511.); si quis a se facta bene facta opinatur, ex iis voluptatem percipere, immo gaudere debet (§. 614.).

*Realitas
definitionis
ipsius evi-
deta.*

A posteriori propositionis præsentis veritas satis manifesta est. Exempla inter eruditos maxime obvia. Etenim si Poëta poëma, quod fecit, legibus artis conforme existimat, gaudio extollitur: nec idem evanescit, si vel maxime ab aliis virgula censoria notatur, ubi censuras iniquas experitur sibi probe conscius salvis regulis artis poëma suum reprehendi non posse. Similiter si quis actiones morales ad examen revocans eas legi divinæ conformes deprehendit; intimo afficitur gaudio, ut id eo dudum agnoverint philosophi antiquissimi ex habitu virtutis agentem non sine gaudio facere quod bonum, quod justum, quod laude dignum est. Neque tollitur gaudium, etiam si quis, quod bene faciat, censuras aliorum iniquas, immo vexas incurrat.

Gaudium hoc, quod ex bene factis percipitur, in eo casu, quo aliorum censuris iniquis ac vexis expositi sumus, *solamen conscientia* vulgo appellari solet. Sed ea de re suo loco in moralibus ex instituto dicemus, quando de conscientia acturi sumus.

§. 751.

Est adeo *Acquiescentia in seipso* affectus, qui oritur, si facta nostra nobis repræsentamus tanquam bona, nec ultra iudicium hoc quicquam præterea attenditur.

Acquiescentia in seipso definitio realis.

Definitio realis probe consideranda est, ne affectum hunc cum alio agnato, quem *Gloriam* posthac dicemus, confundamus, cum

ab eo plurimum differat, etsi fieri possit, ut uterque jungatur. Gaudium in utroque diversa prorsus ratione modificatur, etsi ita modificetur, ut non repugnet utramque modificationem simul fieri in utroque subjecto. Effectus quoque utriusque affectus non iidem sunt: id quod clarius patebit, ubi utriusque notionem inter se contulerimus ac utrumque in nobis sigillatim experti fuerimus. Vitandæ confusionis gratia addidimus, ultra iudicium de actione ad regulam relata nil quicquam attendendum esse.

§. 752.

*Gaudium ex
bene factis
aliorum per-
ceptum.*

Si quis alterum impense amat, ejus bene factis gaudet, vel voluptatem ex iis percipit. Si quis enim alterum impense amat, is eum considerat tanquam seipsum (§. 659.), consequenter quæ ab aliis bene facta sunt sibi repræsentat tanquam a seipso facta, ea nimirum ita approbans, ut ipsemet in iisdem circumstantiis constitutus idem prorsus facturum sese fuisse judicet. Enimvero si quis a se facta bene facta opinetur, iis gaudet, vel voluptatem ex iis percipit (§. 750.). Ergo & factis alienis gaudere, vel voluptatem ex iis percipere debet, ubi alterum impense amat.

Parentes impense amant liberos. Ecquis vero est, qui nesciat, eos factis liberorum gaudere, quæ opinione ipsorum bona sunt, non secus ac si ipsimet fecissent, quæ ab iis facta sunt. Gaudium hoc esse effectum amoris nemo dubitat. Quamobrem respectus ille, qui est inter parentes & liberos attendendus minime venit: neque enim hic quæritur, quænam sit causa amoris, sed quinam sit effectus ejusdem. Exemplum hoc cum sit admodum luculentum, ad propositionem præsentem a posteriori confirmandam abunde sufficit.

Probe notandum est impensum requiri amorem, ne propositionis veritatem in dubium vocemus, si ex amore quocunque gaudium istiusmodi non procedere animadvertimus. Notandum præterea gaudium hoc non confundi debere cum eo, quod ex iis, quæ ab aliis bene facta sunt, ideo percipitur, quia ipsis inde materiam gaudendi esse agnoscimus, cum in eo amor consistat (§. 640.). Sane gaudium, cum quo nobis hic negotium est, locum habet, etiam si noverimus,

alte-

alterum ad ea, quæ bene ac rite fecit, non afferre animum adeo attentum, ut iis gaudere possit.

§. 753.

Acquiescentia in seipso est affectus jucundissimus. Qui enim *Acquiescentia in seipso* acquiescit, is facta sua sibi repræsentat tanquam bona (§. 751.), adeoque sibi conscius est perfectionis suæ, ob *scientia in seipso qualis sit affectus,* quam bonum patrare potuit; conscius sibi est perfectionis suæ, vel alienæ, quam facto suo promovit (§. 554.), vel perfectionis operis sui. Immo conscius sibi est facta sua, vel opus suum ab alio cum ratione reprehendi minime posse. Voluptatem adeo multiplicem una percipit (§. 511.), cumque bene a se factis gaudeat, qui in seipso acquiescit (§. 749.), voluptas multiplex prædominatur (§. 614.), consequenter tanta est, ut tædium, si quod adfuerit, non percipiatur (§. 529.). Immo quia voluptatem etiam inde percipimus, quod nemo cum ratione facta nostra reprehendere possit, *per demonstrata*; gaudium ita comparatum est, ut nemo idem a nobis auferre possit. Est itaque affectus jucundissimus acquiescentia in seipso (§. 608.).

A posteriori innotescit propositionis veritas omnium clarissime, si quis experimentum in seipso sumit. Quamobrem hic provocandum est ad testimonia eorum, quibus experimentum in se sumere licuit. Non urgeo domesticum. Sed ad testimonium *Cartesii* provoco, qui ideo in Tract. de Passionibus animæ part. 2. art. 63. acquiescentiam in seipso omnium aliarum passionum dulcissimam esse affirmat.

Nemo miretur, quod in iis stabiliendis, quæ a posteriori nobis innotescunt, ad testimonia aliorum provocemus. Agitur enim de eo, quod unusquisque in se experitur, modo attentione sufficiente uti didicerit ac acumine suo distinguere possit, quæ in anima cum sint diversa facile tamen pro iisdem habentur. Ideo ad testimonium *Cartesii* provocavimus, quem ad istiusmodi experimentum instituendum aptum fuisse nemo dubitare potest. Multa ab ipso præclare facta sunt, id quod eum non ignorasse tum ex dissertatione de methodo, tum

ex variis epistolis satis intelligitur. Fuit præterea attentione profunda ac acumine sublimi præditus. Nihil adeo eorum ipsi defuit, quod hic desiderari possit. Ceterum probe notandum est, si quis omnes affectus jucundos inter se conferre voluerit, haud difficulter appariturum, quod acquiescentia in seipso sit affectuum omnium jucundorum jucundissimus. Sed nostrum non est ad ambages istas descendere, quas ingredi tenetur, qui id evidenter ostendere voluerit.

§. 754.

Num vocabulum acquiescentia in seipso habeat significatum receptum.

Definitio acquiescentia in seipso non contrariatur notionibus communibus sumiurque vocabulum in significatu a Cartesio in philosophiam introducto. Nos gaudere iis, quæ bene ac recte a nobis facta existimamus, a posteriori probavimus, provocando ad experientias communes (§. 750.), & obviis quoque experientiis stabilivimus, affectum hunc esse jucundissimum (§. 753.), immo monuimus, si quis omnes affectus, quos jucundos experitur, inter se conferre voluerit, acquiescentia in seipso facile palmam adjudicaturum. Rem adeo nemo negare potest, nisi forte sit qui sibi in experta concedere nolit, vel quod bene & recte factorum nunquam sibi fuerit conscius, vel quod ad gaudium hinc ortum non attenderit. De nomine igitur solo est disputatio. Nos destitui nomine isti affectui proprio in communi sermone, vel inde colligitur, quod non minus in sermone nobis vernaculo, quam in Latino vocabulo destituamur, quo is significatur, ut adeo circuitu quodam opus sit ad eundem denotandum. Enimvero in apri-co posita est vocabuli deficientis ratio. Gaudium hoc non distinguitur ab alio, quod intus subsistat, nec per actus quosdam externos foras procedat, quos ab aliis facile distinguere liceret, atque ideo de peculiari nomine vulgo nemo cogitavit. Quoniam vero diversa prorsus ratione modificatur, ut eodem jure pro peculiari affectu haberi debeat, quo in aliis casibus gaudium singulari ratione modificatum pro diverso affectu habetur; philosophi est non ita inhærere communi usui loquendi ac eidem respondentibus communibus notionibus

nibus, ut inde præjudicium nascatur veritati. Mox apparebit, affectum gaudio huic oppositum pro peculiari ab omnibus haberi & peculiari quoque nomine insigniri, etsi tristitiæ quædam species sit. Ecce igitur non eodem jure gaudium ex eo ortum, quod bene, aut recte a nobis factum existimamus, pro peculiari affectu habeamus, præsertim cum in moralibus sapissime ejus injicienda sit mentio, ut ipsa necessitas nomen peculiare eidem imponi postulet? Quoniam itaque *Cartesius* in *Tractatu de Passionibus animæ* part. 2. artic. 63. termino acquiescentiæ usus fuit ad affectum hunc exprimendum; eundem ut retineamus ratio suadet (§. 147. *Disc. prælim.*). *Cartesius* vero loqui de gaudio ex eo percepto, quod bene aut recte a nobis factum existimamus; clarissime liquet. Bonum enim, inquit, a nobis ipsis præstitum dat nobis acquiescentiam interiorem, quæ omnium aliarum passionum dulcissima est: id quod cum definitione nostra reali ex nominali deducta convenit (§. 751.), atque palam loquitur, quod acquiescentiam in seipso pro affectu peculiari habuerit.

Apprime necessarium est, ut acquiescentia in seipso a ceteris affectibus distingvatur cum dignus sit ut omnium attentio ad eundem provocetur. Etenim haud postrema felicitatis humanæ pars hoc affectu continetur: id quod suo loco expressius docebitur.

§. 755.

Pœnitentia est tristitia ex eo, quod a nobis male, vel minus recte factum existimamus, orta, vel saltem tædium inde perceptum. *Pœnitentia*
desinitio.

Affectus hic notissimus est, non autem confundi debet cum officii nomine, quod pœnitentiæ nomine insignitur in Theologia revelata. Quamvis enim negari non possit, affectum istum, cum quo nobis jam negotium est, ab officio illo hominis christiani non esse alienum; plura tamen ad idem referri solent, quam quæ illius notionem ingrediuntur. Pœnitebat *Judas*, quod Christum prodidisset, in sensu philosophico, quatenus nempe affectu molestissimo hoc angebatur, cum factum infectum reddere non posset; sed non pœnitentiam

am agebat in sensu theologico, cum desperabundus sibi ipse manus violentas inferret.

§. 756.

Realitas

ejus asserti.

Si quis, quæ a se facta sunt, male, vel minus recte facta judicat, aut malum a se factum sibi repræsentat; tristitia, vel tædio afficitur. Si quis enim facta sua sibi repræsentat tanquam mala, vel etiam opus suum tanquam regulis artis contrarium; is & imperfectionis propriæ, qua ad male agendum, vel opus non rite perficiendum perductus fuit, ac præterea imperfectionis male factis sibi, vel aliis acquisitæ, aut imperfectionis operis proprii sibi conscius est (§. 568. *Psychol.* & §. 504. *Ontol.*), adeoque multiplici tædio affici debet (§. 518.), quod ubi prædominatur in tristitiam degenerat (§. 619.). Pater adeo nos ex iis tristitia, vel tædio affici debere, quod, quæ a nobis facta sunt, tanquam male, aut minus recte facta nobis repræsentemus.

A posteriori veritas propositionis manifestissima est. Ponamus enim Mevium condidisse poëma ac, ubi publici juris factum fuerit, deprehendere naves complures, quibus obnoxium est, atque adeo sibi probe conscium esse quod regulis artis contrarietur. Nemo non novit, quod tædio inde afficiatur. Quivis etiam optime novit, tædium hoc esse diversum ab aliis tædiis, quod magis anxium reddat animum ac inquietum: id quod proxime in Psychologia rationali clarius patebit. Similiter ponamus Sempronium propalasse consilia, quæ animo agitabat, idque sibi noxium deprehendere. Quantis inde tædiis obruatur animus, & quam inquietum reddant tædia ista animum ejus nemo non novit. Cum haud raro agant homines, cujus ipsosmet postea poeniteat; experimentum veritatis propositionis præsentis in se capiendi frequens admodum occasio est, ut adeo plura eam in rem addi supervacaneum merito existimemus.

Vulgo autores poenitentiam tantummodo restringere videntur ad actiones morales, quatenus eas malas agnoscimus: ast non invita
expe-

experientia extendenda quoque est ad ea, quæ in se moralitatem habere non existimantur, artis nempe opera.

§. 757.

Si quis alterum impense amat, eorum poenitet, quæ ab eo vel Facti alieni male, vel minus recte facta existimat. Si quis enim alterum im- quando poenitiamus. pense amat, is eum considerat tanquam seipsum (§. 659.), consequenter quæ ab eo facta sunt, ea tanquam a se facta spectat. Enimvero si quæ a se facta sunt male, aut minus recte facta existimat, eorum poenitet (§. 755.). Ergo etiam illorum poenitere debet, quæ ab altero male, vel minus recte facta sunt, quem impense amat.

Patet propositionis præsentis veritas etiam a posteriori. Provocare hic denuo licet ad exemplum parentum liberos impense amantium. Quod si enim agnoscant, quæ ab iis facta sunt, mala esse, seu iisdem noxia (§. 565.); tristitia afficiuntur, consequenter eorum ipsos poenitet (§. 755.). Poenitentiam haud obscure indicant hæc verba ingeminantes: utinam filius meus hoc non fecisset! Mallem iacturam facere vel mille thalerorum, si factum infectum fieri posset. Quod si amor non influit in iudicium de factis liberorum; iisdem indignantur. Sed de indignatione hac dicemus deinceps. Exempli loco esse etiam potest amicus, quo admodum familiariter utimur, & quem tanto amore complectimur, ut, quæ ipsius sunt, ea ad nos pertinere existimemus.

Amor sincerus rarior est, eo præsertim gradu, quo animi duorum ita conjunguntur, ut omnia sibi communia existimant. Præterea quoque alii affectus in plerisque casibus eidem accedunt; ut, quæ inde oriri debbat, poenitentia vel prorsus non oriatur, vel cum aliis affectibus confusa non agnoscat. Quamobrem difficile experimentum poenitentiae eorum, quæ ab aliis male facta sunt. Ac idem tenendum est de acquiescentia in aliis, tanquam in seipso (§. 752.).

§. 758.

Poenitentia est affectus molestissimus. Qui enim poenitet Poenitentia eorum, quæ fecit; is tristitia afficitur ex eo, quod male, vel qualis sit mi. affectus.

minus recte a se factum existimat (§. 755.). Quamobrem sibi non modo repræsentat suam ipsius imperfectionem, ob quam male, vel minus recte quid fecit; verum etiam imperfectionem, in quam vi facti sui incidit, vel alios adduxit (§. 565.), aut imperfectionem operis sui intuetur. Multiplicis adeo imperfectionis sibi conscius multiplici rædio perfunditur (§. 518.), consequenter ubi prædominatur, tristitia multiplici afficitur (§. 619.). Quamobrem pœnitentia affectus molestissimus esse debet (§. 609.).

A posteriori idem confirmatur ex eo, quod videamus eos, quos a se factorum pœnitet, plurimum angere, & animos eorum adeo inquietos reddi, ut mortem appetant, ac sæpius desperabundi manus violentas sibi metipsis injiciant: quemadmodum imperu hujus affectus abreptus fecit Judas, cum Christum prodidisset.

Dici ex vero potest, pœnitentiam esse affectum omnium molestissimum. Enimvero cum difficilis sit demonstratio a priori; ambagibus istis nos immergere nolimus.

§. 759.

*Definitio
realis pœ-
nitentia,*

Pœnitentia est affectus, qui oritur, si ea, quæ fecimus, nobis repræsentamus tanquam male, aut minus recte facta, seu qui oritur ex perceptione mali a nobis patrati.

Definitio realis jam includitur in nominali, quam dedimus (§. 755.).

§. 760.

*Definitio
pœnitentia
num usui
loquendi
conformis,*

Definitio pœnitentia tam realis, quam nominalis communis usui loquendi ac recepto significatui conformis. Pœnitere, inquit Goclenius in Lexico, dicimur, cum quæ fecimus nobis displicere incipiunt & molesta sunt. Displicent nobis facta nostra, si ex iis rædium percipimus (§. 542.). Quare quando pœnitentia animum nostrum subit, rædium ex iis, quæ fecimus, percipimus. Et quoniam ea, quæ fecimus, nobis molesta sunt, quatenus nos statumque nostrum imperfectiorem reddunt; ea nobis

nobis tanquam mala repræsentamus (§. 565.), consequenter ex factis nostris tædio, adeoque si ingens fuerit, tristitia afficimur (§. 619.), quod ea mala deprehendimus. Est adeo juxta *Goclenium* pœnitentia tristitiæ, aut tædii quædam species, quæ oritur ex eo, quod, quæ fecimus, mala experiamur, seu facta nostra præterita tanquam mala nobis repræsentemus; quod cum definitione nostra nominali atque reali prorsus convenit (§. 755. 759.). Nil obstat, quo minus molestias, quæ nobis creant facta præterita, ad mentem quoque referamus, quatenus eorum memoria nobis molesta est. Tum vero patet, facta præterita non aliter nobis molesta esse posse, nisi quatenus tædia atque tristitia animum anxium & inquietum reddunt: id quod cum eo convenit, quod affectum molestissimum pœnitentiam ostenderimus (§. 758.). Immo illa inquietudo atque anxietas animi fovetur atque augetur, dum damna, quæ incurrimus & pericula, quibus nos, vel alios exposuimus, nobis repræsentamus. *Perottus* significatum pœnitentiæ ex *Gellii* lib. 17. cap. 1. repetens: Pœnitere, inquit, dicimus, cum, quæ ipsi fecimus, aut quæ de nostra voluntate nostroque consilio facta sunt, ea nobis postea incipiunt displicere, sententiamque in iis nostram demutamus. Hæc non abhorrent ab iis, quæ dixerat *Goclenius*, adeoque cum nostris quoque definitionibus conspirant *per demonstrata*. Porro *Martinius* in *Lexico*: Pœnitere, inquit, simpliciter est doleo ob factum meum, quod admissum nollem. Dolor hic, quod per se patet, ad animum refertur, adeoque tædium & in gradu exquisitiori tristitiam denotat. Est adeo Philologo summo pœnitentia tædii aut tristitiæ quædam species orta ex eo, quod facta nostra infecta esse mallems: id quod notioni pœnitentiæ, quæ nobis est, convenire, partim ex definitione nominali (§. 755.), partim ex propositione sequente (§. 761.) intelligitur. Idem etiam clarissime perspicitur ex ingeniosa, quam subjicit, etymologia. Pœniteo, inquit, est o pœna, quatenus est dolor & quem pœnitet, is dolendo a se quasi pœnam suæ temeritatis exigit.

Consentanea his est definitio pœnitentiæ, quam tradit *Augustinus*: Pœnitentia, inquiens est, quædam dolentis vindicta puniens in se, quod doler commississe. *Cartesius* in Tract. de Passionibus animæ part. 2. art. 63. definitionem realem pœnitentiæ dedit, quod scilicet malum excitet pœnitentiam, quatenus nos consideramus tanquam causam ejusdem: quæ cum nostra definitione reali eadem est (§. 759.). Etenim si sumus causa mali, ea, quæ fecimus, mala sunt (§. 886. *Ontol.*), consequenter ex eo oritur pœnitentia, quod, quæ fecimus, mala nobis videntur.

In stabiliendo communi ac recepto significato vocabuli pœnitentiæ ad etymologiam quoque provocavimus, quem eidem vindicat *Martinius*, ipso *Augustino* præeunte. In genere itaque tenendum est, in significato communi vindicando ideo ab etymologiis, quas tradunt Autores, argumenta peti posse, quod rationes a rebus desumere soleant, cum nescio quam voluptatem ex eo percipiant, quod nomina rebus suis convenire observemus. Profunt etymologiæ etiam contortæ ac falsæ, modo rationes a re petiti sint tales, quæ eidem conveniunt. Etenim convenientiam nominis cum re evicturi sibi quid reperisse videntur, quod ad persuadendam aliis veritatem etymologiæ suæ conducit, ubi rationes convenientiæ in re deprehendunt, si eorum etymologia admittitur. Exempli loco nobis esse potest ipse *Martinius*, qui vocabulum Germanicum *Reue*, quo pœnitentiam significamus, quatenus pro affectu sumitur, a vocabulo Latino *reus* deducit, quod *reuen* seu pœnitere idem sit ac dolere se reum peragere. Etenim qui se reum peragit, is quod fecit male a se factum esse fatetur, ac dolor animi sive tristitia nos reos peragens non alia est, quam quæ ex eo percipitur, quod quæ fecimus male a nobis facta existimamus. Hic ex falsa etymologia deducitur, *Martinio* eundem vocabuli fuisse significatum, quem nos eidem tribuimus. Obiter monemus, ex dictis manifestum esse etymologiarum ab Autoribus allatarum quendam usum in communi vocabulorum significato stabiliendo: qui tanto certior, quo magis certum est Criticos ea in re ultra vulgus non sapere poruisse, consequenter nonnisi notiones communes, quibus communis vocabulorum significatus constat (§. 139. *Log.*), habuisse.

§. 761.

Quem pœnitet, is factum infectum reddere mallet. Quem *Pœnitentis* enim pœnitet, is quod fecit malum esse existimat (§. 755.), *defœcerium.* adeoque idem averſatur (§. 581.), conſequenter non faceret niſi id factum jam eſſet. Et quoniam triſtitia inde afficitur (§. 755.), qua animum vacuum habere mallet; factum utique infectum eſſe, conſequenter ſi per ipſum ſtaret infectum reddere mallet. Sunt adhuc rationes aliæ, unde naſcitur cupiditas reddendi factum infectum, ſi fieri poſſet, veluti pericula, quæ nobis ex facto noſtro imminet, vel etiam damna, quæ incurrimus & a quibus nos liberos eſſe cupimus.

Propoſitionis præſentis veritas a poſteriori adeo manifeſta eſt, ut Critici in reddendis rationibus etymologiæ vocabuli ad eam recurrerint, quemadmodum paulo ante a nobis annotatum eſt (§. 760.). Idem unusquisque in ſe experitur, quotiescunque pœnitet eum jam factorum. Ponamus virum quendam eruditum conſcripiſſe aliquem librum de Quadratura circuli & poſtquam eundem publici juris fecerat, reperire a veritate aberrare, quam ſibi inveniſſe viſus fuerat, circuli Quadraturam. Nemo dubitat quod eum pœniteat, inventum ſuum a ſe publici juris fuiſſe factum, antequam virorum eruditorum iudicium expiſcatus fuerat. Dum igitur mallet librum a ſe conſcriptum nondum publici juris fuiſſe factum; ecquis non videt, dum eum pœnitet publicationis, quod factum infectum reddere mallet. Ponamus ſimiliter aliquem evulgaſſe conſilia, quæ animo agitabat, ac ideo ſcopo ſuo excidiſſe. Dum damnum ſentientem pœnitet, quod intempeſtive aliis dixerit, quæ reticere debebat, ingeminare ſolet: utinam hæc nemini dixiſſem! manifeſto ſane indicio, quod factum infectum reddere mallet, ſiquidem per ſe ſtaret.

Probe notanda eſt propoſitio præſens, quod ejus multus ſit uſus in moralibus, ubi nobis cum pœnitentia plurimum negotii erit. Mox etiam patebit, quantum conferat ad inquietudinem animi hæc cogitatio,

tatio, quod præstaret si factum infectum reddi posset, & quod inde potissimum p. deat differen. ia poenitentia ab aliis tristitia speciebus.

§. 762.

*Poenitentia
affectus
qualis.*

Poenitentia animum admodum inquietum reddit. Si quem enim poenitet ejus, quod fecit; is ideo, quod fecit, tristitia, aut tadio afficitur (§. 755.). Idem vero mallet factum esse infectum (§. 761.). Enimvero cum factum infectum fieri non posse agnoscit, causam quoque, consequenter rationem tristitia, vel tadii sui, tolli non posse agnoscit (§. 883. *Ontol.*), adeoque se a tristitia ista, vel tadio liberari non posse certus sibi videtur (§. 118. *Ontol.*). Quoniam igitur malum reputare debet, quod tristitia, & tadiis conficiatur (§. 613.), inde quoque tristitia afficitur (§. 623.), atque adeo animus ejus inquietus est.

Hanc inquietudinem unusquisque in se ipso experitur, quando eum facti sui poenitet. Clarissime quoque percipimus, inquietudinem esse ex eo, quod factum infectum fieri haud quaquam possit. Quoties enim ipsimet damnamus, quod fecimus, toties anxietas novum quasi imperum in animum nostrum facit. Et iterati isti insultus inquietudinem animi constituunt. Sed præstat ea observari, quam verbis prolixis describi. Sufficit abunde attentionem excitasse ad ea, quæ observari debent.

Quam molesta sit poenitentia, ut probe agnoscamus, plurimum refert. Ingens enim adversus vitium praesidium est ejus memoria. Ceterum hinc quoque intelligitur, cur affectus molestissimus esse debeat poenitentia, quia animus angitur tristitia atque tadio, quod a nobis auferri non potest, nisi diuturnitate temporis, subinde autem vix ac ne vix quidem unquam evanescit. Hortamur itaque serio omnes, ut si eos facti poenitet, ad singula probe attendant, quæ omni acumine suo distinguere valent, ne negligant illud, cujus maxime habenda est ratio, ubi vitam felicem ac tranquillam degere voluerimus, nos vero temere infelices reddere noluerimus.

§. 763.

Si quis in seipso acquiescit, ea, quæ jam fecit, facta esse *Qualis sit*
mavult, quam infecta, ita ut, si occasio ea agendi denuo sese of- *acquiescen-*
ferret, eadem denuo faceret. Qui enim in seipso acquiescit, *tia in seipso.*
 is quæ fecit bene ac rite facta esse judicat, iisdemque gaudet
 (§. 749.), consequenter insigni prorsus voluptate inde afficitur
 (§. 614.). Quamobrem ea, quæ fecit, adhuc appetit (§. 589.),
 tanto quidem magis, quanto major est voluptas, qua inde af-
 ficitur (§. 595.). Enimvero ea, quæ appetimus, facimus, si
 quidem faciendi occasio sese offert, nec quicquam actionem
 impedit. Quamobrem si ea, quæ fecit in seipso acquiescens,
 denuo faciendi occasio sese offerret, cum nihil actioni obster,
 sed potius gaudium, quo inde afficitur, ingens admodum sti-
 mulus sit ad faciendum (§. 603.) ; idem denuo faceret, adeo-
 que fieri non potest ut ea, quæ fecit, infecta potius, quam facta
 mallet. Ea igitur facta mavult, quam infecta.

Experientia idem confirmat omnium clarissime in eo ca-
 su, quo ex iis, quæ bene ac rite facta sunt, ansam nobis nocen-
 di ac tædia creandi capiunt invidi ac malitiosi. Quodsi enim
 in nobismet ipsis acquiescimus, factis nostris ad trutinam ra-
 tionis appensis, ultro fatemur, nos idem denuo facturos, quod
 fecimus, si quidem id faciendi occasio denuo offeratur. Immo
 ultro fatemur, nos idem facturos fuisse, etiamsi vexas ac tæ-
 dia nobis ideo creanda prævīdissemus. Non simulata esse hæc
 verba in aliis ex eo intelligitur, quod inter medias vexas, ac
 inter mille tædia, quæ ipsis creantur, læti sint ac contento
 animo. Exemplo nobis sunt Apostoli, ob evangelium de Chri-
 sto prædicatum vexis dirissimis obnoxii, sed medias inter ca-
 lumnias latissimi. Si quis vero in seipso acquiescens experimen-
 tum in se capit, is sinceritatem judicii ipso sensu interno per-
 cipit, ut de ea dubitare haud quaquam possit.

Non obstat acquiescentiæ in seipso, quod quis malitiæ illorum
 indignetur, qui ipsi vexas creant ob ea, quæ bene ac recte facta
 (Wolfii Psychologia.) D d d d sunt:

sunt: neque enim ea illi contrariatur, sed penes eam subsistere potest, quemadmodum ex sequentibus clarius elucescit. Quemadmodum vero poenitentia id præcipui habet, quod factum infectum mallet; ita acquiescentiæ in seipso non minus peculiare est, quod factum potius factum, quam infectum mavult. Sicuti igitur porro *Marrinius* poenitentiam definit per dolorem ob factum meum, quod admissum nollem; ita e contrario acquiescentia in seipso vi propositionis præsentis definiri poterat per gaudium, seu voluptatem ob factum meum, quod admissum volo. Atque ita quid sit acquiescentia in seipso ex poenitentia rectius intelligitur, oppositis juxta se positis magis elucescentibus: id quod etiam in aliis casibus obtinet, veluti dum sanitas ex morbo clarius innotescit.

§. 764.

Acquiescentia in seipso effectus.

Acquiescentia in seipso animum reddit quietum. Qui enim in seipso acquiescit, ob factum suum gaudet (§. 749.) & ea, quæ fecit, facta esse mavult, quam infecta (§. 763.), consequenter adhuc appetit, quæ appetierat ante, minime autem aversatur, quæ ante appetierat. Quare cum contrariis appetitibus & aversionibus vacuum habeat mentem, nec adsit quod eum a sententia sua dimovere possit, quin potius gaudium, seu voluptas, qua fruitur, stimulo ipsi sit ut in eadem sententia firmiter persistat; animus ejus quietus est, qui in seipso acquiescit. Inprimis ea clarissime percipitur, ubi inter mille tædiæ, quæ nobis creantur ab invidis ac malitiosis hominibus, immo inter nefandas ac abominandas quascunque vexas caput veluti suum extollit acquiescentia in seipso. Sunt quædam hujus quietudinis aut, si vox communior magis placet, quietis animi in aliis indicia, unde haud obscure colligitur. Sed de his suo tempore in moralibus agendi locus erit, ubi cum patientia nobis erit negotium.

Hæc ipsa quies, quæ gaudium singulari quadam ratione modifcat, hanc gaudii speciem ab alio quocunque gaudio distinguit, ut ideo jure merito pro peculiari affectu habeatur. Ab ea est illa affectus hujus dulcedo, quam tantopere prædicat *Cartesius*, & qua
semel

semel degustata non exiguum felicitatis humanæ, immo præcipuam ejus partem, in acquiescentia hac interiore reponimus.

§. 765.

Gloria est gaudium, quod percipitur ex aliorum de nobis *Gloria de nostris*que benigno judicio. Si gaudium nascens fuerit, ejus *finis*. loco voluptas percipitur in minori gradu, quam qui ad prædominium, in quo gaudium consistit (§. 614.), sufficit. Dicitur autem *judicium* aliorum de nobis aliisque *benignum*, si ea, quæ fecimus, bene ac recte a nobis facta esse, quæque nobis sunt, ea bona esse judicant.

Dari istiusmodi gaudium per propositionem subsequentem patet, quam ideo ad evincendam definitionis hujus realitatem subjungimus, quemadmodum jam in aliis casibus a nobis factum fuit.

§. 766.

Si quis benignum aliorum de se suisque judicium sibi repræ- *Realitas*
sentat, gaudio afficitur, seu quod perinde est, ex opinione benigni definitionis
aliorum de nobis nostrisque judicii multoque magis ex ipso judicio gloriæ ad-
voluptate, vel gaudio afficitur. Si quis enim sibi benignum alio-*structa*,
rum de se suisque judicium repræsentat; is vel novit alios judicare, vel existimat alios judicatu-*ros* esse, quod quæ fecit, bene ac recte fecerit, quodque ea bona sint, quæ ipsi sunt (§. 765.). Quamobrem de perfectionis sui ipsius ac operis sui, vel perfectionis aliorum, quam sibi promovisse videtur, conscius est, si illa vera fuerit, si apparens (§. 554. 557.), adeoque voluptate multiplici (§. 511.), vel prorsus gaudio afficitur (§. 614.).

Idem confirmatur a posteriori. Exempla inter eruditos maxime obvia sunt. Ponamus Geometram quendam conscrip-*sisse* Tractatum de novo quodam curvarum genere, hactenus Geometris ignoto, ac novis usum esse artificiiis analyticis in symptomatibus earum investigandis. Quod si jam hoc scriptum suum ad opinionem Geometrarum refert sibi per-

suadet, quod plurimum sint ejus judicio ac ingenio tributuri, opusque suum maximifacuri; gaudio prorsus singulari perfunditur, quo veluti extra se rapi videtur, & nil magis in votis habet, quam ut judicia Geometrarum peritorum actu percipiat. Quodsi contingat Geometram quendam primi ordinis laudare opus ipsius; gaudium ejus multo intensius redditur: quod in causa est ut aliis narret judicia aliorum de suo opere, monstrans literas, in quibus ea ad ipsum perscripta sunt, vel locum librorum, in quibus elogia operis sui leguntur. Enimvero gaudium istiusmodi non tantummodo in Geometra; sed in aliis quoque viris doctis observare licet, sive Theologi fuerint, sive Juri, sive Medici, sive Mathematici, sive Philosophi, sive Literatores, seu quocunque demum nomine veniant. Immo cum necesse non sit, ut, qui benigna aliorum judicia de opere suo sibi promittit, istiusmodi judicia mereatur, vel certam spem foveat, opinione fallaci ad affectuum genesis sufficiente; gaudium eximium in iis promissive observare datur, ubi opera sua, vel inventa, quæ sibi esse opinantur, ad aliorum opinionem referunt. Notus mihi fuit ante annos complures Medicus quidam haud incelebris, qui cum esset principiorum astronomicorum prorsus ignarus, & in elementis Geometriæ adeo hospes, ut tres in triangulo rectilineo angulos duobus rectis æquales esse ignoraret, in elementis Arithmeticæ adeo rudis, ut ne quidem abacum Pythagoricum perspiceret, multo minus multiplicatione ac divisione consueta defungi posset, audacia tamen vix credibili omnem Astronomiam reformare & calculum astronomicum, præsertim eclipsium, facilitare volebat. Nemo non me vel tacente intelligit, quam pueriliter a vero aberrare debuerit, ubi nova sibi invenisse visus est. Hoc tamen non obstante cum inventa sua Cassinianis, Hevelianis, Keplerianis longe præstantiora existimaret orbemque ea visurum in summam admirationem abreptum iri sibi persuaderet, tanto gaudio efferebatur, quanto nunquam elatum vide-

viderim alium. Exempla cumulare licet, si quis vulgus eruditorum adire velit, quod felix est errore suo. Suppeditant quoque exempla artifices opera sua, quibus perficiendis incumbunt, ad aliorum judicia referentes. Præterea attendendum est ad actiones morales; quas qui ad aliorum opinionem referunt, gaudere deprehenderis ubi eas laudari audiunt, vel easdem laudatum iri sibi persuadent.

Gaudium hoc prorsus differt ab eo, in quo acquiescentia in seipso consistit. Ipso sensu interno utrumque a se invicem discernere licet. In eandem inquiremus sollicitus in Psychologia rationali. Ingens autem differentia affectum unum ab altero tanquam duas diversas gaudii species distingui jubet. Utiliter uterque conjungitur: sed de eo dicendum erit in philosophia morali, ubi varios affectuum usus atque abusus exposituri sumus, ut eos in rem nostram vertamus, ab his vero nobis caveamus.

§. 767.

Si quis gloria commovetur, is quæ fecit, vel sibi sunt, ab aliis Quando quis bona existimari opinatur. Gaudium enim percipit ex benigno aliorum de se suisque judicio (§. 765.). Quamobrem cum aliorum de nobis nostrisque, adeoque iis, quæ fecimus, vel quæ nobis sunt, judicium tunc benignum experiamur, si ea, quæ fecimus, vel quæ nobis sunt, ab aliis bona existimantur (§. cit.); quæ gloria commovetur, is ea quæ fecit, vel quæ sibi sunt, ab aliis bona existimari experitur. Enimvero affectus etiam oriuntur si tantummodo nobis sit boni, vel mali opinio, cum sufficiat ejusdem confusa representatio (§. 605.), adeoque gloriæ quoque affectus animum ejus invadere debet, si quæ fecit, vel sibi sunt, ab aliis bona existimari, aut ubi nondum aliis innotuere, bona judicatum iri opinatur.

Propositio hæc convertenda a nobis est in usum definitionis realis. Conversam igitur eidem subijcimus.

§. 768.

Si quis ea, quæ fecit, vel quæ sibi sunt, ab aliis bona Idem ulterius existimari opinatur, gloria commovetur, ubi animum ejus affectus us expenditur.

invadit. Etenim si opinatur, quæ fecit, vel sibi sunt, ab aliis bona existimari; benignum sibi promittit de se suisque judicium aliorum (§. 765.). Enimvero si benignum sibi aliorum de se suisque judicium repræsentat, gaudio afficitur (§. 766.), in casu scilicet affectus orientis, ubi quis bonum existimat aliorum de se suisque benigna esse judicia. Quamobrem cum gaudium istud gloria sit (§. 765.); gloria commovetur, ubi affectus animus ejus invadit.

Non sine ratione prædicato adjecimus restrictionem, propterea quod dantur homines, qui ad aliorum de se suisque judicia parum attendunt, adeoque nec gaudio afficiuntur, ubi benigna sunt. Affectus adeo in istiusmodi subjectis, quorum ad gloriam non dispositus animus est, nullus oritur. In simili autem casu semper tacite supponimus affectum quendam oriri, nobisque tantummodo animus est inquirendi in affectus istius speciem.

§. 769.

Gloria definitio realis.

Gloria est affectus, qui oritur si ea, quæ fecimus, vel nobis sunt, ab aliis bona existimari opinamur.

E. gr. Ponamus Poëtam sibi repræsentare elogia ab aliis in carmen suum conferenda, vel legere in scriptis aliorum encomia, quibus ipsum ob poëma a se conditum ornant; singulari quadam specie gaudii animus ejus commoveri res omnibus explorata est. Hanc vero gaudii speciem gloriam appellari monuimus (§. 765.). Gloria igitur commovetur animus Poëtæ. Dedimus exempla alia definitionem gloriæ nominalem illustraturi, quæ etiam ad definitionem realem illustrandam trahi possunt. Immo definitio realis ex nominali sine ambagibus exsculpi poterat, quod scilicet sit affectus ex opinione benigni aliorum de se suisque judicii ortus, nisi subinde consultius esset ipsum judicium, quale sit, statim exprimi, ut citra ambages procedat applicatio.

§. 770.

Definitiones gloriæ signi communibus & significatui in philosophiam introducto confor-
ptio confor-
mes.

Definitio gloriæ tam realis, quam nominalis notionibus significatui in philosophiam introducto confor-
mes. Negari non potest, gloriam vulgo non pro affectu sumi, sed pro causa affectus. Affectui enim nullum peculiare imponi-

ponitur nomen, propterea quod vulgo gaudium casus presentis non distinguitur a gaudio alio, differentia tantummodo obscure percepta. Vocabuli significatum exponunt *Goclenius* & *Martinus* in Lexicis. Varias ille affert aliorum definitiones, quæ in eo conspirant omnes, quod benignum aliorum de iis, quæ bene ac recte a nobis facta sunt, iudicium sit id, quod gloria appellatur. Hoc vero iudicium, quatenus nobis in mente idem repræsentamus, esse causam affectus, patet (§. 769. *Psychol.* & §. 881, *Ontol.*). *Albertus Magnus* gloriam esse ait claram cum laude notitiam, ejus scilicet, cui gloria tribuitur. Requirit adeo, ut is, cui gloria esse dicitur, aliis sit notus, & quod eundem laudent, quodque hæc laus non sit communis, sed eximii gradus: ideo enim clara appellatur. Jam vero, non male definiente *Goclenio*, laus est significatio expressa boni, quod est in qualibet re, adeoque ab aliis quis laudatur, quatenus recensentur bona, quæ ipsi sunt, ac in primis quæ bene ac recte fecit, consequenter cum laus eximii gradus ad gloriam requiratur, bona, quæ de altero commemorantur, gradus eximii ac facta præclara esse debent. Patet igitur *Albertum Magnum* studiose, quod gloria consistat in iudicio aliorum de bono haud vulgari, quod nobis inest, & de iis, quæ a nobis præclare facta sunt, nimirum ut ea ipsis & perspecta sint, & ab iisdem candide significantur. Ecquis non videt causam affectus, quem gloriam dicimus, ab *Alberto Magno* fuisse gloriam dictam (§. 769.)? *Boëtius* gloriam definit per illustrem & pervulgatam recte factorum & magnorum vel in suos cives, vel in Remp. vel in omne genus hominum meritorum famam. Ad famam denuo requiruntur duo, scilicet recte factorum & magnorum meritorum in alios notitia, atque expressa eorundem significatio in vulgus disseminata, aut minimum inter eos pervulgata, quorum de iis iudicium suspiciendum. Quamobrem & *Boëtius* gloriam denuo reducit ad iudicia aliorum de nobis, quod eximiis bonis ornati simus & præclara fecerimus,

consequenter gloriæ nomen causæ illius affectus tribuit, quæ à nobis gloria appellatur. Omnium vero clarissime *Augustinus* gloriam per affectus nostri causam definit, dum eam esse dicit iudicium hominum bene de hominibus opinantium. *Martinus* vagum vulgo censer vocabuli significatum, adeoque diversos exponit, quos obrinet. Primo loco commemorat actionem celebrantis, quæ gloriæ nomine insignitur; & hunc potiore significatum existimat, dum gloriam per frequentem famam cum laude, seu claram noticiam cum laude explicat. Per laudem idem intelligit commemorationem boni, quod est in aliquo, vel ab aliquo. Atque adeo mens *Martinio* eadem fuit, quæ *Boëtio*. Ostendimus vero *Boëtium* causam affectus, de quo nobis jam sermo est, gloriam appellasse. Ergo patet *Martinio* quoque causam ejusdem affectus gloriæ nomine venire. *Cartesius* in Tract. de Pass. animæ part. 2. art. 66. gloriam in numerum affectuum retulit & dum hanc ejus dedit definitionem realem, quod bonum, quod est, vel quod fuit in nobis, si referatur ad opinionem, quam alii de eo concipere possunt, cum excitet; haud obscure significat ad gloriæ affectum excitandum sufficere repræsentationem iudicii aliorum de eo, quod nobis inest, vel quod fecimus, etsi nunquam ita iudicaturi sint alii, vel aliter jam judicent alii. Atque hæc consentanea sunt definitioni reali, quam dedimus (§. 770.). Quoniam igitur tanto philosopho præeunte gloria in numerum affectuum tanquam singularis eorundem species relata fuit, & ab ejus parte stat veritas, quemadmodum ex anterioribus abunde liquet; veritas non modo eandem in numerum affectuum a nobis referri, verum etiam nomen a *Cartesio* eidem impositum retineri jussit ratio (§. 142. Disc. prælim.).

In lingua vernacula non opus est, ut nomen causæ affectui imponamus; sed peculiare prostat nomen, quod eum a causa distinguit. Etenim cum gloria nobis idem sit quod *Ruhm*, si communi more pro causa affectus sumitur; affectum ipsum *Ruhm*, *Begierde* appellamus, quasi gloriæ cupiditatem. Absit autem ut quis affectum hunc

hunc cum ambitione confundat, quod vitium in excessu esse suo loco in moribus ostendemus, cum affectus, de quo jam loquimur, non semper malus sit, etsi abusu ejusdem ambitio gignatur. Posset is etiam Germanice dici *Ruhm liebe*, quasi amor gloriæ; sed malui tamen vocabulum prius huic posteriori præferre, propterea quod illud rei convenientius est, utpote impetum istum exprimens, quo, qui gloria ducitur, in eundem fertur.

§. 771.

Gloria stimulus est ad præclara præstanda absque ulla spe Glorie lucri. Si quis enim gloria ducitur, is ea, quæ facere debet, ad effectus. aliorum opinionem refert, atque gaudet, quamprimum existimat, alios de iis judicatu- ros, quod præclare facta sint (§. 765.). Quoniam itaque ex eo voluptatem percipit, quod alii præclare a se factum sint agnitori (§. 614.); id quidem tanto melius judicat, quanto major voluptas est quæ inde percipitur (§. 612.), consequenter quod faciendum est ideo appetit (§. 579.). Gloria igitur stimulus est ad præclara agenda. Enimvero quoniam qui gloria ducitur ideo præclare facienda appetit, quod alios agnitu- ros esse confidit, se rem bene ac recte fecisse; per se patet, quod absque spe lucri idem faciat, seu quod idem faciat, etiam si nullum inde lucrum speret.

A posteriori idem luculentis admodum testimoniis confirmari potest. Suppeditant nobis inprimis alia Astronomi, quæ omni exceptione majora esse nemo non agnoscere debet. Quantos, quæso, sumtus Astronomiæ perficiendæ gratia fecit *Joannes Hevelius*? Quantum operæ consumpsit in observationibus cœlestibus venandis, quarum thesaurum nobis inprimis altero Tomo Machinæ cœlestis exhibuit? Cum selenographiam accuratam conficere vellet, ipsemet objecta accurate in charta delineare ac delineata æri incidere didicerat, ne veritatem & accurationem observationum negligentia artificum corrumpere- ret dubiamque harum fidem experiri cogeretur? Ex scriptis vero ejusdem satis superque apparet, ipsum non alia de causa tantopere sollicitum fuisse, ut omnia bene ac recte fierent, quæ

Astronomiæ perficiendæ gratia moliebatur, quam ut Astronomi periti agnoscerent, ipsum omnes Astronomi partes exasse adimplevisse. Nullum vero inde tucrum sperare poterat. Etenim inter modos acquirendi nemo refert sumtus in Astronomiam perficiendam faciendos, quod multis modis aliis utiliter impendere licebat. Non igitur opus est ut prolixè ostendatur, *Hevelium* nulla spe lueri ad Astronomiam excolendam adductum fuisse. *Joannes Keplerus* stupendam industriam collocavit in theoria planetarum indaganda, cum maxima ingenii vileges poli ac veras orbitas planetarum in apricum produceret. Quod vero non alius ipsi stimulus fuerit quam gloria, ex Dedicatione ad *Rudolphum II.* Imperatorem, quam Commentariis de motibus stellæ Martis præmisit, satis superque elucet. Provocare etiam poteram ad Tabularum non modo astronomicarum, verum etiam trigonometricarum, inprimis logarithmicarum conditores, quorum exemplum vel ideo dignum, quod hic commemoretur, quia periti satis superque intelligunt ipsos tot calculi tædia non alio fine devorasse, quam ut bene meriti de genere humano dici possent. Enimvero prostant quoque inter eruditos ceteros exempla longe plurima, quæ veluti sponte sua unicuique sese offerunt, modo levi attentione uti velit. *Ovidius* ipsemet de se fatetur, quod stimulum sibi dederit gloria ad arduum opus perficiendum. Ita enim canit:

Magnum opus aggredior, sed dat mihi gloria vires.

Vires nimirum dat gloria, quatenus gaudio perfusi novo quasi impetu accepto ad perficienda ea ferimur, quorum executio tædiis plena, ut a proposito quasi declinemur. Sed non opus est verbis, ubi rerum testimonia adsunt. Nihil enim præclari unquam in orbe terrarum factum, quod ex gloria tanquam fonte non manaverit. Et ubi accuratius inquisiveris, nonnisi eos, qui gloria ducti fuere, fecisse præclara ac de genere humano bene meruisseprehendes.

Propositio præsens non satis commendari potest, quæ mente continuo volvatur revolvaturque. Utilitatis maximæ est in omni praxi morali & qui gloria uti noverit, haud postremum felicitatis suæ partem eidem tribuit. Recte si eadem utaris, affectui huic socium sese præbet jucundissimus ille, quem acquiescentiam in seipso appellavimus. Cavendus vero est abusus ambitionis fomes, cui poenitentia se comitem præbet cum aliis affectibus molestis. Sed de his differere non est hujus loci. Dabimus suo loco in philosophia morali, quæ conducunt.

§. 772.

Qui gloria ducitur, ei benigna aliorum de se suisque judi- *Quanam*
cia placent. Qui enim gloria ducitur, is gaudio afficitur ex *placeant*
benigno aliorum de se suisque judicio (§. 765.). Quamobrem *ci, qui glo-*
cum ea nobis placeant, ex quibus voluptatem percipimus (§. *ria ducitur.*
542.) ; ex iis vero voluptatem percipiamus, unde gaudio affi-
cimur (§. 614.) : qui gloria ducitur, ei benigna aliorum de se
suisque judicia placent.

Idem a posteriori confirmatur ex iis, quæ ad confirman-
dum gaudium ex repræsentatione benigni aliorum de se suis-
que judicii ortum in medium adduximus (§. 766.). Cur enim
Geometra aliorum de invendis suis judicia benigna aliis com-
memorat ? Non alia sane de causa, quam quod inde volupta-
tem percipiat, consequenter quod judicia ista eidem placeant.
Enimvero a posteriori propositionis præsentis veritas adeo ma-
nifesta est, ut nemo ideo eam in dubium revocaverit.

§. 773.

Si cui benigna aliorum & quidem perito peritorum judicia Signum
de se suisque placent ; is gloria ducitur, seu animum habet ad gloria.
gloriam dispositum. Etenim si cui judicia aliorum de se suis-
que placent, is ex iis voluptatem percipit (§. 542.), adeoque
pro re nata prorsus gaudio afficitur (§. 614.). Enimvero qui
ex aliorum de se suisque benignis judiciis voluptatem percipit,
vel gaudio prorsus afficitur, is gloria ducitur (§. 765.), seu
animum ad gloriam dispositum habet. Quamobrem cui be-

nigna aliorum de se suisque judicia placent, is gloria ducitur. Quoniam vero periti satis superque perspectum habent, non nisi peritos de se suisque judicia veritati consentanea ferre posse; ideo quoque nonnisi ipsorum judicia ipsis placent, consequenter si peritis peritorum judicia benigna de se suisque placent, eosdem gloria duci inde manifestum est.

Ad confirmandam propositionem præsentem a posteriori eadem faciunt, quibus præcedens confirmatur. Ipsa autem experientia loquitur peritis non placere nisi peritorum judicia & quo quem magis norunt rei, de qua judicium ferri debet, peritum, eo magis judicium placere; at imperitorum judicia licet benignissima non commovere peritos. Ita Geometrarum primi ordinis insuper habent judicia eorum, qui cum ultra elementa non sapiant, de inventis ipsorum judicium ferre nequeunt: ast iidem delectantur judiciis aliorum sibi similium. Philosophum non movent judicia aliorum, qui philosophi videri volunt, non sunt; ast eorum demum judicia placent, quibus de rebus philosophicis judicare datum est. Ut ad exempla specialia descendamus, *Copernicum* testem appellamus, qui Astronomorum peritorum judiciis contentus ceterorum Astronomiarum imperitorum judicia contemnebat, quemadmodum ex Dedicatione operis de Revolutionibus orbium cœlestium constat. Hinc videas peritos non captare auram vulgi, quemadmodum vulgus eruditorum facit, nec magni facere elogia, quæ in verbis elegantiam habent, nihil autem ejus significant, quod laudem constituit; sed commemorationem meritorum iis placere, quæ laudem absolvit. Atque ideo porro moris est, ut periti alios laudaturi in factis recensendis ac describendis toti sint, a verbis autem pomposis, quæ vulgi pabulum sunt, prorsus abstinent. Atque ita abunde patet, si de peritis judicandum, utrum ad gloriam dispositum habeant animum, nec ne; quomodo ad peritorum judicia sese habeant respiciendum esse.

Habe-

Habemus hic signum non modo gloriæ, verum etiam peritos ab imperitis distingvendi. Quod utinam notarent, qui vanæ gloriæ studiosi sunt, ut suæ inde imperitiæ convincerentur, quam alias ob imperitiā agnoscere minime valent. Sed plura eam in rem dicemus in moralibus. Imperitus ille astrophilus, de quo supra diximus (§. 766.), mirifice delectabatur judiciis hominum astronomiæ omnis expertium, veluti si inventa, quæ jactabat & de quibus ipsi nihil intelligebant, luce publica digna pronunciabant fidem habentes magnificis laudibus, quibus inventor inventa sua ipsemet extollebat.

§. 774.

Pudor est tristitia, quæ percipitur ex sinistro aliorum de *Pudoris de-*
nobis nostrisque judicio. Si tristitia nascens fuerit, ejus loco *finis*.
tædium percipitur, in minori gradu quam qui ad prædomini-
um sufficit, in quo tristitia consistit (§. 619.). Dicitur autem
judicium aliorum de nobis aliisque *sinistrum*, si ea, quæ feci-
mus, ea minus recte a nobis facta esse, quæque nobis sunt, ea
mala esse judicant.

Daristiusmodi tristitiā ac tædium per propositionem subse-
quentem patet, quam ideo ad evincendam hujus definitionis reali-
tatem subjungimus, quemadmodum in superioribus factum. Quem-
admodum vero in affectu gloriæ supponitur, quod affectui indulgens
judicium aliorum benignum verum esse reputet, cum inde sit, quod
peritus imperitorum judicia non curet (§. 773.); ita quoque in af-
fectu pudoris supponi debet, eum, quem pudet, judicium aliorum
de se suisque *sinistrum* pro vero habere debere. Id vero ex subse-
quente propositione patebit.

§. 775.

Si quis sinistrum aliorum de se suisque judicium sibi repræ- *Realitas*
sentat, idemque pro vero habet; tædio, vel tristitia afficitur, definitionis
seu quod perinde est, ex opinione sinistri aliorum de nobis no- *pudoris ad-*
strisque judicii, multoque magis ex ipso judicio, quod verum *structa.*
esse, vel etiam pro vero ab aliis haberi agnoscimus, tristitia,
vel tædio afficimur. Etenim si quis *sinistrum* aliorum de se
suisque judicium sibi repræsentat, idemque pro vero habet, is
sibi conscius est alios judicare, vel judicaturos esse, quod ea,
Ee ee 3 quæ

quæ fecit, male ac minus recte a se facta sint, vel quod ea, quæ sibi sunt, mala sint (§. 774.), immo ipsemet iudicat ea, quæ fecit, male ac minus recte a se facta esse, vel ea, quæ sibi sunt, mala esse (§. 505. *Log.*). Imperfectionis igitur lux sibi conscius est, quatenus mala a se patrata, vel patranda, vel mala, quæ ipsi sunt, intuetur (§. 565.): Imperfectionis status sui sibi conscius est, quatenus aliorum sinistra judicia intuetur (§. 567.). Ex utraque igitur causa tædio afficitur (§. 518.), vel prorsus tristitia animus corripitur (§. 619.).

Idem confirmatur a posteriori. Exempla inter eruditos obvia sunt. Si quis eruditus in libro, quem publici juris fecit, errores a se admissos animadvertit sibi que repræsentat judicia aliorum de se suoque libro sinistra; nemo non novit animum ejus tædio, immo tristitia perturbari. Atque tum pudet eum erroris a se admissi. Enimvero cum simul ipsum pœniteat, quod librum ediderit, antequam curis posterioribus eundem subicere potuerit; uterque autem affectus tristitiæ quædam species sit (§. 755. 774.); attentione opusest, ut, quæ ad pœnitentiam spectant, separentur ab iis, quæ sunt pudoris. In se unusquisque haud difficulter distingvit ea, quæ sunt pœnitentiæ, ab iis quæ sunt pudoris, neque enim alia re opus est, quam ut attendamus, utrum nobis jam conscius simus nostri, an alieni de factis nostris iudicii. In casu enim primo pœnitentiæ (§. 755.); in posteriori pudori locus est (§. 774.). Sunt vero etiam signa externa, per quæ pœnitentiam a pudore distingvere licet. Pudorem enim nemo non agnoscit ex rubore faciei, aversione vultus ac demissione oculorum: pœnitentiam vero ex planctu de actionibus commissis, vel omissionis. Uterque autem affectus verbis non simularis sese prodit. Sed hæc satis obvia sunt, ut ad specialia descendere non sit opus.

Tristitiam, quæ pudorem absolvit, prorsus differre ab ea, quæ pœnitentiam constituit, ipso sensu interno percipimus. Nostrum vero
demum

demum erit in istam differentiam inquirere in Psychologia rationali. Multum quoque lucem differentia huic affundet philosophia moralis.

§. 776.

Si quem pudet eorum, quæ fecit, vel quæ sibi sunt, is ea ab aliis ignorari mallet. Si quem enim pudet eorum, quæ fecit, vel quæ sibi sunt, is ex eo tadium percipit, vel tristitia afficitur, quod sibi persuadet, alios de se suisque sinistre judicatu-^{Pudoris affectus.}ros (§. 774.). Quoniam igitur sinistra aliorum de se suisque judicia tanto majus malum videntur, quanto majus tadium est quod inde percipitur (§. 613.); illa quoque judicia averfatur (§. 590.), consequenter mallet ea impossibilia esse. Quare cum alii de nobis nostrisque judicare nequeant, si quæ fecimus, quæque nobis sunt, ignorant; is utique, quem pudet eorum, quæ fecit, vel quæ sibi sunt, ab aliis ignorari mallet.

Patet idem clarissime a posteriori. Etenim si quis in dignitate constitutus parentes habet vilioris conditionis ac pauperes, eumque eorum pudet, quod sibi metuit a contemptu aliorum ob vilem conditionem ac egestatem parentum; is de parentibus suis nunquam loquitur, immo sollicitè cavet, ne quis resciat quinam sint, vel fuerint parentes sui, manifesto indicio malle sese ut alii ignorent, quinam parentes sui sint, vel fuerint. Similiter si quis fecit ea, quorum ipsum pudet; is ea, quæ fecit, studiose celare solet, manifesto utique indicio, malle ipsum ab aliis ignorari quæ fecit. Immo si noverit, constare aliis de facto suo, in conspectum eorum vix prodire audet, nec ferre potest, ut quis ipsum intueatur, immo nec ipse quenquam intueri valet: id quod denuo manifesto indicio est, malle sese ignorari ab aliis, quæ fecit, aut id in votis habere, ut ne alii de ipso cogitent. Nimirum multa fluunt ex propositione præsentè, quæ sensui maxime obvia sunt, adeoque indicia præbent ejus, quod in propositione præsentè affirmatur,

Propositio præsens plurimum utilitatis nobis afferet in morali-
bus, ubi eadem tanquam principio in casibus bene multis utemur.

§. 777.

*Quales sint,
qui ad pudorem
proni.*

Quid ad pudorem pronus est, is malum existimat alios nosse, quæ a se male, vel minus recte facta sunt, aut quæ sibi mala sunt. Si quis enim ad pudorem pronus est, is ex eo tadium percipit, immo tristitia afficitur, quod alii norint ea, quæ a se male, vel minus recte facta sunt, aut quæ sibi mala adsunt (§. 774.). Quamobrem cum id malum tanto majus judicemus, quo majus tadium est quod inde percipitur (§. 613.); qui ad pudorem pronus est, is malum existimare debet alios nosse, quæ a se male, vel minus recte facta sunt, & quæ sibi mala adsunt.

A posteriori propositio confirmatur, quod videamus eos, quos pudore corripere observamus, studiosè celare, quæ a se male facta sunt, & unde famam detrimentum capere posse existimant. Jam vero ea averſamur, quæ nostra opinione mala sunt (§. 581.). Satis igitur certo inde colligitur, quod ad pudorem pronus malum reputet ea, quæ in se reprehensione, vel censura aliorum digna sunt, aliis innotescere.

Quoniam dantur gradus pudoris, ita ut unum magis pudeat ejusdem, quam alterum, etsi idem sit utriusque de eodem judicium; unus quoque magis malum judicat, quam alter, si mala de se aliis innotescant. Quamobrem ubi propositionem a posteriori confirmare volueris, ad ea inprimis exempla respiciendum est, quæ pudorem gradus excelsi loquuntur. Ceterum id, unde propositio a posteriori confirmatur, per modum corollarii fluit ex propositione præſente, quemadmodum ex sequente articulo apparet.

§. 778.

*Effectus pu-
doris.*

Quoniam is, qui ad pudorem pronus est, malum existimat alios nosse, quæ a se male, vel minus recte facta sunt, aut quæ sibi mala sunt (§. 777.); quamprimum vero aliquid malum judicamus, idem averſamur (§. 590.), consequenter ne fiat omni malo impedire studeamus; *Qui ad pudorem pronus est,*

est, studiose caver, ne quæ mala sunt opinione sua, vel communi hominum opinione, aliis de se innotescant.

§. 779.

Pudor est affectus, qui oritur, si mala, quæ fecimus, vel nobis sunt, aliis innotescere ac ab aliis agnosci nobis representamus, vel, ex opinione censuræ aliorum, quam ob malum a nobis perpetratum, vel quod nobis est, incurremus. *Definitio pudoris realis.*

E. gr. Ponamus Poëtam admisisse errorem in quantitate syll. bæ cujusdam. Quod si eodem animadverso cogitet, quomodo alii eundem in detrimentum laudis ad minuendam famam ipsius sint interpretaturi; pudore suffunditur. Ponamus aliquem, cui cum homine consuetudo intercedit, qui morbo gallico laborat, contagio affici. Quod si jam cogitet, quam sinistra futura sint aliorum de se judicia, quam hæc futura sint famæ suæ nocua, ubi præsentem intuetur, qui morbum sibi infestum noverit, pudore suffunditur. In hoc vero casu distingvenda est tristitia simplex ex fortunæ adversæ opinione orta, quæ nos immeritos in censuram aliorum adduxit, a tristitiæ specie, quæ ad pudorem spectat.

§. 780.

Definitio pudoris tam realis, quam nominalis usui communi loquendi ac recepto in philosophia significatui conformis. *Definitio pudoris num usui loquendi conformis.* Pudorem nemo non colligit ex rubore, quo suffunditur subito facies, ubi v. g. narrantur male a nobis facta, quemadmodum jam supra notatum est (§. 775.). Quoniam rubor iste motus extraordinarii sanguinis indicium est; pudorem ab omnibus in numerum affectuum referri palam est (§. 611.). Porro nemo non fatetur, quod nos pudeat male factorum, quatenus nobis conscii sumus nos ob ea aliorum censuram incurrere. Quamobrem abunde patet ex communi usu loquendi pudorem designare affectum, qui in nobis oritur, si quæ fecimus talia sunt, ut ab aliis recte improbentur nobismet ipsis iudiciis, vel si aliorum iudicium famæ nostræ adversum fore certo persuasi sumus, quod ea, quæ fecimus, communi omnium opinione mala reputentur. Vocabulum adeo pudoris vulgo sumitur

mitur in eodem prorsus significato, quem nos eidem tribuimus (§. 779.). *Aristoteles* pudorem definit per timorem justæ reprehensionis. Reprehensio consistit in iudicio aliorum de nobis nostrisque factis sinistro, quod scilicet malum reputetur, nos talia fecisse, vel talia nobis adesse. Reprehensionem justam censemus, si idem sit nostrum iudicium, ut ab altero nobis iudicio suo injuriam fieri minime arbitremur. Timemus istam reprehensionem, quando suspicamur fore ut aliis innotescant, quæ reprehensione digna commissimus, vel ut alii, ubi jam innotuere, in malam partem eadem vertant. Pudor igitur oritur juxta *Aristotelem* ex eo, quod existimemus alios nos reprehensuros ob ea, quæ ipsimet reprehensione digna iudicamus, seu, quod perinde est, alios iudicaturos malum esse, quod hoc, vel istud fecerimus, quod hoc, vel istud nobis sit, vel acciderit, nostroque assensu ipsorum iudicium confirmare teneamur. Equis vero non videt hæc cum definitione nostra reali optime consentire (§. 779.)? Non est quod dicas *Aristotelem* pudorem definire per timorem, cum nos eundem definiverimus per tristitiam. *Aristoteles* enim non explicat, in quonam pudor consistat; sed quomodo oriatur, seu qua de causa oriatur. Sane si pudor in timore consisteret, nunquam nos puderet mali a nobis perpetrati, ubi censuram alterius actu incurrimus, seu nos ab eodem ideo reprehendi audimus. Nemo autem est, qui nesciat pudori utique etiam in hoc casu esse locum. Præterea ipse quoque metus tristitiæ quædam species est, quemadmodum deinceps ostendemus, ut adeo, qui pudorem metus quandam speciem facit, non neget eundem esse speciem quandam tristitiæ. *Cartesius* in Tract. de Passionibus animæ part. 2. artic. 66. hanc tradit pudoris definitionem realem, quod malum, quod est, vel quod fuit in nobis, si referatur ad opinionem, quam alii de eo concipere possent, pudorem excitet. Eam non differre a definitione reali, quam dedimus (§. 779.), ex utriusque collatione patet. Non igitur immu-

immutavimus vocabuli receptum in philosophia significatum; sed eum retinuimus, qui & veteri, & recentiori philosophiæ prorsus conformis.

Pudor res notissima est, & in eorum affectuum numero, quos facillime agnoscunt & inter se distinguunt vulgo omnes. Quamobrem facillime eorum, quæ de hoc affectu dicuntur, experimentum capi potest, modo attentione uti didiceris, ut advertas quæ vel in sensum externum incurrunt, vel in anima appericipiuntur, atque eos a se invicem distinguas casus, in quibus pudor solus invadit animum & in quibus alios socios habet.

§. 781.

Qui ad gloriam pronus est, idem ad pudorem pronus est. *Gloria & pudoris cognatio.*
Etenim qui ad gloriam pronus est, is voluptatem, vel gaudium percipit ex eo, quod alii bona esse judicant quæ ipse fecit quæque ipsi sunt, & quæ ipsemet talia agnoscit (§. 765.), consequenter tanto magis bonum existimat, quod alii ita judicent, quanto major voluptas est, quæ inde percipitur (§. 612.). Quoniam igitur malum judicare debet, quod alii ab ipso facta mala judicent ac quæ ipsemet mala esse agnoscit, cum malum bono contrarium sit (§. 554. 565.); tædium, vel tristitiam ex eo percipere debet, quod, quæ a se male facta agnoscit, eadem improbent alii (§. 613.). Ad pudorem adeo pronus (§. 774.).

A posteriori quoque idem satis superque patet. Equis enim ignorat neminem magis pudore suffundi quam eos, qui gloriæ dulcedine capiuntur? Hinc videas eruditos, qui ad nominis gloriam contendunt, pudere erroris. Ac ideo invaluit mos, ut vulgus eruditorum, quod evidentia sensu destitutum, errores suos palliare ac defendere soleat, ne a sui similibus errasse videatur. Et ex adverso periti errores a se admissos emendant ac speciminibus præclaris edendis operam navant, ut ne alii periti errorem in vitium vertant.

Cognatio affectuum, qua palam fit, quinam alii ex aliis nascuntur, & quinam simul in idem subiectum cadere possunt, maximæ

utilitatis est in moralibus, tum in conjectandis hominum moribus, tum in difficili, sed perutili argumento de appetitu sensitivo in concordiam cum rationali reducendo.

§. 782.

*Signum
gloria.*

Qui ad pudorem pronus est, ad gloriam quoque pronus est. Qui enim ad pudorem pronus est, is ex eo tristitia afficitur, vel tedium percipit, quod malum judicet, alios nosse, quæ a se male, vel minus recte facta sunt, & quod eadem mala esse judicent (§. 774. 777.). Quoniam igitur mala judicat, quæ famæ suæ adversa, adeoque statum externum imperfectiorem reddunt (§. 565.); ex adverso bonum judicabit, quæ famæ consulunt, adeoque statum ejus externum perficiunt (§. 554.). Quoniam igitur ad famam conducit, si quæ a nobis bene ac recte facta sunt, ab aliis agnoscantur & approbentur; hoc aliorum de se factisque suis judicium bonum utique judicare, consequenter ex eo voluptatem tanto majorem percipere, adeoque & gaudio affici (§. 614.) debet, quanto magis bonum judicat aliorum istud de se judicium (§. 612.). Ad gloriam adeo pronus est (§. 769.).

A posteriori confirmatur propositionis præsentis veritas, quatenus vulgo pudor boni animi indicium præbere existimatur, nimirum quod famæ ac existimationis suæ rationem habet, quem male ac minus recte factorum pudet, immo quia pudore suffunditur, ubi aliis persuasum est, quasi fecisset quæ famam labefactant. Equis vero non videt, neminem non agnoscere pudorem esse signum gloriæ (§. 769.)? Propositio itaque præfens adeo clara est, si experientiam consulis, ut inter notiones communes referri possit.

Probe autem notandum est, pudorem, quatenus affectus est, non esse confundendum cum abstinencia ab impudentia, quæ in numero vitiorum est, & de qua in moralibus agendum.

§. 783.

*Pœnitentia
pudoris eo-
mes.*

Si quem pudet eorum, quæ fecit, eum eorundem quoque pœniter. Si quem enim pudet eorum, quæ fecit, is sibi re-

pra-

præsentat finistrum aliorum de factis suis iudicium, idemque pro vero habet (§. 774. 775.), consequenter malum a se factum sibi repræsentat. Quoniam igitur ex iis, quæ fecit, tedium percipit, vel tristitia afficitur (§. 756.); eorum, quæ fecit, ipsum pœnitet (§. 755.).

Pœnitentiam ex pudore nasci aut, si mavis, huius comitem esse, velexinde a posteriori patet, quod, quos pudet eorum, quæ fecerunt, ingeminare audias: utinam hæc non fecissem! Immo non minus liquet ex eo, quod iis, quos pœnitet eorum, quæ fecere, ultro confiteantur se quod hæc fecerint non audere in conspectum aliorum prodire.

Propositio præsens non potest converti, neque enim in omni casu, quo quem eorum, quæ fecit, pœnitet, pudori locus est: etenim si quem pœnitet, quod patronum offenderit, ob damnum, quod incurrit, non ideo pudore suffunditur.

§. 784.

Amor benefactoris ob beneficia dicitur *Gratitudo*, aut, si mavis, *Animus gratus*. *Grati animi definitio.*

Gratitudo etiam in virtutum numero est, quatenus ad habitus morales refertur. Sed hoc respectu ad philosophiam moralem pertinet. Hic eam non consideramus nisi quatenus affectus est, amoris quædam species, quod amor singulari quadam ratione modificetur: id quod in se unusquisque experitur, qui affectus huius singulari dulcedine capitur.

§. 785.

Quoniam qui alterum amat, ei animus dispositus est ad voluptatem ex ejus felicitate percipiendum (§. 633.) & ubi felicitatem ejus cognoscit, ex ea actu voluptatem percipit (§. 634.); *Qui gratum animum habet, ex felicitate benefactoris voluptatem percipit, atque animum ad eam inde percipiendam semper dispositum habet.* *In quonam ea consistat.*

Ponamus Mevium mutuo accepisse a Titio pecuniam, ut sumtus necessarios facere potuerit, quos nuptiarum causa postulat. Ubi is habuerit gratum in Titium animum, insigni voluptate perfundetur, quamprimum audiverit, ipsum evectum esse ad dignita-

tem in civitate eminentem. Atque hinc corollarium illustratur & confirmatur.

§. 786.

*Effectus
animi
grati.*

Qui gratum habet animum, is ex voluptate benefactoris voluptatem, ex tædio ejus tædium percipit, ac gaudet ideo, quia benefactor gaudet; contristatur ideo, quod benefactor tristis est. Qui enim gratum habet animum, is benefactorem amat (§. 784.). Quoniam igitur qui alterum amat, ex ejus voluptate voluptatem percipit, ac ideo gaudet, quod alter gaudet (§. 640.); ex ejusdem tædio vero ipsemet tædium percipit, ac ideo contristatur, quod is tristis est (§. 642.); qui gratum habet animum, ex voluptate benefactoris voluptatem, ex tædio ejus tædium percipit, ac ideo gaudet, quod benefactor gaudet, & ideo contristatur, quod is tristis est.

A posteriori idem colligitur ex eo, quod audientes eum, a quo beneficiis affecti sunt, cum voluptate vitam transigere, vel eidem materiam gaudendi esse, voluptate perfusi gaudiove elati, non modo verbis significant, quam gratum sibi sit talia audire, verum simul rationem hanc addant, quod multa ab eo in se profecta sint beneficia, vel factum quoddam singulare commemorantes, quod maximi beneficii loco reponunt. Similiter in casu opposito quando sinistra fata ejus narrantur, a quo beneficia quis accepit, haud raro audies tristem in hæc erumpere verba: doleo vicem viri optimi, meliore forte digni, multa enim in me beneficia contulit, vel id mei gratia fecit, cujus tenacem ad cineres usque memoriam servabo. Equis vero est, qui in utroque casu non agnoscat animum gratum? Grati adeo animi esse ipso facto constat, ex voluptate benefactoris voluptatem, ex tædio ejus tædium percipi ab eo, qui animum gratum habet.

Patent hæc nuda applicatione eorum, quæ de amore in genere demonstrata sunt, ut adeo nihil difficultatis habeant, ubi superiora animo comprehenderis.

§. 787.

Qui gratum habet animum, is voluptatem benefactori creare, Effectus tedium vero ab eodem avertere studet. Qui enim animum gratum *alius* habet, benefactorem amat (§. 784.). Enimvero qui alterum amat, is voluptatem eidem creare, tedium vero ab eo avertere studet (§. 652.). Ergo qui gratum habet animum, is voluptatem benefactori creare, tedium vero ab eodem avertere studet.

A posteriori propositionis veritas satis superque elucet ex casibus obviis. Ponamus enim Titium ob beneficia a benefactore in se collata eidem quid donaturum affirmare, sed id non alio fine facere, quam quod noverit, ipsum inde voluptatem percepturum, vel quod animi grati indicium sit, vel quod res, quæ donatur, talis sit, ut placeat alteri, et si pretii levis æstimetur. Neque enim res solo pretio æstimantur communi, sed affectionis pretium, quod hic considerandum venit, alias prorsus rationes, quam quæ a lucro ortum trahunt, agnoscit. Similiter in casu adverso audies, Mevium hoc vel istud facere nolle, quod Titio displiceat. Quod si Sempronius exceperit, parum referre utrum ei placeat, an vero displiceat; Mevium hanc rationem reddere percipies, se facere nolle, quæ Titio sint tedium, propterea quod hæc, vel ista beneficia ab eo acceperit.

Et si propositiones, cum quibus jam nobis negotium est, ex superioribus facillime colligantur, non tamen ideo prætermittendæ sunt, cum iisdem in hoc casu speciali opus habituri simus, quando in moralibus de animo grato & ingrato acturi sumus, quatenus illa in virtutum numero est. Ecquis vero methodi gnarus ignorat demonstrationes fieri prolixiores, si principiis remotioribus utamur, quam ubi propiora adsunt. Sunt autem propiora, quæ ad casus speciales pertinent; remotiora, quæ generalia sunt. Ad demonstrationes igitur contrahendas propiora non sunt negligenda.

§. 788.

Si beneficia qua talia nobis placent, aut, si mavis, studi- *Animi gra-*
um ti causa.

um benefaciendi in altero nobis placet, vel saltem actus, quem nos experti sumus; animus gratus efficitur. Observamus enim in benefactore, quod nobis placet per hypoth. adeoque eum amamus (§. 645.), consequenter animus efficitur gratus (§. 784.).

A posteriori manifesta est propositionis præsentis veritas. Etenim nemo non novit, non minus ad impediendum, quo minus quis offendant benefactorem, vel faciat quæ eidem displicent; quam ad impellendum beneficiarium, ut faciat, quæ benefactori placent, tanquam motivis vulgo uti omnes beneficiis acceptis. Quoniam igitur a posteriori certum atque exploratum est, repræsentatione beneficiorum excitari amorem benefactoris; eadem quoque animum gratum effici experientia magistra non minus liquet.

Notandum probe est, beneficia nobis placere debere qua talia, seu placere nobis debere, quod alter nobis benefecerit. E. gr. Ponamus Mevium tibi donasse anulum pretiosum. Placere tibi potest annulus, ut eundem ames: ast non ideo animum gratum exhibebis Mevio. Enimvero si consideras, te Mevio acceptum referre debere, quod anulum adeo pretiosum possideas, & eum esse causam voluptatis, quam inde percipis, atque adeo tibi placet actus donantis; tum demum tibi placet annulus tanquam beneficium a Mevio acceptum. Et in hoc casu amor benefactoris oritur, consequenter animus gratus.

§. 789.

Gratitudinis definitio.

Animus gratus, seu *Gratitudo* est affectus, qui oritur, si beneficium ab altero in nos collatum, quatenus id alter in nos contulit, placet.

E. gr. Si Mevii commendatione factum est, ut Titius ad munus aliquod fuerit promotus; Titio autem placet, quod id fecerit Mevius: beneficium a Mevio in ipsum collatum eidem ideo placet, quatenus ille in hunc idem contulit. Qui tunc oritur affectus, is est quem gratitudinem appellamus. Nimirum quando nobis alterum repræsentamus tanquam benefactorem, eundem consideramus tanquam causam boni nobis præsentis. Similiter si quid nobis repræsentamus tanquam beneficium ab altero in nos collatum; idem consideramus tanquam bonum, quod cur nobis præsens sit, in causa est alter.

§. 790.

Definitio gratitudinis nominalis & realis est communi usui loquendi & recepto significatui conformis. Quid sit gratitudo explicaturus *Donatus* : Non continuo, inquit, qui memor est, etiam gratus est. Memorem enim est, qui apud se meminit : gratus, qui meruit hoc nomine vocari, dum vicem reddit. Unde recte concludit *Martinius* in *Lexico*, gratum esse eum, qui grates persolvere studet. Grates persolvimus, dum quæ bona sunt alteri pro virili promovemus. Duo igitur interprete *Donato* ex communi loquendi usu ad gratitudinem requiruntur, memoria scilicet benefactorum & studium benefaciendi ac inferviendi alteri ex ea ortum, cum secus memoria beneficiorum nulli esset usui, nec vicem redderemus. Reddimus enim vicem, si paria facimus alteri, quæ fecit nobis. Enimvero qui quæ alteri placent facit, aut qui facit quæ placere alteri existimat; is facit ea, quæ alteri voluptatem creare opinatur (§. 542.), aut, si in potestate sua id positum esse non deprehendit, saltem ea facere studet. Eum igitur amat (§. 652.). Patet adeo ex communi usu loquendi gratitudinem, quatenus sumitur pro virtute, supponere amorem, nec actus externos, quibus benefactori vicem rependimus, referri ad animum gratum, nisi ex amore procedant. Quamobrem si affectum quandam non repugnante communi loquendi usu gratitudinis nomine insignire volueris; non alii quam amoris benefactoris ob beneficia in nos collata nomen istud tribuere poteris. Quoniam itaque nos gratitudinem definivimus per amorem benefactoris ob beneficia (§. 784); vocabulo tribuimus significatum a communi loquendi usu minime abhorrentem. Vulgo affectus a virtutibus agnatis non distinguuntur, propterea quod ea, quæ ex confusis notionibus oriuntur, non distinguuntur ab iis, quæ ex distinctis ortum trahunt. Affectus ex confusis ideis oriuntur (§. 605.): virtutes ex distinctis originem suam derivant. Illi his conformes sunt, quatenus appetitus sensitivus ad consensum cum rationali reducitur: extra hunc

(*Wolffii Psychologia.*)

casum affectus facile vitii quidpiam habent admixtum. Non igitur mirum, quod in philosophia subinde idem sit affectus & virtutis cujusdam nomen. *Cartesius*, qui modum ex distinctis notionibus philosophandi introduxit, affectus quoque ab habitibus moralibus discrevit, atque adeo gratitudinem in affectuum numerum retulit. Dedit autem definitionem ejus realem in tractatu de Pass. animæ part. 2. art. 64. ubi docet animum gratum effici a bono, quod nobis præstitum fuit ab aliis. Bonum, quod nobis præstat, ab aliis, est beneficium : Qui idem nobis præstat, benefactor. Est igitur juxta *Cartesium* gratitudo affectus, qui oritur, quando nobis repræsentamus beneficia ab altero in nos collata, ita quidem ut ea beneficia esse agnoscamus, hoc est, ut consideremus quidpiam, quod nobis præsens est, tanquam bonum & alterum consideremus tanquam causam boni nobis præsentis. Quoniam ex rebus voluptatem percipimus, quatenus eas consideramus tanquam bonas (§. 612.); affectus ille oritur *Cartesio* non invito ex repræsentatione eorum, quæ nobis voluptatem creant, consequenter cum alterum consideremus tanquam causam hujus voluptatis, ex eo, quod alter nobis voluptatem creaverit, adeoque quod beneficia ab altero in nos collata nobis placeant, quatenus alter ea in nos contulit. Definitio igitur *Cartesii* consentit cum nostra reali, si singula rite excutere noveris (§. 789.).

Quæ de confusione affectuum cum habitibus moralibus in unum incidenter dicta sunt, probe notanda veniunt, cum magnum momentum habeant in moralibus. In praxi enim morali maxime danda opera est, ut affectum per habitum moralem intra legitimos terminos coërceamus, ne eodem extra eos abrepti faciamus, quæ vitii sunt, cum nos ex virtute agere existimamus. Hoc enim pacto peritineas efficiuntur in malo perpetrando, qui virtutis amore non desituuntur. Sed ea suo loco clarius patebunt.

§. 791.

Definitio
nominalis.

Favor est amor alterius ob bonum, quod ipsi tanquam singulare consideramus, in primis ob mores ac habitus animæ nobis acceptos.

E. gr.

E. gr. Ponamus Titium in Analyſi Mathematicorum recentiore probe verſatum eſſe. Ponamus porro Mevium hoc ſtudiorum genus magni facere: erit ipſi profeſtus Titii in eodem admodum acceptus eumque amore complectetur, qui per repræſentationem ſtudii, quod in Analyſi collocavit, tanquam boni ſingulari modo modificatus favor dicitur. Similiter favemus Sempronio ob inſerviendi promptitudinem, quam in eo obſervamus, licet nobis nullum unquam officium præſtiterit, nec uilum cum eo nobis ſit negotium.

§. 792.

Oritur *Favor* ex repræſentatione eorum, unde mores ac *Ejurdem definitio realis.* habitus, qui nobis accepti ſunt, intelliguntur, vel ejus, quod nobis in altero placet, tanquam ſingularis, conſequenter ex repræſentatione boni ab altero præſtiti, vel fieri ſoliti citra relationem ad nos.

E. gr. Si quis famulo utitur, qui mandata prompte exequitur, inde promptitudinem faciendi, quæ ab altero fieri novit, colligit. Eum igitur ſi conſiderat citra relationem ad ſe, quatenus nimirum jam non attendit, quod ea præciſe prompte exequatur, quæ a ſe jubentur; favor oritur, amoris quædam ſpecies ſingularis.

§. 793.

Cui favemus, eum aliis, quos amamus, in promovenda felicitate præferimus. Etenim ſi cui favemus, eum amamus *Effectus favoris.* ob mores, vel habitus animi acceptos, vel bonum quodcunque, quod tanquam alteri ſingulare nobis repræſentamus (§. 791.). Quoniam igitur in eo, cui favemus, quid adeſt, cur eum præ cæteris amemus (§. 649.); ad voluptatem quoque eidem creandam (§. 650.), conſequenter ad felicitatem ejus promovendam proniores eſſe debemus (§. 638.), quam ad promovendam felicitatem aliorum, quos amamus. Eum igitur, cui favemus, in promovenda felicitate aliis, quos amamus, præferimus.

Conſtat a poſteriori, quod eos, quibus favemus, ceteris præferamus, ubi eorum commoda, vel utilitatem promovere valemus. Ac nemo non favorem inde colligit, ſi cujus felicitas nobis multo magis cordi fuerit, quam alius.

Hæc prælatio favorem inprimis distinguit ab amore simplici, atque anima quasi favoris est. Dantur equidem gradus favoris, ob quos plures simul aliis quos simpliciter amamus præferimus, sed eorum denuo unum alteri præferimus. Tum vero ei, quem majore favore complectimur, singulariter favere dicimur. Nulla igitur hinc contra notionem favoris objectio peti potest.

§. 794.

*Definitio
favoris
num usui
loquendi
conformis.*

Definitio favoris realis & nominalis a communi usu loquendi ac recepto significato non abhorret. Si quem videmus omnino conatu id agere ut alterius felicitatem promoveat, ita ut non sit alius, cui æque facilem se præbeat in felicitate ejus augenda; omnes omnino affirmamus, quod is eidem faveat. Nemo vero etiam est, qui non inde colligat, quod eundem amet. Ex communi itaque usu loquendi favor denotat amorem alterius, quo ipsi tribuitur prærogativa quædam præ ceteris, quos amamus. Definitio igitur nostra favoris a communi usu loquendi minime abhorret. Sive enim favorem dicas amorem, qui alteri tribuit jus prælationis in promovenda felicitate ejus, sive nobiscum eum definias per amorem ob bonum alterius, quod nobis tanquam singulare repræsentamus (§ 791.); utrumque idem est, cum ex nostra definitione sequatur, quod eum, cui favemus, in promovenda felicitate alteri præferamus (§. 793.). *Scaliger* favere idem esse ait ac benevolentiam ostendere. Ostendimus autem benevolentiam, quando verbis factisque significamus nos velle ut alteri bene sit. Equidem jus illud prælationis, quod ei tribuitur, cui favemus, *Scaliger* non exprimere videtur. Quodsi tamen consideremus, faventem alteri id agere ut alteri ostendat verbis & factis, quam velit felicitatem ejus promoveri; constans quædam & perpetua hinc apparet voluntas alterius felicitatem promovendi & alterum huius voluntatis certiore reddendi. Hæc ipsa autem voluntas anxiosa quasi satis superque arguit eum, cui favemus, aliis præferri quos amamus. *Martinus* in Lexico vocabulum Germanicum *Gunst*, quo hunc affectum indigitamus, contorta quadam

dam etymologia a Græco vocabulo γανῶν derivans, favere alii idem esse ait ac lucidam voluntatem habere erga eum, non obscuram, atque ita ei afferre lucem, gaudium, auxilium. Quoniam Philologus ideo vocabulum Germanicum a Græco derivat, quod rationem etymologicam a re desumptam existimet, sicque nomen rei suæ convenire arbitretur; ex ratione etymologica de communi vocabuli significatu ex mente illius iudicium fieri potest. Voluntas lucida hic dicitur manifesta, quam nemo non facile videre potest. Quo vero tendat illa voluntas, haud obscure innuitur, scilicet ad gaudium creandum alteri & ad auxilium eidem ferendum, si qua in re auxilio nostro indiget. Voluntas illa manifesta creandi alteri gaudium & auxilium eidem ferendi non differt ab ostensione benevolentiae *Scaligeriana*, unde constantem ac perpetuam voluntatem alterius felicitatem promovendi ac ejusdem alterum certiore reddendi deduximus. Quamobrem cum ostenderimus, *Scaligerianam* explicationem cum definitione nostra consentire; quin cum eadem quoque concordet ratio etymologica *Martiniiana* dubitari non potest. *Cartesius* in Tract. de Pass. animæ part. 2. art. 64. definitionem favoris realem traditurus: Bonum, inquit, quod præstitum fuit ab aliis, efficit ut illos favore prosequamur, quamvis id nobis factum non sit: id quod omnino consentaneum est definitioni reali favoris supra traditæ (§. 792.) cum nominali arctissimo vinculo connexæ. Equidem *Cartesius* non videtur respicere ad jus prælationis, quod favor tribuit ei, quem eodem complectimur: enimvero equis non novit, sæpissime verbis pauciora exprimi, quam quæ in notionibus continentur. Absolum vero est propterea alteri tribuere errorem, quod eorum, quæ recte sensit, quædam aliis ex iis, quæ dixit, colligenda reliquit.

Utinam ad hæc animum adverterent, quæ modo dixi. quotquot scripta aliorum legunt, non scientiam locupletandi, sed carpendi animo! Neque enim facile reperies, quod eruditos magis in contemtum adducat aliorum, quam istud altercandi studium, quo vul-

gus illorum inclarescere studet. Sed non alia erit rerum facies, nisi quando cum doctrina solida conjungentur virtus infucata atque politici mores a doctrina superficialia, quæ maximam adhuc orbis eruditi partem occupat, prohi dolor! sejuncti.

§. 795.

Favor

quando ori-
atur ob
mores pra-
vos ac vi-
tia,

Si quis favet alteri ob pravos ac perversos mores, vel habitus vitiosos; is eos aliquo respectu bonos opinatur. Qui enim alteri favet, is sibi repræsentat bonum quoddam alterius (§. 792.). Quamobrem si eidem favet ob mores pravos ac perversos, vel habitus vitiosos; is eos bonos existimare debet. Enimvero si agnoscit mores istos ac vitiosos habitus in se bonos non esse, vel, cum tales agnoscere nequeat, quod non sint; necesse est ut quodam saltem respectu eos bonos reputer.

A posteriori propositionis veritas manifesta est. Quodsi Titius per fas ac nefas opes corradere studet, ac videt Sempronium in aliis decipiendis versutum ac callidum; placebunt ipsi ejusdem mores, quod versutias ac calliditatem, quibus in aliis decipiendis utitur, utiles judicet ad suum propositum. Quando itaque eundem favore suo complectitur, mores ejus perversos ac habitus vitiosos, quos alias ipsemet improbaturus esset, hoc respectu bonos judicat, quod eos ad propositum suum feliciter exequendum utiles judicet. Similiter si quis ambitiosus ultra ceteros eminere gestit, atque adeo voluptatem percipit ex eo, quod alii traducantur & sublantentur; is hoc respectu promptitudinem aliis illudendi eosque deridendos propinandi bonam judicat. Quando itaque favet eis, qui habitu isto se instructos probant; eis ob perversos mores ac vitiosos habitus ideo favet, quod certo respectu eosdem bonos judicet. Non alia exempla addimus, quæ unusquisque ipsemet obvia colligere potest.

Nihil in hoc affectu insoliti hic occurrit, quod non æque in ceteris omnibus obtineat. Affectus enim non supponunt judiciorum veritatem, cum alias nunquam forent vitiosi, sed semper cum appetitu rationali consentirent; sequuntur potius opinionem ejus, qui

lisdem

iisdem obnoxius est. Ecquis vero nescit diversa admodum esse hominum de eo, quod bonum est, judicia, paucis secundum rationis normam illud dijudicantibus. Ceterum probe notandum est, fieri posse ut quis faveat homini pluribus perversis moribus ac vitiis confurcato, non propter hos mores, neque propter vitia ista; sed propter dotes quasdam animæ, vel corporis insignes, ad quas alii non tam facile attendere solent, vel quæ non adeo conspicuæ sunt, quemadmodum mores perversi ac habitus vitiosi, quos nemo non damnat. Fieri quoque potest, ut quis favere alteri videatur, cui non favet, cum aliæ sint rationes extrinsecæ, cur ejus felicitati amplificandæ potius studeat, quam aliorum. Caute igitur procedendum, ubi veritatem propositionis a posteriori cognoscere studemus.

§. 796.

Spes est voluptas ex bono obtinendo percepta. Quod si *Spes ac gaudium* ea prædominetur, ut in gaudium abeat (§. 614.); dicitur gaudium ex bono obtinendo *Fiducia*. *dii definitio.*

E. gr. Si Titio narratur munus quoddam ecclesiasticum vacare, cui se parem opinatur, idemque sibi persuadet fieri posse, ut ad idem promoveatur; dum sibi possibilitatem muneris obtinendi repræsentat ac ex eo, quod idem obtenturus sit, voluptate afficitur, spem muneris obtinendi concipere dicitur. Quod si adeo certus sibi videatur fore, ut munus istud in se potius, quam in alium conferatur, ut periade esse existimet, ac si in se jam collatum esset; de hac felicitate gaudenti fiducia tribuitur. Distingvendus vero hic quoque affectus est, qui in appetitu residet, ab opinione boni obtinendi, quæ in intellectu est, cum fieri possit ut boni obtinendi opinio ab affectu sejungatur.

§. 797.

Qui bonum futurum sperat, is idem sibi tanquam obtentu *Quando si* *possibile repræsentat* *Et contra.* Etenim qui sperat bonum futurum, is ex eo voluptatem percipit, quod ab ipso obtinendum *tura speremus.* (§. 796.). Voluptas igitur percipitur non ex bono in se considerato, sed ex eo, quod ab ipso obtineri debeat, consequenter qui spem ejus obtinendi concipit, is persuasus esse debet fieri posse ut idem obtineat, adeoque possibilitatem ejus obtinendi sibi repræsentare debet.

Simi-

Similiter si quis sibi repræsentat possibilitatem bonum aliquod obtinendi, hoc ipso sibi persuadet fore ut idem obtineat. Quoniam igitur bonum judicare debet, quod idem sit obtenturus (§. 554.), ex eo voluptatem tanto majorem percipere debet, quo magis hoc ipsi bonum videtur (§. 612.). Jam vero qui voluptatem percipit ex eo, quod se bonum aliquod obtenturum esse sibi persuadet; spe lætatur (§. 796.). Quamobrem patet, eum, qui sibi repræsentat possibilitatem boni obtinendi, idem sperare.

Propositionis præsentis veritas a posteriori satis liquet. Sane nemo est, qui non in se expertus fuerit, se nihil sperasse, nisi quod tanquam possibile sibi repræsentavit, vel ubi nunc quid sperat, id sibi tanquam possibile repræsentare. Ponamus vacare munus, cui nos pares esse satis superque persuasi sumus. Quod si vero non videamus, quomodo ad idem aspirare possimus, ignari prorsus quomodo idem obtinere debeamus; nemo non fatebitur ultro ne minimam quidem nobis spem esse posse ejusdem obtinendi. Sed non opus est verbis, ubi rerum testimonia liquida sunt.

§. 798.

*Quæ sperari
non possint.*

Quæ igitur impossibilia obtentu a nobis spectantur; ea minime speramus (§. 797.). Consentit experientia. In numerum impossibilium retert Titius, se hominem illiteratum ad munus pastoris ecclesiæ vocatum iri. Quod si ergo munus aliquod ecclesiasticum vacet; ne minima quidem spe lætatur fore ut ad idem evehatur. Ita nemo Protestantium vacante sede apostolica sperat se Papam electum iri: nemo Principum Christianorum sperat se ad Imperatoris Turcarum dignitatem evectum iri. Rationem spei deficientis reddunt omnes, quod tale quid fieri non posse nemo non intelligat. Si quis Geometra quadraturam circuli arithmeticam in terminis finitis impossibilem judicat; nunquam animo spem ejus inveniendi concipiet, quin potius spem omnem prorsus abjiciet, quamprimum impossibilitatis convictus sibi videbitur.

Notan.

Notandum hic est, impossibilitatem utramque tam absolutam, quam hypotheticam, conditione tanquam certa præsupposita, spei concipiendæ resistere. Atque ideo proposuimus exempla casus utriusque.

§. 799.

Si bonum nobis repræsentamus tanquam obtentu possibile, spes *Quando*
oritur. Si enim bonum nobis repræsentamus tanquam obtentu possibile, jam nos vel statum nostrum actu perfectiorem reddi posse, vel redditum iri persuasi sumus, quod tantummodo ex nuda repræsentatione boni in se non repugnare certum nobis videbatur (§. 554.). Quamobrem id maxime bonum cense-ri debet, quod bonum istud obtentu nobis possibile opinemur (§. cit.). Quoniam igitur ex eo, quod obtentu possibile existimetur, voluptatem tanto majorem concipimus, quanto major est certitudo boni obtinendi (§. 612. 517.); ubi nobis bonum tanquam obtentu possibile repræsentamus, spes oritur (§. 796.).

A posteriori per se manifestum est, spem animo concipi, quamprimum nobis bonum repræsentamus tanquam obtentu possibile. Quod si enim animum ad nos, vel alios advertamus, quando bonum aliquod, quod nostrum non est, nobis repræsentamus; sequentes animæ status a se invicem distinguimus. Aut enim id, quod bonum judicamus, tanquam in se bonum consideramus, aut tanquam nobis bonum. In casu priori si attentionem nostram in eo non defigimus, vix ac ne vix quidem commovemur, voluptate nascente in herba, quod dicitur, suppressa, aut, si mavis, statim iterum evanescente: si vero attentionem nostram in eo defigimus, voluptatem percipientes per spatium magis perceptibile eodem delectamur, quatenus scilicet per id, quod nobis placet (§. 542.), ad attentionem nostram in eodem conservandam impellimur, sicque voluptas conservatur sæpiusque augetur. In casu posteriori aut bonum, quod cognoscimus, tanquam obtentu possibile nobis repræsentamus, aut tanquam obtentu impossibile. Si tanquam

(*Wolffii Psychologia.*) H h h h obtentu

obtentu impossibile repræsentetur, nulla spes oritur, quemadmodum jam ante vidimus (§. 798.): casus adeo spei est, si bonum, quod cognoscimus, ac nobis bonum existimamus, tanquam obtentu possibile nobis repræsentamus. Casus hi palam distinguuntur in exemplo singulari. Ponamus vacare munus aliquod, quod cum dignitate ac emolumentis conjunctum est. Quodsi jam porro nos iis dotibus instructos esse deprehendimus, quibus opus est ad idem obeundum, nullum est dubium, quin idem appetamus (§. 589.). Enimvero si nos iisdem destitutos deprehendimus, veluti si munus sit ecclesiasticum, nos vero studiis theologicis non sumus imbuti; placet quidem munus ob dignitatem ac redditus, quatenus eorum compotes fieri vellemus; sed ulterius non progreditur appetitus. In votis itaque subsistimus, quæ his, vel similibus verbis significamus: utinam nobis esset munus, cui tanta dignitas, cui tot redditus jungantur! Quodsi vero nos iisdem dotibus instructos deprehendimus, quæ ad munus istiusmodi obeundum requiruntur, sed media idem obtinendi nulla videmus; ipsum quidem appetimus, sed non speramus: immo inquietus redditur animus, quod voti nostri compotes fieri non possimus. Enimvero ubi nos iis dotibus instructos deprehendimus, quæ ad munus istud cum laude obeundum necessariæ sunt, ac media idem obtinendi nobis reperisse videmur, quorum executio videtur facilis, aut saltem in potestate nostra posita; tum demum spem concipimus, minime labefactandam, quamdiu media certa eorumque executio possibilis nobis videntur.

Eo modo, quo casus diversos in confirmanda propositione a posteriori distinximus, uti quoque poteramus in veritate ejus a priori evincenda, cum principia sufficientia ad inferendas in singulis conclusiones, quas experientia magistra iisdem attribuimus, in superioribus prostant.

§. 800.

Spes est affectus, qui oritur, si quod bonum nobis repræsentamus tanquam obtentu possibile. *Spei definitio realis.*

Patet definitionis hujus realis veritas per propositionem præcedentem. Unde ad eam illustrandam facit exemplum, quod ibidem in medium adduximus.

§. 801.

Quoniam spes ideo oritur, quod bonum nobis repræsentamus tanquam obtentu possibile (§. 800.), fieri autem potest, ut id vel facilius, vel difficilius obtentu judicemus, cum alia facilius, alia difficilius obtineri experientia doceat; *Spes tanto major esse debet, quanto facilius judicamus bonum a nobis obtineri posse.* *Gradus Spei.*

Gradus non pendent ex magnitudine boni, quæ desiderium augere potest, quemadmodum paulo post ostendemus; sed ex facilitate obtinendi ejus, quod nostrum esse malleamus. Quamobrem haud difficulter distingves ea in casu dato, quæ ad spem spectant, ab iis quæ ad eandem minime faciunt, ubi alii affectus eidem socios sese præbent. Ceterum ipsi spei gradus manifestant, spem derivandam esse ex repræsentatione possibilitatis obtinendi boni, quod nobis esse malleamus.

§. 802.

Quoniam fiducia nonnisi gradus spei est superior (§. 796.), *Fiducia de gradus vero ex facilitate bonum obtinendi resultant (§. 801.); Finitio realis.* fiducia erit affectus, qui oritur, si bonum aliquod nobis repræsentamus tanquam obtentu admodum facile, consequenter *tanto major erit, quanto major nobis videtur ista facilitas.*

Istiusmodi fiducia erat in Martyribus, qui beatitudinem æternam tanquam bonum certo sibi obtinendum repræsentabant, ut nulla prorsus ipsis appareret difficultas, quæ impedimentum objicere spemque ipsorum labefactare posset. Jungebatur equidem isti gaudium aliud, idque non simplex, quatenus bonum futurum spectabatur tanquam præsens, quatenus idem prægustabatur, quatenus magnitudo ejus expendebatur, & quatenus ipsos cruciatus, quos Christi gratia perpetiebantur, in numerum bonorum referebant, atque hostium impotentiam in auferenda beatitudine æterna ac delendo

præguſtu ejusdem penitus introſpiciabant; ſed a fiducia id omne diſtingvet, qui theoriam affectuum, quæ hic tradimus, animo penitus comprehenſam tenet.

§. 803.

*Definitio-
nes ſpei ac
fiduciæ uſui
loquendi
conformes.*

Definitiones ſpei ac fiduciæ communi uſui loquendi ac recepto ſignificatui non contrariantur. Communem ſpei notionem explicaturus *Martinus* in *Lexico*: ſperare idem eſſe, ait, ac expectare futurum bonum. Futurum bonum expectat, qui ſibi perſuadet, idem certo venturum. Nemo autem ſibi perſuadere poteſt, certo venturum, quod non adeſt, niſi quod idem ſibi repræſentat tanquam obtentu poſſibile. Ex hoc ipſo enim, quod idem obtentu poſſibile judicat, colligit idem eventurum, ubi nempe mediis utimur, quibus idem obtineri poſſe & quorum executionem in poteſtate noſtra eſſe intelligimus. Patet adeo ex communi loquendi uſu ſpem oriri ex eo, quod bonum aliquod nobis repræſentemus tanquam obtentu nobis poſſibile. Quoniam vero hoc conſentaneum eſt definitioni noſtræ reali; communem loquendi uſum cum noſione noſtra conſentire patet, interprete *Martino*. Spem vero in numerum affectuum referri recepto vocabuli ſignificatui convenienter patet, quod philoſophi de affectibus agentes de ſpe tanquam ſpecie quadam diſſerant. Exemplo nobis eſt *Gaſſendus* *Phyſ. ſect. 3. lib. 10. c. 6. f. 495. Tom. 1. Oper.* exemplo etiam eſt *Carteſius* *l. c. art. 58. Gaſſendus* ſpem vocat elationem quandam animæ ob ſuperadditam opinionem, quod bonum adventurum ſit. Unde apparet hoc judice ſpem eſſe affectum, qui ortum trahit ab opinione, quod bonum adventurum ſit. Jam vero opinio iſta naſcitur, quando de mediis ſolliciti nobis bonum repræſentamus tanquam obtentu nobis poſſibile. Significatus adeo, quem vocabulo ſpei tribuit *Gaſſendus*, cum definitione noſtra non minus nominali, quam reali conſpirat. Equidem idem monet, vocabulum ſpei ſubinde quoque ſumi pro expectatione

tione malorum, veluti cum *Cicero* mentionem injicit spei malorum, & *Virgilius* canit:

Hunc ego si potui tantum sperare dolorem.

Immo *Martinius* in *Lexico* observat spem quoque sumi pro quavis expectatione in genere. Sed quæ inconstantia loquendi tribuenda sunt, a foro nostro aliena existimari debent. *Cartesius* definitionem spei realem traditurus: Sufficit cogitare, inquit, acquisitionem boni possibilem esse, ut illius cupiditas excite- tur, sed cum præterea consideratur, num facile, vel difficile sit rem cupitam obtinere, id, quod nobis magnam rei conse- quendæ facilitatem repræsentat, excitat spem. Videtur adeo spem vocare, quam nos fiduciam appellavimus. Enimvero dum affirmat opinionem possibilitatis boni obtinendi cupidi- tatem excitare; id tantummodo innuit bonum in se conside- ratum, nondum spectatis mediis, quibus obtinetur, videri obtentu possibile, quando idem cupimus. Dum vero addit, id quod nobis magnam rei consequendæ facilitatem repræsen- tat, spem excitare; ad media respicit, quibus bonum istud a nobis obtineri potest, consequenter idem tanquam nobis ob- tentu possibile repræsentari debere agnoscit, ubi spes oritur. Atque adeo patet, philosophum non diversam tradere a no- stra definitionem realem, si rem ipsam spectes, etsi in verbis ap- pareat dissensus. Idem vero agnoscit gradum spei superio- rem constituere fiduciam. Etenim cum spes summa est, in- quit, mutat naturam & vocatur fiducia. Sed quomodo na- turam mutet, ex definitione nostra nominali liquet (§. 796.); cur mutet, ex reali intelligitur (§. 802.). *Gassendus* affectum, quem nos cum *Cartesio* fiduciam appellamus, *Fidentiam* vocat, vel etiam *securitatem*, *certamque fidem*, & eam nihil aliud esse affirmat f. 496, quam spem veluti consummatam, hoc est, ratam ac indubiam ob argumenta, quæ boni adven- tum non impedibilem demonstrent. Enimvero si certi sumus vel saltem nobis esse videmur, boni adventum impediri mi-
Hh hh 3 nime

nime posse, nullam difficultatem ejus obtinendi adesse opinamur, adeoque idem tanquam obtentu facile nobis repræsentamus. Unde patet definitionem nostram fiduciæ realem cum significato convenire, quem tanquam receptum defendit *Gassendus*.

Probe autem notandum est spei quoque & fiduciæ nomen tribui dispositioni agendi, quæ affectus istos comitatur. Ac præterea notandum est in spe probabile nobis fieri, quod bonum obtenturi simus, seu quod idem adventurum sit; in fiducia vero certum existimari, quod idem sit adventurum: id quod a nobis haud difficulter demonstratur. Addimus igitur propositionem sequentem.

§. 804.

Cognitio
futuritionis
in spe ac fi-
ducia quæ
sit.

Si nobis fiducia est, prorsus certum nobis videtur bonum adventurum esse: si vero animus spe lædatur, idem tantummodo probabile videtur. Spes pariter ac fiducia oriuntur ex eo, quod nos bonum aliquod obtenturi simus, vel, quod perinde est, quod idem adventurum sit (§. 800. 801.), estque spes tanto major, quanto facilius videtur bonum istud a nobis obtineri posse (§. 801.), & fiduciæ tum locus est, quando admodum facile nobis videtur nos bonum istud obtenturos (§. 802.). Enimvero ideo bonum judicamus obtentu nobis possibile, quod media ad idem obtinendum sufficere videantur. Quamobrem porro obtentu facile judicamus, quod appetimus, bonum futurum, si nulla impedimenta oblatum iri existimemus, quæ media inefficacia efficiunt. Quod si certo persuasi simus, impedimenta nulla objici posse, vel saltem nulla occurrere posse, quibus tollendis non simus pares; nulla circa bonum obtinendum restare videtur difficultas, adeoque certum nobis videtur bonum adventurum (§. 564. *Log.*). Quare cum in hoc casu fiduciæ locus sit *per demonstr.* si nobis fiducia est, prorsus certum nobis videtur bonum adventurum esse.

Enimvero si nondum ea animum tenet opinio fieri non posse, ut impedimenta insuperabilia nobis objiciantur, quin potius suspicamur talia objici posse; nondum nobis persuadere vale-

vale-

valemus bonum, quod obtentu possibile videtur, certo adventurum esse. Quamobrem ejus futuritio nobis tantummodo probabilis est (§. 578. Log.). Enimvero in hoc casu spes oritur *per demonstr.* Quando igitur animus spe lactatur, probabile nobis tantummodo videtur bonum adventurum esse.

Confirmatur propositio a posteriori, quod iis, quos fiducia tenet, bonum, quod appetunt, tam certo venturum esse affirmant, ut jam præsens existimari possit, ac ideo gaudio efferatur animus; qui vero tantummodo sperant futurum, adhuc verentur ne impedimenta quædam intervertant propositum, atque adeo in votis habent, ut bono, quod sperant, statim potiantur. Diversos animi status in fiducia ac spe obvium est distinguere, ac inprimis fiduciam a spe distinguere licet non modo ex sermone bonum futurum expectantis, verum etiam ex dubiis, quæ movere conaris: ille enim fidentiam spirat, ubi eidem locus est; his facilius cedit, qui nonnisi spem, quam qui fiduciam animo concepit.

Quoniam multis certa videntur, quæ alii incerta existimant; multis quoque probabilia habentur, quæ aliis minus probabilia existimantur; in propositione præsentē applicanda, vel a posteriori confirmanda multa cautione opus est: id quod & in aliis casibus observandum, ubi diversitatis subjectorum habenda ratio est.

§. 805.

Cupiditas est prægustus voluptatis, vel gaudii ex bono absente, quod nobis præsens esse malleamus. *Cupiditatis definitio.*

E. gr. Videt quis imaginem, quæ ipsi admodum placet, sibi que repræsentat voluptatem, quam sapius ex hac imagine percipere posset, si quidem sua esset, atque adeo voluptatis prægustum habet. Affectus ille, quo ferimur in eam imaginem, cupiditatis nomine venit: quam pro diverso voluptatis vel gaudii gradu diversam esse debere nemo non agnoscit & experientia fida talium magistra docet.

§. 806.

Si quod nobis placet nondum habeamus, habere tamen velimus quando oriatur. *Cupiditas*

mus; idem cupimus. Si quod enim nobis placet, ex eo voluptatem percipimus (§. 542.), vel prorsus gaudio afficimur (§. 614.). Quamobrem cum idem habere velimus, hinc colligimus, quamnam voluptate, quonam gaudio sumus fruituri, si bonum istud nostrum foret, seu si rem istam, quam bonam nobis judicamus (§. 612.), obtineremus, adeoque prægustum ejus habemus, idemque appetimus (§. 589.). Quoniam itaque prægustus voluptatis, vel gaudii ex bono absente, quod nostrum esse mallemus, cupiditas est (§. 805.); si quod nobis placet, quod nondum habemus, idem appetimus.

A posteriori propositionis veritas exemplis obviis confirmatur. Etenim si quis videt imaginem, quæ ipsi placet, nec eandem obtentu sibi impossibilem judicat, atque adeo habere mallet; eam habere cupit. Simplex nimirum appetitus præcedit cupiditatem, qui affectus est, nec hic nascitur, nisi iste præcesserit. Atque hoc probe notandum est, ubi ad experimenta descenderis, ne experientia iis refragari videatur, quæ confirmat.

Quod etiam nobis placere possint, quæ non habemus, nec tamen ea propterea cupiamus; unusquisque in se experiri potest, si in nundinis transeat per tabernas rebus pretiosis instructas, quarum nullum sibi esse usum intelligit, & quibus sibi comparandis sumtus deficere probe novit. Placent enim res pretiosæ earumque adspectu sæpe adeo delectamur, ut ab iis contemplandis abduci nequeamus: quoniam tamen ob rationes prædictas easdem minime appetimus, nec eas habendi cupiditas animum invadit. Quod si attentione ad rationes prædictas seposita nascatur appetitus, is tamen statim supprimitur attentione ad easdem conversa, sicque nascens perit cupiditas.

§. 807.

Mater cupiditatis.

Quoniam amamus, quod nobis placet (§. 648.), ante autem placet, quam id cupiamus (§. 805.); *cupiditas ex amore nascitur*, seu *amor cupiditatem præcedit*, *cupiditas amorem sequitur.*

Inde est quod gradum cupiditatis gradui amoris respondentem probet experientia. Ponamus tibi placere imaginem insigniter; eandem amabis. Quod si impense eam ames, vehemens quoque orietur cupiditas, ut ut ab amore ad cupiditatem non fiat progressus per saltum, sed mediante prægustu voluptatis in posterum percipiendæ, siquidem imago nostra esset, & prævio simplici appetitu.

§. 808.

Si quid cupimus, id nobis representamus tanquam nobis Quenam bonum. Si quid enim cupimus, voluptatem ex eo percipimus. eandem nobis representamus, si idem nostrum, vel nobis præsens esset (§. 805.), consequenter idem nobis representamus tanquam bonum tanto majus respectu nostri, quanto majorem nos inde percepturos esse voluptatem ex prægustu colligimus, vel certiores reddimur (§. 612.). Atque adeo patet, nos nobis representare tanquam bonum quoad nos, si idem cupimus.

Si quis a posteriori certior reddi vult veritatis propositionis præsentis, attentionem omnem in se convertere debet, quamprimum aliquid cupit. Tum enim satis superque intelliget, quomodo sibi rem, quam cupit, tanquam bonam representet quoad se. Quod si in aliis experimentum capere volueris, ex iisdem sciscitari debes, quænam sit cupiditatis tantæ ratio. Enarrabit enim ea, ob quæ rem, quam cupit, sibi bonam existimat, veluti ubi imaginem pulchram cupit, voluptatem indigitabit, qua perfunderetur animus, quoties eandem contemplari daretur, vel ad voluptatem si non expresse, tacite tamen provocabit, ubi alii eandem in conclavi ipsius intuentes laudaverint & quanti eandem æstiment significaverint. Bonum enim non eadem omnes metiuntur mensura.

Probe tenendum est, quod hic inculcamus, bonum non eadem mensura metiri omnes, cum non modo in cupiditate, verum etiam in omni affectu alio confundamur, si nostra mensura æstimamus, quod bonum est, ubi experimentum in aliis capiendum.

§. 809.

*Quandonam
quid cu-
piamus.*

Si quid absens nobis representamus tanquam nobis valde bonum; id cupimus. Etenim si quid absens, seu quod nondum habemus nobis representamus bonum quoad nos; idem appetimus (§. 589.). Quamobrem cum appetitus habeat gradus (§. 599.), idemque fiat pro ratione boni in re percepti (§. 579.); si quid nobis valde bonum videtur, appetitus vehementior est, adeoque affectus oritur (§. 603.). Quoniam vero bonum quod nobis representamus absens est, *per hypoth.* affectus tendit in bonum absens, quod nostrum esse malleamus, & quatenus idem nobis tanquam bonum representamus, voluptatem ex eo percipiendam prægustamus (§. 612.). Bonum igitur istud absens cupimus (§. 805.).

Pater idem a posteriori eodem modo, quo veritas propositionis præcedentis innotescit, cum utrique eadem notio respondeat, ut adeo plura eam in rem addi non sit opus.

Si bonum exiguum videtur, nec magna est cupiditas, ita ut tam exigua evadere possit, ut vix in numerum affectuum referatur. Quamobrem addidimus in hypothese absens representari debere tanquam valde bonum: id quod per se intelligitur, ubi supponimus affectum oriri debere.

§. 810.

*Definitio
cupiditatis
realis.*

Cupiditas est affectus, qui oritur ex representatione boni absentis.

Nimirum si supponimus affectum oriri, tacite supponimus absens bonum existimari quoad nos, idque valde bonum, ut adeo realitas hujus definitionis in articulo præcedente fuerit evicta.

§. 811.

*Definitiones
cupiditatis
num sent re-
cepto signi-
ficatui con-
formas.*

Definitio tam nominalis, quam realis cupiditatis recepto significatui conformis. Significatum receptum explicaturus Gassendus *Phys. sect. 3. membr. 2. lib. 10. c. 5. f. 491. Tom. I. Oper.* eam affectum esse dicit, quo anima in rem visam bonam absentemque sic tendit, ut illi habendæ fruendæque veluti inhæret. Monet ibidem rem videri bonam, quatenus considera-

tur

tur tanquam voluptatis cujusdam creatrix. Immo diserte monet, proprium esse huic affectui, quod feratur duntaxat in bonum futurum absensve, atque adeo bono facto presente evanescat. Apparet itaque juxta *Gassendum* oriri cupiditatem ex representatione boni absentis: id quod cum definitione nostra reali convenit (§. 810.). Quoniam vero res absens representatur tanquam bona, quatenus ea consideratur tanquam voluptatis creatrix, atque adeo jam actu quædam inde voluptas percipitur; ideo non invito *Gassendo* dici potest cupiditatem esse prægustum quendam voluptatis ex bono absente percipiendæ, quod nostrum esse malleamus: id quod cum definitione nostra nominali prorsus coincidit. *Cartesius* loco sæpius citato art. 58. p. m. 28. notat, cupiditatem semper bonum futurum respicere, sive appetamus acquisitionem boni, quod adhuc abest, aut evitacionem mali, quod judicatur evenire posse, sive exoptemus conservationem cujusdam boni, aut absentiam cujusdam mali. Unde conficitur hunc affectum juxta *Cartesium* oriri ex representatione boni absentis, quemadmodum fert definitio nostra realis (§. 810.). Si dubium moveat, quod art. 58. ajat: Sufficit, ut excitetur alicujus boni cupiditas, cogitandum esse, quod acquisitio possibilis sit, quod cum nostra spei definitione coincidere videtur; repetenda ea sunt, quæ ad idem removendum in superioribus (§. 803. in medium adduximus. Nemo non experitur, nos subinde cupere etiam ea, quæ a nobis acquiri non posse nobis persuasissimum est: quo in casu dicere solemus, vellem hoc, vel istud habere; vel utinam conditio mea pateretur, ut hoc, vel istud acquirere possem! Cognita impossibilitate obtinendi ejus, quod cupimus, excupiditate nascuntur affectus alii, quos ab illa distingvi acute necesse est, ne observaturus quæ diximus confundaris.

§. 812.

Si bonum, quo fruimur, nobis representamus ut conservandum, cupiditatis.

vandum, vel malum, quod abest ut evitandum ; vel, quod adest, ut auferendum ; conservationem boni , evitationem & ablationem mali cupimus. Nemo enim nescit, bonum judicari ut præsens, quo fruimur , bonum conservetur ; malum quod abest evitetur, vel quod adest auferatur (§. 554. 565.). Quamobrem si nobis repræsentamus boni præsentis conservationem, mali absentis evitationem, vel mali præsentis ablationem ; bonum aliquod absens nobis repræsentamus, quod nostrum esse malle-mus. Quoniam itaque repræsentatio boni absentis cupiditatem excitat (§. 810.) ; cupiditas quoque excitari debet repræsentatione boni conservandi, mali absentis evitandi, vel præsentis auferendi.

A posteriori unusquisque cupiditatem in se observare potest, quando bonum aliquod conservari, malum evitari, vel auferri exoptat, ut adeo simplici tantummodo attentione sit opus.

In genere tenendum est omnes affectuum definitiones esse applicabiles in eo casu, in quo quid in numerum bonorum, vel malorum opinione nostra referimus, qualecunque tandem fuerit. Judicatur autem bonum, quod voluptatem creat ; malum, quod tædium procreat in affectuum genesi, ubi nonnisi confusa boni malique repræsentatio est (§. 605.).

§. 813.

Fuga def-nitio.

Fuga mali, vel etiam *Fuga simpliciter* est prægustus tædii, vel tristitiæ ex malo absente percipiendæ, si nobis præsens fieret.

E. gr. Si cui sapor alicujus cibi molestus est, dum is eidem offertur ; saporis illius memor tædium præsentit, quod inde percepturus esset, si eodem vesceretur : eundem adeo fugit. Nempe affectus, quo tunc corripitur animus, dum nos nullo modo adduci patimur, ut eodem vescamur, fuga dicitur. Quod si nullus affectus oriatur, sed simplex tantummodo averfatio ; Fugæ in eo sensu, qui hic attenditur, locus non est.

§. 814.

Quanam fugiamus.

Si quis nobis displicet, idemque averfamur ; idem fugi-mus.

mus. Si quid enim nobis displicet, ex eo tadium percipimus (§. 542.), consequenter quia idem averſamur *per hypoth.* inde colligimus, quanto nobis tadio futurum sit, si idem nobis præſens eſſet, adeoque tadii inde percipiendi præguſtum habemus. Quoniam itaque præguſtus hic affectus ille eſt, quem Fugæ nomine compellamus (§. 813.) ; si quod nobis displicet averſamur, idem fugimus.

Patet idem a poſteriori per illud ipſum exemplum, quo ad illuſtrandam definitionem fugæ modo uſi ſumus. Etenim si ſapor cibi nobis moleſtus eſt, cum averſamur. Quod si ingens fuerit tadium, quod inde percipimus, idemque nobis repræſentemus ; affectus quidam oritur, quo impulſi cibum iſtum procul a nobis remotum volumus. Atque adeo palam eſt, nos eundem fugere. Fugam hanc mali prodimus his verbis : *apage!* Nihil nobis cum re iſta negotii eſſe volumus.

Oponitur hic affectus cupiditati, atque differt a cupiditate mali evitandi, cum tum attentio dirigatur in evitationem mali tanquam rem bonam, in fuga vero malum ipſum quoad nos conſideretur. Qui ad obviam experientiam attendit ; is differentiam inter cupiditatem mali evitandi & fugam mali absque difficultate diſtingvet.

§. 815.

Quoniam id fugimus, quod displicet & averſamur (§. *Mater fu-* 814.) ; quod vero displicet, id odimus (§. 677.) ; *Fuga ex odio gæ.* *nascitur mediante ſimpli averſatione.*

Scilicet averſatio ſimplex locum habere poteſt absque omni affectu, odium locum habere poteſt absque fuga ; ſed si ad averſationem ſimplicem rei abſentis accedit odium, fuga oritur. Nimirum fuga id ſingulare habet, quod nos a malo protinus longo quali intervallo remove nitamur ut tam cito ab eo procul diſtemus, quam nobis quidem poſſibile ; unde fugæ ab averſatione ſimplici differentiam ad ideam imaginariam reducturi affectui huic fugæ nomen impoſuere, cum fugiens ab objecto aliquo ſe celeri curſu remove nitatur.

§. 816.

*Quanam.
fugiamus.*

Si quid fugimus, id nobis representamus tanquam malum quoad nos. Si quid enim fugimus, tādīa nobis representamus ex malo absente percipiēda, ubi nobis præsens fieret (§. 813.). Quoniam vero id tanto magis malum nobis videtur, quanto majus tādīum est quod inde percipitur (§. 613.); absens malum tanquam malum quoad nos nobis representare debemus, dum id fugimus.

Idem a posteriori obvia experientia confirmatur. Medicinam qui fugit, eam malam judicat quoad se, quando nimium eadem uti jubetur: alias eam simpliciter averfatur, vel odio prosequitur. Cibus palato minus gratus fugit, qui eodem vesci jubetur, atque adeo eundem malum judicat quoad se. Alias itidem eundem simpliciter averfatur, vel odit, pro circumstantiarum diversitate.

§. 817.

*Quando-
nam quid
fugiamus.*

Si quid absens nobis representamus tanquam malum quoad nos, idem fugimus. Etenim si quod absens nobis representamus tanquam malum, tādīa nobis representamus inde percipiēda, si ea res nobis præsens foret, eaque tanto majora, quanto majus malum nobis videtur (§. 613.). Præ- gustum adeo habemus tādīi ex re absente percipiendi, si ea nobis præsens foret, in casu nascentis affectus, quem hic supponimus, consequenter rem istam absentem fugimus (§. 813.).

A posteriori confirmatur propositio iisdem prorsus exemplis, quæ ad confirmandam præcedentem faciunt.

§. 818.

*Definitio
realis fuga.*

Fuga est affectus, qui oritur ex representatione mali absantis quoad nos.

Patet realitas definitionis hujus per propositionem præcedentem (§. 817.). Id vero per se liquet, malum, quod fugimus, tanquam eventu possibile representari debere.

§. 819.

Definitio fugæ realis & nominalis recepto significatui con-
formis. Fugam in numerum affectuum refert *Gassendus* loc. cit. *fugæ num-*
 non invita experientia obvia. Fugam cupiditati opponit, adeo- *significatui*
 que oppositum significatum habere debet vocabulum fugæ, qui *recepto con-*
 cupiditati tribuitur. Cupiditatem sumimus in eodem prorsus *formis.*
 significato, quem eidem vindicat *Gassendus* (§. 811.). Significa-
 tus vero, quem vocabulo fugæ tribuimus, oppositus est ei, quem
 vindicavimus cupiditati. Quamobrem is quoque idem esse
 debet cum eo, quem experientiæ communi consentaneum pro-
 bat *Gassendus*. Idem clarius patet, si quæ philosophus de signi-
 ficatu vocabuli fugæ differit, cum iis conferas, quæ nos de fuga
 tradidimus. Fugam in eo cum odio convenire, quod uterque
 affectus sit abductio a re mala molestiæve creatrice, quatenus
 nimirum tanquam affectus molesti in aversatione fortiori con-
 sistunt (§. 609.) ; eo autem differre, quod odium sit prævium,
 fuga vero concomitans : id quod coincidit cum eo, quod ex
 definitione nostra nominali deduximus (§. 815.). *Definit* au-
 tem *Gassendus* fugam per affectum, quo anima rem visam ma-
 lam absentemque sic refugit, ut aversam se illi declinandæ con-
 tineat. Unde liquet ipsum ad genesis hujus affectus requirere
 ut anima sibi repræsentet malum quoddam absens, quod nobis
 præsens fieri nolumus : id quod cum nostra definitione mali fugæ
 coincidit (§. 818.).

Cartesius fugæ nullam facit mentionem, propterea quod cupi-
 ditatem mali evitandi ab illa differre non animadvertit, quam tamen
 ipso sensu in casibus obviis clarissime distingvimus. In unum scilicet
 casum intentus alterius oblitus est, cum nulla tunc adesset ratio, cur
 casus alter ipsi præsens sisteretur : id quod facillime accidere solet.

§. 820.

Metus est tædium ex malo adventuro perceptum, seu ex *Metus ac*
 opinione mali adventuri. Quodsi ea prædominetur, ut in *desperatio-*
 tristitiam abeat (§. 619.); dicetur tristitia ex malo adventante, *nis definitio.*
 seu opinione mali adventantis, præsertim intolerabilis visi, per-
 cepta

cepta Desperatio. Tædium ex malo appropinquante, vel ex opinione mali appropinquantis perceptum vocatur in specie *Timor*, ut adeo *timor metus quædam species sit*.

E. gr. Si quis noctu evigilans procellæ impetum audit sibi que repræsentat incendii periculum in hoc æris statu, ac ejus excitandi possibilitatem in vicinis ædibus; tædium, quo afficitur animus, metus nomine venit. Quodsi vero incendium jam fuerit ortum ac periculum inde imminet ædibus nostris, timori locus est. Si quis in casu posteriori periculum sibi repræsentat tanquam inevitabile ac jacturam omnium bonorum tanquam causam pauperiei intolerabilis sibi visæ, aut jacturam Bibliothecæ tanquam damnum irreparabile; desperationi locus est. Patet adeo affectus, qui metus, timoris ac desperationis nomine veniunt, esse quidem agnatos; sed tamen clarissime differre, ita ut differentiam ipso sensu distingvamus tum in nobis, tum in aliis, quando vel nos, vel alii iisdem agitantur.

S. 821.

*Quenam
& quando
metuamus.*

Qui metuit, is malum sibi repræsentat tanquam eventu possibile, & contra. Qui enim metuit, is malum sibi repræsentat tanquam adventurum ac ex opinione mali adventuri tædium percipit (§. 820.). Tædium igitur percipit non ex malo in se considerato, sed ex eo, quod adventurum sit, consequenter qui malum metuit, is persuasus esse debet fieri posse ut malum eveniat, eventusque possibilitatem sibi repræsentat.

Idem confirmatur a posteriori. Ponamus nos novellas publicas legentes intelligere, in vicino quodam regno apparatus bellicum instrui ac inde porro colligere, fieri posse ut ferale bellum in nostras oras serpat; metus animum invadit, atque adeo patet metuentem sibi repræsentare malum tanquam eventu possibile. Neque enim adhuc pro certo habet, idem eventurum. Jam ex adverso qui sibi repræsentat malum, tanquam eventu possibile, is sibi persuadet adesse rationes sufficientes, cur credat idem adventurum. Quoniam vero malum judicare debet, quod illud adventurum sit (§. 565.); ex eo,

eo, quod adventurum existimet, tædium tanto majus ab eo percipi debere, quo magis hoc ipsi malum videtur (§. 613.). Jam vero qui tædium percipit ex eo, quod malum adventurum sit, metum animo concipit (§. 320.). Quamobrem patet eum, qui malum sibi repræsentat tanquam eventu possibile, metuere sibi ab hoc malo.

A posteriori unusquisque ex seipso intelligit, nunquam sibi esse metum, nisi ubi sibi persuadet, malum aliquod eventu possibile esse, & quamprimum ita opinatur, metum subito oriri.

§. 822.

Metus est affectus, qui oritur, si quod malum nobis tanquam eventu possibile repræsentamus. *Metus definitio realis.*

Sola nimirum mali absentis repræsentatio fugam excitat; sed ubi tanquam eventu possibile consideratur, metus eidem superaccedit. Unde plerumque accidit, ut duo hic affectus oriantur simul: id quod probe notandum, ubi experimentum eorum capere volueris, quæ de utroque affectu docentur.

§. 823.

Quoniam timor a metu in eo differt, quod in illo affectu malum consideretur ut appropinquans, in hoc ut adventurum (§. 820.) ; *Timor* est affectus, qui oritur, si malum aliquod nobis tanquam appropinquans repræsentamus (§. 820.). *Definitio realis timoris.*

Definitio adeo realis jam continetur in nominali, quam dedimus, ut adeo nominalis cum reali coincidat. Etenim fieri potest, ut etiam realis tamdiu pro nominali habeatur, quando ex ea possibilitas rei definitæ nondum intelligitur. Ceterum a posteriori veritas definitionis hujus realis confirmatur ex eo, quod observemus, nos timore perculso transire in tenebris per coemeterium, si quidem nobis persuasum est illo tempore spectra ibidem hominibus damna inferre, atque adeo imaginatio spectra nobis veluti ad nos accedentia & corpus nostrum jamjam ferientia repræsentat. Studio ad hoc exemplum provoeco, quod qualis sit timor & quomodo a metu differat omnium clarissime patefaciat.

§. 824.

*Quando de-
speremus &
quanta sit
desperatio.*

Qui desperat, is malum sibi repræsentat tanquam inevitabile
 & contra: atque tanto major desperatio, si simul ut intolerabile
repræsentatur. Qui enim desperat, is tristitia afficitur ex malo
 adventante (§. 820.), adeoque non tantum quatenus malum
 est, sed quatenus adventat, seu ex eo, quod malum certo fit
 exiturum. Quamobrem persuasus sit necesse est idem a se
 evitari non posse, atque ideo patet eum, qui desperat, malum
 sibi repræsentare tanquam inevitabile. Nimirum quamdiu quis
 existimat malum adhuc evitari posse, nondum pro certo habet
 idem exiturum.

Similiter qui malum sibi repræsentat tanquam inevitabile,
 hoc ipso sibi persuadet fore ut idem eveniat, per ea quæ modo
 diximus. Cumque hic sermo sit de malo, quod haud procul
 abest; idem tanquam jam adventans considerare debet. Quo-
 niam igitur malum judicare debet mali inevitabilis adventum
 (§. 565.), ex eo tanto majus tædium, immo tristitiam prorsus
 (§. 619.), percipere debet, quanto majus malum nobis videtur
 iste adventus (§. 613.), consequenter desperare debet (§. 820.).

Enimvero quia adventus mali intolerabilis tanto majus
 malum videtur, quanto intolerabilius idem existimatur (§. 565.);
 ex eodem quoque tanto majus tædium, immo tanto major
 tristitia (§. 619.), percipi debet, quanto intolerabilius malum
 videtur (§. 613.). Desperatio igitur in hoc casu major esse
 debet.

Veritas propositionis præsentis confirmatur a posteriori,
 si cogitemus hominem ob homicidium ad supplicium ultimum
 damnatum sibi ignominiam perpetiendam repræsentare tan-
 quam malum intolerabile idemque simul inevitabile. Tum enim
 affectum desperationis, quo urgetur, nemo in dubium vocare
 poterit.

Tria in dato exemplo probe attendenda veniunt, nimirum 1. quod ad supplicium ultimum damnatus mortem ac ignominiam cum eadem conjunctam sibi repræsentet tanquam malum, 2. quod malum istud consideret tanquam certo adventurum, 3. quod idem opinetur sibi fore intolerabile. Unde facile probari poterat cum affectu desperationis concurrere alios, veluti horrorem, quem incutit supplicii gravioris repræsentatio; pudor, quem excitat cogitatio de judiciis hominum, per quos ad locum judicii ducendus; tristitia simplex, quatenus malum existimatur, quod supplicium publice perpetiendum evitari non possit. Immo in casu speciali alii affectus superaccedere hisque se jungere possunt, veluti poenitentia, qua quod homicidium commissum fuerit urgemur, & indignatio, quod non potius injuriam ab altero nobis factam perpeffi fuerimus; sed de concursu affectuum non opus est, ut multa dicamus. Etenim si constet quænam sint singularum causæ, in dato casu speciali facile ostenditur, quinam concurrere debeant. Excitanda autem ad hunc concursum nobis fuit attentio, ne in experimentis capiendis confundamur, ubi plures concurrunt.

§. 825.

Desperatio est affectus, qui oritur, si nobis malum repræsentemus tanquam inevitabile, inprimis ubi simul idem nobis repræsentamus tanquam intolerabile. *Desperatio-
tionis defi-
nitio realis.*

Non illustrius habemus exemplum, quam quod ad confirmandam propositionem præcedentem, in qua fundamentum hujus definitionis continetur, seu ejus realitas evicta fuit, usi sumus.

§. 826.

Definitiones metus, timoris & desperationis sunt recepto significatui conformes. Metus, ait *Martinius* in *Lexico*, est motus cordis, ut cum violenter constringitur & futurum malum fugit. Prius ad corpus, posterius ad animam refertur. Quare cum nos affectus hic tantummodo consideremus, quatenus ad animam spectant; dicendum erit juxta *Martinium* metum esse affectum, qui oritur ex opinione mali futuri, quod a nobis abesse vellemus: quod a definitione nostra reali minime abhorret (§. 822.). Clarius *Aristoteles* metum definit per dolorem ac perturbationem ex opinione impendentis mali, quod

vel perniciem, vel molestiam afferre possit: id quod cum definitione nostra nominali prorsus consentit (§. 820.). Et *Gassendus* loco supra citato observat, metum universè ea etiam comprehendere, quæ minores molestias levioraque incommoda paritura sunt, ac ea rursus, quæ tamen si pro foribus non sint, aliquando tamen ad futura creduntur. Etsi enim *Aristoteles* restrictius metum definivisse videatur, non tamen eidem contrariantur, quæ *Gassendus* addit. Etenim jam supra monuimus, ubi notiones ab exemplis abstrahuntur, aut ad ideas referuntur, ut earum appareat veritas, facillime contingere, ut in verba incidamus quæ non satis determinate exprimunt, quod significare debent, propria attentione ad exempla alia nobis obvia facile amplianda, vel restringenda, prout casus tulerit. Quamobrem non inconsultum est, ut, qui in veritate accurate determinanda proficere voluerit, quæ plures de eadem re dicunt in unum congerat: cum enim non omnibus eadem fuerint ideæ exemplares, ad quas verba suareturnerunt, ex collatione determinaciones quomodo rite constituendæ sint innotescit (§. 682. *Log.*). Timorem a metu ita distinguit *Cicero*, optime gnarus significatus vocabulorum latinorum, ut ille sit hujus speciei, scilicet metus appropinquantis mali: quem nos in definitione nominali (§. 820.) secuti sumus. *Martinus* in Lexico timere idem esse ait ac futurum malum, quod vel erit, vel esse potest, expectare. Nisi verba, vel esse potest, scrupulum moverent, dici poterat, eum consentire cum *Cicerone*. Neque enim futurum expectamus, nisi quatenus id tanquam appropinquans, vel adventans spectamus. Sed quod non satis accurate mentem suam expresserit, apparet ex iis, quæ mox de timore dicit, quod sit spem abjicere, tanquam non possit aliquid cogitari, quo juvemur, ut impendentia mala amoliamur. Impendent mala, quæ appropinquant; mala appropinquantia vero non semper ut inevitabilia repræsentantur. Patet itaque quod verbis prioribus

metus

metus & timor; posterioribus autem timor & desperatio non satis a se invicem distinguantur. *Gassendus* loc. cit. desperationem fidentia, seu fiducia, tanquam summum gradum metus summo gradui spei opponit, atque adeo desperationi locus esse nequit, nisi quando malum consideratur tanquam certo futurum, ut spectetur veluti jam præsens, consequenter inevitabile, idemque intolerabile, quemadmodum fert definitio nostra realis (§. 825.). *Cartesius* loc. cit. metum & timorem a se invicem non distinguit, ac eum arctioribus limitibus coercet, quam par videbatur, dum affirmat, quod rei potiundæ difficultatem repræsentat metum, vel timorem excitare. Enimvero cum in numero malorum sit non potiri bono, quod cupimus; nemo non intelligit, ex eo, quod metuimus, ne boni, quod cupimus, spe frustremur, prona consequentia inferri, quod mali adventus metus causa sit, consequenter idem ex opinione mali futuri nascatur, quatenus idem consideramus tanquam eventu possibile: id quod cum definitione nostra consentit. Recte igitur sensitse *Cartesium* nullus dubito. Enimvero desperationem fiducia opponit, quemadmodum a nobis factum est, eumque extremum metum facit, quemadmodum & nos fecimus. Quamobrem cum modo ostenderimus, illum in genesi desperationis nobiscum consentire, qui eam summum metus gradum facit; evidens est *Cartesium* desperationem in eodem significato accipere debere, quem nos vocabulo tribuimus.

Desperare vulgo idem esse ajunt ac spem abjicere, quemadmodum habet *Martinius* in Lexico: quod cum coincidat cum definitione metus *Cartesii*, qui metum summum desperationem facit: haud obscure intelligitur, quid ad explicationem insufficientem ab etymologia petitam reponi debeat. Rarissime accidit, ut explicationes vocabulorum a rationibus etymologicis derivatæ accuratis definitionibus æquipolleant.

§. 827.

Nimia tristitia ex adventu mali improvise orta dicitur *Terroris*
Terror. Kk kk 3 Pona- definitio.

Ponamus Titium per coemeterium transeuntem in tenebris sibi persuadere, quod spectrum ipsi occurrat, & imaginationis vi representare damna, quæ a spectris inferri hominibus auditur; ex improvise hoc ad spectum in terrorem conjicietur. Unde patet, quomodo terror differat a simplici tristitia: simplex enim tristitia ex opinione mali præsentis est (§. 619.): ast terrori locus est, quod malum ex improvise fiat præsens.

§. 828.

Terror definens qualis sit.

Quando igitur terror successive minuitur, simplex tristitia remanet. Confirmatur hoc experientia, quemadmodum in primis eo in casu apparet, quo non alius affectus contrarius in ejus locum statim succedit, veluti cum eventus docet terrorem fuisse inanem. Ponamus itaque Titium ambire munus ecclesiasticum, quod vacat, & admodum securum esse, quod idem sit obtenturus. Ponamus vero præter omnem spem atque opinionem accidere, ut Sempronius ad idem evehatur. Quamprimum hoc ipsi significatur, in terrorem conjicitur; eo autem languescente & animo ad se ipsum redeunte, sola tristitia afficitur. Nec posthac rursus redit terror, etsi ex iacturæ boni sperati recordatione tristitia nascatur. Causa nimirum tristitiæ remanet (§. 623.); sed causa terroris redire nequit (§. 827.).

Idem de ceteris quoque affectibus notandum, qui per tristitiam, vel gaudium definiuntur, ubi dubitas, num per tristitiam, vel gaudium definiri possint, ac veritatem experiri volueris.

§. 829.

Definitio terroris realis.

Quamobrem quia terrori unice ideo locus est, quod adventus mali improvise sit (§. 827. 828.). *Terror oritur, si malum ex improvise ingruit, ac in primis si præter spem omnem ac opinionem accidit.* Aque in his continetur definitio terroris realis (§. 194. Log.).

Confirmatur autem propositio a posteriori. Ponamus enim nos media nocte secure dormientes, sed ob strepitum in platea evigilantes percipere sonitum campanæ, quo signum in-

incendii in urbe exorti datur. Cum malum nobis repræsentemus incendium propter damna inde oriunda & ex strepitu colligamus ejus viciniam, nihil autem istiusmodi cogitantibus nobis incendium contingat; in terrorem conjicimur, quamprimum sonitum campanæ audimus. Atque adeo patet terrorem esse ex eo, quod malum istud nobis imminet ex improvise. Ponamus alium qui terrore non concutitur, quamdiu non novit, ubinam incendium flagret: surgentem vero e lectu rescire, flammam ex ædibus contiguas serpentem jam in proprias favire; præter omnem opinionem intelligit, quod incendium ipsi sit funestum. Quamobrem cum nemo non norit animum in hoc casu terrore percuti; terror utique ex eo est, quod malum adfit ex improvise.

Poteramus idem confirmare exemplis aliis compluribus. Ita in terrorem conjicitur maleficus, si præter spem, quam conceperat, durior poena eidem dicatur, veluti crurifragium, cum se capite plexum iri sibi persuaderet. Terrori vero locus est etiam in rebus levioris momenti, quando meticulosiores fuerimus, modo adfit opinio damni.

§. 830.

Definitio terroris significatui vocabuli recepto congrua. Quæ Definitio ad confirmandam theoriam terroris in medium adduximus *terroris exempla*, abunde loquuntur vocabulum a nobis in significato *num significatui vocabuli recepto* accepti. Etenim nisi notio, cui significandæ vocabulum *conformis*, destinamus, ea foret, quam communi sermone eodem indigitamus; exempla quoque, in quibus terrori locum esse affirmant omnes ex communi loquendi usu, ad illam confirmandam ac illustrandam adduci minime possent. Terrorem metus speciem facit Cicero, qui eum per metum concutientem definit, seu quem pallor, tremor, crepitus dentium consequuntur. Quod si jam experientiam consulas, quandonam ob metum palleat facies, tremant artus, immo dentes in nonnullis subjectis crepent; illa non accidere reperies nisi eo in casu, in quo malum quoddam nobis imminere opinamur præter omnem expe-

expectationem, quemadmodum exempla paulo ante in medium adducta loquuntur. Atque adeo patet *Ciceronem* non alium nomini tribuere significatum, quam quem nos eidem tribuimus, etsi nos in Psychologia ad ea respiciamus, quæ animæ insunt, cum ex adverso *Cicero* ad ea attendat, quæ in corpore obvia sensui manifesta sunt.

Cicero plures alias metus species distinguit, quemadmodum videre est apud *Gassendum* loco citato f. 497.; sed nostrum jam non est differentias istas explicare, quibus significandis non in quavis lingua vocabula prostant, cum alibi tradi possint, siquidem illarum aliquis sese offerat usus.

§. 831.

Fluctuationis animi definitio.

Facillatio seu *Fluctuatio animi* est alternatio voluptatis atque tædii super bono, quod an obtentu possibile sit reperire non possumus.

Ponamus vacare munus, cui nos pares existimamus, atque idem nobis videri admodum utile. Voluptatem nos ex eodem percipere idemque appetere nemo non novit. Enimvero ponamus nos jam sollicitos esse de mediis idem obtinendi, nulla vero reperiri posse, quorum executio in potestate nostra posita sit. Nemo non denuo novit, nos tædio affici, quod voti nostri compotes fieri non posse videamur atque a spe ejusdem obtinendi arceamur. Quando igitur animum ad emolumenta, quæ tibi a munere isto spondes, denuo advertis visurus, num omnem spem abjicere debeas; voluptate iterum perfunditur animus. Quamobrem ejus obtinendi cupidus si de mediis rursus cogitas, ac in iis reperiendis te denuo infelicem experiaris; voluptate evanescente redit tædium. Hunc animæ statum indigitamus, quando animum vacillantem, vel fluctuantem dicimus. Atque ita simul apparet realitas definitionis præsentis. Datur enim istiusmodi status animæ, qualem definitio supponit.

§. 832.

Quomodo oriatur.

Si bonum absens cupimus, sed media, quibus idem obtineamus, vel ignoramus, vel quenam ex pluribus eligere debeamus minime videamur, tum fluctuat, vel vacillat animus. Si enim bonum absens cupimus, voluptate afficimur (§. 805.). Quando
vero

vero de mediis solliciti, vel nulla prorsus reperire valemus, vel quænam ex pluribus eligere debeamus, nobis non apparet; num illud obtentu possibile sit nobis ignoramus. Quamobrem cum malum reputari debeat, si quod cupimus quomodo obtineatur reperire minime valemus (§. 565.); ex eo tædium tanto majus percipere debemus, quanto majus malum existimamus mediorum ignorantiam, vel difficultatem electionis (§. 612.). Quodsi jam spem abjecturi denuo respicimus bonum, quod cupiebamus; voluptas, qua perfundebamur, denuo reddit ex eadem ratione, qua ante ortam ostendimus. Atque cupiditas stimulo est, ut ad media ruminanda animum denuo advertamus. Quodsi vero non feliciores sumus in iis invenientis, vel eligendis, quam antea fueramus, ex eadem ratione redeunt tædia, quibus ante afficiebamur, ob quam iisdem locum esse ostendimus. Levi autem attentione perspicitur, a tædiis ad voluptatem & a voluptate ad tædia reciprocum reditum per longius temporis spatium continuari posse. Quamobrem cum sic tædia atque voluptas alternent vices, quod an bonum obtentu possibile sit, reperire non possumus *per demonstrata*; animus fluctuat, vel vacillat (§. 831.).

A posteriori propositionis præsentis veritatem confirmat exemplum, quod ad illustrandam propositionem præcedentem in medium attulimus. Sane integra demonstratio ad idem applicari potest, ut adeo & ipsa clarius intelligatur.

Per propositionem præsentem patet istiusmodi statum animæ esse possibilem, quem fluctuationis animi nomine indigitavimus: etsi jam a posteriori ex allato exemplo idem appareat.

§. 833.

Si animus vacillat, vel fluctuat, aut media obtinendi bonum, quod cupimus, ignoramus, aut in iis eligendis, vel exequendis hæremus. Si enim animus fluctuat, voluptas atque tædium alternant vices, quod num bonum obtentu possibile sit reperire non possumus (§. 831.). Quoniam ad bonum obtinendum mediis opus est, atque adeo idem obtentu nobis possibile

sibile non est , quamdiu vel media ignoramus , vel quanam eligere , aut quomodo ea exequi debeamus nobis non apparet ; si animus fluctuat , aut media prorsus ignorare debemus , aut saltem dubii simus necesse est , quibusnam ad finem consequendum uti teneamur , consequenter in iis eligendis hæremus.

Confirmatur id a posteriori ex eo , quod fluctuantes nunc decernamus boni prosecutionem , nunc ab eo prosequendo desistere velimus. Quando decernimus illam , cupiditatem nobis stimulo esse deprehendimus. Quando vero ab eodem prosequendo desistendum esse opinamur , mediolorum ignorantia , vel eligendorum difficultas in causa est. Vacillationem itaque , seu fluctuationem ex eo esse intelligimus , quod media obtinendi bonum , quod cupimus , vel ignoremus , vel in iis eligendis hæreamus.

Si exemplum speciale majoris claritatis causa desideres , aut animum adverte ad id , quod antea in medium attulimus , aut cogita te animo fluctuantem , utrum iter amici visendi gratia facere debeas , nec ne. Amicum enim invisere bonum judicas , atque adeo eum invisere cupis. Ast cum iter ideo faciendum sit , ob rationes contrarias idem suadentes ac dissuadentes dubitas , an iter decernere , an ab eodem desistere debeas , adeoque in eligendo medio hæres. Animi igitur fluctuatio ex difficultate electionis medii est.

§. 834.

*Fluctuatio
animi ex
ignorantia
executionis
mediolorum.*

Si ignoramus quomodo media obtinendi bonum , quod cupimus , exequi debeamus ; animus fluctuat. Etenim si media obtinendi bonum , quod cupimus , ignoramus ; animus fluctuat (§. 832). Sed si ignoramus , quomodo ea exequi debeamus , perinde est ac si ea ignoraremus , utpote bonum , quod cupimus , non consecuturi nisi media exequamur. Quare fluctuare quoque debet animus , si ignoramus quomodo media exequi debeamus.

Idem patet a posteriori. Ponamus vacare munus , ad quod nos evelli malleamus. Ponamus nobis innotescere , collationem

nem

nem muneris unice pendere a nutu ministri cujusdam regii. Ponamus eundem nil dare nisi plus danti; nobis vero nec apparere, unde nummos corradere debeamus, ut donum offerre possimus; nec scire quomodo ipsi idem offerre possimus cum sit accessu difficilis, nec ullus domesticorum nobis notus. Vacillare in hoc casu animum, ita ut nunc munus istud ambire velimus, nunc iterum nolumus; experientia palam loquitur.

Media, quorum executio ignoratur, insufficienter cognoscuntur, cum adeorum notionem etiam pertineat eorundem executio. Insufficiens cognitio ex parte ignorantia est, quatenus nempe quædam adhuc ignorantur, quæ notionem ingredi debebant. Ubi vero operatio a completa notione pendet, respectu hujus perinde est, ac si omnis notio prorsus deficeret. Exemplum speciale, quod dedimus, quæ modo dixi abunde illustrat.

§. 835.

Fluctuatio animi est affectus, qui oritur ex ignorantia mediorum, vel electionis, aut executionis eorundem.

Patet veritas definitionis per ea, quæ modo demonstravimus a priori & a posteriori confirmavimus (§. 833.), quamvis ad eam admittendam sufficiat exempla obvia perspexisse.

§. 836.

Definitiones fluctuationis, vel vacillationis animi sunt recepto significatui conformes. Vocabulum fluctuationis per metaphorice rationem etymologicam translatum fuit ad significandum animæ statum, quo dubia est, an quid agere debeat, nec ne, seu an bonum prosequi debeat, ut eodem potiatur, an idem negligi consultum sit. Ipsa ratio itaque etymologica insinuat, quod nunc in hanc, nunc in illam partem feramur, quemadmodum fluctus nunc huc, nunc illuc feruntur, motu in plagas oppositas alternante. Quamobrem ubi ad affectum significandum adhiberi debet, cum omnis affectus vel sit jucundus, vel molestus, jucundi autem in voluptate, molesti in tradio illius opposito consistent (§. 608. 609.); alia in mente fluctuatio significari nequit, nisi quæ in alternatione

Definitio vacillationis animi num sit conformis significatui recepto.

tione voluptatis atque tædii consistit. Hanc autem alternationem locum habere non posse nisi super bono, quod utrum prosequi, an negligere debeamus, nobis non constat, ex antecedentibus satis manifestum est. Non aliud igitur vocabulum ad denotandum affectum, quem hactenus expendimus, suppetit, quod non invito communi usu loquendi adhiberi possit, quam fluctuatio animi (§. 831.). Etsi enim vulgo latius pateat vocabuli significatus, ut etiam extra sphaeram affectuum sese extendat; affectum tamen hunc ambitu suo simul comprehendit. Nemo autem non videt, in doctrina affectuum significatum esse restringendum, quemadmodum jam antea in casibus aliis similibus factum. Præeuntem habemus *Cartesium* loc. cit. qui fluctuationem animi procedere ait a difficultate in electione mediorum, aut in executione, sub qua etiam ignorantiam eorundem comprehendit. Qui enim media prorsus ignorat, is nec novit, quomodo ea exequi debeat, ut adeo philosophus non diversam a nostra tradere videri debeat definitionem. Sermone vernaculo affectum hunc *Wandelmutbigkeit* appellamus, cui vox latina vacillatio animi respondet. Vacillare idem est ac inconstanter ire, adeoque ad animum translatum vocabulum denotat hesitationem in electione, vel executione mediorum, consequenter ratione etymologica adstipulante ad exprimendum affectum, cum quo jam nobis negotium, adhiberi potest, quemadmodum a Germanis fieri solet. Animus enim incertus est in electione & executione mediorum, quemadmodum pes in eundo.

Apparet ex dictis vacillationem animi esse affectum mixtum (§. 610.): id quod ex ipsa quoque definitione nominali palam est (§. 831.).

§. 837.

*Horroris
definitio.*

Horror dicitur metus, qui oritur ex representatione mali tanquam ingentis.

E. gr. Horret animus, quando oculis intuemur præsentem supplicium.

plicium grave, veluti crurifragium, si quidem id nobis repræsentamus tanquam malum ingens.

§. 838.

Quoniam animum horrere affirmamus, quotiescunque *Num definitio usui loquendi conformis.* metum ingentem exprimere volumus, quemadmodum nemini non notum est; metus autem ingens ex opinione ingentis mali imminentis est, quemadmodum ex definitione metus colligitur (§. 822.); *Horroris definitio, quam dedimus, usui loquendi communi conformis.*

Non adeo opus est, ut de consensu definitionis horroris cum communi usu loquendi evincendo plura addamus, cum is adeo obvius sit,

§. 839.

Quoniam terror oritur ex adventu mali improvviso (§. 829.), *Horror* horror autem ex opinione ingentis (§. 837.); *si malum ex improviso imminens nobis tanquam ingens repræsentamus; horror cum terrore conjungatur,*

Conjunctionem loquitur experientia: casum vero, in quo ea contingit, rite fuisse determinatum, acumine utenti observare licet.

§. 840.

Et quia desperationi locus est, si malum imminens nobis *Quando in super desperationis ratio super accedat.* repræsentamus tanquam inevitabile, tum simul tanquam intolérable (§. 825.); *si malum ex improviso imminens nobis tanquam ingens ac inevitabile repræsentamus, horrorem & terrorem simul ortum excipit desperatio.*

§. 841.

Pusillanimitas est tristitia orta ex difficultate boni, quod *Pusillanimitatis definitio.* cupimus, obtinendi.

E. gr. Si Titius munus ambit, quod maxime cupit, varia aut eidem obijciuntur impedimenta, quibus tollendis separem fore desperet, inquietudo illa animi, qua angitur, singularis quædam tristitiæ species, qua animus abjicitur, pusillanimitatis nomine venit.

§. 842.

Si nobis repræsentamus impedimenta, quo minus bonum, quando nam quod

quod cupimus, obtineamus, tanquam insuperabilia; pusillanimitas oritur. Quodsi enim impedimenta, quo minus bonum obtineamus, tanquam insuperabilia nobis representamus; certo persuasi nobis videmur nos eodem minime posituros, aut talem spem omnem abjicimus (§. 799.). Quoniam vero idem cupimus *per hypoth.* malum utique judicare debemus, quod idem consequi nequeamus (§. 565.). Quare cum exindetudium, immo tristitiam (§. 619.), percipere debeamus (§. 613.); tristitia oritur ex difficultate boni, quod cupimus, obtinendi, adeoque pusillanimitas (§. 844.).

Loquitur idem exemplum, quod ad illustrandum definitionem pusillanimitatis in medium adduximus. Atque adeo patet propositionem præsentem a posteriori confirmari: patet etiam quomodo eandem confirmaturi ejus experimentum in nobis, vel aliis capere debeamus.

Impossibilitas obtinendi a difficultate distingui debet. Impossibile nobis est obtinere bonum, quod cupimus, quando nobis deficiunt media idem obtinendi, vel mediorum executio in potestate non est. Difficile nobis est obtinendi bonum, quod cupimus, si impedimenta sese objiciunt, quibus tollendis num pares simus dubitatur, ita ut plurimum negotii nobis facessat eorum sublatio. Hæc differentia, quæ inter impossibilitatem & difficultatem boni obtinendi intercedit, facile nos docet eam, quæ inter fluctuationem & pusillanimitatem obtinet.

§. 843.

*Quenam
pusillanimis
sibi repræ-
sentet.*

Qui pusillanimis est, impedimenta, quo minus bonum, quod cupit, obtineat, tanquam insuperabilia sibi representat. Qui enim pusillanimis est, is sibi representat difficultates boni, quod cupit, obtinendi (§. 841.), adeoque sibi persuadet, fore ut idem non obtineat. Quodsi bonum, quod cupimus, nobis tanquam obtentu difficile representamus, necesse est, ut nobis occurrant impedimenta, quæ obstare videntur, quo minus istud consequamur, & quibus tollendis nos non pares esse existimamus. Impedimenta igitur, quo minus bonum, quod cupit, obtineat, tanquam insuperabilia sibi representat.

A posteriori propositio confirmatur per eadem exempla, quæ ad confirmandam præcedentem conducunt. Sane pusillanimes de causa tristitiæ, qua anguntur, quasi respondēt, se infelices esse, quod omnibus licet adhibitis mediis id tamen consequi nequeant, quod consequi student. Pusillanimitas subinde quoque observatur in iis, qui in studio aliquo inanem operam sumunt, etsi omnem adhibeant diligentiam, librosque sibi comparent, quos in eo scientiarum genere optimos prædicari norunt.

§. 844.

Pusillanimitas est affectus, qui oritur, si quis impedimenta in prosequendo bono, quod cupit, obvia tanquam insuperabilia sibi repræsentat. *Pusillanimitatis definitio realis.*

Obtinet nimirum in executione mediorum & tanto major esse solet, quanto major erat spes, quam in electione mediorum susceperamus. Et perinde quidem est, siue impedimenta ista sese offerant de executione mediorum cogitanti, siue eandem aggredienti.

§. 845.

Si quis bonum prosequi decrevit, nec a proposito suo sese dimoveri patitur; de mediis vero cogitanti nulla sese offerunt, nec aliorum consiliis idem juvatur; pusillanimitas oritur. Si quis enim bonum prosequi ita decrevit, ut a proposito suo se dimoveri non patiatur, quin ingens ejus sit cupiditas dubitari nequit (§. 810.). Nil magis igitur in votis habet, quam ut eodem potiatur, maximumque malum reputare debet, si eodem non potiatur. Quamobrem cum de mediis cogitans nullaque reperiens omne præsidium in consiliis aliorum collocet; ubi his destitutum se videt, quæ mediorum loco esse debebant, eorundem defectum tanquam impedimentum insuperabile sibi repræsentare debet, quod obstat, quo minus bonum, quod vehementer cupit, consequatur, prouti ex ipsa impedimenti notione colligitur (§. 726. *Ontol.*). Quoniam itaque pusillanimitas oritur, si quis impedimenta in prosequendo bo-

no obvia tanquam insuperabilia sibi repræsentat (§. 844.); eadem quoque oriri debet, si quis bonum vehementer cupit & media ignorans nihil præsidii in consiliis amicorum reperit, adeoque in hypothesi propositionis præsentis.

Patet idem a posteriori. Ponamus munus vacare ecclesiasticum, quod vehementer cupit Mevius. Ponamus porro eum non videre, quomodo ad idem pervenire possit; sed spem omnem in amico collocare, cujus commendatione ac consiliis id effici posse confidit, ut voti sui compos reddatur. Quod si jam cognoverit commendationem amici haud multum valituram & consilia, quæ suppeditat, vel esse nulla, vel parum certa, ut iis tuto se fidere posse non existimet; munus vehementer cupiens & durante cupiditate de eo obtinendo desperans pusillanimitas evadit. Hinc audias conquerentem, se destitui omnibus consiliis: neminem esse, qui ipsi succurrere velit. Aliorum commemorantem audias felicitatem, immo summopere prædicantem, suam vero accusantem infelicitatem & impatienter diris nescio quibus semetipsum devoventem, pro uti quidem diversimode dispositus fuerit animus affectusque socii alii superaccedunt ex affectuum theoria decenter applicata discernendi ac separandi a se invicem.

Si quis non perspicit, quomodo inopia consiliorum spectari possit tanquam impedimentum obtinendi boni, quod prosequi decrevimus, is definitionem impedimenti generalem applicet, quam dedimus (§. 726. *Ontol.*), & omnis obscuritas, quæ superest, statim dispelletur. Qui enim ipsemet media ignorans consilia aliorum eodem loco habet; is inde sibi persuadet, se bonum, quod cupit, consequi posse (§. 937. *Ontol.*). Quamobrem ex inopia consiliorum, quorum spem conceperat, intelligit, cur bonum, quod vehementer cupit, consequi nequeat, adeoque in eadem ratio sufficiens frustrati propositi continetur (§. 56. *Ontol.*), consequenter eam impedimenti loco habere debet (§. 726. *Ontol.*).

§. 846.

Definitiones pusillanimitatis sunt recepto significatui conformes.

*Definitio-
nes pusilla-
nimitatis*

formes. In affectu pusillanimitatis explicando multus est *Gassend* ^{num sint re.} *loc. cit. f. 498.* ita autem ille : Ubi, inquit, ne non ob- ^{cepto signi-} *tinemus bonum, aut devitemus superemusve malum metui-* ^{ficari con-} *mus, vel etiam prorsus desperamus, tunc animos ad adori-* ^{formes.} *endum prosequendumque despondemus animove pusillo, sive ad agendum segni reddimur.* Hinc porro infert, pusillanimitatem (quam & *segnitiem* vocat) esse affectum, quo anima in se quasi collabatur & cum difficultatibus malisque, quæ iri superatum diffidit, colluctari detrectet. Videmus ad genesin hujus affectus requiri a *Gassendo*, ut bonum aliquod cupiamus, ad quod etiam pertinere mali evitationem palam est; ut in eo prosequendo objiciantur nobis difficultates, & ut has ipsas difficultates a nobis superari non posse opinemur. Quoniam difficultates istæ aliæ esse nequeunt, quam vel impedimenta, quæ nobis in executione mediorum objiciuntur, vel inopia mediorum consilio alieno minime levanda; non alium affectum pusillanimitatem vocat *Gassendus*, quam cui nos idem nomen imposuimus (§. 843. 844.). Nec minus eundem vocabuli significatum tuetur *Cartesius* loc. cit. art. 59. Diserte enim pusillanimitatem tribuit difficultatibus in executione mediorum, quemadmodum fecerat *Gassendus*. Quare cum ostenderimus *Gassendum* eundem affectum pusillanimitatem appellare, quem nos hoc nomine insignimus; per se patet *Cartesium* quoque eundem significatum tueri. Germanico idiomate idem affectus *Kleinmüthigkeit* appellatur, quod vi compositionis coincidit cum vocabulo latino. Nemo vero est, qui nesciat nos vocabulo isto uti, quoties videmus alterum lugentem & impatienter conquerentem, se omnibus consiliis esse destitutum, ut bono, quod cupit, potiri non possit, vel malum, quod metuit, declinare minime valeat.

Cur hic affectus Latinis dicatur pusillanimitas, Germanis *Kleinmüthigkeit*, ipsa affectus hujus natura insinuat, a qua denominandi ratio in utraque lingua petita. Quemadmodum enim Latinis animum despondere, vel abjicere dicitur qui, cum agere vellet, ad

(*Wolffii Psychologia.*)

M m m m

agen-

agendum segnis efficitur, ob difficultates, quibus amovendis se parem fore diffidit; ita in simili casu vernaculo nobis sermone dicitur den Muth sincken lassen. Animus enim Latinis, quemadmodum Muth Germanis est mentis vigor, unde veluti quidam intrinsecus animæ agendi impetus manat, quando agendi occasio nobis offertur: ea tantummodo differentia est, quod vocabulum Germanicum non sit homonymon, quemadmodum Latinum, propterea quod lingua Germanica vocabulis abundat & Germani, qui linguæ potentes sunt, in rebus accurate discernendis verba apposite admodum seligunt.

§. 847.

*Animositas
tis definitio
310.*

Animositas est prædominium cupiditatis ac spei vincentis metum ex difficultate boni obtinendi orti. Appellatur etiam *Audacia*.

E. gr. Titius cupit munus, quod vacat & quod a se ornari posse novit patronus, cujus favore ad idem evehi potest. Visa igitur possibilitate ejus obtinendi spe lætatur animus (§. 800.). Enimvero ponamus patrono esse agnatum, quem is singulari favore complectitur, ad idem munus adspirantem. Ubi hoc cognoverit Titius, metu percutitur, ne hic sibi præferatur, atque adeo metus ex difficultate boni obtinendi oritur (§. 822.). Enimvero ubi expendit, agnatum patroni non esse muneri obeundo parem, quod ex intentione Principis ornari debet; metu abjecto cum cupiditate spes resurgit ac vires capit, ut adeo a proposito ambiendi muneris non desistat, sed alacri animo executionem ejus adoriatur: quod ubi fit, animosus dicitur, vel, si justo animosior fuerit, prorsus audax.

§. 848.

*Quando
animositas
oriatur.*

Si difficultates boni, quod cupimus; obtinendi nobis expendentibus occurrat ratio, ob quam eadem si non certo superabiles, certe superatu non prorsus impossibiles videantur; animositas oritur. Quoniam difficultatem boni, quod cupimus, obtinendi in executione obviam nobis expendentibus occurrat ratio, ob quam eadem si non certo superabiles, certe superatu non prorsus impossibiles videntur per hypoth. remotis autem difficultatibus bonum obtentu possibile est; idem obtentu possibile, minimum non prorsus impossibile in casu

pro-

propositionis præsentis videri debet. Quamobrem cum ex repræsentatione difficultatum obtinendi boni, quod cupiebamus, nasceretur metus, ne ab eodem excludamur, voti nostri compotes minime facti (§. 822.); ex earundem vero superabilitate, ob quam obtentu nobis possibile, aut saltem non prorsus impossibile videtur *per demonstr.* spes reviviscat, quæ antea ex repræsentatione mediorum enata fuerat (§. 800.); cupiditas ac spes metum vincunt atque adeo prædominantur. Quamobrem animositas oritur (§. 847.).

Confirmatur propositio a posteriori exemplo, quod modo ad illustrandum definitionem animositatis in medium adduximus (*not.* §. 847.). Integra enim demonstratio in eo continetur, ut ab eodem abstrahi possit: id quod mirum non est. Etenim exemplum docet, quomodo animositas in dato casu speciali oriatur; demonstratio autem idem terminis generalibus enunciat.

Constat artis demonstrandi peritis, demonstrationes haud raro ad casus speciales applicatas proferri, ubi si in genere quid demonstrari debet demonstratio obscurior intellectu videtur, aut difficilius, ut ejus vim facilius percipere possint qui alias attentione sufficiente uti nequeunt.

§. 849.

Si quis animosus evadit, is rationem perspicit, cur difficultates in prosecutione boni, quod cupimus, emergentes superatu impossibiles, aut saltem non prorsus impossibiles videntur. Si quis enim animosus evadit, cupiditas boni ac spes ejus obtinendi superare debet metum ex difficultatibus ejus obtinendi ortum (§. 847.). Quoniam adeo metus tamdiu subsistere debet, quamdiu difficultates istas tolli nos posse apparet (§. 118. *Ontol.*), nec spes oriri potest, nisi bonum repræsentetur ut obtentu possibile (§. 800.); evidens est si spes reviviscere ac adversus metum prævalere debeat, difficultates istas non amplius tanquam insuperabiles, sed ut superabiles, aut superatu non

prorsus impossibiles spectari debere. Quoniam igitur tanquam superabiles, aut superatu non prorsus impossibiles spectari nequeunt, nisi adfit aliqua ratio, cur tales appareant (§. 70. *Ontol.*); si quis animosus evadit, is utique rationem perspicere debet, cur difficultates emergentes in prosecutione boni superabiles esse existimet.

Confirmat idem experientia, modo notes in eo casu, quo quid vehementer cupimus, tanquam superabiles spectari difficultates, quando demonstrari nequit quod sint insuperabiles, juxta istud pervulgatum: Quod quis maxime vult, id maxime credit. In inevidentibus enim appetitus influit in assensum. Et tutius non invita prudentia existimatur vel irritu conatu aliquid suscipere, quam ex post facto intelligere a nobis prætermisam esse occasionem obtinendi bonum, quod acquisitu possibile fuerat. Exempla specialia non adjicio: trahi huc potest, quod ante commemoravi.

Nimirum in præsentē casu non evidentibus rationibus opus est, sed sufficiunt probabiles. Inter probabiles vero infimum bonum tenet, quod in casu damni ex negligentia metuendi possibile haberi debeat, cujus impossibilitas demonstrari nequit. Ceteris animosiores sunt, qui in negotiis humanis probabilitati cedunt, nec evidentiam importune flagitant. Sed de his plura dicemus, si Deo ita visum fuerit, in Logica probabilium, quæ magnum ad prudentiam affert adjumentum, quemadmodum in moralibus ex instituto docēbimus.

§. 850.

*Definitio
realis Animo-
sitas.*

Animositas est affectus, qui oritur, si difficultates obtinendi boni, quod cupimus, perpendentibus videantur superabiles, aut superatu non prorsus impossibiles.

Tum in primis difficultates nobis videntur tanquam superatu non prorsus impossibiles, quando ostendere non possumus quod impossibile sit, eas superari a nobis. Ceterum notanda est hic differentia, quæ inter diversos homines intercedit: neque enim omnes ejusdem sunt indolis. Alii enim evidentiam in negotiis humanis desiderant perinde ac in scientiis, atque hi sunt timidiores & ad pusillanimitatem pro-

proclives : alii probabilitati cuicunque locum concedunt, atque hi sunt ceteris animosiores. Sed differentiam istam nunc quidem curatius non scrutamur.

§. 851.

Definitiones animositatis significatui recepto conformes. Animositatem *Gassendus* loc. cit. definit per affectum, quo se anima concitat & ad colluctandum cum difficultatibus malisve, quæ iri superatum confidat, prorumpit. Nos tunc audentes effici, animosque ad aggrediendum pergendumque assumere pronunciat, ubi bene speramus confidimusque fore, ut aut objectas difficultates perrumpendo bonum obtineamus, malumve evitemus, aut cum malo ipso colluctando illud superemus. Patet adeo animositatem, vel audaciam (duo enim hæc vocabula *Gassendo* synonyma sunt) ex mente ipsius oriri, si bonum, quod cupimus, quo etiam mali evitatio refertur, nobis repræsentamus tanquam obtentu difficile, difficultatem tamen superari posse confidimus, si vel maxime certo constare nobis nequeat, utrum superari possit, nec ne. Hæc satis consona esse iis, quæ nos de animositate demonstravimus (§. 848.) palam est. *Cartesius* loc. cit. animositatem, aut audaciam affectum appellat, qui difficultati in executione remediorum sese opponit. Nemo sese opponit difficultatibus, nisi quas superari a se posse confidit, aut minimum quas quod superare non possit nondum certo constare opinatur. Quamobrem *Cartesius* non minus, quam *Gassendus* eum vocabulo tribuit significatum; qui definitioni nostræ reali (§. 850.), consequenter & nominali, ex qua realem deduximus (§. 848.), conformis est.

Quod mali evitatio in numerum bonorum referri debeat, in superioribus jam monuimus, nec quenquam fore arbitror, qui non sua sponte idem admittat. Malum igitur videri debet malum non evitare atque adeo cum malo colluctatur, qui idem evitare studet,

§. 852.

Desiderium est tædium ex mora boni venturi, quod speratur, perceptum. *Desiderii definitio.*

E. gr. Ponamus amicum ex oris peregrinis, in quas excurrerat, reducem nobis per famulum suum nunciare adventum suum ac significare, quod in eo jam sit, ut ipsemet ad nos veniat. Expectamus itaque adventum ejus, quem nobis plurimum voluptatis allaturum speramus. Quod si non statim advenerit, moram impatienter ferimus. Tædium, quod inde percipitur, est id quod desiderii nomine compellamus. Differre hoc tædium tanquam singularem quandam speciem ab aliis ipso sensu interno docemur.

§. 853.

*Definitio
realis de-
siderii.*

Quoniam adeo tum demum desiderare bonum dicimur, si spei superaccedit tædium ex mora adventus subortum (§. 852.); *Desiderium oritur, si mora adventus boni, quod speramus, tædium nobis creat*: id quod exemplo, quo definitionem desiderii illustravimus, a posteriori confirmatur.

Propositio hæc definitio realis est ex nominali immediate fluens.

§. 854.

*Definitio
desiderii
num com-
muni usui
loquendi
conformis.*

Definitio desiderii, quam dedimus, communi usui loquendi conformis. Communem vocabuli significatum expositurus *Martinius* in *Lexico*: desiderium, inquit, est rerum absentium & nondum adeptarum concupiscentia. Quoniam objectum desiderii facit res absentes, quas nondum adepti sumus, hoc ipso significat, nos desiderare ea, quorum obtinendorum aliqua spes nobis superest, ita enim desiderium distinguitur a cupiditate, quæ est boni absentis simpliciter talis. Quod si dicas ea quoque desiderari, quorum obtinendorum ipse nulla nobis superest; id dici subinde non negamus, sed idem ex inconstantia loquendi fieri palam est: cujus si vel maxime *Martinius* rationem habeat, nostra tamen parum refert, cum in philosophia ab inconstantia loquendi simus alieni. Enimvero ad desiderium non sufficit boni venturi expectatio, alias enim a spe non differret (§. 800.). Spei igitur quid superaddere debet. Nil autem est quod superaddere possit nisi tædium ex mora oriundum, quo expectatio efficitur impatiens. Quamobrem
appa-

apparet, si significatum tædii intra limites affectuum coarctes & accuratius determines, quæ notionem verbis *Martinii* respondentem ingrediuntur, non aliam posse condi definitionem desiderii, quam nos tradidimus. Quoniam desiderio agnata est cupiditas, agnata spes est; ecquis miretur idem vulgo non satis ab affectibus cognatis distingui, ubi verbis exprimendum quod in ipsius idea continetur? Enimvero ut nihil supersit dubii circa significatum vocabuli, perpende ea, quorum tibi conscius es, quando te anxie quid desiderare affirmas (hic enim casus affectus est); nostramque definitionem experientiæ consentientem deprehendes ea in te percepturus, quæ ad desiderium tanquam affectum requisivimus. *Cartesius* loc. cit. art. 67. per desiderium intelligit affectum ex bono præterito nascentem. Enimvero cum bonum præteritum consideretur tanquam absens, nec ex eo, quod eodem nobis frui datum est, quicquam ideæ præsentis addatur, nisi quod ea res sit voluptatis creatrix, adeoque quod sit bona; ex boni absentis consideratione non nascitur nisi cupiditas (§. 807.). Quod si malum reputetur, bonum præteritum non amplius præsens esse, quemadmodum malleamus; tædium, immo tristitia inde oritur tanquam ex malo præsentis (§. 623.). Quare cum hic permisceatur cupiditati tædium ex absentia boni, quod non amplius præsens sit in desiderio autem ob moram adventus (§. 853.), adeoque ex eo, quod nondum præsens sit bonum; *Cartesius* ad priorem casum respexit, adeoque desiderium ex mente ipsius erit affectus ex absentia boni, quod cupimus, orti, seu ex eo, quod non sit præsens, quod cupimus, consequenter ejus notio ad casum quoque nostra definitione distincte expressum trahi potest. Uterque tamen casus non prorsus idem est: etenim in casu definitionis boni adventum speramus; in casu *Cartesii* boni absentis tantummodo nobis cupiditas est, spes nulla. Unde accidit, ut uterque mentis status ipso sensus interni iudicio diversius deprehendatur, neque adeo sub de-

fide-

fiderio a nobis comprehendatur. Minime autem opus nobis videtur peculiarem constituere affectum pro eo casu, in quo tradium nobis subnascitur ex eo, quod bonum absens sit, nec ulla nobis ejus spes superfit, quod tamen præsens esse malle-
mus & cujus nobis jucunda est memoria, quatenus bonum ju-
dicamus, quod nobis olim eo frui datum fuerit. Etenim cum
plures diversi affectus hic invicem non permiscantur, sed subi-
to vices alternent, prout attentio in hanc, vel illam ideæ præ-
sentis partem dirigitur; affectus singulos suis nominibus efferre
licet. Entia præter necessitatem multiplicanda non sunt. Quic-
quid sit, sufficit agnoscere *Cartesium* desiderium esse speciem tri-
stitiæ ortam ex absentia boni, quod cupimus: ita enim defini-
tio utrumque comprehendit casum.

Quodli in anterioribus peculiares affectuum species constituisse
videmur, qui ad alios referri poterant, vel in quibus duorum quo-
rundam affectuum aliorum alternatio obtinet; nonnisi attentione o-
pus est ad affectus præsentes, ut differentiam casus, in quo *Cartesius*
animæ desiderium præter necessitatem tribuit tanquam affectum a
ceteris diversum, a casibus ceteris, quos modo diximus, perspicias.
Etenim in illo casu affectus, qui alternant vices, non immutantur,
ac uno redeunte alter evanescit; in ceteris vero casibus quod in alio
affectu est in dato singulari ratione modificatur, ut naturam mutet,
ac plures affectus sibi invicem permiscantur, ut mixtus sit diversus
a simplicibus. Uberiorem lucem his affundet *Psychologia* rationa-
lis, ubi distincte explicabuntur, quæ nunc confuse, percepta indi-
cantur.

§. 855.

*Hilaritatis
definitio.*

Gaudium ortum ex eo, quod malum sit præteritum, vel
metus mali evanuerit, dicitur *Hilaritas*.

E.gr. Si amicus noster gravi morbo decumbat, quem ipsi fa-
talem prædicunt Medici, tristitia afficimur jacturam amici pro malo
reputantes. Enimvero ubi nobis nunciatur ipsum reconvalescere; sa-
nitatis recuperationem in numerum bonorum referimus. Atque
adeo ex bono præsentem gaudium oritur, quod cum singulare sit ab
alio gaudio differens ex bono quodam nobis præsentem oriundo, quod
in nos collatum possidemus, hilaritatis nomine venit. Germani di-
cunt

cunt in hoc casu: Ich bin frohe, daß das Unglück vorbei ist, oder daß das Ungemach überstanden, atque adeo hilaritas est is affectus, quem Germani Frölichkeit appellare solent.

§. 856.

Oritur adeo hilaritas, si nobis representemus malum, rem *Quando*
tædii creatricem, tanquam tædia nobis non amplius creaturum. *oriatur.*

Oritur enim ex eo, quod malum sit præteritum, vel metus mali evanuerit, adeoque præteritio mali est ratio sufficiens huius affectus, ubi ad animam refertur (§. 56. *Ontol.*), consequenter eadem posita ponitur & ipse (§. 118. *Ontol.*). Enimvero si perpendimus malum, illud tanquam rem tædii creatricem consideramus (§. 569.). Quodsi porro idem spectamus tanquam præteritum; utique cogitamus, quod nobis tædium non amplius sit creaturum. Quamobrem ubi nobis representamus malum, quod nos vexavit, tanquam nobis non amplius tædium creaturum; hilaritas oritur.

Patet idem a posteriori ex eo, quod alterum hilarem esse jubentes ea utamur ratione, quod perpendere debeat, quantum tædium perceperit ex malo, nunc vero ab eodem penitus sit liberatus, veluti cum quis luget suæ mortem uxoris, vel filii morbo diuturno & difficili tandem extincti, quo graviter afflictus fuit animus.

Habemus hic hilaritatis definitionem realem, quæ modum ostendit communi praxi conformem eandem in animo alterius excitandi.

§. 857.

Quoniam *Cartesius* significatum vocabuli in Philosophiam introduxit loc. cit. quem hilaritati tribuimus; *receptum tueri* *Num defi-*
significatum non obstante vago usu loquendi, qui dissentire *nitio bila-*
videtur (§. 147. 144. *Disc. prælim.*). *ritatis usui*
loquendi
conformis.

Quod communis usus loquendi repugnare videatur significatui, quem hilaritati tribuimus cum *Cartesio*, liquet. Sane quando apud *Terentium* legitur, *Hilarem hunc sumamus diem*, non videtur significatui nostro esse locus. Neque in simili casu, quando Germani dicunt, *last uns frölich seyn*, idem obtinere videtur. Enimvero si cu-
(*Wolffii Psychologia.*) N n n n rati-
us

ratius rem consideres, eum hic requirimus animæ statum, qualis esse solet ejus, qui ab omni tædio liberatus voluptate præsentē fruitur: unde si quem minus hilarem videmus, eum seponere jubemus quæ tædia creant, quasi jam ab iis prorsus liberatus esset. Et qui hilares sunt, ea tenentur animi persuasione, quasi jam evanuerint omnia, quæ tædio esse possunt, consequenter omnia a nobis ablata fuerint mala. Non igitur prorsus a communi loquendi usu recedimus. Immo videtur vocabulum primo habuisse eum significatum, quem eadem tribuimus: deinde vero is ad casus similes extensus.

§. 858.

*Fastidii
definitio.*

Tædium perceptum ex eo, ex quo ante voluptatem percipiebamus, dicitur *Fastidium*.

Probe notandum est rem hic supponi prorsus eandem, ita ut nihil in ea immutetur. E. gr. Ponamus nos ex sapore cibi cujusdam voluptatem insignem percipere, atque adeo eundem capientes delectari. Quod si jam accadat, ut sæpius repetito ejus usu sapor non amplius gratus sit, sed ingratus evadat, ut tædio ex ejus usu afficiamur: tædium hoc, quod percipimus dum is nobis offertur, est id, quod fastidium appellamus.

§. 859.

*Quomodo
fastidium
oritur.*

Quoniam tædium ex eo percipimus, ex quo ante voluptatem perceperamus, si quod bonum videbatur idem postea malum deprehendatur (§. 558. 570.) ; *Fastidium oritur, si, quod nobis tanquam bonum representabamus, idem deinceps tanquam malum representemus.* A posteriori idem confirmat exemplum, quod modo ad definitionem illustrandum in medium adduximus.

Proximus ad fastidium gradus est, si quod nobis voluptatem creabat, nunc non amplius creet, consequenter si quod bonum judicaveramus nunc tale non amplius videtur: ipsum tamen fastidium nondum adest, si quidem per id affectum intelligis. Defectus enim voluptatis affectus non est. Enimvero si res ista proponitur ad appetendum, cum malum judices eam appetere ; ex eo tædium percipis, quod eam appetere debeas (§. 570.). Atque eatenus ex re, quatenus ad appetendum proponitur, tædium capitur, ex qua antea voluptas percipiebatur. Tuncque fastidio locus est, etsi rem in se spectatam

Eatam non malam judices, nec bonam, adeoque indifferenter te ad eandem habeas quamdiu eandem ad te minime refers. Per inconstantiam loquendi subinde fastidire dicimur, quod nihili facimus, cum antea in pretio nobis fuisset. Sed cum isto significato vocabuli nobis in doctrina affectuum nihil est negotii.

§. 860.

Quoniam quæ sensibus grata sunt & iis mediantibus nobis *Fastidium* voluptatem creant continuo usu tandem minus grata fiunt, vel *eorum, quæ* prorsus ingrata, ut vel nullam amplius voluptatem, vel prorsus *sensibus* tædium creent; *Quæ sensibus grata sunt, eorum fastidium ipsa die, grata.* seu *duratione excitatur.*

Idem a posteriori confirmat exemplum paulo ante allatum (not. §. 858.). Cibus enim, qui bene sapit, quando raro capitur, sæpius iterato ejus usu tandem fastiditur. Jam cibus ex eorum numero est, quæ sensibus grata sunt. Sola autem duratione excitatur ejus fastidium.

§. 861.

Definitio fastidii recepto vocabuli significatui conformis. *Definitio* Quod *Cartesius* vocabulum in eodem significato accipiat, quem *fastidii num* nos eidem tribuimus (§. 858.), facile probatur. Quandoque *usui loquen-* enim, ait, duratio boni gignit sarietatem, sive fastidium. Quoni- *di conformis.* am fastidium in numerum affectuum refert & quidem molestorum; cum tædio conjungi debet (§. 609.). Quoniam itaque tædium percipere debemus ex bono ob solam durationem, ex bono autem voluptatem percipimus (§. 558.) ; tædium juxta *Cartesium* ex eo percipimus, ex quo ante voluptatem percipiebamus, etsi id in se non fuerit mutatum, quando fastidium oritur. Id vero prorsus coincidit cum definitione nostra fastidii. Vulgo non attenditur, quod fastidium in numero affectuum sit, adeoque nobis sufficit tueri significatum, qui ab eo non abhorret, quem vocabulo tribuit *Cartesius*.

Affectum esse fastidium vel ex eo patet, quod extraordinarius sanguinis

guinis ac fluidorum reliquorum in corpore motus observetur, quando quid fastidimus : id quod affectum arguere palam est (§. 611.).

§. 862.

Ira definitio.

Ira est tardium insigne ortum ex injuria nobis vel aliis illata, conjunctum cum odio ejus, qui eam intulit. Cartesius vocat indignationem, si injuria aliis illata fuerit.

Quodsi cui plurima exhibuimus beneficia ac is ingrato animo nos diffamat; injuriam nobis ab eodem inferri nemo dubitat, tantoque major injuria habetur, quanto majora in eum a nobis profecta sunt beneficia. Quodsi jam nobis narrantur calumniæ, quibus famæ nostræ labem adspargere conatur, ira exardescit animus. Quod vero sit tristitiæ quædam species odio aliisque affectibus permixta attendentibus patet. Odium enim prodit nocendi animus, qui sese in irascentibus satis aperte manifestat. Tristes nos esse ira deflagrante experimur.

§. 863.

Pudor quando ira permiscetur.

Si injuria ab altero nobis facta famam nostram ledit, saltem opinione nostra; pudor iræ permiscetur. Etenim si injuriam ab altero factam nobis repræsentamus, ira nascitur (§. 862); si eandem injuriam nobis repræsentamus tanquam famæ nostræ adversam, ex opinione censuræ aliorum, quam incurremus, pudor oritur (§. 779.). Quamobrem ubi utrumque una eademque idea menti exhibetur; ira & pudor simul in anima cooriuntur, atque adeo invicem permiscentur, ut a se invicem non distinguantur, quamdiu uterque affectus simul durat.

Pudorem in eo casu iræ permisceri a posteriori patet, si in rationem ejusdem inquirimus. Etenim tum deprehendimus, nos ideo irasci, quod famæ nostræ adversum existimamus factum alterius, quoniam causæ pudoris magis nobis conscii sumus quam causæ iræ, atque adeo illam cum hac confundimus.

Nimirum iræ causa est, quod alter fecit, quod nobis malum est. Malum vero judicatur ex eo, quod famam nostram læserit. Unde patet cum ratio rationis iræ sit ratio pudoris, cur non semper iram comitetur pudor.

§. 864.

§. 864.

*Si nobis repræsentamus injuriam ab altero nobis factam, nos- Quando
que in causa esse existimamus, quod eam nobis intulerit; pœnitentia pœnitentia
iræ permiscetur.* Dum enim nobis repræsentamus injuriam ab *iræ permi-
scatur.* altero nobis factam, ira exardescit animus (§. 862.). Jam vero
dum nos in causa esse existimamus, quod eam nobis intulerit;
eorum, quæ a nobis male facta sunt, nobis conscii sumus (§.
565.), consequenter nos eorundem pœnitet (§. 759.). Quo-
niam igitur ira & pœnitentia simul cooriuntur; iræ pœnitentia
ut in casu præcedente pudor permiscetur.

Pœnitentiam permisceri iræ satis nobis conscii sumus, ubi
in rationem ejusdem attentionem nostram convertimus, seposita
quasi injuria nobis facta, cum affectus hic facillime dignoscatur
a ceteris omnibus atque per verba foras erumpat.

Facile apparet non repugnare ut pœnitentia atque pudor simul
permisceantur iræ, cum minime repugnet utriusque rationem simul
poni (§. 863, 864.).

§. 865.

*Si per injuriam ab altero nobis factam damnum ingens nobis Terror ac
imminere videtur, quod ante non metueramus; iræ terror permi- metus quan-
scetur. Quodsi vero malum tantummodo videtur eventu possibile; do ira per-
metus eidem permiscetur.* Etenim quia ex injuriæ ab altero no- *miscantur.*
bis factæ repræsentatione nascitur ira (§. 862.), ex opinione mali
ex improvise ingruentis terror (§. 829.), ex opinione vero mali
eventu possibilis metus (§. 822.); si ex injuria ab altero nobis
facta malum aliquod imminere opinamur, iræ permiscetur me-
tus, & si malum istud nobis jamjam prope esse arbitramur, idque
præter omnem spem ac opinionem nostram accidit, iræ terror
permiscetur.

A posteriori confirmatur propositionis veritas eodem
modo, quem in propositionibus anterioribus indicavimus,
ubi scilicet inquirimus in rationes, cur nobis ab altero injuriam
factam esse existimemus. Etenim affectus focii iræ ex ratio-

nibus oriuntur, ob quas factum alterius pro injuria reputamus.

Supponimus injuriam ab altero nobis factam nobis prius innotescere quam rationem, & hanc demum ex facto alterius colligi, dum idem ad statum nostrum referimus, aut damnum ex facto alterius emergens una cum facto ejusdem ad noticiam nostram pervenire, ita ut ex damno judicemus factum alterius nobis esse malum. Et enim si damnum nobis repræsentemus ab altero nobis datum, antequam constet quinam sit ejusdem causa, affectus iræ socius prægreditur iram & hæc demum subsequitur, ubi in autorem damni inquirantibus nobis innotescit facto alterius idem nobis fuisse datum.

§. 866.

*Quando ira
desperatio
permisceatur.*

Si malum per injuriam alterius nobis imminens nobis repræsentemus tanquam inevitabile, idque inprimis nobis quoque intolerabile videatur; ira permiscetur desperatio. Quoniam enim desperatio nascitur ex opinione inevitabilitatis mali, præsertim si accedat opinio intolerabilitatis (§. 825.), ira vero ex opinione injuriæ ab altero nobis datæ (§. 862.); si malum alterius injuria nobis imminens videatur inevitabile, immo simul intolerabile, desperatio ira permisceri debet.

A posteriori confirmatur propositio eodem prorsus modo, quo præcedentes confirmari monuimus.

Quod si demonstrationes propositionum proxime præcedentium atque præsentis consideres; palam erit, eos affectus misceri iræ, qui excitantur damno alterius injuria nobis dato, cum ira excitetur ex eo, quod damnum istud alterius injuria nobis datum existimemus. Quamobrem si opiniones hominum de eo, quod sibi malum esse arbitrantur, nobis innotuere; haud difficulter intelligitur, quinam in dato casu affectus cum ira simul cooriantur.

§. 867.

*Ira unde
intendatur.*

Quoniam plures affectus concurrentes appetitum vel aversionem vehementiorem reddere debent (§. 603.); affectus vero vehementior est, si appetitus, vel aversio efficitur vehementior (§. cit.); ira vehementior evadit, prouti plures, vel pauciores affectus majore, vel minore gradu eidem sociantur.

Quod si per propositiones præcedentes inquiramus, quinam affectus

iræ

iræ socientur; veritatem propositionis præsentis a posteriori addiscere licet.

§. 868.

Quoniam injuriam ab altero nobis factam æstimamus *Definitio*
ex damno, quod nobis intulit; damnum vero æstimatur ex eo *ira realis.*
quod sit malum respectu nostri, vel ejus, cui injuriam factam
arbitramur; *ira oritur ex opinione mali ex facto alterius nobis*
vel aliis emergentis (§. 862.). Atque in his consistit definitio rea-
lis iræ.

Si ira nasci debet ex opinione injuriæ aliis factæ, eam contrario af-
fectu impediri necesse non est. Juvatur autem amore ejus, cui fit
injuria: juvatur quoque odio ac invidia quibus illum persequimur,
qui damnum alteri intulit.

§. 869.

Si injuriarum præteritarum memoria per præsentem no- *Vehemens*
bis refricatur; levi ex causa vehementer irascimur. Etenim *ira ex levi*
si injurias præteritas cum præsentem simul nobis repræsentamus, ira *causa.*
non modo nascitur ex præsentem, sed ex præteritis simul (§. 862.).
Quare cum perinde sit ac si injuriæ omnes aliquando ab altero
perpeffæ nunc demum factæ essent; causa quidem præsens le-
vis est, sed omnis iræ causa levis non est. Quoniam tamen nos
ad præsentem tantummodo attendimus atque ex ea sola iram
nasci arbitramur: vehemens ira nasci nobis videtur ex levi cau-
sa, & levis causa iram revera denuo suscitatur.

A posteriori intelligere poteris veritatem propositionis
ex eo, quod levi ex causa vehementer irascentes, ubi iisdem
exprobraveris, quod ob rem adeo leviculam ad tantam iram
se provocari patiantur, respondeant sibi jam antea plures in-
jurias fuisse ab eodem illatas, aut, ubi causam tantæ iræ ne
generaliter quidem indicare voluerint, saltem regerant, se
probe nosse rationem, cur tam vehementer irascantur. In se
autem unusquisque pristinarum injuriarum memoriam faci-
lius deprehendere valet, ubi re quadam levicula ad iram con-
citatur.

Non

Non jam mentionem injicere lubet injuriarum ab aliis nobis factarum & vi imaginationis cum iis, quas perpeffi sumus ab eo, qui jam ad iram nos concitat, confusarum, cum istiusmodi confusiones in omni affectuum genere obtineant atque eorundem vehementiam augeant.

§. 870.

*Definitio
ira num
usui lo-
quendi con-
formis.*

Definitio iræ usui loquendi ac recepto significatui conformis. Ira res notissima est & ab omni affectu alio facillime distinguitur. Nemo igitur est, qui nesciat, quod irascamur, quando nos ab altero offensos esse existimamus, quodque ira tendat ad vindictam injuriæ illatæ. Ad vindictam tendimus, quatenus alteri nocere cupimus: quæ cupiditas cum ex odio proficiscatur (§. 671.), odium cum ira conjunctum esse agnoscunt omnes. Injuriam ab altero illatam ægre ferimus & fœminæ ad vindictam inermes lachrymantur: quo ipso patet, omnes agnoscere, quod tristitia perturbetur animus, quando irascimur. Nemo igitur alium affectum iram appellat, quam quem nos eodem nomine insignivimus. Inprimis autem in rem nostram loquitur *Gassendus*, ut nostra ex eodem desumfisse videri queamus, etsi dudum in *Metaphysica Germanica* eadem tradiderimus, antequam *Operum Gassendi* copia nobis facta fuisset, quæ paucos demum ante annos in manus nostras pervenere & quæ nunc quidem, dum hæc scribimus, primum evolvimus: quæ ideo monemus, ut ex consensu judicetur modum, quo venamur notiones rerum, non aberrare a veritate ac detegere, quæ ex aliis difficiliter addisci poterunt, quod ob verborum ubertatem sæpius superflua admisceantur & ob eorundem vagum significatum determinaciones genuinæ non tanta facilitate perspiciantur, qua jam aliunde notæ ex iisdem agnoscuntur. Ita autem *Gassendus* loc. cit. c. 7. f. 500. Iratus, inquit, & moleste fert averfaturque acceptam injuriam, & illius causam autoremve odit, & ulcisci, seu nocumentum vicissim infligere cupit, & nocere efficereque, ut autorem poeniteat, sperat, &

ad

ad nocendum audenter prorumpit, & non sine quadam voluptate ulciscitur ac nocet. Ex quo proinde efficitur, ut ira non tam simplex affectus, quam cincinnus quidam affectuum sit, ac definiri possit affectus, quo anima præ dolore ob injuriam accipi visam ac odio in illius autorem concepto pectoreque incalcescente ad ulciscendum concitatur, ut autorem facti pœniteat, neque tale quid amplius patret. Quoniam *Gassendus* monet iratum moleste ferre injuriam ab altero factam, ac animæ dolorem ob eandem tribuit, molestia vero ab ipso dicitur, quod nobis tedium vocatur, molestiaque ingens doloris nomine eidem venit, quemadmodum ex ejus tractatione de affectibus clarissime liquet; ad iram tedium insigne requirit ex injuriæ nobis illatæ opinione ortum: cum quo quod odium constanter jungatur, diserte monet. Eum igitur affectum iræ nomine insignit, cui nos id nominis tribuimus (§. 862.). Agnoscit etiam affectus complures alios simul oriri & coortos cum eodem in unum confundi, quemadmodum a nobis demonstratum est (§. 863. & seqq.). Cetera quæ definitioni admiscet, vel statum corporis concernunt, qui est irascens, vel actiones ex odio in alterum profectæ sunt, quibus injuriam nobis factam vindicare studemus: de quibus suo loco nobis dicendum erit in moralibus, utpote a definitione iræ alienis. *Cartesius* breviter loc. cit. Artic. 65. Malum ab aliis, inquit, patratum, cum ad nos non refertur, efficit solum ut illis indignemur; sed cum refertur ad nos, movet etiam iram: id quod cum nostra definitione iræ reali satis conspirat (§. 868.), si a differentia inter iram & indignationem discesseris, quam hic non attendendam esse ipsa experientia docet. Etenim ex verbis *Cartesii* non aliud colligi potest, quam quod indignatio affectus lenior videatur, quam ira, ita tamen, ut sub ira comprehendatur. An vero ira tantummodo gradu differat ex ipsius mente ab indignatione, an indignationi aliquid superaddat, non satis liquet. Posterius tamen probabilius

(*Wolffi Psychologia.*)

O o o o

bilius

bilius videtur ex adjecta vocola *etiam*. Quicquid sit, experientia satis loquitur, subinde nos irasci ob injuriam aliis factam eodem prorsus modo, ac si ea nobis facta fuisset, ut adeo ad aliquos saltem casus respexisse videatur *Cartesius*, in quibus differentia ista erat ex accidente.

§. 871.

*Cupiditas
vindictæ
quid sit.*

Per *cupiditatem vindictæ* intelligimus cupiditatem mali alterius, propterea quod ipsum consideramus tanquam causam mali nobis præsentis.

E. gr. Mevius propalavit consilia Titii, quorum ipsum partem fecerat, atque propositum ejus irritum fecit. Titius adeo consilium nocendi Mevio capit, ex damno ejus gaudio afficiendus. Cupit igitur malum Mevii, propterea quod is causa mali ipsi præsentis. Atque ea vindictæ cupiditas est.

§. 872.

*Ira cum
cupiditate
vindictæ
nexus.*

Ira cum vindictæ cupiditate conjungitur. Conjungitur enim cum odio ejus, qui injuriam nobis fecit, seu mali nobis præsentis causa est (§. 862.), adeoque iratus ex tadio ejus, cui irascitur, voluptatem percipit, & ideo gaudet quod is tristitia afficiatur (§. 664.). Quoniam itaque malum ipsius bonum sibi existimat (§. 613.), immo propter odii vehementiam (§. 862.) valde bonum opinatur; malum ejus, cui irascitur, ideo cupit, quod eum tanquam causam mali sibi præsentis considerat. Cum ira itaque cupiditas vindictæ conjungitur (§. 870.).

A posteriori satis manifestum est, cum ira arcto admodum vinculo connexam esse vindictæ cupiditatem. Audias enim iratos nescio quibus diris devovere eum, cui irascuntur, immo ubi præsens fuerit, ad eundem verbis, vel factis lædendum eosdem impelli videas. Cupiditas vindictæ in irato adeo manifesta est, ut eam ideo iræ definitionem ingredi fecerit *Gassendus*, non attendens ad id, quod vindictæ cupiditas ex odio fluat, ex eo orto, quod nobis displiceat factum alterius, quia in nos injuriosum, seu quod factum alterius nobis repræ-

repræsentemus tanquam malum respectu nostri (§. 677.).

Multa ex cupiditate vindictæ fluunt, quæ in irato observantur.

Spirat eam vultus & gestus: tendunt ad eandem verba & facta.

§. 873.

Si tadium quidem percipimus ex injuria nobis ab altero *Indignatio* illata, a vindictæ tamen cupidine alienum habemus animum, *quomodo* *Indignatio* oritur. Germani vocant böse seyn. Atque adeo *differat a* patet iram ab indignatione cupiditate vindictæ differre. *tadio.*

Videtur ad hanc differentiam respexisse *Cartesius*, dum indignationem ab ira distinxit. Sed quoniam vindictæ cupiditas ut plurimum abesse solet, ubi consideramus injuriam aliis ab altero, non nobis illatam; ideo ad istiusmodi casus animum advertens sibi persuasit indignationem constanter oriri, ubi nobis repræsentamus injuriam aliis, non nobis ab altero factam.

§. 874.

Si alterum amamus; ei irascimur, qui ipsi injuriam intulit. *Quando* Etenim si alterum amamus, eum consideramus tanquam *alteri injuriam inferenti irascimur.* nos ipsos (§. 659.), consequenter quæ ipsi infertur injuria, ea nobis illata putatur. Enimvero ira nascitur ex injuria nobis illata (§. 862.). Ergo etiam nasci debet ex injuria ei, quem amamus, illata.

A posteriori propositionis veritas confirmatur ex eo, quod irascamur ei, qui amico nostro injuriam fecit, ac de causa iræ quæsit, vel prorsus censuram aliorum incurrentes, quod irascamur ei, a quo offensi non sumus, respondeamus, nos adeo ægre ferre injuriam alteri illatam, ac si nobismet ipsis illata fuisset. Iram in hoc casu non differre ab ea, ad quam injuria nobis facta concitatur, experientia loquitur. Adesse vindictæ cupiditatem, verba & facta loquuntur.

Ecce tibi casum unum, ad quem *Cartesius* non respexit indignationis causam investigaturus.

§. 875.

Si alterum odio prosequimur, ei irascimur ob injuriam aliis factam. Etenim si eum odio prosequimur, tadium ejus *ira ex injuria in aliis facta.* (§. 669.) *or casus alius.*

(§. 669.), consequenter malum ipsius appetimus (§. 613.). Quoniam itaque occasio aliis male faciendi in votis est, quemadmodum ex notione appetitus facile intelligitur (§. 579.); injuriam aliis factam tanquam nobis factam intuemur, vel saltem injuriam aliis faciendo nobis ab eodem injuriam fieri arbitramur. Nasclitur vero ira ex injuria nobis illata (§. 862.). Ergo etiam nasci debet ex injuria aliis ab eo illata, quem odio prosequimur.

A posteriori iram in animo nostro exardescentem observamus, quando narratur eum, quem odio prosequimur, injuriam fecisse aliis, modo hos non itidem oderimus: quæ determinatio ex hypothesi propositionis præsentis exulat, adeoque ei tacite superaddi minime debet. Eandem observamus in aliis tanquam ad casum præsentem pertinentem, quando iram excusaturus hanc affert rationem, quod is, cui irascitur, dignus sit odio, & causas odii promeriti recenset.

Ecce tibi casum adhuc alium, ad quem *Cartesius* animum non advertit differentiam iræ ab indignatione traditurus in definitionibus causalibus: Facile autem casus quidam attentionem nostram subterfugiunt, quando eos non præsentem sistit memoria, propterea quod eos non adeo sæpe fuimus experti, sicuti ceteros. Absit igitur ut quis carpenti animo proferri existimet, quæ animo tuendi nostra proferri amor veritatis suadet!

§. 876.

Quoniam ira excandescit animus, si eum amamus, cui injuria inferitur (§. 874.), vel si eum odio prosequimur, qui alteri injuriam infert (§. 875.); Multo magis animus ira exardescere debet, si eum amamus, cui injuria fit ab altero; alterum vero, qui injuriam infert, odio prosequimur.

Fieri potest ut in hoc casu ira sit major, quam quando aliis ob injuriam nobis factam irascimur. Vehementia enim iræ in casu priori a magnitudine amoris, odii ac injuriæ illatæ; in posteriori a magnitudine illatæ injuriæ pendet sola, nisi affectus socii alii concurrant (§. 863. & seqq.), vel ex accidente intendatur ira (§. 867.).

§. 877.

Casus alius, in quo ira vehemens.

§. 877.

Si eum amamus, qui nobis, vel aliis injuriam facit, ei non Quando irascimur, sed tantummodo indignamur; immo subinde ne quidem tantummodo indignamur. Si enim perpendimus injuriam nobis vel aliis *do indigne-* factam, alterum consideramus tanquam causam mali nobis præ- *mur, immo* sentis, adeoque malum existimamus, quod id fecerit alter (§. 565.), consequenter tædium ex eo percipimus, quod id fecerit *ne quidem* (§. 613.). Et quia eum, qui injuriam intulit, amamus *indigne-* *mur.* per hypoth. ex ejus tædio, consequenter ex eo, quod ipsi malum est (§. 613.), ipsimet tædium percipimus (§. 642.). Impossibile igitur est ut idem nobis repræsentemus tanquam valde bonum (§. 612. *Psychol.* & §. 28. *Ontol.*), consequenter ut idem cupiamus (§. 805.). Quoniam itaque a tædio ex injuria illata percepto abest cupiditas vindictæ (§. 871.) ; ei, qui injuriam intulit, tantummodo indignamur (§. 873.): immo si tantus fuerit amor, ut obftet, quo minus tædium ex injuria nobis facta percipiamus, dum alterum non malo in nos animo, vel ex proposito quid fecisse arbitramur, ne quidem indignamur (§. cit.).

A posteriori idem confirmant exempla parentum liberos impense amantium, qui iis tantummodo indignantur, quando lædunt, vel injuria afficiunt alios; nequaquam verò vindictæ cupiditate in iram abripiuntur. Similiter huc spectant offensæ amicorum, quos insigniter amamus, nos tantummodo ad indignationem provocantes, non vero ad iram, ut adeo vindictæ cupiditate vacuum habentes animum facile in gratiam cum iis redeamus ac illatam nobis injuriam ipsis condonemus.

Atque ita patet indignationi locum esse non modo in casu injuriarum aliis illatarum, sed etiam in casu injuriarum nobis factarum. Quoniam ab indignatione abest vindictæ cupiditas, quæ cum ira conjungitur (§. 872.); illa in querelis, hæc in convitiis ac minis terminari solet, nisi affectus alii intervenerint. Quicquid sit, querelarum tamen in casu priore, convitiiorum ac minarum in posteriore semper supererit vestigium aliquod.

§. 878.

Cum indignatione odium quidem oritur, sed vires non ca- Odium in
pit, indignatio-

*ne quomodo
se habeat.*

pit, quin statim potius extinguitur. Etenim indignantes alteri tadium percipimus ex injuria, vel aliis illata (§ 873.). Quare cum nobis factum alterius displiceat (§. 542.), odium adversus eum oritur (§. 677.). Quoniam tamen ab indignatione abest vindictæ cupiditas (§. 873.), adeoque indignatus alteri quod malum est lædenti minime cupit (§. 871.); ex eo, quod malum est lædenti, consequenter quod eidem tadium creat (§. 613.), voluptatem minime percipit (§. 805.). Quamobrem cum voluptas ista ex odio fluat (§. 664.); odium vires non capit, sed statim extinguitur.

Hinc observare licet a posteriori, quod indignantibus quidem suboriatur subinde impetus quidam ad vindictam, sed qui statim rursus supprimitur. Audias etiam indignantes in hæc prorumpere verba: Eum, cui indignantur, dignum esse hoc, vel isto malo ob injuriam sibi, vel aliis illatam; non tamen ipsi mala imprecari, quemadmodum a vindictæ cupidis fieri solet. Atque inde satis perspicitur adesse odium, sed statim reprimi,

§. 879.

*Quando in
indignatio-
ne odium
prædomi-
netur.*

Quodsi tadium ex injuria ab altero illata perceptum fuerit exiguum, odium in indignatione prædominatur, etsi vires non capiat. Quando enim tadium ex injuria illata ab altero perceptum fuerit exiguum, odii magis conscii sumus, quod cum indignatione oritur, quam tādii ex injuria percepti, adeoque odium prædominatur. Sed cum in indignatione vires capere non possit, ut scilicet ad vindictæ cupiditatem procedat (§. 887.); hoc non obstante quod vires non capiat prædominatur.

A posteriori confirmatur propositionis veritas, quando observamus, quod se ab aliis offensos intelligentes conquerantur quidem de injuria sibi facta & dignum alterum, qui injuriam intulit, hoc vel isto malo pronunciant & contra ne-

gan-

gantes defendunt, sine ulla tamen sensibili animi commotione.

Ex hæcenus demonstratis intelligitur, quanta circumspectione opus sit, ne de ira & indignatione judicaturi judicium præcipitemus: id quod in omni affectuum negotio opus esse intelligitur, si traditam a nobis theoriam attentè meditari libet.

SECTIO II.

DE FACULTATIS APPE- TENDI PARTE SUPERIORI ET COMMERCIO MENTIS CUM CORPORE.

CAPVT I.

De Voluntate ac Noluntate.

§. 880.

Appetitus rationalis dicitur, qui oritur ex distincta boni repræsentatione. Unde independenter ab appetitu in genere definiri potest, quod sit inclinatio animæ ad ob-
jectum pro ratione boni, quod in eo inesse distincte cognoscimus, vel nobis cognoscere videmur. Dicitur autem appetitus rationalis *Voluntas*.

*Appetitus
rationalis
seu Volunta-
tis definitio.*

E. gr. Ponamus Titium in bibliopolio reperire librum, dumque illum evolvit in eo deprehendere, quæ cognitu sibi utilia existimat. Librum igitur istum bonum judicat hoc nixus ratiocinio: Ex libro isto quæ mihi utilia sunt cognoscere valeo. Liber, ex quo utilia cognoscere valeo, bonus est. Ergo liber iste bonus est. Dum igitur librum istum appetit; appetitus oritur ex distincta boni notione, quatenus nempe bonum judicatur, quod au-
get

get cognitionem nobis utilem, v. gr. si quis Mathematicus fuerit, mathematicam; si Physicus, physicam; si Theologus, theologicam. Est igitur appetitus iste rationalis, quatenus rationem, cur librum appetamus, distincte indigitare valemus. Et dum librum istum appetimus, eundem velle dicimur. Et quando eundem emere discernimus; eum emere velle dicimur.

§. 881.

*Aversationis
rationalis
seu Noluntatis
definitio.*

Aversatio rationalis est, quæ oritur ex distincta mali representatione. Unde independenter ab *aversatione* in genere definitur, quod sit reclinatio animæ ab objecto pro ratione mali, quod in eo distincte nobis cognoscere videmur. Dicitur a nobis *Noluntas*.

E. gr. Ponamus Mevium in bibliopolio reperire librum, dumque illum evolvit in eo deprehendere plurima absurda atque erronea, ut inde colligat autorem scripsisse de rebus sibi nondum intellectis. Librum igitur istum, qui ad animum nonnisi erroribus ac absurdis opinionibus replendum aptus videtur, malum judicat hoc nixus ratiocinio: Ex libro hoc legentis animus nonnisi erroribus ac absurdis opinionibus repletur. Liber, qui animum nonnisi erroribus atque absurdis opinionibus replet, malus est. Ergo liber iste malus est. Dum igitur librum istum *aversatur*, *aversatio* ista nascitur ex distincta mali notione, quatenus scilicet ratio distincte allegari potest, cur librum *averferis*. Est adeo *aversatio rationalis* & dum eum ex hac ratione *aversamur*, eum nolle dicimur. Et quando nos nullis rationibus eo adduci patimur, ut librum *emamus*; librum *emere nolle* dicimur.

§. 882.

*Volitio &
nolitio quid
dicatur.*

Ipse actus volendi dicitur *Volitio* in oppositione ad *Voluntatem*, quando ea facultatem animæ denotat, seu potentiam, aut possibilitatem actum istum eliciendi. Et similiter actus ipse nolendi vocatur *Nolitio*, in oppositione ad *Noluntatem*, quando ea facultatem animæ denotat eliciendi actum istum, quem *nolitionem* appellamus.

Ita actus appetitus in singulari, quo is fertur in librum, dicitur *volitio*: actus vero *aversationis* in singulari, quo anima a libro quasi

quasi retrahitur, vocatur nolitio. Differentia inter voluntatem & volitionem, noluntatem & nolitionem in Psychologia rationali clarius elucescet. Non movemur, quod per inconstantiam loquendi actus etiam volendi dicatur voluntas & actus nolitionis non voluntas aut, si mavis, Noluntas: nos enim fixum tuemur significatum a vago abhorrentes, ubi præsertim nulla adest ratio, quæ nobis necessitatem imponit ab eadem recedendi, cum suppetant vocabula, ut proprio unumquodque nomine efferri possit.

§. 883.

Omissio volitionis est indifferentia ad volendum & nolendum. *Omissio volitionis quid* Volitionis scilicet actus nullus adeste dicitur, seu anima objectum quoddam non velle dicitur, quando idem nec velle, sit. nec nolle dici potest.

E. gr. In exemplo ante dato anima nec librum velle, nec nolle dicitur si eodem evoluto appetitus prorsus non movetur, cum nec bonum, nec malum eundem judicet.

§. 884.

Nolitio non est nuda volitionis omissio. Etenim si volitio tantummodo omittitur, nec dici potest, quod anima quid velit, nec etiam dici potest, quod ea idem nolit. (§. 883.). Quamobrem cum non sufficiat ad nolendum, ut quid non velle dici queamus, sed aliquid amplius requiratur, consequenter quid positivi accedere debeat ad privationem (§. 881.); nolitio non est nuda volitionis omissio.

§. 885.

Quamobrem cum ad omissionem volitionis sufficiat, ut absit ratio volendi (§. 118. Ontol.); Si quid nolle debemus, peculiaris ratio nolendi adeste debet.

Ita in casu dato deest volitio libri, si eum non judicamus bonum quoad nos, atque adeo nulla peculiaris requiritur ratio, cur idem non velimus. Ast cum nondum adsit nolitionis actus, ejus adhuc ratio superaccedat necesse est, veluti quod liber erroribus ac absurdis opinionibus plenus sit. Nimirum si bibliopolium ingrederis librumque evolvis; tres unique status in

(Wolffii Psychologia.)

P p p p

mente

mente distingvis, quos diversos esse nemo non agnoscit. Aut enim placet, aut displicet, aut nec placet, nec displicet liber. Unde alius est casus, quo eum habere vis; alius, quo eum habere non vis, seu averfari; alius denique, quo eum nec appetis, nec averfari, cessante & volitione, & nolitione. E. gr. Placet Mathematico liber a Geometra primi ordinis conscriptus, in quo continentur nova de curvis inventa novaque artificia analytica, quibus in eorum proprietatibus investigandis usus. Displicet liber, in quo autor quadraturam circuli daturus impingit in prima elementa ac se probat rudem prorsus & hospitem in omni Marhesi. Nec placet, nec displicet liber a Icto conscriptus, de quo judicare nequit, utrum sit bene, an male conscriptus. Quodsi jam libros istos ad se refert, in primo casu cognoscit eum sibi fore proficuum, quatenus scientiam ex eo augere potest suam; in secundo intelligit, eum sibi creare tedium, quod indignetur homini audenti aggredi, quæ vires suas longe superant, in tercio denique indifferenter sese habet ad librum, eumque sibi nullius utilitatis esse agnoscit. In casu primo librum appetit, nascente volitione ex ratione singulari; in secundo eundem averfatur, nascente nolitione ex ratione non minus singulari; in tercio denique eum nec appetit, nec averfatur, cum deficiat tam ratio ad appetendum, quam ad averfandum, & anima prorsus non movetur. Quodsi tamen quis tibi dixerit esse librum rarissimum, quem diu frustra quæsierit Mevius & cui donum magis acceptum offerre non possis libro isto; amore amici impulsus eum appetis, quatenus tibi habetur medium creandi eidem voluptatem. Accedit adeo ratio singularis, ut eum appetas. Quodsi jam apperentem admoneat Titius, non esse hunc ipsum librum, quem Mevius appetit, sed alium ab hoc prorsus diversum, etsi agnatum habeat titulum. Hunc, quem vides, nihil continere singulare, sed trivialia tantummodo plurimosque errores. Mutato de libro judicio appetitus degenerat in averfationem; sed singularem hic requiri rationem, ut

ut id fiat, clarissimum est. Patet igitur volitionem omitti ob rationem deficientem, nolitionem demum nasci ex ratione quadam positiva.

Non piget hæc uberius illustrare, propterea quod maximi momenti est actum nolitionis ab omissione voluntatis distinguere. Excitanda igitur fuit attentio lectoris, ut acumine usus discernat casum indifferentiæ, in quo & volitio, & nolitio cessat, ab eo, in quo actus nolitionis ac volitionis nascitur. Etenim omnis praxis philosophiæ moralis in eo consistit, ut ex statu indifferentiæ animam transferamus ad appetendum, vel averlandum.

§. 886.

Qui terminos voluntatis, noluntatis, volitionis, nolitionis Num *termini* *in fixo ac determinato significato sumunt; non alium iisdem tribuunt quam nos iisdem tribuimus.* Equidem non ignoro vulgo *num explicati sint recepto significatui conformes.* sub voluntate comprehendere actum volitionis, & nolitionis, ut explicante *Goclenio* in Lexico voluntas dicatur propensio quædam ad bonum intellectum, hoc est, quod intellectu conceptum est, prosequendum, & malum fugiendum, immo adeo late ut ipsum etiam appetitum ac aversionem sensitivam subinde sub se complectatur; idem tamen observat jam olim Stoicos, qui accuratius distinxerunt inter se minime confundenda & quos secutus *Cicero* est, voluntatem non accepisse nisi sensu strictiori pro appetitu rationali boni. Ita enim ex *Cicerone* loc. cit. *Goclenius*: si simul, inquit, objecta species cujuscumque est, quod bonum videatur, ad id adipiscendum impellit ipsa natura: id cum constanter, prudenterque fit, ejusmodi appetitionem Stoici *βέλῃσιν* appellant; nos appellamus voluntatem, quam illi putant in solo sapiente esse, quam sic definiunt: voluntas est, quæ quid cum ratione desiderat. Ab ea differt libido. Nam voluntas, quæ adversus rationem incitata est vehementius, ea libido est, vel cupiditas effrenata. Videntur quidem Stoici non admisisse voluntatem nisi in eo casu, quo judicium de eo, quod bonum est, rationi convenit, nec a veritate abhorret. Enimvero cum intellectus hominis sit errori obnoxius & ab eo com-

missus error serpat in voluntatem ; fieri non potest ut appetitum ab intellectu procedentem voluntatis nomine dignari nolumus, ubi vel in principio, vel in ejus applicatione fallimur, intentione bona. Sufficit adeo appetitum distingui in sensitivum & rationalem, prouti vel ex confusa idea, vel distincta notatione procedit, non attento discrimine, utrum quis bona intentione salva fallatur, an ab errore sit immunis: id quod in primis observandum est, ne incertus nobis evadat vocabuli in casibus specialibus usus. Ceterum ipse *Goclenius* mox terminos volitionis ac nolitionis explicat prorsus in rem nostram. Volitio hominis, inquit, est appetitio rationalis boni cogniti, orta ab illius approbatione. Nolitio est aversio rationalis mali cogniti orta ab illius improbatione. Subjicit idem voluntatem valde improprie accipi, cum tribuitur appetitui brutorum: proprie enim voluntatem esse ἐν τῷ λογικῷ, seu in ente rationali, in brutis non esse. Quodsi ergo voluntas tribui nequit nisi ei, qui ex ratione agit; ab appetitu sensitivo distingui nequit, nisi quatenus vi principii distincte cognoscimus id esse bonum, quod appetimus, atque adeo appetitus rationalis nasci debet ex distincta boni cognitione, quemadmodum nos definivimus. Immo idem *Goclenius* in voce Appetitus, ubi rationalem a sensitivo distinguit, hanc differentiam urget, quod rationalis necessario præsupponat judicium intellectus. Atque ita abunde liquet, si singula, quæ in anima circa appetitum diversa notantur, accurate a se invicem discernere voveris, & terminos ea fini in philosophiam introductos ad fixum ac constantem significatum reducere decreveris; definitiones non invito usu loquendi, quem jam dum placuisse philosophis palam est, aliter condi non posse, quam a nobis conditæ fuerunt. Non opus est, ut plura philosophorum testimonia ad confirmandum propositionem præsentem in medium adducantur. Hospes enim sit in philosophia, qui sibi per-

persuaserit novos a nobis terminorum in philosophia obviorum significatus cudi.

§. 887.

Ratio sufficiens actuum volitionis ac nolitionis dicitur *Motivum* *quid dicatur.*

Ita in exemplo proposito motivum volendi erat augmentum scientiæ lectione libri promovendum; motivum vero nolendi metus ab erroribus ac absurdis opinionibus, quibus oppleri poterat animus legentis.

§. 888.

Quoniam ex ratione intelligimus, cur quid potius sit, *Usus moti-* quam non sit (§. 56. *Ontolog.*), rationes sufficientes vero *orum* actuum volitionis ac nolitionis motiva sint (§. 887.), ex *motivis* volendi intelligimus, cur quid potius velimus, quam non velimus; ex *motivis* nolendi vero perspicimus, cur quid potius nolimus, quam non nolimus.

Ita ex eo, quod quis à lectione libri expectat incrementum scientiæ, intelligimus cur librum emere velimus. Constat vero illam expectationem esse motivum volitionis (*not. §. 887.*). Similiter ex eo, quod quis sibi metuit ab erroribus ac absurdis opinionibus, intelligitur, cur librum emere nolit. Constat vero denuo metum istum esse motivum nolitionis (*not. §. cit.*).

§. 889.

Sine motivis nulla datur in anima volitio, nulla nolitio. *Motivo-* Sunt enim motiva rationes sufficientes actuum volitionis ac *rum neces-* nolitionis (§. 887.). Enimvero sine ratione sufficiente, cur *fitas.* potius sit, quam non sit, nil datur (§. 70. *Ontol.*), adeoque sine ea nec datur actus volitionis, nec nolitionis in anima. Ergo nec sine motivis ullus datur in anima volitionis actus, nec ullus in eadem datur actus nolitionis.

A posteriori veritas propositionis satis superque liquet, ideo a philosophis omni ævo agnita. Neque enim ullum in medium afferri potest exemplum, quo ostenditur, nos quicquam

quam vel voluisse, vel noluisse sine motivo, modo acutus sis in observandis motivis, atque in iis agnoscendis. Qui affirmant tale quid fieri posse, nullum huc usque exemplum in medium afferre potuerunt; sed gratis asseruerunt.

Ne autem in agnoscendis motivis hæreas in casibus specialibus, iis præsertim, ubi ægre agnoscuntur; motiva paulo penitius inspicenda sunt, ut constet, quid eorum loco esse possit.

§. 890.

*Motiva in
quo consi-
stant.*

Motiva sunt representatio boni ac mali distincta, nempe representatio boni volitionis; representatio mali nolitionis. Sunt enim rationes sufficientes actuum volitionis ac nolitionis (§. 887.). Enimvero representatio boni est ratio sufficiens appetitus, representatio mali ratio sufficiens aversionis in genere (§. 586.). Quare cum appetitus & aversio rationalis ab appetitu sensitivo & aversione sensitiva nonnisi in eo differant, quod rationalis ex notionibus distinctis nascatur, appetitus vero sensitivus & aversio sensitiva ex idea confusa ortum trahant (§. 880. 881. 580. 582.); motiva esse nequeunt nisi representatio boni ac mali distincta, illa nempe volitionis, hæc nolitionis.

A posteriori idem patet, modo ad volitiones ac nolitiones animum advertas. Sane dum librum tibi representas tanquam ad scientiam augendam utilem, eum tibi representas tanquam bonum, & quidem quoad te (§. 554.). Quare cum librum ideo habere velis, quod istam utilitatem tibi representes; ratio sufficiens volitionis (§. 56. *Ontol.*), consequenter motivum est representatio boni (§. 887.) & quidem, cum notionem boni distinctam hic habeas, ex qua librum bonum esse judicas (§. 880.), representatio boni distincta. Eodem modo idem patet in casu nolitionis. Sane dum librum tibi representas tanquam eum, unde animus erroribus ac absurdis opinionibus repleti possit, eum tibi representas tanquam malum, quoad te (§. 565.). Quare cum librum ideo habere nolis, quod librum talem tibi representes, ratio suffici-

ens

ens nolitionis (§. 56. *Ontol.*), consequenter motivum est repræsentatio mali (§. 887.), & quidem, cum distincta notione utaris ad judicandum, librum esse malum, mali repræsentatio distincta.

Qui motiva volitionum ac nolitionum cognoscere studet, is ad omnes suas volitiones ac nolitiones attendere debet & in rationes inquiret opus est, cur quid velit, vel nolit: ita enim motiva sibi familiaria cognoscet. Quod si præterea ea ad notiones generales revocaverit usus notionibus boni ac mali in genere (§. 554. 565.) tanquam directricibus; is plurimum proficiet in cognitione sui: id quod alio loco uberius explicandum hic monemus, ut sit stimulus ad studium in ista inquisitione collocandum.

§. 891.

Quam primum nobis distincte aliquid repræsentamus tanquam bonum, quoad nos, idem volumus. Quam primum enim quid nobis repræsentamus tanquam bonum, nempe quoad nos, idem appetimus (§. 889.). Quamobrem cum ad volitionem requiratur distincta objecti, quod appetimus, cognitio (§. 880.); quam primum distincte cognoscimus aliquid esse bonum, seu idem nobis tanquam bonum quoad nos repræsentamus, idem volumus. *Quomodo volitiones nascantur.*

Patet idem a posteriori per exempla eunti. Et prodest exemplum, quo hinc usque usi sumus ad anteriora illustrandum.

§. 892.

Quoties quid volumus, id nobis repræsentamus tanquam Objectum bonum; quoties vero quid nolumus, id nobis repræsentamus tanquam malum. Si enim motiva nulla dantur in anima, eadem nec vult, nec non vult (§. 589.). Quamobrem si vult quidpiam, motivum volendi detur necesse est: si quidpiam non vult, seu ex ratione averfatur, motivum nolendi adsit necesse est. Motivum vero volendi est repræsentatio boni distincta; motivum nolendi vero distincta mali repræsentatio (§. 890.).

Ergo

Ergo si quid volumus, necesse est ut id nobis repræsentemus tanquam bonum; si quid nolumus, opus est ut idem nobis tanquam malum repræsentemus.

A posteriori patet veritas asserti ex eo, quod nemo hactenus unicum allegare potuit exemplum, ubi aliquid voluerimus, quod nobis non repræsentassemus tanquam bonum quoad nos; vel aliquid noluerimus, quod nobis non repræsentassemus tanquam malum quoad nos. Equidem non nego afferri exempla, in quibus motiva adeo latent, ut ignorentur ab iis, qui ad ea provocant, immo ne quidem agnoscantur, ubi ab acutioribus in apricum protrahuntur, præsertim si negandi pertinacia occaecaverit animum: enimvero quis non vider quod toto coelo differat demonstrare, quod nullum prorsus motivum adfit, seu quod nobis idem non repræsentemus tanquam bonum, quod volumus, aut, si mavis, quod apperimus, & confiteri quod ignoremus, vel nobis conscii minime sumus, quale jam adfit motivum, cur hoc velimus, vel appetamus, aut nos motivo isto impulsos hoc appetere, quod insufficiens videtur. Demonstrationem postulamus, non nudam ignorantix, aut dubitationis confessionem.

Si quis controversias de propositione præsentem motas consulere libuerit, is omnino animadvertet confessionem ignorantix aut dubitationis loco demonstrationis obtrudi ab iis, qui propositionem præsentem impugnant: immo plerique sibi persuadent confessionem istam sufficere ad propositionis falsitatem ostendendam, cum quid sit demonstratio ignorent, dum prorsus idea destituti, qualem analysis demonstrationum alibi (§. 551. & seqq. *Log.*) data animo ingenerat. Sed nemo qui acumine pollet ignorantix, & dubitationis confessionem pro demonstratione sibi obtrudi patitur, quod non patiuntur nisi qui hebetioris sunt ingenii, ut illam ab hac discernere non possint. Nostrum vero est juvare acumen eorum, qui objectionum frivolarum nullitatem perspicere debent: quamobrem in expendendis motivis progredimur.

§. 893.

Si sensitivus fuerit appetitus, quoties quid appetimus, id nobis tanquam bonum repræsentamus; si aversatio fuerit sensitiva, quoties quid averfamur, id nobis tanquam malum repræsentamus. Si sensitivi & nulla datur ratio appetitionis, vel aversionis, seu actus appetitus sensitivi, vel aversionis sensitivæ, nulla quoque in anima datur appetitio, nulla aversio, seu nihil actu appetimus, vel averfamur (§. 70. *Ontol.*). Quamobrem si quid appetimus, ratio sufficiens appetitionis; si quid aversemur, aversionis adesse debet. Ratio vero sufficiens appetitionis est repræsentatio boni; aversionis ratio sufficiens mali repræsentatio est (§. 586.). Ergo si appetitus fuerit sensitivus, quoties appetimus quid, id nobis repræsentamus tanquam bonum. Si aversatio fuerit sensitiva, quoties quid averfamur, id nobis repræsentamus tanquam malum.

A posteriori veritas asserti eodem modo probatur, quo præcedens confirmavimus. Facilius vero sibi persuadent acumine, quod ad interiora animæ rimanda requiritur, destituti nullam adesse repræsentationem boni, vel mali, quod nullius sibi consciï sint, quæ in ideis confusis latent non animadvertentes, cum eas evolvere nesciant. Difficilius quoque latens appetitionis, vel aversionis ratio in aprium producitur, ut adeo suæ ignorantix facilius fidem habeant, quæ sibi rationem nullam adesse persuadent.

Propositionem præsentem subjungimus præcedenti, ne ad appetitum, & aversionem rationalem restringere videamur, quod appetitui sensitivo & rationali commune est, præsertim cum in iis casibus, ubi sine motivo quid velle, vel nolle videmur, appetitus, vel aversatio ut plurimum ex parte rationalis sit, ex parte vero sensitivus sensitivæ. Pertinet huc casus electionis, ubi in objectis nulla nobis videtur adesse ratio intrinseca, cur unum alteri præferatur, cum pro paribus habeantur. Sed hæc ex sequentibus magis elucescent.

§. 894.

*Malum
quando ap-
petamus,
bonum
quando
aversamur.*

Si cui bonum videtur, quod malum est, idem appetit, vel vult: & ex adverso si cui malum videtur, quod bonum est, idem averfatur, vel non vult. Si quid enim alicui videtur bonum quod malum est, id sibi tanquam bonum repræsentat, quod per se patet. Enimvero quam primum quid sibi repræsentat tanquam bonum, idem appetit (§. 589.). Ergo quod malum est appetit, si quidem ipsi bonum videatur.

Similiter si cui malum videtur, quod bonum est, is per ignorantiam, aut errorem id sibi repræsentat tanquam malum, adeoque id averfatur (§. 590.). Ergo quod bonum est averfatur, si quidem ipsi videtur malum.

Utrumque confirmatur a posteriori inde, quod quæsit qui malum appetunt, cur hoc faciant, respondeant quod sibi videatur bonum, & ex adverso quæsit qui bonum averfantur, cur hoc faciant, non alias afferant rationes, quam ex quibus apparet quod id malum esse opinentur. Vesci cibo, qui sanitati adversus est, malum esse palam est. Sunt qui norunt sanitati adversum esse cibum, eodem tamen hoc non obstante vescuntur, Quæsit cur id faciant, respondent se sapore ejusdem admodum delectari. Cibus adeo appetunt ob saporem, quod bonum judicent vesci cibo, qui bene sapit. Similiter si quis novit medicamentum conducere ad sanitatem restituendam, sed ob saporem ac odorem minus gratum idem averfatur, is medicamentum averfatur, quod malum judicet uti medicamento ingrati saporis. Appetit adeo in priori casu quod malum est, quia ipsi bonum videtur; in casu posteriori averfatur quod bonum est, quia ipsi malum videtur.

Exempla frequentissime obvia sunt, quibus propositio præsens confirmatur, ut ideo dudum a Veteribus inter notissima relatum fuerit hoc principium.

§. 895.

Quod bonum cognoscimus, sed certo respectu malum *Quanam*
existimamus quoad nos, *aversari* dicimur *sub ratione mali*. Et *sub ratione*
e contrario quod malum cognoscimus, sed certo respectu bo- *mali aver-*
num existimamus quoad nos, id dicimur appetere *sub ratione boni*. *semur, sub*
ratione bo-

Ita cibum sanum ob saporem nobis ingratum *aversantes* bonum *ni appeta-*
aversamur sub ratione mali: cibum enim in se spectatum bonum *mus.*
judicamus, quatenus sanitati conducit; sed malum existimamus quo-
ad nos respectu molestiæ, quam ex sapore minus grato percipimus.
Similiter cibum sanitati adversum appetentes ob saporem nobis gra-
tum malum appetimus sub ratione boni. Cibum enim malum ju-
dicamus, quatenus sanitati adversus; sed eundem bonum judicamus
quoad nos, quatenus jucundum nobis est vesci cibo grati saporis.
Prævalet autem opinio boni, si magis in bonum, quam in malum
dirigatur attentio & contra.

§. 896.

Si malum appetimus, id appetimus sub ratione boni : & Bonum que-
si bonum averfamur, id averfamur sub ratione mali. Si quid *modo aver-*
enim appetimus, vel volumus id nobis repræsentamus tanquam *semur; ma-*
bonum (§. 892.). Quamvis adeo malum esse agnoscamus at- *lum quo-*
que concedere debeamus, quod tale sit, *per hypoth.* idem tamen *modo ap-*
certo respectu bonum videri debet quoad nos. Malum adeo *petamus.*
appetimus sub ratione boni (§. 895.).

Similiter si quid averfamur, vel nolumus, id nobis repræ-
sentamus tanquam malum (§. 892.). Quamvis adeo bonum
esse agnoscamus atque concedere debeamus, quod tale sit *per*
hypoth. idem tamen certo respectu malum videri debet quoad
nos. Bonum adeo averfamur sub ratione mali (§. 895.).

Exempla, quæ modo in medium attulimus, propositionem præ-
sentem illustrent. Ipsa vero propositio principium est, quod veteri-
bus tritum ac familiare fuit.

§. 897.

*Quomodo
minus ma-
lum majo-
ris evita-
di gratia
appeta-
mus.*

Si quis minus malum appetit, propterea quod medium esse existimat evitandi malum majus; is malum appetit sub ratione boni. Etenim si quis existimat minus malum esse medium evitandi majus, cum bonum sit evitare magnum malum; is hoc respectu malum minus sibi repræsentat tanquam bonum. Quamobrem idem appetit, quod bonum ipsi videtur hoc respectu quoad se. Idem igitur appetit sub ratione boni (§. 895.).

Propositio præsens per modum corollarii subsumi quoque potest sub præcedente. Si enim minus malum appetimus, majoris evitandi gratia, malum appetimus. Appetimus igitur istud sub ratione boni.

Confirmatur propositio a posteriori. Si quis ære alieno gravatus non sit solvendo nec videns quomodo ex periculo sibi ac famæ suæ inde emergente eluctari possit, nisi mors afferat finem omnium malorum, manus violentas tandem sibi metipsi injicit; is autochiriam non in se bonam judicat, sed malam, minus tamen malum existimat mortem, quam vitam tædiis sibi intolerabilibus plenam, atque minus hoc malum ideo appetit, quod ipsum liberet a malo majore. Liberatio ab ære alieno ac periculis sibi ex eo imminetibus, quod quis solvendo non sit, bona utique existimari debet. Quatenus itaque eadem cum autochiria connexa est; eatenus eam in hoc casu particulari bonam judicat. Atque adeo hanc intendit, hanc appetit, dum manus violentas sibi infert. Autochiriam vero tantummodo appetit, quatenus sine ea finem, quem intendit, consequi nequit. Unicum hoc exemplum satis superque declarat, quomodo minus malum appetatur, propterea quod sit medium evitandi malum majus sub ratione boni.

Nulla hic objectio est, mortem esse malum majus, quam pericula ex eo imminetia quod quis solvendo non sit. Neque enim hic
de

de rei veritate, sed de appetentis opinione agitur. Omnium vero non eadem opinio est.

§. 898.

Si ex pluribus bonis unum alteri præferendum ; id præ- *Quodnam*
fertur, quod judicatur melius. Etenim si plura sint objecta, *alteri præ-*
quæ bona judicantur quoad nos, unum non minus appetimus, *feratur.*
quam alterum (§. 589.), adeoque ex eo, quod singula judican-
tur bona quoad nos, nondum intelligitur, cur unum alteri
præferatur, consequenter in eo ratio electionis unius ex aliis
sufficiens non continetur. Quoniam tamen sine ratione suffi-
ciente nil quicquam esse potest (§. 70. *Ontol.*) ; ratio quoque
sufficiens adesse debet, cur unum alteri præferatur, adeoque
magis appetatur quam alterum. Enimvero quoniam aliquid
appetentes id nobis tanquam bonum repræsentamus quoad nos
(§. 892.) ; id, quod magis appetimus quam alterum, nobis uti-
que tanquam magis bonum repræsentare debemus. Patet igitur
si ex pluribus bonis unum alteri præferendum, id præferri, quod
melius judicatur.

Idem confirmatur a posteriori. Ponamus nobis offerri
duos nummos aureos & ex iis unum esse eligendum. Pona-
mus nobis constare, unum habere pondus iusto minus, alte-
rum ad trutinam appensum legitimo pondere deprehendi.
Ponamus præter hanc ponderis differentiam nullam aliam no-
tari, aut saltem non attendi, nec animum præterea ad rationes
alias extrinsecas adverti; nemo non novit positis his circum-
stantiis eligi nummum aureum legitimi ponderis, adeoque præ-
ferri eum, qui est melior. Quod si enim ex eligente quasiveris,
cur hunc potius eligat quam alterum, utique respondet, id ideo
fieri, quod is quem eligit sit melior. Quæsitus porro cur eum
meliolem esse existimet respondet, quod sit legitimi ponderis,
alter vero ab eodem deficiat.

Experientia itaque satis superque confirmat propositionem præ-
sentem. Quod si objicias fuisse, qui studio elegerint nummum au-

reum minoris ponderis, & alterum reliquerint alteri, objectionem non moramur. Neque enim in hoc casu defunt rationes extrinsecæ, cur electio levioris melior censeatur electione gravioris: id quod ex subsequētibz magis elucescet.

§. 899.

*Rationes
extrinsecæ
electionis.*

Si ex pluribus objectis appetibilibus unum eligendum, nulla vero adsit ratio intrinseca, cur unum alteri præferatur, ratio extrinseca qualiscunque sufficit, ut unum præferatur alteri. Quoniam objectum unumquodque in se appetibile per *hypoth.* ratio ad appetendum sufficiens adest, si in se consideretur. Quamobrem tantummodo requiritur adhuc ratio, cur unum ex iis eligatur, atque hoc ipso ceteris præferatur (§. 70. *Ontol.*). Enimvero ratio intrinseca, cur unum alteri præferatur, non adest per *hypoth.* seu is, qui unum ex iis eligere, adeoque unum alteri præferre debet, nihil in uno observat, ob quod idem alteri præferendum esse judicet. Deveniendum itaque ad rationes extrinsecas, quæ rationibus, ob quas singula æqualiter appetuntur, accedentes efficiant ut unum magis appetatur, quam reliqua. Quamobrem cum qualiscunque ratio extrinseca istis superaddens appetitum augere debeat; ea utique ad unum alteri præferendum sufficere debet.

A posteriori idem liquet clarissime, modo attentionem sufficientem afferre velis, vel possis. Ponamus tibi offerri duos nummos aureos, ut unum ex iis eligas. Ponamus nullum prorsus discrimen intrinsecum facta inquisitione a te deprehendi posse, ut adeo perinde tibi videatur, siue hunc potius, siue alterum accipias. Deficit adeo ratio extrinseca, cur unum alteri præferre debeas. Ponamus vero te hærentem, quemnam eligere debeas, ac nummos contemplantem, ut inquiras in discrimen, ob quod unus alteri a te præferri debere videatur, ex adstantium aliquo percipere, quod hunc nummum possederit vir quidam celeberrimi nominis, a cujus heredibus eum acceperit qui eundem tibi offert. Ponamus, denique possessoris illius me-

mori-

moriam tibi esse jucundam. Nemo non fatebitur, te ob hanc rationem nummum istum electurum. Eligis adeo unum ex duobus ob rationem extrinsecam, intrinseca deficiente. Quod si nulla extrinseca alia occurrat ratio, ob quam nummum unum præferamus alteri; eum arripimus, ad quem commodius extenditur brachium. Non aliam hic subesse rationem, inde patet, quod quæsitus, cur id facias, in vernaculo nobis sermone respondeas: *Der erste, Der beste*, id est, optimum esse eum, quem primum apprehendimus. Sufficit adeo ratio levicula ad id, ut nummum unum alteri præferamus, etsi non sufficiat ad id ut eundem appetamus, cum appetitus alterutrius jam sit determinatus per rationes alias prævias.

Non ignoro esse aliquos, qui mirantur, rationem adeo leviculam philosopho videri sufficientem ad appetitum, seu voluntatem determinandum, atque eodem magis dignum reputent asserere, quod hic habeamus exemplum volitionis absque ulla ratione. Enimvero mirarer *ἀβελήαν*, nisi certum ac exploratum mihi esset istam objectionem convenire homini non philosopho. Etenim defectu acuminis philosophici confunduntur, quæ a se invicem discerni debebant & a nobis discreta fuerunt, scilicet ratio, qua appetitus determinatur ad alterutrum objectum, & ratio, qua unum alteri præfertur, atque adeo appetitus plenarie determinatur ad hoc potius, quam ad alterum. Etenim si rationem sufficientem desideres, cur nummum hunc appetas, ad eam quoque requiritur id, ob quod alterutrum appetere libuit, antequam ad electionem deveniretur. Præterea lubenter audirem, quidnam rationis subsit, cur magis philosophicum videri debeat, si quis dicat appetitum jam ad alterutrum determinatum flecti ad unum eorum sine ulla ratione, quam si affirmet idem fieri ratione quacunque levicula, ubi magis ardua deficit. Enimvero non opus est verbis, ubi rerum testimonia adfunt: novimus enim homines in rebus maxime arduis, ubi ratio determinandi adum volitionis non sufficit, quam habent, ad consilia amicorum cœca, ad sortem non minus cœcam & nescio quas rationes subinde prorsus ridiculas confugere. Sane rationes istæ si præcis ceteris circumstantiis spectentur leviculæ sunt, immo in se spectatæ sæpius ridiculæ videntur. Sed ubi circumstantiis omnibus probe

probe excussis expenduntur, legibus animæ generalibus satisfaciunt. Absit igitur, ut dicamus nos sine ulla ratione quid appetere, ubi appetitus nascens flectitur ratione levicula in alterutram partem, nobis optime consciis.

§. 900.

Ex duabus actionibus Si actiones volumus nec adest aliqua intrinseca, vel extrinseca quædam ratio, cur ex duabus, quibus in dato casu locus est, equipollenti unam potius eligamus, quam alteram; eam eligimus, quæ nobis magis familiaris est. Etenim si quid duobus modis fieri posse agnoscimus, nec utrum hoc modo, quam altero fiat refert; nulla adest ratio intrinseca, cur hoc potius modo, quam altero id fiat, cum omnimoda paritas saltem opinione appetentis adsit. Ad rationes igitur extrinsecas deveniendum (§. 899). Iam cum nulla adsit per hypoth. ad actiones, ex quibus altera seligenda attentis nobis succurrit, quod alias hanc ediderimus in simili casu (§. 109. 174.). Quamobrem eam alteri præferimus, quæ nobis familiaris est.

Propositionem præsentem jam alias in Annotationibus in Metaphysicam Germanico idiomate editis (§. 158.) exemplo luculento ex Algebra petito stabilivi. Sunt nimirum x & y duæ quantitates incognitæ, sitque per hypoth. $x \mp y = a$ & $xy = b$. Sive x denotet quantitatem majorem & y minorem, sive contraria ratione y majorem & x minorem; erit in utroque casu $x \mp y = a$ & $xy = b$. Quod si jam æquationes sint reducendæ, perinde est sive reductio ita fiat, ut ex utraque eruatur valor ipsius x , sive ita instituat ut ex utraque investigetur valor ipsius y . Quicquid horum fiat, in eandem incidis æquationem quadraticam, scilicet $ay - yy = b$ & $ax - xx = b$. Utraque æquatio duas habet radices, quarum altera quantitatem majorem, altera minorem indicat. Quæ igitur ratio suadere poterat, ut æquationes primum propositas ad x reduceres; eadem quoque suadet, ut eas reducas ad y . Nulla igitur adest ratio intrinseca, cur unum potius fiat, quam alterum. Neque præci-

sis circumstantiis singularibus extrinseca apparet ratio, quæ adesse possit, nec casus impossibilis intelligitur, quod aliquando extrinseca abesse omnis possit. Quoniam vero vel recenter memoriæ inhæret, vel, quod sæpius idem fecisti, nunc succurrit, te alias ubi duplex fuerat inveniendæ æquatio ob duplicem quantitatem incognitam x & y æquationes reduxisse ad x ; quod alias facere solitus fuisti, id quoque nunc facis, cum nulla adsit ratio, quæ te ab agendi consuetudine abducatur. Consuetudo igitur agendi ratio sufficiens est, cur hoc potius facias, quam alterum. Atque sic patet, nos eam præferre actionem alteri, quæ nobis familiarior est altera. Exemplo algebraico jungimus aliud in gratiam eorum, qui illud non intelligunt, quamvis tanta ceteris non insit evidentia, quanta algebraico inest, ob peregrina ideis sese immiscentia. Ponamus nos aduetos esse manum dextram exporrigere versus sinistram, quoties quid apprehendere ac tollere volumus, aut id fieri, quoties pennam atramento immergimus inter scribendum. Ponamus porro nos tollere e mensa debere nummum aureum, ex duobus quidem unum, quicumque nobis arriserit, perinde autem nobis esse, quemcunque accipiamus, nulla ratione electionem suadente. Satis exploratum est nos eum electurum esse, qui sinistræ propior est, dum juxta mensam stamus, propterea quod ad eum tollendum actione nobis familiari opus est, a consuetudine autem agendi non recedimus sine ratione sufficiente. Hoc ipsum itaque exemplum ubi per ambages facimus, quod sine iis fieri poterat, satis superque loquitur, consuetudinem agendi esse rationem sufficientem, ubi deficiente ratione intrinseca, vel extrinseca etiam alia, ex duabus actionibus alterutra eligenda, veluti in dato casu sublatio hujus potius, quam alterius nummi aurei.

Non mirum videri debet, quod consuetudini agendi, vel modo agendi recentis memoriæ tantam vim tribuamus, ut possit flectere appetitum in partem alterutram. Neque enim ignotum est quam

(Wolffii Psychologia.)

R r r r

ma.

magnum agendi principium sit imitatio ejus, vel etiam repetitio ejusdem, quod ante feceramus, in casu simili (§. 501.). Levis momenti vulgo videntur, quæ maximi deprehenduntur ab acutioribus, non per transfennam res obvias adspicientibus, nec per præcipitantiam de iis statuentibus.

§. 901.

*Attentio
quomodo
flectat appe-
titum in
casu equi-
pollentia.*

Si actiones duæ nobis videantur æquipollentes vel objecta quæcunque æquipollentia existimentur, nec alia sit nobis ratio extrinseca, ob quam una illarum, vel unum horum alteri præferatur; eam, vel id præferimus, quæ quodve paritatem, vel æquipollentiam expendentium attentionem primum ad se trahit. Etenim cum nulla addit electionis, vel prælationis ratio intrinseca, nec extrinseca quædam succurrat per hypoth. ex objectorum appetibulum æquipollentia colligitur, perinde prorsus esse, quodnam eorum eligatur, aut alteri præferatur, ac ideo porro decernitur illud eligendum esse, quod primum nobis obvium est. Quamobrem si quid hæc animo volventium attentionem in se trahit; nulla prorsus ratio est, cur a proposito nostro recedamus, atque adeo id eligimus, quod isto temporis articulo attentionem nostram quæcunque de causa in se trahit.

A posteriori idem confirmari potest exemplis algebraicis, ubi v. gr. reductionem instituimus contra consuetudinem: ibi enim acutioribus innotescit id fieri ideo, quod oculorum aciem & cum ea mentis attentionem in hac magis defigamus litera, quam in alia. Idem quoque subinde obtinet in electione nummi aurei ex duobus in mensa collocatis, in quibus non eodem modo constanter obtutum defigimus, dum deliberamus, quemnam ex iis eligere debeamus, non reperi-
entes rationem intrinsecam extrinsecamve, ob quam unum alteri præferamus. Quodsi quis in posterum ad casus electionum attentam mentem afferre voluerit, is propriis experimentis non modo præsentem, verum etiam præcedentes proposi-
tiones

tiones confirmare poterit. Quæ enim nos eo fine adducimus, ad experimenta ex seipſis capiendâ lectorem invitant & modum ea capiendi commonſtrant.

Denuo inculcamus, in præſente caſu non minus, quam in ceteris rationem, qua appetitus ad alterutrum ſeſtitur, non eſſe confundendam cum ratione, cur appetatur : id quod plerumque facere ſolent, quibus ratio allegata ad ſeſtendum appetitum non videtur ejusdem ratio ſufficiens, cur in hanc potius partem feratur, quam in aliam.

§. 902.

Regule appetitus dicuntur, quas anima obſervat in appetendo. *Regula appetitus.*

Exempla regularum appetitus ſunt propoſitiones proxime præcedentes (§. 892. & ſeqq.). Neque alium in finem regulas iſtas propoſuimus, quam ut appetitus inde explicemus, quoties nobis in poſterum cum iis erit negotium.

§. 903.

Lex appetitus dicitur principium generale regularum appetitus. Unde ex lege appetitus redditur ratio regularum appetitus quid dicitur. (§. 865. Ontol.).

Retinemus ſignificatum legis, quem ſupra termino tribuimus in ſimili caſu, veluti cum leges perceptionum definiremus (§. 84.).

§. 904.

Lex appetitus eſt hæc propoſitio : Quicquid nobis repræſenta- *Lex appeti-*
mus tanquam bonum quoad nos, id appetimus. Veritatem pro- *tus quamam*
poſitionis quoad appetitum ſenſitivum & rationalem evicimus ſit.
in ſuperioribus (§. 589.). Quod vero inde reddatur ratio re-
gularum appetitus tam ſenſitivi, quam rationalis, patet ex earum
demonſtrationibus (§. 590. & ſeqq. arque §. 892. & ſeqq.). Eſt
igitur lex appetitus (§. 903.).

Hanc legem appetitus dudum agnovere Veteres, & ejus uſus ampliffimus eſt in philoſophia morali, ubi docetur, quatenus determinatio appetitus in noſtra poteſtate eſt : id quod fundamentum culturæ virtutum.

§. 905.

*Regula
averfatio-
nis.*

Regule averfationis sunt, quas anima observat in averfando.

Exempla regularum averfationis sunt propositiones proxime præcedentes, quibus docetur quandonam quid aversemur (§. 892. & seqq.). Sane non alium in finem regulas istas in medium adduximus, quam ut per eas explicare possimus, cur in dato casu anima quid averfetur, vel num in dato casu quid averfari debeat.

§. 906.

*Lex aver-
fationis
quoniam di-
catur.*

Lex averfationis est principium generale regularum averfationis. Unde ex lege averfationis redditur ratio regularum averfationis (§. 866. Ontol.).

Qui averfationem sub appetitu comprehendunt, illi legem averfationis a lege appetitus non distinguunt. Patebit tamen (§. 907.) legem averfationis esse diversam a lege appetitus, neque adeo opus esse ut utramque eodem nomine compellemus. In re est consensus: in verbis dissensus. Accuratus vero loquitur, qui, quæ diversa concipiuntur, diversis etiam nominibus insignit.

§. 907.

*Lex aver-
fationis
quoniam sit.*

Lex averfationum est propositio: Quicquid nobis representamus tanquam malum quoad nos; id averfamur. Veritatem propositionis jam evicimus in superioribus (§. 589.). Quod vero inde reddi possit ratio regularum averfationis, patet ex earum demonstrationibus (§. 592. 596. & seqq. atque §. 892. & seqq.) Est igitur lex averfationis (§. 906.).

Legem hanc averfationum dudum agnovere veteres utpote experientia obviæ, & ejus amplissimus usus est in philosophia morali, ubi docetur quatenus averfatio in nostra potestate est: id quod fundamentum fugæ vitiorum.

§. 908.

*Consensus
appetitus
sensitivi &
rationalis.*

Consensus appetitus sensitivi & rationalis est tendentia utriusque ad idem objectum.

E. gr. Si appetitus sensitivus fertur in cibum aliquem ob gratum quem habet, saporem & voluptates alias, quas imaginatio tan-

tanquam ab eo profectas confuse repræsentat , ita ut cupiditas cibi enascatur; fertur vero etiam in eundem appetitus rationalis, quod noverit appetens, eum sanitati conducere ea præsertim quantitate, qua offertur; appetitus sensitivus & rationalis ad idem tendunt objectum, adeoque inter se consentire dicuntur.

§. 909.

Si quid nobis bonum quoad nos & confuse, & distincte repræ- *Quando*
sentamus; appetitio rationalis & sensitiva cooriuntur ac appetitus datur iste
sensitivus cum rationali consentit. Si quid enim nobis bonum *consensus,*
quoad nos confuse repræsentamus, appetitus sensitivus in idem fertur (§. 589. 580.). Et si quid nobis bonum quoad nos distincte repræsentamus, appetitus rationalis in idem fertur (§. 589. 580.). Quare cum nobis idem objectum tanquam bonum quoad nos simul & confuse & distincte repræsentemus; appetitio sensitiva & rationalis cooriuntur, cumque ad idem objectum tendant inter se consentiunt (§. 908.).

A posteriori difficilius observatur consensus appetitus sensitivi & rationalis, propterea quod plerumque non nisi ex accidente objectum idem tanquam bonum quoad nos nobis repræsentatur & vi sensuum atque imaginationis, & vi intellectus, sive & confuse, & distincte. Consensus autem ordinarius rarissimus est, ita ut *Confucius*, qui ab ineunte ætate id sibi dederat, ut appetitum rationalem constanter sequeretur, omni conatu suo id tantummodo effecerit, ut anno ætatis septuagesimo appetitus sensitivus sua veluti sponte cum rationali consentiret.

Consensus hic maximi momenti est in moralibus & inter summas, quas homini acquirere datum est, perfectiones referri mereatur ita ut arduum sit philosophiæ moralis problema, *appetitum sensitivum reducere ad consensum cum rationali.* Solutionis fundamentum generale continetur in propositione præsentē. Sed problematis tot sunt casus speciales, quot virtutes diversæ, seu quot

sunt appetibilem species, qua habitus morales variant. Unde nobis multum erit in philosophia morali cum hujus problematis solutionibus specialibus negotium.

§. 910.

*Appetitus
sensitivus
rationali
permixtus.*

Appetitui rationali plerumque miscetur sensitivus. Appetitus enim rationalis nascitur ex distincta boni representatione (§. 880.), ita ut feratur in objectum quod beneficio intellectus distincte cognoscimus bonum esse. Enimvero intellectus noster nunquam prorsus purus (§. 315.), adeoque notioni, ex qua objectum bonum judicatur, semper aliquid confusi atque obscuri admiscetur (§. 313.). Quatenus igitur quidpiam confusi admiscetur, appetitio oritur sensitiva (§. 580.). Appetitui adeo rationali plerumque permiscetur sensitivus.

A posteriori veritas propositionis manifesta est. Ponamus nos cognoscere medicamentum aliquod esse salubre, atque nullum nobis de hoc effectu superesse dubium. Appetitus rationalis fertur in medicamentum, hoc est, ob hanc rationem medicamentum istud sumere volumus & ut nobis porrigatur jubemus. Jam ponamus porro nos jam alias usos esse hoc medicamento & mutationem status præternaturalis in corpore a sumto medicamento percepisse atque inde hilares factos exultasse. Quoniam imaginatio hæc omnia simul idea quadam confusa repræsentat (§. 117.); ex hac enata cupiditas (§. 810.) appetitui rationali permiscetur. Immo imaginatio anteriorum reproductrix & memoria eorundem conservatrix ideæ confusæ, qua medicamentum tanquam bonum repræsentatur, occasione rationis distincte agnitæ, quod sit ad sanitatem restituendam convenientissimum, varia adhuc alia pro diversitate subjecti appetentis & circumstantiarum admiscere potest, quæ in appetitum influunt & sensitivum rationali permiscunt.

Videntur hæc repugnare iis, quæ ad propositionem præcedentem dicta sunt de raritate consensus appetitus rationalis cum sensitivo.

rivo. Enimvero levi attentione tollitur dubium. Etenim hac permixtione non obstante fieri potest, ut appetitus sensitivus sit rationali contrarius, veluti si medicamentum fuerit saporis ingrati, ut ab eo abhorreat æger, ita ut idem statim evomat, quando vix ori ingestum fuit, etsi a vide admodum idem appeteret, vel etiam ex odore ingrato iudicium ferens de sapore idem sumere nolit, ut antea vellet. Permiscetur appetitus sensitivus rationali ex alia ratione; eidem vero hoc non obstante contrariatur ex alia. Atque adeo nulla hic contradictio (§. 31. *Ontol.*).

§. 911.

Appetitus fortis dicitur, si ab appetitione nos non facile dimoveri patimur. Eodem sensu *aversatio fortis* dicitur. Dari appetitum & aversationem fortem, nemo ignorat.

Fortitudo appetitus & aversationis.

§. 912.

Quoniam appetitus sensitivus habet gradus (§. 599.), si rationali permiscetur, eundem pro diversitate gradus sui diversimode intendere debet. Atque adeo si appetitus sensitivus rationali permiscetur, consequenter & si cum eodem consentit, atque adeo cum sensitivo ad idem objectum tendit (§. 908.), fortior fit (§. 911.).

Appetitus rationalis per sensitivum intenditur.

A posteriori hæc non minus clarissima sunt, modo ad exempla obvia attendere velimus.

§. 913.

Aversationi rationali plerumque permiscetur sensitiva. Si quid enim aversamur ex ratione, aversationis actus sive nolitio nascitur ex distincta mali repræsentatione (§. 881.), adeoque ea, quæ fit beneficio intellectus (§. 275.). Enimvero intellectus noster nunquam prorsus purus est (§. 315.), adeoque notioni mali, quam habet, confuse aut prorsus obscure percepta insunt (§. 313.). Quamobrem cum ex confusa mali perceptione oriatur aversatio sensitiva (§. 582.); aversatio sensitiva rationali permiscetur.

Aversatio sensitiva rationali permixta.

A posteriori ista permixtio evidentissima est, ubi aversatio

satio

satio sensitiva fuerit tantæ vehementiæ, ut, nondum in affectum sensibilem degeneret, eidem tamen proxima sit.

§. 914.

*Aversatio
rationalis
quomodo
fortior fiat.*

Quoniam *aversatio sensitiva* suos habet gradus (§. 599.) si *rationali* permiscetur, efficit ut id, quod *aversamur*, vehementius *aversemur*, atque ideo non tam facile nos ab *aversatione* abduci patiamur. Quamobrem si *aversatio sensitiva rationali* permiscetur, eam efficit fortiozem (§. 911.).

A posteriori hujus veritatis unusquisque in se experimentum capiens convincitur, modo ad casus quotidie obvios animum advertere voluerit.

Sunt vero rationes plurimæ particulares, cur fortior sit *aversatio rationalis*, si eidem permiscetur *sensitiva*, quam si absque hac fuerit, veluti quod attentio *aversatur* a contraria representatione, quæ sensuum & imaginationis ope fit, atque mentem seu animam in contrariam partem trahit.

§. 915.

*Consensus
aversationis
rationalis
& sensitivæ.*

Consensus rationalis & sensitivæ aversationis est, si versatur circa idem objectum, vel concursus in eodem objecto.

E. gr. Si quis medicamentum *aversatur*, quod ipsi propinatur, quia idem sibi magis nocere, quam prodesse persuasus est, ac præterea idem quoque *aversatur* ob odorem ac saporem minus gratum aliasque rationes in confusa idea medicamenti tanquam mali representati concurrentes; *aversatio sensitiva & rationalis* in eodem objecto concurrunt, adeoque inter se consentiunt.

§. 916.

*Quando is
obtinat.*

Si quid nobis tanquam malum quoad nos & confuse, & distincte representamus, *aversatio sensitiva & rationalis* cooruntur ac *sensitiva cum rationali* consentit. Etenim si nobis quid tanquam malum quoad nos distincte representamus, id nolumus, seu ex ratione *aversamur* (§. 881.). Si quid nobis representamus tanquam malum confuse, *aversationi sensitivæ* locus est (§. 582.). Quamobrem si simul & distincte, & confuse

tan-

tanquam malum quoad nos nobis repræsentatur ; averſatio rationalis & ſenſitiva cooriantur , cumque utraque in eodem objecto concurrat, inter ſe conſentiunt (§. 915.).

§. 917.

Conſenſus appetitus rationalis & ſenſitivi atque conſenſus averſationis rationalis & ſenſitivæ uno nomine dici poſſunt *Conſenſus facultatis appetendi partis ſuperioris & inferioris*. Quodſi una appetit, quod altera averſatur; diſſenſus in appetendo & averſando vocatur *Pugna partis ſuperioris ac inferioris facultatis appetendi*. *Pugna partis ſuperioris ac inferioris*

E. gr. Ponamus ægrotum ſatis ſuperque eſſe perſuaſum, quod medicamentum aliquod ipſi ſit ſalutare. Dum attentionem ad effectum hunc medicamenti dirigit, appetitu rationali in idem fertur. Atat dum odorem ac ſaporem medicamenti ſibi tanquam valde moleſtum repræſentat atque imaginatio repræſentat alios ſtatus præteritos ob odorem ac ſaporem ori ingeſtorum moleſtum nobis tædioſos; confuſa hæc medicamenti tanquam mali quoad nos repræſentatio averſionem ſenſitivam gignit. Appetitus adeo rationalis & averſatio ſenſitiva, ſeu pars ſuperior & inferior facultatis appetendi ſibi mutuo contrariantur & in hac contrarietate, ſeu repugnantia pugna utriusque facultatis conſiſtit.

§. 918.

Si diſtincte tanquam bonum quoad nos repræſentamus, quod *Quando confuſe perceptum malum videtur & contra; pars facultatis appetendi ſuperior cum inferiori pugnat.* Si quid enim diſtincte nobis tanquam bonum quoad nos repræſentamus, appetitus rationalis in idem fertur (§. 880.). Quodſi vero idem nobis tanquam malum quoad nos confuſe repræſentamus; averſio inde oritur ſenſitiva (§. 581.). Pars igitur ſuperior appetit, quod inferior averſatur. Quamobrem ubi diſtincte nobis tanquam bonum quoad nos repræſentamus, quod confuſe perceptum videtur malum; inter partem facultatis appetendi ſuperiorem ac inferiorem pugna oritur (§. 917.). *pugna iſta detur.*

Similiter si quid nobis tanquam malum quoad nos distincte repræsentamus, idem ex ratione averſamur (§. 881.). Quodsi vero idem tanquam bonum quoad nos nobis confuse repræsentamus, appetitus sensitivus in idem fertur (§. 580.). Pars igitur superior averſatur, quod inferior appetit. Quamobrem ubi distincte nobis tanquam malum repræsentamus, quod confuse perceptum videtur bonum; inter partem facultatis appetendi superiorem ac inferiorem denuo pugna oritur (§. 917.).

A posteriori propositionis præsentis veritas manifestissima est: nihil enim frequentius est pugna inter partem facultatis appetendi superiorem ac inferiorem. Exemplum, quod modo ad illustrandam hanc pugnam dedimus (not. §. 917.), eandem aperte confirmat. Quatenus enim cognoscimus, medicamentum nobis esse salutare; idem nobis distincte repræsentamus tanquam bonum. Et ex adverso ubi ob saporem ac odorem molestum idem averſamur, ipsum nobis repræsentamus tanquam malum. Pugna igitur ex eo est, quod idem distincte agnoscimus tanquam nobis bonum, confuse autem perceptum repræsentemus tanquam malum.

Pugnæ huic tribuendum, quod videamus meliora atque probemus, deteriora sequamur. Sed de his plura dicemus in Moralibus suo loco.

§. 919.

Motiva completa & incompleta qualia sint.

Si omnes rationes expendimus, ob quas objectum ad appetendum, vel averſandum propositum judicatur vel bonum, vel malum, *Motiva sunt completa.* Quodsi aliquas tantummodo expendimus, ceteris deinceps demum expendendis, *Motiva sunt incompleta.*

Nimirum objecta appetibilia spectari possunt cum in se, tum sub certis circumstantiis, iisque vel generalibus, vel particularibus seu specialibus. Etenim quæ in se bona sunt, sub certis circumstantiis mala esse possunt, vel etiam meliora fiunt. Et quæ spectatis hisce tan-

tantummodo circumstantiis bona sunt, eadem superaccedentibus aliis mala esse possunt, vel etiam meliora fiunt. E. gr. Tempestate serena exspatiari & membra corporis reficere ambulando sanitati proficuum, atque adeo bonum est. Enimvero idem facere eo tempore quo negotia, quæ moram non ferunt, expedienda sunt, malum est. Quoniam nunquam agimus nisi sub circumstantiis specialibus; exempla plurima deprehendet ad actionum suarum motiva sedulo attentus. Motiva enim incompleta sunt, quamdiu nondum spectantur omnes circumstantiæ, quarum in negotio dato, seu in casu singulari agendi habenda est ratio, ubi omnes officii partes adimplere volueris.

§. 920.

Appetitus rationalis, qui oritur ex motivis incompletis, *Voluntatis* dicitur *voluntas antecedens*: Qui vero oritur ex completis, *in antecedentem & consequentem & consequentem distinguendo.* *voluntas consequens* appellatur. Idem tenendum de averfatione.

Ita si quis intuetur cœlum serenum & blandum aëris tactu percipit calorem, recordatus a Medicis sibi commendatum esse ut exspatiatus deambulando reficiat corpus; exspatiari vult. Enimvero ubi ad animum revocat, quæ jam agenda sunt differri minime posse; exspatiari non vult, sed potius domi manere vult. Antecedens adeo voluntas hic oritur, nondum spectatis circumstantiis particularibus, adeoque ex motivo incompleto: consequens vero nascitur spectatis circumstantiis particularibus, adeoque ex motivis completis (§. 919.).

§. 921.

Si ob circumstantias præsertim particulares, aut speciales malum videtur, quod in se vel sub circumstantiis generalibus spectatum videbatur bonum & contra; voluntas consequens antecedenti contrariatur. Si quid enim in se spectatum, vel sub circumstantiis generalibus videtur bonum, idem volumus (§. 891.). Enimvero ubi spectatis circumstantiis, præsertim specialibus, harum respectu idem malum habetur; quod volebamus jam nolumus (§. 890. 881.). Jam primum motiva erant incompleta (§. 919.), adeoque voluntas erat antecedens (§. 920.), & inde motiva fiebant completa (§. 919.), adeoque voluntas nascebatur consequens (§. 920.).

Paret adeo cum voluntas consequens includat nolitionem ejus, quod voluntate antecedente appetebamus, voluntatem consequentem contrariam esse antecedenti, si ob circumstantias præfertim speciales malum videtur, quod in se, vel sub generalibus spectatum bonum judicabatur.

Non absimili modo idem ostenditur, ubi sub circumstantiis generalibus malum videtur, quod sub aliis specialibus bonum judicatur.

A posteriori idem confirmant exempla obvia, & satisfacit ideæ exemplaris loco, quod modo ad illustrandam differentiam inter voluntatem antecedentem & consequentem in medium attulimus (not. §. 920.).

Principii hujus multus est in philosophia morali usus, præsertim ubi de conscientia agitur.

§. 922.

*Quomodo
recordatio-
ne pristino-
rum moti-
vorum fa-
cultas appe-
tendi deter-
minetur.*

Si quid jam sæpius appetivimus, vel averfati fuimus aliquod objectum, id denuo oblatum statim appetimus, vel averfamur, nulla ratione, cur idem appetamus, vel aversemur distincte expensa. Si quid enim jam sæpius appetivimus, vel averfati fuimus aliquod objectum; idem quoque jam sæpius tanquam bonum, vel malum quoad nos nobis repræsentavimus (§. 892.). Quamobrem oblata occasione idem denuo appetendi, vel averfandi, hoc est, conspecto objecto appetibili, vel averfabili, imaginationis vi simul reproducentur status præteriti, quibus ipsam vel appetivimus, vel averfati fuimus una cum motivis tum expensis (§. 117.) & vi memoriæ nobis conscii sumus, quod jam alias sæpius idem appetiverimus, vel averfati fuerimus, atque motiva expenderimus (§. 175. 181.). Cum adeo nulla adsit ratio, quæ nobis dubium reddat judicium de objecto antè, denuo non inquirimus utrum bonum sit, nec ne, quod ad appetendum proponitur, vel utrum malum sit, nec ne, quod ad averfandum sese ficit (§. 70. Ontol.). Vi adeo pristinorum motivorum, quorum confusa cum statibus præteritis appetentis, vel aver-
fantis

fantis in mente representatio est, id appetimus, quod antea appetivimus, atque averſamur, quod antea averſari fuimus.

Exempla maxime obvia sunt, cum ea, quæ quotidie appetimus, vel averſamur, talia sint, quæ jam sæpius appetivimus, vel averſari sumus. Ita cibo, quem sæpius comedimus, appoſito, nulla facta inquisitione, utrum bonus, an nocuus sit, statim veſcimur, niſi nova quædam ſeſe offerat ratio, cur ab eodem in præſente abſtineamus, veluti cum ferculum palato magis acceptum expectamus, aut cum deſideriis ſtomachi antea latrantis expletis nulla cibi cupiditas nobis amplius ſupereſt.

Ad caſum propoſitionis præſentis præpoſtere provocare ſolent, qui ſibi aliisque perſuadere cupiunt, animam ſine motivis appetere, vel averſari quid poſſe. Motiva enim nulla aſſe arbitrantur, ubi latentia in aprium proferre nequeunt analyſi notionum vires eorum ſuperante, dum deſectu principiorum psychologicorum, tum ignorantia methodi.

§. 923.

Conſuetudo agendi dicitur habitus agendi ex determinati-
one præterita, ſeu ea, quæ ſit vi motivorum præteritorum, qua-
tenus conſuſe perceptorum memoriam habemus. Ex propo-
ſitione autem præcedente liquet, quod *detur agendi conſuetudo.*

Exemplum conſuetudinis iſtius eſt, quando cibo appoſito veſcimur, quem sæpe jam comedimus, nulla facta inquisitione, utrum ſalutaris, an nocuus ſit; utrum bonus, an malus judicari debeat.

§. 924.

Quoniam in conſuetudine agendi motivorum præteri-
torum nonniſi conſuſe perceptorum memoriam habemus (§. 923.), adeoque quæ in iſdem continentur diſtincte non agno-
ſcimus (§. 39.), ubi vero prima vice quid appetimus, vel a-
verſamur, ſine motivis præviis non ſit volitio, nec nolitio (§. 889.), adeoque facta inquisitione utrum quid bonum ſit quoad
nos, an malum (§. 892.); *diſtincte cogniturus, quo modo ap-
peti-*

petitus , vel averfatio nafcatur , ad eos cafus attendere tenetur , ubi aliquid prima vice appetimus , vel averfamur .

Hoc ideo addimus , ut præcipientiam in judicando præcaveamus , & ad veritatem , quæ explorata eft , ex feipfis agnofcendam alios invitemus ,

§. 925.

Simili a libra petito quomodo illuftratur appetitus & averfatio.

Quæ de appetitu & averfatione animæ dicta funt , simili a libra petito illuftrari poffunt . Nimirum in libra tres ftatus a fe invicem diftinguimus , ftatum æquilibrii , ftatum præpondii verfus dexteram & ftatum præpondii verfus finiftram . Status æquilibrii libræ naturalis eft , feu vi structuræ eidem competit , quemadmodum ex Mechanicis conftat & a posteriori per id liquet , quod fibi relicta fit in æquilibrio . Idem vero etiam enafcitur ex ponderum utrinque appenforum æqualitate . Status æquilibrii non tollitur absque ratione fufficiente , per quam intelligitur , cur libra jam potius præponderet , quam in ftatu æquilibrii permaneat . Neque præponderatio fit absque ratione fufficiente , per quam intelligitur , cur libra jam potius verfus partem unam præponderet , quam verfus alteram . Etenim fi ftatus æquilibrii tolli debet , ex parte una appendendum eft pondus majus , ex altera minus , & præponderatio fit eam in partem , ubi majus pondus fuerit appenfum ; vel ponderibus utrinque existentibus æqualibus præpondium adjicitur , & præponderatio in eam fit partem , ex qua eft præpondium . In anima quoque tres diftinguuntur ftatus a fe invicem , nimirum ftatus indifferentiæ , ftatus appetitionis & ftatus averfionis ; aut , ubi cum parte fuperiori tantummodo nobis negotium fuerit , ftatus volitionis & ftatus nolitionis . Status indifferentiæ per fe datur in anima , quamdiu objectum nobis incognitum eft , faltem ignoratur utrum quoad nos fpectatum bonum fit , an malum (§. 587. 889.) . Idem obtinet , fi rationes ad appetendum & averfandum æquipollentes nobis videntur , ut ulla adfit ratio cur appe-

appetitionem præferamus aversioni, seu volitionem nolitioni & contra (§. 70. *Ontol.*). Status indifferentiæ non tollitur in anima sine ratione sufficiente, per quam intelligitur, cur potius objectum datum appetamus, quam aversemur. Etenim si in casu priori ex statu indifferentiæ anima transferri debet ad statum appetitionis, vel volitionis, objectum istud sibi repræsentare debet tanquam bonum quoad se; si vero eadem ex statu indifferentiæ transferenda in statum aversionis, vel nolitionis, idem sibi repræsentare debet tanquam malum quoad se. In casu posteriori, in quo indifferentia speciali nomine indifferentia perfecti æquilibrii dici solet, ratio quædam ex parte una, vel extrinseca, eaque levicula superaccedere debet, ut appetitus flectatur in unam potius partem, quam in alteram (§. 898. 899. 900.). Similitudo igitur consistit in eo, quod non minus in libra, quam anima dentur tres status diversi, quorum unus per se inest, aut in eo casu, quo rationes ad utramque mutationem sunt æquipollentes, quod ex primo non sequatur reliquorum unus nisi posita ratione sufficiente.

Qui simile aliter explicant, illi ultra suum tertium idem extendunt & luxurianti imaginationi indulgent. Qui animam cum lingula sive examine, appetitum cum brachio dextro, aversionem cum sinistro, motiva cum ponderibus, motivis æquipollentibus superaccedentem rationem cum præpondio, modum agendi ponderum in libram cum influxu motivi in animam comparant; talia proferunt, quæ nostra minime facimus & quæ ad lusus verborum referimus.

C A P V T II.

De Libertate.

§. 926.

*Voluntas
quando cogi
dicatur.*

Voluntatem cogere idem est ac vi quadam externa animam determinare ad appetendum, vel averſandum. Dici etiam poteſt, *Voluntatem cogere* idem eſſe ac vi quadam externa eam adigere ad volendum, ſeu vi externa ex anima elicere volitionem. Et ex adverſo *Noluntatem cogere* idem eſſe ac vi quadam externa eam adigere ad nolendum, ſeu vi externa ex anima elicere nolitionem.

Exemplum hujus coactionis in medium proferre non licet, cum nullum detur.

§. 927.

*Num vo-
luntas &
noluntas
cogi poſſit.*

Voluntas & Noluntas non poteſt cogi. Si quid enim velle debemus, id nobis repræſentare debemus tanquam bonum quoad nos, & ſi quid nolle debemus, id nobis repræſentare debemus tanquam malum quoad nos (§. 892.). Enimvero nulla vi externa effici poteſt, ut quid nobis videatur bonum, vel malum: quod nemo in dubium vocare poteſt. Quamobrem nec ulla vi externa effici poteſt, ut quid velimur, vel nolimus. Voluntas igitur & noluntas cogi non poteſt (§. 926.).

Voluntatem non poſſe cogi luculento admodum exemplo in ſe ipſo ſumto probat *Thomas Campanella* Rerum Metaphyſ. part. 2. lib. 9. c. 6. art. 8. f. 198. quod per continuas quadraginta horas torturæ ſubjectus, venis arteriisque circa ſedem tormentorum immanitate difſractis & ingentem ſanguinis copiam emittentibus, referente *Nicio* in *Pinacotheca Imaginum illuſtrium* part. 1. p. m. 43. eo adigi non potuerit, ut ſe perduellionis reum confiteretur. Nolebat vir innocens dicere,

dicere, quæ erant a veritate aliena & famæ viri sapientis ac boni contraria: quod profecto motivum fortius erat dirissimis tormentis, quo eum ad volendum cogere volebant, quod nolebat, irritò plane successu.

Dudum agnovere philosophi acumine præditi voluntatem cogi non posse. Sunt tamen qui sibi persuadent contrarium experientia constare. Ipsam torturam esse medium cogendi voluntatem existimant, & verberibus compelli homines, ut velint, quod antea nolebant ajunt. Quamobrem ne dubium hoc nos moritur, sequentem addere libet propositionem.

§. 928.

Si quis quacunque vi externa, vel minis adhibitis alterum adigit, ut faciat, quod facere nolebat, vel omittat, quod facere volebat; voluntas & noluntas non cogitur, sed nolens vel volens nolitionem, vel volitionem mutat vi motivi ipsi suppeditati. *Causa occasionalis mutationis volitionis ac nolitionis.*
Etenim si quis facere quid vult, id sibi repræsentat tanquam bonum (§. 892.). Quodsi jam vi quadam externa impellitur ad idem nolendum, nec eidem resistere valet; hoc respectu id quod vult sibi repræsentat tanquam malum. Quamobrem cum bonum sit evitare malum, quod nemo non concedit, judicantis arbitrio relictum est, quodnam ipsi potius videatur. Quare si evitatio mali videatur potior, vel, ubi idem jam præsens experitur, liberatio ab eodem; jam agere non vult, quod antea volebat, quod sibi jam tanquam malum repræsentet, quod antea tanquam bonum repræsentabat. Vi igitur motivi ipsi suppeditati (§. 890.) volitionem mutat in nolitionem, seu appetitionem in aversionem (§. 601.).

Similiter si quis facere quid nolit, id sibi repræsentat tanquam malum (§. 892.). Quodsi jam vi quadam externa impellitur ad idem volendum, nec eidem resistere valet; hoc respectu actionis omissionem malam judicat, ipsam vero actionem tanquam medium id, quod sibi molestum est, evitandi, vel a molestiis, quæ ipsi creantur, sese liberandi bonam quoad

se judicat. Quamobrem si malum minus judicat, ob quod quid nolebat, majus vero illud esse censet, quod ipsi creatur ab eo, ad cujus nutum actionem suam componere debet; minus malum pro medio evitandi majus habet, atque adeo illud sub ratione boni appetit (§. 897.). Nolitioem adeo mutat in volitionem, seu aversionem in appetitum (§. 601.), vi motivi ipsi suppeditati (§. 890.).

Quoniam itaque tam in casu priori nolitio, quam in posteriori volitio vi motivi ab anima elicitur, nequaquam vero vi externa, quam anima tantummodo cognoscit *per demonstrata*; voluntatem ac noluntatem minime cogi, si quis vi externa, vel minis alterum adigit, ut faciat, quod facere nolebat, vel omittat, quod facere volebat, palam est (§. 926.).

Idem confirmatur a posteriori. Ponamus Lazarum eleemosynam a Cræso petentem non modo verbis durioribus excipi, verum verberibus ac minis ex ædibus expelli. Quod si jam eleemosynæ petendæ gratia alia vice exit, ac domum Cræsi divitis præterit, qui largas eleemosynas præbere poterat; vellet equidem eleemosynam a Cræso petere, sed minarum recordatus metu verberum eam petere non audet. Hic voluntatem non cogi, ut in Lazari anima invita eliciatur actus noluntatis, non multa attentione cognoscitur. Etenim volitio petendi eleemosynam a Cræso pendet a motivo, quod Cræsus possit ob divitias, quas possidet, largas dare eleemosynas & eas accipere bonum sibi judicet. Nolitio vero petendi eleemosynam a Cræso pendet ab altero motivo, quod sibi metuat a verbis durioribus ac verberibus, adeoque malum judicet durioribus verbis excipi atque plagis affici. Quoniam posterius certum ipsi videtur, prius vero admodum incertum, ita ut de eo desperet; motivum utique posterius prævalere debet, cum manifesta adsit ratio cur prævaleat (§. 118. *Ontol.*). Propositionis præsentis veritas clarissima luce

inde

inde perfunditur quod non semper volens vel nolens cedat motivo a vi extrinseca pendente; sed principio rationis sufficientis (§. 70. *Ontol.*) convenienter idem eveniat, quod conforme est motivo ob rationem sufficientem prævalenti, quemadmodum ex dato modo exemplo manifestum est. Sane *Campanelle* melius videbatur quosvis perperit dolores, quam famæ jacturam facere juxta illud vulgatum:

Omnia si perdas, famam servare memento.

Quamobrem tormentis non cedebat, nec nolitionem in volitionem mutabat.

Atque adeo patet coactionem voluntatis ne concipi quidem posse, nec ullam ipsi respondere notionem. Tumdemum cogi dici posset, si vi externa adigeremur ad eligendum id, quod putatur pejus: quale quidem exemplum nemo adhuc in medium protulit, nec poterit proferre unquam.

§. 929

Si quid appetere, vel averfari debemus, idem ante cognoscere debemus. Si quid enim velle aut appetere debemus, id nobis repræsentare tenemur tanquam bonum, & si quid nolle, vel averfari debemus, id nobis repræsentare tenemur tanquam malum (§. 892.). Quoniam itaque judicare debemus, utrum statum nostrum internum perfectiorem (§. 554.), an imperfectiorem reddat (§. 565.), utrum voluptatem (§. 612.), an tædium creet (§. 613.); objectum utique, circa quod versatur facultas appetendi, præsertim in casu priori, cognoscere debemus.

A posteriori idem palam est. Ponamus te reperire gemmam pretiosissimam, sed non politam, quam talem esse non agnoscis; gemmam istam non tolles, immo ab altero tibi monstratam abjicies, plurimum tibi indignaturus ubi cognoveris esse gemmam quantivis pretii. Immo ponamus adamantem non contemnendam molis ex annulo delapsam in arena a te conspici, dum in suburbio deambulas. Quoniam existimas

esse gemmam factitiam ex vitro constantem, neque adeo eam agnoscis; eandem denuo tollere non cupis. In utroque casu gemmam nec appetis, nec averfariis, quod eam non cognoscis; avide eandem appetiturus, ubi cognosceres. Quodsi morbo quodam laborans videt in prato herbam, quæ remedium adversus eum præsentissimum est; herbam tamen istam non appetit, quod vel ejus virtutem ignorat, vel herbam, cujus ipsi virtus perspecta est, non agnoscit. Denuo igitur ab herba non movetur, quod eam non cognoscit. Et quisnam, quæso, est, qui appetit fructus exoticos, quos ne fando quidem audivit? Eodem modo sese res habet cum actionibus, quarum determinatio in nostra potestate est. Nemo quid agere vult, quod ignorat; neque etiam actionem, quam ignorat, averfatur.

Propositioni huic æquipollet istud pervulgatum: *Ignoti nulla cupido*. Ventriculus digerit cibum, etsi digestionem non cognoscamus. Cor propellit sanguinem in arteriam pulmonariam atque aortam, etsi modum, quod id fiat, ignoremus. Renes urinam secernunt, etsi nobis non constet, quod hoc sit ipsorum officium. Immo ponamus hominem qui ignorat se hæc viscera habere, cum ne fando quidem de iis quicquam audiverit (id quod in infantibus promiscue omnibus recte supponi nemo nescit); hoc tamen non obstante singula suo defungentur munere. Ast appetitus & averfationis animæ longe alia est ratio. Non fertur anima nisi in cognitum, nec fugit nisi quod cognitum. Atque hæc differentia probe perpendenda, ut notionem libertatis intimius perspiciamus, atque fecunditatem hujus principii in Moralibus agnoscamus.

§. 930.

*Actionum
cognitio cur
necessaria.*

Quoniam anima non appetit, nec averfatur incognitum (§. 629.) ; si quam actionem appetere, vel averfari debet, eam ante cognoscere tenetur: si quam vero non cognoscit, eam nec appetit, nec averfatur.

Continetur hoc corollarium tanquam casus specialis sub propositione præcedente: unde hanc a posteriori confirmaturi ad actiones

nes quoque humanas provocavimus, ut adeo a posteriori corollarium hoc jam fuerit confirmatum.

§. 931.

Motiva animam non cogunt ad appetendum, vel averſandum, hoc eſt, non ſe habent per modum viſ externæ, qua in animam agitur, & cui ab anima reſiſti non poſſit; ſed tantummodo proſi- *Motiva quo-*
gant caſum purum. Ponamus enim motiva ſe habere per modum viſ externæ, qua in animam agitur, & cui anima reſiſtere non poſſit. Nemo non novit poſitis iſtis motivis animam neceſſario appetere debere, ac averſari, prouti a motivis vel impellitur ad agendum, vel impeditur, ita ut actionem ſuſpendere & ſe aliter determinare nullo modo poſſit. Enimvero experientia teſtatur, quod ſalvis motivis iſſque ad appetendum ſufficientibus appetitionem mutare poſſimus, ſi alia ex ratione nobis potius videatur actionem aliquam jam omittere, quam committere. Quare coactio intrinſeca per motiva experientia re- pugnat, adeoque admitti nequit.

Enimvero quoniam motiva ſunt ratio ſufficiens volitionis ac nolitionis (§. 887.), nec ſine iſis ulla datur volitio vel nolitio (§. 889.); id motiva efficiunt, ne quid inſit animæ quoad appetendi facultatem, cujus actualitas deſtituatur ratione ſufficiente. Motiva igitur ex anima caſum purum proſi-
 94. *Cosmol.*)

Videbimus in Pſychologia rationali caſum purum ſapientia contrariari, conſequenter ad perfectionem mentis humanæ requiri ut ex eadem exulet: tantum abeſt, ut inde quid detrimenti accipiat.

§. 932.

Anima ſe ipſam determinat ad volendum, & nolendum, Quomodo
motivis ſuis convenienter. Etenim volitio & nolitio nec vi ex- *anima ſe ſe*
 terna elicitur (§. 927. 928.); nec motiva per modum viſ ex- *determines.*
 ternæ in animam agunt (§. 931.). Quoniam tamen præter motiva nil datur in anima, dum appetit, vel averſatur (§. 890. 892.); anima ſemetipſam determinare debet ad appeten-

dum, vel averſandum. Quoniam tamen ſine motivis nec volitio, nec nolitio in anima datur (§. 889.) atque ex motivis intelligitur, cur id potius velimus, quam non velimus, & id potius nolimus, quam non nolimus (§. 888) ; anima ſe ad volendum ac nolendum determinat motivis ſuis convenienter.

Propoſitionis præſentis veritas ex principiis Psychologiæ rationalis clarius adhuc eluceſcet. Hic tamen prætermittenda non fuit, tum quod per eam manifeſtum ſit, quæ a poſteriori de anima innotefcant, & quod experimento in nobismetipſis ſumto confirmari poſſit ſingulis momentis, modo ſufficiente attentione & propoſitionibus, ad quas in demonſtratione provocamus, tanquam notionibus directoribus utamur ; tum quod abſque eo libertatis notio diſtincta formari minime poſſit.

§. 933.

Spontaneitas quid ſit.

Spontaneitas eſt principium ſeſe ad agendum determinandi intrinſecum. Et actiones dicuntur *ſpontaneæ*, quatenus per principium ſibi intrinſecum, ſine principio determinandi extrinſeco, agens eaſdem determinat.

Hinc jam *Ariſtoteles* monuit ſpontaneitatem tribui etiam rebus inanimatis & animantibus brutis, quatenus nempe ſine vi quadam externa ; ſola vi interna per ſe moveri videntur. Ita ignis ſua ſponte moveri dicitur, quod nulla appareat cauſa externa, quæ motum ejus producit. Idem ſua ſponte extingui dicitur, dum a nulla cauſa externa accedente extinguitur. Similiter canis audiens vocem domini ſua ſponte accurrere dicitur, quia ſine cauſa externa in ipſum agente vi ſibi inſita motum pedum producit. Non jam inquirimus in veritatem horum aſſertorum ; ſed tantummodo ad hæc exempla provocamus, quatenus inde patet nos vocabulum in ſignificatu recepto ſumere. Videatur *Goclenius* noſter in *Lexico*.

§. 934.

Volitiones

ac nolitiones quod ſpontaneæ ſint.

Volitiones ac nolitiones animæ ſpontaneæ ſunt. Anima enim ſe ipſam determinat ad volendum, vel appetendum (§. 932.), nec ulla vi externa ad volendum, vel nolendum determinari poteſt (§. 931.). Quoniam vero iſta determinatio ratione ſufficiente non deſtituitur (§. 70. *Ontol.*) ; anima intrinſecum

secum habere debet sese determinandi principium (§. 866. *Ontol.*). Volitiones igitur ac nolitiones animæ spontaneæ sunt.

De hac spontaneitate nemo dubitat, sed ultro eandem animæ tribuit, qui novit termini significatum. Ceterum spontaneitas animæ non tantummodo apparens est, qualis est in gravi, dum spontaneo motu descendere dicitur; sed vera: id quod uberiori luce illustrabitur in Psychologia rationali, quamvis jam ex iis satis evidens sit principiis, quibus ad evicendam veritatem propositionis usi sumus. Patebit vero deinceps spontaneitatem ingredi notionem libertatis. Unde *Aristoteles* quoque ad actionem liberam requirit spontaneitatem, seu ut ipsa sit spontanea.

§. 935.

Volitiones ac nolitiones animæ in se contingentes sunt, ipsi Contingentes etiam motus corporis a voluntate pendentes contingentes sunt *num ac nolitionum & actionum externarum.*
in se. Si quid volumus, id nobis representamus tanquam bonum, & si quid nolumus, id nobis representamus tanquam malum (§. 892.). Enimvero cum motiva sint istæ boni ac mali representationes (§. 890.), motiva vero animam non cogant ad appetendum, vel averſandum (§. 931.), quin potius ubi ratio nobis succurrit, cur potius volitionem omittamus, vel quod volebamus nolimus, volitio cesset, vel ejus loco nolitio nascatur (§. 118. *Ontol.*), & idem eodem modo sese habeat in casu nolitionis; volitiones ac nolitiones mutabiles sunt (§. 290. *Ontol.*), adeoque contingentes (§. 296. *Ontol.*).

Similiter motus corporis, quos anima vult, & qui ad nutum ejus in corpore consequuntur, ita comparati sunt, ut corpus ad eos atque cōpositos iisdem æque dispositum deprehendatur. Ita per structuram corporis æque possibile est, ut jam sedeam, quam ut stem, vel ambulem; ut os aperiam, vel ut idem claudam; ut brachium extendam, vel ut immotum idem detineam. Quoniam itaque motus oppositi æque possibiles sunt, adeoque contradictionem nullam in se involvunt, quatenus scilicet istiusmodi corporis motus sunt (§. 85. *Ontol.*); ideo contingentes sunt (§. 294. *Ontol.*).

Actiões humanas, ad quas pertinent motus corporis a voluntate mentis pendentes, esse contingentes jam monuimus (*not. §. 294. Ontol.*). Ceterum hanc actionum contingentiam ad libertatem requirit *Aristoteles*, ac quod id recte fiat vi propositionis præsentis patet.

§. 936.

*Motus corporis qui-
nam voluntarii qui-
nam involuntarii.*

Motus corporis, qui pendent a voluntate animæ dicuntur *voluntarii*. E contrario *involuntarii* appellantur, qui ab eadem non pendent. Pendent autem a voluntate animæ, quatenus per eam intelligitur, cur jam fiant, seu ratio ipsorum est volitio animæ (§. 851. *Ontol.*).

Ita brachii extensio est motus voluntarius, quando fit anima volente. Sed motus cordis est motus involuntarius, qui fit sive velimus, sive nolimus.

§. 937.

*Cur anima
velit vel
nolit.*

Anima ex possibilibus eligit, quod ipsi maxime placet; & quia ipsi placet, non vult nisi quia ipsi placet quod vult; nec non vult, nisi quia displicet quod non vult. Quando enim anima quid vult, id sibi repræsentat tanquam bonum (§. 892.), atque adeo voluptatem ex eo percipit tanto majorem, quo majus bonum videtur (§. 612.), consequenter non vult, nisi quia ipsi placet quod vult (§. 542.). Similiter quando anima quid non vult, id sibi repræsentat tanquam malum (§. 892.), atque adeo tædium ex eo percipit tanto majus, quo majus malum videtur (§. 613.), consequenter ideo anima quid non vult, quia displicet quod non vult (§. 542.).

Quoniam vero volitiones ac volitiones in se contingentes sunt (§. 935.), adeoque earum oppositum contradictionem nullam involvit (§. 294. *Ontol.*), consequenter æque possibile est (§. 85. *Ontol.*), volitio vero in anima datur, quod ipsi placet quod vult; nolitio autem, quod displicet quod non vult, per demonstrata; ideo anima præfert volitionem & nolitionem utriusque omissioni, seu statui indifferentiæ (§. 883.) quod ipsi placeat.

Simi-

Similiter quando ex pluribus , quæ ipsi bona videntur, unum alteri præfert, id ideo fit, quod illud hoc melius esse judicet (§. 898.). Quare cum ex eo majorem voluptatem percipiat, quod præfert alteri (§. 612.); id præfert, quod ipsi placet (§. 542.), adeoque etiam quia ipsi placet *vi num. 2.*

Immo quia rationibus intrinsicis deficientibus aliquid præfert ob rationes extrinsecas (§. 899.), & ob easdem rationes actionem unam alteri præfert (§. 900.); ideo bonum judicat hoc præferri alteri, vel actionem hanc alteri præferri (§. 892.), adeoque denuo ex hoc agendi modo & electione ita instituta voluptatem percipimus (§. 612.), consequenter hic agendi modus & electio hoc modo facta nobis placet (§. 542.). Anima igitur eligit quod placet, consequenter electionem ita potius instituit, quam aliter, & hoc potius modo agit, quam alio, quia electio ita determinata, & hic agendi modus placet *vi num. 2.*

§. 938.

Lubenter facere dicimur, quando facimus quod nobis placet. *Minus lubenter* vero facere dicimur, quando facimus, quod in se spectatum nobis displicet.

*Lubenter
quando,
quid fiat.*

E. gr. Si nobis offertur occasio inserviendi alteri, quam diu expectaveramus; placet nobis succurrere alteri, cum ex eo voluptatem percipiamus, immo sapius de oblata nobis occasione gaudeamus. *Lubenter facere* hoc dicimur, immo id contestaturi hanc reddimus rationem, quod non sine gaudio hoc faciamus. Enimvero ubi displicet, quod ut faciamus ab altero petitur, id minus lubenter nos facere dicimus. Minus nempe lubenter facimus, quatenus actionem in se consideramus, scilicet quod commendare debeamus hominem commendatione nostra indignum: etsi lubens id faciamus respectu circumstantiarum specialium, quod sic jubeat patronus, quem offendi a nobis consultum non est.

§. 939.

Anima lubenter vult, quicquid vult. Etenim ideo quid *Lubentia* vult, quod ipsi placet, & ex pluribus possibilibus eligit, quod ipsi maxime placet, & quia ipsi placet (§. 937.). Enimvero qui *anima in appetendo* *& aver-* *facit, do evincitur.*
(Wolffii Psychologia.) Uu uu

facit, quod placet, is lubenter id facit (§. 938). Ergo etiam anima lubenter vult, quicquid vult.

A posteriori probatur ex eo, quod cum infantes, qui rationes confusas, ob quas quid appetunt, vel etiam adulti, quando rationem cur quid velint, vel appetant, aut ignorant, aut celant, quaesiti cur id velint, vel cur hoc faciant, respondere soleant: se hoc velle, vel facere lubenter in sermone nobis vernaculo. *Ich will es gerne, ich thue es gerne*, vel brevius: *so gerne*. Ecce vero ita respondent? Sane non alia de causa; quam quod sibi optime conscii sint, quod lubenter id velint, vel faciant.

§. 940.

Volitiones ac nolitiones sunt. Volitiones enim ac nolitiones in se contingentes sunt (§. 935.), adeoque mutabiles (§. 295. *Ontol.*), consequenter salva essentia non inesse possunt (§. 290. *Ontol.*). Quoniam itaque inter modos animæ referendæ sunt (§. 151. *Ontol.*), per essentiam ejus determinatæ non sunt (§. 148. *Ontol.*).

Propositionis præsentis veritas clarius elucescet in Psychologia rationali, ubi ostenderimus, in quonam essentia & natura animæ consistat. Sane si per essentiam determinata esset anima ad has potius volitiones, quam ad alias; motivis opus non haberet, quæ sunt rationes ab objecto petitiæ, adeoque non ab anima volente desumptæ, veluti motus cordis per essentiam ipsius determinatus rationem sui agnoscit in cordis structura, sive essentia, ob quam non alius, quam qui contingit, possibilis.

§. 941.

Libertatis definitio.

Animæ libertas est facultas ex pluribus possibilibus sponte eligendi, quod ipsi placet, cum ad nullum eorum per essentiam determinata sit.

Ad libertatem adeo requirimus volitionum & actionum, quas volumus, contingentiam; intelligentiam objecti appetibilis, vel averfabilis, spontaneitatem ac lubentiam. E. gr. Librum in bibliopolio libere emimus. Eum vero cognoscimus, qualis sit, antequam emendi cupiditas animum incedit. Non minus possibile est, ut librum emamus, quam non emamus; emimus autem, quod is nobis

bis placet, ac lubenter emimus. Quæ igitur in actione libera observamus, ea definitionem libertatis, quam hic damus, ingrediuntur.

§. 942.

Anima in volendo ac nolendo libera est. Antequam enim objectum appetit, vel averſatur, idem cognoscere ſtudet (§. 929.), quodque ſibi placere deprehendit & quod plurimum poſſibile maxime placet, id eligit (§. 937.), ſponte (§. 934.) ac lubenter (§. 939.), per eſſentiam ad volitiones hæſce ac nolitiones minime determinata (§. 940.). Eſt igitur libera (§. 941.).

Libertas anima adstructa.

Iſtiusmodi libertatem animæ competere a poſteriori liquet, quotieſcunque libere agimus, ſeu actionem edimus a voluntate animæ pendentem. Patet id ex eo, quod ad illuſtrandam definitionem adduximus, exemplo (not. §. 941.), ut adeo aliud afferri præterea non opus videatur.

Habemus hic notionem libertatis, qualem nobis ſuggerit experientia. Non fingimus ad arbitrium, quod an animæ inſit oſtendi minime poteſt: ſed tribuimus animæ ea, quorum unusquiſque ſibi conſcius eſt, & quorum obſervatio notionem libertatis animæ invexit. Notio quoque iſta foecunda eſt, quemadmodum in moraliſbus ſuo loco conſtabit. Rationi eadem conformis eſt, cum magno illo principio rationis ſufficientis ſit conſentanea. Tota etiam pragmatica eſt, cum ex hoc fonte omnis Ethicæ praxis fluat.

§. 943.

Libertatis definitio non contrariatur recepto termini ſignificatui. Libertatem definiit D. Thomas per vim ſeu facultatem electivam. Definimus & nos libertatem per facultatem eligendi; quid ſibi vero velit iſta electio clariuſ oſtendimus. Io. Baptiſta du Hamel in Phil. Vet. & Nov. Tom. 2. Phil. mor. Tract. 2. diſp. 3. quaſt. 5. p. m. 98. definitionem Thomæ deſenſurus: Libertatis, inquit, uſus in electione conſiſtit, ac ſublata electione omnis actus libertatis tollitur. Cum enim voluntas ita in objectum propoſitum determinate fertur, ut eo relicto in aliud ſecti non poſſit, aut ſaltem quoad circumſtantias id non ſit aliquo modo indeterminatum, tum nullus relinquitur libero arbitrio locus. Ex noſtris autem principiis patet, animam per eſſen-

Num definitio libertatis fit recepto ſignificatui contraria.

tiam suam non esse determinatam ad volitiones ac nolitiones singulares (§. 940.); sed sponte eligere, quod maxime placet (§. 937.). Atque adeo eadem definitioni nostræ inferuimus, ut esset completa. Monet idem *du Hamel* loc. cit. Libertatem posse definiri per vim sui ipsius determinatricem, quia scilicet voluntas nec a natura, nec a causa extrinseca ad agendum determinata. Nos vero itidem evicimus animam non esse ad volitiones ac nolitiones singulares determinatam (§. 940.), sed semetipsam determinare motivis suis convenienter (§. 932.). Sumimus libertatem pro facultate animæ electiva & sui ipsius determinatrice, quemadmodum vult *D. Thomas* & *du Hamel*: qualis vero sit ista electio & determinatio experientiæ ac rationi convenienter explicamus. Atque adeo certi sumus, nos vocabulum in significato recepto adhibere, quamque eidem assignamus notionem possibilem esse.

Non plura afferimus ad evincendam veritatem propositionis præsentis: sufficit enim ea, quæ de libertate docemus, veritati esse consentanea ac focunda in philosophia morali ac civili principia: id quod suo loco abunde patebit. Nostra philosophia tota quanta pragmatica est, de conformitate notionum cum ratione ac experientia unice sollicita, consensum vero aliorum, vel dissensum parum curans.

§. 944.

Notio libertatis spuria.

Libertas animæ non consistit in facultate sese sine motivis, immo contra motiva sese determinandi. Etenim si sese determinat sine motivis ad volendum, vel nolendum; in anima dari possunt volitiones ac nolitiones absque motivis: quod, cum & rationi, & experientiæ repugnet (§. 889.), absurdum est, consequenter animæ istiusmodi facultas competere nequit, adeoque vera, quæ eidem competit, libertas in istiusmodi facultate consistere nequit.

Ponamus animam sese determinare contra motiva, nulla ratione in contrarium oblata, quæ istis prævalet: id quod hic supponitur. Quoniam motiva objectum nobis repræsentant tanquam bonum quoad nos, vel tanquam malum quod nos (§. 890.); id qui-

quidem nolemus, quod nobis tanquam bonum repræsentamus, at volumus, quod nobis repræsentamus tanquam malum. Objectum igitur aliquod volumus, quatenus malum est; nolemus, quatenus bonum est, non autem malum volumus sub ratione boni, nec bonum nolemus sub ratione mali: quod, cum denuo & rationi, & experientiæ repugnet (§. 896.), absurdum est, consequenter istiusmodi facultas animæ competere nequit, adeoque vera, quæ eidem competit, libertas in istiusmodi facultate consistere nequit.

Inutilis animæ foret istiusmodi libertas, quemadmodum facile perspicit, qui in philosophia morali ac civili hospes non est ac ad negotia humana attentionem affert; immo nocua prorsus foret, cum ipsi nil proderet rationis cultura.

§. 945.

Determinatio animæ ad volendum & nolendum est fundamentum totius philosophiæ moralis atque civilis, seu ideo philosophia moralis & civilis una cum jure naturæ datur, quia anima se per motiva determinat ad volendum & nolendum. In Jure naturæ demonstratur, quænam actiones sint per se honestæ, quænam per se turpes, quodque ad illas committendas, ad has omittendas obligetur homo. Quoniam anima se determinare potest ad volendum, quatenus sibi quid repræsentat tanquam bonum, & ad nolendum, quatenus quid sibi repræsentat tanquam malum (§. 892.), ideo ad committendas actiones honestas, ad omittendas turpes se determinare potest, quatenus cognoscit illas esse sibi bonas, has esse sibi malas. Præscribi adeo ipsi potest lex naturæ, quatenus habet facultatem sese determinandi per motiva, hoc est, quatenus vult, quod sibi tanquam bonum repræsentat; non vult, quod sibi repræsentat tanquam malum. Adeoque ista determinatione admissa possibile est homini præscribi jus naturæ, quod urget actiones per se bonas committendi, per se malas omittendi.

Similiter in Ethica ostenditur, quomodo homo eo perducipossit, ut volitiones ac nolitiones determinet legi naturæ convenienter: ubi enim id sæpius fecerit, habitum sibi acquirit juri

naturæ convenienter actiones suas determinandi, in quo virtutem consistere constat. Jam ubi anima se determinare potest per motiva, repræsentando sibi actionem tanquam bonam, ut eam appetat : tanquam malum, ut eam aversetur; per motiva ad actiones jure naturali præscriptas quomodo determinetur voluntas atque noluntas doceri potest. Ethica igitur possibilis, quia anima se per motiva determinare potest.

In philosophia civili omnia tandem ex eo pendent, quod homines civiliter obligari possint ad aliquid faciendum, vel omittendum. Compellimus vero eos ad obedientiam imperantibus præstandam partim metu poenarum, partim metu executionis; subinde eos excitamus præmiis. Poenæ & executio mala sunt; præmia bona. Cedit poenis, cedit executioni, instigatur præmiis homo, quia se determinare potest ad agendum & nolendum, quatenus quid sibi repræsentat tanquam bonum & tanquam malum. Philosophia adeo civilis datur & constitutio Rerump. possibilis, quia anima se per motiva determinat ad volendum ac nolendum.

Singula hæc suo tempore ex philosophia practica, quam finita Metaphylica dabimus, clarius multo ac evidentius constabunt. Hic tamen consultum duximus monere, quos ferat fructus notio libertatis genuina, ne qui sibi aliisque persuadere nituntur libertatem animæ in eo consistere, quod possit agere sine motivis ac contra motiva, existiment admissa determinatione animæ ad volendum & nolendum per motiva tolli jus naturæ, tolli virtutem, tolli societates civiles, cum potius eadem posita poni possit jus naturæ, poni virtus, poni societates civiles possint; ex eo autem, quod anima velit sine motivis ac contra motiva nemo deducere valeat, quomodo homo vel naturaliter, vel civiliter obligari & ad virtutem fugamque vitiorum perducipossit. Sed plura suo loco.

§. 946.

Quo sensu dici possit animam per se esse indifferentem ad agendum, vel non agendum atque adeo eidem tribui *indifferentia exercitii* cum Scholasticis, & in Annotationibus in Metaphysicam Germanicam docui, & ex iis perspicue docuit

Tbūm.

Indifferentia exercitii.

Thümmigius in Institut, Psychol. empir. §. 152. Nimirum quia anima eligere potest, quod ipsi maxime arridet, vi notionis libertatis (§. 941.), quam ipsi vindicavimus (§. 942.): ideo ex necessitate naturæ suæ determinata non est ad hoc, vel illud agendum, ad agendum hoc vel isto modo (§. 940.). Hoc observantes Scholastici eidem indifferentiam exercitii tribuerunt.

Sive quis voce ista utatur, sive ab eadem abhorreat, nobis quidem perinde est, cum a denominatione nulla pendeat veritas. Neque ulla necessitas est, ut termino isto utamur, cum de ista exercitii indifferentia nihil nobis sit demonstrandum, sed quicquid potius ad facultatem appetitivam spectans demonstrandum venit, id omne deducitur ex lege appetitus & aversionis (§. 904. 907.) ac inde derivatis regulis (§. 909. & seqq.). Lex appetitus ac aversionis est principium rationi & experientiæ consentaneum, omni ævo agnitum & Theologis dudum approbatum.

CAPVT III.

De commercio inter mentem
& corpus.

§. 947.

DE commercio inter mentem & corpus non tradimus, nisi Institutum quæ indubia experientiæ fide constant. Versamur enim *Autoris*, in Psychologia empirica. Quare cum in eam non admittantur nisi ea, quæ de anima per experientiam nobis innotescunt (§. 1.); de commercio quoque inter mentem & corpus tradi hic nequeunt, nisi quæ indubia experientiæ fide constant.

Quæ igitur hic traduntur, ab omni hypothese libera sunt, ac a nemine in dubium vocantur vel vocari possunt, principia inconcussa Ethicæ ac Politicæ, immo Theologiæ, ideo ab hypothesebus separata, ne quid ab earum incertitudine trahere videantur iis, qui non satis acuti sunt.

§. 948.

*Mutatio
mentis a
mutatione
in organis
sensoriis
pendens,*

Si objecta externa in organa sensoria rite constituta agunt; eo ipso momento oriuntur quoque in mente perceptiones, quibus eadem tanquam extra nos representamus. Si oculus obvertitur arbori flores ac frondes tempore verno emittenti, ut lumen in eundem illabi possit; eo ipso momento conscii nobis sumus arboris cum frondibus atque floribus tanquam extra nos præsens certoque intervallo a nobis distantis. Lumen hic inducit mutationem oculo; quæ qualis sit hic non disquirimus, suo tempore in Physica explicanda & experimentis confirmanda: Mens arborem cum floribus ac frondibus sibi representans eandem percipit (§ 24.). Posita igitur mutatione in oculo ponitur perceptio in mente: cessante mutatione in oculo eandem quoque cessare constat. Nullum vero percipitur temporis intervallum inter mutationem, quæ fit in oculo, & inter mutationem in mente contingentem. Obverte enim arbori oculos clausos. Dum eosdem aperis arborem in eodem temporis momento vides. Lumen illico ingreditur in oculum apertum; sed illico etiam vides. Ne minimam igitur morulam observabilem inter mutationem oculi atque animæ intercedere certi sumus: an inobservabilis quædam intercedat, experientia definire nequit. Similiter dum sonus in aurem illabitur, ejus nobis conscii sumus tanquam extus existentis & ubi vox loquentis ad aures defertur, ejus nobis optime conscii sumus, eamque distincte percipimus. Nullius quoque moræ inter mutationem, quæ auri inducitur, suo tempore in Physica explicandam, & inter perceptionem intercedentis nobis conscii sumus: an vero imperceptibilis quædam morula intercedat experientia decidere minime licet. Eodem modo sese res habet cum gustu, cum olfactu, cum tactu: quæ cum notissima sint ut specialibus exemplis illustrentur opus non est. Abunde igitur constat propositionis præsentis veritas.

Coincidit hæc propositio cum lege sensationum, quam supra (§ 85.) explicavimus, ut adeo hic ad eandem provocare potuissimus, nisi

con-

consultum fuisset ea, quæ ad commercium inter mentem & corpus spectant, in propositiones determinatas redacta & ex obviis unicuique observationibus deducta uno quasi obtentu comprehendenda fisti.

§. 949.

Mutationum in organo sensorio & in mente coëxistentia, An præter nullam vero ejusdem ratio, neque in specie actio quedam corporis istarum in mentem observatur. Mutationum in organo sensorio & in mente eodem momento, seu simul nobis conscii sumus (§. 902.), *mutationum coëxistentiam eorum ratio obser-* atque adeo ad perceptiones nostras attenti cognoscimus, eas *vetur.* coëxistere, consequenter coëxistentiam experimur (§. 664. Log.). Sed quantacunque attentione utamur, nullius tamen rei nobis conscii sumus, ex qua intelligere possumus, cur mutatio in mente coëxistat mutationi in organo sensorio, consequenter rationem nullam experimur (§. cit. Log. & 56. Ontol.). Nec in specie nobis conscii sumus ullius actionis corporis in mentem, consequenter nec eam experimur (§. cit. Log.).

Hæc ideo addimus, ut vitium subreptionis evitemus, quod vulgo committitur (§. 668. Log.), ne in Psychologia rationali hoc præjudicio capti in falsas ac spurias hypotheses explicandi commercium inter mentem & corpus incidamus ac pro evidentibus venditemus, quæ nullam evidentiam secum ferunt.

§. 950.

Ex eo, quod actionem corporis in mentem idearum sensualium productricem non experiamur in nobis, inferri nequit, quod corporis in mentem non detur. Quod si enim ex eo, quod actionem corporis in mentem idearum sensualium productricem non experiamur in nobis, inferamus, quod non detur; hoc nitimur principio: illud non dari, quod non experimur seu observare non possumus, dum *An actio corporis in mentem ideo neganda, quod eam non observemus.* contingit. Sed hoc principium esse falsum, nemo non agnoscit. Ex eo igitur non sequitur, corpus in mente sua vi producere ideas sensuales, quod actionem istam non observemus. Vel niti debemus principio hoc altero: Quod in anima non contingat, cujus nobis non sumus conscii. Sed hoc principium non minus a veritate

tate aberrare, ex superioribus non uno modo patet, veluti ex ob-
 scuratione idearum debiliorum per fortiores (§ 82.), ac in Psy-
 chologia rationali contrarium ostendemus.

§. 951.

*Dolorum,
 infirmita-
 rum & las-
 situdinis
 perceptio.*

*Anima percipit dolores ac infirmitates & lassitudinem corpo-
 ris.* Hæc adeo clara sunt & unicuique explorata, ut ad ea con-
 firmanda exemplis nullis sit opus.

Facile apparet propositionem præsentem tanquam casum specia-
 lem sub leg^e sensationum, seu consentiente cum eodem principio
 (§ 948.) comprehendendi.

§. 952.

*Motus ex-
 traordina-
 rii fluido-
 rum in cor-
 pore in
 mente per-
 ceptio.*

*Si sanguis ac fluidum nerveum extraordinario modo commo-
 vetur; confusa quædam in mente perceptio & veluti quædam per-
 turbatio est, quæ motu cessante & ipsa cessat.* Extraordinarius
 iste sanguinis ac fluidi nervei in corpore motus datur, quando
 anima affectibus commovetur (§. 611.), ac inprimis observa-
 bilis est in ira vehementiore atque terrore. Enimvero quis est
 qui nesciat in ira vehementiore confusam quandam perceptio-
 nem adeo occupare mentem, ut vix ac ne vix quidem distincte
 quid percipiat, primo præsertim impetu animum invadente. Im-
 mo quis est qui nesciat terrore mentem adeo percelli, ut quasi at-
 tonita hæreat nec sui ac aliarum rerum extra se sibi amplius con-
 scia sit, sensu velut omni evanescente, ut ideo mens ad se redire
 dicatur, ubi denuo sensu quid a nobis percipi conscii sumus.
 Enimvero si motus sanguinis ac fluidi nervei ad motum ordina-
 rium revertitur, impetu illo extraordinario sedato; iram quo-
 que sedari & terrorem cessare ac mentem ad pristinam status
 tranquillitatem redire observamus. Immo si quis attentionem
 ad istiusmodi mutationes affert, haud obscure observabit tandiu
 perceptionis istius, quæ animam perturbat, quidpiam superes-
 se, quamdiu sanguinis motus extraordinarius non prorsus sedat-
 us, & illam successive languescere, quemadmodum hic succes-
 sive ab irregularitate sua recedit.

Evidentius multo hæc patebunt in Psychologia rationali. Quamobrem ad specialia non descendimus, quæ Medicorum imprimis observationes nobis suggerere poterant.

§. 953.

Quorundam organorum corporis motus statim consequuntur, quando anima eosdem vult; tamdiu durant, quamdiu anima eosdem vult; extemplo sistuntur, quamprimum anima eosdem non vult. Sunt tamen etiam partes quedam corporis vel facile mobiles, quarum nullus ad nutum mentis sequitur motus. *Motus corporis a voluntate anima pendentes.* Nemo non novit me brachium extendere posse, quoties volo, & quamprimum volo. Me manum, dum scribo, una cum digitis movere posse, prouti ex intentione scribendi & illam, & hos movere volo. Motus ille cessat, quamprimum non amplius scribere volo, adeoque nec manus, nec digiti moventur amplius, quamprimum illam cum his amplius moveri nolo. Similiter pedes movere possum, quando libuerit & motum eundem continuare, quamdiu mihi commodum videtur deambulare. Faciem obvertere possum objecto, quod contueri volo. Sed in re manifesta non opus est cumulari exempla. Diximus in superioribus motus istos voluntarios (§. 936.), & eos tanquam experientia claros sine demonstratione, aut probatione admisimus. Quod vero etiam dentur partes corporis, quæ ad nutum mentis non moventur, etsi facilius moveri possint ceteris, quæ mentis imperio subsunt, a posteriori non minus liquet. Cor in continuo motu est: sed motus iste non sistitur, anima motum ejus nolente. Similiter constat, motum cordis accelerari posse ac retardari: pulsus enim, qui eidem congruit, nunc acceleratur, nunc retardatur. Immo ipsa manu acceleratio motus cordis deprehenditur, si eam illius thoracis parti applicemus, sub qua cor later. Nobis tamen volentibus nec acceleratur, nec retardatur cordis motus. Capilli maxime mobiles sunt: anima tamen eos movere nequit, etsi ipsos moveri velit.

Sunt rationes finales, cur quædam corporis partes imperio mentis subjectæ sint, quædam vero eidem minime parent. Sed in eas demum in Teleologia inquirendum nobis erit. Ceterum per istas patet, cur hæ præcise, non aliæ mentis imperio subjiciantur; hæ præcise, non aliæ eidem subducantur.

§. 954.

In quantum ab eodem dependant.

Motus voluntarii in corpore non consequuntur, nisi organis rite constitutis, nec alii consequuntur, quam per structuram organorum ac vires corporis possibiles. Ita si quis fuerit claudus, vitio pedum nonnisi claudicare potest. Talis adeo ad nutum animæ consequitur motus, qualis per structuram organi possibilis. Non possumus obtorto collo respicere quæ a tergo sunt, propterea quod structura colli non fert caput ita moveri, ut facies tergo contermina fiat. Frustraneum hic est mentis imperium. Similiter non possumus currere tanta celeritate, quanta volumus, sed tam celeri gradu progredi debemus, quam ferunt corporis vires. Non possumus tantum tollere pondus, quantum vires corporis permittunt. Musculo dissecto, brachium moveri nequit. Musculo nimis intumescente, pedis impeditur motus. Atque adeo patet, motus voluntarios non consequi nisi organis rite constitutis, quemadmodum ex anterioribus palam est eos esse tales, quales per structuram organorum corporisque vires consequi possunt.

In Physica patebit clarius, quod motus, quales in organis corporis observantur, toti sint per structuram & naturam corporis explicabiles, & quod per ea, quæ corpori insunt, pateat, cur tales potius sint, quam alii. Nimirum ex structura & natura corporis patet, quales sint possibiles motus: per experimenta & observationes constat, non alios unquam existere nisi eos, quos possibiles a priori intelligimus.

§. 955.

Quomodo motus isti pendeant a

Volitionum animæ & motuum in corpore, itemque volitionum ac cessationis motus in eodem corpore coëxistentiam: non autem animæ in corpus actionem, qua motus isti producantur vel

vel *sistantur*, observamus, immo nec ullam observamus rationem, cur ad nutum animæ cieantur & *sistantur*. Quamprimum volumus motus voluntarios, in corpore quoque consequuntur (§. 953.), adeoque existente volitione hujus motus in mente existit etiam motus in corpore. Coëxistentiam adeo volitionis atque motus organi corporis observamus. Similiter quamdiu volumus motum illum continuari, eundem quoque continuari experimur (§. cit.), adeoque cum volitione in mente motus in corpore continuatur: id quod denuo arguit, nos motus in corpore ac volitionis in mente coëxistentiam observare. Enimvero quacunque attentione utaris & quantamcunque aciem in te ipsum convertas, nullius tamen actionis tibi conscius es, qua motum istum, sive dum inchoatur producas, sive dum continuatur continues, sive dum finitur fistas. Nullam igitur actionem animæ in corpus observas. Immo quantaque attentione utaris, nihil in anima observare poteris, unde intelligatur cur jam brachium potius moveatur, quam non moveatur, cur hoc potius modo moveatur, quam alio, nisi quod observes animam velle istiusmodi motum: ex eo autem quod velit non intelligitur, cur potius sequatur, quam non sequatur. Nullam adeo motus istius in corpore rationem sufficientem in anima observare licet (§. 56. *Ontol.*).

§. 956.

Ex eo, quod animæ actio in corpus a nobis non observatur, An sit rejiciendi colligi nequit, quod non detur. Eodem prorsus modo probatur, quo supra probavimus, ex eo, quod actio corporis in animam non observetur, eam rejici minime posse (§. 950.).

Nec *Cartesius* ideo eandem rejicit, quod eam in nobis non observemus, sed vi suæ hypotheseos de essentia animæ.

§. 957.

Anima ignorat modum, quo motus organorum perficitur. Modus, quo constat enim experientia, dissectis musculis & dissectis ligatisque nervis in eum tendentibus, nullum in ea parte corporis

ma igno-
rus.

fieri posse motum, quæ mediante isto musculo movetur. Sed anima ignorat musculos & nervos esse instrumentum, quibus motus perficitur, nisi per experimenta idem didicerit. Immo ignorat modum, quo muscoli & nervi perficiunt organi motum, ita ut hodiernum Physici ac Medici de motu musculorum in diversas abeant sententias

§. 958.

Motuum
voluntario-
rum mira
velocitas.

Multi motus voluntarii continuo variantes in corpore mira velocitate contingunt, quibus respondentes volitiones particulares in anima non observamus. Constat veritas asserti ex sermone per longum temporis spatium continuato; ex motibus brachiorum & manuum tympanum pulsantis; ex motibus pedum aliorumque membrorum corporis secundum artem saltantis, vel etiam inter colloquendum & meditandum deambulantis: ut exempla alia innumera silentio prætereamus.

Abstineat quis hinc inferat, volitiones particulares nullas dari. Id enim inferri non posse liquet ex supra dictis (§. 950.).

§. 959.

Quorum-
nam ratio in
cur oriantur
perceptiones
in mente ex
cur hæc potius
oriantur, quam
aliæ; seu brevius:
Ex mutationi-
bus in organis
sensoriis ratio
reddi potest
continuitatis
temporis,
quo perceptiones
in mente cum
mutationibus
in organo
contingant
& specificationis
earundem
perceptionum.

Ex mutationibus in organis sensoriis ratio redditur, non nam ratio in cur oriantur perceptiones in mente, sed cur jam oriantur & mente ex cur hæc potius oriantur, quam aliæ; seu brevius: Ex mutationibus in organis sensoriis ratio reddi potest continuitatis temporis, quo perceptiones in mente cum mutationibus in organo contingant & specificationis earundem perceptionum. Quoniam enim experientia constat, positis mutationibus in organis sensoriis poni perceptiones in anima & positis his in specie mutationibus in anima poni has in specie perceptiones in mente (§. 948.); ex mutationibus in organo sensorio intelligitur, cur jam potius, quam alio tempore & hæc potius quam aliæ perceptiones oriantur; haud quaquam vero simpliciter intelligitur, cur oriantur seu actu fiant. Quamobrem evidens est ex mutationibus in organis sensoriis rationem reddi non posse cur oriantur perceptiones in mente, sed cur jam hæc potius, quam

aliæ

aliæ oriantur, seu ratio redditur non actualitatis perceptionum, sed specificationis & simultaneitatis seu continuitatis temporis, quo mutationibus in corpore coëxistunt (§. 56. *Ontol.*).

Nedistinctio, quæ in propositione præsupponitur, videatur nimium subtilis, ad eam illustrandum conducunt, quæ alibi jam fufius exposuimus (not. §. 41. 42. & 43. *Cosmol.*).

§. 960.

*Ex volitionibus ac appetitionibus animæ redditur ratio non Quorum-
cur motus in organis corporis fiat, sed cur jam fiat & cur hic potius nam ratio in
fiat, quam alius, seu brevius: ratio continuitatis temporis, quo vo- corpore ex
litiones & motus contingunt, & specificationis motuum horum. anima red-
dipossit.*
Ostenditur propositio eodem prorsus modo, quo antecedentem probavimus (§. 959.).

Per ea, quæ de anima a posteriori innotescunt, nondum intelligitur, num etiam ratio actualitatis perceptionum ex corpore & motuum ex anima reddi possit; non tamen propterea negatur, sed deficiente ulteriori lumine in dubio relinquitur.

§. 961.

*Anima a corpore dependet quoad perceptionum specificationem & tempus, quo contingunt; corpus vero dependet ab anima quoad specificationem motuum voluntariorum in corpore & tempus mutua a se
quo iidem contingunt. Etenim ex mutationibus in organis sen- invicem de-
sionis ratio redditur specificationis perceptionum in anima & pendentia.
continuitatis temporis, quo utraq; mutationes contingunt (§. 959.), & ex volitionibus in anima ratio redditur specificationis motuum voluntariorum & continuitatis temporis, quo illa cum his contingunt (§. 960.). Quoniam itaque aliquid animæ inexistit, cujus ratio ex corpore reddi potest, & vicissim aliquid in corpore contingit, cujus ratio ex anima redditur; anima a corpore & corpus ab anima dependet (§. 85 I. *Ontol.*), & quidem illa quoad specificationem perceptionum, hoc quoad specificationem motuum, ambæ vero substantiæ a se invicem dependent quoad continuitatem temporis mutationum harmonicarum per demonstrata.*

Hæc

Hæc nimirum non alia dependentia experientia magistra constat, quam in Psychologia empirica unice audimus (§. I.).

§. 962.

*Unio animæ
quid sit.*

Dependentia animæ a corpore quoad specificationem perceptionum & continuitatem temporis, a quo cum mutationibus in organis sensoriiis contingunt, & corporis ab anima quoad specificationem motuum voluntariorum & continuitatis temporis, quo cum volitionibus animæ contingunt, *Commercium mentis cum corpore* vocatur.

Quomodo hoc commercium subsistere possit, in Psychologia rationali inquiremus, ubi ratio reddenda eorum, quæ in corpore observantur.

§. 963.

*Unio mentis
cum corpore.*

Quoniam ex mutua illa corporis & animæ a se invicem dependentia intelligitur, corpus illud ad animam & animam ad hoc corpus pertinere (§. 961.), consequenter respectu corporis hanc animam nostram appellamus, prouti hoc corpus respectu animæ nostrum appellare solemus (§. 58.); *utrumque ens unam substantiam compositam constituere inferimus & ideo mentem cum corpore unitam* dicimus.

In quonam unio illa consistat, tum demum patebit, ubi ratio commercii mentis cum corpore a priori manifesta fuerit.

§. 964.

*Regimen
corporis
quale animæ
tribuatur.*

Et quia anima decernit libere motus voluntarios (§. 941.), nec corpus eidem resistere valet, ut motus, quos vult, non sequantur (§. 953.); *anima corpus regere* dicitur: ut adeo per *Regimen corporis*, quod tribuitur animæ, intelligatur facultas ex pluribus motibus voluntariis per structuram corporis possibilibus libere determinandi eum, qui actum consequi debet.

Quæ hic de commercio inter mentem & corpus experientia magistra tradimus, a Theologo, Jcto, Medico & Philosopho in philosophia morali ac civili sufficiunt, quemadmodum suo loco apertius docebimus.

FINIS PSYCHOLOGIÆ EMPIRICÆ.

INDEX

INDEX CAPITUM, CONSPECTUM TOTIUS OPERIS EXHIBENS.

Prolegomena, 1
PARS I.

De Anima in genere & Facultate
cognoscendi in specie.

SECTION I.

De Anima in genere.

Caput 1.

De existentia animæ humanæ, 9

Caput 2.

De modo cognoscendi animam, 16

SECTION II.

De Facultatis cognoscendi parte
inferiori.

Caput 1.

De differentia perceptionum for-
mali, 20

Caput 2.

De sensu, 34

Caput 3.

De imaginatione, 53

Caput 4.

Da facultate fingendi, 90

Caput 5.

De Memoria, Oblivione & Remini-
scentia, 121

SECTION III.

De Facultatis cognoscendi parte
superiori.

Caput 1.

De Attentione & Reflexione, 167

Caput 2.

De Intellectu in genere & differen-
tia cognitionis, 193

(*Wolffii Psychologia.*)

Caput. 3.

De tribus Intellectus operationibus
in specie, 235

Caput 4.

De Dispositionibus naturalibus &
Habitibus intellectus, 337

PARS II.

De Facultate appetendi in specie
& Commercio inter Mentem &
Corpus.

SECTION I.

De Facultatis appetendi parte in-
feriori.

Caput 1.

De Voluptate ac Tædio, nec non
Notione boni ac mali, 387

Caput 2.

De appetitu sensitivo & aversatione
sensitiva, 440

Caput 3.

De affectibus, 457

SECTION II.

De Facultatis apperendi parte supe-
riori & Commercio Mentis cum
Corpore.

Caput 1.

De Voluntate & Noluntate, 663

Caput 2.

De Libertate, 696

Caput 3.

De Commercio inter Mentem &
Corpus, 117

Y Y Y

INDEX

I N D E X

RERUM PRÆCIPUARUM,

IN QUO NUMERI PARAGRAPHOS DENOTANT.

A.		
A bsens quid dicatur,	63	in quo consistat, 336. quomodo juvetur, 337. 338
<i>Absentia</i> corporis in dato loco, 64		<i>Affectus</i> . Definitio, 603. quinam significatus usui loquendi conformis, 604. unde eriantur, 605. quales sint, 606. quid in corpore importent, 611. quando evanescant, 628. cur nunc in eodem subiecto excitentur, nunc non excitentur, 629. cur ab objecto eodem in uno producantur, in alio non producantur, 630
<i>Abstractiones</i> quomodo claræ fiant ac distinctæ,	284	<i>Affectus jucundi</i> quinam sint, 608
<i>Abstractorum</i> scala,	334	<i>molesti</i> quinam sint, 609. quomodo in jucundos mutantur, 631
<i>Abstrahendi</i> facultas. Definitio, 282. exercitium, 283. & seqq.		<i>mixti</i> quinam sint, 610
<i>Acquiescentia in seipso</i> . Definitio nominalis, 749. realis, 751. existentia evicta, 750. qualis sit affectus, 753. 763. effectus, 764. vocabuli significatus receptus,	754	<i>oppositi</i> quando eadem re in diversis subiectis excitentur, 632
<i>Actio</i> quamam nobis in mentem revocer,	112	<i>Amans</i> quando gaudeat, 635
<i>Actio anima in corpus</i> num observetur, 955. num ideo rejicienda, quod non observetur,	956	<i>Amor</i> . Definitio nominalis, 633. definitio realis, 649. quinam significatus vocabuli usui loquendi conformis, 653. qualis sit amor, 635. quomodo oriatur, 645. 646. 647. quando oriatur, 648. cur uniat homines, 660. quando odio repugnet, 683. quando in odium mutetur, 684. quando cum odio simul oritur, 685. quando odium extinguit, vel ab ipso extinguitur, 686. ejus effectus, 634. 640. 642. 651. effectus quidam singularis, 659. signa. 641. 643. 692. 710. 721.
<i>Actio corporis in mentem</i> num observetur, 950. num ideo rejicienda, quod non observetur,	950	<i>Amor animalium</i> num detur, 654. in quo consistat, 657. quinam sit ejus effectus, 656
<i>Actiones appetibiles</i> quamam,	930	<i>Amor</i> .
<i>aversabiles</i> quamam,	930	
<i>præterite</i> quando mentem subeant,	111	
<i>spontaneæ</i> quamam,	933	
<i>Actionum phantasmata</i> quomodo producantur,	111	
<i>Actus reflexi</i> quinam dicantur,	262	
<i>Edificii novi idea</i> quomodo vi imaginationis producat, 149		
<i>Acumen</i> . Definitio, 332. gradus, 335. medium,	333. 342	
<i>Acumen pervidendi abstracta in concretis</i>		

Index Rerum Præcipuarum.

- Amor rerum inanimatarum* num detur, 654. in quonam consistat, 657. quinam sit ejus effectus, 655
- Analysis notionum* quid sit, 339
- Anima humana.* Definitio, 20. existentia. 21. 22. predicata eidem tribuenda, 27. quomodo cognoscatur, 28. diversi ejus status, 45. 47. potestas in claritatem perceptionum 236. actio in corpus num observabilis, 955. an eadem rejicienda, quod non observetur, 956. quæ ipsi inexistencia rationem in corpore agnoscant 959. quænam ejus mutationes a mutatione corporis pendeant, 948. 961. quod sit sui ipsius determinatrix, 932
- Animalium* quando commiseremur, 701
- Animositas.* Definitio nominalis, 847 ortus, 848. ratio, 849. Definitio realis, 850. quinam vocabuli significatus receptus, 851
- Apperceptio.* Definitio, 25. ejus ab arbitrio nostro dependentia, 234
- A priori* quid cognoscatur, 491
- Appetitiva facultas.* Pars inferior, 584. pars superior, 880. 881. quomodo vi pristinorum motivorum determine-
tur, 922
- Appetitionis genesis* quomodo innote-
scat, 914
- Appetitus sub ratione boni* quænam dica-
tur, 895. quando locum habeat, 896
- Appetitus.* Definitio, 579. lex, 904. ob-
jectum, 929. ratio sufficiens, 586.
quomodo a scholasticis dividatur, 583
quo simili convenienter illustretur,
925. quomodo nascatur, 589
- Appetitus regula* quænam dicantur, 902
- Appetitus lex* quænam dicatur, 903
- Appetitus irascibilis* quid sit, 583
- concupiscibilis* quid sit, 583
- fortis* quinam sit, 911
- rationalis.* Definitio, 880.
quando cum sensitivo con-
sentiatur, 908. 909. quando per
sensitivum fortior fiat, 912
- sensitivus.* Definitio, 580. ob-
jectum, 591. 893. gradus, 599.
quando fortior evadat, 595.
quomodo rationalem forti-
orem efficiat, 912. quando
cum rationali consentiat,
908. 909. quando muretur
quoad gradum, 600. quando
in contrarium, 601. 602.
quomodo rationali permif-
ceatur, 910
- Ars characteristica.* Definitio, 294. ob-
jectum, 295. usus in æstimanda pro-
babilitate, 309. usus in rebus memo-
riæ mandandis, 310. & seqq.
- Ars characteristica combinatoria.* Defini-
tio, 297. quomodo per eam veritates
inveniantur, 299. quænam tanquam
cognita præsupponat, 300. cur diffi-
cilis inventu, 301. cur sit lingua &
scriptura universalis, 305. cur sit lin-
gua philosophica, 305
- Ars experimentandi,* 459
- Ars inveniendi.* Definitio, 454. divisio,
455. unde regulas speciales derivet,
474. unde augmentum capiat, 475
- Ars inveniendi artificum* ab imaginatio-
ne pendens quando non fallat, 150
- Ars inveniendi generalis,* 473
- specialis,* 473
- a priori.* Definitio, 461. quæ-
nam præsupponat, 462. & seqq.

Index Rerum Principuarum.

- a posteriori* quid & quotuplex sit, 457
Ars mnemonica quid sit, 204
Ars observandi quid sit, 458
Artificia heuristica. Definitio, 469. necessitas, 470
Artificium memoriae. Definitio, 202. realitas, 201. usus, 203
Artis periti cur ex opere artis maiorem voluptatem percipiant, 531
Assensus per demonstrationes extortus, 19
Assumenda in demonstrationibus, 11
Attentio. Definitio, 237. impedimenta, 241. 238. remedia, 239. 240. gradus, 243. & seqq. quomodo gradus comparantur, 248. quomodo conserventur & amittantur, 254. quomodo perficiantur & conserventur, 255. quomodo ipsa attentio conservetur, 240. 249. quomodo inter plura dividatur, 251
Attentionis directio num sit arbitrii nostri, 256
indifferentia quomodo acquiratur, 252
Attentio diuturna quomodo acquiratur, 250
Audiendi facultas quænam dicatur, 70
Auditus. Definitio, 70
Aversatio. Definitio, 581. lex, 906. obiectum, 929. ratio sufficiens, 586. quomodo nascatur, 590. quo simili illustratur, 925
Aversatio fortis quænam sit, 905
rationalis. Definitio, 881. quando fortior fiat, 914
sensitiva. Definitio, 582. obiecta, 592. 893. gradus, 599. quando fortior evadat, 596. quomodo rationali permisceatur, 911
 quando quoad gradum mutetur, 600. quando in contrarium mutetur, 601. 602. quando cum rationali consentiat, 915. 916.
subtractione mali. Definitio, 895. quando locum habeat, 896
Aversationis regula quænam dicantur, 905
lex quænam dicatur, 906
Aversionis genesis quomodo innotescat, B. 924
Bonum. Definitio, 554. notio confusa qualis, 593. 612. notio erronea, 561. criterium fallax, 560. quando majus appareat, 597. quando appetamus, 891. quando aversemur, 894. 896
Bonum apparens. Definitio, 557. qualis inde voluptas percipiat, 564
animi, 556
corporis, 556
externum, 555
fortuna, 556
internum, 555
verum. Definitio, 557. qualis inde percipiat voluptas, 564
 C.
Calculus in genere quid sit, 298
Claritatis diversitas in simul perceptis, 235
Coëxistentia mutationum in organo & sensationum in mente necessitas, 79
Cogitatio quid sit, 23. qualis sit, 26
Cognitio. Definitio, 51. 52. quando ejusdem evidentiae, quæ est cognitioni existentiae nostræ, 16
Cognitio a priori. Definitio, 434. unde proficiscatur, 438. quando facultates omnes in usum trahat, 439
 ape-

Index Rerum Præcipuarum.

<i>a posteriori.</i> Definitio, 434. quomodo acquiratur, 436	<i>Consensus</i> averſationis rationalis & ſenſitivæ, 915. 916
<i>mixta,</i> 434	<i>Conſequentiæ immediatæ</i> quam rationem agnoſcant, 410. quodnam habeant fundamentum, 411
<i>intuitiva.</i> Definitio, 286. quando confuſa & diſtincta, 287. 288. quomodo in judicando ſe habeat, 349. & ſeqq. quomodo in ratiocinando, 354. & ſeqq.	<i>Conſequentiæ immediatæ</i> ex oppoſitione 411
<i>mentis</i> quomodo acquiratur, 28	ex univerſali negante, 413
<i>particularis</i> quænam ſit, 321	in caſu æquipollentiæ, 414
<i>philophica</i> unde, 499	in caſu converſionis ſimplicis, 415. 416
<i>ſingularis.</i> Definitio, 319. objectum, 320	a diviſis ad compoſita, 417
<i>ſymbolica.</i> Definitio, 289. uſus, 342. 363. 368. cur in judicando & ratiocinando intuitivæ præferatur, 351. 353. cur in ratiocinando, 369. ejus dependentia ab intuitiva quoad primam mentis operationem, 329. reductio ad intuitivam, 312	a compoſito ad diviſa, 418
<i>univerſalis.</i> Definitio, 317. objectum, 318	a rectis ad obliqua, 419. 420.
<i>Commercium mentis cum corpore</i> in quo conſiſtat, 962	<i>Conſuetudo agendi,</i> 923
<i>Commiferatio.</i> Definitio, 687. ſons, 688. defectus, 689. 690. effectus, 693. 697. & ſeqq. cauſa, 694. definitio realis, 695. ſignum, 700. quinam ſit ſignificatus vocabuli receptus, 696	<i>Corpora</i> quænam nobis præſentia, 59. 60. quænam abſentia, 63
<i>Commiferatio erga bruta,</i> in quo conſiſtat, 704	<i>Corporis</i> in loco præſentia, 61
<i>in res inanimatas,</i> in quo conſiſtat, 702. 703	in loco dato abſentia, 64
<i>Concluſio incognita an per ſyllogiſmum inferri poſſit,</i> 403	<i>Corpus ſuum,</i> unde agnoſcatur, 56. 58
<i>Conditionata ratiocinatio</i> qualis, 385. 386. 387	ejus dependentia ab anima, 960. 961
<i>Connubium rationis & experientie,</i> 497	ejus an in mentem actio obſervetur, 950
	<i>Cupiditas.</i> Definitio nominalis, 805. realis, 810. ortus, 806. mater, 807. objectum, 808. 909. 812. quinam vocabuli ſignificatus receptus, 811
	<i>Cupiditas vindictæ</i> quid ſit, 871. cur cum ira conjungatur, 872
	D.
	<i>Definitio</i> quando rei conveniat, 371. quando denegetur, 377. quomodo hieroglyphice repræſentetur, 155
	<i>Deſormo</i> quid ſit, 543
	<i>Deſormitas.</i> Definitio, 548. in quo conſiſtat, 547
	<i>Deſormitas vera,</i> 549
	apparens, 549
	<i>Demonſtrandi habitu</i> quinam polleat, 443

Demonstratio & probatio eiusdem formæ
num disciplinis omnibus conveniat,
399

Demonstrationum qualis certitudo, 17

Demonstratio consummata in cuiusnam
potestate sit, 444

Dependentia perceptionum reprodu-
cendarum a præfente, 109

Desiderium. Definitio nominalis, 852,
realis, 853. significatus vocabuli re-
ceptus, 854

Desperatio. Definitio nominalis, 820.
ratio, 824. definitio realis 825. quan-
do eidem locus, 824. quando ira
permisceatur, 866. quinam vocabu-
li significatus receptus. 826

Difficultas agendi in quonam consistit,
427

Discipline cur per figuras hieroglyphi-
cas iradi possint, 118

Disiunctiva ratiocinatio qualis, 389

Displicere quid dicatur, 542

Dispositio ad agendum, vel patiendum
quid sit, 426

Dispositio acquisita, 429
naturalis, 429

Distincte percepta cur memoriæ facile
inadentur & diu retineantur, 200

Distincta ratiocinatio quænam, 441

Diverfa quando eadem appareant, 87

Dolor. Definitio, 539. num tædii spe-
cies, 541. quinam significatus voca-
buli usui loquendi conformis, 540

Dolorum perceptio, 951
E.

E*lectionis* rationes extrinsecæ, 899.
& seqq.

Empirici in actionibus quinam sint, 502

Enunciabile quid dicatur, 280. quod-
nam sit, 281

Ens fictum quomodo ab imaginatione
producat, 146. quomodo cum rea-
li non confundatur, 147

Error num a ratione proficiscatur, 500

Evigilare quid sit respectu animæ, 119

Exercitium quid sit, 195

Existentia nostra cognitio quo funda-
mento nitatur, 11. quodnam principi-
um agnoscendi habeat, 13. qua certitu-
dine & evidentia nitatur, 14. 15. 16

Expectatio casuum similium quid sit, 503.
cur rationi similis, 504. 505. quan-
do eidem æquipolleat, 507. 508

Experientia & rationis connubium, 497

Experimentum. Definitio, 456

Extensio imaginationis & memoria in
quo consistit, 198 quodnam sit ejus
principium, quinam progressus, 199
F.

F*acultas animæ* quid sit, 29

Facultas abstrahendi. Definitio, 282
exercitium, 283. & seqq.

appetendi, 584

audiendi, 70

cognoscendi. Definitio, 53. pars
superior, 55. inferior, 54

fungendi, 144. 145

gustandi, 72

imaginandi, 92

olfaciendi, 71

sentiendi, 67

tangendi, 73

videndi, 69

Fastidium. Definitio nominalis, 858.
ortus, 859. objectum, 860. quinam
vocabuli significatus receptus, 861

Felicitas. Definitio, 636. quænam ad
eam referuntur, 638

Fiducia. Definitio nominalis, 796. re-
alis, 797

Index Rerum Præcipuarum.

alis, 802. quinam vocabuli significatus receptus, 803
Figmentum quid sit, 170. quo respectu sit ens verum, 171
Figura hieroglyphica. Definitio, 157. inventio, 152. perfectio, 153. 154. vis significandi, 159. usus in representandis definitionibus, 155. & propositionibus, 156. etque in tradendis disciplinis, 158
Figura hieroglyph. primitiva, 160. 161. 163. *derivativa*, 160. 161. 164. 165. *vicaria*, 168. 169
Figura secunda & tertia syllogismorum origo, 401
Fluctuatio animi. Definitio nominalis, 831. realis, 835. ortus, 832. causa, 833. 834. quinam vocabuli significatus sit receptus, 836
Fuga mali. Definitio nominalis, 813. realis, 818. objectum, 816. 814. mater, 815. ortus, 817. quinam vocabuli significatus receptus, 819
Fundamentum cognitionis existentie nostræ quale sit, 11. 12
Juris naturæ, 945
philosophiæ civilis, 945
moralis, 945
Futuritionis cognitio qualis in spe & fiducia, 804

G.

G*audium.* Definitio nominalis, 614. realis, 614. effectus, 615. causa 720. 722. ortus, 616. significatio, 617. mutabilitas in eodem subjecto, 627. cur non in omnibus idem eadem re excitetur, 626. quinam significatus usui loquendi conformis, 618

Gaudium amantis, 635
edentis, 663
 de re inanimata quomodo ab amore ejus differat, 658
 ex bene factis ab altero perceptum, 752

Genus quando rei conveniat, 371
Generum notiones quomodo abstrahantur, 283
signa, 269. 270

Gloria. Definitio nominalis, 765. 766. realis, 769. ortus, 767. 768. effectus, 771. signum, 773. 782. cum pudore cognatio, 781. quinam vocabuli significatus receptus, 770

Gloria doctis quænam placeat, 772
Gradus attentionis quales sint, 243. & seqq. quomodo comparentur, 248. & amittantur, 254. perficiantur & conserventur, 255

Gratitudo. Definitio nominalis, 784. realis, 789. causa, 788. effectus, 786. & seqq. signum, 785. quinam vocabuli significatus receptus, 790

Gustus. Definitio, 72

H.

H*abitus.* Definitio, 428. quomodo acquiratur, 430. conservetur & perficiatur, 431. amittatur, 432. quando cum contrario simul acquiratur, 433

Hesitatio anime in re cognoscenda quando locum habeat, 222. & seqq. ejus gradus, 225

Hilaritas. Definitio, 855. ortus, 856. quinam vocabuli significatus receptus, 857

Historia unde oriatur, 498

Homi-

Index Rerum Præcipuarum.

<i>Homines quales sint in actionibus suis,</i>	<i>Imaginationis regule.</i>	Definitio, 115
501	lex. Definitio,	116
<i>Horror.</i> Definitio nominalis, 837. quando	<i>Imaginatio viva,</i>	478
terroris socius, 839. quando de-	ingeniosi,	479
sperationis, 840. quinam vocabuli	<i>Imaginandi facilitas,</i>	94
significatus receptus,	<i>Indignatio.</i> Definitio realis, 873. diff-	
I.	rentia ab ira, 873. ortus,	877
I <i>dea.</i> Definitio, 48. artificiosa repro-	<i>Indifferentia exercitii,</i>	946
ductio & recognitio,	<i>Indifferentia ad voluptatem vel ædium,</i>	533
<i>Idea reproducta recognitio.</i> Definitio,		
173. lex, 174. obscuritas,	<i>Indifferentia status in anima,</i>	585. 587
<i>Idea</i> mutationibus organorum senso-	<i>Individuum</i> quomodo ad suam speciem	
riorum respondentes,	suumque genus reducatur,	359
<i>Idearum</i> reproducendarum & recogno-	<i>Infelicitas.</i> Definitio, 637. quænam	
scendarum difficultas, 229. impoten-	ad eam referantur,	639
tia,	<i>Infirmittatum</i> corporis perceptio,	951
<i>Idea rei</i> perceptæ sociæ,	<i>Ingenium.</i> Definitio, 476. quando	
<i>Ideæ</i> sensuales,	significatus vocabuli usui loquendi	
<i>Ideæ</i> sensibilibium quomodo reprodu-	conformis,	477
cantur,	<i>Ingeniosi</i> imaginatio qualis,	479
<i>Idem</i> quando appareat diversum,	memoria qualis,	480
<i>Ignorantia</i> animæ circa motum corpo-	<i>Intellectus.</i> Definitio, 275. gradus ob-	
ris,	jectivus, 276. gradus formalis, 277.	
<i>Ignoti</i> cur nulla cupido,	omnium maximus, 278. limitatio,	
<i>Illatio.</i> Definitio,	279. quænam ejus notio usui loquen-	
<i>Illuminatio.</i> Definitio,	di conformis,	316
<i>Imaginatio.</i> Definitio, 92. gradus, 193.	<i>Intellectus purus.</i> Definitio, 313. quan-	
lex, 117. quando sensui æquipolleat,	do purus, 314. cur nunquam prorsus	
98. quando a sensu obsceuretur, 99.	purus,	315
quando majorem claritatem haber,	non purus. Definitio,	313
101. 102. quorumnam ideas clariores	<i>Inventores</i> cur ingenio opus habeant, 481	
producat, 103. quorumnam ideas re-	<i>Inventores primi</i> quibus principiis usi,	
producat, 104. & seqq. quomodo se-	464	
riem perceptionum continuet, 110.	<i>Inventoris</i> requisita,	462. & seqq.
quomodo entia ficta producat, 146.	<i>Invidia.</i> Definitio, 705. fons, 706. 707.	
quando sese arbitrio nostro subducatur,	absentia, 708. 709. objectum, 733.	
172. quomodo vires ejus extendan-	effectus, 712. 716. causa, 713. definitio	
tur, 197. 198. quænam ejus vi cognos-	realis, 714. signum, 717. 718. cur	
cantur, 437. quomodo attentionem	odium comiteretur, 724. quando vo-	
impediat,	cabu-	
241. 242		

Index Rerum Præcipuarum.

cabuli significatus usui loquendi conformis,	715	<i>Lassitudinis</i> corporis perceptio,	951	
<i>Invidia</i> adversus animalia bruta. Definitio,	725. causa,	726. 729	<i>Legitima ratiocinatio</i> quænam dicatur,	372
<i>Quasi Invidia</i> erga rem inanimatam,	727. 728	<i>Leibnitius</i> quem in notionibus explicandis secutus,	not. §. 76	
<i>Ira</i> . Definitio nominalis, 862. realis, 868. affectus eidem permixti, 863. & seqq. quinam vocabuli significatus usui loquendi conformis,	870	<i>Lex appetitus</i> . Definitio, 903, qualis sit, 904	<i>aversationis</i> Definitio, 906. qualis sit,	907
<i>Ira vehementia</i> unde, 867. quando vehementens ex levi causa,	869	<i>imaginationis</i> , Definitio, 116. qualis sit,	117	
<i>Ira</i> ob injuriam alteri factam, 874. 875.	876	<i>perceptionum</i> . Definitio,	84	
<i>Irrisio</i> . Definitio nominalis, 730. objectum, 731. 732. effectus, 736. 737. signum, 738. ortus, 740. 735. ratio, 739. definitio realis, 741. quando præter rationem detur, 747. 748. gradus summus, 746. quinam ad eam pronus, 734. quinam vocabuli significatus usui loquendi conformis,	742	<i>phantasmatum</i> . Definitio, 116. qualis sit,	117	
<i>Judicii affirmativi</i> actus in cognitione intuitiva,	343	<i>ratiocinandi</i> . Definitio,	373. qualis sit pro ratiociniis affirmativis, 374. qualis pro negativis,	384
<i>Judicii negativi</i> actus in cognitione intuitiva,	345. 346. 347	<i>ratiociniorum disjunctivorum</i> , 390	<i>ratiociniorum hypotheticorum</i> , 388	
<i>Judiciorum categoricorum</i> applicatio,	360	<i>sensationum</i> . Definitio, 84. qualis sit,	85	
<i>hypotheticorum</i> applicatio,	361	<i>Legum demonstrationis & seriei perceptionum continuationis</i> identitas, 395	<i>Libertas animæ</i> . Definitio, 941. evictio, 942. notio spuria, 944. quinam significatus recepto conformis,	943
<i>Judicium</i> quale in cognitione symbolica,	350	<i>Lingua exotica</i> quomodo addiscantur,	274	
<i>Judicium contingens</i> quale in cognitione intuitiva,	347. 349	<i>Lingua philosophica</i> . Definitio,	303. unde pendeat,	306
<i>determinatum</i> in cognitione intuitiva,	348	<i>universalis</i> . Definitio, 302. quænam præstantissima, 307. quando absque Lexico addisci possit,	308. unde pendeat,	305
<i>Jus natura</i> unde principia hauriat, 6. quo fundamento nitatur,	945	<i>Lingua vernacula</i> quomodo addiscatur,	274	
L.		<i>Logica</i> unde principia hauriat,	9	
L <i>Abilitas memoria</i> ,	209	<i>Lubentia</i> ,	938	
(<i>Wolffii Psychologia</i> .)		<i>Lumen animæ</i> quid significet,	35	
		Zz zz	M. Ma	

Index Rerum Præcipuarum.

M.		& difficultas, 187. medium, 196. ob-		
Malum.	Definitio, 565. notio confu-	jectum,	200	
	la qualis, 594. quando appetamus,	Memoria retinere quid sit, 180. quando		
	894. quomodo appetamus, 896. quod-	quid retineamus, 181. diu quid reti-		
	nam majus videatur, 613. criterium	neatur, 188. medium diu retinendi,		
	fallax, 572. notio erronea,	196. objectum,	200	
Malum apparens, 568. quale tedium in-	in Memoriam revocare quid sit,	228		
de percipiatur,		Mens humana. Definitio,	20	
animi,	567	Melius cur alteri præferatur,	898	
corporis.	567	Metus. Definitio nominalis,	820.	
fortunæ	567	realis, 822. objectum, 821. quando		
externum,	566	iræ permisceatur, 865. quinam si-		
internum,	566	gnificatus usui loquendi confor-		
Memoria. Definitio, 175. notio imagi-		mis,	826	
naria, 177. gradus, 193. differentia		Minus malum quando appetamus, 897		
in diversis subiectis, 182. & seqq. ve-		Mnemonicæ qualis sit ars,	204	
locitas & tarditas, 186. adminicula		Modi cognoscendi quotuplices	435	
ab arte characteristica combinatoria		Motivum, Definitio, 887. usus, 888.		
expectanda, 310. & seqq. an ideas re-		necessitas, 889. in quo consistat,		
producat, 176. quando non satis fida,		890. num cogat appetitum vel		
232. & seqq. quando fallat, 207.		aversionem,	931	
quando labatur, 207. quomodo ex-		Motiva completa,	919	
tendatur,	197. 198.	incompleta,	919	
Memoria magna. Definitio, 192. men-		Motus voluntarii. Definitio,	936.	
sura,	194	quod dentur, 953. 954. quibus vo-		
naturalis & artificialis,	205. 206	litiones observabiles non respon-		
bona. Definitio, 189. gradus, 190.		deant,	958	
mensura.	191	N.		
Memoria qualis ingenioso,	480	Natura inesse quid dicatur,	425	
Memoriæ artificium. Definitio,	202.		Nexus perceptionum unde sit,	113
usus,	203		rerum a nexu perceptionum inde-	
labilitas	209		pendens,	114
lapsus. Definitio, 207. possibili-			recognitionis & reproductionis	
tas, 208. causa,	210		idearum,	212
subsidium in retinendis abstractis,			Noluntas, Definitio, 881. objectum, 892.	
	285	quando cogi dicatur, 926. num pos-		
Memoria mandare quid sit, 178. quomo-		sit cogi, 927. quinam significatus usui		
do quid mandetur, 179. mandandi		loquendi conformis,	886	
subsidium, 310. mandandi facilitas		Nolitio. Definitio, 882. quid non sit, 884.		

Index Rerum Præcipuarum.

in quo consistat, 885. ratio, 937. spontaneitas, 934. num per essentiam animæ determinatæ, 942
Notitionis mutata causa, 928
Notitionum coarctationis, 935
Nomen quando rei vindicetur, 362. 354. & seqq. quando denegetur, 375. 376
Nota res solubiles. Definitio, 162. hieroglyphica repræsentatio, 166
irresolubiles. Definitio, 162. hieroglyphica repræsentatio, 164
Notio. Definitio, 49. Differentia, 50. quomodo ex ratiociniis oriatur, 391
Notionum analysis, 339
Notionum generalium usus, 338
Notiones adæquate quomodo hieroglyphice repræsententur, 167
complexæ, quomodo a iudiciis differant, 352
confuse quando rei denegentur, 375
distinctæ quomodo hieroglyphice repræsententur, 164
particulares Definitio, 321. obiectum, 322
Notionum ontologicarum usus, 337
Notiones psychologicas quinam investigare possit, 9

O.

Objectum sensibile. Definitio, 77. species, 77
Oblitio. Definitio, 215. obiectum, 217. limites accurati, 216. dependentia ab arbitrio nostro quanta sit, 218. quænam non noceat habitui acquisito, 453
Oblivioni traditorum recognitio, 232
Observatio. Definitio, 456
Optimum. Definitio nominalis, 661. reals, 677. ortus, 662. 673. 674. effectus, 664. 670. signum, 665. 668. 711.

717. 719. 723. deficientis signum, 710. 691. in amorem mutatio, 684. cur amori repugnet, 683. cur invdiam comitetur, 724. quomodo in indignatione sese habeat, 878. quando in eadem prædominetur, 879. quinam significatus vocabuli usui loquendi conformis, 678. quando cum amore simul oriatur, 685. quando amorem exstinguat & ab eodem extinguitur, 686
Odium rerum inanimatarum & animalium. Definitio, 682. in quo consistat, 679. effectus, 680. 681
Olfactus. Definitio, 71
Ordo cogitandi in demonstrationibus, 396
in probatione probabili, 397
in probatione omni, 398
Organum sensorium. Definitio, 66
Operationum intellectus numerus, 325
Operationis intellectus primæ usus in cognitione intuitiva, 326

P.

Per accidens quid ex altero sequatur, 575
Perceptio. Definitio, 24
Perceptiones quænam ab imaginatione producantur, 107
Perceptiones rerum materialium unde pendeant, 57
Perceptionum continuatio, no. 393. 394
forma ab arbitrio animæ in dependens, 78
nexus unde sit, 113
regulæ, 83
reproductio quomodo facilitetur, 107. 108
repro-

Index Rerum Præcipuarum.

reproducendarum dependen-		<i>regule,</i>	115
tia a præsentē,	109	<i>successio,</i>	110
<i>Perceptio clara.</i> Fundamentum,	30.	<i>Philosophia civilis,</i> fundamentum,	945
Definitio,	31	<i>moralis</i> fundamentum,	945
<i>composita.</i> Definitio, 40. quan-		<i>practica</i> unde principia hau-	
do distincta,	41	riat,	8
<i>confusa.</i> Fundamentum,	37	<i>Placere</i> quid dicatur,	542
Definitio,	39	<i>Penitentia.</i> Definitio nominalis,	755.
<i>distincta.</i> Fundamentum,	37.	realis, 759. in quo consistat,	756. effe-
Definitio, 38. gradus,	42.	ctus, 758. 762. quando ex facto alie-	
quando locum habeat,	266.	no enascitur, 757. quando iræ permi-	
quomodo acquiratur,	267	sceatur, 864. quinam vocabuli signifi-	
<i>obscura.</i> Fundamentum,	30.	catus loquendi usui conformis,	760
Definitio, 32. num eidem in-		<i>Potentia</i> perceptiones combinandi,	141
fiunt clare percepta, 33. num		dividendi,	141
ipsa percipiatur clare,	34	<i>Prædicata</i> quomodo rebus vindicentur,	
<i>partialis.</i> Definitio,	40		362
<i>totalis.</i> Definitio, 43. quando		<i>absoluta</i> quando rei denegentur,	
distincta, 44. quando obscu-			379
ra,	46	<i>hypothetica</i> quando rei denegen-	
<i>universalis</i> quomodo acquiratur,	268	tur,	380. 381
<i>Perfectio.</i> Definitio, 510. Divisio,	510	<i>Prædominium</i> voluptatis,	529
<i>Per se</i> quid ex altero sequatur,	574	tertiæ,	529
<i>Phantasma.</i> Definitio, 93. claritas qua-		<i>Præsentia animi</i> quomodo acquiratur,	
lis, 95. an oriatur sine prævia sensa-			253
tione, 106. lex,	116	corporis in loco,	61
<i>Phantasmata</i> cur arte representari pos-		corporis nostri,	62
sint, 148. cur diversa in eodem sub-		<i>Præmentis operatio</i> qualis in cogni-	
jecto ex eadem sensatione propagan-		tione symbolica, 328. in quonam	
tur, 131. quando ab ideis sensualibus		consistat, 330. ejus limites,	331
distinguantur, 97. cur diversa in di-		<i>Principium moderandi</i> actiones huma-	
versis subjectis ex eadem sensatione		nas,	501
nascantur,	130	<i>Principium reductionis,</i>	472
<i>Phantasmata actionum</i> quomodo pro-		<i>A priori</i> quid cognoscatur,	491
ducantur,	111	<i>Pristinorum motivorum</i> effectus,	922
<i>Phantasmatum compositio,</i>	142. 143	<i>Probabilitatis</i> æstimandæ medium,	309
divisio,	133. 138. 139	<i>Probationis & explicationis</i> sufficientis	
lex,	116. 117	nexus,	447
		<i>Profunditas intellectus.</i> Definitio, 340.	
		gradus,	

Index Rerum Precipuarum.

gradus, 340. medium, 342. quomodo gradus æstimentur, 341
Promptitudo agendi, 428
Propositionum hieroglyphica representatio, 156
Propositionis incognita ex cognitis formatio, 364
Propositiones particulares quando condecenda, 323. quinam earum usus in probabilibus, 324
Psychologia empirica. Definitio, 1. quomodo cognoscatur, 2. usus varii, 4. & seqq.
Psychologia rationalis. Unde principia hauriat, 4. quomodo empiricam perficiat, 5
Psychologici studii, 10
Pudor. Definitio nominalis, 774. 775 effectus, 776. 778. quinam ad eum pronus, 777. definitio realis, 779. quando iræ permisceatur, 863. quinam significatus recepto conformis. 780
Pugna partis superioris ac inferioris facultatis appetendi, 917. 918.
Pulchritudo. Definitio, 545. in quo consistat, 544
Pulchritudo vera, 546.
apparens, 546
Pulchrum quid sit, 543
Pusillanimitas. Definitio nominalis, 841. realis, 844. ortus, 842. casus specialis, 845 quinam significatus recepto conformis, 846

Q.

Q *Uasi invidia erga rem inanimatam*, 727. 728

R.

R *Atio*, Definitio, 483 gradus, 488 489. differentia ab experientia, 490. connubium cum experientia, 497
Ratio pura, 495. 496
non pura, 495
Rationis analogum quid sit, 506
defectus unde agnoscatur, 493. beneficium quomodo quid agnoscatur, 494
Rationi conforme quid sit, 485. 486
contrarium quid sit, 485. 487
Rationales in actionibus quinam sint, 502
Ratiocinatio. Definitio, 366. in quo consistat, 367. quando fiat, 383
Ratiocinatio conditionata qualis, 385. 386.
legitima quænam, 372
disiunctiva qualis, 389
distincta qualis, 441
Ratiocinia nascentia, 354. & seqq.
distincta, 356
Ratiociniorum symbolica expressio, 368.
effectus, 370. 382 usus in explicanda successione idearum, 392
Recognitio idearum. Definitio, 173.
lex, 174. quando dubia, 219. 222. & seqq.
Recognitionis iterata ratio, 213. 214
Reductio heuristica quo fundamento nitatur, 471
Reflexio. Definitio, 257. usus, 258. ambitus, 266. impedimenta, 264. medium, 265
Reflexio animæ super se ipsa, 261
promiscua quomodo acquiratur, 263
Regimen corporis quale animæ tribuendum, 964
Regu-

Index Rerum Præcipuarum.

<i>Regule appetitus,</i>	902	<i>Sensibilia</i> quænam clarius imaginemur	103
<i>imaginationis,</i>	115	<i>Sensibus</i> grata quando fastidiamur,	860
<i>perceptionum,</i>	83	<i>Sensur.</i> Definitio, 67. numerus,	68
<i>ratiocinandi,</i>	372	<i>Signa</i> ad res occultandas apta,	291
<i>sensationum,</i>	83	ad inveniendum apta,	293. 296
<i>Reminiscentia.</i> Definitio, 230. medi-		ad distincte exprimendas notio-	
<i>um,</i>	231	nes rerum apta, 292. ad com-	
<i>Rei meminisse</i> quando dicamur, 126		pendiosam scripionem apta,	290
<i>non meminisse</i> quando dicamur, 127		<i>Signa derivativa</i> qualem significatum	
<i>Rerum perceptarum collatio.</i> Definitio,	259	habeant in arte combinatoria cha-	
<i>Risus</i> quando nascatur, 743. quando		racteristica, 304. qualem usum ha-	
<i>cum irrisione</i> conjungatur, 744.		beant in eadem, 305. 306. 309	
<i>quando alios rideamus,</i>	745	<i>Significatus hieroglyphicus,</i>	151
<i>S.</i>		<i>Solida doctrina.</i> Definitio, 448. me-	
<i>Sanguinis motus</i> extraordinarii per-		ihodus eidem conv. niens, 449. ejus	
<i>ceptio,</i>	952	<i>possessor,</i>	450
<i>Schaden</i> frohe quinam dicatur, 746		<i>Soliditas.</i> Definitio, 440. gradus, 442.	
<i>Scientia</i> quanta nobis sit, 451. quarum		<i>effectus,</i>	444. 445
<i>nullam</i> habemus, 452. unde sit, 498		<i>Solidus</i> quinam sit,	446
<i>Scriptura universalis.</i> Definitio, 302.		<i>Somnium,</i> quid sit, 120. 121. a qua fa-	
<i>unde</i> pendeat,	305	cultate mentis proficiscatur, 122. quo-	
<i>Sensationes.</i> Definitio, 65. quando eæ-		modo incipiat & continuetur, 123.	
<i>dem,</i> 86. quando diversæ, 88, quo-		126, quomodo res in eodem appa-	
<i>modo</i> impediuntur, 80. 81, quomo-		reant, 127. quale sit, 128. unde sit di-	
<i>do</i> debilitentur, 82. regulæ, 83. lex,		<i>versitas</i> somniorum ejusdem initii,	
84. 85. quando ideas imaginationis		129. 133. quom. do extinguatur, 134.	
<i>obscreant,</i> 99. quando clariores sint,		135. quando sit obscurum,	136
100. quando voluptatem pariant, 550.		<i>Somniorum</i> diversitas, 124. 129. 133	
<i>quando</i> tædium pariant, 551. quod		<i>Somnium clarum,</i>	137
<i>cum</i> mutationibus in organo neces-		<i>compositum,</i>	125
<i>sario</i> coëxistant, 79. cur attentionem		<i>obscurum,</i>	137
<i>impediant,</i>	238	<i>simplex,</i>	125
<i>Sensationis debilitata</i> effectus, 132. 133		<i>Somnus</i> quid sit respectu animæ, 118. 119	
<i>Sensatio fortior.</i> Definitio, 74. effe-		<i>Somnus profundus</i> quomodo differat a	
<i>ctus,</i>	76	<i>communi,</i>	119
<i>debilior.</i> Definitio, 75. quomo-		<i>Species</i> quando rei conveniat,	371
<i>do</i> obscretur,	76	<i>Spe-</i>	

Index Rerum Precipuarum.

Specierum notiones quomodo abstrahantur, 283
 signa, 269. 270
Speciosa generalis quid sit, 297
Spec. Definitio nominalis, 796. obiectum, 797. 798. ortus, 799. definitio realis, 800. gradus, 801. quinam vocabuli significatus receptus, 803
Spontaneitas. Definitio, 933
Spontanea actiones quando sint, 933
Status mentis ex aliis nascens per imaginationem, 422. per syllogismos, categoricos, 404. 405. hypotheticos, 406. disjunctivos, 407. per consequentiam immediatam, 421
Status perceptionum distinctarum quinam sit, 45
Status perceptionum obscurarum quinam sit, 47
Status praesens mentis quomodo ex aliis enascatur, 405. quomodo gravis futuri, 408. 409. 423. 424. quomodo impraegnatur, 408
Syllogismi cryptici ortus, 401
Syllogismorum forma cur in demonstrationibus lateat, 400. usus in ortu statuum mentis explicando, 405. & seqq. usus in inveniando, 465. & seqq.

T.

T*actus.* Definitio, 73
Tadium. Definitio, 518. constantia, 520. gradus, 521. 522. mutabilitas, 571. 627. mutatio, 534. quale sit

ens, 535. quando cum voluptate coëxistat, 526. in qua perceptione consistat, 536. quando adversus voluptatem praevaleat, 527. quando non percipiatur, 528. cur ex mali cognitione percipiatur, 560. quando ab eo ad voluptatem valeat argumentatio, 666. quomodo ex malo apparente sequatur, 576. quomodo ex bono sequatur, 577. 578. quando majus appareat, 598. num affectus species sit, 617. quinam vocabuli significatus receptus, 519

Tadium mixtum quale sit, 525
Tadia sensuum quænam sint, 553
Tenebra anima quid significant, 36
Terror. Definitio nominalis, 827. realis, 829. quinam vocabuli significatus receptus, 830. quando iræ permisceatur, 865
Terror desinens qualis, 828
Tertia mentis operatio, 366
Theologia naturalis unde principia hauriat, 7
Timor. Definitio, 823. quinam vocabuli significatus receptus, 826
Tristitia. Definitio nominalis, 619. realis, 623. qualis sit, 620. unde oriatur, 621. cujusnam sit signum, 622. quinam vocabuli significatus usui loquendi conformis, 625

V.

V*Acillatio animi,* 830
Veritas quomodo a priori eruat, 460. 466. & seqq.
Veri-

Index Rerum Præcipuarum.

<i>Veritatum geometricarum evidentia</i> , 18	<i>Voluntas antecedens.</i> Definitio, 920.
<i>universarium nexus</i> , 482	quando consequenti contraria, 921
<i>Visio</i> quomodo olim divisa, 76	<i>consequens.</i> Definitio, 920. quan-
<i>Visus.</i> Definitio, 69	do antecedenti contraria, 921
<i>Universarium</i> intuitiva cognitio, 327	<i>Voluptas.</i> Definitio, 511. constantia, 513.
<i>Unio animantium se mutuo</i> , 660	gradus, 516, 517. mutatio, 534. quan-
<i>Unio anime cum corpore</i> , 963	do adversus radium prævaleat, 527.
<i>Vocabulum.</i> Definitio, 271. vis signifi-	in qua perceptione consistat, 536.
candi, 272. 273	quando non percipitur, 528. cur ex
<i>Vocabulum essentialiter significans.</i> De-	eadem re ab omnibus non eadem
finitio, 303	percipitur, 530. uum sit affectuum
<i>Volitio.</i> Definitio, 882. quomodo na-	species, 607. quomodo ab ea ad ra-
scatur, 891. num sit spontanea, 934.	dium valeat argumentatio, 644. 666.
quinam vocabuli significatus rece-	quænam ex cognitione & inventio-
ptus, 886	ne veritatis percipitur, 532. qua-
<i>Volitionis mutata causa</i> , 928	nam ex cognitione boni, 558. 559.
<i>Volitiones</i> num sint per essentialiam ani-	612. quinam vocabuli significatus
mæ determinate, 940	usui loquendi conformis, 512
<i>Volitionum contingentia</i> , 935	<i>Voluptas apparens.</i> Definitio, 514. mu-
lubentia, 938	tabilitas, 562. mutatio, 563. cum ve-
spontaneitas, 934	ra confusio, 537-538
<i>Volitionis omissio</i> quid denoter, 883	<i>mixta.</i> Definitio, 523. orrus, 524
<i>Voluntas.</i> Definitio, 880. objectum,	<i>simplex</i> , 523
892. quomodo cogi dicatur, 926.	<i>vera.</i> Definitio, 514. qualis sit,
num cogi possit, 927. quinam vo-	515
cabuli significatus receptus, 886	<i>Voluptates sensuum</i> quænam sint, 552

INDICIS FINIS.









